

海国图志

魏源

文硕阁

wenshuoge.com

目录

关于我们	4
原叙	6
后叙	8
卷二	9
卷四	19
卷十	22
卷十三	30
卷十五	43
卷十六	54
卷十七	62
卷十八	79
卷十九	88
卷二十	99
卷二十一	114
卷二十二	121
卷二十三	132
卷二十六	140
卷二十七	149
卷二十八	161
卷三十一	170
卷三十四	185
卷三十五	201
卷三十六	208
卷三十七	217
卷三十八	232
卷三十九	241
卷四十二	249
卷四十四	256
卷四十六	266
卷四十七	278
卷四十八	284
卷四十九	294
卷五十	300
卷五十一	312
卷五十二	323
卷五十五	333

卷六十	343
卷六十二	354
卷六十三	368
卷六十四	375
卷六十五	380
卷六十六	387
卷六十七	389
卷六十八	395
卷六十九	399
卷七十	404
卷七十一	409
卷七十二	411
卷七十三	417
卷七十四	425
卷七十五	435
卷七十六	440
卷七十七	450
卷七十八	461
卷八十一	469
卷八十二	477
卷八十三	483
卷八十五	492
卷八十六	496
卷八十七	501
卷八十八	508
卷八十九	516
卷九十	519
卷九十二	525
卷九十五	528
卷九十六	530
卷九十七	535
卷九十八	540
卷九十九	544
卷一百	550

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

原叙

《海国图志》六十卷，何所据？一据前两广总督林尚书所译西夷之《四洲志》，再据历代史志及明以来岛志，及近日夷图、夷语。钩稽贯串，创榛辟莽，前驱先路。大都东南洋、西南洋增于原书者十之八，大小西洋、北洋、外大西洋增于原书者十之六。又图以经之，表以纬之，博参群议以发挥之。何以异于昔人海图之书？曰：彼皆以中土人谭西洋，此则以西洋人谭西洋也。是书何以作？曰：为以夷攻夷而作，为以夷款夷而作，为师夷长技以制夷而作。《易》曰：爱恶相攻而吉凶生，远近相取而悔吝生；情伪相感而利害生。”故同一御敌，而知其形与不知共形，利害相百焉；同一款敌，而知其情与不知其情，利害相百焉。古之驭外夷者，诋以敌形，形同几席；诋以敌情，情同寝馈。然则执此书即可驭外夷乎？曰：唯唯，否否！此兵机也，非兵本也；有形之兵也，非无形之兵也。明臣有言：“欲平海上之倭患，先平人心之积患。”人心之积患如之何？非水、非火、非刃、非金、非沿海之奸民、非吸烟贩烟之莠民。故君子读《云汉》、《车攻》，先于《常武》、《江汉》，而知《二雅》诗人之所发愤；玩卦爻内外消息，而知大《易》作者之所忧患。愤与忧，天道所以倾否而之泰也，人心所以远寐而之觉也，人才所以革虚而之实也。昔准噶尔跳踉于康熙、雍正之两朝，而电埽于乾隆之中叶。夷烟流毒，罪万准夷，吾皇仁勤，上符列祖，天时人事，倚伏相乘，何患攘剔之无期？何患奋武之无会？此凡有血气者所宜愤悱，凡有耳目心知者所宜讲画也。去伪、去饰、去畏难，去养痈，去营窟，则人心之寐患祛，其一。以实事程实功，以实功程实事，艾三年而蓄之，网临渊而结之，毋冯河，毋画饼，则人才之虚患祛，其二。寐患去而天日昌，虚患去而风雷行。《传》曰：“孰荒于门？孰治于田？四海既均，越裳是臣。”叙《海国图志》。

以守为攻，以守为款，用夷制夷，畴司厥榷。述《筹海篇》第一。

纵二千年，圜九万里，经之纬之，左图右史。述各国沿革图第二。

夷教夷烟，毋能入界，嗟我属藩，尚堪敌忾。志东南洋海岸各国第三。

吕宋瓜哇，屿埵日本，或噬或駝，前车不远。志东南洋各岛第四。

教阅三更，地割五竺，鹊巢鸠居，为震旦毒。述西南洋五印度第五。

维哲与黔，地辽疆阂，役使前驱。畴諏海客。述小西洋利未亚第六。

大秦海西，诸戎所巢，维利维威，实怀泮鹑。述大西洋欧罗巴各国第七。

尾东首西，北尽冰溟，近交远攻，陆战之邻。述北洋俄罗斯国第八。

劲悍英寇，恪拱中原，远交近攻，水战之援。述外大洋弥利坚第九。

人各本天，教纲于圣，离合纷坛，有条不紊。述西洋各国教门表第十。

万里一朔，莫如中华，不联之联，大食欧巴。述中国西洋纪年表第十一。

中历资西，西历异中，民时所授，我握其宗。述中国西历异同表第十二。

兵先地利，岂间遐荒，聚米画沙，战胜庙堂。述国地总论第十三。

虽有地利，不如人和，奇正正奇，力少谋多。述筹夷章条第十四。

知己知彼，可款可战，匪证奚方，孰医瞑眩。述夷情备采第十五。

水国恃舟，犹陆恃堞，长技不师，风涛谁警。述战舰条议第十六。

五行相克，金火斯烈，雷奋地中，攻守一辙。述火器火攻条议第十七。

轨文匪同，货币斯同，神奇利用，盍殚明聪。述器艺货币第十八。

道光二十有二载，岁在壬寅嘉平月，内阁中书邵阳魏源叙于扬州。

原刻六十卷，道光二十七载刻于扬州，咸丰二年重补成一百卷，刊于高邮州。

后叙

谭西洋舆地者，始于明万历中泰西人利马竇之《坤輿图说》、艾儒略之《职方外纪》。初入中国，人多谓邹衍之谈天，及国朝而粤东互市大开，华、梵通译，多以汉字刊成图说。其在京师钦天监供职者，则有南怀仁、蒋友仁之《地球全图》。在粤东译出者，则有钞本之《四洲志》、《外国史略》，刊本之《万国图书集》、《平安通书》、《每月统纪传》，灿若星罗，了如指掌，始知不披海图、海志，不知宇宙之大、南北极上下之浑圆也。惟是诸志多出洋商，或详于岛岸土产之繁，埠市货船之数，天时寒暑之节，而各国沿革之始末，建置之永促，能以各国史书致富媪、山川，纵横九万里、上下数千年者，惜乎未之闻焉。近惟得布路国人玛吉士之《地里备考》，与美里哥国人高理文之《合省国志》，皆以彼国文人，留心丘索，纲举目张。而《地里备考》之《欧罗巴洲总记》上下二篇，尤为雄伟，直可扩万古之心智。至墨利加北洲之以部落代君长，其章程可垂奕世而无弊，以及南洲孛露国之金银，富甲四海，皆旷代所未闻。既汇成百卷，故提其总要于前，俾观者得其纲而后详其目，庶不致以卷帙之繁，望洋生叹焉。又旧图止有正面、背面二总图，而未能各国皆有，无以惬左图右史之愿。今则用广东香港册页之图，每图一国，山水城邑，钩勒位置，开方里差，距极度数，不爽毫发。于是从古不通中国之地，披其山川，如阅《一统志》之图，览其风土，如读中国十七省之志。岂天地气运，自西北而东南，将中外一家欤？夫悉其形势，则知其控驭，必有于筹海之篇，小用小效，大用大效，以震叠中国之声灵者焉。斯则夙夜所厚幸也。夫至玛吉士之《天文地球合论》与夫近日水战火攻船械之图，均附于后，以资博识、备利用。

咸丰二年，邵阳魏源叙于高邮州。

卷二

内守既固，乃御外攻。岳飞曰：“以官军攻水贼则难，以水贼攻水贼则易。”今以海夷攻海夷之法如何？筹夷事必知夷情，知夷情必知夷形，请先陈其形势。英夷所惮之仇国三：曰俄罗斯，曰佛兰西，曰弥利坚。惮我之属国四：曰廓尔喀，曰缅甸，曰暹罗，曰安南。攻之之法：一曰陆攻，一曰海攻。陆攻在印度逼壤印度者，曰俄罗斯与廓尔喀，俄与英之国都中隔数国，陆路不接，而水路则由地中海与洲中海，朝发夕至。康熙三十年间，英吉利曾由地中海攻俄罗斯，败绩遁归，自后不相往来，而兵争专在印度。印度者，葱岭西南，与我后藏廓尔喀、缅甸接壤，去英夷本国数万里，英夷以兵船据东南中三印度，而俄罗斯兵，则由黄海、里海间，取游牧诸部，亦与西中二印度接壤，止隔一雪山，各以重兵拒守。自东印度之孟阿腊之麻尔洼，南印度之孟迈之曼达喇萨，鸦片盛行，英夷岁收税银千馀万，俄罗斯觊觎之。及英夷调印度兵艘，入犯中国，深恐俄罗斯乘其虚以捣温都斯坦〈（中印度）〉。又传闻俄夷使者已自比革特起程入中国〈（比革特，其东都也）〉。惴惴惧其犄角。盖康熙中用荷兰以款俄罗斯，又联俄罗斯以逼准噶尔，故英夷之惧俄罗斯者，不在国都而在印度，此机之可乘者一；廓尔喀者，亦在后藏之西，与东印度逼处，方乾隆中，我师征廓夷时，英夷印度兵船，亦乘势攻其东境，故上年英夷罢市后，廓夷亦即稟驻藏大臣，愿出兵攻击印度。当时若许廓夷扰其东，俄罗斯捣其西，则印度有瓦解之势，寇艘有内顾之虞，此机之可乘者二；故可乘而不乘，非外夷之不可用也，需调度外夷之人也。

海攻之法，莫如佛兰西与弥利坚。佛兰西国逼近英夷，止隔一海港，弥利坚与英夷则隔大海。自明季国初之际佛兰西开垦弥利坚东北地，置城邑，设市埠，英夷突攻夺之，于是佛夷与英夷深仇。及后英夷横征暴敛，于是弥利坚十三部起义驱逐之，兼约佛兰西为援，三国兵船数百艘，水陆数十万，不解甲者数载。弥利坚断其饷道，英军饥困，割地请和，弥利坚遂尽复故地二十七部，英夷止守东北隅四部，不敢再犯。即印度地亦荷兰、佛兰西开之，而英夷夺之。乾隆初，印度上酋约佛兰西、荷兰二国，合拒英夷，连兵数载，始分东印度属英夷，而南印度属西洋诸夷，立市埠，此各国之形也。其互市广东，则英夷最桀骜，而佛、弥二国最恪顺。自罢市以后，英夷并以兵艘防遏诸国，不许互市，各国皆怨之，言英夷若久不退兵，亦必各回国，调兵艘与之讲理。去年靖逆出师以后，弥利坚夷目，即出调停，于是义律来文，有不讨别情，只求照例通商之请，并烟价香港亦不敢索，此机之可乘者三；乃款议未定，而我兵突攻夷馆，反误伤弥利坚数夷，于是弥利坚夷目不复出力。而佛兰西于英夷再次败盟之后，是冬有兵头兵船，至广东求面见将军密稟军务，自携能汉语之一僧，请屏去通使，自言愿代赴江浙与英夷议款，必能折服，不致无厌之求。倘英夷不从，亦可借词与之交兵，乃自正月与大帅晤商，始则不许代奏，及奏又支离其词，反以叵测疑佛兰西，延至六月，闻浙江奏请款抚，始许其行。时英夷兵船，已深入长江犯江宁，于是佛兰西船驶至上海，请我舟导其入江，而上海官吏，又往返申请稽时。迨佛兰西易舟入江，则款事已定数日，尽饱溪壑，佛兰西怅然而

返，此机之可乘者四。故可乘而不乘，非外夷之不可用也，需调度外夷之人也。

今日之事，苟有议征用西洋兵船者，则必曰借助外夷，恐示弱，及一旦示弱数倍于此，则甘心而不辞。使有议置造船械，师夷长技者，则曰糜费；及一旦糜费十倍于此，则又谓权宜救急而不足惜。苟有议翻夷书，刺夷事者，则必曰多事〈（嘉庆间，广东有将汉字夷字对音，刊成一书者，甚便于华人之译字，而粤吏禁之）〉；则一旦有事，则或询英夷国都，与俄罗斯国都，相去远近，或询英夷何路可通回部，甚至廓夷效顺，请攻印度而拒之，佛兰西、弥利坚愿助战舰，愿代请款而疑之。以通市二百年之国，竟莫知其方向，莫悉其离合，尚可谓留心边事者乎？汉用西域攻匈奴，唐用吐番攻印度，用回纥攻吐番，圣祖用荷兰夹板船攻台湾，又联络俄罗斯以逼准噶尔。古之驭外夷者，惟防其协寇以谋我，不防其协我而攻寇也。止防中华情事之泄于外，不闻禁外国情形之泄于华也。然则欲制外夷者，必先悉夷情始；欲悉夷情者，必先立译馆，翻夷书始；欲造就边才者，必先用留心边事之督抚始。

问曰，既款之后如之何？曰武备之当振，不系乎夷之款与不款，既款以后，夷瞰我虚实，藐我废弛，其所以严武备，绝狡启者，尤当倍急于未款之时，所以惩具文，饰善后者，尤当倍甚于承平之日。未款之前，则宜以夷攻夷，既款之后，则宜师夷长技以制夷。夷之长技三：一、战舰，二、火器，三、养兵练兵之法。请陈国朝前事：康熙初曾调荷兰夹板船，以剿台湾矣；曾命西洋南怀仁制火炮以剿三藩矣；曾行取西洋人入钦天监，以司历官矣。今夷人既以据香港，拥厚货，骄色于诸夷，又以开各埠，裁各费，德色于诸夷。与其使英夷德之以广其党羽，曷若自我德之以收其指臂。考东中二印度，据于英夷，其南印度，则大西洋各国市埠环之，有荷兰埠，有吕宋埠，有葡萄牙埠，有佛兰西埠，有弥利坚埠，有英吉利埠。每一埠地，各广数百里，此疆彼界，各不相谋。各埠中皆有造船之厂，有造火器之局，并鬻船鬻炮于他国，亦时以兵船货船，出租于他国。其船厂材料山积，工匠云臻，二三旬可成一大战舰，张帆起舵，嗟咄立办。其工匠各以材艺相竞，造则争速，驶又争速，终年营造，光烛天，声殷地。是英夷船炮在中国视为绝技，在西洋各国视为寻常。广东互市二百年，始则奇技淫巧受之，继则邪教毒烟受之，独于行军利器，则不一师其长技，是但肯受害不肯受益也。请于广东虎门外之沙角、大角二处，置造船厂一，火器局一，行取佛兰西、弥利坚二国，各来夷目一二人，分携西洋工匠至粤，司造船械，并延西洋舵师，司教行船演炮之法，如钦天监夷官之例。而选闽粤巧匠精兵以习之，工匠习其铸造，精兵习其驾驳攻击，计每艘中号者，不过二万金以内〈（英夷有军器之趸船，每艘值银二万馀员，大兵船三桅者每艘值银四万员，见澳门新闻纸。凡侈言每艘需十万金者皆妄也。现在广东义士，请弥利坚人造二桅兵船，果仅费银万九千两）〉。计百艘不过二百万金，再以十万金造火轮船十艘，以四十万金造配炮械，所费不过二百五十万，而尽得西洋之长技，为中国之长技。每艘配兵三百人，计百艘可配三万人〈（靖逆将军弈山，奏夷三桅大兵船三百人，二桅中号兵船二百余人，火轮船八九十人，杉板船大者六七十人，小者二三十人）〉。广东一万，福建一万，浙江六千，江苏四千，其所配之兵，必凭选练。取诸沿海渔

户梟徒者十之八，取诸水师旧营者十之二，尽裁并水师之虚粮冗粮，以为募养精兵之费。必使中国水师，可以驶楼船于海外，可以战洋夷于海中，不增一饷一兵，而但裁并冗滥之兵饷，此其章程可推广者，尚有六焉：我有铸造之局，则人习其技巧，一二载后，不必仰赖于外夷，如内地钟表，亦可以定时刻，逮二十五年大修之期，即可自行改造，一也〈（夷艘例二十五年一修）〉；有铸造之局，则知工料之值，工食之值，每艘每炮有定价，然后可以购买。凡外夷有愿以船炮售官抵税者听。闽商粤商出贩南洋，有购船炮归缴官受值者听。不致以昂价贗物受欺，二也；沙角大角，既有船厂火器局，许其建洋楼，置炮台，如澳门之例，英夷不得以香港骄他夷，生觖望，而我得收虎门之外障，与澳门鼎峙，英夷不敢倔强，广东从此高枕。嘉庆中澳夷曾备兵船二，英夷备兵船四，愿助剿海盗，今更得佛、弥二夷效顺，彼贪市舶之利，我收爪牙之助，守在四夷，折冲万里，三也；鸦片趸船，敢于蔓延者，欺我水师之不敢攻剿，今水师整饬，鸦烟自不敢来，纹银自不透漏，以用财为节财，四也；官设水师米艇，每艘官价四千，已仅洋艘五分之一，层层扣蚀，到工又不及一半〈（靖逆将军弈山奏言，水师例修之船新造二只覆以藤棉，加以牛皮，外施鱼网七层，演试千斤之炮，打穿两面，不能适用）〉。今制海舰，不拘例价，若不善立章程，则将来修造之期，必然有名无实。考洋艘所以坚固，皆由驶犯风涛，遄行万里。令官艘终岁停泊，会哨徒有具文，自后即无事之期，而战艘必岁护海运之米，验收天津闽广则护运暹米、吕宋米、台湾米，江浙则各护苏、松、杭、嘉、湖之米，凡承造之人，即皆驾驶之人。凡内地出洋之商，愿禀请各艘护货者听。凡水师提镇大员，入京陛见，必乘海艘，不许由驿陆进。其副将参游以下，入京引见，或附海运之舟北上，总禁由陆，其文吏愿乘海艘入京者听，惟不许承办船工，五也；国家试取武生、武举人、武进士，专以弓马技勇，是陆营有科，而水师无科。西洋则专以造船驾船造火器奇器取士抡官，上之所好，下必甚焉，上之所轻，下莫问焉。今宜于闽粤二省，武试增水师一科，有能造西洋战舰火轮舟，造飞炮火箭水雷奇器者，为科甲出身。能驾驶飓涛，能熟风云沙线，能枪炮有准的者，为行伍出身。皆由水师提督考取，会同总督拔取，送京验试，分发沿海水师，教习技艺。凡水师将官，必由船厂火器局出身，否则由舵工水手炮手出身，使天下知朝廷所注意在是，不以工匠舵师视在骑射之下，则争奋于功名，必有奇材绝技出其中。昔李长庚剿海贼，皆身自持舵，虽老于操舟者不及，故知水师不能舍船械而空谈韬略武备，不能舍船炮而专重弓马，六也。

天下有不可强者三：有其人，无其财，一难也；有其财，无其人，二难也；有其人，有其财，无其材〈（谓材料）〉，三难也。自用兵以来，所糜费数千万，计出其十之一二，以整武备有馀，则财非不足明矣。海关浮费，数倍正税，皆积年洋商与官吏所肥蠹，起家不赀，其费皆出自鸦片，岂不当派数百万之军饷，则财又非不足明矣。中国智慧，无所不有，历算则日月薄蚀，闰馀消息，不爽杪毫，仪器则钟表晷刻，不亚西土。至罗针壶漏，则创自中国，而后西行〈（罗针始自中国，见《华事夷言》）〉。穿札扛鼎，则无论水陆，皆擅勇力，是人才非不足明矣。船桅船舱，所需铁力之木，油木櫨木柿木，皆产自两广，蓬帆浸以晋石，火不能焚，出自山

西。火药配以石油，得水愈炽，出自甘肃〈（关外玉门县赤金卫迤南之石油河，本年二月陕甘总督解至石油三千六百斤）〉。火箭参以江豚油，逆风更猛，出自四川。军符所下，旦夕可至。硝提数次而烟白，铁经百练而钢纯，皆与西洋无异，则材料又非不足明矣。飞炮火器，皆创自佛兰西，而英夷效之，以及船械相等之葡萄牙、荷兰、吕宋、弥利坚等国，皆仰我茶黄，贪我互市，欲集众长以成一长，则人争效力，欲合各国以制一国，则如臂使指。诚欲整我戎行，但得一边才之两广总督，何事不可为哉？或曰：五十艘之船械，且造且购，一年而可集，百艘之船械，且造且购，二年而毕集，即其制造施用之法，以我兵匠学之，亦一年而可习，二年而可精，是一二年后，已无铸造之事。尚远重修之期，更何局厂之设乎？曰：是何言也，夫西洋惟英吉利国兵船五百余艘，佛兰西国兵船三百余艘，盖为分守各国埠头而设。其余各国战舰，亦各不过数十艘，而皆有船厂火器局，终年不息者，何哉？盖船厂非徒造战舰也，战舰已就，则闽广商艘之泛南洋者，必争先效尤，宁波上海之贩辽东贩粤洋者，亦必群就购造，而内地商舟，皆可不畏风飓之险矣。西洋火轮舟之受数千石者，止为远越重洋，其在本国内河内港之火轮舟，皆不过受五百石至九百石而止。以通文报，则长江大河，昼夜千里，可省邮递之烦。以驱王事，则北甯南旋，往还旬日，可免跋涉之苦。以助战舰，则能牵浅滞损坏之舟，能速火攻出奇之效，能探沙礁夷险之形。诚能大小增修，诎非军国交便，战舰有尽，而出鬻之船无尽，此船厂之可推广者一；火器亦不徒配战舰也，战舰用攻炮，城垒用守炮，况各省绿营之鸟铳火箭火药，皆可于此造之。此外量天尺，千里镜、龙尾车、风锯、水锯、火轮机、火轮舟、自来火、自转碓、千斤秤之属，凡有益民用者，皆可于此造之。是造炮有数，而出鬻器械无数，此火器局之可推广者二。古之圣人剡舟剡楫，以济不通，弦弧剡矢，以威天下，亦岂非形器之末，而睽涣取诸易象，射御登诸六艺，岂火轮火器不等于射御乎？指南制自周公，挈壶创自周礼，有用之物，即奇技而非淫巧。今西洋器械，借风力水力火力，夺造化，通神明，无非竭耳目心思之力。以前民用，因其所长而用之，即因其所长而制之。风气日开，智慧日出，方见东海之民，犹西海之民，云集而鹜赴，又何暂用旋辍之有？昔汉武帝欲伐南越，爰习楼船水战于昆明湖。乾隆中以金川恃碉险，爰命金川俘卒建碉于香山，又命西洋人南怀仁制西洋水法于养心殿。而西史言俄罗斯之比达王，聪明奇杰，因国中技艺不如西洋，微行游于他国船厂火器局，学习工艺，反国传授，所造器械，反甲西洋，由是其兴勃然，遂为欧罗巴洲最雄大国。故知国以人兴，功无幸成，惟厉精淬志者，能足国而足兵。

人但知船炮为西夷之长技，而不知西夷之所长，不徒船炮也。每出兵以银二十员安家，上卒月饷银十员，下卒月饷银六员，贍之厚故选之精，练之勤故御之整。即如澳门夷兵仅二百余，而刀械则昼夜不离，训练则风雨无阻，英夷攻海口之兵，以小舟渡至平地，辄去其舟，以绝反顾，登岸后，则鱼贯肩随，行列严整，岂专恃船坚炮利哉？无其节制，即仅有其船械，犹无有也；无其养贍，而欲效其选练，亦不能也。故欲选兵练兵，先筹养兵，兵饷无可议加，惟有裁并之而已。粤省水师，将及四万，去虚伍计之，不及三万，汰其冗滥，补其精锐，以万五千人作为率，即以三万

有馀之粮，养万五千之卒，则粮不加而足。以五千卒分防各口炮台，与陆营相参，以万人分配战舰，可得三十馀艘。无事日，令出哨外洋，捕海盗，缉烟贩。有事寇在邻省，则连宗赴援，寇在本省，则分艘犄角，可以方行南海矣。或曰：粤洋绵长三千馀里，水师数万，尚虞不周。今裁汰大半，不弥形单寡乎？曰：水师多而不敷，以无战舰也，无战舰出洋，则口岸处处出防，以水师当陆师之用，故兵以分而见寡。今以精兵驾坚舰，昼夜千里，朝发夕至，东西巡哨，何患不周，是兵以聚而见多。英夷各处市埠，自大西洋至中国，首尾数万里，何以水师不过九万，即能分守各国。又何以入寇之兵，不过五十艘，而沿海被其骚动，况水师外尚有本省绿营数万，何患其无兵分守。前年杨参赞有请水师改为陆兵之奏，吾谓不如并岸上之水师，为船上之水师，用力少而收效广。

问：西洋与西洋战，亦互有胜负，我即船炮士卒，一切整齐，亦何能保其必胜？曰：此为两客相攻言之，非为以客待主言之也。夫力不均，技不等，而相攻，则力强技巧者胜，力均技等，而以客攻主，以主待客，则主胜，攻劳守逸，请言其状。夫海战全争上风，无战舰，则有上风而不能乘，即有战舰而使两客交哄于海中，则互争上风，尚有不能操券之势，若战舰战器相当，而又以主待客，则风潮不顺时，我舰可藏于内港，贼不能攻，一俟风潮皆顺，我即出攻，贼不能避。我可乘贼，贼不能乘我，是主之胜客者一；无战舰，则不能断贼接济，今有战舰，则贼之接济路穷，而我以饱待饥，是主之胜客者二；无战舰，则贼敢登岸，无人攻其后。若有战舰，则贼登岸之后，舶上人少，我兵得袭其虚，与陆兵夹击，是主之胜客者三；无战舰，则贼得以数舟，分封数省之港，得以旬日遍扰各省之地。有战舰，则贼舟敢聚不敢散，我兵所至，可与邻省之舰夹攻，是主之胜客者四。故历考西洋各国交兵，凡英吉利往攻弥利坚本国，则弥利坚胜；以英吉利往攻俄罗斯本国，则俄罗斯胜；若英吉利与各国互战于海中，无分主客，则舵师得上风者胜。

问曰：船厂火器局，设于粤东矣，其福建、上海、宁波、天津，亦将仿设乎，不仿设乎？战舰百艘，果足敷沿海七省之用乎？曰：沿海商民，有自愿仿设厂局，以造船械，或自用，或出售者听之。若官修战舰火器局，则止需立于粤东，造成之后，驶往各岸，无事纷设。盖专设一处，则技易精，纷设则不能尽精。专设则责成一手，纷设则不必皆得人。战舰既成以后，内地商艘仿造日广，则战艘不必增造。何者？西洋货船与兵船，坚固同，大小同，但以军器之有无为区别，货船亦有炮眼，去其铁板，即可安炮。内地平时剿贼，尚动雇闽广商艘，况日后商艘尽同洋舶，有事立雇，何难佐战舰之用。惟水师则必以闽广为主，而江浙为辅。何则？福建之役，夷船泊于南澳港，邓制军所募水勇，佯作商舟，乘无风攻之，夷艘甫觉，我水勇已逼其后艄，焚其帆索，伤其舵师水手，夷艘无风不能起碇，逼近不能开炮，且小舟外障湿幔，铙弹不能入。良久风起，夷船始遁。此江浙水勇所不能也。粤东之役，官军方失利于城外，而我武举梁体群，夜以火舟三队，从穿鼻洋截攻其后，乘潮至虎门，横档夷船，甫开一炮，而我火舟已逼其后梢，火药舱轰发，两桅飞起空中，全艘俱毁。佛山义勇，又围截夷兵于龟冈炮台，绕出上风，纵毒烟以眯夷目，尽歼

夷兵，并击破其应援之杉板舟，此江浙水勇所不能也。靖逆将军奏言粤中水勇，以小舟八人荡桨，旋折如飞，将及夷炮所近之处，即覆舟入水，戴之而行，及至夷船，仍翻舟而上，以火球喷筒焚其帆索，得势即跃上夷船，不得势，即仍下水，覆舟而行，铙炮皆不能及，已募得二百余人，此江浙所无也。夷船犯乍浦时，余艘留踞镇海招宝山，有委员雇闽勇三百余，以火舟易使贼觉，献策用大油篓，各装火药二百斤，载以小竹筏，以铁索拴筏四角，套于项颈，手扶篓筏，贴水潜行，远望不见，及至夷船后，潜挂舵上，火发轰烈，全船立毁。既而有尼之者，飞檄中止，此亦江浙所无也。此皆在无战舰之时，可用若是，况配入战舰，用其所长，外夷尚且畏之，岂他省所及？故江浙舟师宜专护海运，而闽粤舟师宜专剿海寇（汉口、瓜洲、钱塘江，亦有没水之人，能伏行江底，然每处仅二三十人，不能多也）。问：子于议守篇，专守内河，守近岸，使夷船夷炮失其所长，已可收安南创敌之功，则又何艘械之足学，而厂局之足设耶？曰：夷兵之横行大洋者，其正也；其登岸，及入内河者，其偶也。夷性诡而多疑，使我岸兵有备，而彼不登岸，则若之何？内河有备，而彼不入内河，则若之何？观其初至也，以结怨之广东而不攻，继以结怨之厦门而不力攻，及突陷舟山，徘徊半载，而不敢深入，是犹未测内地之虚实，尚有所畏也。自广东主款撤防，破虎门，围省会，而夷始肆然无忌矣。再破厦门定海，驶入宁波，而益无忌矣。再破乍浦、宝山、上海驶入长江，而益无忌矣。使夷知内河有备，练水勇，备火舟，如广东初年之事，其肯深入死地哉？故广东初年，有歼夷之备，而无其机；江浙近年，有歼夷之机，而无其备。且夷兵舶五十艘，货船二十馀艘，火轮船十艘，其闯入珠江，入甬江，入黄埔江者，皆不过兵舰七八艘，火轮二三艘，杉板小舟十馀而已。其馀仍寄碇大洋，即使歼其内河诸艇，而奇功不可屡邀，狡夷亦不肯再误。且夷贪恋中国市埠之利，亦断不肯即如安南、日本之绝交不往，此后则非海战不可矣。鸦片趸船，仍泊外洋，无兵舰何以攻之？又非海战不可矣。夷船全帮数十艘，驶入者惟长江，江面虽狭于外洋，而倍阔于他港，夷艘散泊各岸，不聚一处，即用兀术之火攻，而天时风色难必，亦不过歼其三分之一，究恐有窜出大半之舰，则亦非追剿不可矣。苟夷畏我内河，专肆惊扰，声东击西，朝南暮北，夷人水行一日可至者，我兵陆行必数日方至。夷攻浙，则调各省之兵以守浙，夷攻江，则又调各省之兵以守江。即一省中，而有今日攻乍浦，明日攻吴淞，后日又回扰镇海，我兵又将杂然四出，应接不暇，安能处处得人，时时设备。况战舰火器，乃武备必需之物，二三百万，乃军需十分之一，何憚不为，而见轻于四夷。况有洋舰洋炮之后，亦非漫然浪战也。客兵利速战，主兵利持重，不与相战，而惟与相持，行与同行，止与同止，无淡水可汲，无牛羊可掠，无硝药可配，无铁物可购，无蓬缆可补，烟土货物无处可售，舵枪无处可修。又有水勇潜攻暗袭，不能安泊，放一弹，即少一弹，杀一夷，即少一夷，破一船，即少一船。而我之沿海腹地，既有战舰为外卫，则内河近岸，高枕无虞。所至接济策应，逸待劳，饱待饥，众待寡，是数十艘可当数百艘之用。况夷兵以大艘为身，以杉板小舟为四足，但多募渔舟快艇，专毁其杉板小舟，小舟尽则大舟亦可为我有，在得人而已，在得人而已。

我患夷之强，夷贪我之利，两相牵制，幸可无事，非今日主款者之秘略乎？鸦片岁耗中国财数千万计，竭我之富，济彼之强，何以处之？则曰：“但禁内地吸食。”试问持议之人，果严禁内地吸食乎？则又曰：“宜缓不宜急，急之恐触外侮而生内变。”嗟乎！强邻恶少，日设赌博于门，诱我子弟，匿我基业，败我教化，一朝绝不与通，攻门索斗，曷可调停者曰：“姑听其仍开博场，一日赌博，一日无事，百年赌博，百年无事，我产之耗不耗，勿计也，我业之完不完，勿计也，我子弟之败类不败类，勿计也。”欲制夷患，必筹夷情，请先陈夷情而后效其说。

中国以茶叶湖丝馭外夷，而外夷以鸦片耗中国，此皆自古所未有，而本朝有之。茶叶行于西洋，自康熙始，而鸦片之入中国，亦自康熙始。初准以药材上税，乾隆三十年以前，岁不过二百箱，及嘉庆元年，因嗜者日众，始禁其入口。嘉庆末，每年私鬻至三千馀箱，始则囤积澳门，继则移于黄埔。道光初，奉旨查禁，复移于零丁洋之趸船。零丁洋者，在老万山内，水路四达，凡中外商船之出入外洋者，皆必由焉。夷艘至，皆先以鸦片寄趸船，而后以货入口，始趸船不过四五艘，其烟至多不过四五千箱，可用火攻，而大吏密奏请暂事羁縻，徐图禁绝，于是因循日甚，其突增至二十五船，烟二万箱者，则在道光六年，设巡船之后，巡船水师受月规，放私入口，于是藩篱溃决。及道光十二年，始裁巡船，而积习已不可挽。道光十七年，复设巡船，议定每千箱，以若干箱送水师报功，而鸦片遂岁至四五万箱矣。今以道光十七年，广东与英夷贸易出入之数计之，湖丝价银六百五十九万员，茶叶价银千有四百万员，白矾、串珠、樟脑、桂皮、磁器、大黄、麝香、赤布、白糖、冰糖、雨伞，百二十二万六千员，共计英吉利船所购出广东之货，二千一百八十一万六千员；其入口者，棉花八百二十二万员〈（六十七万七千石）〉，洋米二十三万八千员〈（二十一万石）〉，大呢百五十五万员，羽纱四十万员，哗叽八十万员，羽缎五万员，洋布七十万员，棉纱七十三万员〈（千有八百石）〉。水银二十三万员〈（二千石）〉，锡二十九万五千员〈（万五千石）〉，铅八万九千员〈（万四千石）〉，铁四万八千员〈（万六千石）〉，硝七万五千员〈（共万石）〉，檀香、乌木、象牙、珍珠、胡椒、沙藤、槟榔、鱼翅、鱼肚、花巾、洋巾、计七十一万员，共英夷进口货千四百四十七万八千员，少于出口货价银七百馀万员。使无鸦片而以货易货，则英夷应岁补中国银七百馀万员，乃是岁鸦片价银反出口二千二百万员，计销鸦片四万箱，此数之确然可考者。弥利坚国，是岁出口之货，绸缎价七百五十万员，茶叶五百十九万八千员〈（十二万馀石）〉，丝棉、葛布、磁器、席糖、五十七万九千员，共计千有三百二十七万七千员，入口洋货三百六十七万员〈（内有洋米八十六万员，洋布四十五万员，白银四十二万员，价最银）〉，计少银九百六十万员。何以不闻补银，盖亦鸦片价内开除之数〈（英夷所运者，印度鸦片，弥夷所运者，都鲁机鸦片）〉，他西洋诸国，出口入口者，约计二百万员，共计外夷岁入中国之货，仅值银二千十四万八千员，而岁运出口之货，共值银三千五百有九万三千员，以货易货，岁应补中国价银千四百九十四万五千员，使无鸦片之毒，则外洋之银，有入无出，中国银且日贱，利可胜述哉？综计英夷所购出之货，莫大于茶，而湖丝次之，所售入中国之货，莫大于鸦片，而棉花次之，至大黄则蒙古所需，

非西洋所急，故每岁出洋大黄，不过值五万馀员〈（即俄罗斯市大黄归，亦仅用以染色，非用以治病，见松筠《绥服纪略》）〉，茶叶虽西洋所盛行，而佛兰西国不甚需之，以其本国皆饮白酒，不甚饮茶，故佛兰西到粤之船较少。然前代市舶，从不闻茶叶出洋，茶叶出洋，自明季荷兰通中国始。及康熙二年，英吉利商，又自荷兰购归百斤，饮而甘之，国人饮者，岁增一岁。康熙四十九年，至十四万斤；雍正二年，至二十八万斤；乾隆二十四年，二百二十九万斤；三十七年，五百四十七万斤；五十年，遂至千三百万斤；嘉庆十八年，二千一百二十八万斤；道光二年，二千三百七十六万斤；十年后，三千馀万斤。及英夷公司散后，各商自运，销茶愈广。十七年广东出口茶叶三十馀万石，共价银千有四百馀万员。又弥利坚国，道光十七年，购茶价银三百六十九万两〈（共茶十二万馀石）〉。荷兰岁需茶二百八十万斤不等，佛兰西二十三万斤不等〈（佛兰西茶，沿途售与各国，其到本国者无几）〉，此外西洋各国，大约二百万斤，惟俄罗斯由蒙古运往茶叶，岁六百四十馀万斤。是西洋之饮茶，亦犹中国人之吸鸦片，虽损益悬殊，皆始自近日。非古昔所有，故知洋钱流入内地，皆鸦片未行以前，夷船所补之价，至鸦片盛行以后，则绝无货价可补，而但补烟价，洋钱与纹银，皆日贵一日矣。漕务盐务边务，皆日困一日矣。使非养痍于数十年之前，溃痍于设巡船之后，何以至是。今但归咎割痍之人，而养痍溃痍者不问？故至今益以养痍为得计，此边患宜溯其源者一。

西洋互市广东者十馀国，皆散商无公司，惟英吉利有之。公司者，数十商凑资营运，出则通力合作，归则计本均分，其局大而联；散商者，各出已资，自运自售，利害皆一人独当之，其势专而散。方其通商他国之始，造船炮，修河渠，占埠头，筑廛舍，费辄巨万，非一二商所能独任，故必众力易擎，甚至借国王资本以图之，故非公司不为功，及通市日久，垄断他商之路，挥霍公家之帑，费愈重利愈微，国计与民生两不利，则又惩公司流弊，而听散商自为之。以中国比例，公司如广东十三家洋行，而散商则如各省赴粤之客货也；公司如淮南盐法之滚总之整轮，而散商则如票盐如散轮也。道光十三年以前，粤东贸易，一出公司，其局初立于印度，继立于广东，初议公司止设三十年，及限满而公司欲专其利，不肯散局，复以助本国兵饷为词，请再展三十年，而糜费开支，浮冒干没，且运回之货，居奇踊贵，百物滞销，国人皆不服，屡控国王，请散公局，各自贸迁，皆为大班数人把持，与通国散商为怨敌。其公司资本银三千万员，主事二十四商，首领二人，专司机密，每商捐银二千五百员以贍之。道光十年，本国会计入公帑银万有五百万员，公使费银九千万员，公欠项银七千五百万员，公司贸易无利。道光十二年，载资出本国，出印度国者，置价共三千万员，而所售回之价，仅千有六百万员，公司不如散商者六倍。故道光十三年，遂散公司之局，国王尽收帑本，任商自运，而第征其税，此粤中公司合散之情形也。方广东公司未散时，各大班恃其势大多金，凡抗衡中国官吏，皆公司大班所为，公司散则势涣易制，而卢制军莅任未久，误听洋商言，以英夷公司虽散，而粤中不可无理夷务之人，反飭令彼国派领事来粤，十四年始来者曰劳律卑，突入省河，罢市调兵而后退。十六年再至者，即义律也，祇便洋商一日之私图，岂期边疆今日之戎首？试问粤中互市，西洋十馀国，何尝有夷官驻粤？若谓英夷货

多事蹟，則彌利堅國每年貨艘至粵之多，亦亞于英吉利，何以二百載从无桀骜？觀禁烟新令初頒，各國遵令，即英國新至貨船，亦遵例具結，而義律駛兵船阻其入口。苟當時无公司領事，則英夷各商，亦不过随同各國具結，惟恐卸貨之不早，驚利之不先，何暇抗文法，爭體制？何至開兵炮，停貿易？又何至訴國王，請兵艦，連兵万里，構衅數年？故馭邊在先悉夷情，公司散局，此海疆一大机会，而中國邊臣失之者二。

禁鴉片之議有二：一內禁，一外禁。自夷船犯順，人皆謂外禁必不可行，果必不可行乎？又以夷變歸咎于繳烟，果由于繳烟乎？何以五月繳烟之后，旁徨半年而未動？何以尚肯出船貨充公之結？何以尚懸購告犯之賞？何以逐出老萬山外復尚有愿遵大清律乞回澳門之稟？是其激變絕不由繳烟，而由于停貿易明矣。英夷國禁濃酒小帶，有佛蘭西使者至其國，英夷聞其携違禁貨物，因監禁其使，令禁繳出禁物，始釋之，与广东之勒繳烟土何异？又英夷國律例，凡他國商携違禁貨物入境者，罰其貨價三倍。是即科以彼國之法，亦无可辭，其非因繳烟而由停貿易又明矣。然則不停貿易，固可免用兵，亦可禁鴉片使不來乎？曰，奚不可之有？請先陳夷情而后效其說。英夷之說曰：“若要印度人不栽波毕，除非中國人不食鴉片；若要中國人不買鴉片，除非印度不栽波毕。中國人若以鴉片貿易，同英國講論，英吉利國王定肯禁止販運，即印度栽種波毕之事，亦可停止，而栽種別物，仍可得稅餉貿易之利（《澳門月報》）”。又曰：“有人言情愿斷止鴉片一物，別開南邊港口貿易可乎？我恐未必能行（《華事夷言》）”。是外禁之事，英夷亦未尝不籌画及之，但外夷惟利是圖，惟威是畏，必使有可畏怀，而后俯首从命。故上者严修武备，彼有趸船，則我能攻之，彼有夾私，应停貿易，則立停之，使我无畏于彼，彼无可挟于我，自不敢尝试；次者代筹生计，使彼即停鴉片，而上无缺稅，下无缺財，則亦何乐走私之名，而不趋自然之利？請得而詳之：夷烟产自印度，而銷于广东，其东印度种鴉片之地，皆官地，如中国盐场置官收稅，不得私煎，除鴉片地稅銀四百餘万員外，加以栽種時、开花時、取汁時、出口時，四次收稅，又凡五百餘万員。共計孟阿腊岁稅九百六十八万四千餘員。又南印度之孟迈，鴉片稅亦百餘万員，除印度兵餉支用外，岁解英吉利國都者，三百餘万員，此其國最大之利藪。考康熙、乾隆中，准商船运呂宋、暹羅米入口者，每米万石，免其船貨稅十分之五，米五千石以上，免稅十分之三，即不及五千石，亦免稅十分之二，并許商人运暹米二千石以上，議叙頂戴，此二国产米，不产鴉片，有利无弊。自后港脚夷船，援例岁运印度、新嘉坡、葛留巴米入口者，不下四十万石，多以鴉片寄趸船，而以米入口，由是粤海关裁抑之，但免入口米稅，不免出口貨稅。今与夷約，果能铲除鴉片之地，改种五谷者，許其多运洋米入口，并援例酌免其貨稅，則夷喜于地利之不荒，其必乐从者一；粤东出口之貨，是洋行会馆，每百兩抽內商三分，而三分必增諸貨價，其入口之貨，則每一大洋艘至黃埔，官費及引水通事使費，约需銀五千員，皆在正稅之外，虽不明取于鴉片，而夷則失諸彼者償諸此，我則收其实而避其名。今与夷約，果鴉片不至，則尽裁一切浮費，举以前此貢使所屢求，大班所屢控者，一旦如其意而豁除之，俾岁省數百，万夷必乐从者又一；彼國入口之貨，莫大于湖絲茶叶

，出口之费，莫大于棉花、洋米、呢羽，今中国既裁浮费，免米税，商本轻省，则彼国不妨于进口之茶丝，出口之棉米呢羽，酌增其税，以补鸦片旧额。此外铅铁硝布等有益中国之物，亦可多运多销，夷必乐从者又一；威足慑之，利足怀之，公则服之，有不食桑葚而革鹑音者乎？水师之通贿不惩，商胥之浮索不革，战舰之武备不竞，而惟外夷操切是求，纵获所求，且不可久，矧乃河溃而鱼烂，鸟惊而兽骇，尚何暇议烟禁哉？张奂之服西羌，班超之告任尚，此机会可乘，反以过急失之者三。

此皆未变以前事也，既变以后，则不独以夷攻夷，并当以夷款夷。国初俄罗斯争黑龙江地，构兵连年，圣祖命荷兰寄书俄罗斯，而献城归地。喀尔喀两部争衅构兵，诏命达赖喇嘛遣使往谕，而喀部来庭。缅甸不贡，闻暹罗受封而立贡；廓尔喀未降，闻英吉利助兵而即降。故款夷之事，能致其死命，使俯首求哀者上；否则联其所忌之国，居闲折服者次之。上年靖逆将军未至粤时，弥利坚夷目即出调停讲款，于是义律来文有“不讨别情，只求照例通商，倘带违禁货物，船货充公”之语，并许退出虎门之说。夫命将出师，不过因夷之索烟价，索埠地，踞虎门，今三事皆不敢违命，是不战屈夷，亦足以征朝廷折冲千里之威，非弥利坚居间，岂能有是？而利害未能陈明，章奏未能剴切，于是而英夷要盟，又于是而英夷败盟。是冬佛兰西兵帅，复以兵艘至粤，求面见将军，密陈军事，请代款，请助兵以夷攻夷，以夷款夷，在此一举，而又迟疑之，支拙之，延及半载，始令赴江宁，则英夷款议已成数日，视弥利坚原议，相去天渊，故不款于可款之时，而皆款于必不可款之时，此机会可乘不乘者四。

此四机者，谨其始机，则鸦片不至流毒；乘其二机，则公司不致桀骜；乘其三机，则不以罢市兴兵；乘其四机，则不致款议失体。一误再误，三误于事前，四误于事后，经此四误，而鸦片之外，禁不可行矣。今日之事非内禁不可矣。内禁之不效有三：一曰，不许告发也；二曰，不速限期也；三曰，不先黥后僇也。不许告发之故，在防诬陷。夫吸烟有瘾，贩烟有土，告不实有反坐，何患其诬？且有告发之令，则雇工邻右，人怀戒心，大厦深堂，皆无固志，虽有贪欲贪利之徒，不敢再为尝试，其必效一；限期不速者，恐死刑太多也，不知期愈宽，犯愈众。昔宋臣宗泽守汴京，承兵燹之后，百物昂价倍蓰，泽念小民所急惟食，乃梟一饼师之首，下令平价，不三日而市价尽平。夫速则梟一人而万人肃，迟则刑千百而四海玩，果不果之异也。且烟瘾有限期，贩烟有何限期？但使沿海各郡县，每城立梟贩烟之首一二人，以令下之日为始，不俟限期，风行雷厉，其必效者二；吸烟未至限期，罪不至死奈何？曰有《大清律》刺面之法在，今再下令，三月不戒者黥，黥后再三月不戒者死，以下令为始，十七省各出巡烟御史一人，专司有犯必黥之事，其缙绅富户，哀求免黥者，许以金赎，不黥面而仍黥手，黥手逾期不戒，毋得再赎。如此则法易行，法必行，且在前次限期之外，岂得更议其期迫乎？此必效者三。总之，法信令必，虽枷杖足以惩奸，法不信，令不必，虽重典不足儆众，饮食不已，酿为讼师。小刑之刀锯不肃，酿为大刑之甲兵，圣人垂忧患以诏来世，岂不深哉，岂不深哉！

卷四

利未亚州全图

麦西国图

利未亚北方各国图

英吉利所属利未亚州南方各地图

欧罗巴州全图

大吕宋葡萄牙两国合图

《瀛环志略》大吕宋葡萄牙合图

佛兰西国全图

佛兰西图

荷兰北义两国合图

意大里国全图

瑞士国图

大尼国图

日耳曼破路斯奥地利三国图

普鲁社国专图

奥地利国专图

北土耳其国图

希腊国图

瑞丁那威两国合图

欧罗巴州属俄罗斯国图

《瀛环志略》俄罗斯西境图

《异域录》俄罗斯国图

英吉利本国三岛国合图

《四州志》英吉利国分部图

《瀛环志略》英吉利图

苏各兰图

伊耳兰岛图

北亚默利加州全图

英吉利所属加拿他国东边各部图

弥利坚国全图

麦西哥国全图

危亚地马拉国全图

北默利加内英俄二国属地图

亚默利加州各岛图

南五默利加州全图

可伦比国全图

巴悉国图

北路破利威两国图

利加洲南方五国合图

右香港英夷公司所呈大宪图也。余纂此书，有取之华人者，《皇朝通考》及《一统志》，外如周达观《真腊风土记》、王恽《泛海小录》、谢清高《海录》、张奕《东西洋考》、黄衷《海语》、师范《滇系》、刘健《庭闻录》、颜斯宗《南洋蠡测》、黄可垂《吕宋纪略》、王大海《海岛逸志》、郁永河《裨海纪游》、张汝楫《澳门纪略》、陈伦炯《海国闻见录》、《七十一西域闻见录》、徐继畲《瀛环志略》、叶鍾奇《英吉利夷情纪略》。有取之夷人者，艾儒略《职方外纪》、南怀仁《坤舆图说》、美利加人培端之《平安通书》、英人裨理哲之《地球图说》、马礼逊之《外国史略》、欧罗巴人马吉斯之《地理备考》、美理哥人高理文之《美理哥图志》、澳门人之《每月统纪传》及《天下万国地理全图集》四洲志》、《贸易通志》诸书。皆世所鲜见，蕞而录之。旨则数千，稿凡三易，略举其目，以视有征。惟此图乃广州府经历婺源程承训所摹，饰以五色，因取以冠是书之首，斯纯乎以夷人谭夷地也。

卷十

○缅甸

缅甸与暹罗安南三国，在阿细亚洲南洋。欧罗巴人以其与印度交界，统谓之印度外。前代欧罗巴人罕至其地，所知者，不过孟阿腊安治市河之东岸而已。伊揖画师比多里弥所绘地理图，其图内大海湾之西岸，有梯泥城，即缅甸之底泥色领域也。意大利人，曾至中国海岸，而所绘之国亦未详确。佛兰西国，当日攻取麻六甲地，所考察者仅附近一隅。佛兰西又曾遣罗比里至暹罗国，欲行教化，始略知暹罗国大概。近日英吉利已得印度之地，多与三国交界，故所说此方之事，虽不详备，较前代欧罗巴人，则所得为多。缅甸国建都阿瓦，又谓之马腊麻，原是三国：一曰阿瓦，一曰阿腊干，一曰秘古。各不相统，恒相争夺。惟缅甸当冲，受害尤重。千有六百年〈（明万历二十八年）〉，缅甸兴兵攻服秘古。迨千有七百年〈（康熙三十九年）〉，秘古复约荷兰西洋两国之兵同攻缅甸，屡战屡胜，直抵阿瓦，擒获缅甸之底布里王，维时缅甸反属于秘古。然缅人强悍，突有阿罗般部落，招集土兵，恢复阿瓦国都，自立为王，尽收缅甸旧地，遂出师攻灭秘古国。其子山巴领嗣位后，秘古复叛，山巴领又攻胜之。遂乘胜并取暹罗，久仍为暹罗所败，仅存麻六甲以西沿海之麻尔古底呢色领等城耳。山巴领歿，其弟皿底腊疑勃老嗣位，又并合阿腊干为一国。此外尚有攻取加渣尔加色等处，军威可谓矣。然以麻尔古之地，皆与孟阿腊接壤，孟阿腊属于英吉利，两国接壤，日久复起兵争。千有八百二十六年〈（道光六年）〉，英吉利遂起印度之兵攻缅。缅恃其习战，视英寇蔑如也。然缅军纪律不严，进锐退速，以此为英军所挫。英军亦不习其水土，地险饷艰，瘴恶多疾，难以深入。本欲退师，反声言直取阿瓦，长驱而进。缅军屡衄气阻，遂卑辞求和，乃割阿腊干、麻尔古达阿依底尼色领沿海之地。复偿英吉利兵饷，始罢兵。然缅甸陆战全恃坚锐木栅，环绕重濠，有时英吉利兵马亦为其所拒。其国赋税，如东方中国之法，以田地钱粮为正供，此外征收外国贸易税饷不作正项，别贮内库。缅甸、暹罗、安南皆然。传闻缅甸国王与西洋构衅讲和，津贴英军兵饷，咄嗟立办，可见其国之富。缅甸、暹罗、安南，政事大略与东方各国相同，权柄专制于王，百官不得专擅。所用律例，皆合中国印度两国之律，参酌损益而行。如缅甸之职官，若翁疑士，若敬翁多士，若阿达翁士，皆在国都助王理政，并有律官出外分辖各部，征收赋税，解都供饷。部民有事，先赴诉麦翁衙门，次始上控于罗都衙门，由罗都而达于王，以判断之。有烙铁之刑，有咒诅之法，斟酌施用，与印度略同。印度外，咸知文字。惟缅甸语音庞杂，有用佛语，有用鞑鞑里音语，有用中国音语，参杂而成，欧罗巴人不能分其句读，望之如一长句，说写俱难。书籍皆编贝叶，国王则以象牙为篇页，以金饰边，贮以描金盒，并有雕刻成字，而金饰之者。藏书虽富，专以讲论神明为主。而史记音乐，医学画谱，谓之杂说小书。惟安南文学独遵中国，较缅甸、暹罗为深奥。缅甸屋舍最陋，以竹插地，用藤系架，用席作墙，而苫覆之，即谓落成。大者不日可完，小者顷刻立就，虽潦草而便易，风雨坍塌，既无推压之虞，回禄偶遭亦无荡折之戚。伊底河发源西藏，南流经缅甸之麻罗城而入海〈（案

：伊底河谓雅鲁藏布江，即大金沙江也）〉。

缅甸国，东界南掌暹罗，西界孟阿腊，南界海，北界西藏、云南。以阿瓦为国都，领部落四十有八，户口约四百万名。〈（原本）〉

阿瓦〈（国都）〉 门额尔西糜哥里布江墩冻米拉比那古巴尔麻芝补穷皿打梗翁蔑拉布拉光墩邦布磨观边定拉公厘高梗蒙厘布郎欲河班沙巴宕谬麻拉西格呀都麻渣布阿拉干渣岩特曩休蔑都皿特新达比衣谬呢特济骚麻欲疏兰梗皿巴麻尔打曼东俄底奴彪波丹谬哥士皿衣岩知那麻几尔巴三西利 晏麻罗〈（大金沙江，由此城西入东印度）〉 母哇〈（原本止此）〉

○沿革〈（原无今补。止取其涉海国者）〉

《新唐书》：骠，古朱波也。自号突罗朱阁婆，国人曰徒里拙。在永昌南二千里，去京师万四百里。东陆真腊，西接东天竺，西南堕和罗，南属海，北南诏。地长三千里，广五千里。东北袤长，属羊苴咩城。凡属国十八，曰迦罗婆提，曰摩礼乌特，曰迦黎迦，曰半地，曰尔巨，曰坤朗，曰偈奴，曰罗聿，曰佛代，曰渠论，曰婆梨，曰偈陀，曰多归，曰摩曳，馀即舍卫瞻婆阁婆也。弥臣至坤朗，又有小昆仑部，王名茫悉越，俗与弥臣同。由坤朗至禄羽，有大昆仑，王大于弥臣。由昆仑小王所居，半曰行至磨地勃柵；海行五月，至佛代国。有江支流三百六十〈（案：此当即大金沙江）〉。有川名思毗离芮，土多异香。北有市，诸国估舶所凑，越海即阁婆也。十五日行逾二大山，一曰正迷，一曰射鞞。有国俗，与佛代同。经多茸补逻川至阁婆，八日行至婆伽卢国，土热，衢路植椰子槟榔，仰不见日。王居以金为璧，厨覆银瓦，爨香木，堂饰明珠。有二池，以金为堤，舟楫皆饰金宝。骠王出，舆以金绳床，远则乘象，嫔史数百人。青璧为圜，城周百六十里，有十二门，四隅作浮图。民居皆铅锡为瓦，荔支为材。俗恶杀，拜以手抱臂，稽顙为恭。明天文，喜佛法，有百寺，琉璃为璧，错以金银丹彩，紫矿涂地，覆以锦罽。王居亦如之。民七岁祝发至寺，至二十有不达其法，复为民。衣用白氎朝霞，以蚕帛伤生不敢衣，戴金花冠翠冒，络以杂珠。王宫设金银二锺，寇至焚香击之。以占吉凶有巨白象，高百尺，讼者焚香踞象前，自思是非而退。有灾疫，王亦焚香对象踞自咎。无桎梏，有罪者策五竹捶背，重者五，轻者三，杀人则死。土宜菽粟稻粱，蔗大若脰，无麻麦。以金银为钱，形如半月，号登伽佗，亦曰足弹佗。无油以蜡杂香代炷，与诸蛮市，以江猪白氎琉璃罽缶相易。妇人当顶作高髻，饰金珠排衣，青婆裙，披罗段，行持扇，贵家者傍至五六。近城有沙山不毛地，亦与波斯罗门接距。西舍利城，二十日行。西舍利者，中天竺也。南诏以兵强地接，常羁制之〈（案：缅甸与东印度接壤，惟《唐书》略见端倪，故节录之。元明与中国构兵，皆于海国印度无涉，故不录）〉。

谢清高《海录》曰：乌土国，在暹罗蓬牙西北，疆域较暹罗更大。由蓬牙陆路行四

五日，水路顺风约二日，到佗杯，为乌土属邑，广州人有客于此者。又北行百馀里到媚丽居，又西北行二百馀里到营工，又西行二百馀里到备姑，俱乌土属邑。王都在盎画〈（盎画即阿瓦之音转）〉。由备姑入内河，水行约四十日，方至国都。有城郭宫室。备姑乡中有孔明城，周围皆女墙，参伍错综，莫知其数。相传为武侯南征时所筑，入者往往迷路不知所出。云北境与云南接壤，云南人多在此贸易。衣服饮食，大略与暹罗同，而朴实仁厚，独有太古风。民居多板屋，夜不闭户，无盗贼争斗。由备姑西北行，沿海数千里，重山复岭，并无居人。奇禽怪兽，出没号叫。崇岩峭壁间，多古木奇花，所未经睹。舟行约半月方尽，亦海外奇观也。彻第缸在乌土国大山之北，数十年来，英吉利新辟土地，未有商贾，其风俗土产未详。

国史馆《郭世勋传》：乾隆五十五年，暹罗国王郑华表称，乾隆三十六年，被乌土国构兵围城，国君被陷，其父郑昭克复旧基，仅十分之六，其旧地丹著氏、麻叨、涂怀三城尚被占据，请诏敕令乌土国割回三城。诏以乌土国即缅甸别名，前此缅甸孟驳与暹罗绍氏构兵，非新酋孟陨之事，今缅甸已易姓，何得上烦中朝，追索侵地，命两广总督郭世勋檄谕止之〈（案：暹罗国别号赤土国，则缅甸之号乌土，均以坟壤异色得名）〉。

《地球图说》曰：阿瓦国东界暹罗，南界旁葛刺海，并印度洋，西界天竺国，并旁葛刺海，北界西藏国。又内有三小国，即阿瓦、皮球、马搭班是也。其百姓约有二百七十万数，都城名阿瓦，城内民五万。民矮小而健，不辞劳瘁，善经营，巧胜暹民。但贪心太重，一若以天下与之而犹未足也。首不戴帽，身穿夏布，女裙而不裤，廉耻全无。好佛教，日以花果食物供养其僧。僧皆黄衣游食，近有耶苏门徒，传授圣教焉。刑政与他国迥异，君之名固不敢呼，君之姓亦毋题说，有触即加大辟。又男至二十岁以上者，三年内必以一年供王事，或佃，或兵。有至大之江，名伊犁瓦。地产金、宝石、大树、土油、盐硝、象、鹿、牛、马等，所货物茶叶、布帛等。

《地理备考》曰：阿瓦国在亚细亚州之南，北极出地六度至二十七度十分止，经线自东八十九度四十五分起，至九十八度五十分止。东至中国云南暨暹罗国，西连印度国，南接榜加刺海湾，北界亚桑国。南北相距五千五百里，东西相去二千里，地面积方约四十万零五千里，烟户七兆馀口。本国地势，北方则冈岭层叠，迤迤绵亘。中央则邳陵稀疏，峻峭无几。南方则平原坦阔，恒遭淹浸。其伊拉瓦的西当萨密德那塞，灵亚刺千等，乃本国最长之河，纵横贯彻，田亩甚腴，谷果极丰，禽兽草木，靡弗繁衍。土产金、银、铜、铁、锡、铅、钻石、琥珀、红玉、窝宅、碧玉、琉璜、花石、信石、绵花、烟叶、甘蔗、蓝靛、木料等物。地气温和，非雨则热，每岁如常。王位世袭，所奉之教，乃释教也。其贸易通市，与印度中华居多。本国初为北古国管辖，迨既自异别为一国。乾隆五年国变乱，贼寇猖獗，越十二载，北古国人，复行攻夺，时本国人亚隆巴拉率众逐之，大获全胜，兴国立业，践祚为君。其后历代嗣君开辟疆域，将国内外为十有一部。一名阿瓦，乃本国都也。建于伊

拉瓦的河左，茅舍居多，木室亦有，至若砖瓦屋宇，为数无几。一名亚拉于部，一名加赛部，一名仍塞兰部，一名马尔达般部，一名美尔固宜部，一名北古部，一名达歪部，一名德那塞灵部，一名云山部。其通商冲繁之地，曰郎昆，曰波罗美，曰业能军。此外又有进贡属地，一名加星安，一名萨巴音，一名见，一名达翁苏，一名遥，一名巴刺安，一名森，一名拉袜，一名达挠，一名萨拉翁。

《外国史略》曰：缅甸国，北极出地自十五度四十五分及二十七度二十分，长二百六十里，阔一百里。北连云南，南连暹罗，并马他班海隅，东连老掌并云南，西连英吉利藩属，及旁甲拉海隅。海滨甚低，馀皆山。产铁、铜、锡、红铜、铅、金、银、石油、火硝、食盐，红蓝宝石最多。石油由深井汲出，色青厚，烧之出黑烟。林有坚木，宜造船。亦出漆油，并紫梗禾、甘蔗、粟米、豆、烟、绵花、青黛。内多象、虎、豹、熊、野猫、野鸡、鹌鹑、金鸡、沙佳鹑。居民约八百万。地多荒芜，罕耕种。其人身高体健，颜色黑紫，雕题文皮。男女多裸身，耳穿孔，挂金银饰，性贪不喜笑，性诈而傲，崇佛养僧。其僧黄衣髡首，乞食居寺，多造塔，以金镶佛像。民贫官富。语多异音。中多老掌文莱之民，皆拜佛。山内有野民，族类愈不一。缅甸人能织文花布，亦能刻花木，造奇巧金饰，惟不知天主教。

人好武勇，性酷虐寡欲而惰。男逸女勤，不滥饮食，每饭恒嚼槟榔荖叶，好饮酒，不好杀兽，不食牛肉、牛奶。男女均以黑色染指甲口唇。若敬人则坐不立，男女往来，不以苟合为辱。所立规矩法律，俱由印度来，亦多与中国合。其始在周景王时，距今二千三百九十一年前，由印度迁至。一千七百四十年前迁都于他处，今日尚存其庙古迹。于元顺帝三十一年，始建今之阿瓦都城，历传三百六十九年。有文莱岛之民，兴师败缅，后再战败，而文莱反归缅。乾隆十四年，文莱买西洋火器，并募荷兰、葡萄牙各国人，协力攻缅，陷其都，逐其王，据其国。有一小官，起义兵百人抗拒，既而国民云集，尽力恢复。后中国兵两侵其地，多病瘴疠退师。缅人掠其军以配土女，别居新城，故今缅地尚有汉人苗裔。又与暹罗屡交战，夺暹全境，兵气益骄，后缅遂以兵侵印度，英人击退之。道光四年，国王再侵英之印度界。时缅已东盟越南，南服暹罗，觊觎印度之富，遂倾国而来，英军两年鏖战于东界，不服水土，毙者甚众。英终不退兵，复添新军，水陆并进，声言将捣其国都，缅王畏惧，乃求会于南海边地，前时战费，至九百万两。后彼此息兵，亦无侵暹罗之事，但尚时与英人肇衅。道光二十六年，更立之君，亦被其世子废逐失位。

居民各族类，共约八百万。地分四千六百土司。民贪财不善通商。贸易皆在内河，若米若鱼盐，运出者若石油、白糖、蒜纸、儿茶、黄铜、金等器。其漆器绸缎，皆由中国来。由以拉瓦的江，达班摩。与云南通商，琥珀、宝玉、象牙、槟榔、燕窝等物，所买者绸缎，布匹、金箔、糖果、纸等货。缅人亦与老掌交易，老掌族类最朴实，山内多宝玉、虎、象，随时进贡，战亦出助阵焉。

缅都曰阿瓦城，瓦垣而竹屋，街衢甚广，庙耀宫宏，居民三万。北极出地自二十一

度五十分，偏东七十六度。道光十九年，地震。安拉补腊，为唐人所居，大镇国之旧居也。居民二万，兰云、马他、万巴心三城，皆海口。兰云城与印度贸易，产坚木，多运出造船，每年价银十五万两。运入者多布匹，附近城有大庙高塔，愚民随时赴之，烧香拜佛，用重金镶塑木像。前时之都，属文莱国者，称曰破米，多古迹。

王操全权，办事不以律。国中产业，随意夺给。有事则征饷，纳税无定则。王所乘白象，以金镶厩，嵌以宝玉，与宫无异。履花毡，食珍羞，人敬象如大臣。王户俱会同操权，有亲政大臣一位，辅政官一位，副理政事通事官一位。各部立帅，各郡置官，有土司调司，皆世袭无俸禄，故勒索为常。

《地理备考》曰：英吉利在亚悉亚兼摄之地在印度缅甸之间者，一曰亚桑，纬度自北二十五度三十分起，至二十七度四十五分止，经度自东八十八度二十四分起，至九十三度三十分止。东北界西藏，西连印度国，南接阿瓦国。长约一千一百馀里，宽约五百里，烟户一兆馀口。境内冈岭络绎，河之长者曰的各隆，曰矮斯，曰的索也，曰登塞里亚。田土腴腴，谷果丰茂。土产金、银、铜、铁、茶、烟、绵花、甘蔗、胡椒、香料、材木、煤炭等物。地气湿热，技艺精良，贸易昌盛。首郡名若尔合德，昔自为一国，今为英吉利所兼摄。

【阿刺千部】在阿瓦国之西，长约一千八百里，宽约二百里，烟户二兆六亿口。境内冈陵平原，两相间隔。田土肥饶，谷果丰稔，鸟兽草木，靡弗充斥。土产金、银、盐、蜡、象牙等物。地气湿热，技艺寥寥。贸易兴隆。首郡亦名阿刺千，昔自为一国，今为英吉利所兼摄。

【马尔达般部】东连暹罗国，西枕大海，南接业地，北界北古地，统计地面积方约一万三千五百里，烟户五万馀口。境内冈陵络绎，田土腴厚，谷果丰登。土产米、盐、蓝靛、绵花、豆蔻、烟叶、象牙、木料等物。地气温和，昔本阿瓦国一部，今为英吉利兼摄之地。

【达威部】东接暹罗山，西枕海，南界巴展河，北连马尔达般部，长一千一百五十里，宽一百五十里，地面积方约一万七千里，烟户三万口。境内冈陵延袤，田土膏腴，谷果丰稔，鸟兽草木，靡弗蕃衍。土产锡、蜜、盐、靛、象牙、燕窝、沙藤、材木、豆蔻、香料等物。地气温和，人安物阜，其地分为三大部：一名业，一名达威，一名德邦塞灵。昔本阿瓦国之部，今为英吉利兼摄之地。以上皆受东印度榜加刺兵帅节制。

《外国史略》曰：缅甸内英吉利属地，皆缅甸让出海边地，在缅南。北极出地十一度，及十八度，长一百六十里，阔十四里。海边别有多岛，或居民，或荒芜。东界皆山，高约三四百丈。地亦丰盛，林多坚木，可建船屋。所出之物，如蜡、象牙、

兕角、鹿肉、燕窝、海参、胡椒、槟榔、蚝鳖，山内出红铅锡。居民多缅人，时英人据其地，共十一万二千四百口。因与暹罗交战，大半荒芜。英人招百姓以保护其地，民数顿增。民多文莱人，流徙至海边者。山内有加连土蛮未向化，却喜听耶稣之教。

别有英国所据之地，曰马他班，在三支河间。地丰盛，北方归缅甸。天气清爽，不苦热，地荒芜，盖缅甸暹罗两国战场也。现已平靖而民未兴复。惟邻国之民，及汉人咸迁其地为氓。英人筑新城，在港口，曰安黑。其土产木料、胡椒、绵花、青黛、烟、象牙、槟榔、豆蔻、颜色等物。多奉耶稣教，敬事教主。

他威部，北极出地自十度三十五分，及十五度三十分。长百一十里，阔十里。沿海东连暹罗，广延皆山，高四百丈。其海边多港汊，其洲低，其岛皆石。产锡，多象牙、木油、红木、燕窝、海参、木料、槟榔。民性愚野，奉天主教。前缅甸官勒索居民，有资即夺，故百姓偷惰。今则各安其分，又汉人多迁居之。每年国所费银五万五千两。其护守兵千五百丁，水师船三只。

地那悉林部，地最窄，在海边，南及芜来由地，皆密林，难通路。其岛繁多，地甚硗瘠。产檀香、巴马油、紫梗树、脂乳香，南果尤香美。在海边，燕窝、海参、珍珠，皆敛之民。其民无居处，惟浮海面，绝不耕田，止以海味为食。其都会曰墨危，英军士常攻击此地，盖阿瓦国都，恃地险瘴恶为负固，其濒海之地，则暹罗、英吉利常吞并之焉。

○附入缅路程〈（见师范滇系）〉

由腾越州城南六十里为曩宋，为南甸土司故为府。由南甸左行六十里，为龙拘树，又五十里，为杉木笼山，山之险者也。又三十里为蛮陇，又六十里为陇川土司，又四十里为邦中山，又一百里为猛卯土司，凡四百五十里。自南甸右行二十里至沙冲，二十里至猛宋，五十里至黄陵冈，五十里至千崖土司，八十里至盏达土司，三十里至太平街，又自翁输三十里至铜壁关，凡三百五十里，此自腾越州南分左右之里数也。自陇川八十里，至腊撒土司，户撒在其北三十里。自腊撒至铁壁关八十里，由铁壁而左，二十里至蛮等，七十里至虎踞关，又五十里至南喜，三十里至等拐，又十里至天马关，此境内南行之里数也。至于临夷之路，则有五。一自腾北道四程至茶山界，自腾西道八程至里麻界，十程抵孟养境。一自州南一程至南甸，二程至千崖，四程盏达蛮哈山，十程由蛮暮至猛密，二十七程至缅甸，三千里有奇至南海。一自腾南一程至南甸，四程至陇川西南，又十程至猛密转达缅，自陇川东道又十程至木邦，转达景线国。一自腾东南道二程至蒲窝，二程至芒市，转达镇康，旧谓古临夷之路，皆抚剿所必由，惟茶山而西，号野人境，峭壁不可梯绳，弱水难于舟筏。而茶山里麻，前明设有两长官司，明季时为野人所驱，奔入内地，今尚有早土司后裔，已为齐民。其地闭塞不通久矣。至阿瓦之道，出铜壁、铁壁、虎踞三关，

皆可乘船赴緬。惟猛卯出天马关，陆路多于水道。前用兵时，密探其路，自天马关五十里而小滥，又五十里而逗布，三十里而猛卡，四十里而蛮空，四十五里而猛老，四十里而猛勒，四十五里而蛮黑，六十里而猛密土司，三十里而布亚，七十里而章谷洞，三十里而尼孤，凡五百九十五里。然后下船，两日即抵阿瓦，历彦得上浆谬直埂至阿瓦，约三百里计。天马关至阿瓦，水陆兼行，不过九百里耳。而明将军征緬，由木邦出天生桥，取宋寨。其地散漫，小径丛出，深入无继，必至溃散。传经略由万仞关四十里历猛弄蛮埋，止丹来戛南盏河。又三十里出戛鸠，渡江十里蛮乃，三十里蛮赧，又三十里麻里而至猛拱，百五十里南乌赖，三十五里沙河，三十里深沟，又六十里而至孟养。其地至阿瓦甚远，且路径不熟，炎天瘴盛，因回师而驻老官屯。其路则出铁壁关五十里而至猛卡，又五十里而至楞木，又十里而至洗帕河，历猛允猛映而至新街，赵宏榜所败绩处也。南行即为老官屯，临大金沙江，贼分扼江之东西。我军逼其东寨而驻，故造船之议，谓元人征緬以此取胜也。要在熟悉地势，多集兵力，出其不意耳。緬人善于操舟，舟之头尾，多置西洋大炮，旋转如飞。赵宏榜新街之败，为其炮所击溃。又提督常青，言二十四年，驻兵江岸时，月夜见江中出数象，象背载十人，逆流起伏甚捷。水中用象载兵古所未闻，并志之以念知兵者。

○附大金沙江考〈（魏源）〉

緬甸之西，与五印度国分壤，以大金沙江为界。其源出于西藏，即雅鲁藏布江也。源出后藏西界之阿里达木楚克喀巴布山，会诸水东流二千五百余里入中藏，复会木伦江东南流千二百余里，经中藏之南界，过緬甸之阿瓦都城，转西南流至东印度，会恒河注南海，其源流皆不入云南境。滇人谓之大金沙江，对岷江所会之小金沙江而言。小金沙江入东海，大金沙由緬甸入南海。故黄贞元谓此即禹贡之黑水。其说曰大金沙江澜潞三水虽同出吐番，同入南海，然大小远近迥殊，潞四倍于澜，大金沙十倍于潞澜。潞所出源近而狭，大金沙江上源相传近于阩国。自里麻茶山至孟养极北，号赤发野人境。峭壁不可梯绳，弱水不任舟筏。土人惟远见川外隐隐有人马形，皆生番之域也。今姑略其源，惟自经流交流入海可见者言之。水流至孟养陆阻地，合大居江、槟榔江二水方名大金沙江，盖以别丽江北胜武定马湖之小金沙江耳。自此南流至猛掌，有一江西来入之，又南下经蛮莫，有大盈江，自腾越经镇夷南甸干崖，受展西茶山古涌诸水，伏流南牙山麓，出蛮莫来入之。又经蛮法鲁勒孟拱，遮鳌管屯大小菖蒲峡，至戛撒。昔年緬人攻孟养，以船运饷到戛撒，为孟养所败者，此江也。正统中，蒋雄率兵追思机法为緬人所压杀于江中，亦此江也。江自蛮莫以上，山耸水陡，正统中郭登自贡章顺流不十日至緬甸者，亦此江也。下流经温板有龙川江，自腾越经界尾高黎其山陇川猛，乃猛密所部来入之。下流又经猛、吉准、古温、板猛、戛马、达刺至江头，江中有大山，极秀耸，山有大寺。又有一江，自猛辨、洗戛、母南来入之。又经止即龙大马革底马撒路马入南海。其江自蛮莫以下，地势平衍，阔可十五里有奇，益南江益宽，流益缓，緬人操舟如涉平地，至是江海之水，潒为一色矣。按此说所指大金沙江，其上流即今雅鲁藏布江。在西南

荒徼外，其下流又径缅甸，始终不入云南，去禹贡雍梁二州甚远，因难指为禹迹所导之黑水。然此江中段则为缅甸，与东印度分界。下游则金沙江，会冈噶江，全由东印度入海。冈噶江，即佛经之恒河。其与金沙江会以后，谓之安日得河（又曰安治市河，又作澈治斯河）。故《坤舆全图》无大金沙江，盖统归于安日得河也。英夷所绘大清国图，有雅鲁藏布江，会恒河入海。所绘印度图，则有蒲兰蒲达江，自东而西，会澈治斯河入海，即大金沙江西会恒河之异名。盖图中国则用中国之名，图外国则用外国名也。榜葛刺跨恒河之东西两岸，惟以东距大金沙江与缅甸廓喀等国分界。英吉利曾攻印度，乘舟溯流，直向阿瓦，而澳夷新闻录中，又尝恐中国兵假道缅甸，攻东印度，皆以此江下游，直抵孟加腊之故。《一统志》谓其西南流入厄讷特珂国，亦指其下游入东印度之恒河而言，第语之不诈。故于《坤舆图说》之安日得河，欲指为恒河，则无大金沙，指为大金沙，则无恒河，不知二大水下游汇合为一也。大金江未会安口得河以前，其东岸为缅甸，西岸为廓尔喀诸国。及会安日得河以后，东南岸下游为英夷所夺缅地，西南岸为榜葛刺，盖古里地，介金沙江及恒河之间。而榜葛刺则在恒河入海口，岸皆东印度境。其缅甸云南间，尚有南掌、胡卢、景线、景迈等国，皆入贡中朝。以非滨海，不入是志。

魏源曰：乾隆三十四年，缅甸老官屯之役，贼树栅固守，官兵鏖战弥月，坚不可拔。即《四洲志》所谓缅甸兵法，专以大木立栅，自环为不可败。有时英吉利兵亦为所遏，盖缅甸南濒海，尝与英夷之印度交兵，故英夷知其长技也。又考刘健《庭闻录》，顺治十八年二月，李定国白文选攻缅甸于阿瓦，阿瓦城甚高大，城外二江，大曰兰鸠，小曰南葛腊，环城三面皆水，惟一面通陆。自白文选师旋后，并凿之引水为湖留堤三道，置木城其上，距城四里。定国遣人索永历不应，而于木城之外，更立木城，出兵守之。有间木城前复立一城，步步前进，既逼定国营，始出兵大战，前队皆象，中有花象，善突阵，为群象先。定国视战地，当象来处有石桥，自持长刃以待，象鼻卷刃立断，负痛反奔，群象皆奔，文选定国鼓噪乘之，斩其大将，边牙猱杀其兵。万缅甸收馀兵保栅固守，此即树栅自固，步步为营之证，其失在于出栅野战，反以象阵自挫前锋，故为白李所败。惟败后而木栅尚存，退可以守，故阿瓦终不得破。所谓善战者不败，善败者不亡也。明瑞哈国兴，皆尝登山俯瞰，破其一二栅，而十馀栅皆溃。及老官屯之役，贼惩前失，先据高立栅，又固守不出战，我兵百计攻之，终不能拔。是缅兵短于野战，长于凭栅，具征《四洲志》所言之不妄。故上兵之纪律，敌莫能御，中兵之纪律，敌莫能侮。观于缅甸之足拒夷兵，而知我之所以守，观于安南札船之足慑夷艇，则知我之所以攻。

卷十三

英荷二夷所属葛留巴岛〈（有二洲相接，一下港，即古阁婆，亦曰诃陵。一曰葛留巴，即小爪哇也。一作交留巴，一作加留巴）〉

明张奕《东西洋考》：下港一名顺塔，唐称阁婆，在南海中者也。一名诃陵，亦曰社婆，元称爪哇。《一统志》又名蒲家龙，甲兵为诸番之雄。加留巴者，下港属国也。半日程可到，风土相类。华船将到，先以橘一笼，小雨伞二柄，送番目。番目报国王，比到港以果币进王。有华人为财副者四人，番财副二人，华人谙夷语夷书为通事，船各一人。其贸易王置二涧，城外设立铺舍，凌晨各上涧贸易，至午而罢，王日征其税。又有红毛荷兰番来下港者，起土库在大涧东。佛郎机起土库在大涧西。二夷俱夹板船，年年往来贸易。其本地夷，则用铅钱，铅钱十，当西洋一。下港为四通八达之衢，华船与番船贸易盛甲诸岛。《皇清通考·四裔门》：葛刺巴，本爪哇故地，巫来由种也。后属荷兰国，在南海中。距福建厦门，水程二百八十更，计万六千八百里。闽广间人，浮海为业者利其土产，率流寓不返。康熙五十六年，以葛刺巴口岸多聚汉人，恐浸长海盗，禁止南洋往来。其从前出洋之人，限三年回籍，然亦尚有留者。雍正五年，弛洋禁，嗣后通市不绝。初葛刺巴自明季为荷兰人所据，委夷目镇守。汉人居之者，以数万计。生长其地，曰上生仔。司汉人贸易者，曰甲必丹。人有罪则流戍西陇。西陇在西洋中，距葛刺巴甚远，荷兰旧国所属地也。六年闰六月，为群番所扰，荷兰力不胜，遣流人御之。许立功后，令还葛刺巴。诸流人奋勇效力，战屡捷。群番败走，荷兰既有立功赎罪之令，又虑释还流人，则西陇孤弱。一再令葛刺巴调无辜汉人往代。时有甲必丹珽者，以汉人在此贸易，惟领票输银，无调取之例，不受命，番目拘之。被徙者，先后不胜计。于是汉人大恐，鸣金罢市。番目怒，举火鸣炮相攻，杀伤颇多。署福建总督策楞、提督王郡，以闻。策楞又奏言被害汉人，久居番地，屡奉招徕，而自弃王化。今被其戕杀，孽由自作。但葛刺巴以地隔重洋，恃其荒远，残害罔忌，恐嗣后扰及商船，请禁止南洋商贩，俾知畏惧。俟革心悔罪，再请恩施。广东道监察御史李清芳奏言，商人往东洋者十之一，往南洋者十之九。一加禁遏，则江浙闽广海关税额必缺，每年不下数十万。且民间贸易皆先时而买，及时而卖，预为蓄积，以俟流通。若一旦禁止，商旅必至大困。应请止停葛刺巴一国贸易，此外南洋不宜尽禁。既而王大臣会同兵部奏言，今闻葛刺巴已将夷目黜责，于我船返棹时加意抚慰护送，嘱令再往，并无扰及商客之意，宜仍准其通商。从之。

陈炯《海国闻见录》：麻刺甲，南隔海，对峙大山为亚齐。系红毛人分驻。凡红毛甲板往小西洋等处贸易，必由亚齐经过，添备水米。自亚齐大山绕过东南，为万古屡尽处，与葛刺巴隔洋对峙。红毛回大西洋者，必从此洋出，然后向西南过乌鬼甲，绕西至大西洋。就中国往葛刺巴，厦门计水程二百八十更。原系无来由地方，为红毛荷兰所据。分官属名曰甲必丹，外统下港、万丹、地间三岛。下港产胡椒，万丹另埔头，地间产胡椒、檀香，而葛刺巴盛甲诸岛，洋舶云集。中国、大小西洋、

白头乌鬼无来由各番珍宝物食，无所不有。荷兰建城池，分埔头，中国人在彼经商耕种者甚多。年给丁票银五六金，方许居住。中国人口浩盛，住此地何啻十数万。近荷兰亦以新唐禁革，不许居住，令随船回。茶盘一岛，居昆仑之南，毗于万古屢山之东，皆南洋总路水程分途处。岛番捕海为生，产佳文草，顶细而长者年仅足二席之用入王家辟虫蚁，值价四、五十金，次者二、三十金，最贱有一、二金者。

谢清高《海录》：葛刺巴，在南海中，为荷兰所辖地。海舶由广东往者。走内沟则出万山后，向西南行，经琼州、安南，至昆仑，又南行三四日，到地盆山，万里长沙在其东。走外沟则出万山后，向南行少西，约四五日，过红毛浅，有沙坦在水中，宽百馀里，其极浅处止深四丈五尺，过浅又行三四日，到草鞋石，又四五日，到地盆山，与内沟道合，万里长沙在其西。沟之内以沙分也。万里长沙者，海中浮沙，长数千里为安南外屏。沙头在陵水境，沙尾即草鞋石。船误入其中，必为沙所壅，不能复行，多破坏者〈（遇此须取木板，浮于沙面，人卧其上，数日内若有海舶经过，放三板小舟拯救，可望生还。若直立沙中，数刻即为沙所淹没矣）〉。七洲洋正南，则为千里石塘。万石林立，洪涛怒激。船若误经，立见破碎。故内沟外沟，亦必沿西南，从无向正南行者。由地盆山，又南行约一日到网甲，经葛刺巴峡出峡口，又南行过三洲洋，约三日到头次山，即葛刺巴边境也。上有中华人所祀土地祠，又行二十馀里，到海次山。有数岛，一以居中华之为木工者，一居疯疾，一为罪人绞死之所。其余皆以囤积货物。过次山则至葛刺巴山。山纵横千里，有城郭炮台，南海中一大都会也。本荷兰所辖地，后英吉利师侵而夺之。荷兰行成仍命管理，而岁分其贡税焉。荷兰番镇守此地者，三四千人。又有乌番兵数千。凡荷兰分守南洋，及小西洋各国者，俱听葛刺巴酋帅调遣。土番亦无来由种类，俗尚奢靡，宫室衣服器用，俱极华丽。出入俱驾马车，与明呀喇、新埠、息辣各处相同，而葛刺巴为尤盛。中华人在此贸易者，不下数万人，有传至十馀世者。然各类自为风气，不相混也。民情凶暴，用法严峻。中华人有殴荷兰番者，法斩手。戏其妇女者，法绞。乌番兵俱奉天主教，死则葬于庙。荷兰番死，则葬于坟园。土番风俗，与大泥吉兰丹各国同。土产落花生、白糖、丁香、咖达、子蔗、燕窝、带子、冰片、麝香、沉香〈（又曰万丹国，在葛刺巴南，疆域甚小。与葛刺巴同一海岛。土产珍珠、佳纹席极佳。国南临大海，海中有山，层峦叠嶂。）， 岑兀峻嶒。时有火焰引风飘忽，入夏尤盛。俗呼为火焰山。盖南方离火之精熾蒸郁发露。西洋番船有至者，上山探望，攀危蹊险。有山番穴处遥见之，群噪面相逐逃，稍后者，辄为所杀食。自此无敢复至者）〉。

《每月统纪传》曰：三大岛之至盛为呀瓦，即葛刺巴也。产米足敷本岛之用，胡椒、燕窝、翠羽、白糖、绵花、咖啡、苏木、木头等货，各样果实蕉子、椰子、槟榔、柘榴、柚子、菠萝、菠萝子、芒果、橙、桔等果。可恨水多鳄鱼，亦有鳞蛇，又有火山，频数地震，火出烧树屋。土番名呀瓦，回回种也〈（案：呀瓦，即爪哇二字之音转）〉。人甚朴实，勤劳耕田。性温和，戒争斗。惟人触犯之，则必雪怨乃已。又好赌博，输田屋，子妇卖身为奴。偷盗诳骗，莫胜其害，于呀瓦洲为恶俗。

礼拜之时，设虎与水牛相斗场，或死其一乃息。山内多虎，土番射猎。向来数土酋分治此洲，奉天竺国佛教。明天顺间，回回兵征服之。自后，居民改奉穆罕默德教。万历间，荷兰于其海口建葛刺巴城，以为市埠，渐乃征其土产，服其民人，迫令输贡。又别开砥利、文苏、拉圭、呀钺、马廊各埔头，并荷兰公班衙主管贸易。仓箱充实，不知荒歉。惟其分官穷极奢侈，不顾贫窶。自雍正以后，尚无大衅隙。间有土番倍叛，时烦征服。康熙、乾隆间，荷兰公使朝京都。嘉庆间，佛兰西王胜服，荷兰祖家遂派人为葛刺巴总管。是时，英国方与佛兰西连年征战，故英国总管助荷兰攻呀瓦洲，获胜。其地仍归荷兰。道光间，土酋土匪谋废荷兰之公班衙，荷兰王遣将统领兵船大费财力，始征服之。唐人之到呀瓦大洲，立埔头者，自明朝始，及至顺治年，福建同安人多离本地，往葛刺巴贸易耕种，岁输丁票银五六金。此后，每有厦门巨艘船载万馀石，赴葛刺巴及钺马廊埔头。但因水程甚远，沙礁无数，必有西洋伙长，用浑天仪、量天尺，较日出时刻，离水分度，用罗经刻漏沙，以风大小顺逆较更数，始知为某处。近日中国人口浩盛，住此地何啻十馀万。故荷兰总管禁革新唐，令随船回。然汉人流寓，富贵者甚多，荷兰兼用汉人为甲必丹，理国政掌财赋。此外，毗于、呀瓦之岛，多是马莱西土番所居，兼海贼无数。若地汶岛及池门屿皆有荷兰与葡萄牙建城镇守。产檀木、蜜蜡等货〈（马来西一作无来由）〉。《岛夷志》：爪哇地平衍，田膏腴，五谷富饶倍于他国。民不为盗，道不拾遗。谚所谓太平閤婆者是也。

《万国地理全图集》曰：呀瓦岛，南极出自六度至九度，偏西自一百度至一百九度，巽他海峡隔之故，与苏岛不接。广袤方圆一十三万七千方里，民居六百万丁。内横一带山峰，最高者一千二百丈。原有火山地震，果实繁多，珈琲、米谷、白糖、蕉子、椰子、槟榔、柘榴、柚子、波罗蜜、芒果，自然生茂。众地之中，惟呀瓦乃乐土。其土人甚老实温和，但人触犯之，埋恨必报。猛如怒虎，不论好恶，触辄刺杀。最好赌博。礼拜之时，设虎与水牛相斗之场，众民云集。土虽盛而农夫甚贫。明朝年间，汉人已到呀瓦地。经商获利，给丁票银，每年一名五六员。至今中国人口浩盛，住此地何啻十馀万。荷兰人历二百有馀年，据住其地，惟东方尚存土君，毫无权势。荷兰自取各物产而卖之，每年将银五百万员归国帑。但内地民往往不悦，肇衅交战。内海各处，海贼肆掠，而荷派巡船擒治之。其都曰葛刺巴，经商甚盛。另有北滨、砥利文、苏拉圭、呀钺、马廊埔头，皆运出珈琲、白糖、米谷。

《海岛逸志》曰：葛刺巴，南洋一大岛国也。厦门扬帆过七洲，从安南港口，历巨港麻六甲，经三笠而入屿城，至其澳。计水程二百八十更，每更五十里。距泉州约一万四千里，可到其国。面北背南，后屏火烟山，其外则南海也。左万丹，右井里汶，前则屿城罗列，门户坚固，城池严峻。地域雄阔，街衢方广。货物充盈，百夷聚集之区，诚一大都会也。但其地势卑下，天气炎热，四季皆如夏候，炎风暴厉，触之生疾。河水甘凉，浴之却病。春雨秋旱，岁只一收。而田土肥沃，耕种易熟，米价平贱，人民富庶。货物则皆各国辐辏以赴贸易，非本岛所产也。其所统辖，有北胶浪、三宝垄、竭力石、四里猫、马辰望、加锡、安汶、万澜、涧仔低、万丹、

麻六甲等处，不下数十岛。闽广之人，扬帆而往者，自明初迄今，四百馀载，留寓长子孙，奚止十万之众。巴地本瓜亚国也，荷兰设计笼络，纳其租税，施号令，设法度，盘踞海口，征课餉，给文凭，慎出入，严盗匪，管束诸夷。其人隆准赤发，沉潜善虑，故能冠诸夷之上。其官职皆禀命于祖家之国主，巴酋不敢自专也。酋有大王、二王，双柄伽头，山海美色，葛内外淡扳公、杯突公、勃垄诸名目，其分镇各处者，以地之大小，授职之尊卑。瓜亚旧酋处于山中地，名览内，称巡栏，如汉之称单于，唐之称可汗。其餘各处，并称史丹，俱尊览内为巡栏。其官职有二，把智淡扳公，把低，各有副，如中军以代行其事，其升降黜陟，皆听命于和兰。华人自明永乐时，三宝太监郑和等下西洋采买宝物，至今通商，来往不绝。于冬至后厦岛，开棹廿馀日可达巴城，连衢设肆，夷民互市，贵贱交易，所谓利尽南海者也。富商大贾，获利无穷。因而纳贿和兰，其推举有甲必丹，大雷珍兰，武直迷，朱葛礁，诸名目，俱通称甲必丹。华人或口角，或毆斗，皆质之甲必丹，长揖不跪，自称晚生。其是非曲直，无不立断。或拘或挞，无容三思。至犯法大罪，并嫁娶生死俱当申报和兰。水旱来往，皆给与文凭，不得滥相出入。其用法之森严，设税之周密，大约可见矣。惟人命则不问邻右，而重见证，见证必审讯，斩鸡发誓，方敢画押定案。所以杀人或弃之道路，或流之沟洫，皆置而不问者，无敢作见证也。至于和兰风俗，虚名鲜实，揆之五常，多无合者。上<贝戊>其下，肆行贪酷，非仁也。夫妻反目，听其改醮，死未周月，由其他适，非义也。长幼无序，男女无别，非礼也。穷奢极欲，以终其身，不为燕翼贻谋之计，非智也。惟贸易一事，然诺必信，其庶几乎。至各岛生番，怪形异状，木处穴居，虬发文身，露体血食，无足齿及。巴城地势平坦，人居稠密，出鉴光城市以外，皆为园地。而和兰园林相接，联络数十里。楼阁亭台，桥梁花榭，穷工极巧。每七日一礼拜，于已刻入礼拜寺，讲经念咒，其拱听者，皆低首垂泪，似能感发人心也者。喧半时许，各自散去，入园林优宴。尽一日之欢，不理事，以供游玩。车尘马迹衣香鬓影，相望于道，亦一胜事也。馀谓南洋之地有可爱，亦有可惜。天气不寒，频年如夏，百花畅茂，四季俱开。冬春之际，夜雨朝晴，此时景之艳阳可爱也。中华流寓既多，俗重风雅，喜逢迎，善褒奖，穷困相投，或通谱，或瓜葛，皆无异视。童子见客，揖让为礼。婢仆见主，屈膝为敬。此人情之古厚可爱也。地土肥沃，日用平易，斗米二三十钱，鸡鹜贱于蔬菜，缙钱便可纳婢，此土产之便易可爱也。然去国离乡，举目异俗，无中华书籍以资流览，无知己良朋以抒情怀，无幽岩古刹以肆游玩，是为可惜耳。馀居巴城，未及周岁，辄迁于三宝垄，复之北胶浪。巴中风土人情，未能尽悉爰述大概，以资考鉴，且寄客中之岑寂云尔。

三宝垄，巴国所属形胜之区也。地方寥阔，物产繁多，贾帆凑集，甲于东南诸洲。北胶浪、膺森，其左右翼也。劳再年，其仓廩也。堤埭二胞糸爹，其门户也。所辖上下数千里，田土肥沃，人民殷富，为诸邦之冠。天气清凉，胜于巴城。人少疾病，粮食廉于各处，世无饥苦。风俗质朴，道不拾遗。法度严峻，夜户不闭。其所镇之，和兰酋职名鹅蛮律，又有杯突、大写、财副、新蛸、州连等处以分管，各司其事，不相混杂。凡推华人为甲必丹者，必申详其祖家。甲必丹，择吉招集亲友门客

，及乡里之投契者数十人，至期和兰一人捧书而来，甲必丹，及诸人出门迎接。和兰之人入门，止于庭中，露立开书捧读，上指天下指地。云，此人俊秀聪明，事理通晓，推为甲必丹。汝等乡耆以为何如？诸人齐应曰，甚美甚善。和兰俱与诸人握手，为礼毕，诸人退，方与甲必丹携手升阶，至堂中繾綣，叙宾主礼，其笼络人皆此类。巴中甲必丹之权分，而利不专。三宝垄甲必丹之权专，而利攸归。煮海为盐，丈田为租，皆甲必丹所有。得膺其职者，则富逾百万矣。华人自相婚姻，不屑巴产。果得佳婿，蜡烛壹双，即可为聘入赘。以后奉养极侈，婢仆百十人，各执一事。主仆分严，见必屈膝。人多惧内，家事必由主裁，婢妾必由管束。防闲谨密，其锋不可犯。夫妇携手而行，并肩而坐，甚至揽臂狎抱，不避左右。婢妾持伞障日，羽保扇风，执帨捧盒，而服事于前后者。风俗恬然，无足怪也。国中惟重食与眠，虽有急事，不即通报，必俟其食毕眠起，方敢以闻。礼拜寺楼极高，钟声四闻，日夜撞击。子午为一点钟，至十二点而止。午后为二点钟，则家家闭户而卧。路无行人，是一日如两日，一世如两世矣。余谓西南洋为极乐之地，盖中华有礼义以自节制，不敢恣其所欲。洋夷则不知礼义廉耻为何物，惟穷奢极欲，以自快其身心而已矣〈（王大海，曾赘于三宝垄之甲必丹为贵婿，以亲老辞归。此所言乃自道也。南洋原本皆作西洋，今俱改正）〉。

北胶浪，为巴国东南之区。亚于三宝垄，面山背海，列屋而居，可五六十家。南北限以栅，华人息居其中。俗呼为入芝兰〈（谓街衢也）〉。厦屋连绵，危楼高耸，西向者为甲必丹第。右有园一所，可三四亩，树林阴翳，亭名闲云，甲必丹公余游息之所。亭东百卉俱备，四时长放，殆同仙景。南有鱼池柑园，西有丝里园〈（丝里者，荖叶也。）〉两园相接，界以墙，而门通焉。园后椰树数十株，亭亭净直，围可合抱，其叶类葵扇而长，迎风瑟瑟。由入芝兰以北有庙，为泽海真人祠。栅门外为泊面〈（馆）〉，以征来往之赋税。随河而北，可半里，为外泊面，所以稽察遗漏。又四五里达于海口，其地有圣墓极灵。舟楫来往，必具香楮拜祷。由入芝兰南至苗冬，可三十里。苗冬有蔗蓆二处，旧分东西，今合为一。至鲁闽三十里，其地产木片、篱竹。又五十里至海坡，但见碧海漫漫，白云无际，天长路远，顿起故乡之思。坡尽入林至凹务湾馆，其地当万山深翠之中，寥寂异常，昼则猿吟虎啸，〈鸟氏〉鸣鹤唳。行旅往来，必结伴操戈，方敢出入。其间林可四五十里，经藤桥至日踏馆。以上皆浪中统辖。其下由岸咀葛里岭峨至三宝垄，不过百里。出入芝兰山西过河，济竹筏之渡，即磁头礼些。有淡扳公〈（番官）〉居此处。又二十里，至罗冉年，地沃土肥，夷民星聚，三宝垄之仓廩也。自此由八马垄至井里汶，计程六百里。自汶至巴城各处礼些〈（乡镇）〉，皆属巴中统辖。陆路十日可达巴城，但皆险阻难行。惟乌拔马，来往不绝。浪中所镇者为杯突，理刑者名曰大写，理钱谷者曰则副。有城曰班，有兵丁曰喏呀。城与入芝兰，只隔一河。城之南园林深邃，杰阁巍峨者，杯突居焉。巴城华夷聚会之区，街衢方广，宫室华丽。浪中山僻之地，不假修饰，自有山高水长，天然景色。至于夕阳在山，渔人返棹，行歌互答，欸乃相闻，有似楚江音节。河水不深不浅，菱茨纵横其中，仿佛苏杭景象。

万丹在葛刺巴之西境，古称阇婆国，瓜亚所居也。地广土沃，货繁人富。所产经纹幼席，为西洋最。和兰输其租税，据海口以聚集诸夷，来往交易。瓜亚之番，四处星聚。虽有国主，惟畏和兰，遵循维谨。其史丹〈（瓜亚之主）〉处于山中，所居王府，极其壮丽。王府之外，筑一小城。和兰十二人，夷兵百人，居小城中。名曰护卫，实所以挟制。史丹也。其史丹没，诸子非和兰之命不得立。瓜亚性愚蠢，皆曰彼畏我，所以输我土地之税；彼敬我，所以设城亲自护卫。计瓜亚之人，东自巴城、井里汶、北胶浪、三宝垄、臀森、竭力石、四里猫、外南旺，西自柔佛巨港占卑览房等数十区，皆其种类，众奚止百万。和兰人数千，不及其百一，大相悬绝，而能以威胁之，以利诱之，足以慑服其心就我，笼络古人尚智不尚力，信夫。

葛刺巴，古瓜亚之国，和兰所居沿海边地，未及十分之一，瓜亚人数百倍于和兰。俗质实，人愚蠢，性柔怯，皆惧荷兰，闻其名则合掌。居民杂处山谷间。种田岁只一收，于春雨后田水平满，散粟于田，则自发生，并无耘锄，稂莠不生，一穗数百粒。故南洋米价平贱。山陂斜处，亦可种粟。以锥凿地，置粟数粒，及时则自蕃茂。其粟不用磨砮，以长木槽，数人用直杵舂之，脱粟簸出，乃再舂，米粒长而栗，内地不及也。家计生产，皆妇人主之。生女为贵，赘人于室。生男则出赘于人。其室如亭，四面开窗，无椅榻，席地而坐。房中地皆铺席，施帷幄，床亦不高。坐褥茵软，枕叠如塔。大小六七级，坐则盘膝趺坐。见客以握手为礼，以槟榔为敬。富者用金银器盛之，常人用铜唾壶，大如花瓶，用以盛吐槟榔之汁。男女浑坐，无禁忌也。食不设筵，以手掬之。以牛为烹，不食犬豕。女子脚不缠，面不脂粉，首不簪花，衣不带领，裾而不裤。男子则衣有领，鬓簪花，有裤，可谓颠倒矣。百花四季不凋，开放无歇。百果花实相续，味皆美于闽广。然壤地既异，物性亦迁。黄梨、黄瓜之类，性本湿热，乃竟以为清凉之药。凡感触暑气，及风邪者服之，反能却病。蔬菜倍贵于鸡鹜，绿米粮反贱，人皆不肯竭力灌种也。巴国以风为鬼，以水为药。凡有感冒风热病作者，浴于河则愈。产妇及小儿出痘，皆浴于河，且以针挑破痘珠，揉出浓浆，竟无患者，不亦奇乎。虽甚暑，不敢露体扇风，卧必密室，施帷幄，少冒风，则病立作。故楼房屋宇，皆用玻璃为窗户，取其不透风，而内外明亮也。历览野史所载，皆艳仙家岛屿，有四时不绝之花，玻璃为户，玳瑁为梁。南洋处处皆然，无足怪者。

华人呼和兰通称曰段，和兰呼华人为秦，通称曰稽。和兰居于西北海，其人隆准赤发，面粉眼绿，不蓄髭须。衣服精洁，短身狭袖，步履佻达，与红毛佛兰西三国鼎峙。红毛国贫而强，又居咽喉之地，每被其欺凌。和兰占巴国二百余年，始因避风入巴地，见其土地雄阔，可建城池，故假守风，入万丹卑辞厚币，求于史丹〈（瓜亚渠魁镇于万丹）〉。以暂借海滨之地，修理舟楫为名，未几又以设立木棚蔽内外为请，增其岁币。瓜亚愚直无谋，又贪其利，遂被其袭破万丹并巴地。万丹者，巴国门户必争之地也。乃与巡栏〈（瓜亚之国主处览内）〉盟约，每年输纳地租。而沿海之地尽归和兰统辖。建立城池，蚕食附近。相传至今武备严谨，各城门铺塘〈（番语曰喏呀）〉，营卒罗守，昼夜匪懈。衣甲未常去身，竟岁不闻盗贼。创立美

色近厝〈（俗名病厝）〉，以收养贫病鰥寡之徒。凡人临危，无至亲者，则唤梁礁〈（和兰代书）〉作字，一如病人之意，铁案不移，付美色甘〈（和兰衙门）〉收贮，俟其亲人来领，并有逐年利息。或有园宅婢仆，以及交关欠账，俱付作字，分文不苟。稍有违约，立致囹圄，有公勃些里〈（和兰官）〉专管。山上各地，有沈万达专管。海洋关口事例，有内外淡扳公分治。城内外华人，并各种番人，皆设以甲必丹，使其自申约束。惟大罪及命案，皆送付和兰究治。其创立法度，谨慎严明，所以能久远也。和兰言其本国严寒，九月则见霜雪，草木凋零，人多百岁。及至巴国，地气蒸热，草木不凋，频年沐浴，元气发泄，人多不寿，五、六十岁为上寿矣。其巴产者发不红，而瞳亦黑，地土使然也。

英圭黎，华人呼为红毛，居于西北海之隅，与和兰相邻近。其人类和兰，衣服制度，与和兰无异。惟音语字迹各别。制作精巧，其刀铙器皿，为西北诸国之冠。在巴贸易者，皆处以土库〈（巨第也）〉。其交关亦遵巴国约束，而和兰待之甚厚，无敢有失。近有新垦之地，在麻六甲之西，吉礁之南，与大年相邻，地名槟榔屿。但其立法苛刻寡恩，华人有在其地者，皆迁徙他处，不能堪焉。

实班牙，华人呼为宋仔，亦曰大吕宋，居于西北海之隅，国名千丝腊。每发船往高奢国，采买西洋布，以贩巴国。资本极大，华夷均负其债。高奢国〈（此白帽回国也，高奢即包社二字转音）〉，在巴国之西，约水程二百馀更。华人称为些逸，其人高大多须，状甚魁梧，衣花锦袄，白练裙，以白布缠首，手持念珠。国甚富，土产西洋幼布，名绞只，次名毛里，上者每匹百馀金。有袈裟薄如蝉翼，中有纹彩，极其精致。

明末和兰据台湾，近鹿耳门，筑小城以居，俗呼曰红毛城，实即和兰也。海寇郑氏游扬海上，自南京败还，遂攻台湾，为负隅之所。和兰炮铙虽精，然孤城无援，败归巴国。其祖家国主怒，即将败归之和兰致死于巴国城楼上，至今巴国之和兰，历历能道其详。

呜呼，天道循环，无往不复。原夫和兰夷众之据有巴地也，以厚币甘言，与瓜亚土番，暂税其牛皮大之旷地，以为贸易，诡计而得之。数百年于兹，坚固其城池，严酷其法令，远近岛屿之番，莫敢抗衡，悉归其赋，可谓富强之邦矣。瓜亚愚蠢，既饵其利，渐受笼络。和兰又设阿片黑烟以诳诱之，使其众争服食。自致疲弱至于绝嗣，且使无志报仇复土。我中华人亦受其欺，一服此物，遂忘故乡之苦，不以父母妻子为念，遗害不可胜言。夫阿片烟，乃房中之药，其性敛摄，服者藉其火力，取快一时，不知元阳潜消貽害后日。盖人身之元阳元阴，犹日月之有光明，万物藉以健运生长。阿片烟则如野火之烧山，草木当之莫不焦枯。故服之深者，必瘦削软弱，振作无志，容色青暗，不能生育。纵有生者，旋致病死。服之既久，则欲罢不能，破家荡产。虫生髓枯，怪病种种。医药无功，和兰却自禁其众，不得窃服。犯者立置重刑，何吾人之不悟，同于瓜亚，甘堕其术中耶。和兰据此，将谓万年不拔之

基。乃安不思危，渐事剥削。我华人远贩于此，向来皆就所售货之银，或置货，或携银回乡，各从其便。今则严禁不许携银出口，必令将银转置货物，方许扬帆。而其货物又皆产于他处，未到巴地，以致唐船久候，风泛过时，年年不能抵厦。甚遭夏秋风颶，人船俱没。数十年如是，商贾莫不嗟叹。国课亦因减额，惟付之莫可如何。岂意英圭黎红毛久伺其利，觊觎已久。及嘉庆十四年秋，遂兴其甲板舟师数十，往攻不克，退回其国。越年夏秋间，仍备舟师再往，以大炮环攻而克之。和兰不敢与敌，逃回祖家。今之巴地，悉属红毛统辖。除去和兰酷法，招商如故，人皆悦服。远近商贾，莫不交通。红毛此举，亦海洋之一快也〈（案：红毛侵夺葛留巴之事，或以为英吉利，或以为佛兰西。要皆嘉庆初年之事，其后荷兰旋即夺回此岛，见前《每月统纪传》，此志刊于嘉庆初年，尚未知也）〉。

○葛留巴风土述

《海岛逸志》曰：巴国地在西南，气候迥异。书夜之短长，潮汐之早晚，皆与内地相反。春雨夏旱，岁以为常。风则朝南暮北，来往乘之。夜则北斗以下，诸星沉没不见，而南方星宿倍明。朔望不常，缘不置闰月也。其四时八节，悉皆符同。以冬至后十日为岁首，千百载如一。馀于十二月，厦岛扬帆，次年正月初间到巴国。悉见诸处园林，芙渠菊花，蜀葵茉莉，凤仙珠兰，草木诸花并开。乍见骇异，询之巴人，皆云频年长放，相续不绝。然百卉之香，皆浓浊不及中华之清馥。又百卉之种，多传自中华，何至于此而红者或化为白，白者或化成红，盖地土变幻，四时背戾，使之然也。

岛中有过渡之处，不用舟楫，皆用篱竹数十片，编为竹筏，不用篙桨，只用大藤一条，长数十丈，横亘东西两岸，或立木为竿，以系之，或系于大树之身，又以小藤数条，结于筏，环系大藤之上。欲渡时，数人手挽大藤，循藤而过焉。

两山相向，中夹一溪，而水深流急，不能造桥。两岸大树参天，而树杪交柯者，用竹筏连绵纠结，阔七八尺，长十馀丈。筏之两边，以藤悬挂树杪，形如月桥，浮空摇曳，乍见骇人。番众过之，如履平地。馀自垄至浪必由之径，无可奈何，乃下舆戒仆人不得同过，惧其摇曳也。徐步轻涉而进，至其半高处，目不敢下视，惧而蹶足，则其摇愈甚，乃伏而坐。番仆欲走进扶腋，馀愈惧，急止之。小停则其摇息，乃徐起战战而下。嘻，异域畏途，于兹仅见也。

火烟山，在巴城西南六百馀里。其山极高，人迹罕到，峰顶如灶上之突，日夜不息。晴明则其烟少减，风雨晦暝，则其烟愈炽。或有时如鸣巨炮，则天雨灰，气味如硫磺。意者南海之极南，乃地气所发舒也。录之以备博物者采取。

磁石洋，在南旺之东。山谷间及崖岸皆有磁石，磁石性能引铁，故其处之船，皆用竹钉为之，不敢用铁钉也。来往船楫，悉当扬起，不得相近，或有被狂风驱近者，

则被其牵引，不能解脱矣。

海滨崖岸，石齿嵯峨，多洞壑，海燕千百为群，巢于洞中。自万丹、巴城、三宝垄、竭力石、南旺、马臣、猫釐、把实，产燕窝者，不下数十处，皆和兰之有力者掌握焉。逐年税息，大者数千金，小者数百金，而富商大贾纳其赋税，以采取焉。燕窝者，燕巢也。燕食海菜，吐而成窝。岁冬夏两收，不敢多取，譬如取蜂之蜜，数斯败矣。每采取则结庐其处，择吉刑牲，演唱弄迎，番人百十，用竹梯数十，以布囊系于竹竿之末而取焉。逢其盛者，利无数也。遇其衰者，则亏折矣。

海马产于望加锡岛。常登海岸，逐牝马，故为人所牢。毛纯黑，而柔腻。尾长扫地，其陆行与凡马无异。甚驯，日可行千里。但不敢浴于河，见水则旧性复起，游泳沉潜，其力甚大，不可复制矣。

和兰欲穷览博物，每闻有奇形异状之事，不惜重费必罗致以壮观，用火酒实以玻璃器而藏之。厨中怪禽异兽，毒蛇恶鱼，无所不有焉。葛留巴风俗述

《海岛逸志》曰：岛中车四轮者，驾两马；两轮者，驾一马。四轮者，前轮小而后轮大。用木为之，外镶以铁，式如小亭。大者可坐三四人，小者可坐一二人，雕花彩绘，每辆数百金。王坐镶金者，有官职及甲必丹，皆坐彩绘者。平人坐漆颜色者，其座褥悉毡绒为之，华丽奢僭。

国中设赌棚，甲必丹主之。岁纳和兰税饷，征其什一之利。日日演戏，甲必丹及富人蓄买番婢，聘漳泉乐工教之，以作钱树子。有官音乱弹泉腔下南二部，其服色乐器，悉内地运至。岁腊无停，所以云集诸赌博之徒，灯笼大书国课二字。其赌之场，帷幄皆书天下最乐，不如赌博，或写乐在其中。有巡赌者数十人，来往稽察遗漏。虽父子兄弟到其处，不得相管束也。倘欲管束，有巡赌者闻之，立拘其父兄，见甲必丹责云：教训子弟，当在家中，此处国课所关，何得浮言惑众，以乱人心，使国课无征，罪何可恕。即有立致囹圄之祸，盖荒服之国，其背谬类此。

番戏名曰浓迎。番妇之颇有色者，带虬发，缠锦幔，插金花，摇纸，裸衣跣足，歌番歌，舞番舞。摇头闪目，鹤立鹭行。演唱杂剧备诸丑态。或两妇对舞，或三四妇共跳舞。闲人亦可入其中，与之对舞，名曰弄浓迎。弄毕，则酬以金。每于清夜远远听之，其音凄切悲楚，所谓异乡之乐，只令人悲耳。番社中，最喜日夜演唱。华人住居之地，严拒不许入境焉。又有花英者，类影戏，俗呼皮猴。所演唱皆其瓜亚土古故事，未全人形，或飞或遁。如稗官所载，诸诡诞不经之事。竹木杂陈，俚鄙不堪注目。

和兰每宴会，必设长席，可坐数十人，名曰鑊实踏。丝竹杂陈，男女对舞，名曰丹六。其俗女子字人，听其自择，名曰思甲。若两相爱悦，则对舞以定匹偶。其乐有

长如瑟者，其音清朗；有高如人者，立而弹之，其声高旷；有形如琴者，其音铿锵可听，颇有大雅之风。其乐且精妙，工巧异常。其最者，每副价值千金。

酣赣教名，如白莲尤溪之类，非国名也。瓜亚、无来由、里猫柔皆习之。其教持经咒法语，不论年月，揣摩就，则成为铜身铁骨，刀枪不能伤。惟忌猪犬，以猪油犬血涂刀枪杀之，则能饮刃也。

西北和兰之属，皆著袜履，戴毡笠，名曰三角帽。东南瓜亚之类，皆不冠不履，名曰赤脚番。赤脚番皆能制药，于山僻无人之处，用毒蛇恶兽脂膏合药，以涂刀枪之上。制愈久，则其毒愈烈。伤人及禽兽，见血立毙，登时溃烂，只存皮骨耳。

暴暴岛，地土颇大，物产繁多。商船无敢交易其处者，风俗狡狴，如鬼如蜮，惧其烟也。不知何药所制，于上风高处焚之，闻其烟则举船之人皆立毙。所以物产卑贱，少有通往之船，必自运出耳。

有疽发于背，腐溃欲绝者，或荐和兰医，而病人畏其用刀宰割，固却之。后病楚不堪，外科皆束手，不得已乃聘和兰医入门一见。则曰疮剧矣，何不早告，自作之孽也。急觅一豕，乃唤其仆于车中携小箱，出药酒一瓶，斟以盏，曰饮之，则身麻不知痛痒也。出银刀，割去疮之腐溃者，大如盘。缚豕于庭，生割其肉，亦大如盘，操药敷之时许，弃其豕肉，臭黑不堪，其毒悉为拔出矣。如是者三。曰可矣，乃敷以膏药。戒曰：当慎房事，节食酒，匝月耳。三日而平复。我华人外科无其技也，虽华陀、扁鹊，何以过焉。葛留巴流寓华人述。

《海岛逸志》曰：陈豹卿，名历，漳之石美人。性机警，能知人。其堂兄映，为三宝垄甲必丹。豹卿往访，辄能佐理其事。映卒，遂袭其职。贾帆数十发贩州府，所到则其利数倍。不数年，富甲一方。歌童舞女，食前方丈，侍妾数百。余始至垄，见番官淡扳公，往候豹卿。队马数百，整肃而来，至栅门外，则下骑，入门则膝行而前。豹卿危坐，俟其至，乃少欠身。噫，异乡贵显，一至于此，真为华人生色也。巴中有大第一区，名三宝垄土库。唐帆初到，客有欲到三宝垄者，则进其土库，并有船护送至垄。或通谱，或瓜葛，或荐举，或投奔，悉皆收录。因才委任，各得其宜。华夷均领其资本，经商者不计其数。垄地贾帆辐辏，货物充盈，甲于南洋。迨没之日，贾帆停泊，生涯顿歇，垄中为之寂寞。语云：人杰地灵，良有以也。

许芳良，漳郡人也，为巴城甲必丹。性开扩，有雅量。蔡锡光时为门下客，每称其气量，人所不可及。闽果有棕梨者，漳之佳果也，亦不可多得。唐帆或有携一、二枚至岛，大者百金，小者数十金。芳良市两枚付锡光，将以进之巴王，而锡光误以为常果，剖而供之芳良。徐曰：此诚故乡中珍果也，悉呼其客，及家人共尝之。安汶有丁香油，用玻璃瓶宝之，大者每瓶价百金。锡光拂几误碎之，香闻远近不可隐，遂告之。芳良曰：生毁有数，何必较也。巴中宴贵客，则用玻璃器。杯盘茗碗，

俱系玻璃。每副价值一、二百金。一日宴客，婢失手尽碎之，长跪请死。芳良曰：无须。进内但云我误碎可矣。盖巴中法度，驭婢仆甚严，仆则自行管束，婢则细君主之，不如是则婢殆矣。有许姓者，落魄为佣。时巴中诸许皆贵显，芳良每以自炫。有云佣者姓许，芳良即招之曰：即系子侄行，到巴，当即见我，何自苦为也。录用之。不数年，竟成巨富，其雅量类如此，不能毕举焉。

黄井公，漳之漳浦人也。性朴讷，胸无宿物，初为三宝垄甲必丹，以诗酒自豪，不受约束，遂遭遣谪。又以课项未明，竟至囹圄。或为井公谋，以其所负于已者告之上台，使偿已责。井公曰：缘我一人而累及众人，吾宁死不为也。众共仰其义，愿为之地，各敛金而出之。长子绵光在巴，奋志经营，颇为小康，乃奉井公归养巴中。筑园于清漪之沼，日与二三游侣，啸咏自适。人皆以为古厚之报佛宾者。三宝垄观音亭之住持僧，漳之漳浦人也。能书善画，出言滑稽，公然娶妇，育子女各一，蓄婢仆。客至唤婢烹茗，诚可笑也。盖西洋僧家，有妻有妾，无足为奇。余有戏赠佛宾绝句云：闻道金仙在此间，禅家事事竟安闲。袈裟自绣闺房里，待客烹茶唤小鬟。

漳城东门外深青社，有苏某者。经商南洋，娶妇某氏，数载以不获利而归，遂卒于家。南洋妇闻其讣，且知其家贫，亲老子幼，乃孑然帆海至闽，养姑教子，以终其身。其节义求之中华妇女，尚不多得，况荒服僻壤哉。惜未详其姓氏，为可憾。

○附：葛留巴所属岛

《海岛逸志》曰：葛刺巴国，其地一线之横，背负南海。左万丹，右自井里汶、直葛、北胶浪、三宝垄、二肥糸爹、营森、竭力、石泗、里猫，至外南旺，不过三四十日，可以陆路相通，其地舆水乡泽国。入巴国经营者，东至于万澜，西至于巴东，南背于南海，北背于狭巴国。港口浮屿罗布，曰王屿、甲板屿、鼎马屿、白屿、草屿，不可枚举。总而言之曰屿城。巴国统辖属国，东有望加、锡安、汶万、澜润、仔低，东北有马辰，西有把东西，北有麻六甲、柔佛。其余荒壤之国，但入贡而已。西北大海之中，有泽国数处。土地甚大，皆属和兰统辖。但华人未到其处，不能尽详其风土，今述其就近属岛，可知者于左。

一瓜亚番。其类甚多。自万丹、巴城、井里汶、北胶浪、三宝垄、营森、竭力石、泗里、猫仔、外南旺边海一带，以及柔佛巨港占卑览房之处，皆其种类。俱尊三宝垄览内为巡栏。其余各处，但称史丹而已。其人粗蠢愚直，胸无宿物，怡然听受。不纪年岁，以十二月为一岁，见月之日为初一。其字迹如蛇蚓，音语则各处有同异。然受制于和兰，役使如奴隶，遵循维谨，不敢少懈。

一华人。有数世不回中华者，遂隔绝声教，语番语，食番食，衣番衣，读番书。不屑为瓜亚，而自号曰息览。奉回教，不食猪犬，其制度与瓜亚无异。日久类繁，而

和兰授与甲必丹，使分管其属焉。

一无来由番。其种类甚多，散居四处。麻六甲、吉礁、把东、望久里、马辰、里骂、知汶、把实之属，皆其类也。性狡狴反复，多有劫掠海洋中者。巢穴处于吉里门、龙牙等处，内地所谓艇匪者是也。出没无常，闽广患之。其言语和兰遵之以通融华夷，如官音然。

一武乞氏。岛居于望加锡，其魁处于山中，自称癸喏，如瓜亚之称巡栏。南洋诸国皆习武艺，武乞氏为最勇。武艺精者，父母荣之，乡里敬之，尊之曰牛实地大好汉也。能断一乡，无不服从者。所以不论男女，十岁以上，则演习枪刀跳舞诸技。其枪法刀法，皆有教师秘传。其教之名色甚多，如太祖达尊猴拳鹤势之类。故其武艺为南洋之冠，每扬帆海上，贼船遇之，莫不辟易。不受和兰节制，与盟约为兄弟而已。土产幼布、海参，二者为西洋最〈（友人王砥候，有仆数人，随其驾舟往万澜，中途遇盗。舟师大惧，诸仆曰：我等武乞氏，武艺皆高强，此辈所慑服，无恐也。戒舟人勿言动，以示懦怯状。盗见之曰，此必巴国唐人之船，畏怖如此。齐登船上。诸仆持刀以待，盗伙一见皆错愕曰，何得武乞氏之船。即欲遁去，仆大喝盗长跪称误犯死罪，各献所有，叩头而去。又曰武乞氏女子，丽而乖巧，能识人意。馀一婢名掌珠，随往马辰，中途遇贼，众寡不敌，仓皇失措。婢云无恐，持枪而出，守于楼门不动。贼登舟拥至，婢以枪挥之，立伤数人。贼退而相谓曰：何得有武乞氏之枪法。婢叱曰：我即武乞氏也。贼惧而尽披靡）〉。

一苗釐。岛居于外南旺之东，状类瓜亚。男女皆穿耳，而大其洞。女子颇有色，性勤俭持家。不属和兰统辖其地，当巴国之极东，四面大海，浮屿罗布，中多石洞。土产燕窝、海菜、鱼翅、海参、翠羽。

一武敦。岛居于望加锡之南，与息癸门相近。状貌丑黑，性强悍，视死如归，诸番所畏。其刚猛不亚于武乞，而粗豪过之。不属和兰统辖。土产长藤、苏木、海参、鹤顶、龙涎香。

一暴暴。岛居于安汶之东，状如夜叉，浑身漆黑，毛发螺拳如艾，丑恶不堪。手足敏捷，上树如飞。多木处而穴居，不火食，血如浓墨，性多嗜酒。和兰喜蓄此种为仆，以其状丑，便于出入。与西兰吉宁比连而处，风俗亦略相同，皆称曰乌鬼仔。土产文烟、血结、香木、苏木、海菜、西国米。

一知汶岛。在尾陈之极东，番语东曰知汶故云。无来由所居，与猫釐相邻，地方垦瘠，人物粗蠢。国贫，不属和兰统管。土产香木、丁香、木香、苏木、海参、海菜。

一把实岛。在马辰之东，风土略同马辰，而富裕不及，坐地之番什籍无来由。自有

国主，不属和兰管辖，每年只纳贡税而已。土产燕窝、长藤、沙金，诸岛称为富国。

一色仔年岛。华人呼为乌鬼，无祖系，如巴国设立礼拜寺于城中。其年岁、字迹、音语俱遵和兰。衣服饮食，器用宫室，亦并相同。人物清秀，女子甚美。惟与和兰婚娶，其他不屑也。其属多从写字，或从营伍。性机警，和兰妒忌，不肯使之为民上也。

一里猫柔。岛居于马辰之西，处山中，属马辰巡栏统辖。其状貌略似瓜亚。产沙金、长藤、鹿肉。其类皆以抽藤打鹿淘洗沙金为事。马辰之国甚富，数处产金。又产铨石，其性最坚，磨之光耀如镜，可鉴毫发，闪艳夺目，如日月之精华，入火不灭，磨之光彩依旧。大者无价，小者用米粒兑之，以米十六粒为一葛力，每葛力价二三十金。和兰不贵珠玉，以铨石为至宝。钮扣领袖，皆用以为饰。或云重至十葛力以上者，佩之可辟凶邪〈（铨石，即金刚钻）〉。

一里骂岛。在望加锡之东，无来由所居，不属和兰经管。地里偏僻，风俗贪暴。土产良马，鲜有经商之舟。每年惟载良马入贡巴国而已。

一安汶岛。在巴国之东南，与万澜润仔低相鼎峙。色仔年、息览、无来由，什处其地，其属国浮屿，有些罢、赖馀、癸亚哥、癸里哥、务里、万里罢。土产海参、丁香、荖{艸孝}、鸚哥、雾鸟、花油、盒蜜。

一万澜岛。在巴国极东南之地，与苏洛、宿务相近。相传从此回厦，较之巴国为近，但未有行之者。土产海参、玳瑁、沙金、珍珠。其浮屿属国尚多。

一西垄岛。在西北海之隅。地极广大，距葛留巴极远。和兰、红毛佛兰西、吕宋诸国，错处其间。产金银、宝石、五色俱备，光彩夺目。地属和兰管辖，徙葛留巴之犯流罪者，悉置于此。华人之犯罪者，亦置于此。馀则不能到也。

一龟静岛。在西北海之滨，与垄西垄三处鼎峙，地方甚大。和兰聚集居处其间，人烟稠密，不亚葛留巴。但华人未有到其地者。

卷十五

○英荷二夷所属亚齐及三佛齐岛〈（三国同岛，即唐以前婆利洲地。苏门答刺，今名亚齐。三佛齐，今名旧港）〉

谢清高《海录》曰：三佛齐及苏门答刺岛，在新柔佛岛对渡，旧柔佛为英吉利所据，其土番徙新岛。周围数百里。由柔佛岛对渡，西南海中，别峙一大洲。九国环之，曰溜里，曰锡里，曰大亚齐，曰小亚齐，曰尼古巴拉，曰苏苏，曰叭当，曰尼是，曰茫古鲁，曰旧港，曰龙牙，九国同此一山。亚齐及苏苏，皆苏门答刺故地，旧港则三佛齐故地也。溜里国，在柔佛西南，不与柔佛相连。由柔佛渡海而南行，约日馀可到。疆域约数百里，风俗土产与柔佛同。土番较强盛，潮州人多贸易于此。海东北为琴山径。

锡里国，在溜里西北，疆域风俗与溜里同。由溜里买小舟沿海行，约四日可到。海东为麻六甲，由此又西北行，约二日，仍经红毛浅。土产鱼肚、冰片、椰子、胡椒。

大亚齐国，在锡里西北，疆域稍大。由红毛浅外海西北，行日馀即到。由国都向西北陆行丘六日，水路顺风，一二日则至。山尽处，俱属大亚齐。风俗与无来由各国同。海东北岸为沙喇我国，山尽处，则与新埠斜对。土产金、冰片、沙藤、椰子、香木、海菜。

尼古巴拉，西南海中孤岛也。由亚齐山尽处，北行少西，顺风约十一二日可到。土番俱野人，性情淳良，日食椰子、熟鱼，不食五谷。闽人居吉德者，常偕吉德土番到此，采海参与龙涎香。其海道亦向西北，约旬日可到。由此又北行，约半日许，有牛头马面山，其人多人身马面，嗜食人，海艘经过，俱不敢近。望之但见云气屯积，天日晴朗，遥见山顶似有火焰焉。又北行旬日，即到明牙喇海口，若向北少西行，顺风六七日，可到曼达喇萨。

小亚齐国，一名孙支，在大亚齐西。由大亚齐西北行，经山尽处，转东南行，约日馀可到。疆域亦数百里，风俗与大亚齐同。土产金、沙藤、胡椒、椰子、冰片。

苏苏国，在小亚齐南，水路顺风约二日可到。疆域风俗土产，与小亚齐同。

叭当国，在苏苏东南，水路顺风亦二日可到。疆域风俗与上略同。海西别有一岛，为呢是国。

呢是国，又名哇德，在苏苏叭当二国之西，海中独峙一山。民似中国而小，常相掳掠贩卖，出入必持标枪，惧炮火，不食五谷，惟以西谷米合香蕉煎食。年老者，子

孙则抱置树杪，环其下而摇之，俟跌死而后已。其灭伦理至于此极。自此以西，海中多大石，风涛险阻，故大西洋海舶，往小西洋者，必由叭当之西，咒是之东。茫古鲁在巴当东，水路顺风，约五六日可到。陆路亦通，但山僻多盗贼，故鲜有行者。沿海都邑，近为英吉利所夺，国王移居山内。然英吉利居此者，不过数十人，领跛兵数百而已。土产海参、丁香、豆蔻、胡椒、椰子、槟榔。

旧港国，即三佛齐也，在茫古鲁东，疆域稍大。由古东南行，约三四日转北，入葛刺巴峡口，顺风行半日，方出峡。峡东西皆旧港国疆土。峡西大山名网甲，别峙海中，山麓有文都上卢寮、下卢寮、新港等处。山南复有二小岛，一名空壳槟榔，一名朱麻里，皆产锡。闽粤人到此，采锡者甚众。文都有英吉利镇守，而榷锡税。凡采者，俱向借资斧，得锡则偿之。每百斤止给洋银八枚，无敢私卖。国王所都在峡西，由文都对海入小港，西行四五日方至，亦有荷兰镇守。两岸居民，俱临水起屋，颇称富庶。国王殿廷为三级，每日听政，王坐于上，次列各酋长，庶民争讼者，俱俯伏于下。体制严肃，而民性凶恶，多为盗贼，不知尊中国而畏荷兰、英吉利如虎。凡有诛求，无敢违抗。巫来由番皆然，不独此国也。土产金、锡、沙藤、速香、降香、胡椒、椰子、槟榔、水鹿。

龙牙国，在旧港北，由峡口水路到此，顺风约三日。由此北行日馀，则为柔佛。西北行日馀，则至溜里。此山多木，大者数十围。中华洋船至此多换桅柁。凡溜里、锡里，大抵皆巫来由种类，唯大亚齐及苏苏，民稍淳良，馀俱凶恶，盗劫为生。凡巫来由各国，俱产黑燕窝、速香、降香、鸡骨香、槟榔、椰子、海菜。

《地里备考》曰：苏麻答刺岛，亦曰苏门答刺，在南洋之极西，纬度自北五度起，至南五度止。经度自东九十三度起，至一百零三度止。长约三千五百里，宽约五百五十里，烟户六兆馀口。本岛地势，重冈叠领，迤逦延袤，其最大者，曰柯非尔山，曰古农哥孙巴拉山。火山不一，地震时作。田土腴腴，谷果丰稔。丛林稠密，禽兽蕃衍。土产金、银、铜、铁、锡、硝磺、冰片、胡椒、椰子、甘蔗、药材、沙谷、米等物。地气互异，每多阴雨。商贾云集。本岛疆域，不属别国管辖，惟一处归贺兰国兼摄。其自为国者三，曰亚齐，在岛之北，疆域狭窄，人烟稀疏，都城建于西北。屋宇朴陋，街衢湾曲。曰西亚哥，在岛东之西亚哥河两岸。数酋分摄，各霸一方。海滨之人，多务劫掠，都城贸易萧条。曰巴达斯，在岛西海滨与亚齐毗连。数酋分摄，不相统属。其归贺兰摄者，一名巴当，在岛之西，地势偏小，贸易则盛。一名美囊加布，在岛之中。一名巴梭邦，在岛之东，田土肥饶，稼穡丰茂。一名槟榔，在岛之南。地多涔泽，人烟稀疏。岛之东西，小岛胪列，各设酋长。东岛一名卢巴，一名邦八尔。一名灵安，长约一百八十里，宽约一百里。一名兵当，长约一百里，宽约四十里。一名当容比囊，内有里约城，商贾辐辏。一名邦加，长约五百四十里，宽约一百五十里。人烟寥落，锡磺繁衍。一名比磷敦多，产黑金。西岛一名英加诺，回环约一百里，田土腴腴，地气严寒。一名波日，又曰那搔，岛屿甚多，不产粳稻，椰竹、沙谷、米等，甚属蕃衍。一名波拉，又曰细波拉，岛屿不一

，大者长约三百里，宽约六十里。一名细比卢，长约二百七十里，宽约四十里。内有火山，昼夜吐焰不熄。一名巴都，一名尼亚斯，长约一百八十里，宽约六十里，田土膏腴，谷果丰稔。一名巴比，一名巴比亚哥，长约六十里，宽约二十里。

《每月统纪传》曰：苏门答刺大州屿，一带皆山。于其州中间，分州两分。瘦岭磽地，只产锡、金、沙藤、胡椒、槟榔、椰子、冰片等货。英吉利人又种豆蔻、丁香树，其金凤有大声名，不胜其美。土番皆马莱西族类，不胜数。回民居住，由来已久。强悍刁顽，肆为不法。年年往默底那国，拜其圣人穆罕默德铁棺椁。各处皆有小土酋，沿溪居茅，不善生理，故上下穷苦。唐时为亚齐国，权势甚大，今则西洋藩属。

《外国史略》曰：苏门他拉，此为长岛，与牙瓦岛以孙他海峡相隔。长约三千五百里，阔约五百五十里。地分三分，东北甚低，有血蝎，产沙米、谷米、安息香，大河由此入海。海濱出胡椒，地虽低，无大泽。西北高，多出槟榔。中多高山，有千三百八十四丈，山下广坦。暑月亦凉，土人乐之。亦多湖泽。西则溪川四处灌溉，地常震，火山出火浆。又多金、铜、铁、硫磺等，磺炭、石油、硝等物，但居民未悉采取之法。金矿每年可出三万两，游山者或偶遇之，有一块重九两者。其谷仅足居民食用，惜地未开垦，草木畅茂，为野兽之藪。产胡椒、槟榔及冰片之树。计冰片数斤，必伐木三百株。惟中国贵之，每年运出六千六百五十斤。耕田以水牛，林多象、犀、虎、猴、狒狒。水中多虾、蜈蚣、蚬蚌、蝮。林中有金鸡、神鹰、鹤、鸚鵡。运出之物，如安息香、桂皮、绵花、加非等货，计万万石。又有乳香、楠沉红木、乌木等料。居民多芑来由族类，崇回回教，其教师严禁鸦片及各荤物。民色紫，尊贵人以金镶齿。居民恒带短刀，有要事则誓诸墓，以旧器为盟。在海口贩人为奴，百姓不好城居，自建乡里，竹葵为寮。食不用箸，以手搏之，饭惟鱼虾、花椒等物。以老男女为医生，不必通其艺，随意令病者服药。教外之人，皆好赌博，食鸦片。海边居民，以抢劫商船为事；其内地民则朴实。有大城曰黑囊加报城，亦芑来由族类。此族人在元以前，独住稣门他拉一岛，后散布群岛不啻千万，仍以此城为圣域，赴其庙以祀神。地多产金，居民皆造金器，亦善造火器、火药、短刀。乾隆间，土酋互相战斗。嘉庆间，请荷兰兵助遏其教师，荷兰遂据其地。

稣岛有名之国曰亚珍，或曰亚齐。昔与中国通，其君住草舍，道甚微。居民惮劳苦。

此国之南方，有巴答蛮者，虽向化，辩字，务农，却食人肉。战则虏人为粮，或父母老迈，即食其肉。昔耶稣教师，至此欲化之，为土民所杀。后遂无入境者。在南方有离利让等族类，崇佛教，其民惰贫。

明万历间，葡萄牙船到此岛通商，与海贼肇衅。英人随之，在西南海边，开宾古林埠，二百余年，以胡椒贸易。乾隆年间，始种丁香、豆蔻。后以此地让荷兰。顺治

年间，在西海边开巴当海口，亦在东边占巴林邦。所据之地，道光年间，始为全岛之主。由此衅起，与土人久战，亡其军。再战始胜之，然耗兵糜饷，始令民种加非树，土产日增。惟西北各金山归荷兰。唐船每年有一二到巴林邦口，买沙藤、锡、胡椒等货。海边又任汉人开市，百姓为荷兰管束，不敢远出。

附近此岛各地，一曰罔加岛，在苏门之东。其地饶，产红石锡磺甚盛，每年出六十万馀石，为荷兰所辖。广东嘉应州人多在此开锡山，收饷颇重。一曰北里屯岛，距罔加不远，多海贼，航船者难之。

又稣门西为尼押群岛，居民愚蠢，芜来由虏卖之为奴。地亦丰盛，惜无人开垦。

○亚齐旧港即古婆利沿革考

《梁书》曰：婆利国，在广州广南海州上，去广州二月日行，国界东西五十日行，南北二十日行，有一百三十六聚。气暑如盛夏，谷一岁再熟，草木常荣。海出文螺、紫贝，有石名蚶贝罗，初采柔软，刻削为物干之，遂坚。国人披吉贝如巴，及为都纁。王乃用班丝布以婴络绕身，头著金冠，高尺馀，形如弁，缀以七宝带，金装剑，偏踞金高坐，银蹬支足。侍女皆为金花杂宝之饰，持白毛拂，及孔雀扇。王以象驾舆，舆以杂香为之，上施羽，盖珠帘。导众吹螺击鼓。王姓陈僑如，自古未通中国。言白净王夫人，即其国女。天监十六年，入贡。

《明史》：苏门札刺在满刺加之西，顺风九昼夜可至。或言，即汉条枝，唐波斯、大食二国地，西洋要会也。成祖初，遣使，以即位诏谕其国。永乐元年，遣使赐其酋织金文绮。中官尹庆使爪哇，便道复使其国，其酋遣使朝献。诏封为国王，遂比年入贡，而郑和凡三使其国。先是，王之父与邻国花面王战，中矢死，王子年幼，有渔翁率国人往击，馘其王而还。王妻遂与之合，称为老王。既而王子年长，复杀老王，而袭其位。及是郑和至其国，老王弟苏干刺以颁赐不及己，怒，统数万人邀击。和勒步卒及国人御之。大破贼众，追至南渤利国，俘以归。宣德五年，帝以外番贡使多不至，遣和及王景宏，遍历诸国颁诏，凡历二十馀国。明年遣使入贡者再。八年，贡麒麟。九年，王弟哈利之汉来朝，卒于京。成化二十二年，其使者至广东，有司验无印信勘合，乃藏其表于库，却还其使。别遣番人输贡物，京师稍有给赐。自后贡使不至。迨万历间，国两易姓。初，其国有大臣握兵权，大臣有奴桀黠，出谓其主曰：国王左右侍卫少，主拥重兵出镇，必入辞，请以奴从。主言有机事，乞屏左右，奴乘间刺杀之。大呼曰：王不道，吾杀之，吾主即王矣。敢异议者血此刃，众慑服，不敢动，其主遂篡位，任奴为心腹，委以兵柄。未几奴复弑主而代之，乃大为防卫，拓其宫，建六门，不得阑入，虽勋贵不得带刀上殿。出乘象，象驾亭而帷其外。如是者，百馀俾人莫测王所在。其国俗颇淳，出言柔顺。惟王好杀，岁杀十馀人，取其血浴身，谓可除疾。贡物有宝石、玛瑙、水晶、石青、回回青、善马、犀牛、龙涎香、沉香、速香、木香、丁香、降真香、刀弓、锡锁服、胡椒

、苏木、硫磺之属。货舶至，贸易称平。地本瘠，无麦有禾，禾一岁二稔。四方商贾辐辏，华人往者以地远价高，获利倍他国。其气候朝如夏，暮如秋，夏有瘴气。妇人裸体，惟腰围一布。其他风俗，类满刺加。篡弑后易国名曰亚齐。又有须文达那者，古不知何国，洪武十六年来贡。或言须文达那，即苏门答刺，洪武时初更。然其贡物与王之名皆不同，无可考。

《皇清通考·四裔门》：亚齐在西南海中，相传旧为苏门答刺国名。万历中乃易今称。其王严防卫，拓宫殿，建六门，虽勋贵不得带刀上殿。出乘象，象驾亭而帷其外，如是者百馀俾人莫测王所在云。风俗男女穿长衣，头缠白布。土产西洋布、丁香、肉果、水安息、苏合油之属。地本瘠，无麦有禾，一岁二稔。市道称平，内地商船，常往其地贸易。

《宋史》：三佛齐国，盖南蛮之别种，与占城为邻，居真腊阇婆之间，所管十五州。土产红藤、紫矿、笏沉香、槟榔子，无缙钱。土俗以金银贸易诸物。四时之气，多热少寒，冬无霜雪。人用香油涂身。其地无木有米，及青白豆、鸡、鱼、鹅、鸭，颇类中土。有花酒、椰子酒、槟榔酒、蜜酒，皆非<麦刍>蘖所酝，饮之亦醉。乐有小琴、小鼓，昆仑奴踏曲为乐。国中文字用梵书，以其王指环为印，亦有中国文字，上章表即用焉。累甃为城，周数十里，用椰叶覆屋。人民散居城外，不输租赋。有所征伐，随时调发立集。酋长率领，皆自备兵器粮糗。泛海使风，二十日至广州。其王号詹卑，其国居人多蒲姓。唐天祐元年，宋建隆元年，皆来朝贡。终宋世，职贡不绝。

《明史·三佛齐传》：三佛齐，古名干陀利。宋孝武帝时，尝遣使奉贡。梁武帝时数至。宋名三佛齐，修贡不绝。洪武三年，太祖遣行人赵述诏谕其国，明年遣使奉表，随入朝贡方物。诏赐大统历，及绵绮有差。其货舶至泉州者，命勿征税。时其国有三王。八年九月，遣使随招谕。拂菻国朝使入贡。洪武九年，遣使贡犀牛、黑熊、火鸡、白猿、红绿鹦鹉、龟筒及丁香、冰脑诸物。其使者言，先王歿，嗣子不敢擅立，请命于朝。诏遣使赍印，敕封为三佛齐国王。是时爪哇强，已威服三佛齐，而役属之。闻天朝封为国王，与己祭，大怒，遣人诱朝使邀杀之。天子亦不能问罪。自是其国益衰，贡使遂绝。洪武三十年八月，礼官以诸番久缺贡，奏闻。帝曰，洪武初，诸番贡使不绝，迺者安南、占城、真腊、暹罗、爪哇、大琉球、三佛齐、渤泥、彭亨、百花、苏门答刺、西洋等三十国，以胡惟庸作乱，三佛齐乃生间谍，给我使臣，至彼爪哇，王闻知，遣人戒飭，礼送还朝，由是商旅阻遏，诸国之意不通，惟安南、占城、真腊、暹罗、大琉球朝贡如故。大琉球且遣子弟入学，凡诸番国使臣来者，皆以礼待之。我视诸国不薄，未知诸国心若何。今欲遣使爪哇，恐三佛齐中途阻之。闻三佛齐本爪哇属国，可述朕意移咨暹罗，俾转达爪哇。然是时爪哇已破三佛齐，据其国，改其名曰旧港。三佛齐遂亡，国中大乱。爪哇亦不能尽有其地。华人流寓者，往往起而据之。有梁道明者，广州南海县人，久居其国，闽粤军民泛海从之者数千家，遂推道明为首，雄视一方。会指挥孙铉，使海外，遇

其子挟与俱来。永乐三年，遣使赍敕招之，随使入朝。四年旧港头目陈祖义、梁道明各遣其子来朝，祖义亦广东人。虽朝贡而为盗海上，贡使往来者苦之。五年郑和自西洋还，遣人招谕之，祖义诈降，而潜谋邀劫。有施晋卿者，告于和。祖义来袭，被擒，献于朝，伏诛。命设旧港宣慰司，以晋卿为使，赐诰印及冠带，自是屡入贡。然进卿虽受朝命，犹服属爪哇。其地狭小，非故时三佛齐比也。嘉靖末，广东大盗张琯作以官军已报克获。万历五年，商人诸旧港者，见琯列肆为番舶长，漳泉人多附之，犹中国市舶官云。其地为诸番要曾，在爪哇之西。顺风八昼夜可至，辖十五洲。土沃宜稼，语云：一年种谷，三年生金。言收获盛而贸金多也。俗富好淫，习于水战，邻国畏之。地多水，惟部领陆居，庶居皆水居，编筏筑室，系之于桩。水涨则筏浮，无沉溺患。欲徙则拔桩去之，不费财力。下称其上曰詹卑，犹国君也。后大酋所居，即号詹卑国，而故都则改为旧港。初本富饶，自为爪哇破灭后，渐至萧索，商舶亦鲜至其地。风俗物产，俱详《宋史》。

《瀛涯胜览》：旧港古号三佛齐，曰渤淋邦，隶爪哇。东距爪哇，西距满刺加，南距大山，自西北滨海，舶入淡港，入彭家里舍，易小舟入港，达其国。国人多广东漳泉人流寓。土沃人稠，宜稼穡。俗好赌博，如把龟、奕棋、斗鸡，皆索钱具也。市亦用中国铜钱、布帛之类。厥产鹤顶、黄连、降真、沉水香、黄蜡、食炭、神鹿。只啖草木，不近腥物。虽系之不死，牛羊猪犬鸡鸭蔬果之类，与爪哇同。

明张奕《东西洋考》：旧港古三佛齐国也，初名千陀利，又名渤淋，在东南海中。本南蛮别种，居真腊爪哇之间。王号詹卑，故今王所部为詹卑国。而故都为爪哇所破，更名旧港，以别于彼之新村云〈（俗名吉邦）〉。其地故称沃土，商舟至，献果币，有成数，居人商量物价，虽议偿金多少，然非偿金，实偿椒也。如值金二两，则偿椒百石，其大较云。喜买夷妇，他国多载女子，易其椒以归。旧港则用铜钱矣。三佛齐夙称蕃盛，国破以后，满目萧条，贾人亦希造。

魏源曰：三佛齐国，自宋以来，臣服中国。苏门答刺亦终明世，职贡不衰。国朝独不列王会之图，则知为西夷窟穴久矣。其地自宋以前，则为婆利洲，梁隋唐皆入贡，而隋唐书言婆利国。自交趾浮海，南过赤土、丹丹，乃至其国。国界东西四月行，南北四十五日行，赤土即古扶南，今暹罗。而丹丹即今柔佛等国，地望相准。且唐以后无婆利，宋以前无三佛齐，今此昔彼，亦沿革相承。又史言婆利东西南北数千里，为海南大国。舍是岛外，更无大洲，足当婆利故壤者。断非《明史》南渤利南巫里梨我阿鲁那孤儿等小屿，居民千馀家之伦。至《明史》沿王圻之谬，以苏门答刺为古大食、波斯等国。乌乎，何以至是。

○荷佛二夷所属美洛居岛〈（一作马路古，一作木路各，一作摩鹿加各。原无今补）〉

《明史》：美洛居，俗讹为米六合，居东海中，颇称饶富。酋出威仪甚备，所部合

掌伏道旁。男子削发女椎结。地有香山，雨后香堕，沿流满地，居民拾取不竭。其酋委积充栋，以待商舶之售。东洋不产丁香，独此地有之，可以辟邪，故华人多市易。万历时，佛郎机来攻，其酋战败请降，岁以丁香充贡，不设戍兵而去已。红毛番横海上，知佛郎机兵已退，乘虚直抵城下。执其酋语之曰：若善事我，我为若主，殊胜佛郎机也。酋不得已，复听命。佛郎机酋闻之大怒，率兵来攻。值红毛番已去，遂破美洛居，杀其酋，立己所亲信主之。无何红毛番至，又破其城，逐佛郎机所立酋，而立美洛居故王之子。自是岁岁构兵，人不堪命。华人流寓者，游说两国，令各罢兵，分国。万老高山为界，山以北属红毛番，南属佛郎机，始稍休息。而美洛居竟为两国所分。

南怀仁《坤舆图说》：吕宋之南，有木路各岛。无五谷，出沙谷米，是一木磨粉而成。产丁香、胡椒二树，天下所无，惟本处折枝插地即活。性最热，祛湿气，与水酒同贮即吸干。树旁不生草，土人欲除草，折其枝插地，草即立槁。又产异羊，牝牡皆有乳。有大龟，一壳可容一人，或用为盾以御敌。

《地理备考》曰：美洛居岛，亦号米六合，亦号么鲁加斯，在南洋之西，塞勒卑斯岛之东。纬度自北三度起，至南十度止，经度自东一百十七度起，至一百三十度止。岛屿纷繁，火山不一，地震时作，每有不虞。地气湿热，不便居栖。田土互异，土产各殊。岛中或设酋长管理，或附贺兰总兵统摄。岛之大者，曰安波义那，长约二百里，宽约三十里。田地肥饶，地气炎热。土产硫磺、丁香、加非、蓝靛、沙谷米等物。树木充斥，东方为最。禽兽蕃衍，鳞介庶众。曰塞郎，长约七百五十里，宽约一百五十里。山势峻峭，田土腴腴，五谷百果靡弗丰登。诸酋分摄，各据一方。曰布卢，回环约一百七十里。地面积方约二千六百里，冈陵巍峨，川河纷繁。土肥谷丰，毛羽鳞介充斥。诸酋分摄，各霸一方。曰邦达，内计十岛，皆有火山，地震时作。地气不驯，有碍居栖。其内义辣、郎多、义尔、古农、阿比、不卢、阿义，乃十岛中之大者，皆属贺兰国兼摄。曰济罗洛，又名阿拉马厄辣，长约八百里，宽约一百五十里，境土错落，不相联络。田土腴厚，物产丰饶。地气炎热，不便居栖。岛分三属，北属德尔那的岛，酋长兼摄。南属的德尔岛，酋长兼摄。中为本岛。诸酋分辖，不相统属。其南北二处，于道光四年，有贺兰国总兵驻扎于此，始为兼摄。曰德尔那的，回环约九十里。内有火山，昼夜吐焰，田土膏腴。金砂实繁，岛中一酋统摄，亦归贺兰兼辖。曰的德尔，长约十里，宽约八里。本岛较德尔那的虽小，而庶民则过之。一酋统摄，亦属贺兰兼辖。曰巴将，长约二百里，宽约四十里。田土肥饶，谷果丰茂，金矿蕃衍。一酋管理。曰大科比，长约二百五十里，宽约四十里。田地土产，与巴将岛相等。诸酋分摄，各霸一方。曰迷索尔，长约一百七十里，宽约五十里，诸酋分摄，不相统属。曰波波，乃众岛总名也。大者亦名波波，回环约百七十里，一酋管属。曰么尔带，长约二百二十里，宽约六十里。田土腴腴，人烟寥落，归于德尔那的岛，酋长兼摄，不相统属。曰门日斯，乃众岛总名也。大者三岛，皆归明达挠岛酋长兼摄。

《外国史略》曰：东南各屿，曰摩鹿加岛，一作美洛居。地硖出粟、蕃薯，并无米。多火山，多地震，山为谷，谷为湖，所常见也。居民朴实，出丁香、玉果，出售远商，与荷兰往来。多奉耶稣之教，亦有回回族，自为教门。明万历间，葡萄牙初到开埠，与土君战，是班牙兵船亦争此地。荷兰遂乘间而据是屿，后各岛归荷兰。包揽丁香、玉果之贸易，且谕土民尽伐其树，令他国无可买处。如结果太过，恐以是减其价，即烧此果。每年出丁香约六千石，玉果约七千石，豆蔻花约二千石，大半售于欧罗巴各国。他岛近亦种是树，价终减焉。荷兰调军士数千，驻安本岛，筑炮台。其班他悉兰在北方黄道之内，特那地乃火山岛，义箩罗大屿，大半荒芜。主拉岛、地突岛、摩得岛、马善布罗岛，出好檀香并花木。

荷兰各藩属在群岛之中，广袤方圆，共万六千四百里，居民千四百六十四万四千。俱听荷兰之命，各岛广袤方圆七千九百五十五里，居民三百八十五万一千口。

《万国地理全图集》曰：摩鹿加群岛，在小吕宋之南，全归荷兰辖。居民大半奉耶稣教。地出丁香、玉果、豆蔻、苏木等货。各岛总帅驻在安门，北极出三度四十分，偏东一百二十八度。海口建炮台，有万他不离地，内有火山，常地震，玉果丰结，足以补列国之用。西兰长屿，出沙谷米，但民不耕田，故由他屿运买。其居民尚野，未向化。德拿地小屿，称乐土，周年天气和暖。但内地火山一动，邻地遍焚毁，提读岛上有土君，亦管义罗罗岛也。出丁香、玉果，但荷兰人不准运卖。巴治安岛，又归回回土君所治。明隆庆年间，葡萄牙人之船，始到德岛，不期是班牙人亦至，与葡接战。泰昌年间，惟荷兰乘机力攻两国，驱其驻防兵严守，其权历二百年不废。但所发卖丁香、豆蔻等物，不足以资国费，又绝他国船只，往来买卖。是以生意不盛。

又曰，摩鹿加之西，至牙瓦岛一带屿，曰亚罗地门律两岛，土蛮人居住，不与外国交通。武罗乃荷兰埔头，少民人，少物产。地门出蜡檀香，东方葡萄牙居之，西则荷兰之埔头，曰古邦。西南曰檀香屿，北系佛理屿，西曰逊巴、瓦伦、泊巴理等岛，皆出米，居民尚奉佛教，未向化。

《每月统纪传》曰：美洛居屿等，与巴布阿大洲，皆荷兰管下。本产豆蔻、丁香，每年数万石，惟荷兰可载运出之。谷岛等因山岭多石，故无米。土番食沙谷米，即是树髓。居民事救世主耶稣，崇拜上帝，与荷兰交友，只恨人都安逸偷闲。其都会为安门，是荷兰总管所治。又有那巴布阿之土番，欲娶妻必以人颇为聘，故好杀人而宝其颇，面黑性蛮。有鸚鵡、言鸟、各类果食数种，盖土番可畏，商舟往贸易者鲜矣。道光十年，荷兰王差人建炮台、城池，以防海口。教习土番，耕田作工以调理之。又曰，万古累巴当二岛，西南海滨巴邻纲甲二岛，在东北海滨，为荷兰所管。建炮台，开埔头。因良久与山内之白头回回僧战斗不息，故其地官府时时防范。巴邻纲甲，沿溪楼阁群居。广东船进江，买胡椒、藤、锡等货，勒索太甚。万古累先为英国藩属地，因公费过于税入，故以麻刺甲邑易之。万古累地，丁香树、胡椒

园，不胜数。惟种之者无利。纲申屿附苏门答刺洲，岁出锡几万石。故荷兰设官发卖，且广东人开锡山甚难，米食物都由外国运出，盖其地为石山而已。

又曰，槟榔屿，亦是英国所管，附大山。乾隆年间，英国人开此地方，并作胡椒丁香园，故息力槟榔屿之屋不胜光耀。

岛之南北大岛六，曰桑济尔，曰西昂，曰邦加，曰书拉，曰布敦，曰萨拉夜尔，馀不记。

又曰：闽堂屿，是荷兰所管，有炮台在山岭及大营泛。其产物为胡椒等货，潮州府人耕田买卖向有几万，今其数渐减。马莱西君惟治各小屿。因马莱西之族类懒惰穷苦，并米皆无。

《地理备考》曰：塞勒卑斯岛，在南洋之西婆罗、美洛居二岛之间，纬度自北二度起，至南六度止，经度自东一百十七度起，至一百二十三度止。南北相距约一千七百里，东西相去约七百里，烟户三兆馀口。本岛地势错落不相联络，田土极腴，谷果最丰。丛林稠密，木多上品。地气熇烈，海风清凉。土产金、铁、硫磺、水晶、粳稻、棉花、丁香、豆蔻、乌木、檀香、椰子、沙谷米各等物。岛中朝纲两端，一系贺兰派官镇守，一系自设土酋，仍附贺兰。其贺兰派官者有四，一名马加萨，又名茫加萨，在岛之西南，贸易兴隆，商贾云集。一名宾达音，在岛之南，去马加萨二百五十里。一名马罗斯，在岛之北，去马加萨一百二十里。一名马那多，在岛之东北，诸货骈臻，其自设土酋者数国，工相结盟。曰波尼，曰瓦八，曰卢呼，曰马加萨尔，曰曼达尔，曰达内德，曰索兵，曰昔德灵白翁古宜辣，曰哥阿。

《明史》：丁机宜，爪哇属国也。幅员甚狭，仅千馀家。柔佛黠而雄，丁机宜与接壤，时被其患。后以厚币求昏，稍获宁处。民俗类爪哇，物产悉如柔佛。华人往商，交易甚平。自为柔佛所破，往者亦鲜。又苏吉丹，爪哇属国，后讹为思吉港，国在山中，止数聚落。又有碟里国，日罗夏治国，皆近爪哇，于永乐初入贡。

《明史》：合苗里，海中小国也。土瘠多山，山外大海，饶有鱼虫，人知耕稼。永乐三年，遣使附爪哇使臣朝贡。其国又名苗里务，近吕宋商舶往来，渐成富壤。华人入其国，不敢欺凌，市法最平。故华人为之语曰：若要富，须往苗里务。有网巾礁脑者，最凶悍，海上行劫，因是苗里务商舶亦稀，地渐贫困。

《海国闻见录》曰：吕宋下接利仔爰，水程十二更；至甘马力，水程二十一更。二处汉人从吕宋舟楫往彼贸易，利仔爰之东南，隔海对峙有五岛。曰班爰，曰恶党，曰宿务，曰苗务烟，曰网巾礁脑，均土番族类。山海所产，与吕宋同。水程必由吕宋之利仔爰海而南，吕宋至班爰十更，至恶党二十三更，至宿务二十四更，至网巾礁脑五十入更。人愚罔知识，国各有酋惟谨守国土。其东南又有万老高、丁机宜二

岛，居于己方，国土人物产类相似。水程吕宋至万老高一百七十四更，至丁机宜二百一十更。

魏源曰：《坤舆图说》、《职方外纪》述阿细亚洲海中巨岛，曰日本，曰吕宋，曰淳泥，曰小爪哇，曰苏门答刺，曰则意兰，曰马路古〈（一作：木路各）〉，皆西洋市舶所盛之区，而马路古不见于史。史言美洛居为佛郎机荷兰共据，又不见于《图说》、《外纪》，其为音译相互无疑。丁机宜合苗里，又小，不足道矣。乃《明史》，此外尚有览邦、淡巴、南巫、里白、葛达、古里、班萃等数十国，仅谓在东南海中，初无疆里沿革，不过渔獠蛋户，西洋所不屑顾，而郑和遍致诸王会，史乘概列诸职方，何足算哉，何足算哉。国朝互市，诸番在西北洋者，皆夷船来市。惟南洋，则华船往市。以冬春往，夏秋归。康熙初，开东洋海禁，尚未许赴南洋。雍正乾隆海禁大弛，蜚帆鹢舶，万里遄征。然内地商船，远极印度、南洋而止，无至小西洋者。明太监郑和亦仅远至小西洋，无至大西洋者。故今志海国以东南洋冠诸首，而尽删《明史》诸小岛。

○英夷所属新埠岛〈（疑即《明史》之交栏山。原无今补）〉

谢清高《海录》：新埠，海中岛屿也，一名布路槟榔，又名槟榔土，英吉利于乾隆年间开辟者。在沙刺我西北大海中，一山独峙，周围约百余里。由红毛浅顺东南风约三日可到，西南风亦可行。土番甚稀，本巫来由种类。英吉利招集商贾，遂渐富庶。衣食房屋俱极华丽，出入悉用马车。有英吉利驻防番二三百，又有叙跛兵千馀。闽粤到此种胡椒者万馀人。每岁酿酒，贩鸦片，及开赌场者，榷税银十馀万两，然地无别产，恐难持久也。

何大庚《英夷说》：英吉利者，昔以其国在西北数万里外，距粤海极远，似非中国切肤之患。今则駉駉移兵而南，凡南洋濒海各国，远若明呀喇、曼哒喇、萨孟买等国，近若吉兰丹、丁加罗、柔佛乌土国，以及海中三佛齐、葛留巴、婆罗诸岛，皆为其所胁服，而供其赋税。其势日盛，其心日侈，岂有厌足之日哉。近粤洋海岛有名新埠者，距大屿山仅十日程，沃土三百里，闽粤人在彼种植，以尽地利者，不啻数万。阡陌田园，一岁再熟，即粤人所谓洋米是也。英夷以强力据之，拨叙跛兵二千，驻防其地，与新嘉坡相犄角，居然又一大镇矣。

《明史》：麻叶瓮，在西南海中。永乐三年十月，遣使赍玺书赐物，招谕其国。其酋长迄不朝贡。自古城灵山放舟，顺风十昼夜，至交栏山，其西南即麻叶瓮。山峻地平，田膏腴，收获倍他国。交栏山甚高，广饶竹木。元史弼、高兴伐爪哇，遭风至此山下，舟多坏，乃登山伐木重造，遂破爪哇。其病卒百馀，留养不归。后益蕃衍，故其地多华人。

元汪大渊：《岛夷志略》勾栏山，岭高而林密，田瘠谷少，气候热，俗射猎为事。

至元初，军士征阇婆，遭风于山，轻损舟。一舟幸免，见此山多木，故于其地造舟十馀只，飘然长往。有病卒百余人不能去，遂留山中。今唐番杂居。〔源案〕交栏山，为往大爪哇婆罗洲必由之地，又山高壤沃，似即新埠之地。

卷十六

英夷所属外新阿兰岛，即阿塞亚尼洲〈（一名澳大利亚洲，但与欧罗巴之奥地利国同名，若但呼新荷兰，又与两爪哇相混。故今从《地理备考》阿塞亚尼洲之名，其实音近，字殊，犹之奥地利国，一作欧塞特厘国也）〉，盖《地理备考》以此洲为南洋诸岛之统领，故以岛名为州名。其实亚细亚等，皆夷人以意命名，非有故实。六合之外，圣人不论，既放观宇宙之大，不得不名从主人也。

《地理备考》曰：阿塞亚尼洲，又名奥斯达拉里，亦名大新阿兰，在南洋之中。纬度自南十度起，至二十九度止，经度自东一百十度起，至一百五十二度止。南北相距约七千五百里，东西相去约九千五百里，地面积方三百八十五万里。

又曰阿塞亚尼州，即南洋诸岛，今合称为五州之一也。重洋叠屿，地狭国多，而以中央之最大奥斯达里亚岛为主，其余各岛，土产丰饶，黎庶不一，政治各殊。纬度距赤道自北三十五度起，至南五十六度止，经度巴黎斯午线东九十一度起，至一百零五度止。

本州东枕大海，西接印度海，南连南大海，北界北大海，暨亚细亚、美里加二州。

本州四面皆海，众岛散布于中，合计众岛南北相距约二万二千七百五十里，东西相去约四万一千里，统计地面积方约四百二十万零五千五百里。

本州地分三域，一名西亚塞亚尼，纬度自北十二度起，至二十一度止，经度自东九十三度起，至一百三十二度止。岛屿纷繁，散布其中，曰苏麻答刺，曰爪哇，曰松巴瓦地门，曰美洛居，曰塞勒卑斯，曰婆罗，曰吕宋，此西方诸岛国也。一名中阿塞亚尼，又名奥斯达里，即本州之主岛，所谓大新阿兰者也。纬度自北一度起，至南五十五度止，经度自东七十六度起，至一百八十一度止。其诸岛曰新为义亚，曰卢义西阿达，曰新北勒达尼，曰萨罗蒙，曰北卢斯，曰基罗斯，曰新加勒达尼，曰诺尔佛尔克，曰新塞兰地，曰叠门尼，此中央诸岛国也。一名东阿塞亚尼，纬度自北三十五度起，至南六十五度止，经度自东一百二十五度起，至一百零五度止，各岛曰日本，曰马黎亚纳，曰巴劳，曰加罗黎讷，曰慕尔加拉威，曰维的，曰当加，曰花和尔尼，曰合么阿，曰给尔马的，曰古名，曰都浪哀，曰达义的，曰包么度，曰门达那，曰合威，曰斯波拉大，此东方诸岛国也。三域纷布，而以中央之奥斯达里洲为主，故得阿塞亚尼州之名。

本州各岛人民，约计二京零三亿馀口。风教不一，曰回教，曰释教，曰诸神教，曰耶苏公教，曰加尔威诺教，各从所尚。

本州各岛朝纲，视别州无异，其中称王称汉，称酋称长，或历代相传，或庶民自立，称谓各殊，彼此不同。

本州各岛人民不一，技艺各殊，视他州迥别。其黑人惟林是居，无所事事。凡日用器物，概不知造。其马来人稍为辛勤，或佃或渔，或驾舟，或开矿，以为养生之计。至若陶器，多造于巴布阿西亚人，簟席多编于罗马都人。其塞勒卑斯、布基斯勒及爪哇等各岛，织纺最优，工作细致。其维的当加达、义的都波哀等各岛，工作制造，亦属精良。凡熔造金银，琢磨玉石，刊斫竹木，雕刻牙角，在在不乏。其最精者，乃婆罗、爪哇及布里内西亚各岛之人。外人罕到，迄今尚莫能悉。至于海滨，亦未甚详。其冈陵重叠，人迹罕至。河之长者曰好给斯巴黎，曰马加里，曰拉支兰，皆在东方。其白矾、煤炭、生铁等物，多产于南方之中。草木花卉，靡弗充斥，丛林稠密，禽兽蕃衍。地气互异，各有不同。北方酷热，人莫能堪。中央温和，甚便居栖。南方或寒或暑，与欧罗巴州相等。技艺缺乏，土人愚鲁。明朝末年，有荷兰人始寻得此地，旋以其荒芜弃去。近数十年，英国复徙流民开垦创造，故犹存新阿兰之名，示别于葛留巴也。通岛各地，有属英吉利兼摄，有为酋长管理。海滨有东西南北之号，其东方又名南新牙利斯，乃酋所属地方。人民鄙陋居无庐舍，迁徙靡常，盖洪荒甫辟，榛狁之象也。东南洋各岛林立，然至大如婆罗、爪哇、日本，皆不过长二三百里止。独此岛长将万里，广七千馀里，如星中之月。且寒暑适平，物产繁殖。非南极、北极下冰海不毛之比。故当命为一州，与欧罗巴、亚悉亚等并峙焉。其属英吉利者，曰昔德，内屋宇壮丽，贸易日盛。曰波德尼卑，曰女加斯德尔，曰巴拉马大，曰日尔非斯，曰马加利，曰非里卑。西方曰留温，曰厄德黎，曰音达拉。至南方皆属英吉利兼摄，地分四，曰奴宜德斯，曰非磷德尔，曰波定，曰加兰。北方皆属英吉利兼摄，地分四，曰维德，曰弯叠门，曰阿尔内音，曰加尔奔达里。

《外国史略》曰：南洋群岛最多，形势最大，南极出地十二度四十分，及北极二十度，偏东自九十二度至一百三十四度，各相连，皆在南北黄道带内。故其天气物产情形皆相似，大山茂藎，并多古迹。产物甚贵。由此而西各岛分峙，第一带为苏门他拉岛、牙瓦岛、巴里岛、伦薄岛，偏东一百一十六度，土地丰盛，居民务农。第二带为西里白，在群岛之中，东界系补东岛、撒刺益等岛，皆延偏东一百一十六度，及一百二十四度。婆罗岛亦在此度内，所居族类不一。第三带岛自偏东一百二十四度，及一百三十度，北极出自二度及南极十度。大半皆蛮，其中有向化者，亦奉耶苏之教，食物系沙谷米。产丁香、玉果等物。第四带系吕宋群岛，出米谷，居民颇向化，多地震。第五带系锡兰山并五印度群岛，族内有两种，其一居各海边，身短、色紫、发长。其二系土民，黑面，发卷而长，体短且蛮，居林内。

总计东南岛屿，棋布星罗，其中央大地，无如奥大利亚洲者。广袤方圆约十五万里，南极出地自十度，至四十度。偏东自一百一十二度，及一百五十四度。此地支港不多，江河亦少，海边有山岭，其地平坦，广有草场。巡游者虽多，终不知其内地

形势之详。其北方近黄道，天气甚热，南方则冷，水凝冰结。内地低，夏时多东北东南等风，冬时多西北西南等风。天气之寒暖，与别国不同。往往冬夏相反，虽长亢旱而其露如滴，且无烟瘴，故外人至者皆服水土。树木约四千二百种，高约五十丈，便于建船屋。数年前，其地惟出莠，后英人种蔬菜、南果、葡萄、荔枝等树，皆蕃盛，尤美花卉。因缺水灌溉，惟可植麦，不宜禾。多野兽，无牲畜。英船载牛马羊豕至，日加蕃殖。鸟多鸚鵡、翠翎之属。海族多蛤蜊螺蚌而少鱼鳖。土人极卑陋，无衣无宇，奔走林内，遇外国人惟求酒食，醉即安睡。虽耶苏门徒教化，终无改变。明万历三十三年，荷兰初到此，因其荒芜不足开埠，遂去。故其岛至今尚有新荷兰之称，非婆罗爪哇之新荷兰也。迨乾隆四十二年，英国水师官远寻至此，遍览情形。乾隆五十二年，议将徒流之人，押配海边之陂他七港。自后土民始同开垦。道光年间，四方遍建城邑，开港口，筑草场，辟田亩，事勤作，不惜耗费。更察内地有壤土，招农工，年年增益。其最重之地，曰新瓦里士，系东海边之部。中间硤山，而四面平坦，牧场甚广，足养牲畜，每年剪羊毛运回本国，织造呢羽，约七万石。并煎用其油。道光十八年，垦田五千四百顷。出粟米、大麦、燕麦、{艸牧}麦、荷兰薯，共三十四万一千石。遇亢旱则居民食物不足，必由他地运入。道光十九年，居民共十一万四千三百口。道光十八年，运入之货值银四百五十万两，运出之羊毛、鲸鱼油等，值银二百二十万两，船二百九十二只。道光十九年，运进货价值银六百六十九万两，运出者银二百八十二万两，船五百六十三只。其后商贾不诚实，外人滥賒滥卖，诸行忽倒，银局不能守旧，物价皆落，商废民贫，赖英国才人，设法整顿补救，渐复如旧。

英人调兵帅管理此地，其戍兵三年一易，所派文官不多，其乡绅公会，皆良民所择。道光四年，饷银十五万两。二十年，二百零四万两。今又消减矣。新瓦里士形势，似北亚、默利加，足为大国，此时开垦创建，料百年后，当为东南洋第一广大繁盛之地矣。都会曰悉尼城，南极出地三十三度五十一分，偏东百五十一度十六分，居民二万六千。城美街广，海隅水深，可泊船。巴拉马他海港，居民三千。默布尼所属之菲立港，山水四周，景尤清妙，道光十七年甫建此邑，已广筑屋宇。

南边藩属地，偏东自百三十二度，及百四十一度，广袤方圆千一百五十万顷，平坦不生草木，近地开埠，民不过万，此时开垦，产物日增。会城曰亚得害。

西边藩属地，南极出三十一度，及三十五度，偏东自百一十五度及，百二十九度。于道光十九年始开此地，濒海多沙，并无产物，居民数千口，住鸿鹄河边。

北方藩属地，在甲宾他海隅，乃道光十八年所开之埠。天气物产，俱与南海岛无异。多产海参，山内出丁香。土蛮面黑。港曰益生顿，居民少，地面岛，南极出地四十一度二十分，至四十三度四十分，偏东一百四十四度四十分，及一百四十八度二十分。广袤方圆一千一百五十五里，系丰盛灌溉之地。所出木料、五谷甚多，每年出麦二万一千馀石。所养之马，共二千零三十四匹，牛八万四千四百七十六头，羊

百二十三万二千五百一十一头。居民四万五千。道光十八年运入之货，共计银二百一十万两，运出者百七十四万两，船三百七十只；运出之鲸鱼油价值银二十六万两，绵羊毛五十一万三千两。惜仅开辟中央，未能遍垦。中央都会曰何巴邑，居民万四千三百八十二口。老新屯邑，居民六千口，亦繁盛之港。英国新到之氓，大半无银，因在两邑开银局，随时借贷，以扶其民焉。

所附之那里佛屿，系流徙所集，地出麻。

《万国地理全图集》曰：南亚齐亚地，分荷兰大山，与大海洋之群岛，繁絮如微尘之数。至其列地方，西国船户首先寻得者，吕宋、荷兰等国为首。前百有馀年，无人知此等地，迨及英国船只，询问风土人情形势，察出新地无数，则将其罪犯徒流之新荷兰，亦有閭閻之民，在本地无食物，甘心涉重海来此。开荒地，辟草莱，后又异国之民，愿受一厘而为氓，别有教师，离本地以传耶稣福音之理。又有捕鲸鱼之船只，巡驶往来，与该屿结交。于今通知其形势，而识其地理矣。

新荷兰，南极出自十度至三十八度，偏东自一百十五度，至一百五十度，延袤方圆九百万方里。惟知其海边，但其中地无人迹到也。其江河不多，两边干涸之土，所有山岭最高者三十丈。天气暴躁，赤地穷发。所有禽兽，与北地毫无同形焉。其土民素性近于禽兽，惟以草果为食，以树枝为栖。但与白面人往来之际，则饮酒醉，辗转泥渚内。不穿衣服，男用其女若畜生，痛打虐待，怒则杀之。英国之新民到此地者，种麦粟米，牧绵羊，生意日广日盛。毳毛最细，以织呢绒，居民得其奶而卖其毛。所运出者，每岁价银二百八十万两；所运进之物，每年四百万两。其居民在各新处不上十万，其都乃悉尼。在广海门，系属大地之港口。通商不少，但其流徙之匪，风俗奢器，居民亦染其毒而离道远焉。有时浩荡虚费，挥金如土，有时行铺闭歇，银钱缺乏。海口居民二万丁，大半务商。内地部落虽多，人户有限，务农者鲜，以放牧为要。年年搬进新民，则六十年后此地乃大国。彼时全南海之地，必遵其命而服其权焉，其船只现赴到广州府贸易矣。

南海边所辟之处，尚新建屋数间而谓之邑。所移人户渐增，又与外国经商，故未久而成大国。在西边之新地，惟江边一处，初到之民，行事不如意，现时失望，并不得使费以开阡陌也。其北界近于黄道，天气暴热。但其土能产物，故英国调劲兵驻扎，此时遍地荒芜。但海滨之石中，出海参、海菜、燕窝等物件，其土人野心不驯焉。

地间岛，海东南形势，南极出四十度四十二分，至四十三度四十三分，偏东自一百四十四度二十二分，袤延方圆八万一千方里。出五谷及薯及各项蔬菜，其居民不独务农，乃以捕鲸为重。沿海港口，多不胜数，贸易富庶。

新荷兰，乃南方两岛，隔以海峡，南极出自三十四度，偏东自一百六十度至一百七

十八度。袤延方圆一十八万六千方里，峰高及云，雪叠环绕，水泽涌泊。其土民狠心好杀，与异族常结仇报复，猖獗放荡，令众人惊畏。此时耶苏之门徒，进其地以教化之，将福音传其老幼。又令此野人务农作工，以除其食人肉之弊。

其地丰盛，出麻谷菜等物。是以英国迁移人口，向其土君买田，遍开新地。佛兰西亦效法而占据此方。

所有捕鲸之船，节次赴此港口，包兑包送，以鸟枪绒毡易各项食物，其土人亦登其船，而为水手。但性悍难近也。

前所言之各地方，全数归英国调兵派官，彼土君所管治者，泯泯棼棼，纲纪摧残，其中亦有蛮无主，皆散林内，如兽结群。东南海之岛，如新危尼、新耳兰、新撒罗门、希伯等群岛，繁不胜数。其山高，亦有出火之峰。但其居民黑面短身，倚强恃暴，无交通之理，只知此岛之形势而已。

其大洋海茫茫，一望无涯。所有各群岛，疏散不密，大半褊小之地，四围有珊瑚石盘，近之甚杂。其山出椰子、芋薯、饼果，居民以逸待劳，晴朗和畅，衣服不多，既无务事，惟取乐而已，其风俗未向化。但其中有族循良，谏行言听，耶苏学生又至其岛，教以天道，开其茅塞，发光其心，而引向福音。不期土人，自将其菩萨一切舍弃，真可谓神力无穷，蛮心感化也。

其群岛最大之屿，称曰阿他害地。风景清美，居民与所属各屿，钦奉耶稣，向风慕义增设学校。阿歪希，乃繁多群岛之最广，亦归正教。嘉庆十七年，奉教主耶稣弃邪归正，画一无异。今时此岛之居民大兴，但人户渐减。其王养弁兵，操演练习，亦有师船遍海巡驶。学校遍地，开谕教蒙。

其群岛之居民形体正端，但心内埋毒狠，加罗林群岛最多。中有族颇会技艺，偶有船只与之通商。

其贼群岛，被是班牙所占据者，强其居民奉教，效死不从。此外尚有多屿，大半所出物件，椰子而已。居民最多，与外国绝交。

佛兰西国于道光二十二年，占据马耳其沙之群岛，以为新地。但未知其情形何如，付之数年后可也。

《瀛环志略》曰：澳大利亚，一名新荷兰，在亚细亚东南洋巴布亚岛之南。周回约万馀里，由此岛泛大洋海东行，即抵南北亚墨利加之西界。其地亘古穷荒，未通别土。前明时，西班牙王遣使臣墨瓦兰，由亚墨利加之南，西驶，再寻新地。舟行数月，忽见大地，以为别一乾坤。地荒秽，无人迹。入夜烧火乱飞，命名曰火地。又

以使臣之名，名之曰墨瓦蜡尼加，西班牙人以此侈航海之能，亦未尝经营其地也。后荷兰人东来，建置南洋诸岛，展转略地，遂抵于海滨。乃建设埔头，名之曰澳大利亚。又称新荷兰。旋为佛郎西所夺，佛人寻弃去，最后英吉利得之。因其土地之广，坚意垦辟，先流徙罪人于此，为屯田计，本国无业贫民，愿往谋食者，亦载以来。他国之民，愿受一廛者，听之。地在赤道之南，天气炎燥。海滨多平土，山岭高者不过三十丈，江河绝少，杂树荒草，灌莽无垠，鸟兽形状，诡譎与别土异。土番黑面，披发裸体，食草根山果，结巢于树，予之酒一饮即醉，卧泥中，如豕负涂。男役女若畜，怒辄杀之。英人流寓者，垦海滨湿土，种麦与粟，草肥茂，牧羊孳乳甚速，毛毳细软，可织呢绒。现居民不足十万，每年运出之羊毛，值银二百餘万两，百物未备，日用之需，皆从别土运往。英人于东海口，建会城曰悉尼，居民二万。捕鲸之船，时时收泊，贸易颇盛。而流徙之户本莠民，饮博荡侈，相习成风，流寓良民亦颇染其俗。南境滨大南海，英人新徙人户，已成聚落。西境亦创置一廛，在江河之滨。北境近赤道，天气酷热，产海参、海菜、燕窝。英人派陆兵驻守，以防侵夺。计澳大利亚一土，英人四境所耕收，仅海滨片土，不过百之一二。其腹地则奥草丛林，深昧不测。土番如兽，老死无往来，不特风土无从探访，即山川形势，亦无由乘輶历览。英人谓此土虽荒旷，而百餘年后，当成大国。南海诸番岛，当听役属如附庸也，近命名曰南亚细亚。

案：此《即职方外纪》所云第五大洲，陈资斋所谓人迹不到处也。野番兽处，亘古昏蒙。西班牙搜奇天外，荷佛蛮触海隅，英人极意经营，可谓好勤远略矣。

○附近此洲各岛

《外国史略》曰：新危尼岛，一作新为匿，一作新义内，在东南广袤方圆万三千里，居民五十万。山甚高，峰积雪，海中可遥见之。亦有火山、火浆。民不知耕，皆黑面髻发，不着衣，性如禽兽。有人上岸，即杀之。其内地不知何产，荷兰人于此开埠，不服水主，守兵多殒于烟瘴。甲版船过此岛时，即有土蛮来，以玳瑁、金沙，易布匹衣服。然所给之衣裳亦不穿用，好裸身巡游。尚有多屿，悉荒芜无人。《外国史略》曰：新阿兰岛，南极山地，自三十四度二十五分至四十七度十九分，偏东自百六十六度及百七十九度，广袤方圆四千二百九十一里，居民约十五万。岛南多山，天气冷，产物少。万历间，荷兰水手初到此岛。乾隆间，英人驶船始抵此。鲸鱼云集，恣人所捕。而市皆无果，田皆无谷，兽无羊豕牛。民食草根树叶，于是伐木构屋，垦田治圃，种果树，蕃薯、麦、谷、蔬菜，置牲畜，土民始火食。出高千四百七十五丈，土蛮力健勇于作为，形貌平正，性亦良善。附近群屿尚多，皆荒地不毛，土蛮如野兽。《地理备考》曰：新义内岛，一作巴布阿西岛，在南洋之中，新阿兰岛之北，纬度自南一度起，至十度止；经度自东一百二十八度起，至一百四十七度止。长约三千六百里，宽约九百里。山势峻峭，丛林稠密。岛外人罕到，迄今尚莫能悉。至于海滨亦未甚详。土产椰蕉沙谷米等物。人民朴陋，逐日建篷造船，营生谋食。通岛分为四酋管辖，其余各岛曰阁必，曰萨尔瓦地，曰加门，曰巴

定打，曰非里威里，曰当必，曰书敦，曰阿路。内有一岛曰外去，归于的德尔酋长统摄。

《地理备考》曰：卢义西阿达岛，在南洋之中，新义内岛之东，纬度自南八度起，至十二度止，经度自东一百四十八度二十分起，至一百五十二度十分止。地势错落，不相联络，居民皆食人肉，岛中备细，外人尚莫悉其详。岛之巨者，曰罗塞尔，曰圣挨南，曰音德里加斯德，曰虽斯地，曰多罗皮安。

《地理备考》曰：新北勒达尼岛，在南洋之中，卢义西阿达归之北，纬度自南四度起，至六度二十五分止；经度自东一百四十六度起，至一百五十度止。地势错落，不相联络。火山不一，昼夜吐焰。丛林稠密，禽兽充斥。人民纷繁，性凶猛。岛之大者，曰新北勒达尼，又名比拉拉。曰新义尔兰达，又名当巴拉。曰约尔各，又名亚加马大。曰新阿诃威尔。其余颇小，兹不悉载。

《地理备考》曰：萨罗蒙岛又名新日尔治，在南洋之中，新义内岛之东，纬度自南四度起，至十二度止；经度自东一百五十二度起，至一百六十一度止。岛屿胪列，树木稠密。人烟纷繁，迁徙无常。岛之巨者，曰布加，曰布加音威里，曰三大义萨白尔，曰日尔日亚，曰瓜达尔加纳尔，曰三几里斯多望。其西萨尔加岛虽小，火山吐焰猛烈。《地理备考》曰：北卢斯岛，又名三达古卢斯，在南洋之中，萨罗蒙岛之南，纬度自南八度三十分起，至十二度十五分止；经度自东一百六十三度二十分起，至一百六十七度四十分止。地势错落，不相联络。岛之大者七，内有火山一座，吐焰猛烈。

又曰基罗斯岛，又名新里比里大，亦号大西加拉德，在南洋之中，新阿兰岛之东，纬度自南十四度二十九分起，至二十度四分止；经度自东一百六十五度起，至一百六十八度止。中有二十一岛，大者九，曰斯必里多，曰马里哥罗，曰三都义至，曰义诺忙各，曰达纳，曰三巴尔多罗阿，曰澳罗拉，曰本德哥斯的，曰义罗忙加。

《地理备考》曰：新加勒德尼亚岛，在南洋之中，新基罗斯岛之西南，纬度自南十九度三十七分起，至二十二度三十分止；经度自东一百六十一度十七分起，至一百六十三度五十三分止。长约八百里，宽一百五十里。烟户一万五千口。地瘠不毛，不宜种植。人民鄙陋，迁徙无常。四面小岛不一，大者曰阿塞尔瓦多略，曰罗牙尔地，曰波大尼加，曰阿奴诺。

《地理备考》曰：诺尔弗克岛，在南洋之中，新加勒德尼并达斯马尼二岛之间。纬度在南二十九度，经度在东一百六十五度四十九分，甚属细小。田土肥饶，果谷丰登，地气温和。中有三岛，曰诺尔弗克，曰尼比安，曰非里卑。《地理备考》曰：新塞兰地岛，又名达斯马尼，在南洋之南，纬度自南三十四度起，至四十七度止；经度自东一百六十四度起，至一百七十八度止。分而为二，曰义加耶马惟，又名北

达斯马尼。曰达为不那母，亦号南达斯马尼。其北达斯马尼，长一千八百里，宽五百七十里。人烟纷繁，颇属强大。田土膏腴，树林稠密。地气酷热，海风清凉。诸酋分摄，不相统属。其南达斯马尼，长二千里，宽五百馀里。人烟稀少，田土较瘠。南北居民，性甚凶狠，互相残杀。风俗鄙陋，礼法全无。四面岛屿甚多，大者曰布路敦，曰半的，曰金卑里，曰阿加冷，曰马加里。

《地理备考》曰：叠扪尼岛，在南洋新阿兰之南，纬度自南四十度四十二分起，至四十三度三十八分止，经度自东一百四十二度二十二分起，至一百四十六度五分止。南北相去六百三十里，东西相距五百五十里。田土肥饶，谷果丰登。丛林稠密，禽兽充斥。土产铜铁、矾玉、云石、煤炭等物。地气温和，其岛为英吉利兼摄。分列九属，大者曰何罢尔其利。至蒙老者斯敦二处，则次之。本岛所属岛屿不一，曰布路尼，曰马利亚，曰沙刺，曰付尔诺，曰经乃，其大者也。

卷十七

○日本岛国录〈（凡前史无关海防者不录）〉

《明史》：日本，古倭奴国。唐咸亨中，改日本，以近东海日出而名也。地环海，惟东北隅大山。有五畿、七道、三岛，共百十五洲，统五百八十七郡。其小国皆服属焉，国小者百里，大不过五百里，户小者千，多不过一二万。国主世以王为姓，群臣亦世官。宋以前皆通中国，朝贡不绝。惟元世祖，数遣使招之不至。乃命范文虎等，师舟师十万征之。至五龙山，遭暴风军尽没。终元世，未相通也。明兴，乘中国用兵，屡寇海濱州县。洪武二年，遣使颁诏书，且诘其入寇之故。日本不奉命，侵掠如故。屡入贡，皆无表，却之。二十年，命江夏侯周德兴往福建，信国公汤和往浙江，整饬海防。命福建备海舟百艘，广东倍之。会胡惟庸谋逆，藉日本为助，其王遣僧如瑤，率兵卒四百余人，诈称入贡，且献巨烛，藏火药刀剑其中，既至而惟庸败。事露，乃决意绝日本。专务防海，后著祖训不征之国十五，日本与焉。永乐初，始通表贡。时对马台岐诸岛，贼掠滨海居民。谕其王捕之，王发兵，捕其众，繫其魁二十人以献。自是频入贡，亦频献所获海寇。且表言：岛上无赖鼠窃者，实非臣所知，愿贷罪。然海寇犹不绝。十七年，辽东总兵官刘江，大破之于望海埭。自是寇掠为稀，贡使亦不至。正统四年，八年，倭船四十艘，连寇台州、海宁，先是洪熙时，黄岩、龙岩民二人，因徭役叛，入倭为之乡导。倭性黠，时载方物戎器出没海滨，得间则张其戎器，肆侵掠，不得则陈其方物，称朝贡，东南海滨患之。其贡使亦屡杀人犯法，其来贡者，皆利互市，交通沿海奸豪，故且贡且寇。

嘉靖二十七年，巡抚朱纨，乃严为申禁，斩其交通者。由是浙闽大姓素为倭内主者，失利而怨纨，又数腾疏于朝，显言大姓通倭状，以故闽浙人咸恶之。巡抚御史周亮闽产也，上疏诋纨，请改巡抚为巡视，以杀其权，其党在朝者左右之，竟如其请。后又夺纨官，罗织其擅杀罪，纨自杀。自是不置巡抚者。四年，海禁复弛，乱益滋甚。祖制浙江设市舶提举司，以中官主之，驻宁波。海舶至，则平其直，制驭之权在上。及世宗尽撤天下镇守中官，并撤市舶，而滨海奸人遂操其利，初犹市，商人为之主，已而严通番之禁，遂移之贵官家，而负其直者愈甚，索之急，则以危言吓将吏。俾之剿兵将出，又以好言给之走，谓吾终不负若直。倭丧其赀不得返，已大恨，而大奸若汪直、徐海、陈东、麻叶辈素窟穴其中者，以内地不得逞悉，逸出海岛中，为倭谋主。诱之入寇，而海中巨盗，遂袭倭服饰旗号，并分艘掠内地。倭患日剧，于是廷议复设巡抚。三十一年七月，乃以佾都御史王忬任之，而势已不可扑灭。先是国初沿海要地建卫所，设战船，董以都司巡视副使等官，控制周密。及承平久，船敝伍虚，及遇警，乃募渔船以资哨守，兵非素练，船非专业，见寇舶至，辄望风逃匿。而上又无统帅御之，以故贼帆所指，无不残破。三十二年三月，汪直勾诸倭，大举入寇，连舰数百，蔽海而至。浙东西江南北，滨海数千里，同时告警。破昌国卫，四月犯太仓，破上海县，掠江阴，攻乍浦。八月，劫金山卫，犯崇明及常熟、嘉定。

三十三年正月，自太仓掠苏州，攻松江，复趋江兆，薄通泰。四月陷嘉善，破崇明，复薄苏州。入崇德县。六月，由吴江掠嘉兴，还屯柘林。纵横来往，若入无人之境。忬亦不能有所为。未几，改抚大同，以李天宠代之。又命兵部尚书张经总督军务，乃大征兵四方，协力进剿。是时倭以川沙洼、柘林为巢，抄掠四出。明年正月，贼夺舟犯乍浦、海宁，陷崇德，转掠塘栖、新市、横塘、双林等处，攻德清县。五月，复合新倭突犯嘉兴，至王江泾，乃为经击斩一千九百馀级，馀奔柘林，其他倭复肆掠苏州境，延及江阴、无锡，出入太湖，莫有御之者。大抵真倭十之三，从倭者十之七。倭战则驱其所掠之人为军锋，法严人皆致死。而官军素懦怯，所至溃奔。帝乃遣工部侍郎赵文华督察军情，文华婪，颠倒功罪，诸军益解体。经天宠，并被逮。代以周充、胡宗宪。逾月充罢，代以杨宜。时贼势蔓延，江南北，浙东西，既无不遭其蹂躏。新倭来益众，每自焚其舟，登岸劫掠。自杭州西剽淳安，突徽州歙县，至绩溪、旌德，过泾县，趋南陵，遂达芜湖，烧南岸，奔太平府，犯江宁镇，径侵南京。倭红衣黄盖，整众犯大安德门，及夹冈，乃趋林陵关而去。曲溧水，流劫溧阳、宜兴。闻官兵自太湖出，遂越武进、抵无锡，驻惠山。一昼夜奔一百八十馀里，抵浒墅，为官兵所围。追及于杨林桥，歼之。是役也，贼不过六七千人，而经行数千里，杀戮战伤者几四千人，历八十馀日始灭。此三十四年九月事也。

应天巡抚曹邦辅以捷闻，文华忌其功，以倭之巢于陶宅也，乃大集浙直兵，与宗宪亲将之，又约邦辅合剿，分道并进，营于松江之砖桥。倭悉锐来冲，遂大败。文华气夺，贼益炽。十月倭自乐清登岸，流劫黄岩、仙居、奉化、馀姚、上虞，被杀掳者无算。至嵊县乃歼之，亦不满二百人，顾深入三府，历五十日始平。其先一枝，自山东日照，流劫东安卫，至淮安、赣榆、沐阳、桃源。至清河阻雨，为徐邳官兵所歼，亦不过数十人。流害千里，杀戮千馀，其悍如此。而文华自砖桥之败，见倭寇势甚，其自柘林移于周浦馀，泊于川沙旧巢，及嘉定高桥者，自如他侵犯者无虚日。文华乃以寇息请还朝。明年二月，罢杨宜，代以宗宪。以阮鹗巡抚浙江，于是宗宪乃请遣使谕日本国王，禁戢岛寇，招还通番奸商，许立功免罪。既得旨，遂遣宁波诸生蒋洲陈可愿往，及是可愿还，言至其国五岛，遇江直、毛海峰。谓日本内乱，王与其相俱死，诸岛不相统摄，须偏谕乃可，杜其入犯。又言萨摩洲者，虽已扬帆入寇，非其本心，乞通贡互市，愿杀贼自效。乃留洲传谕各岛，而送可愿还。宗宪以闻兵部，言直等本编民，既称效顺，即当释兵，乃绝不言及。第求开市通贡，隐若属国。然其奸叵测，宜令督臣振扬国威，严加备御。移檄直等，俾剿除舟山诸贼巢以自明，果海疆廓清自有恩赏，从之。

时两浙皆被倭，而慈溪焚杀多惨，馀姚次之。浙江柘林、乍浦、乌镇、皂林间，又皆为贼巢，前后至者二万馀人，命宗宪亟图方略。七月，宗宪言，贼首毛海峰，自陈可愿还，一败倭寇于舟山，再败之沥表。又遣其党招谕各岛，相率效顺，乞加重赏。部令宗宪以便宜行。是时徐海、陈东、麻叶方连兵，攻围桐乡。宗宪设计间之，海遂擒东叶以降，尽歼其馀众于乍浦。未几，复蹙海于梁庄，海亦授首，馀党尽

灭。江南浙西诸寇略平，而江北倭则犯丹阳，及掠瓜洲，烧漕艘者。明春复犯如皋、海门，攻通州，掠扬州、亭邮，入宝应，遂侵淮安府，集于庙湾，逾年乃克。其浙东之倭，则盘踞于舟山，亦先后为官军所袭。先是，蒋洲宜谕诸岛，至丰后被留，转令僧人住山口等岛，传谕禁戢。于是山口都督源义长具咨送还被掠人口，而咨乃用国王印，丰后太守源义镇遣僧德阳等，具方物奉表谢罪，请颁勘合修贡，送洲还。前杨宜所遣郑舜功出海哨探者，行至丰后岛，岛主亦遣僧清授附舟来谢罪。言前后侵犯皆中国奸商，潜引诸岛夷众，义镇等实不知。于是，宗宪疏陈其事。言洲奉使二年，止历丰后山口二岛，或有贡物而无印信勘合，或有印信而非国王名称，皆违朝典。然彼既以贡来，又送还被掠人口，实有畏罪乞恩意，宜礼遣其使，令传谕义镇、义长转谕日本王，擒献倡乱诸渠，及中国奸宄，方许通贡。诏可。汪直之踞海岛也，与其党王激、叶宗满、谢和、王清溪等，各拥众诱挟倭寇为雄。朝廷至悬伯爵万金之赏，以构之，迄不能致，及是内地官军颇有备。倭虽横亦多被剿戮。有全岛无人归者，往往多尤直，直渐不自安。宗宪与直同郡，馆直母与其妻孥于杭州，遣蒋洲赍其家书招之。直知家属固无恙，颇心动。义镇等以中国许互市，亦喜。乃装巨舟遣其属善妙等四十余人，随直等来贡市。于三十六年十月初，抵舟山之岑港。将吏以为入寇也，陈兵备。直乃遣王激入见宗宪，立遣之。直又邀一贵官为质，即命指挥夏正往。直以为信，遂与宗满清溪偕来，宗宪大喜，礼接之甚厚。令谒巡按御史王本固于杭州。本固以属吏，激等闻大恨，支解夏正，焚舟登山，据岑港坚守。逾年，新倭大至，屡寇浙东三郡。其在岑港者，徐移之柯梅，造新舟出海，宗宪不之追。十一月，贼扬帆南去，泊泉州之浯屿，掠同安、惠安、南安诸县，攻福宁州，破福安、宁德。明年四月，遂围福州，经月不解。福清、永福诸城，皆被攻毁。蔓延于兴化，奔突于漳州，其患尽移于福建。而潮广间，亦纷纷以倭警闻矣。

至四十年，浙东江北诸寇以次平，宗宪寻坐罪被逮。明年十一月，陷兴化府，大杀掠以据平海卫不去。初倭之犯浙江也，破州县卫所城以百数，然未有破府城者，至是远近震动。亟征俞大猷、戚继光、刘显诸将，合击破之。其侵犯他州县者，亦为诸将所破。福建亦平。其后广东巨寇，曾一本黄朝太等，无不引倭为助。隆庆时破碣石，甲于诸卫所。已犯化州、石城县，陷锦囊所、神电卫。吴川、阳江、茂名、海丰、新宁、惠来诸县，悉遭焚掠。转入雷廉琼三郡境，亦被其患。万历二年，犯浙东宁、绍、台、温四郡，又陷广东铜鼓卫、双鱼所。三年，犯电白。四年，犯定海。八年，犯浙江韭山及福建澎湖东涌。十年，犯温州，又犯广东。十六年，犯浙江。然是时疆吏惩嘉靖之祸，海防颇饬，贼来辄失利。其犯广东者，为蜚贼梁本豪勾引，势尤猖獗。总督陈瑞集众军击之，斩首千六百馀级，沉其船百馀艘，本豪亦授首。帝为告谢郊庙，宣捷受贺云。

日本故有王，其下称关白者最尊显。时山城州渠信长为此职，偶出猎遇一人卧树下，惊起冲突，执而诘之。自言为平秀吉，沙摩洲人之奴，雄健矫捷，有口辩。信长见而悦之，令牧马，名曰木下人。后渐用事，为信长画策，夺并二十馀州，遂为摄

津镇守。大将有参谋阿奇支者，得罪信长，命秀吉统兵讨之。俄信长为其下明智所弑，秀吉方攻灭阿奇支。闻变与部将行长等，乘胜还兵讨之，威名益振。寻废信长三子，僭称关白，尽有其众，时为万历十四年。于是益治兵征服六十六州，又以威胁琉球。吕宋、暹罗、佛郎机诸国，皆使奉贡。乃改国王所居山城为大阁，广筑城郭，建宫殿。其楼阁有至九重者，实妇女珍宝其中。其用法严，军行有进无退，违者虽子婿必诛，以故所向无敌。乃改元文禄，并欲侵中国、灭朝鲜而有之。召问故时汪直遗党，知唐人畏倭如虎，气益骄，益大治甲兵，缮舟舰，与其下谋。入中国北京者，用朝鲜人为导。入浙闽沿海郡县者，即用唐人为导。虑琉球泄其情，使母入贡。同安人陈甲者，商于琉球。惧其为中国害也，与琉球长史郑回谋，因进贡请封之使，具以其情来告。甲又旋故乡，陈其事于巡抚赵参鲁。参鲁以闻，下兵部。部移咨朝鲜王，王但深辨乡导之诬，亦不自知其谋已也。初秀吉广征诸镇兵，储三岁粮，欲自将以犯中国。会其子死，旁无兄弟，前夺丰后岛主妻为妾，虑其为后患。而诸镇怨秀吉之虐已也，咸曰：此举非侵大唐，乃袭我耳。各怀异志，由是秀吉不敢亲行。

二十年四月，遣其将清正行、长义智僧、元苏宗逸等，将舟师数百艘，由对马岛渡海，陷朝鲜之金山。乘胜长驱，以五月渡临津，掠开城，分陷丰德诸郡。朝鲜望风溃，清正等遂逼王京。朝鲜王李公弃城奔平壤，又奔义州，遣使络绎告急。倭遂入王京，执其王妃王子，追奔至平壤，放兵淫掠。七月，命副总兵祖承训赴援，与倭战于平壤城外，大败。承训仅以身免。八月，中朝乃以兵部侍郎宋应昌为经略都督，李如松为提督，统兵讨之。当是时，宁夏未平，朝鲜事起。兵部尚书石星，计无所出，募能说倭者侦之。于是嘉兴人沈惟敬应募，星即假游击将军御，送之如松麾下。明年如松师大捷于平壤，朝鲜所失四道并复。如松乘胜趋碧蹄馆，败而退师，于是封贡之议起，中朝弥缝，惟敬以成款局，事详朝鲜传。久之秀吉死，诸倭扬帆尽归，朝鲜患亦平。然自关白侵束国前后七载，丧师数十万，糜饷数百万，中朝与朝鲜，迄无胜算。至关白死，兵祸始休。诸倭亦皆退守岛巢，东南稍有安枕之日矣。秀吉凡再传而亡。终明之世，通倭之禁甚严，而闾巷小民，至指倭为詈骂，甚以噤其小儿女云。

《武备志》：倭夷惯为蝴蝶阵，临阵以挥扇为号，一人挥扇，众皆舞刀而起，向空挥霍，我兵仓皇仰首，则从下砍来。又为长蛇阵，前跃百脚旗，以次鱼贯而行。最强为锋，最强为殿。中皆勇怯相间，每日鸡鸣起，蟠地会食。食毕，夷酋据高坐，众皆听令。挟册展视，今日劫某处，某为长，某为队。队不过三十人，每队相去一二里，吹海螺为号，相闻即合救援。亦有二三人一队者，舞刀横行，薄暮即返。各献其所劫财物，毋敢匿，夷酋较其多寡而赢缩之。每据妇女，夜必酒色酣睡。劫掠将终，纵火以焚，烟焰烛天。人方畏其酷烈，而贼则抽去矣。愚给我民，勿使邀击，专用此术。贼至民间，遇酒饌先令我民尝之，然后饮食，恐设毒也。行衢陌间，不入委巷，恐设伏也。不沿城而行，恐城上抛砖石也。其行必单列而长，缓步而整。故占数十里莫能近，驰数十日不为劳。布阵必四分五裂，故不能围。对营必先遣

一二人，跳跃而蹲伏，故能空竭吾之矢石、火炮。冲阵必伺人先动，动而后突入，故乘胜长驱。战酣必四面伏起，突绕阵后，故令我军惊溃。每用怪术，若结羊、驱妇之类，当先以骇观，故吾目眩而彼械乘。惯双刀，上诳而下反掠，故难格。钹枪不露竿，突忽而掷，故不测。弓长矢巨，近人则发之，故射命中。敛迹者其进取也，张扬者其逃遁也，故常横。破舟以示遁，而突出金山之围；造竹梯以示攻，而旋有胜山之去。将野逸，则逼城。欲陆走，则取棹。或为阱以诈坑，或结稻杆以绊奔，或种竹签以刺逸。常以玉帛金银妇女为饵，故能诱引吾军之进陷，而乐为吾军之邀追，俘虏必开膛而结舌，莫辨其非倭，故归路绝。恩施附巢之居民，故虚实洞知。丰赏降虏之工匠，故器械易具。细作用吾人，故盘诘难。向导用吾人，故进退熟。宿食必破壁而处，乘高而了，故袭取无机问。常一被重围矣，饵以伪馘而逸之，或披蓑顶笠，沮溺于田亩；或云巾纓履，荡游于都市；故使我军士或愚而杀贼，或疑而杀良。江海之战，本非其长，亦能联虚舟，张弱帘，以空发吾之先锋。捐妇女，遗金帛，以饵退吾之后逐。凡舟之裾墙，左右悉裹布帛、被褥而湿之，以拒焚击。交哄间，或附蓬而飞越，即雷震而风靡矣。寇掳我民，引路取水，早暮出入，按籍呼名。每处为簿一扇，登写姓氏，分班点闸。真倭甚少，不过数十人为前锋。寇还岛，皆云做客回矣。凡被我兵擒杀者，隐而不宣，其邻不知，犹然称贺。

又曰，日本造船与中国异。必用大木取方，相思合缝，不使铁钉，惟联铁片；不使麻箸桐油，惟以短水草塞罅漏而已。费功甚多，费材甚大。非大力量，未易造也。凡寇中国者，皆其岛贫人。向来所传倭国造船千百只，皆虚诞耳。其大者容三百人，中者一二百人，小者四五十人，或七八十人。其形卑隘，遇巨舰难于仰攻。若于泥沉，故广福船皆其所畏。而广船旁陡如垣，尤其所畏者也。其底平不能破浪，其布帆悬于桅之正中，不似中国之偏桅帆常活，不似中国之定惟使顺风。若遇无风逆风，皆倒桅荡橹，不能转舵。故倭船过洋，非月馀不可。今若易然者，乃福海沿海奸民，买舟于外海，贴造重底，渡之而来。其船底尖能破浪，不畏横风、斗风，行使便易，数日即至也。

俞正燮《癸巳类稿》：万历中，台湾为日本倭所据，末年荷兰红毛人自西洋来，欲据香山不可，则据澎湖，又不可。乃南据美洛居，及葛留巴。以鸦片烟诱葛留巴，葛留巴人俱臃肿不能动，役于荷兰。既而荷兰聚集精锐，攻香山，战败。扬帆东走至澎湖，使人行重贿于福建巡抚，援意大利亚人居香山故事，以求澎湖必得。巡抚使人善谕之，则投日本于台湾。岁纳鹿皮三万，求台湾互市也。适日本倭居台湾者，新奉天主教，遂许之筑赤嵌城以居，今安平镇是也。荷兰既得地，即数数与日本倭构争。倭既染其教，争不胜，尽属东去，愤甚。尽诛其人之习天主教者，并约束琉球。而荷兰据有台湾，置揆一王，亦不复东。郑芝龙者，闽人也。为日本婿，家于台湾。日本之东归也，芝龙以舟楫人众横于海。大清顺治二年，芝龙自安平奉表降，其子成功逃入海。晚年，率舟师数百艘攻台湾。荷兰寡不敌众，遂去而伺于葛留巴。台湾人犹有习其教者，曰教册。成功则尽除之。康熙初，郑克塽降。廷议弃台湾，施琅力争曰：是资荷兰也。卒置郡县，功施至今。

陈伦炯《海国闻见录》曰：朝鲜，居天地之艮方，其南隔一洋，日本国属之对马岛，顺风一夜可抵。自对马岛而南，寅卯东方一带，七十二岛，皆日本倭奴之地。而与中国通贸易者，惟长崎一岛。长崎产乏粟菽，难供食，指开贸易，人公家通，计岁终所获利，就长崎按户口均分。国王居长崎之东北，陆程近一月，地名弥耶谷，译曰京。王服中国冠裳，国习中华文字，读以倭音。予夺之权，军国政事，柄于上将军。王不干预，仅食俸米，受山海贡献，上将军有时朝见而已。易代争夺，不争王而争上将军。倭人记载：自开国以来，世守为王。昔时，上将军曾篡夺之，山海贡物不产，五谷不登，阴阳不顺，退居臣位，然后顺若如故。至今无敢妄冀者，官皆世官世禄，遵汉制，以刺史千石为名，禄厚足以养廉，故少犯法。即如年弁，举一街官，街官者，乡保也。岁给养贍五十金，事简而闲。通文艺者为高士，优以礼，免以徭。俗尚洁净，街衢时为拭涤，夫妻不共汤羹。饮馔婢仆尚弃之，富者履坐絮席，贫者履坐荐席。各家计摊毯，踏棉之多寡为户口。男女衣服，大领阔袖，女加长以曳地，画染花卉文采。裤用帛幅裹绕，足著短袜，以曳履。男束带以插刀，髡须而剃顶，额留鬓发至后枕阔寸许，向后一挽而系结发，长者修之。女不施脂而傅粉，不带鲜花，剪彩簪珥，而插玳瑁，绿发如云，日加涤洗，薰灼楠沉，髻挽前后，爪甲无痕，惟恐纳垢。其男女眉目肌理，亦非诸番所能拟。人皆覆姓，其单姓者，徐福配合之童男女也。徐福所居之地，名曰徐家村，其冢在熊指山下。俗尊佛，尚中国僧。敬祖先，时扫坟庐。然所云熊指山者，亦未知其所在，则犹或出于附会也。

法最严，人无争斗。语言寂寂，呼童仆，鸣掌则然诺。无售买人口，佣工期满，即归。所统属国二，北对马岛，与朝鲜为界，朝鲜贡于对马，而对马贡于日本。南萨峒马，与琉球为界，琉球贡于萨峒马，而萨峒马贡于日本。二岛之王，俱听指挥。气候与山东、江浙齐。长崎于普陀东西对峙，水程四十更。厦门至长崎，七十二更。北风从五岛门进，南风从天堂门进。对马岛坐向登州，萨峒马坐向混台。地产金、银、铜、漆器、磁器、纸笺、花卉、染印，海产龙涎香、鲑鱼、海参、佳蔬等类。萨峒马山高巉岩，溪深水寒，故刀最利，兼又产马。人壮健。嘉靖间，倭寇者，萨峒马是也。日本原市舶永嘉，因倭之渔者十八人，被风入中国，奸人引之为乱，髡须剃额，杂以远处土语，递相攘掠，群称倭奴。及就擒仅十八人，随禁市舶中国。听我往彼，至今无敢来者。普陀往长崎，虽东西正向，直取而渡横洋，风浪巨险。谚云：日本好货，五岛难过。厦门往长崎乘南风，见台湾鸡笼山北，至米糠洋，香蕈洋，再见萨峒马大山天堂，方合正针，糠蕈二洋者。洋中水面若糠秕，水泡若蕈菌，呼之为米糠洋。香蕈洋，萨峒马而南，为琉球。居于乙方，计水程六十八更，中山国是也。习中国字，人弱而国贫，产铜器、纸、螺甸、玳瑁，无可交易。至日本琉球而东，水皆东流，所谓尾闾也。

南怀仁《坤舆图说》：日本乃海内一大岛，长三千二百里，宽不过六百里。今有六十六州，各有国主。俗尚强力，虽有总王，权常在强臣。其民多习武，少习文。土产银铁、好漆。其王生子，年二十以上，以王让之。其国不重宝石，惟重金银及古

窑器。

《皇清通考·四裔门》：日本，古倭奴国。唐咸亨初，更号日本。或云日本乃小国，为倭所并，故冒其号。国在东海中，东北限大山，其地东高西下，势若蜻蜓。古亦曰蜻蜓国。有五畿、七道、三岛、一百十五州，统五百八十七郡。皆依水屿，大者不过中国一村落而已。属国凡数十国，有天皇者，自开关以来，相传弗易，不与国事，不辖兵马，惟世享国王供奉。有国王者，受国事，掌兵马，盛衰强弱，更替不常。有官名关白者，如中国丞相职，代相更替，专国政兵马。平原藤橘四姓，为日本巨族。相窃据为国王，然君长授受次序，仅见于日本僧裔然所纪，有吾妻镜一书五十二卷，始安德天皇治承四年，讫龟山院天皇文永三年。凡八十七年，事识其小而略其大。李言恭撰《日本纪国》，书土俗颇详，而世系弗晰。相传国王，以王为姓，居长崎岛之东北。地名弥耶谷，译曰京。从长崎至弥耶谷，陆行近一月。去辽东远而闽浙迹，史称从带方至倭国，循海水行，历朝鲜国，乍南乍东，渡三海，历七国，凡一万二千里，然后至其国。又言去乐浪郡，及带方郡，并一万二千里，在会稽东，与儋耳相近，就至其国都而言，故纡回如此。若日本所属之对马岛，与朝鲜仅隔一洋，顺风一宿可抵。昔朝鲜国王李公时，关白兴师，七载不解，八道几没者屡矣。自内附本朝，倭人震慑帖息。崇德四年，日本岛主令平智连藤智绳等致书朝鲜云，去年大君有疾，久不听政，今春始瘳。大君左右用事之人，需索贵国土产甚多，近来贵国土产数少，且唐代交易之路又绝，大君左右所求，无以应之。望将贵国乙亥以后，未给之物，一一补给，然后两国可保无虞矣。萨摩洲太守，主和琉球；肥前州太守，主和南蛮，每岁所得不资，岛主主和贵国，而所得零星。以视二州为何如哉。朝鲜国王奏其书，言倭情叵测，应令边臣戒饬防守，以备不虞。是时，日本虽观衅而动，而朝鲜究未被兵者，皆震慑天威所致。七年二月，日本君以生子故，建祠祈福，索助祭器于朝鲜。八年三月，日本复遣告朝鲜，令致书所生之子如君例，兼索朝鲜国王空白印纸。倭请遣使往日本致贺仪，藉观形势，许之。顺治以后，惟通市不入贡。其市亦惟中国商船往，无倭船来也。其与中国贸易，在长崎岛，百货所聚，商旅通焉。外此有七十一岛，自对马岛而南而东，皆日本地也。国饶铜，我朝鼓铸所资，自滇铜而外，兼市洋铜。安徽、江西、江苏、浙江等省，每年额四百四十三万馀斤，设官商，额船十六只，皆以内地缎、丝、棉、糖、药往易。商办铜斤，必藉倭照以为凭验。又有额外浮给之小照，数止一二百箱。川二三年即废。其摄摩依势若佐传多之民，相矜以贾，积资或百万。和泉一州，鼎食击锺，有中国风。萨摩之鹦哥里，其民知礼义，重犯法。独伊纪之头陀，僧三千八百房，颇羯夷，嗜杀。诸州郡统于山口、丰后、出云三军门。三军门相掎掣，国分为三，而丰后独强，总属于山城君。明代入寇者，萨摩、肥后、长门之人居多。市舶所集，内奸勾引故也。人物秀丽，气候与江浙齐。产五色磁器、漆器、金文、纸马。萨摩州者，良地产铜锻工，所聚刀最利，故倭人好以为佩。龙涎香及海参、鰻鱼之属，皆海中产。所统属国，北为对马岛，与朝鲜接，南为萨摩州，与琉球接。对马岛与登州直，萨摩州与温州直，长崎与普陀东西对峙。由此达彼，水程四十更。厦门至长崎，北风由五岛入，南风由天堂入，水程七十二更。以海道不可以里计，舟

人率分一昼夜为十更，故以更记里云。

《澳门纪略》曰：日本国禁天主教最严，其海口葛罗巴马头石凿十字架于路口，武士露刃夹路立，商其国者，必践十字路入。如回避者，立斩之。又捏耶稣石像于城阙，以踏践之，故西洋夷船，不敢往商其国。

《万国地理全图集》曰：日本国本系三屿，而中山最广大。其内亦有王都，海边港汊，遍有埠头。其内地多山，出金铜。然其土不腴，土人不好食肉，不畜鸡豕，惟衣是务。山厂出各矿，国民掘地道甚巧。日本人与汉人不同，其面貌话音亦异，虽然藉中国之字，学唐人之礼，但其意见迥异，身体不高，眼深鼻扁。只剃前首，其后发生长，缚札短编，安于头上。其衣长袍，并不著裤，足蹑革履。其食物惟米饭、蔬菜、鱼鳖而已。惟食酒过量，齏醉，奸淫最甚。娼妓满地，尊贵贱卑。国民承父之职，历来不变。其世爵蒙王之封，各带刀剑，自治列邦。但必在京都，或亲躬为质，或调子孙为质也。自王至于庶子，各遵定例，即王者亦不得任意侈用游玩，有大臣管束之。故国主在其宫中为虏也，其内阁大学士，亦不自主，乃服律例之约束。其诸侯之动止寝食，惟礼是定。独准小民任意行为，倘若犯法，置之重典，稍不宽贷，惟知义，并不知仁。故百姓畏惧，并不敬爱也。自古以来，有两王治国。古时真王现操神权，在殿内，如僧度生，无殊木偶。其次王操武权，兼摄政务。士民共计二千万丁，至于士农匠商，种种过人。三屿大半饶地，非勤耕即饿死。匠作漆器、细绸，中国所罕得者。其商遍游经营本国沿海。明朝年间，广开通商之路。但缘天主教肇衅失和，与葡萄争战而赖荷兰获胜。是以灭教门，驱逐外人，无所不至。自斯以后，众民归佛。惟准荷兰与大清乍浦来之船只，在长崎贸易。严行管事。所有居民，繁多不胜数。不幸屡次被火烧，或地震之，屋宇颠倒，遍为瓦垒。神王驻在京都，此乃庙寺之地，僧道僻数。沿海马头不少，最广大者系大枝。

《莼乡赘笔》曰：鲁监国航海时，其臣阮进欲乞师日本，遣使赍补陀藏经以往。有僧湛微者，前自日本来，因与同载。阮抵日本，其国初闻有藏经往，喜甚。及闻湛微名，大惊曰：此僧复来，则速死耳。囚不受敕，护经而归。叩其故，则以湛微曾入天主教，逋逃回也。先是西洋人以天主教诱其国人，各授以秘术，民间闺闾，多为所乱。一入其教，死生不易。主者遂肆奸术，纠众怙乱，其国大发兵扑灭之。自是痛绝西人，以铜板镂天主形，置通衢。凡各国人往者，必使践踏而过。衣囊或携西洋一物，或西洋画册，搜得，一船皆诛。见张遴白《奉使日本纪略》。

《地理备考》曰：日本国在亚细亚州之东，北极出地二十九起至四十七度止，经线自东一百二十六度起，至一百四十八度止。四面枕海，东北西南相距约五千八百里，东西相去约九百里。地面积方约二十八万里，烟户三京馀口。地势嶄岩，峰峦叠起。众山之中，有昼夜吐火不熄，有冰雪凝积不化，有树木丛密，风景遍殊。湖河甚多，地方沃润。河之长者有五，一名约多，一名等略，一名亚拉，一名多内，一名伊哥。湖之大者有四，一名厠宜的斯，一名苏袜，一名加斯迷架乌刺，一名伊那

巴。田土腴腴，花木充斥。土产金、银、铜、铁、锡、铅、丝、茶、漆、竹、樟脑、绵花、纹石、玛瑙、磁器等物。地气屡更，寒暑俱甚。风暴地震，不时交作。王位惟男继立。所奉之教，乃新德释儒三教。其奉儒教者，为数无几。技艺精巧，工肆林立。惟与中华、高丽、贺兰等国通市，埠头不一，惟有屈许岛可治客船。通国分为七十二部，首郡名多乃，国都也，在慕许部。此外又有耶索海岛，及古里利亚斯岛，大拉该岛之南方，皆属本国兼摄。

《地理备考》曰：南洋北有慕宁窝尔加尼岛，分为四。一名慕宁西麻，中有八十九岛。一名富加尼各，中有火山。一名东岛，一名西岛。田土腴瘠，地气寒燠，俱似日本。自为部落，不受管辖。马梨亚纳岛，在小吕宋岛东北，纬度自北十二度三十分起，至二十度十三分止；经度自东一百四十一度起，至一百四十三度止。田土肥沃，谷果丰登。地气温和，海风清凉。中有十七岛，大半为吕宋管辖。各岛惟五岛有居民，俱在南方。曰矿，又名圣若望；曰的尼安；曰塞半；曰亚基到于；曰亚宋桑。

《外国史略》曰：大清国东，为日本国。北极出地自三十度至四十二度，偏东自一百二十度至一百四十三度。广袤方圆一万二千五百里，居民三千五百万。分五十三郡、九州。此外尚多岛屿。日本之国，隔以海峡。古里利群岛，亦归日本权辖。日本山高而饶，丰田不多，常地震，杰峰积雪，四面环绕，冬夏不消。产金铜，多宝玉，出米谷、萝卜、茶叶、绵花、胡丝、樟脑，但不足用耳。百姓罕食肉，牲畜甚少。惟准唐人于港口养豕，山内有野猪、鹿、麂、熊、狼等兽。山水甚美。日本在上古时，本中国之氓往开垦，与土人相参，各地有土君操权，时时争斗，百姓不安。日本与中国往来不多，元世祖怨日本不入贡，调战船攻击，狂风忽起，到岸者皆被杀。后日本海盗，据掠浙江、江苏界，侵高丽，以雪怨，连二百年。有世袭将军专权，于是日本之君，徒存虚名。

明世宗嘉靖二十年，有西洋数船到日本岸，与土民贸易。有传天主教之师，教其民人几及数万。后是班牙船，亦开通商之路。贸易不久，时荷兰亦到日本，通商甚盛。适日本将军曰平秀吉者，侵朝鲜地，大胜。辄自骄，尽服各岛主，而操全权。忽领军回国，禁其君只准在宫内与嫔妃往来，不许外接。且立令，列国诸侯每年六月携家往都中，回时留妻孥为质。又下令，严禁奉天主教之民，所杀数万，天主教遂止。明怀宗十九年，将军永禁西洋商船，不许赴本港。后有澳门之公使来议和，即杀之，仅归其水手。大吕宋有商船到日本国，连人货尽没入之。一切船户有奉天主教者，立治以死罪。又严禁国人，不准出入他国，违者死。遇有难民被风漂到异国者，回时即监禁，不准与其亲戚骨肉往来，免染异俗。有荷兰并中国往商之汉人，及水手，亦严禁在小洲，不与土人交接。每三年一次，惟荷兰公使赴其都朝见。沿途严防，不容散步。若遇他国船到，即尽力绝之。或未速退，即放炮轰击。道光十七年，有花旗国船，载送日本被风难民七人回国，尚几至，被害。道光二十六年，有花旗佛兰西、大尼等国之公使，赴其港议和睦章程，亦被拒。虽在对马岛与高丽

人贸易，不久亦绝往来。

日本东方地甚饶，不多产物，惟出黄金红铜。民习于勤，而性固执。每因细故轻生，其君亦视民如草芥，见人贫苦，亦不援手。娼妓甚盛，婚姻丧祭，与中国相似。尊长常带剑二三口，起居不舍。有痛于心，则剖腹而毙。其人朴实不许，若委以事，不成不止。手工艺巧捷，最美者花布、漆器、绸缎等货物。剃头惟留顶发，衫长及脚，贫者不裤，夏则身裸。女裳与男不异，面目多同吕宋，而异中国。多食菜鱼，不养牲畜。时时食茶，然不及中国茶叶。语音虽异中国，而用中国文字、书册以教人。除汉人文字外，兼学荷兰各艺术，是以医术、天文、地理，无不通习。其聪明过于汉士，尚有用字母者，智士便写之以合土音。日本国重文墨，但官多世袭。通习文字者，或反无俸禄。不甚与外国贸易，每年惟荷兰船一，唐舶五，琉球船亦不过十。百姓沿海惟以本地之货交易，或载列岛主，所进贡将军之物。最大之港曰大阪，然每年飘所失之舟，亦有五分之一，盖所造之舟本不固，难冒风水。其君恐商人远离本地，故禁造坚舶。宁见本民之陷没，不肯立法保救。濒海民多业渔，日用所常食也。捕鲸鱼，食其肉，而用其油。除佛教外，则崇尚古时所传之神道。僧最多，官府惟执法律，不稍宽贷。罪犯一闻拟罪，辄愿自尽，不欲受辱。

全国分七道，六十八国，六百有四郡，万有三千邑，九十万零九千八百五十八乡，百有四十六炮台，神庙二万七千七百间，佛庙二万二千五百八十间。其北面山与满州对峙，多未开垦者。土民愚鲁，与黑龙江之鱼皮部同类。近日耕地渐广，产物渐多矣。另开一连屿，与土人贸易，亦设官理之。国之将军所驻，在江户海隅。居民百馀万，其宫殿周二三里，妃嫔嬖幸无数。其街直，恐地震，以木造屋，多火灾。庙甚壮丽，居民五十万。巧于造物又多著书，邑僧约八千名，贵贱远赴寺庙烧香者不胜数。大阪港系国之大海口，商贾云集。长崎港，荷兰唐人所集之处，尤便通商。因禁例严酷，年年消减。

国自昔王操全权，生杀必按法律。有大臣六，执法管束君上。若会议不合理，众且反之，则必自刎以抵其罪。其国王名为全国之主，实不得自专。王妃极多，以九百九十名为率，但不得出宫，恐人见。又不得踏地，恐污身。磁器衣服，一用必尽弃之。将军每年进贡，敬之如神。第利少权微，仅如偶像，将军之腹心探伺者，常在君左右。若有不合例之事，即告将军，动受其制。男女皆可为君，必素性谦谨，方可即位。诸侯各辖其地，将军察出有失，即劾奏之。其海口，俱将军派官掌政，责成甚重。若不昼夜尽心防范，即多陷罪。诸侯多管徧小之地，但在都，使费浩大，公项不敷。又恐其富而背叛，故妻子时留都中，拘在本宫，犯法即死。然诸侯勤明政事，而将军有意枉屈之。国人亦不服，即将军亦遭废害。各诸侯每年必赴都远覲，受扰无穷，然民亦安其法制之峻。军士约十万，步兵三万，骑兵三千，但不习武，有战则诸侯可募三十六万八千丁。其师船半烂半漏，仅恃刀剑之利。军令之严，庶民分四五品，以衣裤刀剑若干，分别各品。最卑者为皮匠，不准与他人来往。总之日本武勇，在亚西亚州，超越众国。但禁例过严，其君五爵视以下各品人等，有

若奴隶焉。

《外国史略》曰：琉球岛在日本南，共三十七所。其中八所，在台湾之东北。出番薯、米、白糖等货，其山饶。居民形体与日本同。但多悦色，好交接，远施厚量，慈惠尊贵者。识汉字，学中国语。由福州入贡京都，日本萨摩君颇难之，且重征税，每年必贡糖几万石。若有西洋甲板船至其国，国王优待之，若失船则补修，而押送之。居民约六十万，多务农，贫者业渔。贵贱不带兵器，惟立法律以束其众。屋宇甚美甚窄，船多渡大海，到福州，亦与日本通商，犹朝鲜之兼贡日本也。

黄宗羲《行朝录》曰：明季海盗有周崔芝者，福清人也。少读书不成，去而为盗于海。其人饶机智，尝往来日本。以善射名，与日本之萨摩岛主，结为父子。日本三十六岛，每岛各有王统之。其所谓东京者，乃国主也。国主曰京主，拥虚位而已。一国之权，则大将军掌之。其三十六国王，则如诸侯之职。萨摩王于诸岛为最强，王与大将军为首尾。崔芝既熟日本，故在海中无不如意。久之招抚以黄华关把总，稽察商舶。乙酉秋，唐王隆武加水军都督副黄斌卿驻舟山，其冬崔芝遣人至萨摩岛，诉中国丧乱，愿假一旅，以齐之存卫、秦之存楚故事望之。将军慨然约明年四月发兵三万。一切战舰军资器械，自取其国之馀资，供大兵中华数年之用。自长琦岛至东京三千馀里，驰道、桥梁、驿递、公馆，重为修辑，以待中国使臣之至。崔芝大喜，益备珠玑玩好之物以悦之。参谋林龠（一作学）舞为使，期以四月十一东行。龠舞将解维，而斌卿止之曰：大司马徐煌书来曰，此吴三桂乞师之续也。崔芝怒而入闽，福州既破，郑芝龙降。丁亥三月，崔芝克海口、镇东二城，遣其义子林皋，随安昌王至日本乞师，不得要领而还。戊子御史冯京第，谋于黄斌卿，偕其弟黄孝卿往日本，至长琦岛，其王不听登陆。始有西洋人为天主教者，入日本作乱于其国，日本勒兵尽诛教人，焚其船于岛口，绝西洋人往来。于中衢置铜板，刻天主教像于其上，以践踏之。囊橐有西洋一物，搜得必杀无赦。西洋人复以大舶载炮，来与日本为难，日本拒之。甫退一日，而京第至。故戒严同于外国，京第效包胥故事，于舟中朝服拜哭不已，会东京遣官行部，如中国巡方御史，秃顶坐蓝舆。京第因致其血书，萨摩王闻长琦王之拒中国也，曰中国丧乱，我不遑恤，而使其使臣哭于我国，我国之耻也。与大将军言之，议发各岛罪人出师。京第还，日本致洪武钱数十万。盖其国不自鼓铸，但用中国古钱，舟山之用洪武钱由此也。而黄孝卿假商舶留长琦岛，长琦岛多官妓，皆居大宅，无壁落，以绫幔分为私室。当月夜，每室悬各色琉璃灯，诸妓各赛琵琶，中国之所未有，孝卿乐之，忘其为乞师而来者。见轻于其国，其国发师之意益荒矣。己亥冬，有僧湛微自日本来，为荡胡伯阮进述请兵不允之故。且言金帛不足以动之，日本最敬佛经，诚得普陀山藏经为贄，则兵必发矣。进与定西侯张名振上疏监国，以澄波将军阮美为使，王亲赐宴。十一月朔，出普陀，十月至五岛山，与长琦相去一程。是夜大风黑浪兼天，两红鱼乘空上下，船不知所往。十二日见山，舵工惊曰，此高丽界也。转帆而南，又明日乃进长琦。凡商舶至国，例拨小船讯出入，名曰班船。阮美喻以梵篋乞师，其王闻之大喜。已知船中有湛微者，则大骇。初湛微之在日本也，长琦岛有三大寺，一曰南京寺，

中国北僧居之。一曰福州寺，闽浙广僧居之。一曰日本寺，本国人居之。南京寺住持名如定，颇通文墨，国人重之。湛微拜为师，湛微所能不若师而狡狴多变，乃之一岛名腴泉者，其岛无中国人往来，不辨诗字之好丑。湛微得妄自高大，恶札村谣，自署金狮子尊者，流传至东京，大将军见之曰：此必西洋人之为天主教者，潜入吾国。急捕之。既知其为江西僧，逐之过海。日本不杀大唐僧，有犯法者止于逐，再往则戮及同舟。湛微欲以此举自结于日本，于是阮美始知为其所卖也。遂载经而返，然日本自宽永享国三十余年，母后承之，其子复辟，改元义明，承平久矣。其人多好诗书、法帖、名画、古奇器、十三经、十七史，异日值千金者捆载既多，不过一二百金，故老不见兵革之事，本国且忘，岂能渡海为人复仇乎。即无西洋之事，亦未必能行也。

《瀛环志略》曰：自澳大利亚，迤东迤北抵南北亚墨利加之西界，谓之大洋海，水程数万里，岛屿甚稀。间数千里乃一遇其岛，四围多盘石，亦生珊瑚，海船近辄搁浅，故不能遍及。大洋海风浪最恬，泰西人称为太平海。各岛天气晴和，水土平淑，产椰子、芋薯，果实足供采食。土人织草为衣，以蔽形。性驯而慧，异于迤西岛番之悍犷。近年耶稣教之徒，游其地而诱进之，多有信从易俗者。岛名不能尽悉，英人因教事而命以名。

一曰会群岛，言其入耶稣之会也。岛之大者，曰阿他害地。附近群岛甚多，以此岛为纲领。其地山水秀淑，风景宜人。土人笃信耶稣教，广设学馆。又阿歪希者，亦大岛，属岛甚多，有国王。嘉庆年间，举国奉耶稣教，学馆尤繁。其王颇谙武备，常有师船巡海。

一曰友群岛，言与耶稣教为友也。土人形貌端正，有心计，耶稣教之徒，时游其地诱化之。有加罗林者，属岛最多，内有一族，颇通艺术。商船偶过其地，亦停泊贸易。

一曰贼群岛，言其非善类也。各岛多西班牙所据，西人以天主教诱劝之，土人不肯从，遂至互相攻击，交哄不已。此外小岛尚多，名不尽著。土产惟椰子，人户甚少，未与他国往来。道光二十二年，佛即西新开马耳其杀群岛，风土未详。

按四海之中，惟大洋海最大，即中国之东海，直抵亚墨利加之西境，四万里茫茫巨浸，别无广土。即岛屿亦晨星落落，据泰西人所传述，各岛风土人类，远胜于亚细亚南洋诸岛。然帆樯偶涉，率略未详。盖由东道往，水程当十馀万里，由西道往，须历南亚墨利加之铁耳聂离。途既险远，又无利可牟，故商船罕有至者。惟捕鲸之船，专鹜大洋，无所不到，于诸岛数数遇之，乃得稍通声闻耳。

坤舆四大土，皆周回数万里，惟中国之南洋，万岛环列，星罗棋布，或断或续。大者数千里，小者数百里，或数十里。野番生聚其间，榛狉相仍，自为部落。其种人

统名巫来由〈（一作无来由）〉，又有称为绕阿〈（即爪亚）〉、武吃者〈（一作茭吉）〉。西汉时诸番始通贡献，唐以后，市舶麇集于粤东。明初遣太监郑和等航海招致之，来者益众。迨中叶以后，欧罗巴诸国东来，据各岛口岸，建立埔头，流通百货。于是诸岛之物产，充溢中华。而闽广之民，造舟涉海趋之如鹜，或竟有买田娶妇，留而不归者。如吕宋、葛罗巴诸岛，闽广流寓，殆不下数十万人。则南洋者，亦七鯤珠崖之余壤，而欧罗巴之东道主也。

顾亭林《天下郡国利病书》云：倭奴邻三韩而国，故名韩中倭。后自恶其名，更号日本。在东南大海中，依山岛而居。地方数千里，为畿五。曰山城，曰太和，曰河内，曰摄津，曰和泉，共统五十三郡。为道七，曰东海，统一百十六郡；曰南海，统四十八郡〈（尝见日本所刻《和汉纪年》者，其国本名曰和，而华人讹称曰倭。至日本亦华人所称其国，至今自称大和，不云日本也）〉；曰西海，统九十三郡；曰东山，统一百二十二郡；曰北陆，统三十郡；曰山阳，统六十九郡；曰山阴，统五十二郡。为岛三，曰伊岐，曰对马〈（按《海国闻见录》称日本平列三大岛，其迤北者名对马岛，而此所云对马岛，止统两郡，盖对马本北境小岛之名，后来遂以为北境总名。余尝见日本人所作《广对马岛赋》，仿选体，极瑰丽。自注云岛小不足赋，故广言之。亦一证也）〉，曰多祢艺，各统二郡，皆依水附屿。郡之大者，不过中国之村落，户可七万，课丁八十万奇。国王一姓历世不易，初号天御中主，居筑紫宫，其子号大材云尊。自后皆以尊为号，传世三十二，至彦瀲尊。第四子号神武天皇，徙太和州强元宫。传至守平天皇，凡四十一世，复徙都山城国。其国文武僚吏皆世官。自两汉时始通中国，魏晋以后，得五经佛教于中土，于是沙门之教盛行。唐贞观间，尝遣使往谕。宋初，遣国僧裔然浮海贡献。太宗赐紫衣，厚存抚之。其传国已六十四世矣〈（按《后汉书》倭在韩东南大海中，依山岛为居，凡百馀国。自武帝灭朝鲜后，通汉者三十许国。大倭王居邪马台国，男子皆黔面文身，男女无别，饮食以手，俗尚徒跣云云。是日本在汉时，并非一国。土俗与诸番岛无异，其文字官制，自是两汉通中国后，始学得之。此所云六十四世，溯之当在商周。其国王一切名号，当系通华文后，增饰为之耳）〉。元王恽《泛海小录》云，由对马岛六百里，逾一歧岛，又四百里入容浦口，又二百七十里至三神山。其山峻削，群峰环绕，海心望之，郁然为碧芙蓉也。上无杂木，惟梅竹灵药松桧杪罗等树。其居民多徐姓，自云皆徐福之后。海中诸屿，此最秀丽方广。《十洲记》所云，海东北岸，扶桑蓬邱瀛州，周方千里。余按三神山本方士夸诞之说，用以欺诳人主，果即系日本附近小岛，则当日船交海中，何为求之不得。《后汉书·倭国传》称会稽海外有夷洲，及澶洲，秦始皇遣方士徐福，将童男女数千人，入海求蓬莱神仙不得。徐福畏诛不敢还，遂止此洲，世世相承，有数万家人民。时至会稽市，王恽《小录》所云或即夷洲、澶洲之类。至三神山之名，其为傅会无疑也。泉州陈资斋提军〈（伦炯）〉少时尝附商船游日本，言其风土甚悉。云日本人皆覆姓，单姓者徐福配合之童男女也。徐福所居之地，名徐家村，其家在熊指山下云。徐家村、熊指山，不知在日本何地。盖华人入倭，自徐福始，其遗民年久繁衍，遂散布于通国。倭人通中国文字，当系君房教之。特海外远夷，輶车罕至，往来者皆商贾之流，无

由探悉其原委耳。

案：日本三岛，香港英夷图萨摩岛于对马岛西，居长崎大岛西北，此大误也。夷人未至日本，故东洋形势未能了如，而以不知为知，此亦其一。盖萨摩即萨司岛，居日本之南。明季倭寇，此岛人也。其北长崎，长崎西北王京在焉。又北曰对马，其北朝鲜。

○附东南洋诸岛形势上

《明史》宾龙童国，与占城接壤，气候风土，大类占城。有昆仑山，节然大海中，与占城东西竺鼎峙相望。其山方广而高，其海即曰昆仑洋。往诸西洋者，必待顺风，七昼夜始得过。故舟人为之谚曰：上怕七州，下怕昆仑，针迷舵失，人船莫存。此山无异产，人皆穴居巢处，食果实鱼虾，无室庐井灶。

〔源案〕宾龙童，乃占城海岸之国，昆仑岛则在其南海中，非地相连也。大小昆仑，即东西竺山。《宋史》：天竺注辇国来朝，行二百馀昼夜，至三佛齐国，又行十八昼夜，度蛮山水口，历天竺山，至宾头狼山，又行二十昼夜，至广州是也。《明史》沿王圻《续通考》之误，分昆仑竺山为二，谬一。又望文生义，谓东西竺山为柔佛国，谬二。既以柔佛为佛国，竺山为天竺，因并以其对岸之宾龙童，即舍卫城，然则佛国近在占城，而大秦当近在长安乎。昆仑屿中，当有河源乎，谬甚。

《海国闻见录》：昆仑岛，七洲洋之南，大小二山屹立澎湃，呼为大昆仑、小昆仑山，尤甚异。土产佳果，无人迹，神龙盘踞。昔荷兰失台湾，边海界禁未复，因金厦二岛，平荷兰，掠普陀，毁铜像、铜钟。万历间，宫塑脱纱佛像，刀刃不能伤。驾火炮坏之，取里所实金银财宝。见像必剖以取藏宝，悉收而去。至昆仑意欲居之，龙与为患，藉火炮与龙斗，相持有日。后荷兰状若颠狂，自相戏。以曲腕击背心，日益毙，扬帆而去。将至噶喇巴，船击碎，存活者可十人。雍正丁未岁夏，噶喇巴海面立一中国人，群相棹舟往视，惟浮一铜钟，上镌普陀白华庵。知为昔荷兰掠沉者。回浙洋艘，互相争载，公议求筴。有黄彦者得筴，载回通港。惟此舟小而旧敝，顺帆不及月，抵南澳后转运至普陀。别船有被劫红毛者，有失风水者。佛力如此，前惟付之劫数耳。康熙四十五、六年间，红毛又图昆仑，不敢近山居住，就海旁立埔头。以昆仑介各洋四通之所，嗜涎不休，而中国洋艘亦多载砖瓦，往易红毛洋货。以其本廉而利大。夜围宿沙洲，多为鳄鱼步岸所吞。伐木围栅，稍宁。夜闻山中语，语促归。红毛为水土不服，毙者甚多，又为广西番劫杀殆尽。乃虚其地，凡中国洋艘由昆仑者，备鸡鹅毛蜃壳，到昆仑洋，天时极晴霁，见黑云一点，随化为烟，蜿蜒摇尾，即如江浙夏月，湖中云龙。下蓬惟恐不及，狂风立至，幸不及时而霁，俗呼鼠尾龙风。白云者，其风尤甚。日遇二三次，或四五次，间或不遇者少。故焚翎毛蜃壳，取秽气触远，过昆仑则无。

《海国闻见录》：南澳气岛，居南澳之东南，屿小而平。四面挂脚皆 娄古石，底生水草，长丈馀。湾有沙洲，吸四面之流。船不可到，入溜则吸阁不能返。隔南澳水程七更。古为落漈、北浮沉，皆沙垠，约长二百里，计水程三更。馀尽兆处有两山，名曰东狮象，与台湾沙马崎对峙隔洋，阔四更，洋名沙马崎头门。气悬海中，南属沙垠。至粤海为万里长沙头，南隔断一洋，名曰长沙门。又从南首复生沙垠，至琼海万州，曰万里长沙。沙之南又生 娄古石，至七州洋，名曰千里石塘。长沙一门，西北与南澳、西南与平海之天星，鼎足三峙。长沙门南北约阔五更，广之番舶洋艘，往东南洋、吕宋、文莱、苏禄等国者，皆从长沙门而出。北风以南澳为准，南风以大星为准。惟江浙闽省往东南洋者，从台湾沙马崎头门过，而至吕宋诸国，西洋甲板，从昆仑七州洋东、万里长沙外，过沙马崎头门，而至闽浙、日本，以取弓弦直洋。中国往南洋者，以万里长沙之外，渺茫无所取准，皆从沙内越洋而至七州洋，此亦山川地脉联续之气，而于汪洋之中，以限海国也。沙有海鸟，大小不同。少见人，遇舟飞宿，人捉不识惧。抐其背，吐鱼虾，以为羹。馀在台丙午年，时有闽船在澎湖南大屿，被风折桅飘沙坏，有二十人，驾一三板脚舟，用被作布帆回台，饿毙五人。馀詢以何处击碎，彼仅以沙中为言，不识地方。又云潮水溜入，不得开出。馀语之曰，此万里长沙头也。尚有旧时击坏一甲板，潮虽溜入，汝等若以南风棹长潮，再不得归矣。大洋之水，为沙两隔，节次断续，南北沙头，为潮汐临头。四面合流，外长而内退，外退而内长，须沿沙节次，撑上断续沙头，夹退潮乘南风东向尽流南退，虽欲北上求生，而南下者，正所以生也。何也，南风夹退潮，方能出溜，虽溜下然而归于大海。不入内溜，方得乘南风而归。舟人闻馀语，群起惊呼曰：亦曾到此地平，不则何为知之详，确如目睹耶。坏甲板尚存，为飞沙污没。饥抱海鸟为餐，渴饮其血，驾长潮为溜所吸，不待开动，三四日，无奈棹筴掉退潮滌入大洋，飘十二日到台。馀又语之曰，潮水分合，退为长，长为退，夹流双开，临头汇足，南澳气受四面流水，吸入而不出，古为落漈。试问入而不出归于何处，岂气下男有一海，以收纳乎。四人者从上而入，必从下而出。如溪流涌急，投以苇席入而出于他处。此理甚明，并以志之。

明黄衷《海语》：昆仑山，在大佛灵南，凡七屿七港，是谓七门。其旁洲屿，皆翼然环列。适诸国者，此其标也。其山多兕犀、野马、巨麋、异蛇、大木。复平川沃壤数百顷，椰树骈生，堕实弥谷，冬瓜延蔓，苍藤径寸，实长三四尺，大榆一围，海上无人之境。产物皆硕大，予客朱岩，令人采取何首乌、天南星二药，皆三倍于常品，气味自别。固知有枣如瓜，非诞语也。麋腐若泥淖然，船欲樵苏，非百人不能即往。日老估尝镌崖壁，识险以示防云。

又曰，分水在占城之外罗海中，涉屿隐隐如门限，延绵横亘，不知其几百里。巨浪拍天，异于常海。由马鞍山抵旧港，东注为诸番之路，西注为朱岩儋耳之路。天地设险，以限华夷者也。由外罗历大佛灵，以至昆屯山，自朔至望，潮东旋而西。既望至晦，即西旋而东。此又海中潮汐之变也。惟于操舟者，乃能察而慎之。

又曰，万里石塘在乌瀦二洋之东，阴风晦景，不类人世。其产多车渠，其鸟多鬼车，九首者，三四首者，漫散海际，悲号聒耳，惨颜怆神。舵师脱小失势，误落石汉，百无一免。

又曰万里长沙，在万里石塘东南，即西南夷之流沙河也。弱水出其南，风沙猎猎。晴日望之，如盛雪。船误冲其际，即胶不可脱，必幸东南风劲，乃免陷溺。

又曰铁板沙，所在有之，舟触即败。成化二十一年，宪庙遣给事中林荣、行人黄乾亨，封占城官，治大艘。凡大船之行，必选熟于洋道者，驾小艚船先行探水，大船后复系二小船，以便樵汲，且防不虞。是役也，军民千人，物货太重，而火长又疏于径路，次交趾之占城，罗误触铁板沙，船坏，二使溺焉，军民死者十九。予里中有麦福者，同七十余人夺一脚艇，棹至崖侧，巨浪簸荡，舍舟登山。回望大船覆处，近如席前，洪涛澜汗，惟败篋破甑，出没其间，数百人沕灭无迹。众皆长恸，昼行夜伏，捕蛇鼠，拾草木之实而啖。风雨晦冥，石妖木魅，怪侮万状。且已忘甲子，惟视月弦望以验时日。曾未浹旬，死者强半。存者二十四人，复已缺食二日。蹒跚冥行，俛入空谷，石窟宽坦如堂，有草叶如广之水蕉，掘之根类，蹲鸱而大，竞取以食。喉间微觉苦涩，馀味如葛。识者曰，此非恶草也，第未经风日，水土气，作苦涩味耳。乃曝之日中，偃息酣寝。比寤，晓星煌煌矣。迟明敲火燃草，取所曝者，煨而食之。味转香滑，晨进一枚，饥渴俱弭。相率肆力搜采，顷之根裔都尽。窟居二日，体力完健，乃人负数枚，复沿水际而行。俄闻中人语，至见岛夷数辈，乘三小船，循谿搜捞缎帛器物。有谙夷语者，询之，乃交趾占城界之巡徼船也。共载以归。二国夷王闻是天朝人民，馆谷如礼，于是占城遣人以二使来讷，广中始知大船汨没。守臣以闻，二使均荷恤荫。又逾年，二国始具海舟，送回中国。

王圻《续文献通考》：〔龙六犀角岛〕地内平而外尖，民皆蚁附而居之。气候常热，以亲戚尊长为重。一日不见，则持酒肴问安。地产沉速、降香等。

又，〔龙涎屿〕浮海内，波击云腾，每至春间，群龙来集，交戏遗涎。番人乃驾独木舟，登屿采归。设遇风波，则人俱下海，旋即至岸。其涎初若脂胶，黑色，有鱼腥气，久则成大块。或大鱼腹中割出，亦觉腥气，迨焚之，其香清远，货于苏门。官秤一斤，金钱一百九十二，准中国铜钱四万九千文。

又，〔龙牙门〕在三佛齐之西北，山门相对，若龙甲状。中通船，山涂田瘠，气候常热，四五月间淫雨。人以掳掠为豪，遇有番船，则驾小舟迎敌。若得顺风则幸脱，否则被其截劫，泛海者宜慎焉。

又，〔吉里地闷岛〕地在连迦罗之东满山，茂林皆檀香，树无别种。商贩聚十二所，有尊长。田肥谷茂，朝热暮寒。商船染病，十死八九。盖其地多瘴气也。

谢清高《海录》曰：东洋诸岛，曾历其地者，曰哇大岛、哇希岛、匪支岛、唵呢岛、千尼岛、葛格是岛、那韦巴岛、亚哆歪岛。以上八岛，俱在东海，由地间正东行，约二月可到。每岛周围十馀里，各有土番数百。其地多豕，西洋船经此取铁钉四枚，即易豕一头，可三十斤。人性浑庞，地气炎热。土番不穿布帛，惟取鸟衣，或木皮围下体。能终日在水中。有娼妓，见海舶来，俱赤身落水。取大木一段，承其颌，浮游水面。海舶人招呼之至，听其调谑。与之铁钉二枚，则喜跃而去，不知其何所用也。有花旗番，寓居亚哆歪岛，采买货物。土产珍珠、海参、檀香、薯芋，无五谷、牛马鸡鸭。有果形似柚而小，熟时人取归，火煨而食之，味如馒头。不食盐。由此又东行二三月，海中有三山。西洋人呼其一为努玉，一为衫里，一为亚刺德反，并无居人，惟有鸟兽。闻过此以东，则南针不定，番舶亦不敢复往云。又曰，开于岛，在东北海，由哇夫岛北行，约三月可到。谢清高昔随西洋海舶至此，采买海虎、灰鼠、狐狸各皮，天气凝寒，雪花遍地。船初至海口，有冰块流出，大者寻丈，未敢遽进。鸣大炮，有土人摇小船来引，其船皆刳独木为之。舶中有通其语者，故得与交易。其人甚稀，而形似中国。食干鱼，每日见太阳在南方，高仅数丈，一二时即落。而未甚昏黑，惟戌亥二时始晦，馀时俱可见人。每月唯望前后数日，可见月光，星光则未见也。初到时，手足皆冻裂，而土人无恙。唯来往手中，皆执大木叶二，坐则以足踏之。知必有取也，亦效之，果愈不知为何木。土人极喜中国皮箱，见则以皮交易而去。偶上岸步行，入一土窟，土人外出，见藏皮箱十馀，开看皆装人头，怖而返。由此复北行，二十馀日，至一海港，复鸣炮，不见人来，遂不敢进。闻其北是为冰海云。其东洋诸国，清高所未至，故皆不录。

卷十八

◎东南洋诸岛形势下

琉球，一作流虬，古未通中国，随时有海船望见之。唐宋后渐通中土，明初入贡，太祖赐以闽人善操舟者三十六姓，修职贡甚谨。后为日本所灭，不通音问者数十年。已而王被执不屈，倭送还国。国在日本萨峒马岛之南，周环三十六岛，南北四百馀里，东西不足百里。旧分山南、山北、中山三国，后并入中山为一，故称中山王。王尚姓，自记载以来，一姓相传，无改步。国小而贫，属役日本。惟赖贡舟贩鬻，稍得馀资以自给。由福州五虎门放洋，用卯针四十馀更，至姑米山，其国大岛也，再东即至其国，收泊于那霸港。国分三路，曰首里，王居之；曰久米，曰那霸，用中国文字。入本朝更恭顺，修职贡，其官之最尊者，为金紫大夫，守土之官曰按司，一按司所辖约六七里。土饶瘠，产米绝少，以地瓜为食〈（即番薯）〉。非官与耆老不食米，无麻絮，以蕉为布，负戴者围下体，馀皆裸露。

◎附南洋各岛

《地理备考》曰：巴劳岛在南洋之北，加罗梨那岛之西。纬度自北六度五十三分起，至八度九分止；经度自东一百二十七度三十九分起，至一百三十三度四十分止。中有十八岛，人烟稠密，物产丰阜，人民良善，作事勤劳。岛之大者，曰渡卑都狎，曰哥罗，曰尼利斯黎都。

又曰：加罗梨那岛，在南洋之北，马黎亚纳岛之南。纬度自北六度起，至十二度止；经度自东一百三十三度起，至一百六十七度止。中有三十岛，地势错落，不相联络。人烟纷繁，树林稠密，地气温和，风雨不时。岛之大者，曰亚巴，曰我里，曰么结母，曰系利亚威内，曰五亚兰。

又曰：慕尔加拉威岛，在南洋之中，马黎亚纳岛之东南。纬度自北一度起，至十度止，经度自东一百六十八度起，至一百七十一度止。田土瘠薄，物产不阜。岛之大者，曰布路尼，曰刺达各，曰刺利客，曰斯加波路，曰京师米尔。

又曰：维的岛在南洋之中，慕尔加拉威岛之南，纬度自南十五度四十五分起，至十九度四十三分止；经度自东一百七十四度四十分起，至一百七十九度四十分止。长一千二百五十里，宽一千一百里。地势错落，不相联络。田土腴厚，物产丰饶。诸酋分辖，不相统属。岛之大者，曰维的黎勿，曰千打本，曰华兰黎勿，曰罗斯，曰当基。又曰：当加岛，又名亚米，在南洋之中，维的岛之东南。纬度自南十三度二十分起，至二十五度三十分止；经度自西一百七十三度十八分起，至一百七十八度三十八分止。中有一百五十岛，大者维三：曰尝加，曰瓦瓦阿，曰意五亚。田土肥饶，物产丰厚，地气酷热，海风清凉。人民壮健，作事勤劳，诸酋分辖，不相统属。

。

又曰：花和尔尼岛，在阿塞亚尼亚州之中。地势错落，不相联络。岛之大者，曰五瓦，曰好望岛，曰何尔尼。

又曰：么阿岛，在南洋之中。纬度自南五度三十分，经度自东一百五十二度十七分。中有七岛，诸酋分辖。岛之大者，曰波刺，曰阿牙刺瓦，曰茂拿，曰罗沙。

又曰：给尔焉的岛，在南洋之中，维的岛之南，纬度自南三十度三十六分，经度自东一百七十八度五十分。中有三岛，曰刺五耳，曰马告来，曰姑尔的斯。

又曰：古各岛，在南洋之中。纬度自南十八度四十五分起，至二十一度二十六分止；经度自西一百五十九度四十五分起，至一百六十二度十五分止。地气错落，不相联络。岛之大者，曰马拿牙，曰亚的五。

《地理备考》：都波哀岛，在南洋之中，纬度自南二十三度三十分，经度自西一百五十二度。地势错落，不相联络。岛之大者，曰都波哀，曰鲁都，曰黎马打刺，曰来瓦外，曰鲁都意。

又曰：达义的岛，在南洋之东。纬度自南十七度二十九分，经度自西一百五十一度。田土肥饶，谷果丰登。多上品树木，地气温和，岛屿不一，诸酋分辖。岛之大者，曰达义的，曰弟都罗亚，曰母勒亚，曰买弟亚，曰化衣尼，曰刺牙的亚，曰打下，曰波刺波刺，曰茂卑的，曰都拜。

《地理备考》：色么度岛，在南洋之东。纬度自南十四度起，至二十三度止；经度自西一百五十二度起，至一百四十度止。岛屿纷繁，地势低陷。岛之大者，曰刺沙勒，曰蝇岛，曰澳罗罇，曰巴黎射。

又曰：门达那岛，在南洋之东。纬度自南七度五十分起，至十度三分止，经度自西一百四十度起，至一百四十三度止。岛屿纷繁，分为两区。在南东者，曰马尔给沙。山势峻峭，峰峦参天。在西北者，曰窝神敦。地气高燥，层峦耸峙。其余各岛，曰达度意瓦，曰达卢亚大，曰瓦波亚，曰瓦卢加。

又曰：合威岛，其地在地在南洋之东北。纬度自南十九度起，至三十三度止；经度自西一百五十六度起，至一百六十四度止。田土肥饶，谷果丰登。地气温和，诸酋分辖，不相统属。中有十三岛，大者曰合歪，曰茂维，曰窝亚卢，曰亚堆。

又曰：斯波拉大岛，在南洋之南北，其南之大岛有六：曰本林，曰巴给斯，曰沙刺，曰阿賒亚即，曰亚尔都耳，曰圣自尔那都。其北之大岛有五：曰巴刺打，曰罗卑

斯，曰圣巴尔多罗么，曰圣巴多罗，曰罗也斯。各岛人民稀乏，物产不阜。

《外国史略》曰：东洋岛三种：一曰山地，山高自二百丈及一千丈，各有火，内产石蚝蚬等物，山脚草木茂盛。二曰珊瑚屿，乃沙地，有珊瑚磬，四围系珊瑚内之虫负土积累致成高石。三曰丘地，产物丰盛，出椰子、甘蔗、有饼树，其果如馒，味甘美，并各蕉大薯、番薯。兽只犬豕鼠，今则五畜资养焉。居民之状，与芜来由相似。众尚蛮，拜偶像。厚接外客，日捕鱼。其头目时时交战，远驶海隅，坐小船以攻大敌。恶僧弄权，甚至杀人祭鬼。衣甚少，仅以叶束腰而已。男女苟合。近日天主教于各岛开学馆，以教化之。

群屿太多，今述其最广者。无人屿，在日本东南，系荒岛，乃外国水手所开，人少物稀。惟捕鲸之船，随时到此，与居民往来，买蔬菜牲畜。北向一带岛屿，皆属日本。

侧屿在台湾东北，极出地自十二度及二十一度，偏东自一百四十四度，至一百四十八度。其南向之屿，有居民，归是班牙权辖。林甚密，牛羊豕满野。

加罗林群岛，北极出地自三度至十六度，偏东自百三十三度，至百七十三度。共四十六州，皆有居民。好航海，地惟有鼠，无他牲畜。居人以芋、番薯、鱼鳖为食。裸身，草舍，屡相争斗。所往之船，惟有海参、檀香等贸易。

此州之南，曰菲治群岛，居民墨面，性凶残。各酋互相交战，虏敌即吞食之。亦有时屠宰人，一日至二百馀。出檀香，商人之船，至今罕犯。东牙群岛最大者，周三十里，其地丰盛，居民稠密，互相交斗。

航海群岛，在菲治岛东北。其八岛最广者，周六十里，有火山，多火浆。地丰甚出树木，居民健身、高体、色白。

谷群岛，南极出地自十八度，至二十三度，偏东百五十七度及百六十度。系茅塞之地，居民多奉耶稣教。

会党险海群岛，南极出地自十四度至二十五度，偏西自一百二十四度及一百五十七度。其屿繁多，最大者曰他希地。出木甚美，居民昔时仇恨相杀，以血歃神像。今奉耶稣教，改过向化。

马其群岛，多沙而低，居民雕题甚丑，俱出海参、珍珠。土人寐水中，寻出之。外国水手，至此贸易，多为人所杀。

阿盛希等屿，共八所五州，北极出地自十九度及二十三度，偏西自百五十五度及百

六十度。居民十万八千三百九十三，但今人户日消减。地繁盛，中有佳果、蔬菜、檀香、甘蔗、绵花。有火山，恒出火浆。乾隆间，此屿尚荒无，居民以芋鱼为饭。后英国水师到此，导以风化。嘉庆二十三年，居民皆去塑像，而拜上帝。其都曰阿那罗路，居民六千，各国之船所集。

东洋之竟屿虽多，但徧小。居民罕少，除椰子等货，别无产物。◎附东南洋道路

《东西洋考》：南洋针路，自七州山、七州洋始〈（《琼州志》曰：在文昌东一百里，海中有山，连起七峰，内有泉，甘冽可食。舶过用牲粥祭海厉，不则为祟。舟过此极险，稍贪东，便是万里石塘，即琼州所谓万州东之石塘海也。舟犯石塘，希脱者。七州洋打水一百三十托，若往交趾东京，用单申针五更，取黎母山）〉。黎母山〈（在琼州定安县南四百里。《广东通志》曰：五指山，一名黎母，生黎峒，中五峰，如人指屹立。每辰已后，云雾收敛，则一峰耸翠插天。申酉间，复蔽不见。用庚卯针，十五更，取海宝山）〉，海宝山〈（用单亥针及干亥，由涂山海口，五更，取鸡唱门，即安南云屯海门也）〉，交趾东京〈（《一统志》曰：东至海，西至老挝，南至占城，北至思明府）〉，又从七州洋〈（用坤未针，三更，取铜鼓山）〉，铜鼓山〈（《广东通志》曰：在文昌东北铜鼓海，极深险，用坤未针，四更，取独珠山）〉，独珠山〈（山在万州东南海中。峰势高峻，周围五六十里。南国诸番修贡水道，视此为准，其洋为独珠洋。舶人云，有灵伯庙，往来祭献，打水六十五托，用坤未针，十更，取交趾洋）〉，交趾洋〈（打水七十托，用坤未针，取占笔罗山。是广东港口）〉，广南〈（汉为日南郡，隋唐为州，国朝为义安府）〉，又从交趾洋〈（用未申针，三更，取望瀛海口，入清华港）〉，清华港〈（汉为九真郡，隋唐为爱州，交趾为西京，国朝为清化府）〉。又从交趾洋，〈（取小长沙海口，入顺化港）〉，顺化港〈（国朝为顺化府）〉。又从交趾洋〈（用坤未针，十一更，取外罗山）〉，外罗山〈（远望城门，近看东高西低，北有椰子塘，西有古老石。船傍西行，打水四十五托，用丙午针，三更，取马陵桥，其内为提夷，是交趾属县）〉，提夷马陵桥〈（打水二十五托，内外俱可过船。南边有桥出水，用丙午针，四更，至交杯屿，即新州港口）〉，新州港〈（国朝为新安府）〉，新州交杯屿〈（两屿相对，故名。内打水十八托，用丙午针，三更，取羊屿）〉，羊屿〈（有小石塔，好抛锚，内打水八九托，外二十托，南有羊角礁，不可近。用丙午针，三更，取烟筒）〉，烟筒山〈（此交趾占城分界处也，用丙午针，三更，取灵山）〉，灵山〈（与占城山连接，峻岭而方，山顶一石块，似佛头，故名灵山。往来贩舶，于此樵汲，崇佛诵经祈禳开，打水六十托，用单午针，取伽南貌）〉，伽南貌山〈（港内有三屿，潮涨则不见山。远过打水十五托用坤未针，五更。由圭龙屿取罗湾头，即占城港口）〉，占城国〈（《一统志》曰：东距海，西抵云南，南接真腊，北连安东，南北至广东。舟行可半月程，至崖州，可十日程）〉，占城国罗湾头〈（打水五十托，用坤申针，五更取赤坎山）〉，赤坎山〈（宋时占城王常避交人，徙居兹山。近打水二十托，外十八托。用单申针，四更，取鹤顶山）〉，鹤顶山〈（打水二十五托，洋中国玳瑁洲宜防，若往柬埔寨由此分路，用单庚

针，四更，取柯任山）＞，柯任山＜（自赤坎沿山而行，因风应变，外任寻港。用庚申针开，有石烂礁在西南。若行船放落屿下，开头用单庚及庚申针，看风让高收毛蟹州）＞，毛蟹州＜（打水六七托，船头对洲收拾，有三托水。在浅内船，恐犯洲尾浅。要认毛蟹州，须见两边坤身头崎便是。大略晴明，潮水晓退。在外任开船，东风小午到浅，至午，进港为妙）＞，柬埔寨＜（即古真腊地也，又名占腊。将至港，俱是泥地，故名占腊泥国。人自呼甘孛智，后讹为甘破蔗。舶人又讹为柬埔寨）＞。

又从赤坎山＜（单未针，十五更，取昆仑山）＞，昆仑山＜（屹然海中，山高而方，基盘广远，俗云：上怕七州，下怕昆仑。针迷舵失，人船莫存。用单庚及庚酉针，三更，取小昆仑）＞，小昆仑＜（两边有礁出水，用庚酉及单酉针，八更，取真屿）＞，真屿＜（看成三山，内过打水十四托，泥地外过，打水十八托，沙地远过，只七八托便是假屿，水浅不可行，直从真屿东北边，出水礁，南边过船，用庚戌针，五更，取大横山）＞，大横山＜（到此是暹罗界，外过南边，打水二十五托，为正路，北边水浅，只五托水，船在南边，见小横山）＞，小横山＜（其山多树，打水十四托，用辛戌针，十更，单戌针，十更，干戌针，十更，取笔架山）＞，笔架山＜（远望形如笔架，故云。山下打水十四托，开打水二十托，壬亥针，五更，取陈公屿，及黎头山）＞，黎头山＜（西边高大，东南稍低，其内有屿，西北一派是石排山。用壬子针，五更，取圭头浅）＞，圭头浅＜（打水四十托，单用干针，二更，取竹屿）＞，竹屿＜（浅口打水四五托，用壬子针，及干亥，没山坤申尾即暹罗）＞，暹罗＜（乃古赤土及婆罗刹地，至本朝合暹与罗斛二国，名暹罗。《一统志》曰：在占城极南）＞。又从昆仑山＜（用坤申及庚酉针，三十更，取吉兰丹）＞，吉兰丹＜（即大屿港口，用坤申针，七更，入港是大泥国）＞，大泥国＜（贡道由福建入）＞，又从昆仑山＜（取真屿，用辛酉针，二十八更。取六坤）＞，六坤＜（暹罗属国也，其地与大泥相连）＞，又从昆仑山＜（用坤未针，三十更，取斗屿）＞，斗屿＜（用丁午针，五更，取彭亨国）＞，彭亨国＜（一名彭坑，单午针，五更，取地盘山）＞，地盘山＜（在彭亨港，外打水二十八托，内四十四托，三更，至东西竺）＞，东西竺＜（此柔佛地界也，用丁未针，十更，取罗汉屿即柔佛港口）＞，柔佛国＜（一名乌丁樵林）＞，罗汉屿＜（水浅宜防，往来寻白礁为准，往满刺加从北边过船，用庚酉针，五更，入龙牙门）＞，龙牙门＜（山门相对，如龙牙状，中通船，田瘠谷薄，据掠为豪。番舶于此防之，夜不敢行，以其多盗。且南有凉伞礁也。中打水三十托，北二十托，南八九托。又过淡马锡门，用庚酉及辛戌针，三更，取吉里问山）＞，吉里问山＜（打水二十七托，两边有浅，用干亥针，三更，取昆宋屿）＞，昆宋屿＜（打水二十五托，用单亥针，五更，取箭屿）＞，箭屿＜（打水三十四托，用干亥针，五更，取五屿）＞，五屿＜（先时酋门镇于此，此中有真五屿、假五屿，沿山而入，为麻六甲）＞，麻六甲＜（即满刺加国也。船人音讹耳，在古为歌罗富沙地）＞，又从东西竺＜（用丙午针，十更，取长腰屿）＞，长腰屿＜（北边正路打水二十六托，若往丁机宜，用坤申针，四更，取独石门）＞，独石门＜（出门用单酉针，过铁钉屿）＞，铁钉屿＜（其外水流

急甚，用单庚及庚申针，四更，至鳄鱼屿）》，鳄鱼屿〈（西是坤身，昼南流而夜北流，再进由第二港入，是丁机宜国）》，丁机宜〈（爪哇属国）》，又从长腰屿〈（用丁午针，十更，取龙雅大山）》，龙雅山〈（在马户边过，用单午针，三更，取馒头屿）》，馒头屿〈（收入即是詹卑，七更可到）》，詹卑〈（三佛齐人称其国王为詹卑，其国既为爪哇所破，故王徙居于此，因以名地）》，七屿〈（从馒头屿驾开，用丁午针，三更，到此又用丁未针，七更，取彭家山）》，鼓家山〈（用坤申针，五更，取西南第二山，有沉礁用坤申针，收旧港）》，旧港〈（即三佛齐故都也，其先为干陟利，国初时为爪哇所并，改名旧港，以别于彼之新村）》，又从彭家山〈（用辰巽针，十更，取进峡门）》，进峡门〈（用丙巳针，巡坤身，七更，见三麦屿）》，三麦屿〈（过屿用单丁及丁午针，五更；单未针，五更，取都麻横港下）》，都麻横港口〈（中望一山，名真不真，假不假。正路打水十七托，用单午针，十更。取览邦港口）》，览邦港口〈（览邦夷人，好食人，故舶无维缆者。外有小屿，名奴沙呀，近屿打水八九托，用丁午针，三更，取奴沙刺。打水十四托，又用丁午针，三更，远望锡兰山）》，锡兰山港口〈（即梁时所谓狼牙修也。今讹为石旦，夷言高山为锡兰，因名。此瓜哇地，而称锡兰港口者，亦就望见言之，其实去彼尚远。地广人稠，亚于爪哇。海边有一盘石，上印足迹，长三尺许，常有水不干。称先世释迦从翠蓝屿来登此，足蹶迹至今尚存。）

永乐间其王来贡，旋复负固不恭，郑中贵和虏其王归，上命释之。洋中凡五屿，正门打水四五托，用丙巳针，六更，至下港）》，下港〈（即古阁婆，在南海中者也，亦名社婆，至元始称爪哇。今下港，正彼国一巨镇耳。舶入亦名顺塔，再进入为咖留吧）》，又从满刺加国五屿〈（分路入苏门答刺，用单干针，五更，取绵花屿）》，绵花屿〈（第三湾正好过船，打水七八托，外二十托，用单戌针，过浅。辛戌针，四更。取鸡骨屿）》，鸡骨屿〈（对开打水六十六托，有浅，船宜远过，用干戌针，十更，取双屿）》，双屿〈（对开打水三十五托，门中十托，即正路所经也。用干戌针，并辛戌，四更，取单屿）》，单屿〈（内打水十六托，外四十托，用辛戌针，十更，认亚路）》，亚路〈（坤身打水三托，洋中二十托，用壬亥及干亥针。若杂山用干戌针，十五更。取巴禄头）》，巴禄头〈（其旁为九州，山林木丛生。永乐间，郑和遣人入山采香，有长六七丈者数株，香味清远，黑花细纹。山人张目吐舌，言天朝威力若神。用单亥及干戌针，五更。取急水湾）》，急水湾〈（西边有湾，沉礁打浪，对开水二十五托，用辛酉针，五更，取亚齐）》，哑齐国〈（即苏文答刺国也，一名苏文达那。《广东通志》曰：自满刺加九昼夜可至）》，又从玳瑁洲〈（用丁未针，三更，取东西董）》，东西董〈（从西董过船，远似石礁状，用单丁针，五更。丁未，三十更。取失力大山）》，失力大山〈（近山用坤未针，五更，取马鞍屿）》，马鞍屿〈（用巽巳，五更，取塔林屿）》，塔林屿〈（山尖有老古石，正路在西，用辰巽针，三十更。取吉宁马哪）》，吉宁马哪山〈（山上有池，池土石壁有古篆，用单巳针，七更。单丙针，六更。取勿里洞山）》，勿里洞山〈（丙午，十五更。取吉里问大山）》，吉里问大山〈（西面坤身，拖尾甚长有老古浅离山宜防，用辰巽针，四更。取保老岸山）》，保老岸山〈（山

与吉里问相对，俗讹呼巴哪大山。番舶未到，先见此山。顶耸五峰，云覆其上。用巽巳针，四更。取椒山）>，椒山<（即猪蛮地，沿山取磨屿，七更，收入饶洞）>，思吉港饶洞<（即苏吉丹国，与爪哇国相近，而吉力石为之主）>。

又从保老山<（用乙辰针，五更。取吉力石港）>，吉力石港<（即爪哇之柱板村，史所谓通蒲，奔大海者也。打水八九托，用乙辰针，一更。取双银塔）>，双银塔<（用丁未针，五更。取磨里山）>，磨里山<（即《星槎胜览》所谓彭里者也，俗尚寇掠。用单乙针，三更。取郎木山）>，郎木山<（山下有三吧哇屿，屿前有老古浅。用单卯针，五更。取重迦罗）>，重迦罗<（舶人讹呼高罗，地与爪哇界相接，高山奇秀，内一石洞，前后三门，可容万人。用单卯针，五更。取火山）>，火山<（内是里马山，有真里马、假里马。过火山门，用辰巽针，二更。取大急水）>，大急水<（一名双牌，水深流急。出门用乙辰针，三更。至髻屿）>，髻屿<（用乙卯针，十更。取大云螺、小云螺）>，大小云螺<（用乙卯针，六更。单卯针，七更。取苏律山）>，苏律山<（有红毛番居此，不宜进舶。用乙辰针，三更。收山取印屿）>，印屿<（用单卯针，二更。至美罗港，即是池闷）>，池闷<（即吉里地问，是诸国最远处也）>。

又从吉宁马礁<（往文郎马郎分路，用丙巳及巽巳针，五更。取吧哩马阁）>，吧哩马阁<（即白水，打水八托，是正路。近屿有浅，可防。用乙卯针，五更。甲卯针，五更。单卯针，五更。即取三密港）>，三密港<（用乙卯针，二更。取龟屿打水六托，是正路）>，龟屿<（稍开有石六七块，名猫著万里浅。用单巳针，三更。取单戎世力山）>，单戎世力山<（有浅宜防，打水五托，是正路。用单巳针及巽巳，四更。又辰巽针，收美哑柔）>，美哑柔港口<（是处多盗，好夜杀人。前有大山，是马神国）>，文郎马神国<（古称文狼）>。

◎东洋针路

太武山<（用辰巽针，七更。取澎湖屿）>，澎湖屿<（是漳泉间一要害地也，多置游兵防倭于此。用丙巳针，五更取虎头山）>，虎头山（用丙巳针，七更取沙马头湾，沙马头湾<（用辰巽针，十五更。取笔架山）>，笔架山<（远望红豆屿并浮甲山，进入为大港）>，大港<（用辛酉针，三更。取哪哦山）>，哪哦山<（再过为白土山，用辛酉针，十更。取密雁）>，密雁港<（南是淡水港，水下一湾，有小港，是米吕萼。下一老古湾，是磨力目，再过山头，为岸塘）>。

又从密雁港<（幞头门用丙午单午针，十更。取六藐山）>，六藐山<（下有四屿，用单巳针，五更。取郎梅屿）>，郎梅屿<（单午针，四更。取麻里荖屿）>，麻里荖屿<（用丁午针，五更。取苏安山，及玳瑁）>，玳瑁屿<（东是傍柱旋栏，用壬子针，四更。及癸丑针，五更。取表山）>，表山<（山甚高，为涛门之望，故名。用丙午针，及单午针，五更。取里银中邦）>，里银中邦<（用丙巳针，

五更。取头巾礁）＞，头巾礁＜（用单午针，五更。收吕宋国）＞，吕宋国＜（国初贡路，由福建入，用丙巳针，及乙辰针，十更。取沙塘，浅开是猫里务）＞，猫里务国＜（即今猫里国也。永乐时，与吕宋贡使偕来）＞。

又从吕宋＜（取猪末山，入磨荖央港）＞。

又从吕宋＜（过文武楼，沿山至龙隐大山，为以甯港）＞，以甯港＜（山尾十更，西边取里摆翰，至高药港）＞。

又从以甯港＜（用丙巳针，取汉泽山，即屋党港口）＞，汉泽山＜（用单巽针，取海山）＞，海山＜（用单巳针，五更。取呐啖，其内为沙瑶）＞。

又从汉泽山＜（用丙午针，二十更。取交隘，一名班溢）＞交溢＜（稍下为逐奇马山，用乙辰针，七更。取魍根礁老港）＞，魍根礁老港＜（用乙辰针，七更。见绍山）＞，绍山＜（又用乙辰针，十更。入千子智港，是米洛居地，今佛郎机驻此）＞，千子智港＜（对面是直罗里，稍上是绍武淡水港，红毛夷驻此）＞，绍武淡水港＜（此处大山，凡四进，入即美洛居。舶人称米六合）＞。

又从交溢＜（对西开船，取犀角屿）＞犀角屿＜（外有三四白礁，南势开船，用单申针，入苏禄国）＞，苏禄国＜（国初朝贡，有东王、西王、峒王。其后惟东王来贡不绝，疑是为东王所并矣。商舶所至，则峒王地）＞，又从吕蓬＜（用坤未针，五更。取芒烟山）＞，芒烟山＜（用丁亥针，十更。取磨叶洋）＞，磨叶洋＜（用单未针，并丁未，取小烟山）＞，小烟山＜（其上有仙人掌。用丁未针，五更。取七峰山）＞七峰山＜（用单丁针，五更。取巴荖圆，巴荖圆＜（用丁未针，五更。取罗卜山）＞，罗卜山，＜（用丁未针，三更。取圣山）＞，圣山＜（自圣山东去，突山二大尖，两傍皆老古石，中只一沟，舟行甚险。用单未及坤未针，五更。取昆仑山）＞，昆仑山＜（此又别一昆仑，是舶人强名之耳。用坤未针，取长腰屿）＞，长腰屿＜（舶过屿门，用单午针，五更。取鲤鱼塘）＞，鲤鱼塘＜（取毛花蜡，即文莱港口）＞，文莱国＜（即婆罗国，此东洋最尽头，西洋所自起处也。故以婆罗终焉）＞。

◎西南洋五印度国志

叙曰，西南洋为印度海，惟西北二印度，尚各自为国。其中南东三印度，并据于西洋。东印度为英夷驻防重镇，凡用兵各国，皆调诸孟加腊，每卒月饷银约二十员。又与我属国缅甸、廓尔喀、邻近世仇，故英夷之逼中国，与中国之筹制英夷，其枢纽皆在东印度。南印度斗出南海，有佛兰西、弥利坚、葡萄牙、荷兰、吕宋各国市埠环列，而英夷之市埠，曰曼达萨喇，曰孟迈，皆产鸦片烟，与孟加腊埒，各国不得分其利。恒外睦内猜，故我之联络佛兰西、弥利坚及购买船炮，其枢纽皆在澳门

与南印度。中印度为英夷与俄罗斯相拒之所，中惟隔一兴都哥士大山，俄罗斯逾山则可攻取温都斯坦。英夷设重兵扼守之，故我之联络俄罗斯，其枢纽在中印度。不悉东印度之形势，则不知用廓夷，虽有犄角捣批之策，而不敢信也。不知南印度之形势，则不知用佛兰西、弥利坚，欲行购造兵船之策，而未由决也。不知中印度、北印度之情形，则不知联俄罗斯。方询俄罗斯国都与英夷国都远近，不知其相近者，在印度边境，而不在国都也。昔唐太宗贞观中，王元策用吐蕃之兵，以捣印度，即廓尔喀攻孟加腊之路。元太祖兵至北中二印度而返，及宪宗命诸王旭烈先攻取西印度，而后回取五印度，即今俄罗斯侵逼温都斯坦之路。明三宝太监郑和以舟师破锡兰山，俘其国王归献诸朝，即今粤夷兵船赴南印度之路。具载往牒，近征商舶，事异凿空，形同肘腋，指示发踪，谁端衔策。志西南洋实所以志西洋也，故以东南中三印度冠其前，而以西印度之天方教、天主教，附其后。五印度沿革，又附其后。

。

卷十九

◎西南洋

○五印度国〈（东南中三印度，今皆属英吉利。惟西北二印度，各自为国）〉

印度国即兴都斯顿也〈（一作痕都斯坦，一作温都，亦有作轩都斯丹者）〉，地隶阿细亚洲。西南地广，壤沃产丰，甲于诸国。其国如何创治，诸记未详查。探《险宝记》仅云为数小国，而《西流古土记》又云大国，以巴利摩刺腊为国都，仍未载及主国者为谁〈（竟不知印度为古佛国，盖由西洋人奉天主教，不览佛书，而近日印度，又为回教久据，力泯佛教踪迹也。然志中东南中三印度诸部落，尚奉佛教，又似未尽改回教者，未详其故）〉。大西洋有公记始云，壮麻墨合印度可腊山达达里共为一国，后被俄利所灭。俄利传至巴旦王，耶苏纪岁千三百九十八年〈（明建文二年）〉，又为底摩阿所灭。底摩阿传百余年，后悉归蒙古〈（此蒙古谓赛马尔罕之王）〉。嗣各部落隔大山之险，不服蒙古统辖，各自立主。各部中，又以马拉他为最强〈（此南印度主国，非东印度之孟加腊也）〉。至西北温大压、山麻腊、耦特尔、希阿俄腊等部，均归马拉他所辖。南隅麻疏一部，为哈达阿里所据，加补尔部，为阿密沙所据。阿密沙与马拉他交战时，各部互相攻击。英吉利乘隙征服东隅，遣贺威廉驻防孟阿腊，遣贺族乞驻防。遂于曼达拉萨、孟买两处，开埠贸易，货物充刃，各国商舟云集。是时惟哈达阿里尚强，不服英吉利，于是印度之苏拉札道腊统兵与英人争斗，收贺威廉部众，置之黑狱。英吉利遂遣律记利付夺复其地，别置头目。后至千七百六十五年〈（乾隆三十年）〉，复又背叛，全灭英吉利之人。英吉利王复遣萨依姑底夺复疆域。自此印度地属于英国者，十三部：曰孟阿腊，曰曼达腊萨，曰孟买，曰弥那，曰欧尼，曰沥部，曰麻疏，曰萨达腊，曰稔哇，曰特那弯戈，曰果真，曰那治勃，曰西伦岛。其各自为主者，曰新低，曰阿鲁斯，曰尼保尔，曰新尼，曰即茅尔旦，数部而已〈（此数部乃中印度、南印度之边境，未尽属英吉利者。若西北二印度，又不在此数部之内。观英夷所绘印度图，印度河东岸，尚系青色，不尽在所保黄色各国之内，可证即此数部也）〉。孟阿腊以加尔格达为首部，计幅员二十二万零三百二十万方里，户口六千九百七十一万名，外有八万五千七百方里，未计户口。英吉利派加稔那一人〈（加稔那，官名也）〉，驻扎孟阿腊，理粮饷、盐法、贸易、鸦片、兵丁、医馆等事，随员四人，分理各事。曼达那萨幅员十四万一千九百二十三方里，户口千三百五十万八千五百三十五名。英吉利派加稔那一人，驻扎曼达那萨，理粮饷、盐法、贸易、鸦片、兵丁、医馆等事。孟买幅员五万九千四百三十八方里，户口六百二十五万一千五百四十六名，外有五千五百五十方里，未计户口。英吉利派加稔那一人，驻扎孟买，理粮饷、盐法、贸易、鸦片、兵丁、医馆等事。定例曼达那萨、孟买两处加温那，仍归孟阿腊统辖。此外，别设靡宿各一人，执连共七十六人，统设叙跛兵十八万一千五百一十七名，英吉利兵八百名，兰顿王家兵二万名，曰王家兵者，双分口粮也。弥那，幅员九万六千方里，户口一千万名。欧尼，幅员二万方里，户口三百万名。萨达腊，幅员

一万四千方里，户口百五十名。特腊弯戈果真，幅员八千方里，户口一百万名。那治勃，幅员二十八万三千方里，户口千六百五十万名。西伦岛，幅员二万四千六百六十方里，户口百万名，俱英吉利统辖，而各部头目，则由部民公举。尚有新低阿，幅员四万方里，户口四百万名。鲁斯，幅员五万方里，户口三百万名。所属加斯弥野，幅员一万方里，户口百万名。尼保尔，幅员五万三千方里，户口二百万名。新尼即茅尔旦，幅员二万二千方里，户口百万名，此皆自主之部落，不属英国所辖。河道三，安治士河〈（即恒河）〉，发源谦麻那压山；希腊特河，发源阿山，俱至孟阿腊出海；新地河，又名兴都士河，发源西藏，经历数千里，至达岱入海。产棉花、胡椒、槟榔、檀香、苏木、糖、洋靛、牙硝、绢纱、羊毛、钻石、金沙、猫儿眼石、碧玉、水晶宝石、银铁、硫黄、砒霜、洋参、铅、椰子、象、虎、地毯、袜、缎布、姜、黄豆蔻、肉桂、鸦片。鸦片为最巨之贸易，英吉利独擅其利。初时尚稀，近则遍地皆种。以麻尼哇所产为最，每年出港共六千五百满〈（六百斤为一满）〉，每满价约百二十五员〈（以上原本。案：此所述鸦片，专指麻尼哇一处，非全数。麻尼哇，一作麻尔洼，乃自主部落，非英夷所辖）〉。

○重辑〈（原无今补）〉

《贸易通志》曰：印度之地，距大西洋数万里。自古不相通，其通商自荷兰始。万历二十二年，荷兰商船驶至南海，五印度布胡椒，返棹大获利，于是设公班衙，仅洋银三万圆，积久增至三百万员。主其事者六十五商，及明泰昌间，仅二十年，公班衙所赢银已千有四百万员。每岁大舶四十旋，据南海葛留巴洲建总埠。顺治四年，遂与佛兰西国分擅其利，于是荷兰公班衙大兴。东通暹罗、日本，又据台湾，雄长南洋诸岛间。每年文武使费银百五十万员，其后虽失台湾，仍踞暹罗东南方地，与各国互市。康熙三十八年，再稟求其国王，赐敕书定岁贡额银九十万员，每岁别献贡贖仪银十五万员。公班衙即公司之异名也，方荷兰之立公班衙于南洋，英吉利商慕之，于万历二十七年，纠国人，合赀本，且稟求国王设立公司，严禁本国散商之赴南洋者。其始国人尚惮险远，仅合赀十五万员，次年增至二十六万员，获利皆三倍，且途劫荷兰国、葡萄牙国之商舶以归。于是英吉利公司渐兴，与荷兰公班衙据地争权。英吉利乘机于印度海滨，开新地，立商埠，其印度国民尚外视而轻忽之。时商船仅三十五只，资本仅三十五万员，国人屡稟求散公司之局，于是国王令他商于印度西方孟买屿立新公司，两公司相倾轧。康熙四十年，始合两公司为一，并借国王公帑银一千万员，岁息八十万员，其后复贷五百万员，免其利息，于是英吉利南洋公司大盛。乾隆四年，东印度兵为北印度侵逼，且臣下自相割据，结荷兰、佛兰西公班衙之兵为助。于是，英吉利公司兵船乘机取印度海南地。印度国王求援于荷兰、佛兰西，并力拒败英吉利之兵。乾隆二十四年后，英吉利复兴兵与战，荷兰及佛兰西连年军旅，供亿浩繁，虽岁税四百余万，入不赡出，非惟尽逋本国之贡献，反借其国帑数百万，生计日耗。至乾隆五十年，遂败于英吉利。嘉庆十六年，英吉利遂据公班衙之地。佛兰西公班衙散局，惟与各国分市南印度。其东中两印度，大半归英吉利。道光十三年，国中会计公司贸易无利，且亏空公项以巨万计，始

散公司局，听散商自运，人人皆悦。

《每月统纪传》曰：明宏治年间，葡萄牙人精神涌发，营大图艰，始寻水路到五印度国。欧罗巴沿海各邦闻知之，皆乘船踵至其地。葡萄牙官禁之，令师舰纵横洋面，截劫商船。各国商船，不敢孤行。故各人出钱，或千员，或万员，或三万员，积藏公帑，备船炮，募弁兵，遇葡舰海贼，则决战保货。返国则以所载之货，发卖各捐户，公分其利。由此立商会，曰公班衙。公班衙者，为群商捐措资本钱，其作贸易也。荷兰公班衙为首，始出公银二百五十万员，赴牙瓦洲摩鹿群岛，买丁香、胡椒等货归国，获益一倍。年年续驶南海，利路大开。始则向土酋买地，开新埠，后则开衅战斗，而夺其旁地。兵盛势强，两攻澳门，败退。因据台湾之港口，与福建沿海居民贸易，开垦愈广，钱货益增，船舶满海，筑城建邑，商变为君。后有为福建郑成功所攻，时荷兰公班衙通事何斌，知港路深浅，说成功联檣并进。荷兰严守安平大港，成功从鹿耳门进，水涨三丈馀，入据台湾，与荷兰相持甚久，围其堡台，鏖战不息。镇守官乞盟，返棹回国。康熙二年，公班衙虽失此地，别夺他岛，建城立埠，复兴贸易自东、自西、自南、自北，每年奉本国王银十五万员，别纳一百万员，以答国恩。嘉庆年间，与英吉利国构兵攻伐。忽然公班衙不幸，其船或沉沦，或被夺，英总兵乘机取其新地。荷兰公司散局，将所据之地奉归本国。英吉利公班衙始与荷兰相合，但每开衅隙，屡次交锋。于是公班衙密合防御，共本钱八百万员，争斗良久。后再立公班衙于五印度国，建两城，东边曰马大刺，西边曰梦买。其时彼国土官贪贿慕势，私取陋规，其土君复侧目公司之利，誓逐英军，而夺其业。乾隆十七年，奋力攻战，交锋未及十馀合，土若皆败散。自后英吉利特命总理官，兼摄五印度国大半之权。佛兰西人恨之，费力费帑，图胜英军，英兵冒火突锋鏖战，佛兰西兵终败。于是土君割地求和，不敢强逼。自三印度国属英公班衙之后，所据地广，不尽贸易，惟务治国而已。向来所赴广东商船致载茶叶，自道光十四年不利于市，公司虽散，掌握尚存，每年所收国帑之银，共计一千五百万员。但使费亦繁，所馀者无几（以上原本无，皆今补）。

《海岛逸志》曰：明绞劳（即孟加腊译音之殊），在葛留巴之西，土地亦甚宽大，和兰色仔年红毛杂处其地。四夷云集，交商之所，百物俱备，货贿流通。土产大呢、羽缎、哔支。

案：道光二十二年四月，靖逆将军奕山，奏：风闻 英逆所属之孟阿刺地友，向有英夷兵目，带领黑白夷兵各数百名驻守。因黑夷出兵在外，多有伤亡，仅剩白夷兵不敷驻守。该逆兵目于去冬勒派土夷、商民充当兵役，因而构怨，群起刺杀夷目，并将白夷兵数百名焚毙殆尽。嗣又据香港探报，英逆前估孟阿喇埠头藉产鸦片厚利，得充兵饷，因被孟阿喇么佬鬼了，将八颠之弟杀死，夺回鸦片埠，以至兵饷不继等语。又访闻得英国之东，另有思田国，相距约三月水程，英夷欲夺其地，被思田国设计诱骗，于本年正月内杀毙英兵万余名，现在干戈仍未止息，等语。又传闻逆夷先与喀布尔打仗，现在又与治拉拉拔打仗，有地名古斯尼，仍被治拉拉拔夺回。

该逆夷深恐喀布尔与治拉拉拔和好。又访闻喀布尔与孟阿喇各处总名印度等语。案：喀布尔，即加布尔，乃阿付颜尼国之部落，在中印度西境。详见于下。

《每月统纪传》曰：孟买部，在痕都斯坦西南方，其酋部城建于屿，其屿初为葡萄牙亚所属地，后让与英国。至顺治二年间，英国王以此屿赐公班衙治理，当时屿甚荒杳，潮涨水溢，巨浸地也。英人驻三年，水土不服，染病多死。英人勉筑堤防，火烈山泽，建砖屋，开衢同，招徕流寓，户口繁滋，其屿虽饶瘦，终年之产，不足一月之用，却烟户十六万馀，皆恃贸易为业。洋艘七百馀只，皆往印度西北，及法耳西，阿拉比，及中国各处。所载出药材、棉花、玛瑙石等货。除英国商贾外，有白头回及法耳西商贾。白头人本法耳西国之土民，当回教始兴，尽力征服四方。不顺奉者，必遭刑戮，致令多人往印度避害。其人皆俭约勤作，善贸易，惟崇拜阴阳，每当日出日入之际，叩首敬奉。然其俗好善施济，扶困持危，惜无人告以福音之真道也。英国在孟买建造战船，其匠皆白头人，手艺甚巧。

塔喇瓦府，每年纳饷七十万员。昔属玛哈喇塔国，其国本有大权势，因与回回战斗不息，而后衰败。民遂任意作乱，诸侯操权，战斗为务。自王达于庶民，俱劫夺为业。婆罗门僧，狡狴巧捷，煽惑民人，恐吓取财。既贮藏银，王即革顶，夺其不义之利。嘉庆二十年间，玛哈喇塔王攻孟买，肆焚掠，与英军交锋。玛哈喇塔兵败走，诸侯皆服，百姓甘顺。自从英人操权，匪徒安分，其王除位而安享空禄。

干底土府，属省治不久，其郡系盗藪。农废田荒，独守堡台。土人只捕野兽，故甚猛烈，捐躯而战。风俗甚蛮，且不守婆罗门教，乃供奉污鬼塑偶，近于禽兽。

君干分作南北两府，皆丰腴地，出米糖等货。亚美塔拔府，先为回回之国，征敛腴削，百姓尽穷，后已复兴。惟嘉庆二十四年，遭地震败废。该喇府之土人，崇婆罗门邪教，常杀怨敌以献神赎罪。英国律例严禁，然作乱不已，当用军防范。

苏喇府，在大南洋北方，昔海贼之藪。故公班衙立一帮师船，巡海剿贼，今始安静。地产棉花，织布精工，府城即印度国。当回教兴旺时，户口有八十万人，现在减少十五万口。建放生院，养各禽兽，不论犬马鸟虫诸类，皆养之不杀。布罗者府，陆海地方，久归英国掌管。

北方各府，其名吉斯喇地方，居民皆印度国之土人。俗尚火葬，妇与夫尸同烧，嬖妾争先蹈焰。贵家恐养女辱门，辄杀之，无恻隐之心。而婆罗门僧亦无警醒之言，反砺磨愚民，行溺女之罪。近日英国严禁此弊〈（以上原本无，皆今补）〉。五印度，东界西藏、缅甸，西南界海，北界鞑鞑里。近日东南中三印度，皆属英吉利。其自主之国，惟西北二印度耳。孟阿腊、孟买、曼达那萨，均滨海大市埠〈（以下又原本）〉。

孟阿腊，东印度部落。东界缅甸，西界麻哈，南界海，北界西藏、廓尔喀。领小部落二十一，俗奉墨那敏教，即古时佛教也。首部落曰噶里噶达，重兵驻防，商民环处，楼阁园亭，街衢廛市，盛甲南海。设有鸦片公司，凡巴达那默那出产鸦片，均归入公司，由公司发售，出口。

麻哈，东印度部落。东界孟阿腊，西界阿腊哈墨，北界尼保尔，南界尼路阿那，领小部落十，俗奉墨那敏佛教。而尼达那出产鸦片，曰黑土，又曰公班。

尼路阿那，东印度部落，东界麻哈、孟阿腊，西界弥里阿，南界那特兰，北界阿腊哈墨，领小部落三十，俗奉墨那敏佛教。

阿兰牙墨，南印度部落。东界弥那，南界靡渣布，西界海，北界堪力市，领小部落九，俗奉墨那敏佛教。《海录》谓居斯土者，为巴史种类，颜色稍皙。即今来粤贸易之白头夷也，家居温厚，人习商贾。所属孟买，为麻尔洼鸦片出口之埠头。

厘加那特，南印度部落。东南俱界海，北界麻腊耦，西界特腊弯戈，在孟阿腊西少南，陆行二十馀日，水路顺风五六日，领小部落二十有一，俗奉墨那敏佛教。《海录》谓之曼达喇萨居斯上者，为雪那里种类，出产鸦片，一曰金花红，一曰油红，以金花红为最。

阿那哈默，南印度部落。东界麻哈，西界麻尔洼，南界尼路阿那，北界欧尼，领小部落十有二。俗奉墨那敏佛教，产鸦片，曰黑土，逊于巴达那。

麻尔洼，南印度部落。东界阿腊哈墨，西界吾治沥，南界堪力市，北界腊赤布达那，领小部落十有二，俗奉墨那敏佛教，产鸦片，中国谓之白皮。

吾治沥，南印度部落。东界麻尔洼，西界刮治，南界海，北界腊赤布达那，领小部落十有六。俗奉墨那敏佛教。

特那弯戈，南印度部落。东界厘加那特，西界海，南界海，北界果真，领小部落二。俗奉墨那敏佛教。

果真，南印度部落，《海录》作固真。东界戈弯都，西界海，南界特那弯戈，北界马那麻。领小部落二，俗奉墨那敏佛教。

弥那，南印度部落。东界尼路阿那，西界阿兰牙墨，南界海里那墨，北界摩那，领小部落六。俗奉墨那敏佛教。

欧尼，南印度部落。东界麻哈，西界阿尼那，南界阿那哈默，北界尼保尔。领小部

落六，俗奉墨那敏佛教。西伦岛，在黎加那特之东南，领小部落九，俗奉墨那敏佛教。

靡渣部，南印度部落。东界海里那墨，南界麻疏，西界海，北界阿兰牙墨。领小部落十有五，俗奉墨那敏佛教。

麻疏，南印度部落。东界麻那耦，南界歌王麻都，西界加那腊，北界麻腊耦。领小部落十，俗奉墨那敏佛教。

马拉他，南印度部落。东界歌王麻都，西界海，南界果真，北界加那腊。领小部落四，俗奉墨那敏佛教，产鸦片。

加士敏耶，中印度部落。东北俱界西藏，西南俱界腊和尔。领小部落一，俗奉墨那敏佛教。

腊和尔，中印度部落。东北俱界西藏，南界特尔希，西界牙尔士丹。领小部落十有五，俗奉墨那敏佛教。

俄尔洼，中印度部落。东界西藏，西界特尔希，南界尼保尔，北界西藏。领小部落二，俗奉墨那敏佛教。

特尔希，中印度部落。东界俄尔洼，西界腊赤布达那，南界阿厄腊，北界腊和尔，领小部落十，俗奉墨那敏佛教。

腊赤布达那，南印度部落。东界阿厄腊，西界茅尔旦，南界麻尔洼，北界腊和尔。领小部落十有八，俗奉墨那敏佛教。

茅尔旦即新地，南印度部落。东界腊赤布达那，西界麻凝士丹，北界腊和尔。领小部落七，俗奉墨那敏佛教。

刮治，南印度部落。东界吾治沥，西界海，南界海，北界茅尔旦。领小部落四，俗奉墨那敏佛教。

阿厄腊，南印度部落。东界欧尼，南界阿腊哈墨，西界腊赤布达那，北界特尔希。领小部落五，俗奉墨那敏佛教。

尼保尔，中印度部落。东界西藏，西界俄尔洼，南界孟阿腊，北界西藏。领小部落四，俗奉墨那敏佛教。

阿里沙，东印度部落。东界孟阿腊，南界海，西界特兰沙加尔司，北界尼路阿那。领小部落五，俗奉墨那敏佛教。

特兰沙加尔司，东印度部落。东界阿里沙，西界麻那耦，南界海，北界尼路阿那。领小部落十有二，俗奉墨那敏佛教。

海里腊墨，东印度部落。东界尼路阿那，西界靡札布，南界麻那耦，北界弥那。领小部落六，俗奉墨那敏佛教。

靡腊，东印度部落。东界尼路阿那，南界弥那，西北界堪力市。领小部落三，俗奉墨那敏佛教。

堪力市，东印度部落。东界尼路阿那，南界摩腊，西界吾治沥，北界麻尔洼。领小部落三，俗奉墨那敏佛教。

麻那耦，南印度部落。东界特兰沙加尔司，西界麻疏，南界里加那特，北界海里那墨。领小部落五，俗奉墨那敏佛教。

加那腊，南印度部落。东界麻疏，南界马拉他，西界海，北界靡查布。领小部落五，俗奉墨那敏佛教。

歌壬麻都，南印度部落。东界西林，西界马拉他，南界里加那特，北界麻疏。领小部落一，俗奉墨那敏佛教。

西林，南印度部落。东界里加那特，西界歌王麻都，南界里加那特，北界麻那耦。领小部落一，俗奉墨那敏佛教〈（原本止此）〉。

五印度补辑〈（原无今补。此专取本朝近日情形，其历代沿革，别见后卷，不入此内）〉

高宗御制文集《五天竺说》曰：昆仑居大地之中，天下万国环之。昆仑以东，我大清国最大。昆仑以西南，五天竺国最大。昆仑以西，鄂罗斯国最大。今回疆与痕都斯坦相接，其国即印度故境。以中国之力，欲通五天竺国何难。但出于招致非彼之慕德向化而来故，不为耳。

又御制诗集题《大西天草书·普吉祥玉印序》曰：痕都去卫藏甚远，道里莫得而详，即古五印度也。相传彼处有佛遗迹，而今彼处佛教乃式微，外道转盛。俗称为大西天，若回人之痕都斯坦，盖印度之一耳。兹得玉印二方，体近天竺。因令侍卫巴忠，持询章嘉胡士克图，据称是大西天草书。一曰萨尔瓦，汉语普也。一曰莽噶拉

穆，汉语吉祥也。首岁得此，实为兆庶锡福之征。

《海国闻见录》：小西洋，居于丙午丁未方〈（按：此沿俗称西南洋为小西洋，与今志例不合）〉，从麻刺甲、暹罗绕西，沿山而至于白头番国，人即西域之状，卷须环耳，衣西洋布，大领小袖，缠腰，头裹白布，故以白头呼之。国有二：东为小白头〈（国名莫卧尔，即痕都斯坦）〉，西为包社大白头〈（即伯尔西亚）〉。二国北接噶尔丹国，而噶尔丹为之北〈（案：噶尔丹乃准部，在葱岭东，与小西洋包社等国不相接。当作赛马尔罕，在葱岭西，此误混为一国）〉，邻细密里亚国。细密里亚国之西，为俄罗斯国〈（案：细密里亚，即悉毕厘阿，乃俄罗斯东藩，与中国新疆喀部、黑龙江连界者皆是也。原图误析俄罗斯与细密里亚为二国，故滋阅者之疑，今仍原文，而附订于此）〉。小白头东邻民呀国〈（即孟呀腊）〉，小白头北，与大白头皆联赛马尔丹，西北枕里海，西邻东多尔其，西南邻阿黎米亚〈（即天方阿丹回国）〉，南临大海。

多尔其分东西二国，皆回回。东多尔其〈（机洼回国）〉国不通海，东邻大白头，东北傍里海，北接惹鹿惹亚〈（即南都鲁机）〉，西邻西多尔其〈（即如德亚，今并入天方回国）〉，南接阿黎米亚〈（回教祖国）〉。

里海者，诸国环而绕之，东北细密里亚〈（即哈萨克）〉，西北俄罗斯，东赛马尔丹〈（赛马尔丹者，明代国名也。今则为敖罕布哈尔爱、乌罕等国）〉，西惹鹿惹亚〈（南都鲁机）〉，西南东多尔其〈（即机洼回国）〉，南包社大白头，内潞大泊，不通海棹，其水惟从包社出海，故为里海。

惹鹿惹亚一国，亦不通海，东傍里海，西傍死海，北联俄罗斯，南接东西多尔其。女子姿色美，而毛发红，气味臭〈（即古之西女国故地）〉，衣着同白头，贡于包社。

死海者，即黑海源从地中。北俄罗斯，南西多尔其，东惹鹿惹亚，西璿年呻〈（即北都鲁机）〉。四面环绕，不通大海，故为死海。而西多尔其、璿年呻二国，不通小西洋之海，而滨于中海之东北。中海从大西洋之海而入。语附大西洋记。

阿黎米亚〈（即阿丹天方回回祖国）〉，东邻包社大白头，北接东西多尔其，西北滨于大西洋之中海，西联乌鬼国。陆地一隅，自西至西南与乌鬼之地隔对一海，南临大洋。国为多尔其所属，贡男女于多尔其为奴婢〈（今天方之默德那阿丹国，亦臣服于包社也）〉。

《万国地理全图集》曰：五印度国，亦称忻都土坦。北极出地，自六度三十分，至三十五度，偏东自六十五度，至九十五度。东西南三方环海，北至西藏，东北连亚三，西北接加布。此邦自古有名，产玉金香珠，万国会聚赴市。广袤方圆三百八十

四万方里，居民万三千四百万丁。北方各地，高山插天，四面积雪，与西藏交界。其国中间山峰相接。自北至南，半之二分。北至高之山二千五百丈。西方惟有三百丈而已。安额为圣河，自北山流出，其雪穴闯入印度地方，东南流入旁葛刺海隅，即东恒河也。印度河由西藏出，至五印度西北疆，入印度海，即西恒河也。又东北方有巴马埔他江，自云南流入亚三境，入旁葛刺海隅，即大金沙江也。西尚有逆埔他答地等河，南有峨他惟利、吉那加惟利等江，山内及沿河出钢钻、红宝石、石权珠、嫩黄玉、金色玉珊瑚、青碧玛瑙。其国丰盛，惟西北沙漠乃游牧之地。印度所出棉花最盛，每年运出十八万九千七百石，青黛一十万石，檀香、苏木、胡椒、水果各项。其五爵君王皆骑象，造金鞍，美丽光彩。其鹰甚怪，鹫则高飞，吞臭尸骸，飞及高山。山内金银不多，但有铁如石。其北方出硝甚多，而最恶之鸦片，亦此国所出。

又曰：自古以来，五印度国，大有声名。因离中国不远，数次梵僧，流布其教，令中华固执，奉事菩萨。周烈显等王年间，西国有希腊王，率其军士，所向无敌，攻取印度各国，旋即退败。嗣后与大秦各国，总无交通。惟其商贾负物西往，但不进内地，又不探风俗，故述怪诞以招人耳目。宋朝年间，回回旋自北侵国，自崇独一真主上帝，不奉事菩萨，并力攻击，拆其庙，坏其像，扫荡全地，强其土民服其权辖。及元朝始衰之年，有蒙古兵犯界，剿灭地方，开基创业，四方强服。其居民算各户共计八千万丁。忽于明宏治八年，葡萄牙船只不远数万里，来到印度西边，即时开港垦地，贸易丰盛。强据沿海多口，筑城建邑，并立总帅，代王理藩。荷兰妒之，亦来兵船，与葡接战，百攻百胜。是时英商来国，请土君建馆，亦筑炮台，又有公班衙总官操权。乾隆二十年，旁葛刺总帅肇衅，执英人付囚狱，暴虐之甚。英官力击土人，厚施贿赂，教其将帅，奸计投降，土军即时四散，而英官操权。于是其土君皆怨结，约合军南北，两边力战而究败走。惟英官施政行义，故其土民仰之，不敢背乱。英国现今所据之地，北有旁葛刺省，方圆九十八万四千方里，居民五千七百万丁，其广大云南省三倍半。马塔刺省，方圆四十六万二千方里，居民一千五百万丁。网买，方圆二十一万一千方里，居民一千万丁。所属权辖，居民共计八千三百万丁。别有列国归英辖，方圆八十四万九千方里，居民一千五百万丁。所有自主之国，不服英者，方圆五十六万一千方里，居民一千一百万丁。

又曰：印度人身体懦弱，四肢百体相称，面黑容温。其女不美，穿鼻挂环。天气甚热，男惟著围凉，时将花帕包肩胸，女则浑身加衣。所食淡薄。庶民各分品等，上品者，称曰巴闵，为国之儒。又有战品，乃兵弁之类，自幼读兵书，习武艺。各匠自为一品，子接父业，否则父母弃之，亲友疏之，馁毙沟洫，固执己见，不向教化，仍蹈前辙，陷习恶。所拜之菩萨、神像千万，节期相接无已。其僧大有权势，教其愚民，将婴儿投河，或饲鳄鱼。如有僧将死，寡妇于其墓堆薪自焚。英官禁其弊而罚之，印度之行，外屈节从权，内巧谗诡谋，说谎骗人。现开通商之路，每年所运之货，共计银二千四百万两。所运出之物，银三千五百万两。

又曰：印度各国贡于英吉利者，一曰尼散国。在印度内地，广袤方圆二十八万八千方里，居民一千丁。其地山峰不高，天暑物阜。国王好战，募兵与邻国结衅。兄弟离散，四方仇敌并起。英人助之，始免亡失。王交接匪类，近习嬖幸。英国始派大臣驻都理国，所有军士，皆归英国将弁，督率弹压。都城最大，居民二十万丁。国众淫邪无度，王常避宫不出。

一曰纳不邦者，广袤方圆二十一万方里，居民三百四十七万丁。古王以剽掠邻邦为生，往往犯英藩属，是以伐其王，别遣大臣代办国事。

一曰澳地，广袤方圆六万方里，居民三百万丁。田地甚丰，江河灌溉。土民健强好斗，恒结衅隙，近招英官办事。其王甚富，府库充满。赖英大臣代理国政，故百姓乐业。

一曰巴罗他，乃贼魁之国本地暨破，报两国。因邻敌逼迫，并无攻战之法，故招英官而服其权。

一曰买素，在印度南方。广袤方圆八万一千方里，古时农务甚兴，但王好战，连年英官效死力战，全取其地，而此外别有列国小邦，如中国之诸侯，皆以英为其地主，随时进贡，而拜其大臣，如办政之宰相。

印度自主各国，一曰廓尔喀国，南东西三方皆连印度，北连西藏。遍地高山穿谷，产大麦、玉麦、棉花、甘蔗、豆是参、肉豆蔻。土地广袤方圆一十五万九千方里，居民二百万丁。如西藏土人崇佛教，信喇嘛。山内民人，身矮力大。乾隆年间，侵西藏，劫庙宇，被天军追剿。嗣嘉庆二十一年，与英结衅隙，战败议和，其都称为甲曼士。

一曰悉国，在西藏西南。形势广袤，方圆一十五万方里，民人三百万丁。田地沙多，农夫力耕，居民独拜上帝一位，不崇菩萨。力战回回教门，自创立新国。道光年间，明君操权，百攻百胜。请西洋国将军率兵，讲求武艺，精熟韬略。故此邻国畏之。道光十九年，没宗孙摄政，谗佞在朝，权奸营私，国不如旧，其都称为刺合。

一曰新地亚地，广袤方圆一十二万方里，居民四百万丁。国虽广大，然诸侯甚多，各系自主。好掳掠攻击，为英军力战击退，只待机会，再可征伐。土产鸦片，每年运出二万馀箱，销卖四方，其都称曰鸟忽，多有古迹。

一曰甲布国，南连英藩属国，北至新疆，东接后卫，西及白西国。其地广大，但居民不多。部落土酋，各据其邦。大半为回回教门，勇猛好战，以骑射为业。地内沙漠，狂风四起，道路崎岖，人马难行，故敌难攻击。况山洞路窄，隘口难通。道光

十九年，俄罗斯国，私差奸人，兜揽事情，遍滋事端。英国兴师望甲而进，跋涉劳顿不胜，卒击其敌，逐其王，而防范其国。其王今贡于英〈（案：甲布，一名河付干，即爱乌罕国）〉。

英吉利在印度国权力势重，始系商贾结伙为公班衙，其贸易人等，到印度沿海各口，建立商馆买卖。因土君力索磨难，必须防范，是以操演军法，逐一过人，百击百胜。虽本国距印度几万里，能遥制之也。所养骑步炮手各等兵，共计三十万，其中仅十分之一为英人。恒布真教，劝人弃菩萨而崇拜真王上帝。又引导各民悦服救世主耶稣，故上帝增广其土地，而竖其国家矣。

卷二十

《地球图说》：天竺国，东界阿瓦国、西藏国、并旁葛刺海，南界印度洋并旁葛刺海，西界亚拉比亚海，并皮路直坦国、亚加业坦国，北界西藏国。其百姓约有十四千万之数，都城地名甲谷他，城内民六十五万，大半释教，小半回回教。现有花旗国并英吉利国人，在是国传耶稣教。人民聪明，能织羊毛布匹，体弱面黑，含笑温和。南方最热，不见冰雪。东南北三方，俱有高山。中央平坦，惟北方之山更高，上有积雪。国内分列三部：曰旁葛刺，曰马搭刺，曰网买。现属英国管辖，故英官长教其庶民，各归四业：一僧，二兵，三商，四役。各传其业，无相夺伦，不许互相姻好。一出其类，父母恶之，众民弃之，亲友疏之。有三大江：曰沿绝斯江，印度江，布兰布塔江。其沿绝斯江，僧人愚其国人，以为圣江，能投赤子以饲鳄鱼，则神佛护佑。遇大偶像，乘车而来，凡所过境，民争以子及身投于轮下。男或病亡，则其妇与其夫之尸，一齐焚化，诚可伤矣。旁葛刺之城，名比拿力，内有高楼五六层，僧言古昔菩萨亲手创造，妄称圣域。人能至此烧香，即免地狱之苦。有河一带，能入河洗涤，则罪恶俱净，以此取人之利。国内有极大之榕树，其枝倒垂于地，则枝复生根，绵延不绝。故一树根株，远约二里，其下可容三四千人。国西有旷野沙漠，物产全无，禽兽繁殖。又一城名俄亚，现系葡萄牙国人管辖，逼合土人入天主教，不从则鞭责，甚至火焚，何其忍也。大小书院，学习文艺，处处皆有，不计其数。土产五谷、白糖、胡椒、果品、檀香、苏木、青黛、棉花、鸦片、金钢钻、红宝石、石榴、珠嫩黄玉、金色玉、珊瑚、玛瑙、铁硝、象、虎、豹、熊、鹿、水牛、鹰鹫、各大鸟，又有最毒之大蛇等物。再南有一岛名锡兰洲，现与英吉利管辖，耶稣门徒亦在此传教。是洲土产与天竺国无异，但另有桂皮、香料、象〈（土人用之如牛马）〉。山内多宝玉，海滨多珍珠，至于架非，近亦栽种不少。

《地理备考》曰：印度国，又名天竺，在亚细亚州之南。北极出地七度起，至三十六度止；经线自东六十五度起，至九十三度止。东至阿瓦国，暨榜加刺海湾，西连阿付干国，暨科曼海湾，南枕印度海，北界西藏。长七千五百里，宽五千五百里，地面积方约一百六十六万里。烟户一垓三京四兆馀口。本国地势，东南北三方，重冈叠岭，迤迤延袤。中央平原坦阔，风景幽雅，湖河甚多，地方沃润。河之长者有九：一名安日，一名印度，一名巴刺迷尼，一名玛合奴的，一名哥达威黎，一名基斯德那，一名加威利，一名内尔布达，一名达布的。湖之大者有四：一名几尔架，一名郭拉伊尔，一名林，一名达尔。田土膏腴，生殖蕃衍。土产金、银、铜、铁、锡、铅、珍珠、水晶、硃砂、钻石、花石、鸦片、棉花、蓝靛、木料、香料等物。地气酷热，海风清凉。南方高山峻岭，南北绵亘迤迤，冬夏互异，冷热悬殊。每十二时，风色两转，由子至午，风向海去，则酷热异常。由午至子，风向岸来，则清凉复生。国制名位不一，或为王，或为酋，或自设官长，或他国兵帅兼辖。所奉之教，或巴拉马，或那内克，或回回，或天主，或释，各教纷纷，趣向不一。技艺精巧，工肆林立，五方辐辏。史书记载，渊源久远，年岁迢递。耶稣未诞之前，全奉释教。耶稣降生之后，一千年间，回王肇居北偏，始创回教。明孝宗宏治十年，布

路亚国人，航海访护水路，遂至其地。而贺兰、英吉利、佛兰西三国，次第接踵而至。所得境土惟英吉利人居多。通国之地，约分为三。一属于别国管辖，一不属于别国管辖，一进贡于英吉利国。自是天主教大兴。

其一分，内建四国：一名新的亚，一名塞哥，一名信地，一名尼巴尔。其新的亚国，在印度之中，东西南北四至，皆英国兼摄之地。土地版图，不相联络，错落别国疆域之中。统计地面积，方约有四万一千三百余里，烟户四百万口。通国分为三方：一名亚加拉，首城瓜利尔，乃国都也。建于平原之中，屋宇峻丽，人烟稠密，百货骈集。一名于德宜至，一名马卢袜。其塞哥国，在印度西北。中为隆德勒，至河分歧。在河左者为英国兼摄，别序于后。在河右者东界西藏，西界北罗吉斯丹、阿付千二国，南界信地国，北界西藏、阿付千二国。长约二千五百里，宽约一千里，地面积方约十八万零五百五十里，烟户八百万口。昔则列君分据，各霸一方，彼此结盟，不相统属。今则一君统摄，世袭王位。通国分为十二部：一名本若，首部曰劳尔，乃本国都也。建于拉维河岸，昔繁华，今萧条。贸易仍盛，技艺犹巧。一名固宜斯丹，一名加支迷尔，一名著者，一名亚萨勒，一名北朝威尔，一名几尔加布，一名木尔丹，一名勒亚，一名德拉义斯马伊汗，一名德拉合西汗，一名巴合瓦尔布。其信地国，在印度之西。东界亚日、迷尔加支二部，西界北罗吉斯丹国，南界加支部，暨科曼海湾，北界北罗言斯丹、塞哥二国。长约一千余里，宽约五百里，地面积方约五万五千五百五十里，烟户一百万口。至于朝纲王位，历代相传。首域名海德拉巴，乃本国都也。其通商冲繁之地，一名达大，一名哥拉齐，一名给伊布耳，一名拉尔加纳，一名奴沙辣。其尼巴尔国，在印度之北。东界布丹国，西界德列部，南界乌德国，暨阿尔部，北界西藏。长一千六百里，宽四百里。地面积方约五万五千五百六十里，烟户二百五十万口。王位历代相传。通国分为九邑：一名尼巴尔，首城曰加德满都，乃国都也。一名念四汗，一名念二汗，一名马各王在尔，一名几拉德斯。其中各汗分据，首城非一，一名加当，一名札言布尔，一名萨巴带，一名么隆。

其一分，内建十二国：一名乌德、一名德干，一名那哥布尔，一名曷尔加耳，一名卖索耳，一名日瓜尔，一名刺日布德，一名西林德，一名邦德尔干，一名波保尔，一名萨达拉，一名达拉王哥尔。

其乌德国，在印度之北。东界巴阿尔，西界德列暨亚加拉，南界亚拉合巴尔德，北界呢巴尔国。长约九百里，宽约三百五十里。地面积方约二万三千三百三十里，烟户三百万余口。朝纲王位，历代相传。首域名卢各脑，乃本国都也。建于高翁的河岸，其通商冲繁之地，一名非萨巴尔，一名几拉巴，一名巴来支，一名丹达。

其德干国，又名尼桑，在印度之南。东界那哥布尔国，西界萨达拉国，南界加尔那德部，北界马尔袜部。长约三千七百五十里，宽约三千三百里，至于朝纲王位，历代相传。通国分为五部：一名海德拉巴，乃本国都也。一名比德尔，一名北拉尔，

一名亚瓦，即加巴。一名北乍布尔。

其那哥布尔国，在印度西南。东界阿利萨部，西界尼桑国，南界西尔加部，北界亚拉把部。国境长约一千五百里，宽约一千里，地面积方约八万里，烟户二百四十七万口。王位历代相传。首城亦名那哥布尔，乃本国都也。其通商冲繁之地，一名霸架尔，一名郎德各，一名昭布尔，一名拉登布尔，一名马合罢，一名列布尔，一名古达，一名威拉合尔。

其曷尔加耳国，在印度之西。东界新的亚国，西界古萨拉的部，南界千的是部，北界刺日布德国。地面积方约一万五千里，烟户一百二十万口。王位历代相传，首郡亦名曷尔加耳，乃本国都也。

其卖索尔国，在印度之南。东南二方，界加尔那德部，西界加那刺部，北界贝查布尔部。长约七百五十里，宽约六百里，地面积方约四万五千里，烟户二百二十七万口。王位历代相传，首郡亦名卖索尔，乃国都也。其通商冲繁之地，一名邦加罗尔，一名几那巴登，一名几德拉克，一名赛拉，一名哥刺尔。

其日瓜尔国，又名古宜加瓦尔，在印度之西。东界亚美大巴府，西南北三方皆界扁曼海湾。长约五百五十里，宽约四百余里，地面积方约二万三千五百里，烟户二百万口。王位历代相传。首郡名巴罗达，乃本国都也。

其刺日布德国，在印度西北。东界亚哥拉部，西界阿付千国，南界古斯拉德部，北界塞哥国。长约一千二百六十里，宽约七百二十里，地面积方约九万里，烟户三百余万口。侯位相传，各分部落。通国分为九部：一名曰宜布尔，一名哥达，一名奔的，一名柯代布尔，一名入德布尔，一名当克，一名日萨迷耳，内有诸酋分部，一名比加尼尔，一名巴的，内有诸酋分部。

其西林德国，即萨德勒至河左之塞哥国也，在印度之北。东界德列部，西北界塞哥国，南界刺日布德国。长约八百余里，宽约四百里，地面积方约三万余里。至于朝纲，诸酋统辖，各分部落。首郡一名巴的亚拉，一名达内萨尔，一名拉的亚纳，一名翁巴拉。

其邦德尔干国，在印度之中。东界乌德国，西界新的亚国，南界亚拉合巴部，北界德列部。长约六百里，宽约五百余里，地面积方约三万里。诸酋统辖，各分部落。首郡一名札德尔布，一名某，一名布那。

其波保尔国，在印度之中。东南界亚拉合巴部，西北界新的亚国。长宽皆约三百里，地面积方约九千里。至于朝纲，王位临御。首郡亦名波保尔，乃本国都也。

其萨达拉国，在印度之西。周围四方，皆英国属地，北惹布尔部包括。长约五百里，宽约四百里，地面积方约一万余里。王位临御。首郡亦名萨达拉，乃国都也。其通商冲繁之地，一名马合比里昔尔，一名美黎至，一名般德尔布，一名合达尼。

其达拉王哥尔国，在印度之南。东北界加尔那德部，西南界海。长约五百余里，宽约二百余里，地面积方约一万里。王位临御。首郡名的里湾德梭，乃本国都也。其通商冲繁之地，一名达拉王哥尔，一名波尔架，一名固兰，一名安任加。

《地理备考》曰：本州之地，隶英吉利者实多，有国君专管之地，即锡兰海岛。有印度公司兼管之地，即印度之榜加刺等十九部暨亚桑，阿刺干，马尔达般，达威新埠，息辣，马拉加各等处。分四兵帅管摄，一在榜加刺驻扎，一在亚加刺驻扎，一在马达拉斯驻扎，一在孟买驻扎。锡兰海岛。在印度之南，纬度自北五度五十分起，至九度五十二分止；经度自东七十七度三十分起，至七十九度止，长约一千里，宽约四百里，烟户一兆五亿口。田土肥饶，谷果丰登。土产稻、烟、丝、麻、椰子、槟榔、胡椒、桂皮、棉花、木料、金石之类。禽兽充，鳞介纷繁。地近赤道，暑多寒少。贸易昌盛，商舟络绎。首郡名哥伦波，有国君所派总兵一员驻扎。

榜加刺部。东界阿瓦国，西界阿拉合巴暨巴合尔二部，南界印度海，北界布丹国。长宽皆约一千二百五十里，地面积方十五万六千二百五十里，烟户二京五兆三亿口。地势土产，已详印度国志。贸易兴隆，五方辐辏。总领十八府，首府名加尔古达，乃都会也。建于乌给黎河之左，地势平坦，泽隰间隔。屋宇峻丽。

巴合尔部。东界榜加刺部，西界乌德国暨阿拉合巴部，南界冈都亚那部，北界尼巴尔国。长一千里，宽七百五十里，烟户一京馀口。总领六府，首府名巴达那，乃都会也。

科黎萨部。东界榜加刺海湾，西界冈都亚那部，南界哥达威利河，北界榜加刺部。长宽皆约三百里。总领六府，首府名古达克，乃都会也。

冈都亚那部。东界科黎萨部，西界北拉尔根的土二部，南界义德拉巴、北西尔加耳二部，北界马尔秣、阿拉合巴二部。长二千里，宽一千八百里，地面积方十五万四千四百里，烟户三兆口。为英国兼摄者。只东北二方，首府名倭巴尔布。

以上四部，皆属驻榜加刺之兵帅管辖。亚加拉部。东界乌德国暨阿拉合巴部，西界亚日迷尔部，南界马尔秣部，北界德列部。长九百里，宽六百里，烟户六兆口。总领五府，首府亦名亚加拉，乃都会也。

阿拉合巴部。东界卑合尔、榜加刺二部，西界马尔秣、亚加拉二部，南界冈都亚那部，北界亚加拉部暨乌德国。长九百七十里，宽四百三十里，烟户七亿口。总领六

府，首府亦名阿拉合巴，乃都会也。

德列部。东界乌德国，西界亚日迷尔部，南界亚加拉部，北界古尔瓦勒部。长宽皆约五百里，烟户八兆口。总领六府，首府亦名德列，乃都会也。

古尔瓦勒部。东界尼巴尔国，西界劳尔府，南界德列部，北界西藏。长约一千里，宽约八百里，烟户五亿口。总领三府，首府名西里那都，乃都会也。

亚日迷尔部。东界亚加拉部，西界阿付千国，南界古塞拉德部，北界劳尔府。长一千二百六十里，宽七百二十里，烟户三兆口。此部惟首府亚日迷尔为英国兼摄。

以上五部，皆属驻东方亚加拉之兵帅管辖。案：克什弥尔，惟首郡属英，则北印度未全为英夷有也。

加尔那的部。东南界榜加刺海湾，西界达拉王哥尔暨卖索尔二国，北界北日布尔部。长二千里，宽约三百里。总领十府，首府名马达拉斯大，乃都会也。

哥英巴都尔部。东界加尔那的部，西界马拉巴尔部，南界丁的古尔府，北界加的山。长约五百里，宽三百里，烟户六亿口。总领二府，首府亦名哥英巴都尔，乃都会也。

马拉巴尔部。东界哥英巴都尔部，西界海，南界达拉王哥尔国，北界加那拉部。长七百里，宽二百里，烟户九亿口。总领一府，首府多加里古都。

加那拉部。东界卖索尔国，西界大海，南界马拉巴尔部，北界北日布尔部。长七百里，宽约二千里，烟户三亿九万口。总领五府，首府名蒙加罗尔，乃都会也。

巴拉加部。东界加尔那的部，西界加那拉部，南界萨灵部，北界义德拉巴部。长一千里，宽八百里，烟户二兆口。总领二府，首府名北拉利，乃都会也。

北西尔加部。东南界榜加刺海湾，西北界窝黎萨部。长一千二百五十里，宽约二百里，烟户五兆五亿口。总领五府，首府名千都尔，乃都会也。以上五部，皆属驻南方马达拉斯大之兵帅管辖。

科隆加巴部。东界德千国之东比德尔府，西界科曼海湾，南界北日布尔部，北界根的土部。长约六百里，宽约五百五十里。总领十府，首府名孟买，乃都会也。

北日布尔部。东界义德拉巴部，西界印度海，南界卖索尔国暨加那拉部，北界科隆加巴部。长一千三百里，宽七百五十里，烟户七兆口。总领五府，首府亦名北日布

尔，乃都会也。

根的土部。东界北拉尔部，西界古塞拉德部，南界科隆加巴部，北界马尔秣部。长六百五十里，宽约五百里。总领三府，首府名高尔那，乃都会也。

古塞拉德部。东西南界海，北界亚日迷尔部，长一千四百里，宽六百五十里，地面积方约四万四千里。烟户二兆一亿六万口。总领四府，首府名苏拉的，乃都会也。

以上四部，皆属驻孟买之兵帅管辖。

《地理备考》曰：本州之地为葡萄亚兼摄者，曰科秣，又名小西洋，在印度之西。纬度自北十四度五十四分起，至十五度五十三分止；经度自东七十一度三十分起，至七十二度五分止。东南至加那拉部，西枕厠曼海湾，北界北日布尔部。长二百五十里，宽一百二十里，地面积方约一千五百里。烟户三亿一万馀口。内有一十九岛，冈陵叠起，络绎回环。田土肥饶，谷果茂盛。土产盐、麻、绵花、豆蔻、胡椒、椰子、槟榔等物。禽兽草木，靡弗蕃衍。地气炎热，夏多飓风。技艺平常，贸易清淡。其地分为三部，一名厠秣，首府邦靖，设有总管衙门。一名萨尔塞的，首府马尔冈。一名巴尔德斯，首府马布萨。此外又有新疆之地，内分十部。一名奔达，一名加那哥纳，一名比吉灵，一名萨达利，一名北尔宁，一名阿斯德拉加，一名巴黎，一名英巴尔巴开，一名顺达拉瓦的，一名加哥刺。

达蒙。在印度国古塞拉的部内，其地甚小，长宽不过数十里，烟户约一万五千口。在昔贸易兴隆，今甚凌替。

的玉。在印度国内，地方狭窄，人烟稀疏，海口深阔，泊舟便利。

《地理备考》曰：佛兰西国兼摄之地，皆在印度国内，分为五府。一名奔的支黎府，在加尔那的部内。于北极出地十一度五十五分，经线自东七十七度三十一分。烟户四万口。土产米、糖、蓝靛、鸦片、药材等物。设有总管衙门。一名加黎架尔府，亦在加尔那的部内。于北极出地十度五十五分，经线自东七十七度二十八分。烟户一万五千口。土产绵花。一牙那安府，在北西尔加耳部内。其北极出地十六度五十五分，经线偏东七十九度五十分。烟户一万八千口。土产木料。一名商德尔那哥府，在榜加刺部内。其北极出地二十二度五十五分，经线偏东八十六度九分，烟户一万五千口。土产鸦片。一名马黑府，在马拉巴尔部内。其北极出地十一度四十二分，经线偏东七十三度十六分，烟户一万口。土产胡椒。

《地理备考》曰：大尼国兼摄之地，俱在印度国内。一名西棱布尔府，在榜加刺部内，乌给黎河之右。其北极出地二十二度四十五分，经线偏东八十六度六分。烟户

一万三千口。设有总管衙门。一名达郎给巴尔府，在加尔那的部内，其北极出地十一度十五分，经线偏东七十七度三十四分。烟户一万二千口。

《外国史略》曰：五印度国，为亚悉亚热带地。北极出地自七度至三十五度，偏东自六十七度至九十七度，广袤方圆四十一万六千里。其东印度海边一千二百里，自南至北一带六千二百三十里。最阔之地，约六千里。若论其交界，北连雪山，称曰喜马拉雅山，与西藏交界，及大印度海。东及旁甲拉海隅，与缅甸交界。西及印度海西北，与押安比路治等交界，则以印度江画其疆也。北方之山，高耸二百六十丈，四时积雪，不见巉岩。由此河流直下，岸谷蕃昌，终年花开。树木蕃盛，然多瘴疠，无居人。入夏则禽兽俱不得生。自此南向，渐有广坦，当河之支流分为三条：曰布兰补答，曰恒额，曰印度。其水皆来自西藏。东西两岸，皆山连山，皆密林延及南方海滨，所谓哥摩林也。印度西北有旷野，广袤方圆五万里，夏无草木，飞尘蔽空。惟于深谷内掘井以饮，产水瓜止渴。西北海边甚低，有二海港：一曰屈治，一曰千拜。内有咸泽，众水所入，所谓里海也。印度之南有锡兰岛，岛间有马那尔海港，其水浅，大抵锡兰岛之间，与巴勒海相隔无多港支，海舶不至。其印度河自西藏涌出，初西北流，后转西南，入五印度地，众水之所汇也。至一处，有五支河入之，五印度之所以名者，或亦以此。在新缔地，亦有海口，其水浅，大船不能入。恒额河所流出之地，在印度之北界，其地高于海面者九百丈。南流入印度国，又多分支，入旁甲拉海隅，即印度人所称圣江者是也。流传谓能浴此河内，即洗涤诸大罪过。故自远来溺死河边者不少。榜甲拉有石岸，在南地之河。产金沙、金刚石、红青蓝等玉。巴勒海产珍珠，其北方产米、鸦片、绵花、青靛、糖，南方产胡椒、檀香、各项香木、树膏、椰子、桂皮、各项材木，兽有象、兕、豹、虎、骆驼、野驴、鹿，惟牛最鲜。有则民称为神禽，翎羽甚美，但无能鸣者。昆虫多如海沙，而白蚁最狠，又多青蛇。

印度国自古有名，所出宝物不可胜数，人皆视为乐土。故凡称他国最美之区，则曰犹五印度云。自古与东洋西洋各国无往来。其书册所录，惟述佛菩萨神明之异。众民各分品类，各守戒律，有犯必逐。惟听第一品婆罗门辈之命。其君大国者，皆出此族。周赧王年间，有希腊国王者，侵五印度，自后遂由红海通商贸易。既而佛教之僧，遍往四方，传其教，竟至中国。中国百姓，亦盛奉此教。即日本、暹罗、缅甸各国，皆设其像而建其庙。至汉时始与中国交接。自耶稣升天后数十年，其门徒亦至此国，传福音之理，所立圣会，至今尚存。后五印度各国多年肇衅，互相争战。及宋靖康年间，有回回族由白西尔亚伐五印度，据其地创立大国。富强浸盛，于是西域押安之游牧部落，皆贪其富，而攻伐之。始于元初创国，时争据其地，坏佛菩萨像，强百姓入教门，不从则斩，乱久不息。明建文元年，西域蒙古撒马尔罕王谟母尔，强服印度国，创立大蒙古号，管理五印度。大半各国，皆震栗。及明世宗嘉靖八年，蒙古王全操印度之权，建立法度，历十五年。其国广袤方圆至七万余里，居民四百万名。岁收饷银二万二千四百万，各国皆景仰焉。时葡萄牙人于明武宗正德七年，初到五印度海西边通贸易。后占其海口，称曰峨亚，复于他海口开埠。

而荷兰人亦于嘉靖年间，至此国造船，夺葡萄牙国所据之锡兰岛，开港通市，然必奉大蒙古之谕。后英吉利、佛兰西、大尼三国，亦乘机往租地通商，皆在偏隅未开广市，于时大蒙古之君，威权重大，人皆畏之。其后众子争权，内乱并起，各部酋皆乘间自王其地，遂四分五裂。

英吉利国于万历二十六年，在印度创立公班衙，与各国贸易，得利甚微。万历三十八年，又在印度西北苏拉地方开埠。顺治十年，始于马答拉贸易。康熙二年，葡萄牙国以网买岛让英国，正在印度之西。数年后，大蒙古王肇衅，商人有见杀者。康熙三十八年后，英吉利与佛兰西肇衅，即在印度之炮台，互相攻击。前则英失，后则佛奔。于是邻国皆动干戈，或助英，或从佛，屡有战争。欧罗巴公使出为两国议平。乾隆二十年，佛国官蛊惑蒙古所驻榜甲拉之兵帅，将所辖之英商弁，尽行禁锢，毙其大半。英人欲雪此仇，调倾国之师，驶入恒额河，与其土酋盟，自逐其蒙古酷主。佛兰西乘隙，复率荷兰师船入内河，力拒英人。英人中有才能者曰加里威，集众聚议，与其蒙古土君背城一战，竟获全盛。于是东印度各君长，皆以其地让给旁甲拉，以为英人之藩属。其南方地，或买或和，得之。于是英国调兵帅代理其全地，又择其年少聪明者，使之学而后执政。恐其受贿赂，则给厚俸，以养其廉。

乾隆六十年间，有蒙古土酋与英人交锋，招佛兰西助之。英军尽力攻守，至嘉庆四年，土酋父子悉降其地，大半归英。嘉庆十年，尽驱佛兰西驻印度之兵，以据其地。又在南方占荷兰国所据之牙瓦等岛也。时英人在此地，尚与印度为对待，既而大蒙古国渐微，其外部尽背叛自立，于是英人入其都。其蒙古王曰得希者，反赖英官赈济之。其初财积如山，竟成穷乏。此以知大国之不可恃也。嘉庆十六年，各土君在五印度者，皆服。惟有耶加之族类，越境侵扰。英人讨之。西北有新起教门，其首领系西刻人，甚勇猛，土君惴惴求英人保护，而纳贡焉。缅甸王亦与英人争锋，且杀其兵将，入旁甲拉地，攻英藩属，连年不解。后英军击败缅甸，入其都。缅王求和，让北方并南海口，且偿其兵费。于是各国皆畏英兵之强，五印度国赖以少安。历数百年，或同盟之土君有叛者，必除其位。是以农力于田，匠勤于肆，商则遍出于其途，皆归英权辖。忽俄罗斯国使与甲布君盟，合白西国攻击黑腊城。道光十八年，英军克甲布地，复立其旧主。二十一年，甲布人又生异心。英人募兵侵甲布，仍复前王之位。此时西刻地之主，复募兵侵英境。英军旋剿灭，以峨拉升王此国。于是加治弥耳地，亦归英国，自是五印度皆安堵矣。

五印度人，固执教门，不论佛教、婆罗门、回回，皆一心坚守。民多紫黑色，有面白者，有正黑者。身体高大，行不能速。发长而黎，身多瘦，貌圆扁。额大而高。女多美。男女以白布绕身。好洁勤洗，常以布缠头，即缠头回回也。百姓畏热少衣，好以金银器饰手足耳鼻。常赤足不用履。其教门古分四品，即婆罗门等是也。僧长领，军士，商匠，农工，各分品类等级，世守其业，不得互相婚姻。一出其品类，即谓忘本原，不得比于人数。是以上品世贵，下品世贱。婆罗门为上品，门第最重。婆罗门之巧谗者，藉经术以渔利济私。此外尚有各国族类，与本土人相杂。欧

罗巴中，维葡萄牙人甚多，计约六十万。皆执天主教，与土人未通往来。英人苗裔在此者，文武兵丁六万，工商等人四万。亚拉人亦有来此充兵立业，各类参杂，统计约二十万万口，大半服英国权辖。土音系梵语，所撰书册诗本，惟僧能讲。其民土音有三十六种，今则多习英语，译各艺术之书，以资日用。城内大开书院，广教学士。崇婆罗门佛教者，居十之九。尤异者，数年前教门之寡妇，必同夫尸自焚。争赴礼佛菩萨之像，致车轮压毙者不胜数。此真婆罗酷虐之门，迷惑不悟，大可哀哉。其回回教之人，约千五百万口。崇耶稣教者，亦几十万人。又北印度国锡兰岛等处，皆确守释迦之教。

英国据印度地大半，分四部：东北方曰榜甲拉部，方圆万有二百四十八里，居民六千六百九十四万二千口；中央曰亚加拉部，广袤方圆四千一百九十六里，居民二千二百一十四万六千七百口；东南曰马答拉部，广袤方圆六千七百里，居民六千四百八十七万六千口；西方曰网买部，方圆三千六十五里，居民六百八十八万七千口。北界廓尔加地，南界同名之海隅，东至亚散、缅甸等地，西至巴哈部，经度自二十一度至二十七度。平坦丰盛，恒额河东南流之所在也，海边有潴泽。二十四分之中，三分河湖，四分荒芜，一分乡城，三分牧场，九分田，四分未垦之地。遍地皆支江，可以灌溉。其水时涨坏田，夏旱又易浅涸，稍雨则水骤长。江河迁变无常，沧桑陵谷盈涸时有。春夏之交，雷雨连月，不胜蒸热。秋则无雨，零露灑天气苦冷。北方则近雪山，寒冻更甚。中央地势卑湿，平地皆水。家家以小舟通来往。乡村广大，皆筑高阜以居，生齿浩繁。榜甲拉为米谷所出，夏禾冬麦，兼产豆粟黍姜，并出鸦片、青黛、烟、糖、油，在印度首推沃饶之地。田岁收二次，一谷一菜。但民不善耕，且多贫不能具农器。男女体段，女好染指甲，作赤色。平民亦喜争讼，当步兵者四分之三。奉婆罗门教甚谨，出蚕丝，善造绸缎，织绉纱布，亦出硝、硃砂，并各药材。富者开肆，兑换金宝，贷银取利。不好远出。榜甲拉西连巴哈，亦属此部。在廓耳加之南，经度自二十二度，至二十六度。出鸦片、绵花、谷、糖、黛青、油、槟榔、玫瑰花露。榜甲拉之南，曰阿勒撒部，地濒海，未开垦，多山林密箐，山民听本宗长领，不服他人。其性蛮，其地饶，江中多毒虫鳄鱼。

榜甲拉之都会，曰甲谷他城，在胡义利河边，恒额河之支流也。北极出地二十二度三十三分，偏东八十八度二十八分。为榜甲拉之大海口，统印度大兵帅所驻。各文武官商，皆居于此。地甚辽阔，城池高固，四方置大炮台。居民甚杂，乃各国所集之大市。舟车辐辏，每年运出货价约三千六百万两。其军士则屯于巴拉破利炮台，距荷兰破利城不远。其城前属大尼国，亦美邑也。居民万三千口，内多回回人，造绉袈裟布。母耳士他城，城在河边，屋宇三万间，居民十六万五千口，多富饶。巴那城，居民三十万，种罂粟，其土人大半回回，性多傲。

半古答，城壮屋美，民多长寿。距此地不远，曰若尼宇城。有佛菩萨庙，印度四方之人，每岁来礼拜者，约十万人。道毙者不少，而僧则愈富足。

东连榜甲拉之亚山地，在云南交界，亦属榜甲拉。长一千二百里，阔自六百里，及百二十里不等。地平坦，巴马布他河支流之下游也。多矿，沿河有金沙。山内产石炭，出米谷。田未开垦者十之八九，多瘴疠。居民由中国迁来者，建屋筑城，其古迹至今尚存。后被缅甸扫荡，而其地难以复兴。居民约三十万，崇佛教。山民尤朴实，与人无诈骗。其居民大半老掌之族，守分务业，藉英国人为保护。

榜甲拉海隅之东为亚拉千地，广袤方圆千八百里，东连缅甸，以高山为界，内多广谷支溪，遇雨涨溢，遍地成湖泽。土极丰腴，宜果木而多瘴。异方人不服水土。海口处处可泊，其鱼繁。林内多象虎。居民二十一万六千名。会城曰亚拉千，古极兴旺，今又有海口之邑，曰脚地，亦通商之处。

亚山之南，尚有各地。草木丛茂，人迹罕到。然居民健勇可用，此地当东印度、缅甸之交界，乃母尼补、甲治、加特比、拉可西亚各土酋所辖，其民野性不驯，统归英人羁縻。

亚甲部，在榜甲拉西北，广袤方圆四千一百八十七里。居民二十万。当诸河下游西南，其山渐高，布那出金刚石。西方多牧场，与高山相连。天气与江浙无异，居民健壮，产麦，多猛兽。东连榜甲拉，西南抵网买、列酋境，北及雪山西刻之地，北极出自二十五及二十八度。内河甚浅，未足灌溉。盛出者绵花、青黛、白糖，居民织粗布，仅足用此地。昔为大蒙古之都，尚有古迹，居民多回回，是为印度之圣城。其都会曰亚拉哈巴城，在恒额河、闰那河会汇之处。居民六万馀口，印度人在此集会烧香。城为蒙古所造，甚坚固，有大军局，又有比那勒城，亦五印度之圣城。四方云集，以拜佛像。婆罗门僧多若蜂聚，其街甚狭，居民二十馀万。每年自远方来敬佛者，不下十万，争向恒额河浴身。回回五分之一，与土民分党，不居城内。

亚甲，居民九万六千，昔系大城，今渐衰矣。内多宫殿古迹，有昔时王后之陵，最壮丽。广通商。又德希城，大蒙古之故都也，居民十五万，旧国王苗裔在此，赖英人之禄以度生。

巴勒里城，居民七万，回回居三分之一。属地曰古摩云，与西藏不远。山林深邃，冬甚冷。物产茂盛，居民不多，田亦褊少。前婆罗门僧再据此地，与西藏通。廓尔加国君于嘉庆十九年据之，后让地于英人。英国贵人，多建别墅。每岁从印度来此，作销夏之会。所驻之地曰新拉，乃印度统帅行馆纳凉之所。且登山以猎熊虎，夏后仍还印度平坦之地。

尼布他，地在尼布地河之两岸。其民未向化，惟伐林木为材料，不用银钱，只以盐糖交易。其平地及谷内，亦有印度人。但地未开垦，所交界之云他瓦地，间有向化之土人，与中国苗蛮无异。

马他拉部，在印度南，广袤方圆六千七百里，居民千四百八十七万。海边有轻沙如盐卤，天气长热，雨则全地皆涨，旱则野无青草。南方高山深林，下汇溪涧，可灌全地。山顶结冰，而谷中暑燠难堪。海边出椰子、绵花，内地产米稻、甘蔗、芝麻。西边地最低，出胡椒、肉豆蔻、米，山溪内多产金沙。其会城同名马答拉，计屋二万七千间，居民四十二万。虽濒海口，而无泊处，船难到岸。各炮台内文官，日间务事，晚则归庄园水榭，以度良夜。其土民所住称黑城，为数甚繁。旁牙罗利城，在内地高原。英军屯驻焉。西令牙巴城，高而坚固，居民三万。英军前此力攻克者也，君巴歌伦。居民三万，有大池，云浴之者可涤诸罪。各信士云集，以祈清洁。亦恒额河所分汇也。

特治那破里城，居民八万，乃土君所驻之都。四方丰盛，多奉耶稣教。曼牙罗利海口，在西方，居民三万。加里屈海口，居民数同。葡萄牙人，初到印度时，即抵此港。在西边为海湾最深入之地，东边无湾可泊。

网买部，广袤方圆三千六百六十五里，居民六百八十八万七千。属此部者非一处，山多而地饶，五谷不足，惟产绵花，每年四分之一运进中国。又出檀香等货，居民多回回。会城与部同名，北极出地十八度五十六分，偏东七十二度五十七分，昔葡萄牙国，以此岛让英人，遂建城邑。初不服水土，今已天气清爽。居民二十三万，住屋二万七百八十六间。中多白头回人，有豪气，博济好施，专务通商。其民皆能讲十九种语音，尤乐与中国人交易。亦与亚拉白西等国贸易。英国船厂在焉，能造最大战舰、商船。苏拉城，亦在海隅。居民六十万口，大半崇印度婆罗门之教。其愚人或以兽牲为圣畜，养之诚谨。古时此处为通商之埠，但海口潮溜甚急，船难近岸。布那乃，内地之城。居民七万，有大书馆焉。此外城邑尚多。

○五印度土君藩属国

此外尚有土君之国，虽未设英官，而系为英国藩属者，今别叙于左。内地有希答巴地，广袤方圆一万零五百里，地高坦出好麦。因其国官吏 削其农，故民甚贫乏。又罕通商，岁费重饷，约七百万两。地大半为爵士所据。其土君昔与英对敌，募兵约八千丁，此嘉庆年间之事。但君既无智能，其臣又奸宄，惟利是图，故英人时时计议，欲取其国焉。其都城居民八万口，内多匪恶。虽有一万二千之英兵屯此，尚时时反侧不安。其附近之峨干他邑，昔曾出珍玉，号为宝库，兹已尽矣。又有澳龙牙巴，居民六万，昔盛今衰。土虽丰产，仅足食用。前代后妃之陵，惟在此者最壮丽。

其毗连此部者，为纳布里。广袤方圆约六千里，多出豆、烟、麦、粟、米，其土君无大权，常以千骑自卫，其都城居民八万。地颇广，屋则土寮，附近此城有英人炮台。

萨他拉等部土君，系马拉他种类，好骑好虏掠，自英人摄权后，悉顺服。地无高山，其民好猎。古城广大，居民罕少。中有圣城，远方云集，焚香礼佛，不远千里。

答文可利部，在南方海边。山水极佳，果木尤可珍，海口古时被荷兰所据。居民一万，大半迁徙别处。内地之米所地，昔有土君，近归英国，亦广大之邦。但居民屡遭困迫，不足以获其益。

西金地，在西藏旁，徧地也，天气甚冷，土酋辖之。

乌地，在榜甲拉之北。土虽丰产，居民甚贫。惟土君之帑常充，都城曰鹿那，居民五十万，英国屯兵在此，时遣大官莅办政务。

本得君地，在西北。半归英权辖，半为各土酋所管，其土无所出。布陂城，小而固，英人尝再攻不破，三次乃陷。破巴系山地，在匿补他河边。民不勤作，惟以武艺为重。

突鹿小地，英人所立，在马拉他族类之中间。

哈甲，系马拉他种类。古时广大，屡扰印度各界。英人降其桀骜，而民以靖。

巴罗他广地，在西北千拜海隅。民以劫盗为生，英人调重兵征服。道光二十四年，复抗拒，再击败之。多印度国之圣迹，居民焚香处也。此际归英国者已大半。

古治，在西北之极。形势斗出，常惧地震，逼近火山。故其地饶，不甚产物。民多野心，约三十五万。惟水手不惮死。会城曰威城，居民三万丁。英军屯驻焉。

拉补坦，亦列君之地，居民有胆略，遇险不惧。印度列国之兵，惟此称武勇。

新蒂地，在印度河边，多丛林，列君射猎处也。道光二十三年，悉为英人所灭。地丰沃，全赖印度河灌溉。一遇亢旱，五谷遂不登。其都曰希答巴，居民二万，屋则土寮。城之固者曰答他城，在平原。列土君藏所劫夺之财帛，约数千万两，今已罄矣。

西刻地，在后藏南。嘉庆年间，伦亚升王所立国也。此君之祖曾取印度及回教二者参合为一，以宇宙万物之主宰为万土之王，尽绝神佛，自为一教。至伦亚升王，募兵攻伐甲布居民，夺加治弥耳等地。且招西国之武官，操练兵法，邻国畏之。于道光十九年，伦薨，干戈并起，其子孙越英藩属境，大肆掳掠。道光二十二年，复侵英藩属地，乘英人不备，一战而胜。英人死者甚多，英军士力拒旬月，始破西刻之

军，直入其国都，于是割地请盟焉。其地长七百六十里，阔百三十里，居民四百万。地多盐，可为药材。每年所掘，约八百万石。南地多卤，不产物。北方丰盛，因官吏勒迫，民甚贫乏。惟专意于武战。与后藏交界，多山岭，遍地江流，乃印度五支江所派也。其都曰拉合，居民八万。内有回回庙，其君常至此纵乐。又有云勒悉城，王所藏库处。莫但城，乃制造丝缎之处，居民四万五千。所属之谷曰加治弥耳，高于海面五百八十丈。所环之峰，最高者约千七百丈。冬夏积雪不消，物产甚多，甲于南北。奈国主酷待其民，故地虽腴，无能兴焉。前时居民八十万，今仅二十万而已。昔大蒙古之君，夏时于此纳凉，为加治弥耳，国之名胜地。居民多为商，与后藏、西藏多年贸易。其都会同名，居民四万。

各国民经营不一，惟英国所营者为富庶。旁甲拉货物，共价银七十万万圆，众务事所收银一千九百万；亚甲货物，共价银三十五万万圆，每年众务事所收者七万万圆；马答拉银十四万万圆，众务事所收者共二万三千六百万圆；网买部货物，价值银万五百万圆，众务事所收者万七千五百万圆。贸易甚大，任百姓自作生计。无苛政管束，故民甘出力，宜其旺相也。人皆善积，各安分乐业，印度地丰盛，但不善灌溉。一旱亢则无禾麦，除五谷豆菜外，遍地种青黛，约五十余万顷。亦产湖丝，种罌粟，每年出鸦片约四万箱。榜甲拉所出者五谷，每年价值银三千三百万两，蜀黍九百万两，豆千六百万两，种子千四百万两，白糖烟棉花等货二千七百余万两，共九千七百七十三万两。合五印度各国所陈田产，统计四万万两。百姓以制造物件为重，不出运卖外国。其细布绸缎之美者，惟西洋每岁买之。外有加治弥耳人织造搭膊布，悉不得运出外国。印度人不知掘矿，故铁、铜、金、玉，必由外国入。道光十七年运入之货，三千四百六十余两，运出者五千三百八十有万余两。现掘河以运货，立银局以便贸易。百姓向愚蠢，英人于此设学馆教民，于是印度人皆事天主。

五印度各属地，有大事必问本国公班衙，乃与英国公同会议，复立议士，会同斟酌。在马答利、网买两部，各调兵帅，共同议士商办，听大帅之命。惟英人能务大事，其土人只任下职而已。若征田赋，亦立乡绅总理钱粮。

国费出入，榜甲拉部入八千一百七十万圆，经费银七千六十二万五千九百圆，所调之军十一万六千。马答拉入银三千一十二万四千圆，经费二千四百二十二万六千圆，军士七万。网买收银千四百万圆，经费千九百七十三万二千圆，军士四万。在旁网两部调水师战舰、火轮船，防范其火轮大船二十只，另建铁船、小火轮船，其守五印度三营者，大半土人。

西洋各国所据五印度地，葡萄牙属地曰峨亚，在西南方，海边港口嘉邑也。地多山，无通路。其田大半能耕，居民五十万，崇天主教三分之二。地门亦海口，昔与中国通商，撒米居民十万。

佛兰西所据东南之偏地，居民二十一万，其都曰本得识理。海边种青黛、甘蔗、桑，亦开学院以教其民焉。

○印度各土君之国

新地亚附近之亚甲，即所称马腊地也，广袤方圆四千七百里，居民四百万有馀口。每年所出之饷，约四百二十万两。其都为吴亚未鹿，居民五万口。鸟音之城，亦坚固，步兵万四千，骑兵一万，有大炮二百五十门。常与英抗。

尼报里国，亦曰廓尔加，印度之北地也。与西藏交界。山峰插天，居民专务佛教，多拉麻僧，惟念经好静。不养父母，一女配数男。山内之民，甚勇猛。曾入贡中国。嘉庆十七年，攻及英界，英人攻战，始让地议和，此时英人尚驻。其都所称甲曼士，居民二万四千。其民互仇战斗，山内各有酋长，自专其地，不听其王之命。产铁、铅、铜等。多印度人，亦有回回族，居住此地。其廓尔加族，即由北方所来之矮人，攻服此地。种类语音不同，教门互异，今尚占据。

布但地与尼报里，皆西藏所连之微地。山上雪冰恒积，多烟瘴。平地出蔬菜果麦，居民善灌溉。敬其老猿为仙兽。百姓面貌似中国，而刚健习劳，信佛敬僧，多修寺院。其转世刺麻，号为活佛。与西藏同俗。亦与旁甲拉通商。其都曰他西苏屯城。此两国均未信救主耶稣之教。

《瀛环志略》曰：余尝见米利坚人所刊地图，五印度共二十馀国，在东者曰孟加拉，曰麦哈尔，曰尼泊尔，曰阿力邑。在北者曰克什米尔，曰勒怀，曰威聊，曰乌纳，曰聂离。在中者曰阿尔各拉阿拉哈板特，曰工洼纳，曰马尔洼。在南者曰甘勒士，曰弥勒尔，曰海特尔拉蛮，曰麻打萨，曰噶纳的，曰孟买。在西者曰尔勒士布他拉，曰阿布尔信。据米人雅裨理云，此系五印度旧部落之名。自英吉利据印度后，有分析，有改革，与此图不同。后见英人所刊五印度图，与米利坚图全不同。地名繁简亦异，地既属英，当就英图立说，以资考核。

塞哥〈（一作悉国，又作西刻）〉，北印度大国，西域称为克什米尔〈（一作加治弥尔，又作加支迷尔，又作夹氏米理里）〉，乃其别部之名〈（其国自古以此部为国名。《新唐书》谓之个失密，又谓之迦湿弥罗，《宋史》谓之迦湿弥勒，元人谓之乞石迷耳，皆克什米尔之转音也）〉，犹尼泊尔之称廓尔喀，浩罕之称安集延也。东北雪山环抱，与后藏西徼毗连。西北隅接西域之札布，西界阿富汗、俾路芝。西南界信地。东西约千里，南北约二千五百里，其地时序和平，山水明秀，沙碛虽多，而田土极沃。农功甚勤，户口约三百万。商贾善于行远，西域、回疆、后藏，处处有之。国旧分左右部，以隆德勤至河为界。河左之西林德部，已降英吉利为属国。余诸部皆在河右，各有酋长，不相统属。乾隆末，劳尔〈（即刺合）〉酋长林日星，兼并河右诸部为一。又逾印度河，割阿富汗数城。继立之王尤雄武，以欧罗

巴人为将，战胜攻取，四邻畏服。道光十九年，王卒，宗孙嗣立。信任谗佞，大柄旁落，国势顿衰。先是英吉利攻灭孟加拉，乘胜胁降诸部，值塞哥两世得贤主，国治兵强，故英人止戈修好。未尝措意，至是昏庸在位，间隙可乘，遂连年大举，深入侵割其疆土过半。其所失为何部，尚未得其详也。国分九部，首曰本若，都城，建于拉维河岸。曰劳尔〈（一作刺合，米图作勒怀）〉，贸易繁盛，为通国大都会。曰固宜斯丹，首城名拉德如尔。曰克什米尔，首城同名。曰著这，首城名亚德各。曰亚萨勒，曰北朝威尔，曰几尔加尔不耳，曰木耳丹，曰勒亚，曰德勒义斯马伊尔汗，曰德拉合西汗，曰巴合瓦尔不耳，首城皆同名〈（道光二十年，粤东译出英人新闻纸，有英军攻阿付颜尼，峨罗斯约木哈腊欲攻阿付颜尼之说，意在争北印度也，二十六年，传闻英人用兵于北印度，有取得西刻之加治弥尔，与后藏接壤，欲赴藏通市之说。西刻即塞哥。加治弥尔即克什米尔。据西人所刻地图，克什米尔在塞哥极北界。英人果割地至此，则已拊塞哥之背，不止丧地实多，抑且危如朝露矣）〉。英吉利印度埔头，孟加拉最盛，孟买次之，麻打拉萨又次之。英吉利本国商船，与欧罗巴诸国之船，每岁往来以数千百计，其税银每岁得千馀万。养兵太多，支销之外，所馀亦无几。

中国之布，从前皆以麻织，自元太祖征印度乃得绵花之种〈（棉花，初称吉具）〉，流传中土，至今衣被九州，功驾桑麻之上。其利溥矣，乃鸦片之毒，亦出于此。五印度诸部，皆产此物，而最多者为马刺他〈（川南滇西，地近印度故有栽种芎粟者）〉，鸦片分两种。成团者为大土，其价昂，聚于孟加拉、麻打拉萨。成片者为小土，其价廉，聚于孟买。五印度货物，惟绵花、鸦片最多。近年竟以鸦片为主，每岁出运数万馀箱，宇宙浮孽之气，乃独钟于佛国，何其怪也。

回疆叶尔羌等城，时有克什米尔、温都斯坦两处之人往来贸易。《西域闻见录》谓两部皆回部大国，由叶尔羌南行六十馀程，至克什米尔，又四十馀程至温都斯坦。以今考之，克什米尔即塞哥，为北印度大国，温都斯坦，则五印度总名。部落既多，西域不能辨识。自克什米尔之外，概称为温都斯坦耳。又云两广、福建之物，往往由温都斯坦，贩至回疆，此无足怪。温都斯坦之孟加拉、孟买皆英吉利大埔头，闽粤之货山积，由两处至回疆，皆商贾通行之熟路，转运固甚便矣。

案：由回疆之叶尔羌、南越博罗，可达后藏。由后藏，越廓尔喀，可达印度。英夷果由印度转贩回疆，未知此以北大雪山葱岭，以及叶尔羌南之大戈壁，皆属陆路，何由得至，岂溯印度河逆流而上与。然究在雪山南也，若用驼马转运，或由冈噶江逆折而西而北，以达回疆与，然不可考矣。

卷二十一

◎中印度各国

《西域闻见录》温都斯坦，亦西域回国之大者也。叶尔羌西南，马行六十馀日，至克食米尔。克食米尔复西南行四十馀日，至温都斯坦。水亦可通，两地贸易之人，多资舟楫，往来不绝。称其王曰汗，其都城雄壮，周围六十馀里，辖大小回城三百七十馀。其人深目、高鼻、多须，目睛黑白，光如琉璃，面黑唇青。言语类鸟鸣，回子亦不能辨。衣敞前襟，头缠花布。厥土黑坟，地极溽暑，瘴疠为害。人有头面生赘疣，引之而长，放之而缩者。地以象耕，服车致远，皆取给于象。有牛马，无驼羊骡驴，不解游牧之事。粳糯粳稻，及瓜果蔬菜，靡不繁植。槟榔、桃榔、棕榈、橘柚，在在成林，冬不凋叶。人习技巧，金漆雕镂，制作精奇。所制玉器，薄如蝉翼。文成如发，抽金银为丝，织绸缎毡布。遍货于西域各国，及各回城。所居穴地深数丈，旁掘土洞为室，室亦绝精，饰以金玉。从无地土起屋，并园亭之事，其城村似旷邈无人烟处也。郭外大泽一，山水秀丽，花木蔚然。居人多携眷乘舟，累月经旬，游于其内。多美酿，尚宴会，必费数百金，亦多载酒泛舟于泽中者。凡其地之公私事务，及一切农工商旅操作交易，皆于夜间为之，日出则伏。国既富庶，风俗奢靡。其地亦有玉山，独少白金，价过黄金也。最贵中国磁器，或有携至其国者，争以白玉盘碗交易而去，惟恐失之。而大黄尤为至宝，以黄金数十倍兑换，盖其地之一切疾病疮疡，得大黄即愈，百不失一。贵客来及大筵宴，皆以大黄代茶。人若经年不服大黄，则必死。故虽贫苦小回，亦必有一半两大黄囊胸前，舌舐而鼻嗅之。其地之江河，皆通海洋。时有闽东海航，到彼停泊，多有以大黄渔利者。两广福建之物，往往有之，或重贩至叶尔羌，转入中国矣。喀什噶尔回子，买得漳绒一端，上有天顺字号，固闽货也。其国西隅有巨泽，围数千里，泽中有山，围逾千里。万峰耸峙，高入云天，或曰人间第一高山也，名曰牵各里麻胆达喇斯。山中产狮子，于秋月皎洁，辄负雏于山中往来。头大而毛虬尾形如帚，黄质黑章如虎皮，长六七丈。时登山绝顶，望月垂涎，咆哮跳掷，猛飞吞月。有飞去八九里、十馀里而坠死山谷中者。其国人以豢养狮子为上户，每当秋月，其汗使人取狮，以金铁作柱，大如瓮，密布层遮，围畜之于其中，饲以牛。时而吼如雷霆，满城震动，人畜不宁。椿园氏曰：乾隆四十年，有温都斯坦之海门达尔游至回疆，予晤其人，面黑唇青，睛如琉璃。据云彼乃其地之白皙者耳。又云其国之西南数万里，有黑白之人，白者如雪，黑者如漆。国在大海之中，得毋即东粤之所谓黑鬼、白鬼者欤。因细谈其地之事甚详，与予向所闻无异。而牵各里麻胆搭拉斯之山，高耸至极，灵迹最著，其即古人所谓日绕之峰欤。顾山虽至高，无出没日月之理，四围皆水，舟楫可通，亦无所谓弱水焉。（案：温都一作痕都，一作兴都，即印度、身毒之转音也。《坤舆图》《职方图》皆作莫卧尔国，盖中印度也。其西北大泽，即所谓里海也。里海中高山，而疑为须弥，陋不足辨）。其地暑而多瘴、多雨，类闽广，水土恶劣之乡。而山有宝，地生毛，故人繁而殷富。惜乎象胥通言，不能尽解其说。所得考核存据者，亦仅参半焉尔。

《万国地理全图集》曰：亚加者，古时中印度之省会，系蒙古印度王之都。殿宇官衙，光曜灿辉。形势在北极出地二十七度十一分，偏东七十七度五十三分。有塔建在平坦，周视九十里。所有居民，大半崇回回教，并不崇拜菩萨。其庙内无偶像，并无烧香，惟念经叩头而已。回回教门之人数百万，在五印度各处居住。昔蒙古军侵国，强令土人弃绝佛像，否则诛死。故此印度多奉其教，至今不绝。其近城有古王之墓，高如叠塔，一周几十丈，焕然齐整。其炮台四面险固，此际邻国咸宁，毫无战衅，故生意复兴。道光十三年，以此地为都会。又亚北得希者，古回回王之京。明嘉靖五年，蒙古汗乘机侵夺，创立大国，历二百三十五年，令五印度列国进贡。乃佞臣结党，变诈蜂出。乾隆二十五年，王懦无能，投降英人。蒙其俸禄，安居本都。但战斗不息，为敌国侵掳。于是英官征逆靖国，宣威回回。王现时驻官无权，惟享虚荣，受英俸禄，足以养宗室而已。其都广大，其殿辽阔，其民各服英权，历年泰平。

◎东印度各国

《海录》乌土国，在暹罗、蓬牙西北，疆域较暹罗更大。由蓬牙陆路行四五日，水路顺风，约二日到佗歪，为乌土属邑，广州人有客于此者。又北行百余里，到媚丽居；又西北行二百余里，到营工；又西行二百余里，到备姑，俱乌土属邑。王都在盎画，由备姑入内河〈（内河即恒河，会大金沙江海口）〉，水行约四十日，方至国都，有城郭宫室。备姑乡中有孔明城，周围皆女墙，参伍错综，莫知其数。相传为武侯南征时所筑，入者往往迷路，不知所出云。北境与云南、缅甸接壤，云南人多在此贸易。衣服饮食，大约与暹罗同。而朴实仁厚，独有太古风。民居多板屋，夜不闭户，无盗贼争斗。国法极宽，有过犯者，罚之而已。重则圈禁，旬日而释。无杀戮扑楚之刑，实南洋中乐国也。男女俱椎髻，婚姻略同中国。死葬于山，不封不树。土产玉、宝石、银、燕窝、鱼翅、犀角、泥油、紫景、儿茶。宝石蓝者为贵，以其难得也。泥油出土中，可以燃灯。紫景亦土中所出，可代印色。自安南至此，乃南洋诸国，沿海俱有鳄鱼。形如壁虎，嗜食人。土番有被鳄吞者，延番僧咒之，垂钓于海，食人者即吞钩而出，其余则不可得也。由备姑西北行，沿海数千里，重山复岭，并无居人，奇禽怪兽，出没号叫。崇岩峭壁间，多古木奇花，所未经睹，舟行约半月方尽，亦海外奇观也。彻第冈，在乌土国大山之北。数十年来，英吉利新辟之地，未有商贾。其风俗土产未详〈（案：此皆印度之东境，即古柯枝国也）〉。

又曰：明呀喇〈（即孟加腊）〉，英吉利所辖地。周围数千里，西南诸番一大都会也，在彻第冈海西岸。由彻第冈渡海，顺东南风，约二日夜可到。陆路则初沿海北行，至海角，转西又南行，然后可至，为日较迟，故来往都由海道。其港口名葛支里港，外沿海千馀里。海水浑浊浅深叵测，外国船至此，不能遽进，必先鸣炮，使土番闻之，请于英吉利，命熟水道者，操小舟到船，为之指示，然后可。土番亦必预度其深浅，以泡志之。泡者截大木数尺，制为榄形，空其中，系之以绳，坠之以

铁，随水道曲折，浮之水面，以为之志，土番谓之泡。每一望远及转折处，则置一泡。然外人终不能测，是殆天险也。港口有炮台，进入内港，行二日许，到交牙炮台。又三四日，到古里噶达。英吉利官军镇明呀喇者治此。有小城，城内唯住官军，商民环处城外。英吉利官吏，及富商家属俱住涨浪居。涨浪居者，城外地名也。楼阁连云，园亭绮布，甲于一国。英吉利居此者万馀人，又有叙跋兵五六万，即明呀里土番也。酋长有三，其大者曰即攸士第，其次曰尼里，又次曰集景，皆命于其王，数年则代。国有大政、大讼、大狱，必三人会议，小事则听属吏处分。其统属文武，总理粮饷一人，谓之辣，亦数年而代。其出入仪仗，较三酋长特甚。前有骑士六人，后有四人，左右各一人。俱穿大红衣，左右二人，装束俱同辣。唯辣所穿衣，当胸绣八卦交为异耳。凡鞫讼，上下俱青衣，唯三酋长两肩有白绒缘头，戴白帽。酋长上坐，客长十人旁坐。客长客商之长也。每会鞫必延客长十人旁坐，欲与众共之也。其狱必金曰是，然后定讞。有一不合，则复鞫，虽再三不以为烦。然怙奢尚利，贿赂公行，徒事文饰，无财不可以为说也。

其土番有数种，一明呀里，一夏里，一巴蓝美。明呀里种较多，而巴蓝美种特富厚。明呀里食牛不食豕，夏里食豕不食牛，巴蓝美则俱不食。富者衣食居处，颇似英吉利，以华丽相尚。贫者家居俱裸体，以小幅布围其腰脐，以掩下体。男女皆然，谓之水幔。无来由番亦多如此，有吉庆，则穿长衣窄袖，其长曳地，用白布二丈缠其头，以油遍涂其身。所居屋，尽涂以牛粪。交易以文螺壳为货贝。娶妻皆童养，夫死鬻发而居。各种不相为婚，男子胸盖数小印，额刺纹，女皆穿鼻带环。巴蓝美死则葬于土，馀俱弃诸水，明呀里间有以火化者。更有伉俪敦笃，夫死跃入火中，以殉者。自此以西，地气渐寒，中国人居此者，可穿夹衣，非若东南洋诸国，四时俱单衣也。土产鸦片、烟硝、牛黄、白糖、棉花、海参、玳瑁、诃子、檀香。鸦片有二种，一为公班，皮色黑，最上；一名巴第古喇，皮色赤，稍次之；皆中华人所谓乌土也。出于明呀喇属邑，地名巴旦拿。其出曼达喇萨者，亦有二种：一名金花红，为上；一名油红，次之。出马喇他及盎几里者，为红皮；出孟买及即杜者，则为白皮。近时入中华最多，其木似婴粟，叶如靛青，子如茄。每根仅结子二三颗，熟时，夜以刀微划其皮，膏液流出。凌晨收之，而浸诸水数刻，然后取出，以物盛之。再取其叶曝干，末之杂揉其中，视叶末多少，以定其成色，叶末半则得膏半，然后捏为团，以叶裹之。子出膏尽，则拔其根，次年再种（案：明呀喇，《海国闻见录》作璿呀，或人又作孟阿拉，或作孟加腊，实皆一地）。

《海国闻见录》：小白头国，东邻璿呀国（一作明呀喇，即今孟加腊也）。璿呀人黑，穿着皆白，类似白头。英机黎、荷兰、佛兰西聚此贸易。璿呀，天竺佛国也。璿呀之东南，远及暹罗。璿呀之南，临海。璿呀之北，接刺麻、西藏及赛马尔丹国属。

《粤商回述》：孟阿拉，地宜种植，百物丛生。终岁南风，并无冬夏。每洋银一圆，值彼处铜钱一百文。白米一升，值彼处铜钱一文。其鸦片烟四季种收，周流不息

。各国夷人，均向彼处收买。每公土一件，价银一圆；白土一包，价银六钱。国王所抽税，每土一件约银二圆。运至中国，每码土，计成本银四圆有奇。从前可卖至八九圆，闻去年中国禁令森严，彼处夷发售甚艰，价亦太贱。每船烟土所售银两，仅敷来往盘费。所获既无大利，各夷均不愿作此鸦片生理。本年夏间，由彼处起程，闻英吉利国王以中国严禁，有传令停止制造之说。

《万国地理全图集》曰：榜葛刺国，东印度也。海口河流疏派，田亩丰盛，物产如山，如糖、硝、棉花、鸦片、靛饼、胡丝、五谷等货。其省会曰甲谷他，在安额河之滨。于北极二十二度二十三分，偏东八十八度二十八分，天下互市之处。康熙七年，英商始建市馆，筑小炮台，屋宇仅七十间。乾隆十七年，土君擅坏其房，囚其人。当时英官报仇，用兵驱逐虐主，总归其管辖焉。都邑广大，居屋如殿，其街直而广，两面高楼，粉白如雪。内有学校、文院各等文艺之馆。男女读书务学，勉为良善。全印度之总帅扎驻甲谷他，管下英国军士三万丁，土军二十三万丁。文官俱幼时来自英国，学习土话，自下升擢，俸禄甚厚，以理地方各事。所建炮台，四围广大，敌军断难取据。深沟高垒，金城汤池，四面险固。水路可通内地各大邑，若水浅流急，用火轮船，牵其河舟，不待风潮，上下不绝。城内财帛不胜数，凡他省及内地富商，皆云赴甲城，以包兑包送。

甲部东势他加城，居民二万丁。百姓立机房，造织细幼布帛。昔总帅扎驻之省会，此时惟见颓墙坏壁。

甲部之西八拿邑，居民稠密。造硝，种罌粟、青黛，田种玫瑰、酴醾，摘花叶，造花露。居民好香扑鼻，常用以调饭洗身。

甲部西南北拿力邑，印度教门中著名之区，谓是地之中心。街衢甚窄，房屋瓦造，高五六层。众生奔驰，如影不绝。居民计六十万丁，据印度人说，菩萨造成，其城以为圣处。信其教者，诣邑烧香，奉拜偶像，以免地狱之罪。又言沐浴其河内者，诸罪一概洗涤，直上天堂，此印度佛教中之恒河也。东印度之东，为缅甸。北印度之东，为廓尔喀，及西刻等国。此数国皆近西藏，贡于中国。近日西刻及廓尔，亦为英吉利驻印度之兵所攻服。故东印度孟加腊已与西藏通互市，惟北印度与鄂罗斯国游牧部相接壤，至今争战未息，盖鄂罗斯亦贪印度鸦片之利尔。

魏源《西藏后记》曰：滇南师范，有言中国赴于竺佛国，亦有两道。一自云南腾越州而南，由缅甸城转西，以至东天竺，凡三千五百里；再至中天竺，又千有一百里，共五千有百里。一自云南丽江而距进藏，至中天竺北界二千里，又千有六百里，而至中天竺，仅三千有二百里视南道经千有九百里，以地望准之，云南之腾越州，正与天竺东南相值。止因其间赤发野人隔之故，一则迂道南行千有七百里，至缅甸然后转西至东天竺，又西北至中天竺檀那国，计三千八百里；一则迂道西行入藏，然后转南亦至檀那，计三千二百里，使能取道野人径直西上，则色田缅甸由藏两迂道

，而自腾越达天竺，不过千有九百里。野夷若入版图，则与天竺境壤相接。昔汉武帝开西南夷，欲由梁州达大夏，伟矣哉。《西藏记》曰：由后藏塞尔地方西南十八程，至宗里；又八日，至白木戎部落。其地北接后藏，西接白布，南至小西天，北界至小西天界。南行十日，至其国都。布尔牙部落始上海船，行半月，至大西天。小西天为东天竺，大西天为中天竺。又曰后藏札什伦布，西南与布鲁克及白布等部交界，白布即赞普。取白布国王女之地布鲁克，即往天竺之路也。又一路由阿里西南二千馀里，入厄纳特珂克，即中天竺。其中藏、前藏，东南则以怒江为界，江以南即猺獠野人。每藏中有死罪，则驱之过江，听野人残之（以上《西藏记》）。然则怒江南岸，逾野夷西境，即布鲁克部，与东天竺近。而怒夷自雍正中内附，岁输皮贡，于腾越界，非不可辟之区，则天竺与中国亦非不可接之境。惟是东天竺即今南洋孟加腊地，久为西洋英吉利所据，专产鸦片烟，流毒中国，诚能募腾越土勇万人，渡江而西南长驱，捣其背腋，通绝域为邻壤，实制西夷之一奇。或曰大金沙江自藏经缅，其入海之口，即东天竺界，其水阔于大江，造舟藏地，顺流建瓴，尤倍捷于陆。然有舟师之便，而又有缅夷之梗，利害亦适相当也。

又，《乾隆征廓尔喀记》：四川、云南之西，为乌斯藏；乌斯藏之西南，为廓尔喀；廓尔喀之西南，为五印度。印度古佛国，在葱岭西南，濒大海，去乌斯藏尚远。或以乌斯藏，即古佛国者，非也。自四川打箭炉，西行二十馀驿，至前藏；四十二驿至中藏；又十二驿至后藏；又十二驿至济陇；又三十驿至石宿堡，为后藏极边地。逾桥而西，则廓尔喀矣。廓尔喀本巴勒布国，旧分叶楞部、布颜部、库木部。于雍正九年各奉金叶表文，贡方物。后三部并吞为一，遂与后藏邻。自古不通中国，其与中国构兵，则自乾隆五十五年，内犯西藏始。初后藏班禅刺麻，以四十六年来朝，祝高宗七旬寿。中外施舍，海溢山积。及班禅卒于京师，资送归藏，其财皆为兄仲巴呼图克图所有，既不布施各寺庙与唐古特之兵，又摈其弟舍玛尔巴为红教，不使分惠。于是舍玛尔巴愤诉廓尔喀，藉商税增额，食盐糴土为词，兴兵闯边，唐古特兵不能御，而朝廷所遣援剿之侍卫巴忠、将军鄂辉成德等，复调兵贿和，阴令西藏堪布等私许岁币万五千金，按兵不战，遽以贼蹙乞降饰奏，而讽廓尔喀酋入贡，受封国王。廓尔喀既侮藐内地，次二藏中岁币复爽约，于是廓尔喀以责负为名，再举深入。后藏札什伦布西南左有曲多江汛，右有彭错岭，峭壁连冈，咽喉天险。贼步卒数千，自聂拉木入，其时蕃汉官兵，若分两路，一扼曲多江汛遏其前，一绕赴彭错岭截其后，则廓尔喀深入无援，可不战溃也。驻藏大臣保泰，一闻贼至，则移班禅于前藏，并请移达赖班禅于西宁，欲以藏地委贼。且札什伦布地负山面江，形势巩固，刺麻数千，乘墉可守以待援，而仲巴呼图克图挈资先逸，刺麻济仲札苍等，复托言卜诸吉祥天母，不宜战，众遂溃。贼大掠札什伦布，全藏大震。尔大喇嘛飞章告急侍卫巴忠，扈驾热河，闻变畏罪，自沉水死。时鄂辉为四川总督，成德为四川将军，因尽以罪委之，谓巴忠解唐古特语，故私议皆其一人所为，已二人不知也。及奉命赴藏剿御，又按程缓进，上知二人不足恃，乃命嘉勇公福康安为将军，超勇公海兰察参赞，调索伦满兵及屯练土兵进讨，其军饷则藏以东，川督孙士毅主之；藏以西驻藏大臣和琳主之；济陇边外，则前川督惠龄主之。贼狃于上年贿和

之役，半运所掠归国，半屯界不去。鄂辉、成德等遂奏贼退，欲即以藏事，上切责不许。

明年二月，将军参赞，由青海至后藏；四月连败其屯界之贼，尽复藏地，六月遂大举深入。恐贼绕袭后路，遣领队大臣成德岱森保，及总兵诸神保各出左右一路，以分贼势。而大军出中路，海兰察将三队为前军，福康安将二队继之，贼据木古拉山，阻水拒险。将军议令护军统领台斐英阿，与贼相持，而大军别趋间道，海兰察绕山后，出贼营之上，福康安由间道合冲贼营，克其木栅石卡数十，追奔至雍野雅。而成德诸神保，亦克铁索桥进会利底。廓夷举国震慑，遣使诣军前乞降，将军参赞严檄斥之。七月再进，六战六捷，杀贼四千，涉贼境七百馀里，将近其国都阳布之地。隔河大山，贼以十营踞山严守，水深山斗绝，山后即其国都也。福康安欲逾桥攻之，海兰察力持不可，福康安自引兵渡桥仰攻，果不利，赖海兰察接应退贼。方是时其国境南邻印度之地，久为英吉利属国，与廓夷积衅。闻廓夷受兵于中国，则亦出兵攻其边鄙，廓夷两支强大敌，汹惧无计。且恐我军闻而气奋也，再遣人诣军，卑词哀乞。将军参赞，议以贼境益险，而逾八月，即大雪封山，不可老师，乃允其降，尽献还所掠藏中财宝，及塔顶金册印，归前被执之丹津班珠尔等，并献沙玛尔巴之尸，贡驯象番马工乐，请永遵约束，班师。

上本欲俟事平，裂其土授诸土司，而酬福康安以郡王爵。及闻已受降，乃允其请，留番兵三千，汉蒙古兵一千，戍藏，是为官兵驻藏之始。后藏至廓尔喀，故有孔道，贼严守之，故我师觅间道入，其峭绝处，左壁右湍，不容一骑，将军参赞亦时步进，故所贡象，竟不能达。而乌拉岭，上下百二十里，必穷一日之力逾之，稍昏黑，即不能觅路，且有雪城若门洞，深数十丈，人往来者不敢语，否辄有雪，大如屋压而殛之。廓尔喀寇藏时，运资归国者二千人，过岭冻死殆尽。盖葱岭之南脊，天所以限中西也。险倍金川，远逾回部，为汉唐兵力所未至。幸其士卒皆跣足，每战仿古法，先约期而后交绥，我军不顾，辄先发掩袭，往往猝为我乘。自大创以后，至今贡献不绝。其国西南，与五印度相邻。其南海号印度海，近日印度之孟加腊，及孟买等国，为西洋英吉利所据。乾隆六十年，英吉利使臣入贡，自言前岁大将军率兵至西藏西南之的密部落时，彼国兵船亦曾相助，倘嗣后有需用西洋兵者，情愿效力。朝廷始知前此廓尔喀之役，其南界亦有边警外患也。道光二十年，英吉利夷人入寇粤浙，廓尔喀亦遣人禀驻藏大臣，言小国与里底所属披楞相邻，每受其侮，今闻里底与京属构兵，京属屡胜，臣愿率所部往攻底里属地，以助天讨。时驻藏大臣，未知所称里底即英吉利，所称京属即谓中国之广东省，所称披楞属地，即印度。答以蛮触相攻，天朝向不过问，却之。盖英吉利国都虽远在大西洋，而其属国印度则与廓尔喀接壤，世仇构衅，故我攻廓，则英夷乘之，我攻英，则廓夷亦愿助之云。

臣源曰：廓尔喀界西藏，及东印度，摄两强敌之间，然内贡中国，而不贡印度夷。近日英夷西与鄂罗斯构兵，东与中国结衅，故廓尔喀欲乘两大国之势以攻印度。云

印度地产鸦片烟，英吉利关税岁入千万计，其兵船入犯中国者，十九皆孟加腊之人，诚能听廓夷出兵之请，奖其忠顺，扰彼腴疆，捣其空虚，牵其内顾，使西夷失富强之业，成狼狈之势，亦海内奇烈也。鄂罗斯地袤二万里，与中国首尾相接，地大兵强，西洋所畏。其与我互市之地，则有陆而无海，英夷之与我互市，则又有海而无陆。近日鄂罗斯屡与英夷争鞑里之地，其地横互南洋，鄂罗斯得之，则可以图并印度，故与英夷连年血战〈（雍正五年，俄罗斯攻取西藏西南五千里之务鲁木，以地尚佛教，遣人至中国学刺麻，当即与廓尔喀相近之地）〉。若能许鄂罗斯海舶赴粤贸易，连络弥利坚、佛兰西等国，皆英夷仇敌，则英夷之兵船不敢舍其境而远犯中国〈（英夷在印度，大兵船止百艘，以其半入寇中国，其余皆分守各境，不敢远离，恐他国乘其虚也）〉。夫以夷攻夷之效，咫尺者视为迂图。乾隆嘉庆间，一封暹罗，遂足以西制缅甸，东制安南。善奕者或一间著而全局皆生，况以宅中驭外之势，制仇衅四结之夷哉。

卷二十二

◎北印度各国

《一统志》：巴勒提，在博洛尔南，痕都斯坦东与之接境，贡道由回部，汉唐罽宾近东地也〈（当为唐《西域记》之毕迦试国）〉群山近接，中有长河。有土伯特牝穆巴、克什米尔诸地〈（分两部落，酋长默默帕尔及乌苏完分统之。各有众八千余人，旧在叶尔羌贸易。乾隆二十五年内附）〉。

《西域见闻录》：克什米尔回子，一大国也〈（案：《宋史》曰迦湿弥勒国，元《经世地理图》曰乞石迷耳，英夷地图曰夹氏米里，皆字异音同）〉。叶尔羌西南马行六十馀日，可至其国。中隔一冰山，人畜至此，须土人驼牵而过，其险甚于木素达板。其人深目、高鼻、黄睛、多须，衣圆领窄袖，无发辫，饮食尤多禁忌，礼拜尤虔。语言强半可通，称其君曰汗。所属回众，近百户，城池周三十馀里。椿园氏曰：嘉峪关外多流沙，间有水泉沙石，兀突怪恶，不生草木，至克什米尔以西以南，时既清，权，山川秀丽，别有天地矣。而温都斯坦各国极热，多雨，无霜雪，一切飞潜动植，与中国之闽广无异，岂以其近海之故欤。人习工巧，制造诡异〈（案：此所云克什弥尔之冰出即唐玄奘《西域记》北印度之大雪山也）〉。

《皇清四裔考》曰：爱乌罕，在巴达克山西南，部落最大。汉书西逾葱岭，有北道，北道出大宛，南道出大月氏，此当为大月氏地。有三大城，曰喀奔，曰堪达哈尔，曰默沙特喀奔城。南北西面山，东面平旷。堪达哈尔城，四面俱山，其汗爱哈默特沙居之。默沙特城，旧属伊兰，爱哈默特沙征取之，统治三城。事耕种，无游牧。胜兵十五万，军器鸟枪腰刀之属，无弓矢。善田作，户有馀粮，少物采。自兼并温都斯坦部后，资其金丝缎匹，物力加丰。亦有奄竖，多取诸温都斯坦。商人不至其国。乾隆二十四年，大兵逐霍集占，将入爱乌罕境，为巴达克山酋素尔坦沙擒献。其属下有奔爱乌罕者，唆其兴师问罪于巴达克山。素尔坦沙惧，遣使具言诸不得已状。爱哈默特沙云：大清国地广人稠，见于记载，未知道路远近，今拟与尔部偕往投诚，遂屡贡焉〈（案：爱乌罕亦作阿布额尼，亦作甲布尔）〉。所属阿拉克巴、拉斯阿尔、杂拜延，旧隶伊闲。由喀奔至堪达哈尔，二十八程；由堪达哈尔至默沙特，二十程。北接布哈尔，西有默克札志尔等数部落，中隔沙漠，过此为西海，南有思布部落，过思布亦海也。〈（案西海皆里海，非地中海也。）〉

《地理备考》曰：阿附千国，即加布尔，在亚细亚州之中，印度之西北。北极出地二十八度起，至三十六度止；经线自东五十七度起，至七十度止。东至塞哥国，西连白尔西亚国，南接北罗吉国，北界达尔给国。长三千二百馀里，宽约二千里，地面积方约十五万二千七百馀里，烟户四兆二亿口。本国地势，东南西南，平原坦阔，其余各方，峻岭重叠。湖河甚少，河之长者惟一，名曰印度河，又名心德河。湖之大者有二，一名卢克湖，一名乌勒尔湖。其田土西方则硗瘠过半，沙漠无垠；馀

方则陇亩腴腴，谷果丰盛。土产铁、锡、矾盐、窝宅、硃砂、硫磺、烟叶、绵花、阿魏、青黛、丹参、甘蔗、地毡等物。地气互异，冷热俱极。王位相传，长幼皆得，临御诸臣公举，惟贤继立。所奉之教，乃回教也。技艺庸陋，贸易平常。商贾负贩，结队而行。粤稽本国，来历渺茫。明武宗正德元年，有巴卑尔者，既获加布尔济斯尼、干达尔等处，遂即位称汗，历传二百馀载。康熙五十九年，复取白尔西亚国，归于一统。越十七载，白尔西亚国君那的尔沙，兴师击逐，反取本国。迨薨后，本国复兴，自为一国，时君名亚美里沙。乾隆四十五年，传至塞曼沙者，被弟马慕篡逐。以后纲纪败坏，国乱民变。越十馀载，塞哥国劳尔地酋长林日星者，乘机侵占。其兼摄诸地，亦皆背叛。惟阿付千、西斯丹等处尚存。现改九部：一名加布尔，乃本国都也。建于平原之中，街市繁华，风景美丽。一名罗各曼，一名日刺拉巴，一名合斯那，一名西维，一名千达合尔，一名发来，一名都札克，一名伊隆达尔。其通商冲繁之地，曰加布尔，曰千达合尔，曰合斯那。

案：又名阿付颜尼，即爱乌罕之转音也。

《外国史略》曰：甲布国，或曰押安国，或曰加布额尼，前属白西亚国及北路治。北及西域游牧部，东及五印度，西连白西国。广袤方圆万六千里，居民千四百万。多山谷，故气候土产皆异。在印度界内，惟此地无深渊大河，山顶积雪不消，而山内极热。地肥饶不一，百姓稀少，农夫有五等，每年二收。多麦，产油并阿魏，多驼及绵羊，犬善走，猫亦美，鹰能捉鹿。民朴实，有仇必报，百年不忘。耻买卖，不肯家居，以持械争战为要务。山峡甚多，有外人入之，即绝其归路，故敌国不敢侵，而屡伐他国获胜。尝据五印度地，后为白西国所服，降为藩属。道光十七年，俄罗斯国怂恿其民畔白西，复动干戈。而白西国王率兵围其北界之黑腊城，于是甲布别立新主，调兵以拒退白西国。道光二十一年冬，土民乘冬冻，攻击英兵。英兵乏衣食，多毙者。次年英兵攻之，仍令前王摄权，地始安静。

其都曰加布额尼，城甚坚固，英人破之。千他哈亦交界之城，街广而直，城长而方。民多甲布之族，与白西国所属之黑腊国交界。其国君每驻此，与白西国有隙。地丰盛，民壮健。

哈萨克甲布两地之间，有地曰甲非勒坦山地，奉佛教，与附近甲布之回人交战，族类甚多，地狭险，多岩居，出葡萄、南果，民美丰姿，但未向化。因在岩内负固，回族亦难侮之。无王无君，惟听命于长老，好饮酒，面白，每将其女卖与回人为奴。最轻忽无信，若非山岩险固，久为他国降服矣。

《外国史略》曰：北路治地，南及印度地，北连甲布，东及英藩属地，西连白西亚国。广袤方圆九千一百五十四里，居民二百七十万，地分五部：曰撒拉文，曰云他瓦，曰以哈拉文，曰路士古地。天气殊异，高峰夏亦雪积，平地则热甚，野长六十五里，阔四十里。东多山，高者八百丈。有金、银、铜、锡、铁、铅等矿，出绵花

、五谷、青黛。居民分两族，多游牧，颇诚实，喜接旅客。亦有印度白西人，其宗派各有本酋，不相合驻。其拉之地，每年征饷二十五万圆，兵四千。有战则召募民壮至三万五千之多，曾进贡于甲布国，此地形势，未经详察。

案：俾路芝南滨印度海，西北接巴社，居爱乌罕之南，西恒河迤西也。

《地理备考》曰：黑拉德国，又名东哥罗三，在亚细亚州之中，印度之北。北极出地三十三度起，至三十六度止；经线自东五十八度起，至六十五度止。东南界阿付干国，西连白尔西亚国，北接达尔给斯丹国。长约一千五百里，宽约七百里，地面积方约八万里，烟户一兆五亿口。地势崭岩，冈岭络绎，湖河甚少，田亩肥饶，谷果丰稔，草木纷繁，牲畜充刃。土产铁、丝、麻、烟、阿魏、绵花、香料、药材、鸦片等物，地气温和。王位世袭，所奉之教乃回教也。技艺精良，商贾辐辏。通国分为三部：一名黑拉德，乃国都也，建于平原之中，昔甚富丽，今稍凌替。一名夏般，一名巴米昂。

《瀛环志略》曰：阿富汗，波斯东境。明时裂波斯数城，自立为国。前此固统于波斯，别无名号也。世多传其兼并温都斯坦，今考温都斯坦，乃五印度总名。与阿富汗为邻者，为北印度之塞哥国。两国本以印度河为界，阿富汗尝逾河而割塞歌之西境。迨后塞歌亦逾河而割阿富汗之东境。所谓疆场之邑，一彼一此者耳。《西域闻见录》谓敖罕与温都斯坦，地界毗连，各以威力相制，迭为强弱。今考与温都斯坦为邻者，阿富汗之外，别无敖罕国名。盖阿富汗一作爱乌罕，爱乌合音近敖，遂误以爱乌罕为敖罕。而安集延之浩罕，都城亦称敖罕〈（一作豪罕，又作霍罕）〉，论者遂以此讥椿园之谬妄，谓其移极北之回部于南方，实则转音之淆讹，而不足深訾也。又《闻见录》云，敖罕之人，种类不一，有与内地回子相似者，有与安集延相似者，有与土尔扈特相似者，有毛发拳曲，与俄罗斯相似者。又一种人亦回子衣帽，须绕颊如猬，而赤染以茜，其人多力善用木矛，西域人多畏之。又一种人圆领大袖，衣冠类汉唐，貌清奇似朝鲜，人或谓是后汉之遗种云。又云敖罕西域之大国，亦西域之乱邦。诈力相尚，日日皆逐鹿之势，盖自古而然。馀考西洋人地图，阿富汗境土纵横，皆不过三千里，幅员既无莫大之势，种族安得如许之繁，盖其国本波斯所分，迨后由分而合，复由合而分，西域不知波斯国名，遂以波斯各部种类，并归之阿富汗耳。泰西人亦称波斯客籍，流寓种类甚多，语音不一。有额力西者〈（即西腊）〉，有阿丹者〈（即阿刺伯）〉，有罗马者，有土鲁机者，正与《闻见录》所云相合。至两国再合再分，兵争数起，又复时时内讧，迭相篡夺，所云日日皆逐鹿之势，殆不虚也。

俾路芝〈（密罗既，北罗吉，忽鲁谟斯，思布）〉在阿富汗之南，亦回部也。东接西印度，西接波斯，南临印度海，东西约一千七八百里，南北约六七百里。冈{白大}重叠，沙磧广莫，田土甚瘠，仅敷耕食，时序和平，物产与阿富汗略同。国无王，分六部：曰萨拉弯，曰加支干达瓦，曰倭拉弯，曰卢斯，曰美加兰，曰古义斯丹。

六部各有酋长，国小而强，习于攻战，与英吉利所属之印度西部，时时构兵，互有胜负。

按：俾路芝立国，不知所自始。明初郑和等使西洋，乃有忽鲁谟斯国名，今四裔考》之思布，皆指俾路芝也。

《地理备考》曰：北罗吉国，一作比路治国，亚细亚州之中，印度之西。北极出地二十五度起，至三十度止；经线自东五十八度起，至六十七度止。东至塞哥、新的亚二国，西连白尔西亚国，南接舛曼海湾，北界阿付干国。长约一千馀里，宽约六百二十里，地面积方约十万馀里，烟户三兆馀口。本国地势，冈陵重叠，沙漠广阔。湖河甚小，逢夏略涸。田土颇瘠，树林稀疏。五谷百果，仅敷所需。各种鸟兽，罔不充刃。土产金、银、铜、铁、锡、铅、矾、砒、窝宅、硫磺、硃砂、花石、茜草、绵花等物。地气温和，四季相适。至于朝纲，诸酋统辖，各分部落。所奉之教，乃回教也。技艺庸拙，贸易清淡，通国分为六部：曰萨拉湾，曰加支干达瓦，曰倭拉湾，曰卢斯，曰美加兰，曰古义斯丹。

《地球图说》：皮路直坦国，一作比路斯，其酋亦号士丹，犹痕都之号斯坦也。东界天竺国，南界亚拉北亚海，西界白耳西亚国，北界亚加业坦国。其百姓约有二百万之数，都城名基拉，城内民二万。半述释教，半述回回教。其风俗亦有不善，遇财即劫。多居穹帐，少瓦屋，人尚规矩，又有不居于帐篷者，即不良之徒也。嘉庆年间，本与亚加业坦国为一国，后各自分析立主。国内有极大之旷野，有极峻之高山，故少膏腴，惟牧羊马。

《地球图说》：亚加业坦国，东界天竺国，南界皮路直坦国，西界白耳西亚国，北界大布加利亚国。其百姓约有五百七十万之数，皆半述释教，半述回回教，以牧羊马为生。南有旷野，东南北复有高山，惟中央平坦。人民之状，与皮路直坦国相似。风俗亦无异，惜其民心不睦，时相矛盾。国王失柄，不从其令。心惟愚拙，何异天竺之民也。

《地理备考》曰：布丹国，一名廓尔喀国，在亚细亚州印度西藏二国之间。其国土自北极出地二十六度二十分起，至二十九度止；经线自东八十六度十分起，至九十二度五十五分止。东至亚桑国，西连阿付干国，南接榜加刺地方，北界西藏国。长约一千六百里，宽约七百里。山陵叠起，人烟稠密。田土肥饶，湖河润泽，五谷百果，鸟兽草木，靡弗蕃衍。绵花、大黄、黑金、纹石，宝为丰盛。地气温和。所奉之教，乃黄衣释教。人民黽勉，贸易兴隆，通国分为二大部：一曰德白拉乍，乃国都也，一曰比斯尼。

《俄罗斯与印度构兵记》曰：印度海与后藏，缅甸曰邻廓尔喀介其中，其孟阿腊，东印度也；孟迈，南印度也；其温都斯坦，中印度也。温都，一作兴都，一作痕

都，即印度之转音）〉；克阿弥尔，古罽宾，爱乌罕，古大月氏，北印度也。印度河两岸，巴社各回国，西印度也。皆在葱岭西，南接中国西域。近日英吉利自称管理五印度，盖惟北西印度，未全为所据。其东南中三印度，则几尽并之矣。然康熙雍正间，英夷仅据孟阿腊、孟迈二埠，未窥印度全境。而俄罗斯方与普鲁社构兵，亦未南牧。葱岭西、地中海东，皆统于天方之回教。乾隆中，西域甫平，温都斯坦尚与巴达克山构兵，旋为爱乌罕所并。嘉庆以来，俄罗斯由黄海攻服黑海各部，又沿里海南侵；英夷亦并温都斯坦，溯恒河北上。于是葱岭西除布哈尔、爱乌罕诸大国外，凡里海游牧回部号鞑鞑里者，皆并于俄罗斯。夹恒河及南洋之城郭回国半属于英吉利〈（里海，即加士比唵海，近于咸海，亦名北高海。《明史》谓游牧之蒙古曰鞑鞑，西洋人谓游牧之回部曰鞑鞑，皆音近）〉。英吉利及俄罗斯二境中，所隔数国，则爱乌罕为大，或称阿付颜尼，或曰甲布尔。道光十九年，爱乌罕与沙苏野相攻，沙苏野酋求救于英夷。英吉利遂起印度各部落之兵，并力攻破爱乌罕。爱乌罕之酋亦走诉于俄罗斯，俄罗斯复起驻防鞑鞑之兵，南攻巴社，取机洼，取木哈腊，欲恢复爱乌罕故地，以直攻印度。英吉利兵据险力拒，于是英俄二边境，仅隔兴都哥士一大山，而血战无虚日矣〈（兴都，即印度二字音转。其山界北中二印度之间）〉。爱乌罕国及沙苏野部落，皆在是山之南，机洼及木哈腊，皆在是山之北。而沙苏野之部落，亦有轶出山北者，是为英鄂交恶之由与交兵之界。沙苏野王以道光十八年，为爱乌罕所破走，投援印度。时英吉利镇守印度之大兵帅曰□□□，副兵帅曰沙机尼，遂于十九年七月，起孟阿腊、孟迈、温都斯坦三部之兵，使沙机尼将之，而沙苏野酋，自以所部兵乡导。时爱乌罕酋，自都于加模尔城。遣其次子，以兵三千五百，守牙尼士城；长子以兵数千，守加布尔城。牙尼士城本险固，于其城门前，复增重濠重墙，守御甚固。英吉利军先营近郊诱战不出，乃督马炮军、骆驼炮军、步炮军，三路进攻〈（此三军谓以马负炮，以骆驼负炮，以人扛炮也）〉。又开天炮击之，天炮者，仰空发炮飞堕城中，遂逼城而营，并以兵扼加布尔援军之路。爱乌罕之酋遣其长子，领千五百骑，步兵三千，由加布尔城赴援，夹攻后路，为沙苏野部兵击退。次日遂会各营，专攻城门，更番迭进。城内兵亦死力鏖战，既而天炮从空而下，城中震兢，争溃遁，凡二昼夜拔其城，擒其次子，乘胜两路进攻加布尔城。爱乌罕之酋，同其长子，率兵万有三千，守格麻关，而军士夺气，望风解体，父子率三百骑走保麻缅，弃刍糗、火炮、辎械山积，英吉利遂据二城，遣沙苏野王复国，酌留欧罗巴兵、温都斯坦兵、及爱乌罕新降兵，助守其地。此英夷侵北印度之事也。爱乌罕既遁，麻缅则遣使乞师于鄂罗斯，鄂罗斯镇守鞑鞑里之兵帅，久艳东南印度之富，特隔于各回部，至是乘各部自哄，谋由巴社以图印度。巴社者，回回祖国，即来粤贸易之白头番，所谓港脚者也。小白头为温都斯坦，大白头为巴社。巴社虽不属英吉利，而与英吉利睦，故英帅律屋兰者，以兵助巴社拒之。鄂罗斯复以收逃奴为名，袭破机洼，及木哈腊二回部。又攻取沙苏野所属三部之在兴都哥士山北者，遂驻兵荷萨士河，与英吉利中印度接界，并使人习印度法律言语，又购木哈腊人乡导，无一日忘印度。而英吉利亦严兵爱乌罕为备。议还旧酋于故地，以息外构而增藩蔽。议未定，而广东事起，是时，钦差大臣赴广东禁鸦烟，罢互市，声其罪恶，布告诸国。其佛兰西、弥利坚，仇英夷者咸称快。廓尔喀亦

白驻藏大臣，愿率所部收东印度〈（姚莹《康纪行》：廓尔喀为我全藏藩篱，而与英吉利有隙。道光十八、九年，英吉利初扰广东，廓尔喀求助之，往攻第里八察。大臣不知第里八察即孟加拉也，不许。及英夷大扰江浙，廓尔喀自以兵乘虚攻之，大有破获。英夷回救不及，乃以所得中国银百万赎其俘千人以和）〉，鄂罗斯使臣亦自比革尔国都起程赴阙，约中国由缅甸西藏夹攻印度。事虽未行，而英夷则惴惴，甚或欲乘鄂国使臣未至，速行入寇。或料中国疑鄂罗斯更甚于疑他国，未必遽信其言。然南洋西洋闻罢市之信，各埠茶叶、大黄已不肯售，踊贵价倍。而英夷国中缴烟价，罢关税，各缺银千馀万员，诸银肆复不出贷，价复翔贵。借贷邻国数百万充兵饷，而弥利坚、佛兰西先后在粤请助兵船，为中国效力者，屡见于粤中督抚及将军章奏，事则可征也；时则可乘也。前廓尔喀记中以夷攻夷之议，尚或迂之而不察，故复述是篇，而以澳门探报附其后。

臣源曰：由近事溯之，乾隆则准酋阿睦尔萨纳之来投请兵也，盈廷喙拒，独高宗排群议用之，遂一戎衣而定伊犁矣。土尔扈特之弃鄂罗斯来附也，盈廷喙拒，独高宗排群议受之，并移檄鄂罗斯，剖明曲直，卒尽臣瓦剌四大部矣。由远事溯之，康熙则俄罗斯所部东逼黑龙江，圣祖附书荷兰，转达鄂汗，海道往还，半载得报，遂扩索伦地数千里矣。准噶尔请授兵六万于鄂罗斯，圣祖移书宣示利害，绝其纠约，噶尔丹败无可投，卒溃窜死矣。圣祖筹运于廊庙之间，而指麾使于数万里之外，岂不在识夷情，洞敌势哉。西藏一陷于准噶尔，再陷于廓尔喀，彼时氛恶焰炽，孰不畏道远劳师，而两朝深维利害，不惜深入挾伐，恢域犁庭，是以北摄准夷，西震印度。弈世而后，尚有愿效驰驱之廓夷，夹攻印度之鄂部，请助海艘之岛国，待我驱策，同我敌忾，故曰天下有道，守在四夷，此击则彼应，威立则令行，事会之来，间不容发哉。

○附澳门月报〈（即所谓新闻纸）〉

道光二十年七月，澳门接印度五月十四日来信〈（即中国四月十三日）〉，论及鄂罗斯欲攻打印度之事。盖我英国之印度兵，攻取兴都哥士山〈（近巴社国）〉南边各部落，而鄂罗斯边境，在此山之北。三年前，尚有回回四五国亘隔英吉利与鄂罗斯属国之间，各远数百里，今止隔一大山而已。鄂罗斯近日直攻至鞑鞑里之机洼〈（鞑鞑里，谓游牧回部，如哈萨克、布鲁特之类，东起葱岭，西至里海，南界印度，北界鄂罗斯，皆是也。机洼乃鞑鞑里南方部落）〉，皆因我等攻取阿付颜尼部〈（此部原属巴社，今为英吉利所据，在印皮之西，巴社之东北，鞑鞑里之南）〉，故鄂罗人亦攻至荷萨土河〈（鞑鞑里，地近机洼）〉，已约木哈腊〈（亦鞑鞑里南方部落，近阿付颜尼）〉，同取阿付颜尼部，以攻打印度，为我英国兵头沙阿力山及马约里治堵御，故计不行。鄂罗斯前在希腊〈（巴社国东方部落，近阿付颜尼）〉，与巴社人立约，欲收服阿付颜尼，以攻取印度，亦因我兵头律屋兰所拒〈（巴社，即白头回国，南抵海，西界都鲁机，北界鞑鞑里）〉。后诡称收回逃散奴仆，突攻取机洼，及木哈腊。人皆谓鄂罗斯既得此二地，当必退兵。乃又日日使人学习

印度事务，又与木哈腊人立约，同取阿付颜尼，不知鄂罗斯人要到何地方肯住手。现闻鄂罗斯使者，已自比特革起程，由鞑里到中国〈（此鞑里谓廓尔喀蒙古，盖凡各游牧部皆谓之鞑也）〉，必怂恿中国人与英国人争斗，并欲得北京出谕，与缅甸人使引来攻击。不知何时使臣能到得北京，我等切不可闭目不理。鄂罗斯人曾以兵威自黄海攻至黑海一带地方，以广其国境，所以今日必要堤防，其在荷萨士河驻扎之兵，前来攻击。倘我将阿付颜尼防兵撤回，则鄂罗斯人必带领木哈腊之兵，同攻阿付颜尼矣。我等今年若将阿付颜尼王复立于加模尔城〈（阿付颜尼旧部）〉，即应带兵过兴都哥士大山，取回沙苏野所失去之三部落〈（一曰袞都斯，一曰麻尔格，一曰模特散，皆在阿付颜尼之北，木哈腊之南）〉。然我兵到彼，必定遇鄂罗斯兵与木哈腊兵，约会夹攻我兵。我兵恐即扰乱而回，亦或与鄂罗斯人相持，大抵英鄂二国，在阿细亚洲交战之事，不久即至。我等宜先预备出兵矣。

○南印度各国

南印度地，毗连印度海，地形如箕。海中东南一岛，名曰锡兰，东南西三面距海，北距中印度，西为孟迈〈（一作孟买）〉。孟迈之西，海中有岛，曰槟榔屿，即新埠也。其余小岛星布，皆无大于此者。

《海国闻见录》曰：小白头南入于海之地，曰戈什峡，东西南三面皆临大海，为大西洋各国市埠所环据。戈什峡东面沿海地名有三：曰网礁腊，则英机黎埔头也；曰房低者里，则佛兰西埔头也；曰泥颜八达；则荷兰埔头也。其西面沿海地名有二：曰苏喇，曰网买，则英机黎埔头，其地俱红毛所建置。此外又悬一岛，曰西仑大珠，即锡兰山也，此皆南天竺地。

《海录》曼达喇萨，在明呀喇西少南，由葛支里沿海陆行约二十馀日，水路顺东风约五六日，俱英吉利所辖地。至此别为一都会，有城郭，英吉利居此者，亦有万人，叙跋兵二三万。此地客商，多阿里敏番，即来粤东戴三角帽者是也。土番名雪那里，风俗与明呀哩略同。土产珊瑚、珍珠、钻石、银铜、绵花、诃子、乳香、没药、鸦片、鱼翅、玃、梭豸，梭豸形如小洋狗。又有金边洋布，价极贵，一匹有值洋银八十枚者，内山为晓包补番。晓包补者，犹华言大也，本回回种类。其间国名甚多，疆域不过数百里。所织布极精细，大西洋各国番多用之。

笨支里，在曼达喇萨西南，为佛郎机所辖地。由曼达喇萨陆行约四五日，水行约日馀即到。土产海参、鱼翅、诃子、棉花、玃、梭豸，内山亦属晓包补。

尼古叭当国，在笨支里西岭界中。疆域甚小，土番名耀亚。

西岭在笨支里少北，又名古鲁慕，由笨支里水路约六七日，陆路约二旬可到，为荷兰所辖地。土番名高车子，风俗与明呀哩略同。内山为乃弩王国，土产海参、鱼翅

、棉花、苏合油。海参生海中石上，其下有肉盘，盘中生短蒂，蒂末即生海参。或黑或赤，各肖其盘之色，竖立海水中，随潮摇动，盘边三面生三须，各长数尺，浮沉水面，采者以钩断其蒂，捞起剖之，去其秽，煮熟，然后以火焙干。各国俱有，唯大西洋诸国不产。

达冷莽柯国，在西岭西北，顺东南风约二三日可到。疆域甚小，民极贫穷。然性颇淳良，风俗与上略同。属邑有地名珈补者，西洋客商皆居此。土产海参、鱼翅、龙涎、香诃子。

亚英加，在加补西北，顺风约五六日可到。为英吉利所辖地，土番风俗与上略同。土产棉花、燕窝、椰子、诃子。又曰固贞，在亚英加西北，水路顺风约日馀可到，为荷兰所辖地。土番风俗与上略同。内山为晏得尼加国，实回回种类。土产乳香、没药、鱼翅、棉花、椰子、苏合油、血竭、砂仁、诃子、大枫子。

隔沥骨底国，在固贞北少西，水路顺风约二日可到，陆路亦通。风俗与上同。土产胡椒、棉花、椰子，俱运至固贞售卖。内山仍属晏得尼加。

马英，在隔沥骨底北少西，水路顺风约二日可到，为佛郎机所辖地。土产风俗与上略同。内山亦属晏得尼加。达拉赭，在马英西北，陆路相去约数十里，为英吉利所辖地。土番风俗亦与上同。土产胡椒、海参、鱼翅、淡菜。内山仍属晏得尼加。

马喇他国〈（此与孟加腊音近地异，此南印度，彼东印度也。毋混为一）〉，在达拉赭西，疆域自东南至西北长数千里。沿海边地分为三国，一小葡萄，一孟婆罗，一麻伦尼。为回回种类，凡拜庙，庙中不设主像，唯于地上作三级，取各花办，遍撒其上，群向而拜。或中间立一木椎，每月初三，各于所居门外，向月念经，合掌跪拜稽首。土产棉花、胡椒、鱼翅、鸦片。

小葡萄，在马喇他东南，沿海边界，由达拉赭向北少西行，经马喇他境，约六七日到此。为葡萄亚国所辖地。疆域约数百里，土番奉蛇为神，婚嫁与明呀里同，死则葬于土。每年五月男女俱浴于河，延番僧坐河边，女人将起，必以两手掬水洗僧足，僧则念咒取水赝女面，然后穿衣起。又有苏都鲁番、察里多番、古鲁米番三种，多孟婆罗国人，西洋人取以为兵。西洋人居此者有二万人。土产檀香、鱼翅、珊瑚、犀角、象牙、鲍鱼。尝有西洋太医院，随船至此。闻其妻死，特遣土番赍札回大西洋祖家，请于国王，以半俸给其家养儿女。是知此地亦有陆路可通大西洋也。

孟婆罗国，在小葡萄北山中，由小西洋水路顺风，约日馀可至国境，王都在山中，以竹为城。疆域亦数百里，风俗与小西洋同。土产檀香、犀角。

麻伦尼国，在孟婆罗北，水路顺风约日馀可到。疆域风俗与孟婆罗同。土产海参、

鱼翅、鲍鱼。二国所产货物，多运至小西洋埔头售卖。

盎几里国，在麻伦尼北少西，水路顺风一二日可到。疆域风俗与小葡萄略同。土产洋葱，其头寸馀，熟食味极清酣；玛瑙、棉花、鸦片。内山亦属晓包补。自曼达喇萨至郎杜，土番多不食豕牛羊犬，唯食鸡鸭鱼虾。男女俱戴耳环。

孟买，在盎几里北少西，相去约数十里。为英吉利所辖地，有城郭，土番名叭史。颜色稍白，性极淳良，家多饶裕。英吉利镇此地者数千里。土产玛瑙、大葱、棉花、阿魏、乳香、没药、鱼膏、鱼翅、鸦片、番<卤见>。棉花最多，亦南洋一大市镇也。邻近马喇他、盎几里、晓包补，即杜诸国。多辇载货物到此贸易，其内山亦属晓包补。

苏辣，在孟买北，水路约三日可到，亦英吉利所辖。土番名阿里敏，土产同上。

淡项〈（读平声）〉在苏辣北，水路约日馀可到，为葡萄牙所辖。土产同孟买。

即杜国，在淡项北，疆域稍大，由淡项水路顺风约二日可到。风俗民情，与盎几里诸国略同。土产鸦片、海参、鱼翅。俱运往苏辣、孟买贩卖。自明牙喇至此，西洋人谓之戈什峡，总称为印度海。土人多以白布缠头，所谓白头回也。遇王及官长，蹲身合掌上于额，俟王及官长过，然后起。子见父母，亦合掌于额，平等亦如之。其来中国贸易，俱附英吉利船。本土船从无至中国，中国船亦无至小西洋各国者。自此以西，海波汹涌，一望万里，舟楫不通，浅深莫测。沿海诸国不可得而纪矣。其即杜内山，则为金眼回回国。闻其疆域极大，不与诸国相往来。故其风俗土产亦不可得而纪也〈（案：金眼回回在南印度山内，当是中印度之莫卧尔白头回国也）〉。

《万国地理全图集》曰：马塔刺，南印度之省会也。形势在北极十三度五分，偏东八十度二十一分。海边浪涌涛鸣，上岸甚险，建城于沙坦。居民四十万馀丁，土人面黑，而肢骸趯捷，能翻飞作剧。富户耗费银钱，造庙造像，信佛奉神，不悟天主教。英国建炮台，保障防御。其屋建于园里，美花香草，芳芬浓郁。佛兰西军屡次攻击英台，虽然获胜，后亦必退。此时英权稳立如磐，断难动移。马塔刺之南，为本地治利城。乾隆间，为佛兰西守据，挑唆土民肇衅驱英。但东得西失，惟留本城而已。此省内所有大城，如左班牙乐，炮台坚固，街衢广丽，内有古王宫殿，被英军所攻败者；北刺利，建在山顶，系要隘，欲上山岭，惟有一路，防兵乘险开炮，无敌敢近；撒林居民，织造布帛，又制火硝；骨他巴，系罪犯徒流之邑；骨他罗利邑，屋宇美，街衢广；西令牙巴坦；昔系王都，锐意欲驱，英民出印度所募民壮军士，不胜数，因英国之兵夺险逼城，效死力战，土王战败，和银一千万两，割其国三分之一，以免剿灭。于嘉庆三年再开衅隙，王募四十万军士，立心力战，于是英国军士，围攻城池，闯入城内，其王被兵刺死，遂夺全地为英属国。

又曰：网买，在南印度之西边，海滨之左。昔属葡萄牙，此时归英，建立省会。因潮水高涨，掘筑船厂，建造战舰。其房屋甚美，其人贵。白头回惟利是图，拜日祀火，不葬其尸，以供鹰食。恒时买卖获益，亦好布施，厚赈济，故令天下庶民景仰之也。

邻地，丰产棉花，大半运赴中国。亦有胡椒、椰子、珊瑚等货。海船至大者，载二万二千五百石，入水甚深，每年进黄埔厚运货物。省会形势，在北极十八度五十六分，偏东七十二度五十七分。天气热，昔时英人不服水土，此时已经开垦，安居无恙。其居民共计一十七万丁，内有白头一万三千口。前日地饶人贫，今广开通商之路，每年运出物价几百万两，日增裕富。

网买之北苏刺城，昔大兴盛，此际渐衰。城内有禽兽院，养各类老犬老牛。亚麦大八邑，乃回回之城，居民有十万丁。因地震倒坏屋宇，所损不可胜计。埔拿城，嘉庆年间，乃马刺他之雄都。四围山岭，筑建堡台，以防御国敌。英国攻取各台，驱其人而据其地。

网买之南，有葡萄藩属国，曰俄亚者。长一百二十里，阔六十里。于明正德五年，攻取其地，建城保障，胁服邻国。立庙造寺，养僧无算，不久速废。今所留之地，物产不多，生意亦少。

昔荷兰据海边之城，如可陈等处，互市贸易，现已割予英人。是以沿海各地方，大半英人所辖。

《地理备考》曰：马尔地瓦斯国，一曰锡兰山，在亚细亚州之南，居印度海中。北极出地十五分起，至七度二十分止；经线自东七十度三十分起，至七十一度三十分止。周围枕海，地不相连。环以各岛，共一千五百座。四面相向。自南而北约二千里，其烟户所在惟四五十岛。地气温和，寒暑相称。田土不泽，陇亩稀疏。谷果甚鲜，椰子木多。海出鼉龙，土产珊瑚、玳瑁等物。商船络绎，王位相传。所奉之教，乃回教也。国都在马劣岛中，乃通国之首岛。

《外国史略》：锡兰山岛在印度东南，广袤方圆千一百六十二里，居民一百四万五千六百口。北极出地自五度五十六分及九度四十六分，偏东自七十九度三十六分及八十一度五十八分。地高于海自八十丈及三百丈，最高之峰五百处。其一曰亚坦之峰，有石上足痕，或曰佛足迹焉。西北地低，港汊皆流入之。夹以最深之海港，地形如箕舌。时有甘雨，地气常如春时，绝不似印度亢热。地多饶，产桂皮、加非、椰子，海边尤丰。居人榨其油，市与外国。土人用象如牛马。多嫩黄青蓝各色美玉，海产明珠，每年约值银二十万两。内地多出盐，但五谷不登，必买于印度。居民有三种，一为内地之干地人，土民多由五印度来，半奉耶稣教，余则拜佛。锡兰岛自古有名，珍奇锤萃，号为宝渚。时有中国大商艘，赴岛贸易。亚西亚各国，皆于

是港通商。明时回回族类，由亚拉国来侵据此岛。孝宗宏治年，与葡萄牙兵船结盟，岁贡肉桂皮，协力驱亚拉回人，遂为葡萄牙所据，劝土民奉天主教。崇祯四年，干地王招荷兰助驱葡萄牙，而荷兰复夺海边各地开埠。越百三十年，嘉庆元年，又为英人攻据。自后全岛归英国，每年纳饷约百万，尚不足供官费。然贸易日兴，所种珈琲树，每年增至数万石。开道院，劝民奉耶稣教。

其都城曰可伦破，在西南海边，居民六万，筑炮台以护之。内设大炮三百门。干地山水甚美，高海面者六百馀丈，前与北地未通，欲攻击其酋主不能进。此时开通路，辐辏不绝，贸易日兴，其海口曰可道丁马里。又牙利城，东南之坚城。

又曰：马地威群岛，约百八十里。偏东七十二度四十八分，并七十三度四十八分。产珊瑚，有沙石，亦出椰子、粟，多沙鱼。居民勤劳，年年将椰油、咸鱼、贝子、玳瑁、谷等货，赴印度市，以易铁器、布、沙糖。百姓驯朴，今皆遵天主教。

腊其地威十七岛，偏东自七十二度，至七十四度；北极出地自十度，至十二度。惟八洲有居民。种椰子为饮食，民甚贫乏。

尼哥巴群岛，在印度西海中，北极出地在七度。产木料，其烟瘴各岛，多出椰子，槟榔，海出蛤、蚬、蚌、海参、香涎等物。居民惰逸，耶稣之徒教化之。大尼国在此开埠，因瘟疫皆毙。道光二十六年，再开垦。

大尼之北为安他曼群岛，土蛮未向化，居草寮，食鱼蚝，泥身不衣，然善用弓箭，互相杀戮，其林箐内有红黑香木，但烟瘴太重。乾隆五十四年，英国人在此开埠，旋退去。后或有船抵此，甫及岸，其土民即突出攻击。

卷二十三

◎西南洋

西印度西巴社国〈（一作包社，一作高奢，一作报达，一名百尔西亚。即汉之安息，唐之大食，皆属西印度西地）〉

巴社国，又名巴尔齐亚，在都鲁机之东。西与都鲁机毗连，以戈厘斯顿山为界；东与新都司顿毗连〈（即温都斯坦）〉，以比鲁山为界；北与俄罗斯鞑鞑里毗连〈（鞑鞑里，即西哈萨克、西布鲁特各部）〉以古疏山为界；南界海，即利玛窠所谓默生丁海是也。史记所载，亦古名邦，如阿西利阿。巴比罗尼阿先日之国都，即巴社边界之地也。后有国中之西腊士征服巴比罗尼阿，遂称为巴社国。以伊士巴含为国都，恃其兵力，遂取西里阿伊揖、小阿细亚及东界之印度，疆域之大，古未有伦。后以奢侈无度，为额力西所覆〈（额力西，一作厄勒祭，在意大里国之东，今并于西都鲁机）〉遂将巴社印度等处，均改为部落。至耶稣纪岁三百年〈（汉永康元年）〉，始有阿达色尔士，夺回巴社自立为王，并败罗汶之兵。至七百年间〈（唐武后则天年间）〉，为阿丹所灭，改遵阿丹之回教，率师东征，拓地益广。忽又被都鲁机鞑鞑里互侵，国中复为战场。至千五百八十六年〈（明万历十四年）〉，国中阿巴士，纠集部众，悉驱外国之人，恢复故都，设官立政，垂二百余年。复有阿富晏士作乱，所过焚戮，人民涂炭。越十有四年，有高里坎王者，起兵攻击阿富晏士，自立为王。然以暴易暴，身没无嗣，头目争立，为一大将所据，称曰加林坎王。在位十有六年，身没，国中复乱。时耶稣之千七百七十九年也〈（乾隆四十四年）〉。有阉人阿牙磨哈墨者，以兵定乱于千七百九十六年〈（嘉庆元年）〉，始立发底阿里沙为王。厉精图治，百废俱举。巴社之疮痍稍息，虽俄罗斯亦常侵扰，夺去边境数部，而国中无恙。惟屡遭兵乱，古昔典册，泯荡无存。改遵回教，尊君卑下，尚胜于东方诸国。各部头目，世袭其职，擅财赋兵马，各制一方，国王不得过问。各头目角胜争强，人民伺胜负为去就，彼胜归彼，此胜归此，故头目争结民心以自固。国王之女，止与教师婚配，不下嫁于头目，以其掌兵，恐谋篡夺。国王额设护卫兵三千，谓之王仆；步兵万二千，以为外护。按名给田，耕屯自养。其余兵马，分统于各头目。遇警征调，可二十余万。善骑射，耐辛苦，断敌粮草，绝敌水道，是其所长。曾以此困罗汶，后被鞑鞑里阿富晏士攻败，从此兵威不振。近世国王，复按欧罗兵法，训练其兵，渐还旧观。佛兰西王前曾遣牙鼎尼求援于巴社，以攻英吉利东边之属国。英吉利旋亦使至巴社，力陈利害，发佛兰西诡谋，巴社兵遂不东。复请英国将官往助训练，故其骑兵轻捷，长于枪剑。复有枪炮步兵万人，皆合欧罗巴法度。嗣值巴社与都鲁机用兵，英国恐己将士助战生衅，尽召回本国。

其地平远，中央大山，起自都鲁机之阿弥巴阿，至南边海岸。深山大谷，洞穴曲通，多为盗窟。平时专事劫夺，有事亦可募为军锋。北界俄罗斯，时虞侵逼。故近日国王移都于南，并于加士比奄海〈（即里海也，亦名咸海，亦名北高海）〉，设立

水师防卫其国。户口传闻二万万人，多黄色，壮而不秀。客籍流寓，种类甚多。国中音语不一，有额力西者，有阿丹者，有罗汶者，有都鲁机者。风俗虚假鲜实，善谄媚，尚礼貌，一见如故，久始知其知有己不知有人也。奢靡甲东方，宫室外则砖石闳丽，内则陈设璀璨。衣饰珠宝，一衣有值十馀万金，至二十、三十万金者。命妇衣皆丝缕宽袍大袖，不蒙头不出户也，颜色易凋，不十年俨如老嫗。母以子贵，无论嫡庶。尤喜良马，不惜高价。其嗜马之心，百物无以尚之。惟饮食疏俭，罕供鱼肉，筵宴宾客，仅以果品为丰。巴社素称文墨之邦，先日以诗名者，有哈斐士，长于揄颂；有沙底，善论风化；有法部西，工言情。欧罗巴之人，译出读之，文奇趣溢，各极其妙。然古时文学，早已残缺。近日王重文学，每日必有诗人在侧。曾对英吉利使者夸赞之，每一脱稿，即赐一金钱润笔。医学、星算诸馆，亦与文学并重，各有教授传习之人，岁费三四十万棒。故巴社之人多信星卜，谓可致富贵。欧罗巴人皆不信之。俗奉回教，以阿厘为宗主。阿厘者，马哈墨之兄子，亦即其婿也。阿厘之教，即马哈墨所传。都鲁机、阿丹等国均宗马哈墨，何以各有不同，互争得失，致成仇敌？有谓阿厘之教，虽授自马哈墨，然其中悟会，亦少有分别，各自流传，遂成偏执。如巴社禁人不饮酒，礼拜火神，即与该国回教不同。产米、麦、盐、丝、发、五采地毯、羊毛、绸缎、磁器、纸皮、宝石、铜铁，领小部落二百六十有六。〈（部落名目，原本阙。）〉

○西印度西巴社回国沿革 〈（唐以前非回教，已见西印度内。唐以后为大食，为包社，为伯尔西亚国。今与英吉利通和，非其所属。原无今补）〉

《新唐书》：大食本波斯地，男子鼻高，黑而髯，女子白皙，出辄障面。日五拜天神，银带佩银刀。不饮酒举乐，有礼堂，容数百人。率七日，王高坐为下说曰：死敌者生天上，杀敌授福。故俗勇于斗。土硲砾不可耕，猎而食肉，刻石蜜为庐如輿状。岁献贵人葡萄，大者如鸡卵。有千里马，传为龙种。隋大业中，有波斯国人，牧于俱纷摩地那山。有兽言曰：山西三穴有利兵，黑石而白文，得之者王。走视如言，石文言当反，乃诡众裒亡命于恒曷水，劫商旅保西鄙自王，移黑石宝之。国人往讨之，皆大败还。于是遂强，灭波斯，破拂菻，始有粟麦仓庾。南侵婆罗门并诸国，胜兵至四十万。康石皆往臣之。其地广万里，东距突骑斯，西南属海。海中有拔拔力种，无所属附。不生五谷，食肉刺牛血，和乳饮之。俗无衣服，以羊皮自蔽。妇人明皙而丽。多象牙及阿末香，波斯贾人欲往市，必数千人，纳鬻刀血誓乃交易。兵多牙角而有弓矢铠槊。土至二十万数，为大食所破略。永徽二年，大食王始遣使者朝贡。自言王大食氏，有国三十四年，传二世。开元初，复遣使献马钁带，谒见不拜，有司将劾之。中书令张说谓俗殊慕义，不可置于罪，玄宗赦之。使者又来辞曰，国人止拜天，见王无拜也，有司切责，乃拜。十四年，遣使苏黎满献方物，拜果毅，赐绯袍带。或曰，大食族中，有孤列种世酋长，号白衣。大食种有二姓，一曰盆尼末换，二曰奚深。有摩诃末者勇而智，众立为主，辟地三千里，克夏腊城，传十四世，至末换杀兄自王，下怨其忍，有呼罗珊木鹿人并波悉林将讨之，徇众曰：助我者皆黑衣，俄而众数万，即杀末换，求奚深种孙为王，更号黑衣大食。

至德初遣使者朝贡，代宗取其兵平两京。贞元时，与吐蕃相攻十四年，遣使者三人朝。东有末禄小国也，治城郭，多木姓，以五月为岁首，以画缸相献。有寻支瓜，大者十人食乃尽。蔬有蕈葱、葛蓝。军达茈薤、大食之西。有苦国者，北距突厥可萨部，地数千里。有五节度，胜兵万人。土多禾，有大川，东流入亚俱罗。商贾往来相望云，自大食西十五日行，得都盘；西距罗利支，十五日行；南即大食，二十五日行；北勃达，一月行；勃达之东距大食，二月行；西抵岐兰，二十日行，南都没，北大食，皆一月行；岐兰之东南，二十日行；得阿没，或曰阿昧，东南距陀拔斯，十五日行；南沙兰一月行；北距海二日行，居你诃温多城，宜马羊，俗柔宽，故大食常游牧于此。沙兰东距罗利支，北怛满，皆二十日行；西即大食，二十五日行。罗利支东距都盘，北陀拔斯，皆十五日行；西沙兰二十日行；南大食，二十五日行；怛满，或曰怛没，东陀拔斯，南大食，皆一月行；北岐兰，二十日行；西即大食一月行。居乌浒，河北平川中，兽多狮子，西北与史国接以铁关为限。天宝六载，都盘等六国，皆遣使者入朝。

《宋史》：大食国，本波斯别种。隋大业中，据有波斯西境。唐永徽后，屡入朝贡。乾德四年，僧行劝游西域，因赐其王书，以招怀之。开宝中，太平兴国贡方物，自后屡朝，职贡不绝，其从者目深体黑，谓之昆仑奴。其贡物有白龙脑、真珠、玻璃器、象牙、乳香、镔铁、红丝、杏贝、五色罗花番锦、蔷薇水、龙盐银药、千年枣、驼毛褥。其国贡使，自言与大秦国相邻，为其所属，在都城介山海间，土产犀象、香药。自泉州西北，舟行四十馀日至蓝里，次年乘风帆，又六十馀日，始达其国。地雄壮广大，民俗侈丽，甲于诸番。天气多寒。其王锦衣玉带，蹀金履，朔望冠百宝纯金冠，其居以玛瑙为柱，绿甘为壁，水晶为瓦，碌石为砖，帷幕用百花锦。官有丞相、太尉，各领兵马二万馀人。马高七尺，士卒骁勇。民居屋宇，略同中国。市肆多金银绫锦，工匠技术咸精其能。建炎三年，奉珠玉宝贝缗贡。帝曰：大观宣和间，茶马政废，武备不修，致金人之祸，今复捐数十万缗，以易无用之珠玉，曷若惜财以养战士。乃却贡优赐，以答远人之意。绍兴初，复贡文犀象齿，朝廷亦厚赐而不贪其利，故远人怀之，贡赋不绝。

《职方外纪》：印度河之西，有大国曰百尔西亚。太古生民之始，人类聚居言语惟一。自洪水之后，机智渐生，人心好异，即其地创一高台，欲上穷天际。天主憎其长傲，遂乱诸人之语音，为七十二种。各因其语，散诸五方。至今其址尚在，名曰罢百尔，译言乱也，谓乱天下之言也。百尔西亚之初为罢鼻落你亚，幅员甚广，都城百二十门，乘马疾驰，一日未能周也。国中有一苑囿，造于空际，下以石柱擎之，上承土石，凡楼台池沼，草木鸟兽之属，无不毕具，大复逾千。一邑天下七奇，此亦一也。后其国为百尔西亚所并，遂称今名。至今强大。国主尝建一台，纯以所杀回回头累之。台成髑髅几五万。廿年前，其国王好猎，一围获鹿至三万，欲侈其事，亦聚其角为台，今尚存也。又东撒马儿罕界一塔，皆以黄金铸成，上顶一金刚石，如胡桃，光夜照十五里。伯尔西亚地，江河极大，有一河发水，水所及处，即生各种名花。南有岛曰忽鲁谟斯，在赤道北二十七度，其地悉是盐，否则硫黄之属

。草木不生，鸟兽绝迹。人著皮履，雨过履底辄败。多地震，气候极热，人须坐卧水中，没至口方解。又绝无淡水，勺水亦从海外载至。其艰如此，因其地居三大州之中，凡亚细亚、欧罗巴、利未亚之富商大贾，多聚此地。百货骈集，人烟辐辏。凡海内极珍奇难致之物，往辄取之如寄。土人尝言，天下若一戒指，此地则戒指中之宝物也。

《贸易通志》曰：西印度各洲在海中，为荷兰、佛兰西、西班牙、英吉利分属之藩国，其中耕田之人皆黑面，乃田主之奴，他国多买雇而用之。产白糖、咖啡、棉花、烟、酒、姜，与南海洲相类。有古巴者，西班牙之新地也。道光八年，货进口价银千有九百五十万员，出口亦如之。船千有八百八十九只。其他埠头，亦出入货价三四百员，英吉利所属之西印度洲亦如之。

《万国地理全图集》曰：白西国，即西印度之包社地也。南及海隅，北至西域里湖并俄罗斯藩属国，东至印度，西接土耳其藩属国。北极出地自二十六度至四十度，偏东四十四度至六十度。其北方有高山数带，自远视如巨齿。其河不长，或入湖，或浸于沙地。有好马奇羊。国王当周秦年间，强服邻国。唐朝年间，弃所习崇火拜太阳之教，而为回回。往往自东自北，有强敌侵其国，而逐其君。道光年间，土君与俄罗斯肇衅，屡次战败，割北方全地让俄罗斯，而服事之。虽英国大臣驻防者，苦劝土君坚守，然不得其志。国王随意赏罚，如令将军领师交战，而接捷音，遂令之割阵亡敌人之耳，获胜是实。王释放戮杀，不顾律例，凡事自专。其宫殿如仙境，四面花园水池，异鸟香烟缥缈，珠玉交辉。臣工百僚，自视如奴。

东北各地交界，有西域游牧时时侵犯境界，掠民为奴，而白西人不得折冲御防。居民共计一千三百万丁，皆奉回回之教。一饮酿酒，喜得心花俱开。农者勤劳种麦，因无水沟，不得植稻。葡萄丰生。内地草场甚广，喂马羊，剪羊毛，造帕毡，其价甚贵。北地出铜及土油，地面有盐土，故田不膏腴。土人好字作诗，不尽唱和之欢。土音和雅，听之如作乐。甚好饰身，耗费银钱。又买好马，挺枪跃骑，奔腾千里。好礼百拜，谄谀无实。常时食烟游玩。居环土墙，内铺呢毡。夏冬洗身，眉清目秀。其女容仪雅媚，但不贵本地之女，必由番国买来为妾。美艳易凋，嫁后七八年，形容憔悴。男将女严禁闺中，若出过市，则浑身盖蔽。贬食省用，只务外观。

国之北部如额兰部，在里海之滨，支流灌溉，林密草芳。省会居民六十万，城多古迹，昔有几万居民，今颓墙坏壁。马散地兰部，在里海，四围高峰，山麓平地，为牧羊之所。

可刺散，广大地方，省会米食，居民五万人。田亩虽丰。游牧贼心，肆掠无忌。故农夫苦贫。

内地之部曰以辣，山岭不毛，谷内物产甚阜。但因战衅之久，遍处颓废。国都地希

兰，周围十四里。城池巩固。

益巴罕城，屋宇繁多，通商富裕，昼夜勤劳。东南饶土，惟叶大城，居民繁多，生理富盛。

法耳辣城，郊外山水清秀，国中诗人，观山玩水，歌诵吟啸。其补食海口，与印度国通商。运出强马、红枣、珍珠，运入各项南产布匹。白西海隅，有恶末屿，古时大市，众商聚会。今已废为沙野。部内有古迹，花柱旧庙。大殿城，瓦砾场，游人察其古迹，解其碑记，乃古白西人，崇火拜阳，与西国交战，兴工营筑者。

法南沿海褊小，刺地沙惟出枣而已。东方克耳曼部，居民养毳羊，用之以织造花帕，其价甚贵。

西古西但省，田肥土茂，其河灌溉全境。缘贼侵掠，小民缺于日用。

东南有沙野无水，其王好战，率兵围甲布王之希辣城，欲侵印度，赖英国兵帅，力行阻御，连月奋死击退。

《地球图说》：白耳西亚国图说，东界亚加业坦国、皮路直坦国、大布加利亚国，南界白尔西亚海，西界土耳其基国，北界里海、并大布加利亚国。其百姓约有九百万之数，都城名第希兰，即城内民十三万，大都回回教，又另有拜火之教，名曰太阳教。是国昔时威震诸国，今不若昔矣。西北民最众，东南次之。中有旷野，以牧羊纺织毛布、呢毡毯为业。好尚服色，颇知礼仪，言语文式。女容雅媚，出外必遍身遮蔽。交际专尚虚礼，不守忠信。遇有疑虑，常食鸦片，以解郁闷。然其食鸦片之形状，不似中国，而与土耳其基国相似。其饮食不用刀叉匙箸，惟以手拈之，诚不美也。自道光年间，频与俄罗斯国暨亚加业坦国交战，未分胜负。土产毡毯呢、羊毛布、绸缎、葡萄酒、羊、马、枣、铜、油盐。

再稽圣书，所谓古圣人摩西，与真神示诫于西奈山，以色列人奉摩西之谕，避麦西国人之害，追入红海，真神即合水以相灭，其山其海，均在是国焉。内有至旷之野，人民行走，俱跨骆驼，以牧羊马为生。所居大都帐房，但其风俗每多不善，遇财即劫，诚可恶也。土产 架啡、枣子、靛青、药材、珠子、骆驼、良马。其马上山如平地，渡水似浮桥，日行二百里。

《地理备考》曰：白尔西亚国，又曰义兰，曰波斯，在亚细亚州之中。北极出地二十五度三十分起，至三十九度止；经线自东四十一度四十分起，至六十一度三十分止。东至黑拉德阿付干，北罗吉三国，西连土耳其基国，南接白尔西亚、科曼二海湾，北界达尔给，厄罗斯二国，暨加斯比约海。长约四千五百里，宽约三千里，地面积方约六十万里，烟户九兆馀口。本国地势，山陵叠起，砂磧绵邈。河之长者，曰

给拉，曰加伦，曰达波，曰西达罗干，曰的窝卢，曰固尔，曰给西鲁森，曰马三德兰。湖之大者，曰塞勒，又名都刺海；曰诗拉斯乌尔迷亚，曰伊里完。田土饶瘠，惟诗拉斯伊、巴汗、义兰、马三德兰等处，平原膏腴，谷果丰茂。禽兽充刃，树木萧条。土产铜、银、铁、铅、丝麻、烟酒、窝宅、花石、硫磺、硃砂、磁器、绵花、珍珠、药材、香料、大黄、鸦片、毡毯、牛皮等物。地气互异，西冷南热，中温。王位相传。所奉之教，乃回教也。技艺精巧，人烟辐辏。凡与邻国交易，靡弗结队而行，驮负运载。本国初并于美地亚国，周灵王十二年，有西禄斯者，复立国基，即克服都兰美地亚，暨亚细亚州西方等处。越二百零七载，传至达里约。有马塞多尼亚国君，攻夺其地。迨薨后，麾下诸将，互分其地，各霸一方。称王未几，各嗣君陆续皆被罗马国君所侵，惟本国屡挫其三军，不致尽隶版图。唐太宗贞观十年，为天方回人侵夺。宋理宗景定五年，又为蒙古人兼并。越一百二十六载，土耳其基亚国人，逐去蒙古而据其地。其后嗣君暴虐无道。康熙三十三年，国中变乱废弑迭兴。索非斯君之后裔达马斯者，招兵买马，用贼首那的尔沙为将，许以重赏，率讨叛寇，大获全胜，尽复失地。其后那的尔沙，贪婪无厌，以赏不酬功为词，遂行背叛，将达马斯君囚而弑之，篡位为王。乾隆十二年，被臣所弑。其后纷纷争位，干戈四起，国之变乱，较昔尤甚。以致国人各分党羽，皆欲立其酋为君，杀戮抢夺，无所不至。东方各地，竟为阿付干国所获，别建一国。西方各地，则被那的尔沙家臣给灵者所据，即位后任贤举能，兴利除害，为一时之明君，在位约三十载而殁。时其弟萨的者，欲窃君位，乃以鸩谋毒嗣君，其后妻从子亚里木拉，亦欲窃位，声言萨的欲行篡逆，乃率众攻围西拉斯城。越九月，既陷。遂将萨的暨嗣君一并弑害，僭立为君，时国内复乱，兵革滋扰。乾隆五十年，亚里木拉薨后，国事未定，其哥么部酋，曰非尔者，僭位称王。中涓马何美起兵攻之，屡战获胜，而有其国。及薨，其侄巴巴塞尔达嗣立。嘉庆十八年，与厄罗斯国交兵，即俄罗斯也，又丧日尔日亚地方，于是通国分为十一部，大小不等。一曰义拉亚日迷尔，乃国都也，建于平原之中。一名达巴利，一名马郎德兰，一名义兰，一名亚塞尔拜然，一名古尔利，一名古西，一名发尔斯，一名给尔满，一名古义，一名哥刺森，其通商冲繁之地；一名亚不支尔，一名本德尔亚巴西，一名音西利，一名巴尔福禄支。

《外国史略》曰：白西亚国，北及俄罗斯、里海、西域，东及西域甲布、巴律坦，西及亚拉并土耳其藩属地。广袤方圆二万二千七百四十里，居民二千一百二十五万。北极出地，自二十六度至四十度，偏东自四十二度至六十度。西北多山，北地尤高，余皆平坦，民皆穿河灌溉。海滨广斥，卑湿而热。山亦硗确，无草木。惟出马、驴、驼、羊、鼠，各多异种。又产瓜、豆、麻、烟、姜、鸦片、绵花、乳香、阿魏、甘枣、百果、大黄、硝、硫磺、铁、铅、铜、盐。道光四年，地大震，山崩，大邑遂多荒芜。

白西亚，本古国，民昔居山内，与他国无往来。周朝时，有巴比伦国攻击犹太人，虏之。陈高祖永定二年，白西亚朱鲁士王，陷巴比伦都，释犹太人，厚送财帛，再建神殿，而阿西亚各地皆服之。其子又强陷麦西等国，恣其暴虐，国人废之，别择

立贤明之大利阿王，出兵西方，据地益广，降地中海各岛，与东北游牧之徒战，败退。其子悉实，又攻据希腊所属之马基顿地，王歿，国为将军所分。及北宋时，罗马人欲占其地，与白西国战，屡年不克而退。于东晋穆帝时，罗马之君议和，以五部让白西国。白西王又夺印度各国连界之亚拉地，于齐武帝永明元年，与匈奴盟，遂广扩土地，自地中海延及印度，虽罗马君亦畏之。唐太宗贞观元年，罗马军突破其国，而亚拉之回王穆哈默，亦攻败白西，杀其君，强百姓归回教，不服者诛之。白西国昔奉星宿太阳，自太宗贞观九年，始归亚拉回教。至南宋间，五百八十四载，无所变易。及宋理宗二十五年，元太祖起蒙古，逾葱岭西征，尽降其地，封其婿赛马尔罕为王，驻阿母河西北，以遥辖之。至明洪武时，赛马尔罕王，兴师而南，遍陷其地，尽有西域，亦奉回教。及赛马尔罕王没，大军亦旋，留诸酋长分镇各地，土耳其人乘间据白西国。正德间，复归蒙古。雍正元年，屡与土耳其、俄罗斯两国结怨。白西人素勇，但性反复无常。乾隆元年，有蒙古王霸那得者，以本国地微，遂侵五印度，夺其财帛，降其百姓，性酷贪，境虽广。歿后，白西国遂分为四，各邻国亦夺其土地。俄罗斯兵之在界者，屡击败白西人。道光六年，让里海边地。后白西民又杀俄国公使，割其王之鼻耳。今王于道光十四年即位，受俄罗斯之命，攻喜拉城，此地向属五印度，英军击退之，俄罗斯因讲和焉。其国各有土酋分封，本蒙古之宗室，常反侧不安。

其产宜麦，宜瓜果，多马。其民貌美，女幼甚丽，逾二十馀岁，遂成老丑。俗尚奢靡，惟利是图。其屋外朴内华，其人外谦内诈，颇聪明，有豪气，能诗文，多尚回教，喜拜太阳、火焰。多出外国贸易。好美其须，乘良马。家家有浴室，甚整饰。语多亚拉音。与土耳其国为仇。制造最巧者，花毡搭膊布。美兵器，嵌以金银并磁器。其民不善通商，故船赴海口者少，亦无土产运出。

其城邑最北者，曰治耳文城。在里海西，与俄罗斯交界。平坦，多五谷。有油泉自土涌出，每日得油千斤。有自然火，由渊上炎。五印度敬火之人，争赴此拜之。里海之巴古海口，可通商。

里海之西，曰其兰部，甚丰盛，出蚕丝，多果木。水土恶，有瘟疫。南有溜山，路狭难通行，其都会曰勒悉城，居民六万。大埠也在里海。

北部之东，里海之南，有马撒得兰部，出米谷。巴佛居民四万，亚末居民三万。阿士搭拉巴部，四面云山，丽景如画。

西北之部曰亚得比安，与土耳其俄罗斯交界，四面皆山，即古之他必城。极广大，地丰五谷，并日用各物。多耶稣之教，又有大城曰以利文。

哥拉撒，与西城白西亚国交界。地甚广，有卤野。其都曰墨设城，居民五万。

以拉部，西连土耳其亚拉等国，地多饶，而产谷颇盛，农皆守分。其北方有新立都曰得希兰城，居民五万，大半驻兵，冬来夏去，以免瘟疫。其王尝驻此，以拒俄罗斯。其古都曰以土巴含城，百年前，居民百馀万，今荒废。其海口曰布悉，有贸易，无战船。

注斯部之示拉土邑，山川秀丽，距此百馀里，有古城。

其王专威好杀，傲视他国，侍卫二千人。其都周围，以万骑环之。其游牧者各有首领，战即召之各省所部，以随阵各营，增至十五万及二十万人，皆乌合易散。近请英人及佛兰西人，训练其兵，仿欧罗巴军令阵法，以拒俄罗斯，然犹不能敌焉。政酷而饷重，故富户甚鲜。

卷二十六

《新唐书》：拂菻，古大秦也。居西海上，一曰海西国。去京师四万里，在苦国西北，直突厥可萨部。西濒海，有迟散城；东南接波斯，地方万里，城四百，胜兵百万，十里一亭，三亭一置，臣役小国数十。以名通者曰泽散，曰驴分。泽散直东北不得其道里，东度海二千里，至驴分国。重石为都城，广八十里，东门高二十丈，扣以黄金。王宫有三袭，门皆饰异宝，中门有金巨称一，作金人立其端，属十二丸，率时改一丸落。以瑟瑟为殿柱，水晶琉璃为椽，香木梁黄金为地，象牙闔。有贵臣十二共治，国王出，一人挈囊以从，有讼书投囊中，还省枉直。国有大灾异，辄废王，更以贤者。王冠如鸟翼，缀珠，衣锦绣，前无襟。坐金花榻，侧有鸟如鹅，绿毛，上食有毒辄鸣。无陶瓦，屑白石墍屋，坚润如玉。盛暑引水上，流气为风。男子剪发，衣绣，右袒而帔，乘輜辘白盖小车，出入建旌旗击鼓。妇人锦巾，家资亿万者为上官，俗喜酒，嗜干饼。多幻人，能发火于颜，手为江湖，口幡毼，举足堕珠玉。有善医，能开脑，出虫以愈目眚。土多金银、夜光璧、明月珠、大贝、车渠、玛瑙、木难、孔翠、虎珀。织水羊毛为布，曰海西布。海中有珊瑚洲，海人乘大舶，堕铁网水底。珊瑚初生磐石上，白如菌，一岁而黄，三岁赤，枝格交错，高三四尺。铁发系网舶上，绞而出之，失时不取即腐。西海有市，贸易不相见，置直物旁，名鬼市。有兽名贄，大如狗，犷恶而力。北邑有羊生土中，脐属地，割必死。俗介马而走，击鼓以惊之，羔脐绝，即逐水草不能群。贞观十七年，遣使献赤玻璃绿金精，下诏答赉。大食稍强，遣军伐之。拂菻约和，遂臣属。乾封至大定再朝献。开元七年，因吐火罗大酋，献师子、羚羊（源案：《唐书》所言大秦之盛皆隔海，欧罗巴大秦，非拂菻所有，故云度海二千里，当以《后汉书》为正）。

《宋史》：拂菻国，东南至灭力沙，北至海，皆四十程；西至海，三十程；东至西大食，及于闐、回纥、青磨，乃抵中国。历代未尝朝贡。元丰四年十月，其王始遣大首领来献鞍马刀剑真珠，言其国地甚寒，土屋无瓦，产金、银、珠、西锦、牛、羊、马、独峰驼梨、杏、千年枣、已榄粟、麦，以葡萄酿酒。乐有箏、篪、壶琴、小箏、篳、偏鼓。王服红黄衣，以金线织丝布缠头，岁三月则诣佛寺，坐红床，使人舁之。贵臣如王之服，或青绿、绯白、粉红、黄紫，并缠头跨马。地市田野，皆有首领主之。每岁惟夏秋，两得奉给，金钱锦谷帛，以治事大小为差。刑罚罪轻者杖数十，重者至二百，大罪则盛以毛囊投诸海。不尚斗战，邻国小有争，但以文字来往相诘问。事大亦出兵。铸金银为钱，无穿孔，面凿弥勒佛，背为王名，禁民私造。元祐六年，其使两至，诏别赐以玉帛二百匹，白金瓶裘衣金束带（《文献通考》案：《唐史》有拂菻国，以为即古大秦也，然大秦自后汉始通中国，历晋唐贡献不废。而宋《四朝史·拂菻传》则言其国历代未尝朝贡，至元丰始献方物。又唐传言其国西濒大海，而宋传则言西距海尚三十程，其馀界亦龃齬不合。土产风俗亦不同，故以唐之拂菻附入大秦，而此拂菻自为一国云。源案：唐之拂菻已非后汉之大秦，而宋之拂菻又非唐之拂菻，皆慕前代柔远之盛，而冒名之者）。

《明史》：拂菻，即汉大秦。桓帝时始通中国，晋及魏皆曰大秦，尝入贡。唐曰拂菻，宋仍之，亦数入贡。而宋史谓历代未尝朝贡，疑其非大秦也。元末，其国人捏古伦，入市中国，元亡不能归。太祖闻之，以洪武四年八月召见，命赍诏书还谕其王，复命使臣普刺等，赍敕书彩币诏谕，乃遣使入贡，后不复至。万历时，大西洋人至京师，言天主生于如德亚，即古大秦国也。其国自开辟以来六千年，史书所载，世代相嬗，及万事万物原始，无不详悉。谓天主肇生人类，言颇诞漫。其物产珍宝之盛，具见前史〈（今西洋诸书，止言天主生如德亚，无大秦之号，此徐光启傅会《唐书》而《明史》沿之）〉。

《坤輿图说》：亚细亚州最西有名邦，曰如德亚。其国史书载上古事迹极详，自初生人类至今六千馀年，世代相传，万事万物，造作原始，悉记无讹。因造物主降生是邦，故人称为圣主。春秋时有二圣王，父达味德，子撒喇满，造一天主堂，皆金玉砌成，饰以珍宝，穷极美丽，费以三十万万。王德盛智高，声闻最远，中国谓西方有圣人，疑即指此〈（案：天主生于汉元寿中，春秋时安得便有国王造天主堂耶。或即古之天祠亦止祀上帝，而非祀耶稣，安得谓西方圣人，即指上帝，岂上帝亦偏在西方耶）〉。古名大秦，唐贞观中，曾以经像来宾，有景教流行碑刻可考。如德亚之西，有国名达马斯谷，产丝绵绒罽，料极佳，城不用砖石，是一活树纠结，甚厚无隙，高峻不可攀登，天下所未有〈（案：利马窦初至中国，安知有列子及景教碑，皆徐光启代为傅会，而近人方执以证大秦之说，亦可哂已）〉。

《职方外纪》：亚细亚之西，近地中海有名邦，曰如德亚。此天主开辟以后，肇生人类之邦。天下诸国载籍，上古事迹，近者千年，远者三四千年，而上多茫昧不明，或异同无据，惟如德亚史书，自初生人类至今将六千年，世代相传，及分散时候，万事万物，造作原始，悉记无讹。诸说推为宗国。地甚丰厚，人烟稠密。是天主生人，最初所赐沃壤其国。初有大圣人，曰亚把刺杭，约当中国虞舜时，有孙十二人，支族蕃衍，天主分为十二区，厥后生育圣贤，世代不绝。故其人民百千年间皆纯一，敬事天主，不为异端所惑。其国王多有圣德，乃天主之所简命也。至春秋时有二圣王，父曰大味得，子曰撒喇满，尝造一天主大殿，皆金玉砌成，饰以珍宝，穷极美丽，其费以三十万万。其王德绝盛，智绝高，声闻最远。中国所传为西方圣人，疑即指此也。此地从来圣贤多有受命天主，能前知未来事者。国王有疑事必从决之，其圣贤竭诚祈祷，以得天主默启，其所前知，悉载经典，后来无不符合。经典中第一大事，是天主降生，救拔人罪，开万世升天之路，预说甚详。后果降生于如德亚白德棱之地，名曰耶稣，译言救世主也。在世三十三年，教化世人，所显神灵圣迹，甚大且多。如命瞽者明，聋者听，暗者言，跛者行，病者起，以至死者生之类，不可殚述。有宗徒十二人，皆耶稣纵天之能，不假学力，即通各国语言文字，其后耶稣肉身升天，诸弟子分散万国，阐明经典，宣扬教化，各著神奇事迹，缘此时天下万国，大率为邪魔诱惑，妄立邪主各相崇奉，自天主降生垂教，乃始晓悟真理，绝其向所崇信恶教，而敬信崇向于一天主焉。所化国土，如德亚诸国为最先，延及欧罗巴，利未亚，大小千馀国。历今千六百馀年来，其国皆久安长治，其人

皆忠孝贞廉。

兹略述教中要义数端。一日天地间至尊至大，为人物之真主大父者，止有一，不得有二，一即天主上帝而已。其全智全能全善，浩无穷际万神人物，皆为天主所造。又恒赖其保持安养，凡人祸福修短，皆其主宰。故吾人所当敬畏爱慕者，独有一天主也。此外或神或人，但能教人纯一，以事天主，即为善人吉神。若以他道诱人，求福免祸，是僭居天主之位，而明夺其权，其为凶神恶人无疑。崇信祭祀此类者，不免获罪。一日天地间惟一天主为真主，故其圣教独为真教，从之则令人行真善而绝不为恶，可升天堂，永脱地狱。若他教乃是人所建立，断未有能行真善，免罪戾，而升天堂脱地狱者。一日人有形躯，有灵魂，形躯可灭，灵魂不可灭。人在世时，可以行善，可以去恶，一至命终，人品已定，永不转移。天主于时乃审判而赏罚之，其人纯一敬事天主，及爱人如己，必升天参配天神，及诸圣贤，受无穷真福。若不爱信天主，违犯教戒者，必堕地狱，永受苦难也。其苦乐永永无改更，无业尽复生为人，及轮回异类等事，故实欲升天堂脱地狱，只在生前实能为善去恶，无他法也。一日人犯一切大小过恶，皆得罪于天主者也。故惟天主能赦宥之，非神与人所能赦，亦非徒诵念徒施舍所能赎也。今人生孰能无过，欲求赦宥，必须深悔前非，勇猛迁改。故初入教，先悔罪，有拔地斯摩之礼，既重犯求解罪，有恭裴桑之礼，遵依圣教，守戒祈求，必获赦宥。不然，一生罪过无法可去，地狱无法可脱也。所以教中要义，望人真能改过迁善，以获赦免而享天福。自有专书备论去。如德亚之西，有国名达马斯谷，产丝、绵、绒、罽、刀、剑，颜料极佳。城有二层，不用砖石，是一活树纠结，无隙甚厚，而高峻不可攀登，天下所未有也。土人制一药甚良，名的里亚加，能治百病，尤解诸毒。有试之者，先觅一毒蛇咬伤肿胀，乃以药少许咽之，无弗愈者，各国甚珍之。

《职方外纪》曰：百尔西亚西北诸国，皆为度尔格所并。内有国曰亚刺比亚，中有大山名西奈山，古时天主垂训下民，召一圣人美瑟于山，赐以十诫，著于石板，左板三诫，右板七诫。今所传十诫是也。其西北有死海，海旁城邑，古极富厚。因恣男色之罪，天主降之重罚，命天神下界，止导一圣德士名落得者，全家出疆，遂降火尽焚其国。至今小石，遇火即然，臭不可近。产果形如橘柚，破之则臭烟而已（按上文回教亦托言西奈山十诫，则不知谁为葛龚之未去也）。

《万国全图集》曰：土尔其藩属国，北接黑海，南连地中海，西至希腊群岛海，其中有湖，长四百里，广百里，名曰死海。古时建大城邑，因民自作罪孽，天降火焰硫磺，尽烧其城，沉为咸湖臭水。四方无人居，惟有瘦岭枯山。死海之北为加利湖，有救世主耶稣灵迹，其约尔坦河，南流入死海。此河内救世主受洗礼，而圣神降临之。

《瀛环志略》曰：泰西人记巴庇伦城高三十五丈，厚八丈七尺，上设塔二百五十，城门一百，以铜为之。周回一百八十里。南怀仁所记宇内七大宏工，有巴必鸾城（

（即巴庇伦之转音）》，即此城也。当其初建，糜膏血而供版筑，自以为子孙万世之业，然居鲁士兵来，曾不血刃而克之。金城千仞，果足恃乎。巴庇伦再叛，大流士恶其城垣之高，拆毁其半，至今犹存遗址。在土耳其东方，美索不达米亚境内，又英官李太郭云，西里亚文字〈（西里亚文字，即巴庇伦所造文字）〉，与诸国不同，与清文极相似，但横写顺读耳。

泰西人纪犹太古事云，犹太古名迦南，有夏帝芒之世，西土有至人曰亚伯拉罕，生于两河之间〈（阿付腊底斯河，底格里士河）〉，迁于迦南。其苗裔称以色列族，传数世至耶哥伯，有十二子，最少者曰约色弗，聪慧过人，诸兄忌之卖于麦西为人奴〈（麦西，一名埃及多，一作厄日多，或作以至比多，又作伊齐不托，在亚非利加之东北境，详阿非利加图说）〉。麦西王立以为相，以色列之族群往归之。初至时七十人，年久繁衍，至六万人。麦西王忌其强宗，欲除之时，迦南以色列族有至人曰摩西，生而神异，学识过人，报仇杀人，逃于荒野。四十年，梦神人使赴麦西救本宗。至则麦西王方张网罗，欲收以色列族坑之。摩西密告宗人，约期同发，至海港，潮退变陆，渡毕而潮大至。麦西军追者皆溺死。摩西率众至迦南之耶路撒冷，遂王其地。示十诫以训民，教以事神天，敬父母，勿杀，勿奸，勿盗，勿妄证，勿贪他人之财。七日礼拜，省过愆，是为西土立教之始〈（泰西人相传天神降于西奈山，石上现文字，摩西拜受，垂为十诫，以教民盖托于神道，以起人之崇信耳。后来耶稣教即本于此。西奈山，在今亚刺伯西北境）〉。摩西卒，约书亚继之。分以色列族为十宗，裂地封为小部，统于耶路撒冷。数传至周穆王时，始称犹太国，又数传至周襄王时，王耶何雅舍嗣位，始贰于巴庇伦。先是巴庇伦为亚细亚大国，犹太夙备西藩，巴庇伦多汰，遇诸侯无礼。犹太王怒，绝朝贡。周简王元年，巴庇伦以大兵攻之，城破王自杀。迁其民于巴庇伦，犹太遂亡。周景王八年，波斯灭巴庇伦，释犹太民归国。以色列族复立故国，传三百余年。西汉时，降罗马为属国。后复叛，为罗马所灭。屠耶路撒冷都城。罗马衰，亚刺伯回部据之。犹太为耶稣生长之地，欧罗巴人时往拜其墓，既为回部所据，禁不得通，诸国皆怒，合兵攻回部。从军者缝十字于衣，血战二百余年，卒夺回犹太地，重立为国，戍以兵。未几，戍兵思故土，各散归。寻为土耳其所据，其部民散之四方。西土各国多有之，以数百万计。而总称为犹太族，与别族不相混云。犹太人最讲文字，西国各种书籍，多犹太人所译解。故其国纪载独详，欧罗巴文士游学者，不于希腊，即于犹太，盖泰西之邹鲁也。犹太女人，姿姣好而性灵慧，与别部迥异。娶妇得犹太女，则以为威施在室也〈（犹太自唐以后，中国称为拂菻，即撒冷之转音。初转为拂懔，再转为拂菻。《唐书》直以拂菻为大秦，盖拂菻在罗马东部中，最著名，遂误为大秦别名。犹之西域称浩罕为安集延也。宋明史因之，则沿《唐书》之误耳）〉。

案：罗马即大秦东土之犹太叙理诸部，今为东土耳其。其中土曰买诺，附近有数岛。曰居伯罗，曰罗得，曰治阿，曰米地邻。其东土有阿腊山、黎巴嫩山、阿付腊底斯河〈（一作阿偏得，又名八阿）〉、底格里斯河〈（一作地额河）〉，有大泽曰死海，湖曰加利利，其地为泰西诸国创建之祖，其民居海岸海岛者，曰额力西种，

希腊是也，为上等。其半阿丹种，戈达曼种，及马罗奈底士种，特鲁西种，黑尔西种，皆回民。自其国中衰，守土之酋，仅羁縻勿绝而已，拥地自擅，如唐之藩镇焉。

《万国全图集》又曰：犹太国，今土尔其国之藩属也。昔分三部：曰犹太，曰撒马利亚，曰加利利。古时其地蕃昌，物产如阜，名扬四海。本居麦西国，上帝率之，进始祖所先住之地，但必四十年间，游于亚刺伯旷野。又奉上天所启，始识上帝之圣旨。汉建始年间，有罗马国征服天下，犹太人亦归其权。且上帝之子耶稣，于汉平帝元始元年，于犹太国生，住世三十三年。布圣教于民，并赎人之罪，代受酷刑而死，复活升天，操万世宇宙之权，教散于四方，而信士以其地为重，往往诣耶稣墓而伏拜。今为回回国主所辖。

犹太之都曰路撒冷，昔甚广大，居民数十万，在旬山上建立上帝之殿，届期礼拜。因犹太人不崇上帝之子，自作罪孽，激罗马国之怒，遣大将引兵，四面围合，攻破城池，犹太人自此亡国，四散各邦为旅。此时其城大半坏败，居民贫乏。

加利利拿撒勒邑，系救世主所养生之处。居民不承其道，虽见其灵迹，却不改悔加省。

此地之海口，曰亚吉，曰伯律，曰牙法，但其口无障风之山，选货又不盛。

犹太国，北叙理亚国，南方里巴嫩山。出香柏，阿伦得河通流其地，地破里海口，居民二万五千。海滨有两大城，一曰土罗西页城，其富商如国君，仓廩实，府库充。一曰大马士革城，山川秀丽，田场开爽，衢市修饰，花卉芬芳。昔扫罗望此邑而行，欲执耶稣之门生，忽天发光闻声，即此地也。

叙理亚之东方，近野哈马大城，古迹遍地，昔大有权势之王所居。其都会曰亚勒坡，居民三十万。道光二年，地震，屋倒城坏，野有饿殍。道光十六年，麦西总帅与上王结衅，侵取其国。于二十年英军扶助，还其原主。

○景教流行中国碑〈（唐建中二年，大秦寺僧景净述）〉

粤若常然真寂，先先而玄无。窅然灵虚，后后而妙有。总玄枢而造化，妙众圣以元尊者，其唯我三一妙身，无玄真主阿罗诃欤？判十字以定四方，鼓玄风而生二气。暗空易而天地开，日月运而昼夜作。匠成万物，然立初人。别赐良和，令镇化海。浑元之性，虚而不盈。素荡之心，本无希嗜。泊乎婆殚施妄，钿饰纯精。闲浑大于此是之中，隙冥同于彼非之内。是以三百六十五种，肩随结辙，竟织法罗。或指物以记宗，或空有以沦二，或祷祀以邀福，或伐善以矫人。智虑营营，恩情役役。茫然无得，煎迫转烧。积昧亡途，久迷休复。于是我三一分身，景尊弥施阿戢隐真威

，同人出代。神天宣庆，室女诞圣于大秦。景宿告祥，波斯睹耀以来贡。圆廿四圣有说之旧法，理家国于大猷。设三一净风无言之新教，陶良用于正信。制八境之度，炼尘成真；启三常之门，开生灭死。悬景日以破暗府，魔妄于是乎悉摧；棹慈航以登明宫，含灵于是乎既济。能事斯毕，亭午升真。经留廿七部，张玄化以发灵关；法浴水风，涤浮华而洁虚白。印持十字，融四照以合无拘。击木震仁惠之音，束礼趣生荣之路。存须所以有外行，削顶所以无内情。不畜臧获，均贵贱于人。不聚货财，示罄遗于我。斋以伏识而成，戒以静慎为固。七时礼赞，大庇存亡；七日一荐，洗心反素。真常之道，妙而难名。功用昭彰，强称景教。惟道非圣不弘，圣非道不大。道圣符契，天下文明。太宗文皇帝光华启运，明圣临人。大秦国有上德曰阿罗本，占青云而载真经，望风律以驰艰险。贞观九祀，至于长安。帝使宰臣，房公玄龄，总仗西郊，宾迎入内。翻经书殿，问道禁闱。深知正真，特令传授。贞观十有二年，秋七月，诏曰：“道无常名，圣无常体，随方设教，密济群生。大秦国大德阿罗本远将经像，来献上京。详其教旨，玄妙无为；观其玄宗，生成立要。词无繁说，理有忘筌。济物和人，宜行天下。所司即于京义宁坊造大秦寺一所，度僧廿一人。宗周德丧，青驾西升；巨唐道光，景风东扇。”旋令有司，将帝写真，转摸寺壁。天姿泛彩，英朗景门；圣迹腾祥，永辉法界。案《西域图记》及汉魏史策，大秦国南统珊瑚之海，北极众宝之山，西望仙境花林，东接长风弱水。其土出火浣布、返魂香、明月珠、夜光璧。俗无寇盗，人有乐康。法非景不行，主非德不立。土宇广阔，文物昌明。高宗皇帝，克恭纘祖，润色真宗，而于诸州各置景寺，仍崇阿罗本为镇国大法主。法流十道，国富元休；寺满百城，家殷景福。圣历年，释子用壮，腾口于东周；先天末，下士大笑，讪谤于西镐。有若僧首罗含，大德及烈，并金方贵绪，物外高僧，共振宏纲，俱维绝纽。元宗至道皇帝令宁国等五王，新临福宇，建立坛场。法栋暂饶而更崇，道石时倾而复正。天宝初，令大将军高力士送五圣写真，寺内安置。赐绢百疋，奉庆睿图。龙髯虽远，弓箭可攀；日角舒光，天颜咫尺。三载，大秦国有僧佉和，瞻星向化，望日朝尊。诏僧罗含、僧普论等一七人，与大德佉和于兴庆宫修功德。肃宗文明皇帝于灵武等五郡，重立景寺。代宗文武皇帝，每于降诞之辰，锡天香以告成功，颁御馔以光景众。

我建中圣神文武皇帝，披八政以黜陟幽明，阐九畴以惟新景命。化通玄理，祝无愧心。大施主、金紫光禄大夫、同朔方节度副使、试殿中监、赐紫袈裟僧伊斯，和而好惠，闻道勤行。远自王舍之城，聿来中夏。中书令、汾阳郡王郭公子仪初总戎于朔方也，肃宗俾之从迈。为公爪牙，作军耳目。能散禄赐，不积于家。献临恩之颇黎，布辞口之金闕。或仍其旧寺，或重广法堂。崇饰廊宇，如翬斯飞。更效景门，依仁施利。每岁集四寺僧徒，虔事精供，备诸五旬。馁者来而饭之，寒者来而衣之，病者疗而起之，死者葬而安之。清节达娑，未闻斯美；白衣景士，今见其人。愿刻洪碑，以扬休烈。

方碑下及东西三面，皆列彼国字式，下有助检校试、太常卿、赐紫袈裟、寺主僧业刹检校建立碑石，僧行通杂于字中，字皆左转，弗能译悉。按碑三一妙身，无玄真

主，阿罗诃者，教之主也。大秦国上德阿罗本者，于贞观九年至长安也。京兆府义宁坊建大秦寺，度僧廿一人，贞观十有二年也。此即天主教入中国之始〈（《未斋金石考略》）〉。

右《景教流行中国碑》。景教者，西域大秦国人所立教也。《舒元舆重岩寺碑》：杂夷而来者，有摩尼焉，大秦焉，秋〈（疑袄字）〉神焉，合天下三夷寺，不足当吾释氏一小邑之数。今摩尼袄神祠久废，不知所自。独此碑叙景教传授颇详，盖始于唐初，大秦僧阿罗本携经像至长安，太宗诏所司，于义宁坊造寺一所，度僧廿一人。高宗时崇阿罗本，为镇国大法主。仍令诸州各置景寺，其僧皆削顶留须，七时礼赞，七日一荐。所奉之像则三一妙身，无玄真主，阿罗诃也。今欧罗巴奉天主耶稣，溯其生年，当隋开皇之世，或云即大秦遗教。后题大簇月七日大耀森文日建立。所云大耀森文，亦彼教中语也〈（《潜研堂金石》三跋尾）〉。

《册府元龟》：天宝四载九月，诏曰波斯经教，出自大秦，传习而来。久行中国，爰初建寺，因以为名。将以示人必循其本。其两京波斯寺，宜改为大秦寺。天下诸州郡宜准此。此大秦寺建立之缘起。而碑言贞观中，即诏赐名大秦寺，夷僧之夸词也。《舒元舆重岩寺碑》云，合天下三夷寺，不足当吾释寺一小邑之教。释寺唯一，夷寺有三，摩尼即末尼也，大秦即景教也，袄神即波斯也。今据元舆记而详考之。《长安志》曰：布政司西南隅胡袄祠，武德四年立，西域胡天神也。祠有萨宝府官，主祠袄神，亦以胡祝称其职。《东京记》引《四夷朝贡图》云：康国有神名袄，毕国有火袄祠，疑因是建庙。王溥《唐会要》云：波斯国，西与吐番康居接，西北距拂菻〈（即大秦也）〉，其俗事天地、日月、水火诸神。西域诸胡事火袄者，皆诣波斯受法，故曰波斯教，即火袄也。宋人姚宽曰：火袄字从天，胡神也。经所谓摩酰首罗，本起大波斯国，号苏鲁支。有弟子名元真，居波斯国大总长如火山后，化行于中国。然袄神专主事火，而宽以为摩酰首罗者。以波斯之教事天地水火之总，故诸胡皆诣受教，不专一法也。大秦之教本不出于波斯，及阿罗诃者出，则自别于诸胡。碑言三百六十五种之中，或空有以沦二，或祷祀以邀福，彼不欲过而问焉。初假波斯之名以入长安，后乃改名以立异。若末尼，则志磐统纪，序之独详开元二十年敕云。末尼本是邪儿，妄称佛法既为西胡师法，其徒自行，不须科罚。会昌三年秋，敕京城女末尼，凡七十二人皆死。梁贞明六年，陈州末尼反，立母乙为天子，发兵禽斩之。其徒不茹荤酒，夜聚淫秽，画魔王踞坐佛为洗足，云佛上大乘，我乃上上乘。盖末尼为白云白莲之流，于三种中为最劣。以元舆三夷寺之例，核而断之。三夷寺皆外道也，皆邪教也，所谓景教流行者，皆夷僧之黠者。稍通文字妄为之词，非果有异于摩尼袄神也〈（钱民《景教考》）〉。

按：西洋奉天主耶稣，或谓即大秦遗教，据碑有判十字以定四方之语，与今天主教似合。然《日下旧闻考》载天主堂，构于西洋利玛窦，自欧罗巴航海九万里入中国，崇奉天主云云。若大秦一名如德亚，今称西多尔，其在欧罗巴南印度之西，相距甚辽远，似不能合为一也。杭氏谓唐之回纥，即今之回回，说亦未然。唐之回纥即

回鹘，其地与薛延陀为邻，距长安只七千里，若回回有祖国，以今职方诸书考之，在古大秦国之东，一名伯尔西亚，今称包社大白头番，与回纥隔远，亦不能合为一也。碑称大秦国上德阿罗本，而《唐书·西域传》所载诸国，惟拂菻一名大秦，然无一语及景教入中国之事。《唐会要》称波斯国，西北距拂菻，则波斯在拂菻之东南，故《长安志》所载大秦寺，初谓之波斯寺。玩天宝四载诏书，波斯经教出于大秦，则所谓景教者，实自波斯，而溯其源于大秦也。《唐书·西域传》波斯距京师万五千里，其法祠祆神，与《唐会要》语同，然亦无所谓景教者。祆神字，当从示从天，读呼烟切，与从夭者别。《说文》云，关中谓天为祆；《广韵》云，胡神。所谓关中者，统西域而言。西北谓国，事天最敬，故君长谓之天可汗，山谓之天山，而神谓之祆神。延及欧罗巴，奉教谓之天主，皆以天该之。唐转载波斯国俗似与今回回相同，此碑称常然真寂、戢隐真威、亭午升真、真常之道、占青云而载真经，举真字不一而足。今所建回回堂谓之礼拜寺，又谓之真教寺，似乎今回回之教，未始不源于景教。然其中自有同异，特以彼教难通，未能剖析，姑备录诸说，以资博考。至碑称景教景字之义，文中只二语云：景宿告祥悬，景日以破暗府。是与景星景光，流照之义相符。然则唐避讳而以景代丙，亦此义欤？〈（《金石萃编》）〉

《四库全书提要》曰：西学凡一卷，附录唐大秦寺碑一篇。碑称贞观十二年，大秦国阿罗本，远将经像，来献上京。即于义宁坊敕造大秦寺一所，度僧二十一人云云。考《西溪丛语》，载唐贞观五年有传法穆护何禄，将祆教诣关闻奏，敕令长安崇化坊立祆寺，号大秦寺，又名波斯寺。至天宝四年七月，敕：波斯经教出自大秦，传习而来，久行中国，爰初建寺，因以为名，将以示人，必循其本。其两京波斯寺，并宜改为大秦寺。天下诸州郡有者准此。《册府元龟》载开元七年，吐火罗国王上表献解天文人文慕阁，智慧幽深，问无不知，伏乞天恩唤取，问诸教法。知其人如此之艺能，请置一法堂，依本教供养。段成式《酉阳杂俎》载孝亿国界三千馀里，举俗事祆，不识佛法，有祆祠二千馀所；又载德建国，乌浒河中有火祆祠，相传其神本自波斯国乘神通来，因立祆祠，内无像，于大屋下置小庐舍向西，人向东礼神。有一铜马，国人言自天而下。据此数说，则西洋人即所谓祆，斯天主即所谓祆神，中国具有纪载。不但有此碑可证，又杜预注《左传》，次睢之社，曰睢受汴，东经陈留、梁谯、彭城入泗。此水次有祆神，皆社祠。顾野王《玉篇》，亦有祆字，音啗怜切，注为祆神。徐铉据以增入《说文》，宋敏求《东京记》载宁远坊有祆神庙，注曰：《四夷朝贡图》云，康国有神名祆，毕国有火祆祠，或曰石勒时立，此是祆教，其来已久，亦不始于唐。岳珂《桧史》记番禺海祆，其最豪者蒲姓，号白番人，本占城之贡人，留中国以通往来之货，屋室侈靡逾制，性尚鬼而好洁，平居终日，相与膜拜祈福，有堂焉以祀，如中国之佛，而实无像设，称谓髻牙，亦莫能晓，竟不知为何神。有碑高袤数丈，上皆刻异书如篆籀，是为像主，拜者皆向之。是祆教至宋之末年，尚由贾舶达广州，而利玛窦之初来，乃詫为亘古未睹，艾儒略作此书，既援唐碑以自证，则其为祆教更无疑义。乃无一人援古事以抉其源流，遂使蔓延于海内。盖万历以来，士大夫大抵讲心学，刻语录，即尽一生之能事。

故不能证实考古，以遏邪说之流行也。

卷二十七

明文秉《烈皇小识》：崇祯初，始行天主教。上海徐光启，教中人也。入政府力进其说，官府供养诸铜佛像，尽毁碎，至是悼灵王病笃。上临视之，王言九莲华娘娘立空中，历数毁坏三宝，及苛求武清云云。言讫而薨。上大惊惧。无及京师天主堂，有二西人主之，龙华民、汤若望也。皈其教者，先命取其家佛像来天主殿前，有石幢一，石池一，其党取佛像至，即于幢上撞碎，弃池中，率以为常。某年六月初一日，复建此会。方日正中，天无纤云，适举火忽大雷一声，将佛像炉炭尽摄去，众皆汗流合掌，念阿弥陀佛，遂绝此会。

《澳门纪略》曰：澳中凡庙所奉天主，有诞生图、被难图、飞升图，其说以耶稣行教至一国，国人裸而缚之十字木架，钉其首及四肢，三日苏，飞还本国。更越四十日而上升，年三十有三。故奉教者必奉十字架，每七日一礼拜。至期男女分投诸寺，长跪听僧演说。岁中天主出游，三巴则以十月，板樟以三月九月，支粮以三月，大庙则二月、五月、六月。凡三出游，率先夕诣龙松庙迎像至本寺，然灯达旦，澳众毕集，黑奴舁被难像前行，番童诵咒随之。又以番童象天神，披发而翼，来往腾跃，诸僧手香独步，其后又用老僧抱一耶稣像，上张锦棚，随从如前仪。岁三月十五日，为天主难日，寺僧皆暗，越十七日复鸣。诸番彻酒肉三日，虽果饵啖不至饱。番僧不一类，三巴寺僧削发披青冠斗帽，司教者曰法王，由大西洋来。澳酋无与敌体者，有大事疑狱，兵头番目不能决，则请命，命出，奉之惟谨。其出入张盖，树幡幢，僧雏拥卫之。男女见者辄前跪捧足，俟过然后起。法王或摩其顶，以为大幸，妇女尤信向之。龙松庙僧，亦削发蒙毡，内衣白而长，外覆以青。板樟庙僧，不冠，曳长衣，外玄内白，复以白布覆其两肩。噶斯兰僧，服粗布衣，带索草屨，不冠不袜，出入持盖。是二庙僧，有尽削其发者，有但去其顶发者。他如大庙、风信、花王、支粮诸庙，则系本澳自行焚香，秃顶而圆，被长青衣，无妻室，而左右列侍番女，于庙于家惟所便。盖火居衲子之流，其通晓天文，曾游京师者，皆留髭须，解华语，分住各庙中。诸僧往来番人家，其人他出，径入室见其妇。以所携藤或雨伞置诸户外，其人归，见而避之。惟三巴戒律綦严，番妇入寺者，为之持咒禳解。寺僧不苟出入，即出必以人伴之，书其名于版以为志。尼曰圣母，其敬奉尤甚于法王。一女为尼，其家人罹重辟，得女尼片纸立宥之。然必捐千金致诸公，故入寺者鲜。寺中尼凡四十有奇。三巴寺在澳东北，依山为之。高数寻，屋侧启门，制狭长石作雕镂，金碧照耀，上如覆幔，旁绮疏瑰丽。所奉曰天母，名玛利亚，貌如少女，抱一婴儿。曰天主耶稣，衣非缝制，自顶被体，皆采饰平画，障以琉璃，望之如塑。旁貌方论说状，须眉竖者如怒，扬者如喜，耳重轮，鼻隆准，三十许人，左手执浑天仪，右叉指若动，目若瞩，口若声。

又曰：天主教者，西土曰天主耶稣。汉哀帝元寿二年庚申，生于如德亚国，为天主教肇生人类之邦。西行教至其国，奉之至今。甚且沾染中土，诱惑华人。在明则上至公卿，下逮士庶。迨日奉诏禁，而博士弟子，尚有信而从之者。其徒著书阐述，多

至百餘种。士大夫又为润色其文词，以致谈天言命，几于乱聪。今就澳门取其书观之，所云五经十诫，大都不离天堂地狱之说。而词特陋劣，较之佛书尤甚。闲尝寻求其故。西洋诸国，由来皆崇佛教、回回教，观其字用梵书，历法亦与回回同源。则意大利亚之教，当与诸国奉佛奉回回者无异，特其俗好奇喜新。聪明之士，遂攘回回事天之名而据如来天堂地狱之实，以兼行其说。又虑不足加其上也，以为尊莫天若，天有主，则尊愈莫若。盖其好胜之俗为之，不独史称历法云尔也。昔西人有行教于安南者，举国惑之。王患之，逐其人，立二帜于郊下。令曰：从吾者立赤帜下，宥之；否则立白帜下，立杀之。竟无一立赤帜下者，王怒，然炮杀之尽。至今不与西洋通市，至则举大炮击之，西人亦卒不敢往。倭亦然，噶罗巴马头，石凿十字架于路口，武士露刃夹路立，商其国者，必践十字路入，否则加刃，虽西人亦不敢违。又埋耶稣石像于城阙，以蹈践之。盖诸番严恶之如此，中土人士，乃信而奉之，如恐弗及。明臣蒋德璟序《破邪集》，且为调停其间。夫逃杨归儒，归斯受之，犹可说也；援儒入墨援而附之，不可说也。必如圣朝用其历法，而放斥其邪教，庶乎两得之矣。

赵翼《檐曝杂记》曰：天主堂在宣武门内，钦天监正西洋人刘松龄、高慎思等所居也。堂之为屋，圆而穹如城，门洞而明爽异常。所供天主，如美少年，名耶稣，彼中圣人也。像绘于壁而突出，似离立不著壁者。堂之旁有观星台，列架以贮千里镜，镜以木为筒，长七八尺，中空而嵌以玻璃，有一层者、两层者、三层者。余尝登其台，以镜视天，赤日中亦见星斗，视城外则玉泉山宝塔，近在咫尺间，砖缝亦历历可数。而玻璃之单层者，所照山河人物皆正，两层者悉倒，三层者则又正矣。有楼为作乐之所，一虬须者坐而鼓琴，则笙箫磬笛锤鼓铙镯之声，无一不备。其法设木架于楼架之上，悬铅管数十，下垂不及楼板寸许。楼板两层，板有缝，与各管孔相对，一人在东南隅，鼓鞀以作气，气在夹板中，尽趋于铅管下之缝，由缝直达于管，管各有一铜丝，系于琴弦，虬须者拨弦，则各丝自抽，顿其管中之关捩而发响矣。铅管大小不同，中各有窾窍，以象诸乐之声，故一人鼓琴，而众管齐鸣，百乐无不备，真奇巧。又有乐锤，并不烦人挑拨，而按时自鸣，亦备诸乐之声，尤为巧绝。

俞正燮《癸巳类稿》曰：西域有丛神，谓之天祠。有主祠者如巫覡，至其教成，其徒惟奉本师，不复奉天神，势则然也。佛藏《贤愚因缘经》云，过去提婆令奴王，将至天祠，泥木天像，起身为礼。前王五百子中，设至天祠，自礼天像。诸余泥木天像，悉不作礼。又云，恒河边有摩尼跋罗天祠，毗沙门王白帝释言，我有一臣，摩尼跋罗。有转相从其祠求子，是所谓天神者。事火事日，又杂兼众神，所谓主者庙祝，如马韩各立一人，主祭天神，名之曰天君也。其人非一，惟耶稣能成大宗。耶稣亦作尔息，亦作尔撒，对音字不能审也。佛时乾闥婆、阿修罗皆其教，传之耶稣，其教始盛。耶稣生当汉哀帝元寿二年，景宿告祥，在如德亚地。唐建中二年，大秦寺僧景净立《景教流行中国碑》，言大秦寺，始贞观十二年七月。碑称三一妙身，无元真主阿罗诃。又称其母为三一分身，景尊弥施诃。云室女诞圣于大秦，又

言阿罗诃存须削顶，七时礼赞，七日一荐，则兼摩尼法。唐以后，宋元不见于史。明万历九年，其人复至广东。二十九年，至京师。《明史》云，礼部郎中徐如珂，召天主教二人，授以笔札，所记舛缪不相合。回回《干尔塞经》则云，尔撒圣人者，亦阿丹圣人之后。立教敬天为主，传徒繁盛，战胜攻克。或通其妻，托求异术。尔撒告妻，畏人缚发。妻于是夜暗系其发，仇至遭擒，便被杀害。其徒愤恨天不垂佑，乃奉天主，不复事天。天主教则言耶稣行教，国王磔之十字架上。其徒所传艾儒略《万物真源》、冯秉正《圣言广益全编》及其诂自证等经，冗鄙无可采语。十字架者，景教碑所言判十字以定四方者也。《贤愚因缘经》、《优婆鞠提缘品》云，梵志或事日月，翘脚向之；或复事火，朝夕然之。即《通典》注言，大秦胡事火咒诅也。《西域记》云，钵罗那迦天祠，人露形旦上高柱，一手执柱端，一足蹑旁杙。一手一足，虚悬向外。视日影求出生死，所谓裸形求仙，是尼犍法。然则十字架者，高柱及杙，后不事日，犹留其式。耶稣裸体，张十字架上者。耶稣以他事被杀，而遗像具生时露形上高柱，翘手脚视日也。其徒文言之则曰定四方，妄言之则曰耶稣磔于十字架。耶稣诚磔死架上，何忍宝其受惨刑具而顶礼之，且耶稣母何为以弄其儿哉。《大唐西域求法高僧传》云，诸外道先有九十六部，今但十馀，斋会聚集，各为一处。是彼时犹与佛教同赴斋请，其截然分判不知始于何时。今天主教皆力拒佛，其自言知识在脑不在心，盖为人穷工极巧，而心窍不开，在彼国为常，在中国则为怪也。乃好诱人为之，而自述本师之事，亦不求所本。然则耶稣在西洋为持世之人，而他部之人入其教，则亦无心肝之人矣（案耶稣磔死十字架，汤若望书有之，不应汤若望不知天主事迹也）。

歙县杨光先《辟邪论》上篇曰：历官李祖白，天主教之门人也。著《天学传概》一卷，其言曰：

天主上帝，开辟乾坤，而生初人，男女各一。初人子孙，聚居如德亚国。此外东西南北，并无人居。当是时，事一主奉一教，纷歧邪说，无自而生。其后生齿日繁，散走遐邈。而大东大西，有人之始，其时略同。考之史册推以历年，在中国为伏羲氏。即非伏羲，亦必先伏羲不远，为中国有人之始。此中国之初人，实如德亚之苗裔。自西徂东，天学固其所怀来也。生长子孙，家传户习。此时此学之在中夏，必倍昌明于今之世矣。延至唐虞三代，君臣告诫于朝，圣贤垂训于后，往往呼天称帝，以相警励。其见之《书》曰：昭受上帝，天其申命用休。《诗》曰：文王在上，于昭于天。《鲁论》曰：获罪于天，无所祷也。《中庸》曰：郊社之礼，所以事上帝也。《孟子》曰：乐天畏天事天。何莫非天学之微言法语乎，审是则中国之教，无先天学者。噫，小人而无忌惮，亦至此哉。不思今日之天下，即三皇五帝之天下也。

祖白谓历代之圣君圣臣，是邪教之苗裔；六经四书，是邪教之微言；将何以分别我大清之君臣，而不为邪教之苗裔乎。而弁其端者曰，康熙三年，柱下史昆陵许渐敬题。噫吁异哉，以史臣，以谏官，而亦为此言耶。虽前明之季，学士大夫如徐光启

、李之藻、李天经、冯应京、樊良枢者，多为天主教作序，然或序其历法，或序其仪器，或序其算数，至进天主书像图说，则罔有序之者，实汤若望自序之，可见徐李诸人，犹知不敢公然得罪名教也。若望之为书也，曰男女各一，以为人类之初祖，未敢斥言覆载之内。尽是其教之子孙也。祖白之为书也，则尽我中国而如德亚之矣；尽我中国古先帝圣师，而邪教苗裔之矣；尽我历代之圣经贤传，而邪教绪馀之矣，岂止妄而已哉。天主教不许供君亲牌位，不许祀祖先父母，真率天下而无君父者也。而许侍御序之曰，二氏终其身于君臣父子，而莫识其所为天，即儒者或不能无弊。噫，是何言也。二氏寺观供奉龙牌，是尚识君臣；佛经言供养于辟支佛，不如孝堂上二亲，是尚识父子，况吾儒以天秩、天序、天伦、天性立教乎。唯天主耶稣以犯其国法钉死，是莫识君臣；耶稣之母玛利亚，有夫名若瑟，而曰耶稣不由父生，及皈依彼教人，不得供奉祖父神主，是莫识父子。许君颠倒之甚，至谓儒者言天有弊，是先圣乎？先贤乎？不妨明指其人，与众攻之。如无其人，不宜作此非圣之文，自毁周孔之教也。杨墨之害道也，不过曰为我兼爱，而孟子亟拒之曰：杨墨之道不息，孔子之道不著，传概之害道也。苗裔我君臣，学徒我周孔。祖白之意若曰，孔子之道不息，天主之教不著，孟子之拒，恐人至于无父无君；祖白之著，恐人至于有父有君。而许君为祖白作序，是拒孔孟矣，遵祖白矣。儒者不能无弊，许君自道之也。

邪教开堂于京师宣武门之内，东华门之东，阜城门之西，山东之济南，江南之淮安、扬州、镇江、江宁、苏州、常熟、上海，浙之杭州、金华、兰溪，闽之福州、建宁、延平、汀州，江石之南昌、建昌、赣州，东粤之广州，西粤之桂林，蜀之重庆、保宁，楚之武昌，秦之西安，晋之太原、绛州，豫之开封，凡三十窟穴。而广东之香山壘盈万人，盘踞其间，成一大都会。以暗地送往迎来，若望藉历法以藏身金门，而棋布邪教之党羽于大清十三省要害之地，其意欲何为乎。明纲之所以不纽者，由废祖宗之法，弛通海泄漏之律。徐光启以历法荐利玛窦等于朝，以数万里不朝贡之人，来而弗讥其所从来，去而弗究其所从去。行不监押之，止不关防之，十三直省之山川形势、兵马钱粮，靡不收归图籍而弗之禁，古今有此玩待外国人之政否。大清因明之待西洋如此，习以为常，不察伏戎于莽万一，窃发百馀年后，将有知。予言之不得已者。

其下篇云：天主教所事之像名曰耶稣，手执一圆象。问为何物，则曰天；问天何以持于耶稣之手，则曰天不能自成其为天，如万有之不能自成其为万有，必有造之者而后成。天主为万有之初有，其有无元而为万有元，超形与声，不落见闻，乃从实无造成实有，不需材料器具时日，先造无量数天神无形之体，次及造人。其造人也，必先造天地品汇诸物，以为覆载安养之需。故先造天造地，造飞走鳞介种植等类，乃始造人。男女各一，男名亚当，女名厄袜，以为人类之初祖。天为有始，天主为无始，有始生于无始，故称天主焉。次造天堂，以福事天主者之灵魂，造地狱以苦不事天主者之灵魂。人有罪应入地狱者，哀悔于耶稣之前，并祈耶稣之母，以转达于天主，即赦其人之罪，灵魂亦得升于天堂。惟诸佛为魔鬼，在地狱中永不得出

。问耶稣为谁，曰即天主；问天主，主宰天地万物者也。何为下生人世，曰天主悯亚当造罪，祸延世世苗裔，许躬自降生救赎。于五千年中，或遣天神下告，或托前知之口，代传降生。在世事迹，预题其端，载之国史。降生期至，天神报童女玛利亚，胎孕天主，玛利亚怡然允从，遂生子名曰耶稣。故玛利亚为天主之母，童身尚犹未坏。问耶稣生于何代何时，曰生于汉哀帝元寿二年庚申。

噫！荒唐怪诞，亦至此哉。夫天二气之所结撰而成，非有所造而成者也。设天果有天主，则覆载之内，四海万国无一而非天主之所宰制，必无独主如德亚一国之理。独主一国，岂得称天主哉。既称天主，则天上地下，四海万国，物类甚多，皆待天主宰制。天主下生三十三年，谁代主宰其事。天地既无主宰，则天亦不运行，地亦不长养，人亦不生死，物亦不蕃茂，而万类不几息矣。天主欲救亚当，胡不下生于造天之初，乃生于汉之元寿庚申。天主造人当造盛德至善之人，以为人类之初祖，犹恐后人之不善继述，何造一骄傲为恶之亚当，致子孙世世受祸。且其子孙中，又有圣有贤，有智有仁，不尽肖亚当所为，又何人造之哉。天主下生救之，宜造化存神型仁讲让，以登一世于皋熙，其或庶几，乃不识其大，而好行小惠，惟以瘳人之疾，生人之死，履海幻食，天堂地狱为事，又安能救一世之云祲，去恶而迁善，以还造化之固有哉。释氏销罪，必令忏悔，彼教则但崇事耶稣母子者，即升之天堂。不奉之者，即下之地狱。使奉者皆善人，不奉者皆恶人，犹可言也。苟奉者皆恶人，不奉者皆善人，不皆颠倒赏罚乎。谓佛堕地狱中，永不得出，谁则见之。而耶稣生钉十字架，则现身剑树苦海，岂有主宰天地万物之人，而不能自主其一身之性命者乎。以造化世界之上帝，而世人能戕之、戮之者乎。剽窃释氏天堂地狱之唾馀，而反唇谤佛，则虽道教方士之剽佛谤佛，不如是甚也。且又援儒而谤儒，历引六经之上帝，而断章以证其为天主。曰苍苍之天，乃上帝所役使，或东或西，无头无腹，无手无足，未可为尊，况于下地乃众足所践，污秽所归，安有可尊之势。夫不尊天地而尊上帝，犹可言也；尊耶稣为上帝，则不可言也。耶稣而诚全天德之圣人也，则必一言而为法后世，一事而泽被四海，若伏羲文王之明易象，尧舜之致时雍，大禹之平水土，周公之制礼乐，孔子之明道德，斯万世之功也，耶稣有一于是乎？如以瘳人之病，起人之死为功，此华陀良医、祝由幻术之事，非大圣人之事也，更非主宰天地万物者之事也。苟以此为功，则何如不令人病，不令人死之功更大也。以上帝之圣神广运，一一待其遇病瘳之、遇死起之，则已不胜其劳。遇耶稣者一二，不遇耶稣者无量无边，其救世之功安在也。且利玛窦之书止载耶稣救世功毕，复升归天，而讳其死于王难。至汤若望黜不若利玛窦，乃并其钉死受罪，图写而直布之，其去黄巾五斗米之张道陵几何。而世尚或以其制器之精奇而喜之，或以其不婚不宦而重之。不知其仪器精者，兵械亦精，适足为我隐患也；不婚宦者，其志不在小，乃在诱吾民而去之，如图日本取吕宋之已事可鉴也。《诗》曰：相彼雨雪，先集为霰。《传》又曰：鹰化为鸠，君子犹恶其眼。今者海气未靖，讥察当严；揖盗开门，后患宜愆。宁使今日詈予为妒口，毋使异日神予为前知，斯则中国之厚幸也。夫〈（案福音书耶稣自称为上帝之子，而称上帝为神父，未尝谓耶稣即上帝也，此所论稍未中肯，其馀大概得之）〉。

欧罗巴诸国，汉后皆奉天主教，教王居于罗马。明初，日耳曼人路得，别立耶稣教。自是诸国从天主教者半，从耶稣教者半，然所谓天主者，即耶稣，其书同而讲解异。按耶稣生于犹太，教之盛行，起于罗马，王侯听其颐指，有不从者，国辄被兵，数百年无敢违异，以耶稣为上天之主宰也。路得称耶稣为救世主，名其教为耶稣教，诸国之奉天主教者，翻然从之不可止（今欧罗巴从天主教者，曰意大利，曰佛郎西，曰比利时，曰西班牙，曰葡萄牙。从耶稣教者，曰英吉利，曰荷兰，曰瑞典，曰普鲁士，曰米利坚。此外两教参杂者，曰奥地利，曰日耳曼。天主教规立十字架，作铜人肖耶稣被钉受难之形，旁有女人像，肖耶稣之母马利亚，耶稣教无之。其余七日礼拜、安息之类皆同。又别有希腊教者，亦天主教别派）。

《瀛环志略》曰：事火神者拜旭日，或燃薪向之拜，民非火化不生，非白日则宇宙无睹，故两地之夷，古有此俗。义起报本，非邪神也。事天神始于摩西，时在有商之初（沃丁年间）。托言天神降于西奈山（在阿剌伯境内），垂十诫以教世人。七日安息，礼拜即起于此。距耶稣之生，尚隔一千数百年。乃天主教之所自出，非即天主教也。天竺自佛教兴而祀火之俗改，今西域之乾竺特，南印度之孟买，仍有拜火之俗，是其明证。波斯则自唐以前尚未改，后其国为回回所夺，始改从回教。然至今礼拜仍兼拜火神，故末恶屿有太阳火神古殿也。中国自前五代时，有祆神祠，又有胡祆祠，火祠。唐时有波斯经教，天宝四年，诏改两京波斯寺为大秦寺，又有《景教流行中国碑》。建中二年，大秦寺僧景净述。今考祆字从示从夭，即天神。其教起于拂菻（即犹太摩西初建此国，耶稣乃其裔孙），本大秦国之东境（大秦，即意大利之罗马国。汉人因其人长大平正，有类中国，故称为大秦。其本国并无此名），谓胡祆之即祆神，祆神之即天神（祆字，本中国人所造，西土不同文，安得有此等字），而属之大秦似也（拂菻自汉初隶罗马，至唐时乃为阿剌伯所夺），是即耶稣教之嚆矢也。若火神教则出自波斯，与大秦无涉，谓为火祆，则已混火神于天神。谓波斯教出于大秦，则又溯本支于异姓。景教一碑，尤为荒诞。景教即火教，中间景宿告祥、悬景日以破暗府、亭午升真云云，皆指太阳火也。又云判十字以定四方、七日一荐云云，又牵涉天主教，其所谓三一妙身、无元真主、阿罗诃者，不知何人。而一切词语，又皆缘饰释氏糟粕，非火非天非释，竟莫名为何等教矣。盖波斯之祠火神，本其旧俗；而佛教行于天竺，乃其东邻；天神教行于大秦，乃其西邻。至唐代则大秦之天主教，又已盛行。胡僧之黠者，牵合三教，而创为景教之名，以自高异。中国不知其原委，遽从而崇信之。正昌黎所谓惟怪之欲闻者耳。又碑中云，贞观十二年，大秦国大德阿罗本，远将经像，来献上京。阿罗德果自大秦来，其为天主教无疑，其经当即欧罗巴所传之圣书福音，其像当即耶稣被钉十字架之像，乃当时不闻有此。而其所谓景教者，依傍于波斯之火神，润色以浮屠之门面，是不可解也。自唐以后，佛教盛行，胡祆火祆之祠，波斯大秦之教，俱不复见据泰西人所纪载。惟阿非利加比土之阿比西尼亚，尚有大秦教名，亦仍是波斯火神耳。

○天主教考上〈（魏源）〉

《天学初函》诸书未之见也，所见者西夷述救世主耶稣《新遗诏书》，用汉文译刊，凡十馀卷。曰：《马泰传福音书第一》；《马可传福音书第二》；《路加传福音书第三》；《约翰传福音书第四》，皆述耶稣降生行教灵迹始末也。《圣徒言行传第五》，述耶稣死后诸大弟子传教事迹也；《圣徒保罗寄人书》十篇；《圣徒约翰寄人书》三篇，又《圣徒耶哥伯书》；《彼得罗犹大士书》，皆其门人阐扬师教，犹中土人论学之书也。又《圣人约翰天启之传》，则言天地劫毁，天主重造人物之事，计自开辟至今将六千年，自耶稣降生千有八百三十馀年。称耶稣为基督，其先世自亚伯喇罕至大辟十四代，自大辟至流巴庇伦十四代，自流巴庇伦至基督亦十四代。其四十二代，其母曰马利亚，童女有身，征兆奇异，言是上帝之子降生，代天行化。及长，能使病者愈，死者生，聋者聪，暗者语，盲者视，跛者行，能履海涛，能服邪鬼，能荣槁木，能以七饼分给四千人食，能通各国语言。遣其十二门人行化各郡国，言上帝为神父，耶稣为神子，敬其子即敬天。年三十有二，为犹太国异教所嫉毁之，国王禽而钉之十字架，死后三日复活，母子重逢生于天上，坐于上帝之右。其现身酷死，所以代众生之罪，故惟敬耶稣可以免罪获福，免地狱，生天上。万历中，冯马诺著《天问略》曰，天有十二重，最高之十二重为天主上帝诸神圣处，永静不动，广大无比，即天堂也；其内第十一重，为宗动天；其第十、第九重，为东西岁差天，南北岁差天，其动极微，仅可推算而甚微妙。又其内各重，为日月诸星本动之天，皆自西而东，宗动天自东而西，故先论九重，未及十二也。《福音书》曰，元始有道，道即上帝，万物以道而造，其造生者，人类之光也。光辉耀于暗，而居暗者不识，有上帝所遣之人，名约翰，来为其光所证，令众得信，真光照世，即耶稣也。其身非由私欲而生，乃上帝之子也。

耶稣之教，始于阿细亚州，而西行于欧罗巴，近则并行于墨利加。其西洋人发挥彼教之书曰：大西各国惟知崇拜一上帝，此外无所祈祷，此教何所始？曰：有一《旧遗圣书》，乃上帝指示摩西圣人所录，而摩西子孙传于后世也。其一言上帝之出没，其二言万民之本分，其三言后世之永福永祸。夫上帝先乎天地万物，不可得知其所由来，惟无所不知，无所不能，无所不在，至正至大，至智至诚，则人人可信。故风雷云雨，日月星辰，草木花卉，飞禽走兽，鳞介昆虫，凡天地所覆载，莫非上帝创造，故名之曰天父，曰救世，曰圣神，其实一上帝而已，此当知者一。人生于世，莫不禀受于天。既禀受于天，则此身心皆上帝所生。上帝即人之亲矣，惟子者可不爱敬其大父母乎？次则生我之父母，亦当报罔极之恩，推及同气与天下同类之人，此当知者二。且人莫不有灵魂，常不息不灭，故信上帝而为善，则死后其灵永享天福，违上帝而为恶，则死后其灵永受苦罚，此当知者三。上帝无形无声，恐人不知，故留书以救世。其圣书始于夏，终于汉。前者已阅三千年，后者已阅二千年馀矣。其书半是亚细亚之西希伯来人所录，半是欧罗巴之东希腊人所录。

又有《神理论》曰，天地内有神，为极大全能，造化万物，管理万物。人不能自生

，物不能自造，日星何以循环，山川何以凝载，草木何以荣落，飞走潜介何以视听鸣动，曰灵曰魂，曰心曰性，皆神之所为也。是神独一无二，最始无前。倘有对待，有后起，即非神天之神也。莫大于天地，然天地有形可见，神天无形；天地有终始，神天无终始；天地乃受造之物，所造之者神也。天地乃运动之机器，所以运之者神也。天地尚不可称神，而世人常敬数神千百神，如日月云雷，山海社稷，则以其尊大显赫而神之。古人有文武出众，功德在人者则神之，不知天上地下，止有一神所管，更无二神可抗。故专言神，恐邻于祇鬼；专言天，恐泥于形气，惟合言神天，乃足该至大至灵之宗，即儒书所谓造化，所谓上帝，非世俗玉皇大帝之谓者也。谓神曰灵亦可，但有人灵，有仙灵，有天灵。人灵与身体相结，不脱于物，亦神所造，非神也。仙灵乃神之使者，无粗重之身，而有细妙之身，亦神所造，非神也。惟天灵，即神天，全无身体无方所，无在无不在，故《易》曰阴阳不测之谓神，妙万物之谓神，不疾而速，不行而至之谓神。

○天主教考中

天主垂世为十大诫。十大诫者，当中国商朝时，神天降于如大国之西奈山，文留石碑，又以大声音，宣其命令。惟召圣人摩西上山受上帝之命，藏在金匮千年，至耶稣兴，始以其法示人。凡戴天履地，皆宜祇遵。其一，神天曰：除我外不可有别神也〈（凡人手所作之木偶土石及山川祖宗等神，皆不可奉，盖拜祭之礼，止可施于神天，不可施于他人，以分此心，宜全心一意，以敬神天也）〉；其二，神天曰：不可为我而造雕画之像，不可立庙设位，陈牲酒，施鼓乐，赞诵而事神也〈（礼拜之日，虽耶稣及圣母之像，十字之架，皆不可设，盖无形之圣神，有形则非神矣）〉；其三，神天曰：尔不可轻用神名〈（古时以色列国民，受神遗诏，述神名曰耶何瓦，汉译言自然而然之神也。凡发愿发誓祈祷、闲语时，不可泛称神名，必至诚用之）〉；其四，神天曰：撒巴日宜守礼，其前六日，可兼营尔业，惟第七日不可务别业，并尔子女婢仆牲口，门内之客皆然。盖六日内，神主造天地海，第七日乃神主安息日。故宜守之撒巴即礼拜日也，第七日不惟罢外事，乃亦息内念，已往未来，一切闲事勿念。一心专念神天，或拜神，或读圣书，或省察己心，或劝化他人，皆所以保灵魂体造化〉。以上四诫，皆属敬天，以下六条乃及五当。其五，神天曰：敬尔父母；六曰不可杀人〈（不但害人，灵魂不可，即自戕者其灵魂陷入地狱。故临难可死，不可自戕，最为大罪）〉，七曰不可奸人妻〈（不惟禁外淫，并不许养妾，凡富贵之人，可用婢仆无数，惟不可置妾，无子，亦听于命，不可违戒）〉；八曰不可盗人物；九曰不可妄证及尔邻者；十曰不可贪人之所有〈（上数戒皆外事，此则并心内贪念戒之）〉。

耶稣曰：尔以全心、全灵魂、全明悟，而爱尔主尔神，此乃第一大诫。其第二，则必爱尔邻如己焉。此耶稣述十诫大意，归此敬天爱人二者。然敬天则无不爱人，故二者中，又以敬天为要。圣徒保罗曰：恶报有三，一者今世诸难；二者死亡大痛；三者死后永苦。凡有罪者，不能脱免，惟信耶稣可得救之。何者？耶稣在世，成全

律法，有大功劳，信之则其功归我。又耶稣曾受艰苦代我当罪，信之则我罪归他。大哉盛哉。施舍生命，以免我苦；以其痛苦，我得平安；以其死亡，我得生活；以其祸害，我得永福。天上神仙，其力有限，其位非高，不如耶稣力大尊极，贵为神子，位为参天，自弃天光，降此红尘，代人受苦，以救万世不信之者。虽善人亦堕落，能信之者，即恶人立升天堂。至万万年，还有馀祥焉。

○天主教考下

《天学初函》诸书，四库全书列诸存目。今略录其提要，曰：《二十五言》一卷，明利玛窦撰。西洋人之入中国，自利玛窦始。西洋教法传中国，亦自此二十五条始。大旨多剽窃释氏而文词尤拙，盖西方之教，惟有佛书。欧罗巴人取其意而变幻之，犹未能甚离其本。厥后既入中国，习见儒书，则因缘假借以文其说，乃渐至蔓衍支离，不可究诘。自以为超出三教上矣。附存其目，庶可知彼教之初，所见不过如是也。

又《天主实义》二卷，明利玛窦撰。是书成于万历癸卯，凡八篇。首篇论天主始制天地万物，而主宰安养之；二篇解释世人错认天主；三篇论人魂不灭，大异禽兽；四篇辨释鬼神及人魂异论，天下万物，不可谓之一体；五篇排辩轮回六道，戒杀生之谬，而明斋素之意，在于正志；六篇解释意不可灭，并论死后必有天堂、地狱之赏罚；七篇论人性本善，并述天主门士之学；八篇总举泰西俗尚，而论其传道之士，所以不娶之意，并释天主降生西土来由。大旨主于使人尊信天主，以行其教。知儒教之不可攻，则附会六经中上帝之说，以合于天主，而特攻释氏以求胜然。天堂地狱之说与轮回之说，相去无几，特小变释氏之说，而本原则一耳。

又《畸人》十篇二卷，附《西琴曲意》一卷，明利玛窦撰。是书成于万历戊申，凡十篇。皆设为问答以申彼教之说。一谓人寿既过，误犹为有；二谓人于今世，惟侨寓耳；三谓常念死候，利行为祥；四谓常念死后，备死后审；五谓君子希言，而欲无言；六谓斋素正旨，非由戒杀；七谓自省自责；无为为尤；八谓善恶之报，在身之后；九谓妄询未来，自速身凶；十谓富而贪吝，苦于贫窶。其言宏肆博辩，颇足动听，大抵掇释氏生死无常、罪福不爽之说，而不取其轮回戒杀不娶之说，以附会于儒理，使人猝不可攻。较所作天主实义，纯涉支离荒诞者，立说较巧。以佛书比之，天主实义，犹其礼忏，此则犹其谈禅也。末附《西琴曲意》八章，乃万历庚子利玛窦觐京师所献，皆译以华言，非其本旨。惟曲意仅存，以其旨与十论相发，故附录书末焉。

又《七克》七卷，明西洋人庞迪我撰，书成于万历甲辰。其说以天主所禁罪宗凡七：一谓骄傲；二谓嫉妒；三谓怪吝；四谓忿怒；五谓迷饮食；六谓迷色；七谓懈惰于善。迪我因作此书，发明其义。一曰伏傲；二曰平妒；三曰解贪；四曰熄忿；五曰塞饕；六曰防淫；七曰策怠。其言出于儒墨之间，就所论之一事言之，不为无理

。而皆归本敬事天主以求福，则其谬在宗旨，不在词说也。其论保守童身一条，载或人难以人俱守贞不婚，人类将灭。乃答以傥世人俱守贞，人类将灭，天主必有以处之，何烦过虑。其词已遁。又谓生人之类有生必有灭，亦始终成毁之常，若得以此终，以此毁，幸甚大愿。则又词穷理屈，不觉遁于释氏矣，尚何辟佛之云乎。

又《辨学遗牍》一卷，明利玛窦撰，是编乃其与虞淳熙论释氏书，及辨莲池和尚《竹窗三笔》攻击天主之说，齐固失矣，楚亦未为得也。

又《交友论》一卷，明利玛窦撰。万历己亥，利玛窦游南昌，与建安王论友道，因着是编以献。其言不甚荒悖，然多为利害而言，醇驳参半。如云友者过誉之害，大于仇者过訾之言，此中理者也。又云，多有密友，便无密友。此洞悉物情者也。至云视其人之友如林，则知其德之盛；视其人之友落落如晨星，则知其德之薄，是导天下以滥交矣。又云，二人为友，不应一富一贫，是止知有通财之义，而不知古礼惟小功同财，不概诸朋友。一相友而即同财，是使富者爱无差等，而贫者且以利合，又岂中庸之道乎。王肯堂《郁冈斋笔麈》曰，利君遗馀《交友论》一编，有味哉其言之也。使其素熟于中土语言文字，当不止是，乃稍删润着于编。则此书为肯堂所点窜矣。

又《西学凡》一卷，明西洋人艾儒略撰。儒略有《职方外纪》已着录。是书成于天启癸亥，《天学初函》之第一种也，所述皆其国建学育才之法。凡分六科：所谓勒铎理加者，文科也；斐录所费亚者，理科也；默第济纳者，医科也；勒义斯者，法科也；加诺搆斯者，教科也；陡禄日亚者，道科也。其教授各有次第，大抵从文入理，而理为之纲。文科如中国之小学，理科则如中国之大学，医科、法科、教科者，皆其事业；道科则在彼法中所谓尽性致命之极也。其致力亦以格物穷理为本，以明体达用为功，与儒学次序略似。特所格之物，皆器数之末；而所穷之理，又支离神怪而不可诘，是所以为异学耳。

又《灵言蠡勺》二卷，明西洋人毕方济撰，而徐光启编录之。书成于天启甲子。皆论亚尼玛之学。亚尼玛者，华言灵性也。凡四篇。一论亚尼玛之体；二论亚尼玛之能；三论亚尼玛之尊；四论亚尼玛所同美好之情，而总归于敬事天主以求福，其实即释氏觉性之说而巧为敷衍耳。明之季年，心学盛行。西士慧黠，因摭佛经而变幻之，以投时好。其说骤行，盖由于此。所谓物必先腐，而后虫生，非尽持论之巧也。

又《空际格致》二卷，明西洋人高一志撰。西法以火气水土为四大元行，而以中国五行兼用金木为非。一志因作此书以畅其说，然其窥测天文不能废五星也，天地自然之气，而欲以强词夺之，乌可得乎。适成其妄而已矣。

《寰有诠》六卷，明西洋人溥泛际撰，书亦成于天启中。其论皆宗天主。又有圆满

纯体不坏等十五篇，总以阐明彼法。

案欧罗巴人，天文推算之密，工匠制作之巧，实逾前古。其议论夸诈迂怪，亦为异端之尤。国朝节取其技能，而禁传其学术，具存深意。其书本不足登册府之编，然如《寰有诠》之类，《明史·艺文志》中已列其名，削而不论，转虑惑诬。故著于录而辟斥之。又《明史》载其书于道家，今考所言，兼剽三教之理，而又举三教全排之，变幻支离，真杂学也。故存其目于杂家。

魏源曰：西域三大教，天主、天方，皆辟佛，皆事天，即佛经所谓婆罗门天祠，其教皆起自上古，稍衰于佛世，而复盛于佛以后。然吾读福音诸书，无一言及于明心之方、修道之事也。又非有治历明时、制器利用之功也。惟以疗病为神奇，称天父神子为创制，尚不及天方教之条理，何以风行云布，横被西海，莫不尊亲，岂其教入中土者，皆浅人拙译，而精英或不传欤。神天既无形气，无方体，乃降声如德之国，勒石西奈之山，殆甚于赵宋祥符之天书。而摩西一人，上山受命，遂传十诫，则西域之王钦若也。印度上古有婆罗门事天之教，天方、天主，皆衍其宗支，益之谲诞，既莫尊于神天，戒偶像，戒祀先，而耶稣圣母之像，十字之架，家悬户供，何又歧神天而二之耶。斥佛氏之戒杀而力言禽兽异于人之灵魂，万物不可为一体，以济其口腹庖宰之欲，是上帝果不好生而好杀乎。人之灵魂最贵，故人不可杀，亦不可自杀，即殉难自杀，亦必陷地狱，则申生扶苏，召忽屈原，皆地狱中人，反不如临难苟免之人乎。谓上帝初造人类时，止造一男一女，故人各一妻，妻即无道，不可议出，即无子不可娶妾，则何以处淫悍不孝，且何又许富贵人婢仆无数，岂阴许其实而阳禁其名乎。谓人一命终，善恶皆定，受报苦乐，永无改易，更无复生轮回之事，则今生皆初世为人，人皆天主所造，何不但造善信，毋造邪恶乎。耶稣自身受罪，可代众生之罪，则佛言历劫难行苦行，舍头目脑髓若恒河沙，功德当更不可量，耶稣又曷斥之乎。谓孔子佛老皆周时人，仅阅二千馀岁，有名字朝代，但为人中之一人，不能宰制万有，则耶稣诎非西汉末人，又安能代神天以主造化；且圣人之生，孰非天之所子，耶稣自称神天之子，正犹穆罕默德之号天使，何独此之代天则是，彼之代天则非乎。

历览西夷书，惟神理论，颇近吾儒上帝造化之旨，馀皆委巷所谈，君子勿道。又其书皆英夷所刊布，而英吉利旧传不奉天主教（见《海国闻见录》及俘夷安突得口供），及《考每月统纪传》，则又言英吉利民，迁墨利加洲新地，不服水土，疫气流行，皆赴神天之堂，吁救得息，于是国人奉事天主，七日礼拜。又以耳得兰岛，距国数里，结党抗教，国王勒之归顺，且禁买黑奴，亦以耶稣之道，岂昔辟之而近日奉之欤。抑遵波罗特士之天主教，而不遵加特力之天主教，门户不同，旨归小异欤。董子曰：道之大原出于天。故吾儒本天，与释氏之本心若冰炭，乃天方、天主，亦皆本天，而教之冰炭益甚，岂辨生于末学，而本师宗旨，或不尽然欤。周孔语言文字，西不逾流沙，北不暨北海，南不尽南海，广谷大川，风气异宜，天不能不生一人以教治之。群愚服智，群嚣讼服正直。文中子曰：西方之圣人也，中国则

泥。庄子曰：八荒以外，圣人论而不议；九州以外，圣人议而不辨。或复谓东海西海，圣各出而心理同，则又何说焉（道光二十五年，广东总督奏佛兰西国夷，呈请天主教劝人为善，非邪教，请弛汉人习天主教之禁。奏交部议，准海口立天主堂，华人入教者听之。惟不许奸诱妇女，诬骗病人眼睛，违者仍治罪。查西洋之天主教不可知，若中国之天主教，则方其入教也，有吞受药丸、领银三次之事，有扫除祖先神主之事，其同教有男女共宿一堂之事，其病终有本师来取目睛之事，其银每次给百三十两为贸易资本，亏折则复领。凡领三次则不复给，贍之终身。曩京师有医某者，岁终贫困，思惟入天主教可救贫，而邪教又不可入，乃先煎泄药升许，与妻子议，言俟我归，如昏迷者，急取药灌我。于是至天主堂，西洋人授以丸，如小酥饼，使吞之，予百馀金归。至家，则手掷神主，口中喃喃，妻子急如前言，灌药。良久暴下而醒，见厕中有物蠕动，洗而视之，则女形寸许，眉目如生，乃盖之药瓶中。黎明而教师至，手持利刀，索还原物。医言：必告我此何物，乃以相予。教师曰：此乃天主圣母也。入教稍久，则手抱人心，终身信向，不改教矣。乃予之而去。又凡入教，人病将死，必报其师。师至，则妻子皆跪室外，不许入。良久气绝，乃许入。则教师以白布裹死人之首，不许解视，盖睛已去矣。有伪入教者，欲试其术，乃佯病，数日不食，报其师至，果持小刀近前，将取睛，其人奋起夺击之，乃踉跄遁。闻夷市中国铅百斤，可煎文银八两，其馀九十二斤，仍可卖还原价。惟其银必以华人睛点之乃可用。而西洋人睛不济事，故西洋病终无取睛之事，独华人入教则有之也。亦鸦片不行于夷，而行于华之类也）。

卷二十八

（此国界西洋西南洋之间故别为一卷）

都鲁机国，疆域在阿细亚洲者半，在欧罗巴洲者半。在阿细亚洲者，曰南都鲁机，地广而沃。古时巴比罗尼阿国、阿弥尼阿国、厘底阿国、主底阿国旧基也。主底阿旧为巨国，部民种类，由斯为多。方其盛强，邻近诸邦，小者灭，大者服。可与敌者，惟西厘阿与斐尼西阿二国耳。斐尼西阿，都于代厘，雄丽蕃庶，在埃阿尼啉、耶阿厘斯、厘底阿、加厘阿、阿西利阿、巴比罗尼阿诸国之上。此外以大国称者，又有巴比罗尼阿、阿西尼阿，然皆不能长久，后均降于巴社。斯时巴社之腊西王恃其强盛，西夺小阿细亚，南取伊揖，疆甲诸国。意犹未尽，复统大军，北攻额力西〈（额力西，欧罗巴洲大国。一作厄勒祭，在意大里之东。今并于北都鲁机）〉。兵骄无纪律，为额力西非厘王之子阿力山达一战覆之，举国遂属于额力西。迨阿力山达嗣位，尤称富强。身后数子争立，大将色力玉加斯乘内乱而篡之。惟西隅之地，尚属阿力山达之子，旋亦为人所侵，割据分裂，一曰伯牙麻司，一曰朋都司，一曰阿弥尼阿，相继称王。后值罗马盛强之日，沿黑海、里海之间，悉服罗马。惟晏底古斯、弥特厘底斯二王不服，与罗马血战多年，终为罗马所灭，改国为部落者数百年。

及耶苏纪岁七百之际，罗马浸衰，兵戈迭起，西厘阿地、阿西利阿地，均为阿丹回教所据，建都麻那。于是阿丹之游民蜂拥而至，悉夺小阿细亚疆土，树建回旗，令所属地均改奉回教，风俗政事一变。未几黑海之南，干戈不息。复有头目荷多曼者，智勇过人，先得欧罗巴之北都鲁机，建都其地，旋得南都鲁机合为一国。惟耶路萨凌之地，被欧罗巴之克力士顿教人所据。不及百年，克力士顿教人居东不乐，忽退回西。故耶路萨凌仍属于都鲁机矣。南都鲁机屡经变乱，民生不聊。自荷多曼得国以后，历数百年，无干戈之扰。惟回教政尚操切，风俗终不如古。如先日滨底格厘士河岸者，有阿西利阿国，滨欧付底斯河者，有巴比罗尼阿国。及巴社所辖印度河之那麻士加司、依路弥阿、耶路萨凌、萨麻利阿、巴厘阿、斐尼西阿，皆当日巨邦，部落逾百。里社星罗，野无荒土；衢无停辙，牧畜遍野；舟楫连樯，极一时人物之盛。今其地虽存，名多不同，且奈音位之军墙，巴比罗尼阿之城郭，巴色波利士之宫殿，耶路萨凌之庙宇何在；与夫阿腊之船厂，代伊尔之巨舶，西伦之机织商贾，兵卒之众，牲畜之蕃，农夫士女之讴吟，又安在。陵谷沧桑，今古丘壑。人能兴地，非地兴人，信夫。政事与欧罗巴洲之都鲁机同，每大部落立一巴札辖之。地广权重，势成尾大。故千七百年间〈（康熙三十九年）〉，达哈荷麻王时，名虽臣属，实各专制。征调贡献，羁縻阔略。按南都鲁机处一洲中央，距北都远，又隔黑海，常怀跋扈。如东隅巴札之来沙部、巴酸部、荷罗部，鞭长莫及。食税衣租，不供王室。即主底阿之巴札亦复如是。若巴比罗尼阿之巴札曰阿黑，则先后抗拒于那达沙王、疏厘麻王，竟成敌国。千八百有十年〈（嘉庆八年）〉，费几经营，始能黜革。而新立之巴札甫经一二年，复拥众背叛。国王率师往征，竟遭射肩殒命。从

此王家不振，特以世臣夹辅，未及沦夷耳。伊揖原其属国，亦旧设巴札之一。近日不但不臣，且侵夺都鲁机之西厘阿部落，收养亡命，为其爪牙，居民荼毒亦甚矣。各处巴札，专利一削，遇讼狱，则或株连富人而罚之；或听其入教，令人首报而勒赎之；或置豪民于死刑，而籍其财产，皆彼国之大害。

城中山河表里，自成境界，然亦不如印度希麻腊牙、唵底斯两山之形势。在阿弥阿者，以阿腊山为最高，次即西厘阿之黎巴伦山。终年积雪，而中多平原可耕。若主底阿全是山阜，而无高耸。其西隅，有两山夹峙，中仅通人者；有四面拱抱，内皆沃野者。虽绵亘迢迢，而高则仅同主底阿之山。诸河皆导源是山，其最巨者，曰欧付腊底斯河。底格厘士河，一直一曲，均会麻疏腊，同行百有五十里，而出印度海。故欧付底司河，长千四百里，而底格厘阿河，仅八百里，曲直之别也。此外小河纪载未详。湖有底比厘阿湖、晚湖，虽不甚大，山环树绕，风景宜人。风俗、教门、文学，大约与欧罗巴洲之都鲁机同。而各部种类，性情经异。在各处海岸海岛者，俱额力西种也，谓之上等人。在山中者，达戈曼种也，远隔巴札，不服约束。容貌风俗，似是如土比奄之后裔。而游牧为生，好勇斗狠，全类鞑鞑里。如遇行军，但许其虏掠，竟可毋给行粮。然亦难以御节制之师。其在西厘阿、巴里士达、巴比罗尼阿各部者，俱阿丹种也。美髯善骑，经商致富，文雅甲通国。在里麻伦山居住者，有二种。一马罗奈底士，一特鲁西士，均阿丹人也。

马罗奈底士乃贤者马伦所化导之人，因此得名。原居于格斯罗晚山谷，俗奉克力士顿教，阿丹以兵勒令改教，弃家逃来，日久蕃庶，遂攻阿丹近边，并欲侵据耶路萨凌部落，致都鲁机之阿母腊王于千五百八十八年〈（明万历十六年）〉，率兵深入其地，马罗奈底士寡不敌众，始输贡献，改从回教。其俗每村必有一庙，立道观二百馀所，道士业耕种，僧则牧畜，能甘淡泊，人咸敬之。虽幼小之僧，有人遇诸途，亦必口啜其手。官民毋分尊卑，节俭甚于百姓。而日用尚有不足，政事、会议、公所，以阿丹之教断之。彼此有仇，准私报复。其户口十一万五千，兵三万四千。

又有特鲁西士者，种类强悍，亦宗伊揖巴札伐底美所立之回教。在耶稣纪年一千时〈（宋咸平四年）〉，其教始行。与阿丹回教不尽同，被阿丹禁逐，遂逃于里麻伦山极高之地。迨阿母腊王统兵征服马罗奈底士之时，特鲁西士亦往归服。令其自立头目，约束一方。以麦罗为首部，岁贡方物。后因游于意大里，染习奢华，为人中伤而死。其家别选一人，续充教师，世代相继不选外人。部落有大事，即传各小头目会议，并许部众参议，与英吉利政事略同。其人勇敢轻生，闻战争先恐后，不暇觅器械，徒手短衣，长驱赴敌。其战不长平陆，而长山险。居高陵下，鸟枪发无不中。境内所崇祀者，一克力士顿庙，一回教庙。每逢礼拜，两庙俱至。虽无区别，而至克力士顿庙者多。其教师以为经典天神所授，大言自圣。欧罗巴人欲见其经典，从不可得。大抵亦无甚精奥，观于同族联姻，自娶姊妹，已可概见。其额兵共有四万，其户口约二十万。

又有黑两西者，其种类亦居里麻伦山最高之处，属于西厘阿。所奉回教，略同巴社。饮食器皿，非己不用。欲洗自己之罪过，须杀别教自代，都鲁机人皆斥为邪教。惟遇争战，奋不畏死，从未败绩。常以数千而敌万人，国中亦赖此不为俄罗斯吞并。又阿弥尼阿部者，当昔大乱迭起时，受灾较少，户口约十七万。原奉克力士顿教，因罗汶之人前曾至此，故习加特力者亦约二万。第克力士顿之和尚，仅不茹荤，仍皆婚娶，故甚尊加特力之和尚。风俗、政事、教门，与由斯相似，而不桎骯。其贸易近则巴社，远则欧罗巴及印度，并有深入阿未里加洲者。阿弥阿之南，即戈底士丹部落，滨临底格厘士河。地险难耕，多游牧于鞑鞑里。而巴社俗尤刚强，动辄攘夺，为通阿细亚洲中之最悍。产羊裘、地毯、葡萄干、布、丝、药材、树胶、宝石、酒、谷、麦、五金。国中港口，在四马那部内。南都鲁机，在阿细亚洲之最西，又名小阿细亚。东抵巴社，以底格厘士河分界，西抵地中海，南界阿那比阿〈（阿那比阿即阿丹也）〉，北界黑海。东西距千二百里，南北距八百里，幅员五十万方里，户口千万丁。领大部落九，小部落二百十有六。

阿那多里阿，东界路弥阿加、那马尼阿，西西北界海，领小部落八十有四。

加那马尼阿，东北界路弥阿，西北界阿那多尼阿，南界依芝尔，领小部落十有六。

依芝阿，东界阿尔尼悉阿，南界西里阿海，北界加腊马尼阿、路弥阿，领小部落十有六。

路弥阿，东界阿弥尼阿，西界阿那多里阿、加那马尼阿，南界阿尔尼西阿、依芝尔，北界海，领小部落二十有七。

阿弥尼阿，东界巴社，南界哥底士丹、阿尔尼西阿，西界路弥阿，北界海及俄罗斯，领小部落二十有四。

哥底士丹，东界巴社，南界依那加比，西界阿尔尼西阿，北界阿弥尼阿，领小部落十有六。

伊那加比，东界巴社，南界阿拉比阿，西界阿尔尼西阿，北界哥底士丹，领小部落十有九。

阿尔尼西阿，东界依那加比、哥底士丹，南界阿拉比，西界西里阿，北界路弥阿尼阿，领小部落二十有九。西里阿，东界阿尔尼西阿，南界阿腊比阿、伊揖，西界海，北界芝尔，领小部落二十有五。

《职方外纪》：百尔西亚西北诸国，皆为度尔格所并，内有国曰亚刺比亚，中有大

山名西奈山，天主传十诫之处也。土产金、银，极精，亦多宝石。地在二海之中，气候常和，一岁再粟。有树如橡栗，夜露堕其上，即凝为蜜，晨取食之，极甘美。更产百物，俱丰，自古称为福土。其地有沙海，广二千馀里，沙乘大风如浪，行旅遇之，偶为沙浪所压，倏忽上成邱山。凡欲渡者，须以罗经定方向，测道里，又须备粮糗及兼旬之水，乘以骆驼，驼行甚急，可日驰四五百里，又耐渴，一饮可度五六日。其腹容水甚多，客或乏水，则剖驼饮其腹中水。传闻有鸟名弗尼思，其寿至四五百岁。自觉将终，则聚干香木一堆，立其上，待天甚热，摇尾燃火自焚矣。骨肉遗灰变成一虫，虫又变为鸟，故天下止有一鸟而已。西国言人物奇异无两者，皆谓之弗尼思云。其地有一海，长四百里，广百里，水味极咸，性凝结，不生波浪，尝涌大块如松脂不能沉物，虽用力按，抑不能入。曾有国王异之，往观。命人沉水，试之，终不可入。海色一日屡变，日光炫耀，文成五色。因其不生水族，故命曰死海。度尔格之西北，曰那多理亚国，有山多琼石。国人尝往凿之，至一石穴，见石人无算，皆昔时避乱之民，穴居于此，死后为寒气所凝，渐化为石。其地西界欧罗巴处，中隔一海，宽五里许，昔有一名王曰失尔塞者，造一跨海石梁，通连两地，今为风浪冲击，亦崩颓矣。又有地名际刺，产异羊。羊之绒轻细无比，雨中衣之，略不沾濡，即渍以油，毫不污染也。一种异犬，性好窃衣履巾帨之属，稍不慎，辄为窃匿矣。有山生草木皆香，过之则香气馥郁，袭人衣裾（案：《后汉·西域传》从安息绕海北行，有飞桥数百里，即此五里石梁之讹传）。

《新唐书》：拂菻西际海，有西女国，种皆女子，多珍货。附拂菻。拂菻君长岁遣男子配焉。俗产男不举。

《文献通考》：西女国在葱岭之西，其俗与东女同（东女在葱岭东，南近吐蕃，后亦为吐蕃所灭），附于拂菻。唐贞观八年，朝贡始至。

《坤舆图说》：鞑而鞑各国，迤西旧有女国，曰亚玛作搦。骁勇善战。建一神祠，壮丽奇巧，非思议所及。今亦为他国所并，仅存其名耳（案：为他国所并者，即指度尔格国兼并之事）。

《万国地理全图集》曰：土尔其藩属国，北接俄罗斯及黑海，南连亚刺伯及地中海，东接白西国，西至希腊群岛海，为亚齐亚洲极西之地方。北极出自三十度至四十度；东偏自二十六度至四十八度。长二千六百里，阔二千四里。北方山极险峻，高接云霓，河源皆在此山。最长者巴河、地额河，对流而东南，及将入海，两河乃合。屡次涨潦。其湖最著者曰死海。其北为加利湖。其约尔坦河，自北流南，而入死海。

此地古时分为列国。唐朝年间，回回占据其地，居民涂炭。今已千有馀年，土官横征私派，并勒令天主教及希腊回教之徒，概进税贡。山内有蛮族，心野好战，时时掠其游牧。所有列国藩属如左。又曰小亚西亚国，即南都鲁机也。其国半土，山险

峻，物产多出胡丝、干葡萄果等货，遍地古迹。昔时兴旺，今则衰寂。士麦那城，居民十万，所运出运进之货价，每年不止几百万金。列西国之贾，悉来其地。但其城市不洁，瘟疫易生。

补撒大城，居民六万。加士他母尼邑内，有回回庙宇。其黑海北方有得比逊海口，与俄罗斯通商。族类五万人。内地古地亚城，可尼昔西域之王都也。居民六万丁。附近安峨刺城，羊毛最细，用之织布最温软。西瓦邑，六万居民。掘山出铜，其东南海滨。居伯罗岛，地膏腴，出葡萄酒、南果五谷。女多美丽。但因苛政，民稀土旷。罗得岛，水土最宜农。古时各岛皆有土酋，今服属于土尔其。

治阿岛，居民十五万。道光四年，土尔其水师上岸，攻其城池，毁其富庶。

米地邻岛，产酒油。两河中地，北有亚麦尼地，山岭险隘，峒峡深邃。洪水初平之际，巨舟阁于其峰。居民奉耶稣之教，好商贾，不惮跋涉。惟回回官甚磨难其民。其都曰叶西伦，有十万民居。天气冷，七月有雪。巴牙息在山脚，亚麦尼民之学院，内有壮丽之寺，其教主所会也。近河平坦，地亚北客城，与邻国通商。

山内古耳得族类，建堡山穴，以贼盗为生。中地之都会，曰摩俗邻地。或沙或泽，农苦耕耘，贼夺产物。

八塔城，昔回回国都。古时殿宇，祥光灿烂。现时衰废，独存其古迹。瓦砾如山，可想其城之广大。因犯上帝之律例，酷待所虏之犹太人，是以遭废成野。

在两河入海之所，曰巴所刺邑。与印度国通商，屋小街窄人秽，然系万国饶富之市，商贾甚盛。

案：南都鲁本鞑靼种，旧游牧葱岭、伊犁一带，展转西徙，入买诺，居于拉马尼亚者也。

《地球图说》：土耳其国，东界白尔西亚国，南界亚拉比亚国，西界地中海，北界黑海。其百姓约有一千二百万之数，其都城在欧罗巴大洲内。土耳其国相间之处，地名孔士旦，半天主教，半犹太教。北有高山，南有旷野，中央平坦。内有大湖名曰死海，咸而且臭，终无可利用。死海之北有加利利湖，即救主耶稣在此宣讲真理，多医疾病，不时显圣。有约耳坦江，即耶稣领受洗礼之处。又有许多被天火焰烧之城，即巴米辣、巴皮伦、尼尼瓦等城，虽泯没，而旧迹尚存。再稽圣书内言真神始以土尘造人名亚丹，复以亚丹之筋骨造女，以为夫妇，复栽以田园，以与二人居住之处，暨耶路撒冷城，系犹太国之都。内有真神殿宇，当时之民，每年必三至礼拜。迨后犹太国民终不信从，真神震怒，即加大罚，殛其民，毁其城，至今大相悬殊也。城外有橄榄山，即耶稣日在耶路撒冷城宣教，夜回橄榄山栖宿之地。并耶稣生

身之地，长养之地，葬身之地，均在是国。现其冢上，为天主教门徒建立礼拜堂，以耶稣教之门徒无追墓之理也。国内江河极少，运货俱用驼马，必旅伴同行，以御劫掠。牧羊者众，务农者少，有大江名由非刺氏江〈（又名比拉江）〉。土产北果、葡萄酒、五谷、烟叶、绵布、鸦片、胡丝、羊绒布、兽皮、铜等物。道光十六年，被麦西国人侵占西南境界。至二十年，幸欧罗巴大国助而复之。

《外国史略》曰：南土耳其，在亚悉亚藩属地，南抵亚拉回国，北及黑海，东连俄罗斯、白西等国，西及地中海群岛等海。达他匿并君士坦海峡隔之。以俄罗斯之微地曰苏益，与亚非利加相连。北方多山，东方平坦。两大河汇入白西海隅者，一为以法河，一为得义河。所属之地，本古各国，后为罗马所辖。

小亚悉亚，乃半地所凸出者。广袤方圆八千里，居民五百万。田甚丰盛，天气温和，多物产。南果、葡萄俱美，出绵花、鸦片、姜花、烟、木料、牛、马。羊尾长，可织布。又出胡丝、花石、铅。居民多土耳其人，性骄傲。亦多希腊人，多为商匠。在山内者恣游牧，颇为盗贼。居民造搭膊布并缎。地分八郡，最广港口曰士默那，居民十二万五千，多外国商贾。人户稠密，多瘟疫。港多商船，运出者，鸦片、蚕丝、百果、药菜、花毡等货，运入者各工制造之物。广通商，无积聚。土甲，居民十万。旧地亚，居民六万。

属此地之岛曰棋宾岛，在叙利海边，居地中海中。广袤方圆三百四十里，民多希腊人，亦有教师教主。昔本丰盛，多物产，今只出葡萄。极大之城曰尼可西亚，居民万六千。全岛之山水美不胜收，故自古闲逸之士，皆集此以适其意。

罗■岛，广袤方圆二十一里，出南果、绵花、五谷、橄榄油，居民三万。在地中海边，地立新埠，今已三百年，服土耳其之权。

勒布，广袤方圆十二里，居民五万，属土族。出无花果及橄榄油，百姓能力于战。

士其阿，广袤方圆十八里。数年前居民十二万。出南果、胡丝、绵花，向时此岛本乐境，贸易极旺，道光二十年，希腊人欲脱土耳其之酷，因驱逐土兵，土兵来报复，杀男女老幼四万，又将三万人贩卖为奴，遂荒其地。

两河中之地悉广坦，古本乐地。中地之北方，甚丰盛。有牧场，与亚拉回国交界。系沙野，少产物。两河边潴泽尤广，地半游牧，各自有酋长，不服国王之权。山内有新族，亦不畏国君。其都会巴达，系古回回国君之都。居民五万，即与五印度贸易之处。地平坦，前时建巴比伦、尼尼瓦两大邑，为两国之都。于是时据各邻国，亦陷犹太地，且虏其民人，后为他国所灭。间有游牧者至其地，遍地荒野，且其河溢涨，居民受困，地虽甚腴，却无草无菜，又时有瘟疫。其大港曰布所拉，在白西

海隅，为两江汇入，海口商船云集。

北与俄罗斯国所连者曰亚面地，广袤方圆千五百九十三里，居民九十五万。大半山地，所出之谷微，惟牧场颇茂，居民多耶稣教。古原自为一国，被回回攻服，民聪慧善贾，巡游四方，甚殷实，散布亚悉亚各国。在土耳其国，大开银局。其国若务大事，惟亚面人是赖。人奉回教，外多仪，而内极诚实，外国人皆敬之。其会城曰益西伦，在高山上，居民十万，多制造皮布、兵器，多卖与土尔其国。群商每年自亚悉亚集此贸易，辐辏不绝。附此邑有山，巨舟能入，有水患即避此。

叙利亚部，在地中海边，东与亚拉国相连，延及小亚悉亚，广袤方圆二千三百里。有利巴伦山，古多香松，今为游牧之所。东方沙坦，多巉岩。海边地极丰盛，天气热。北方有阿伦得江，足灌溉，两岸山水甚美，多产南果、蒲桃、烟、绵花、五杀。居民二百五十万。养驼、绵羊、山羊、蚕、豕、蜜，山出铁花石及各货。百姓语音不一，教亦不一。若回回、天主教门，犹太人种种有之。昔推叙利亚部为国主，后归罗马所辖。居民久奉天主教，迨亚拉之回回侵迫，令民改从回教。居民不多，荒其田而不耕，较往古盛时，不及百分之一。大马士革城亦丰盛，居民二十万，街狭人稠。

安地悉，居民一万，古为广大之都。海边港口曰亚拉，居民万五千，叠为敌国围困。昔有破拿伦将军，后为佛国王，攻伐而退。后麦西国并英人又取之。哈立城，即山麓大城邑，原居民二十万，于道光二年地震，屋宇倒坏，然山水固极清秀也。犹太国属叙利亚，古时天主创教之地，为罗马国所有者五百余年，后又为回教所属者五百年，后欧罗巴各国大发愤，会兵攻取耶路撒冷之都，旋为土耳其君所据，仍崇回教。故其地虽丰，今则荒甚，仅存耶路撒冷之民，约二万馀，多属天主教。岁有远方人来拜圣墓，瞻古迹。耶稣之都，亦立教主以训犹太民。其国大河曰约耳但河，自北而南，其流甚急，入于死海。在北流所通之湖曰加利利，长二里，阔里馀。在湖滨海南之地多沙，海北地产各物，内多山峰，亦有平坦沃土千里，居民散处无定居。土耳其征其钱粮，按数追纳，逃避者多。约耳但河外有平坦，足资游牧，谷田甚腴。其地分三分，东曰加利利，即耶稣所生长之地；中央曰撒马利亚，百姓以道杂异端，故甚与犹太人结仇；其南曰犹太，亦在此建都焉。

土耳其国有杂族之民，共二百万，乐安逸，好勇战，一人每娶数女。土人甚少，用外国人以代办事。立酷政以儆胁其下，虏异族小儿断其势皮，以为回教。所募之军，所建之船，一切皆效西洋，招异国人为武官。其希腊人住海口，广贸易，亦为水手，亦耕田，约百馀万。崇天主教，或尚罗马教皇所传之教。巧狃务利，不朴实。其女美而惑男，今则民数日少。前统管亚悉亚西方，今被土夷所束。亚面族约十万名，颇老实，在各大城邑经营致富，与峨国同音，族类七百二十万人，与波兰所居相上下，情甚鄙陋，惟饱食无他意，土国制之，易如反掌。其由西国来之杂族，约六百五十万。其犹太国人散在各部，以本祖所居之国为圣地，云集居住，数约九十

万。以买卖为业，其东方有亚拉人数百万，或游牧，皆崇回教。另有蛮族在山内，以抢夺为生，极凶悍。

其产物多绵花，在欧罗巴地，每年约值银三百五十万两。在麦西国约六十万石。亦出烟，每处多至二十万包，国人皆食之。葡萄汁由西方亚悉亚运出者，约六十万担。所出之鸦片，约四千箱，皆运入中国。亦产药材、蜡、蜜、蚕、丝与细羊毛。其马高大善走。制造之物不多，皆买自外国，而易以土产。国多港口，土人不善营生，希腊亚面等国之民，争至此为商。在土默拿一年之货物，运出运入，约价银五千万员。

《地理备考》曰：土耳其国兼摄之地，在亚细亚州之西，纬度起自北三十度起，至四十二度止；经度自东二十三度起，至四十八度止。东至白尔西国，西枕地中海，南接天方国，北界黑海。长四千里，宽二千六百里，地面积方约七十二万里，烟户一京二兆五亿口。境内嶄岩参嵯，冈陵延袤。山之至高者，曰道罗，曰里巴诺，曰亚拉刺，曰科令伯，曰义大，曰加尔美罗。河之最长者，曰有发拉德，曰的加勒，曰几西义马，曰曼德勒，曰若尔丹，曰萨拉巴。湖亦错杂，大者曰万，曰亚斯发的德，即死海也；曰巴加马，曰亚波罗尼，曰亚斯萨约，曰达萨拉，曰亚哥失尔。屿更罗列，巨者曰西布勒，曰巴达么斯，曰罗德斯，曰西岳，曰勒斯波，曰德内德斯。田土肥饶丰茂，金石各矿具备，禽兽充斥。土产丝、酒、油、蜜、香料、药材等物。地气互异，山顶冰雪，平原熇暑。技艺精良，贸易丰盛。所奉之教乃回教也。其地分为五部，一名小亚细亚，又名亚那多里，在西方，内六府。一名亚尔美尼部，在东方，内五府。一名古尔的部，在东方，内二府。一名美索布达迷部，在东南，内三府。一名西利亚部，在南方，内四府。其冲要繁华之地，皆在亚那多里部，半在亚尔日西拉部。一又名白棱，即耶稣降生之地，皆在西利亚部。

◎西南洋五印度沿革总叙

行海以指南针取向，地球以浑仪辨方，五印度地，当震旦西南。以中国偏东形势格之，为丙午丁未方；以地平二十四盘分之，则在巽己云。唐以前西域贡道，由葱岭达玉关，道虽迂迢，而历代取经求法之僧，足与目谋，图画指掌。至宋天圣中，防西夏钞掠，始改大食等国贡道，由海达广州，自后习于航海之使。于是自古西域西南近海之国，概称西南洋。古时国名十亡其六，元有天下吞并西域，分封驸马子弟为王，尽易国名以蒙古语。而古今沿革，十亡其九。明《一统志》，称自后魏至隋唐，康居、安息二国地界相混，岂知大秦与条支二国、罽宾与印度各国，尤混之混。甚至《宋史》谓天竺以东之注犍国，距广州四十一万里（天竺以东，当与今满刺加接壤。在缅甸暹罗之南，距广州不及万里）。《元史》征爪哇，谓以五千卒，渡海二十五万里，征从古未至之国（《史弼传》）。考其方域，距闽粤皆里不及万。至马八尔国，在天方之西境，较注犍、瓜哇稍远，亦计里不过万馀。而《元史》谓自泉州至其国，约十万里，皆无稽之说。地周九万里，自欧罗巴大西洋至

中国几于绕地半周，为里亦不过五六万里。乌有阿细亚洲之南洋近接西藏、缅甸，动称数十万里者乎。又甚者，以元太祖至铁门，见角端之地为东印度，不知尚未入北印度也。以西藏、吐番之地为古佛国中印度，反以中印度之痕都斯坦为罽宾（《西域图志》），而不知印度河、印度海，至今尚存西南洋也。以葱岭东西回部，自昔皆回教，无佛教，不知自古皆佛教，无回教也。六合以外，存而不论；八荒以外，论而不议；九州以外，议而不辨。西南诸国，近在九州以外，尚非八荒之外也。且海防切肤之灾也，乌得不论而乌得不议。辑五印度沿革六篇，恒河考二篇，附北印度疆域考二篇，元伐征西域考二篇，葱岭以东新疆回部考二篇。

卷三十一

○北印度西北邻部附录〈（《汉书》：罽宾以西北各国皆北印度之邻境也，隋唐为九姓、昭武等国，见《大唐西域记》者。孰北印度，孰非北印度，至为昭析，今不复录。惟元代尽易国名，而《明史》误以北方之赛马尔罕为罽宾，官书《西域图志》又以南方之温都斯坦为罽宾，罽宾以南之西藏，方为天竺，遂燕郢易位，棼如乱丝。今特画出北印度以外各国，以区戎索，特自元明始）〉

《邱长春西游记》〈（门人李志常述。前半乌程程同文注，后半大兴徐松注。魏源附注）〉：真人长春子，姓邱，名处机，登州栖霞人。己卯年住莱州吴天观〈（己卯，元太祖称帝十四年，宋宁宗嘉定十二年，金宣宗兴定三年）〉，江南河南各大帅，屡邀请不往。会是冬十二月，成吉思皇帝遣侍臣刘仲禄，以虎头金牌率二十骑来请，时山东尚为金有，适两朝讲好，故使命得通。庚辰年正月启行〈（庚辰，元太祖十五年，宋宁宗嘉定十三年，金宣宗兴定四年）〉，由燕京出居庸关，驻宣德州。十月斡辰大王遣使臣阿里鲜来请〈（程同文曰：斡辰大王，即太祖第四弟斡赤斤也。太祖西征命斡赤斤居守斡难河）〉，以辛巳年二月八日启行〈（辛巳，元太祖十六年，宋宁宗嘉定十四年，金宣宗兴定五年）〉，度野狐岭〈（在张家口外）〉，北过抚州。十五日，东北过盖里泊，有盐池〈（《金史》：抚州之丰利县有盖里泊，在今张家口北百里）〉。迤东北去，自此无河，凿沙井以汲。南北数千里，亦无大山。马行三日出明昌界，又六七日忽入大沙陀〈（即大漠）〉。东北行千里外，三月朔出沙陀，至渔儿冻，始有人烟聚落〈（张德辉《纪行》云，昌州以北入沙陀，凡六驿而出沙陀，与此正同。今为达儿海子，在克什克腾部落北）〉。又二十馀日方见一沙河，西北流入陆局河〈（陆局河，即胪胸河之音转，今克鲁伦河也）〉。渡河北行，三日入小沙陀。四月朔，至斡辰大王帐下〈（即斡难河旧帐，非和林也）〉。十七日马首西北，二十二日抵陆局河，积水成海，周数百里，并河南岸西行。五月朔亭午，日有食之。水流东北，行十有六日，河势绕西北山去，不得穷其源〈（克鲁伦河，发源肯特岭，南流及平地，始转东南。长春由河南岸折河西行，故不见来源）〉。西南冻驿路又行十日，夏至量日影三尺六七寸。渐见大山峭拔，从此以西，渐有山阜〈（此所见大山当即肯特岭）〉。又四程西北渡河，乃平野〈（此所渡土腊河也）〉，山川秀，水草饶，有契丹故城。盖辽亡士马不降者，西行所建城邑也。又言西南至寻思干城万里外，回纥最佳处，契丹都焉。历七帝〈（注详下文，盖契丹初奔乃蛮，后乃西徙回纥葱岭也，故乃蛮之亡来投西契丹欤）〉。

六月十三日，至长松岭后宿，十四日，过山度浅河，天极寒。十七日宿岭西，盛夏冰雪，山路盘曲，西北且百馀里，既而复西北，始见平地。有石河长五十馀里〈（此鄂尔昆河东流将会喀拉河处，河经山峡，故曰石河。雍正中，拒准噶尔，其时黑龙江兵至鄂罗坤河军营者，过汗山，即西北渡土拉河，又西北行，逾喀里雅尔山，乃济鄂尔坤河与长春行程正同。长松岭，当即喀里雅尔山，其地已在北极出地四十

九度，是以寒甚欤）〉。山行五六日，峰回路转，寻登高岭，势若长虹。壁立千仞，俯视海子，渊深恶人〈（此厄鲁赫特山也）〉。二十八日，泊窝里朵之东。窝里朵，汉语行宫也。奉皇后旨，请师渡河。其水东北流，弥漫没轴。入营，驻车南岸，其车輿亭帐，望之俨然。古之大单于未有若此之盛也〈（此和林行宫也，在鄂尔坤河之北，色楞格河之南，又在塔米尔河哈绥河二小水之间。哈绥河，即元时和林河也，以水得名。其地为自昔回纥建身之所，其所渡之河，或即入和林河之支流，今曰瑚伊努河）〉。七月九日，同宣使西南行，五六日屡见山上有雪，山下往往有坟墓。又二三日，过曷刺肖故城。又五六日，逾岭而南，迤邐南山，望之有雪。此地东距陆局河约五千里。七月二十五日，至阿不罕山北。镇海相公来谒〈（阿不罕山，在金山东北，今阿集尔罕山也。《镇海传》：太祖屯田于阿鲁欢，立镇海城。阿鲁欢，即阿不罕之音转）〉。八月傍大山西行，约三日，复东南行，过大山，经大峡。中秋日，抵金山东北，其山高大，深谷长阪，车不可行。三太子出军，始辟其路。县辕以上，缚轮以下，约四程连度五岭，南出山前临止泊〈（傍大山者，即傍阿尔泰山之东大干也，乃向西南行，当取道于今科布多，再西南，乃科布多河及额尔齐斯河发源地，为阿尔泰山之脉脊，故曰经大峡抵金山东北也。南出山临河，当是乌隆古河，刘郁《西使记》谓之龙骨河）〉。渡河而南，经小童山七十里，又鹵地三十里，宣使与镇海议曰：此地最难行，前至白骨甸，行二百里，达沙陀北，颇有水草，更涉沙陀百馀里，方及回纥城。所谓白骨甸者，古之战场。疲兵至此，百无一还。顷者乃满部大败于此，须暮起夜渡其半，明日向午方得水草，但黑夜魑魅为祟，当涂血马首以厌之。师笑不答〈（徐松曰：金山东北与乌鲁木齐所属之古城南北相直，今自科布多赴新疆驿路，南抵古城之鄂伦布，之〈古立〉克台，之苏吉台，之噶法台，皆沙迹，即白骨甸也）。翌日过沙陀，南望天际若银霞，疑为阴山。八月二十七日抵阴山后，回纥交迎至小城北，告曰：此阴山前三百里和州也。翌日，沿州西行，禾麦初熟。西即鳖思马大城，回纥王部族劝葡萄酒，供花果。告曰：此大唐时北端州府，景龙三年，杨公何为大都护，有龙兴西寺，二石刻纪其功德。其东数百里，有西凉府。其西二百馀里，有轮台县。唐之边坊，往往尚存。此阴山非河套之阴山，乃天山也。博克达三峰，去古城北数日程，即见之。故长春诗有“三峰并起插云寒”之句。其阴山前三百里和州者，谓天山以南吐鲁番为古火州地，讹火为和耳。唐北庭大都护府，在今济木萨之北。端州者，端即都护字之合音。轮台县治，在今阜康县西五六十里，县治在博达克山背，故南望阴山。程同文曰：鳖思即别失，欧阳圭斋曰：北庭今别失八里也，则元时别失八里，正在于此。）〉

九月七日，西行问更几程得至行在，皆曰西南更行万馀里即是。四日，宿轮台之东。又历一城，重九日，至回纥昌八刺城。其王畏午儿，与镇海有旧，率部族远迎〈（源案：畏午儿，即畏吾儿，乃回鹘转音也。元初畏吾儿地，西接伊犁，东抵哈密，故此有其酋长。程同文曰：昌八刺城，即《元史》西北地理附录之彰八里也。《耶律希亮传》：逾天山至北庭都护府，二年至昌八里城，夏逾马纳思河，则昌八里，在今玛纳斯河之东矣）〉。翌日并阴山而西约十程，又度沙场，一昼夜方出，盖

白骨甸大沙分流也。南际阴山之麓，逾沙又五日，宿阴山北，诘朝南行，长阪七八十里，翌日又西南行二十里，忽有大池，方圆几二百里，雷峰环之，倒影池中。师名之曰天池〈（徐松曰：沙场者，晶河城东至托克多积沙成山，东距阜康千一百里，故云十馀程，其间当过数小河，此不言者。夏雪融则涨，冬则涸，此九月过之故不知有水也，自托克多至晶河，山行五百馀里，至赛喇木泊。东岸泊正圆周百馀里，即天池海）〉。沿池正南下左右峰峦，众流入峡，曲折六七十里。二太子扈从西征，始凿石理道，刊木为四十八桥，桥可行车〈（并泊南行五千里入塔勒奇山峡，谚曰：果子沟。沟水南流，势甚湍急，架木桥以度车马，峡长六十里，今为四十二桥，即其遗址）〉。翌日方出，入东西大川，次及一程，至阿里马城。铺速满国王暨蒙古塔刺忽且来迎，宿于西果园。土人呼果为阿里马，因以名城〈（东西大川，即今阿里玛图河也，阿里马，《元史》作阿力麻里，即伊犁城也。《元史》又作叶密里，又作叶密立，皆即此城。本朝名之曰伊犁。以《唐书》伊列河得名，恐亦即叶密立之音转）〉。又西行四日，至答刺速河，土人呼河为没輶云。水势深阔，从东来抵西北，截断阴山，河南复是雪山。十月二日，乘舟以济，南下至一大山，北有小城此即今伊犁河也，其水西流，以西行四日计之，其渡河当在今之察林渡也，南下一大山，疑今铅厂诸山）〉。又西行五日，宣使刘仲禄以去行在渐近，先往驰奏，独镇海公从。又西行七日，度西南一山，遇东夏使回，言七月十二日，辞行在，上将兵追算端汗至印度〈（西南一山，当是善塔斯岭。算端者，西域长君之称，《元史》作算端，《明史》作速檀，一作琐檀。本朝官书作苏勒坦，今哈萨克布鲁特每称之。七月十二日辞行在，十月十四日至此，在道三月矣）〉。明日至回纥小城。十有六日，西南遇板桥渡河，晚至南山下，即大石林牙，其国王辽后也。自金师破辽，大石林牙领众数千去西北，迁徙十馀年，方至此地。风土气候，与漠北不同。平地多农桑，果实如中国。惟夏秋无雨，皆资灌溉。东北西南，左山右川，延袤万里。传国几百年，乃满失国依大石，土马复振，盗据其土，继而算端西削其地，天兵至乃满寻灭，算端亦亡源案：前记言西南至寻思干城万里外，回纥最佳处，契丹都焉。历七帝者此也。刘仲禄言：在乃蛮奉诏征师者亦此也，大石林牙，辽宗姓，于辽亡后率众西行，间关万里，建国西土。是为西辽耶律大石，号德宗，改为延庆二年。康国十年，子夷列立，号仁宗，其幼时太后萧氏权国，改元咸清，凡七年。及亲政改元绍兴，凡十三年卒。子幼，妹耶律氏权国。崇福十四年，子直鲁古立，改元天禧，凡三十四年。元太祖灭乃蛮禽太阳汗，其子屈出律奔契丹，袭执天禧，尊为太上皇，篡其国。阅十馀年，元太祖征西域灭之。其事附见《辽史》天祐纪末，兼见于《契丹国志》实止建国七十年，历三帝二后。以远隔葱岭，故诸史皆无之。此地尚在伊犁西境，未逾葱岭也。时乃蛮部据其葱岭东地，而印度算端据其葱岭西地，分为两国。其寻思干城则印度算端所据也。旧皆西契丹地）〉。十有八日，沿山而西，七八日，山忽南去，一石城当途，石色尽赤，有驻军古迹。西有大冢，若斗星相联〈（今时穆尔图泊南岸也。多古翁仲，即此地也。自渡伊犁河以南所经之程，即今伊犁兵赴喀什噶尔换防之路，傍特穆图泊东南经布鲁特游牧，乃上葱岭也）〉。并西南山行五程，至塞蓝城有小塔，回纥王来迎入馆。

十一月四日，土人以为年，傍午相贺。西南复三日，至一城，其王亦回纥。明日又历一城，复行二日有河，是为霍阐河，由浮桥渡，泊于西岸。其河源出东南二大雪山间，色浑而流急，深数丈，西北注不知几千里〈（此正逾葱岭之路也。程同文曰：赛蓝，据刘郁《西使记》在塔刺寺西四日程，今塔刺河之西也。《明史·外国传》赛兰在塔失干之东，今塔失干城在锡林河之北。元时西域往返之道，必从塔刺斯河过赛兰，乃西南行渡霍阐河，即纳林河也。刘郁《西使记》在忽牵河，其音相近）〉。河之西南，绝无水草者二百馀里，复南望大雪山而西，山形与邪米思干之南山相首尾。又至一城，得水草，复经三城，山行半日，入南北平川。仲冬十有八日，过大河，至邪米思干大城之北，西契丹之河中府也。大师移刺国公及蒙古回纥郊迎，大设帷幄，乃知宣使刘公以路梗尚留此处，盖千里外舟梁为土寇所毁也。遂留过冬，其城临河岸，秋夏常无雨。国人疏二渠入城，分绕巷陌。方算端未败时，城中十万馀户，今存四之一。大半回纥人，契丹及汉人次之。有冈高十馀丈，算端之新宫据焉。又孔雀、大象皆东南数十里印度国物〈（邪米思干，《元史》及《西史记》皆作寻思干，即赛马尔罕城，在今敖罕境内，在纳林河之南。长春自北来，先渡霍阐河，此又渡大河至邪米思干城者，应指城东之河，北流入那林河者也。自北庭至此，大率西行，过此则大率南行，最为西征扼要之地。故于此宿兵，而以耶律楚材驻守焉。其后以封驸马帖木儿，至明尚为西域大国。源案：《元史》太祖先取寻思干城，后取薛迷思干城，则误作二地。薛迷，即邪迷也）〉。师因问五月朔日食事，其人云：此中辰时食至六分止。师曰：前在陆局河时，午刻见其食既，又西南至金山，人言巳时食至七分。此三处所见各不同，以理揆之，正当其下则见其食既，在旁者则千里渐殊耳。是年闰十二月将终，宣使所遣侦骑回言，二太子发军灭土寇，整桥梁，帝蹕大雪山之东南，今则雪积山门百馀里，深不可行，今开此路请师。师作诗有“阴山西上五千里，大石东过二十程”之句。

壬午年春三月〈（壬午，元太祖十七年，宋宁宗嘉定十五年，金宣宗元光元年）〉，阿里鲜至自行宫来迎，师问阿里鲜程途几何？对曰：春正月十三日自此初发，驰三日东南过铁门，又五日过大河，二月初去东南，过大雪山，积雪甚高，马上举鞭测之，犹未及其半。下所踏者复五尺许，南行三日，至行宫矣。三月十五日，同刘宣使启行。四日，过碣石城，传旨以甲士千人卫送，过铁门东南度山。山势高大，乱石纵横，众军挽车，两日方至前山。沿流南行，军即北入大山破贼。五日，舟渡小河，七日舟济大河，即阿母河也〈（碣石，《元史·地理志》作柯伤，《明史·外国传》作渴石云，南傍大山屹立，出峡口，有石门，色似铁。《唐西域记》：出铁门至睹贺罗国，其地东拒葱岭，西接波刺斯，南逾大雪山，北据铁门。过雪山为濫波国，即北印度境是也。太祖追北印度算端，南逾雪山，已亲至北印度。太祖旋师后复遣将追至忻都穷及申河，算端死乃返，则兵亦至中印度界矣。前阿里鲜赴行在时，正太祖追算端至印度之日。故逾雪山南又三日乃达，乃长春至行在，则帝已回至雪山避暑。故长春过铁门后，行十二日至雪山而止也。所渡之阿母河，《元史》亦作暗布河，亦作阿木河。《元秘史》作阿梅河，即佛书之缚刍河，发源葱岭大龙池，西北流入里海者。其后于阿母河立元帅府，统葱岭以西各国。大雪山，今为

和罗三托山。自东而西，绵亘千里）〉。东南行又四日达行在，时四月五日也。上恐印度迤南炎热，故于雪山避暑。上卜四月十五日开道，将至期有报回纥山贼指斥者，上欲亲征，因改卜十月吉。师乞还旧馆，临时再来。乃以千馀骑由他路回，遂历大山。山有石门，望如削堵。有巨石横其上若桥，其下流甚急，此地盖门口，新为兵所破。师出峡诗，有“水北铁门犹自可，水南石峡更堪惊”之句〈（源案：阿母河之南，雪山之北，其中尚有一印度河。此石峡，即印度河上游也。印度河，亦名新头河。《法显传》曰：度葱岭西南行十五日，其道艰阻，崖岸险绝，其山惟石，壁立千仞，临之目眩，下有水名新头河。昔人有凿石通路，蹶悬縆过河，两岸相去八十步，过河便到乌苌国，即北天竺也。《水经注》曰：乌秣之西，有悬度之国。案：汉乌秣，今巴达克山国也，悬度更在其西，则河之下游，此石峡，则河之上游矣）〉。征西人回，多获珊瑚，有从官以白金二镒，买五十株，高者尺馀〈（源案：《职方外纪》：葱岭迤西有国曰得白德者，不以金银为币，止用珊瑚，又西红海在天方之西，水皆红色，相传珊瑚所映而成）。五月五日，复回耶米思干城。八月八日复启行诣行在。十有二日，过碣石城。翌日步骑千馀入大山中行，即铁门外别路也。涉红水涧，有峻峰高数里，向东南行，山根有盐泉流出，见日即成白盐。又东南上分水岭，西望高涧若冰，皆盐耳。十有四日，至铁门西南之麓，将出山。其山门险峻，左崖崩下，涧水伏流一里许。中秋抵河上，其势若黄河流。乘舟以济，东南行三十里，乃无水源案：此又过阿母河也）〉。即夜行过班里，城甚大。东行数十里有水，马仅能渡〈（源案：此又过印度河上游也）〉。二十二日至行在，入见。道人见帝无跪拜礼，入帐折身叉手而已。二十七日，从车马北回，九月朔渡河桥而北〈（盐泉在铁门山之西，其西北即大盐池。《元史·郭宝玉传》：太祖封大盐池为惠济王。刘郁《西使记》：过纳商城，满山皆盐，如水晶状。纳商，即渴石也。越三日，出山抵河上，其水势若黄河西北流者。即流入大盐池。盖葱岭西之水，皆会于此，即阿母河。南怀仁图言里海之水，浩荡甚咸，或以受此河之故欤。东行数十里，复渡一河，则印渡河之上源也。九月朔复渡河桥北还者，即阿母河之浮桥。前为贼毁，官军修复之。盖长春已见帝即扈从而北矣。读此记乃知《元史》本纪及耶律楚材传帝至东印度驻铁门关，角端见班师者，盖本于宋子贞所作《楚材神道碑》，不知太祖军逾雪山，止至北印度，何由遽及濒海之东印度，若铁门则距雪山北印度尚远，考《湛然集》，楚材在西域十年，止驻寻思干城，纵或偶至铁门，无由至印度。《神道碑》欲归功楚材，故移印度之事于铁门，以傅会之，不知种种不合）〉。

《明史》：撒马儿罕，即汉罽宾地〈（此语误沿王圻《续文献通考》之谬，赛马尔堪城，沿纳林河，今在敖罕西北，塔什干西南，则是古大宛、大夏地。敖罕、布哈尔，皆元撒马尔罕所辖地，与罽宾无涉）〉。隋唐皆通中国，元太祖荡平西域，尽以诸王驸马为之君长，易前代国名以蒙古语，始有撒马儿罕之名。去嘉峪关九千六百里。元末为之王者，驸马帖木儿。洪武中，太祖欲通西域，屡遣使招谕，而遐方君长未有至者。二十年四月，帖木儿首遣回回满剌哈、非思等来朝，贡马十五、驼二。诏宴其使，赐白金十有八锭。自是频岁贡马驼，及鍔铁刀剑、甲冑诸物。而其

国中回回，又自驱马抵凉州互市。帝不许，令赴京鬻之。元时回回遍天下，及是居甘肃者尚多，诏守臣悉遣之。于是归撒马儿罕者千二百余人。二十七年八月，帖木儿贡马二百，其表言钦仰圣心，如照世之杯，使臣心中豁然光明。照世杯者，其国旧传有杯，光明洞澈，照之可知世事，故云。成祖践阼，遣使敕谕其国。

永乐三年，傅安等尚未还，而朝廷闻帖木儿假道别失八里率兵东，敕甘肃总兵官宋晟戒备。五年六月，安得还。初安至其国被留，朝贡亦绝。寻令人导安遍历诸国数万里，以夸其国广大。至是帖木儿死，其孙哈里嗣，乃遣使臣送安还，贡方物。帝厚赉其使，遣官往祭故王，而赐新王及部落银币。其部落头目沙里奴儿丁等，遂亦贡驼马。景泰七年，贡玉石。天顺元年，命都指挥马云等使西域，敕奖其锁鲁檀，赐彩币，令护朝使往还。锁鲁檀者，君长之称，犹蒙古可汗也。成化中，其锁鲁檀偕亦思罕各酋长贡二狮至肃州，其使者还。不由故道，赴广东，又多买良家女为妻妾，又请泛海至满刺加，市狻猊以献。市舶中官韦眷主之，布政使陈选力陈不可，乃已。宏治二年，其使由满刺加至广东贡狮子、鹦鹉诸物，守臣以闻，礼官耿裕等言南海非西域贡道，却之，薄犒其使，量以绮帛赐其王。明年又偕土鲁番贡狮子及哈刺虎诸兽，由甘肃入。嘉靖十二年，偕天方、土鲁番入贡，称王者至百余人。礼官夏言等论其非，请敕阁臣议所答。张孚敬等言，西域诸王疑出本国封授，或部落自相尊称，先年亦有至三四十人者，若骤议裁革，恐人情觖望，乞敕礼兵二部详议，于是言及枢臣。王宪等谓，西域称王者，止土鲁番、天方、撒马儿、罕如、日落诸国，称名虽多，朝贡绝少。宏正间，土鲁番十三入贡。正德间，天方四入贡，称王者率一人，多不过三人，余但称头目而已。至嘉靖二年八年，天方多至六七人，土鲁番至十一二人，撒马儿罕至二十七人，孚敬等言三四十人者，并数三国尔。今土鲁番十五王，天方二十七王，撒马儿罕五十三王，实前此所未有。宏治时回赐敕书，止称一王，若循撒马儿罕往岁故事，类答王号，人与一敕，非所以尊中国，制外番也。帝纳其言。国止给一敕，且加诰让示以国无二王之义，然诸番迄不从。十五年入贡，复如故。甘肃巡抚赵载，奏诸国称王者至一百五十余人，皆非本朝封爵，宜令改正，且定贡使名数，通事宜用汉人，毋专用色目人，致交通生衅。后入贡迄万历中不绝。盖番人善贾，贪中华互市。既入境则一切饮食道途之资皆取之有司，虽定五年一贡，迄不肯遵天朝亦莫能难也。

其国东西三千余里，地宽平，土壤膏腴。王所居城广十余里，民居稠密。西南诸番之货，多聚于此，号为富饶。城东北有土屋，为拜天之所。規制精巧，柱皆青石，雕为花纹。中设讲经之堂，用泥金书经，裹以羊皮。俗禁酒，人物秀美，工巧过于哈烈而风俗土产多与之同。其旁近东有沙鹿海牙、达失干、赛蓝、养夷，西有渴石、迭里迷诸部落，皆役属焉（达失干即今之塔什干，在撒罕之北哈萨克之西）。

又曰：迭里迷，在撒马儿罕西南，去哈烈二千余里，有新旧二城，相去十余里。其酋长居新城，城内外居民仅数百家。畜牧蕃息，城在阿木河东，多鱼。河东地隶撒

马儿罕。西多芦林，产狮子，永乐时陈诚、李达尝使其地。卜花尔，在撒马儿罕西北七百馀里〈（案：卜花尔，在敖罕西，即今布哈尔也。撒马尔罕都城，在今布哈尔敖罕地，断非汉之罽宾矣。罽宾为今克什弥尔，且中隔巴达克山等国，相去甚远。又布哈尔彼时疆域甚小，今则尽有撒马尔罕之地，为大国。故以撒马尔罕为今之布哈尔，古之大夏。庶乎近实）〉。城居平川周十馀里，户万计。市里繁华，号为富庶。地卑下，节序常温，宜五谷桑麻，多丝绵布帛，六畜亦饶。永乐十三年，陈诚自西域还，所经哈烈、撒马儿罕、别失八里、俺都淮、八答黑商、迭里迷、沙鹿、海牙、赛蓝、渴石、养夷、火州、柳城、土鲁番、盐泽、哈密、达失干、卜花尔，凡十七国。悉详其山川、人物、风俗，为《使西域记》以献，以故中国得考焉。宣德七年，命李达抚谕西域，卜花尔亦与焉〈（达失干，即今塔失干，别失八里，即今新疆南路回部，八答黑商，即今巴达克山）〉。

《明史》：哈烈，一名黑鲁，在撒马儿罕西南三千里〈（当为今爱乌罕部之地）〉。去嘉峪关万二千馀里，西域大国也。元驸马帖木儿既君撒马儿罕，又遣其子沙鲁哈据哈烈。洪武时，撒马儿罕及别失八里咸朝贡。哈烈道远不至。二十五年，遣官诏谕其王，赐文绮彩币，犹不至。二十八年，遣给事中傅安、郭骥等，携士卒千五百人往，为撒马儿罕所留，不得达。三十年，又遣北平按察使陈德文等往，亦久不还。成祖践阼，遣官赍玺书彩币，赐其王，犹不报命。永乐五年，安等还。德文遍历诸国，说其酋长入贡，皆以道远无至者，亦是年始还。德文采诸方风俗，作为歌诗以献。帝嘉之。明年，复遣安赍书币往哈烈，其酋沙哈鲁巴都儿始遣使随安朝贡。七年，达京师，复命赍赐物，偕其使往报。明年，其酋遣朝贡。撒马儿罕酋哈里者，哈烈酋兄子也，二人不相能，数构兵。帝因其使臣还，命都指挥白阿儿忻台赍敕谕之，白阿儿忻台既奉使，遍诣撒马儿罕、失刺思俺的、干俺都淮、土鲁番、火州、柳城、哈实哈儿诸国，赐之币帛，谕令入朝。诸酋长各遣使贡狮子、西马、文豹诸物。自是诸国使并至，皆序哈烈于首。及仁宗不勤远略，宣宗承之，久不遣使绝域，故其贡使亦稀至。七年复命中官李贵通西域，敕谕哈烈贵等，未至。其贡使已抵京师，贡驼马玉石。英宗幼冲，大臣务休息，不欲敝中国以事外番，故远方通贡者甚少。天顺后朝贡遂绝。

其国在西域最强，大王所居城方十馀里，垒石为屋，平方若高台，不用梁柱瓦壁，中敞虚空，数十间，窗牖门扉悉雕刻花文，绘以金碧。地铺毡罽。无君臣上下，男女相聚，皆席地趺坐。国人称其王曰锁鲁檀，犹言君长也。男髡首，缠以白布。妇女亦白布蒙首，仅露双目。上下相呼，皆以名。相见止少屈身，初见则屈一足，三跪，男女皆然。食无匕箸，有瓷器，以葡萄酿酒。交易用银钱，大小三等，不禁私铸，惟输税于酋长用印记，无印者禁不用。市易皆征税十二，不知斗斛，止设权衡。无官府，但有管事者名曰刀完。亦无刑法，止罚钱。以姊妹为妻妾，居丧止百日，不用棺，以布裹尸而葬。常于墓间设祭，不祭祖宗，亦不祭鬼神，惟重拜天之礼。无干支朔望，每七日周而复始。岁以二月、十月为把斋月，昼不饮食，至夜乃食，周月始茹荤。城中筑大土室，中置一铜器，周围数丈，上刻文字，如古鼎状。游

学者皆聚此，若中国太学然。有善走者日可三百里，有急使传箭走报。俗尚侈靡，用度无节。土沃饶，节候多暖少雨。土产白盐、铜铁、金银、琉璃、珊瑚、琥珀、珠翠之属。多育蚕，善为纨绮。刑止捶扑，交易兼用银钱。狮生于阿木河芦林中，初生目闭七日始开，土人于目闭时取之。调习其性，稍长则不可驯矣。其旁近俺都淮、八答黑商，并隶其国。俺都淮在哈烈东北千三百里，东北去撒马儿罕亦如之〈（东北，旧误西北，又东北旧误东南，今改正。俺都淮与八答黑商相连，即今爱乌罕也。安得更在哈烈之西，撒马儿罕之北乎）〉。城居大村，周十馀里。地平衍，无险田，土膏腴，民物繁庶称乐土。自永乐八年至十四年，偕哈烈通贡，后不复至。八答黑商在俺都淮东北〈（观此语可证前投方向之误，盖巴达克山，在爱乌罕东北也）〉，城周十馀里，地广无险阻，山川明秀，人物朴茂。浮屠数区，壮丽如王居。西洋西域诸贾，多贩鬻其地。故民俗富饶。初为哈烈酋沙哈鲁之子所据，永乐六年，命内官赐其酋书敕彩币并及哈实哈儿葛忒郎诸部，自是往来通商。东西万里，行旅无滞。十二年，陈诚使其国。十八年，遣使来贡。

《皇清四裔考》：巴达克山，居于葱岭中，其境北至伊西洱河，东北去叶尔羌千馀里。有城郭，其汗曰素尔坦沙。部落繁盛，户十万有奇。头目戴红毡小帽，束以锦帕，衣锦氎衣，腰系白丝绦，足穿黑革鞢。女则被发双垂，馀与男子同。其民人帽顶制似葫芦边饰以皮，衣黄褐，束白丝绦，足穿黑革鞢，亦有用黄牛皮者。其国负山险，扼葱岭之右，颇擅形势。有河北流经博罗尔、巴达克山两部落之间，至伊什得特儿分流。一流经北入图斯泊，一流道西，又北入于伊西洱泊。其北鄙之城曰瓦汉，在汉乌秣国地。乾隆二十四年八月，回部逆酋博罗尼都、霍集占为王师所败，奔巴达克山，副将军富德率师追之，二贼方窜入巴达克山之锡克南村，诡称假道往墨克，乃逸去，肆掠村落。素尔坦沙禽博罗尼都，而以兵围霍集占于阿尔浑楚哈岭，贼退保齐那尔河。素尔坦沙进战擒之，囚于柴扎布。柴扎布者，布达克山系囚处也。素尔坦沙乃遣人诣军门投款，且报二贼就擒。副将军富德鉴其忠顺，遣使者往谕，责令献俘，进军瓦汉以待之。是时温都斯坦方以兵临巴达克山，谋劫霍集占兄弟。而塔尔巴斯者，巴达克山仇国也。贼将通之，攻巴达克山。所遣使被获，乃迁霍集占于别室，以二百人围杀之。尚以二逆酋与己同派，噶木巴尔裔欲缚献，恐诸部不从，难之。富德反复晓以顺逆利害，乃以逆尸驰献，率其部十万户与博罗尔部三万户俱降〈（《四裔考》曰：《汉书》皮山国西南至乌秣国千三百四十里。皮山在于阗国西，今自和阗西行至巴达克山亦千三百馀里，其国居葱岭南境，四面皆山，与班史乌秣国山居之说相合，则今之巴达克山在汉为乌秣国也。又《魏书》载阿钩羌国在莎车西南，西有县度山，《汉书》亦云乌秣国西有县度、莎车，今之叶尔羌，在巴达克山东北，亦与阿钩羌国在莎车西南之说合，又权于摩国去代一万二千九百七十里，阿钩羌国去代一万三千里，二国相距止三十里，当属毗联之境。疑汉时统属乌秣，至魏乃分两国。东属权于摩，故去代较近，西属阿钩羌，故独与县度相接也。《唐书》不载乌秣权于摩、阿钩羌诸国，而有喝盘陀者，由疏勒西南六百里至其国，今之喀什哈尔，古疏勒地，西南六百里至巴达克山，道里适符。城居山内，河抱城东，所谓沿葱岭负徙多河者，形势可验。至《元史》载有巴达哈伤，《

明史》载有八答黑商，其音与巴达克山相近，疑即此地。然《元史》不载远近道里，而明自陈诚使西域一至其地，名号粗传，天顺后绝不复至。重以中外译音仿佛同异，猝难审证，聊附存以备考云）。

又曰：博罗尔，在巴达克山东，有城郭，户三万有奇。四面皆山，西北面有河。乾隆二十四年，与巴达克山同时内附。其南有部落曰温都斯坦，产金丝缎。霍集占走巴达克山时，温都斯坦方以兵相攻，谋劫霍集占不果，后其部为爱乌罕所并。二十九年正月，博罗尔遣使入朝，是时博罗尔与巴达克山屡行构衅，围城劫掠，乞援于驻扎叶尔羌都统新柱，遣谕巴达克山，恪遵约束，还俘罢兵。至是进玉斡双匕首。

《地球图说》：大布加利亚国，即布哈尔也，东界新疆，南界亚加业坦国并耳西亚国，西界里海，北界俄罗斯国。其百姓约有五百万之数，都城名布加利。城内民八万，大都回回教，牧牛马，以马乳为酒，毡毯为庐。国内有旷野亦名沙漠），各城皆有书院，土产马、骆驼、羊、绵布、果品、金、珠玉、宝石、金刚石等物。所进入货物，惟中国之磁器、茶叶、杂色绵布、绸缎，少购西洋之物。

《地理备考》曰：达尔给斯丹国，即南怀仁图所谓鞑而鞑也，斯丹乃西域国王之称，亦名哈萨克国，在亚细亚洲西北，北极出地三十四度起，至五十五度止；经线自东四十七度起，至八十度止。东至天山北路，西枕加斯比约海，南接白尔西亚、阿付干二国，北界厄罗斯国之西卑里亚，长约五千里，宽约三千五百里，地面积方约一百七十八万里，烟户四兆馀口。本国地势，东南峰峦峻耸，冰雪凝积。西北平原坦阔，沙漠相间。河之长者，一名亚木达里，一名西尔达里，一名萨刺苏，一名主意，一名古弯，一名加尔齐。湖之大者，一名亚拉尔，又以其过大而称海，一名德勒斯古尔，一名加拜古拉，一名加拉古尔，一名达兰，一名巴达于的尔。田土膴原，滨地尤腴。谷果草卉，禽兽鳞介，靡弗蕃衍。五金各矿皆备，惟铁开采，馀皆禁取。土产矾煤、宝石、纹石、璫砂、烟叶、熟皮、药材等物。地气温和，寒暑俱极。诸汗统辖，各分部落。所奉之教乃回教也。工作技艺，惟布加拉人善于织造，馀皆耕牧为业。贸易兴隆，商侣结队而行。盗风太剧，往来维艰。通国半土著，半游牧，共分二十部落。一名布加拉，建于平原之中，乃通国之最富强者也。一名著尔塞波斯，一名伊陆尔，一名安该，一名美马墨，一名巴尔克，一名古尔墨，一名昆都斯，一名达黎干，一名巴刺达哥古，一名德尔瓦斯，一名古拉波，一名亚比者尔么，一名刺迷。以上皆土著之部，有城郭居室。此外则一名加尔札，系诸酋分部，游牧无常处。一名加非里斯丹，亦诸酋分部，游牧无常处。一名哥干，一名其尔意斯，土人素称哥萨克，内分上中下三部：一名其袜，一名加刺加尔巴，亦诸酋分部，游牧迁移，靡有定居；一名都尔各马尼亚，亦诸酋分部，游牧庐帐，徙处不一，并无定止。

《外国史略》曰：西域哈萨克，游牧国也。葱岭东西皆有其地，西人称之曰达达里

，亦曰达尔鞑，亦曰达尔给。北极出自三十六度及五十一度，偏东自四十三度及七十八度。广袤方圆三万二千里，南及甲布地，北及俄罗斯藩属国，东及新疆，西及里海。东南有大山隔新疆。在北亦有山，多湖，其味咸，色如海潮，旱则盐出。其山麓平地，高于海面二百丈，渐近里海，势愈低。亚拉湖之南有两野，各广三十五里。在北之山地，足资游牧，绝无淡水。有沙丘焉，随时变易。其处中多潴水，与里海所连之地，悉高坦。其土饶，无产物，故居民鲜焉。其新疆西北哈萨克游牧之地，土虽饶，尚有牧场，亦丰盛。然西南甚瘦，不生草木，惟驼克通行焉。中有腴地，生五谷。西域大半皆不毛之地，其亚母河之泉在三十七度二十七分，高于海者百五十丈，其水西北流，无沙线，无磐石，汇入亚拉湖。水深能驶船。西熏河，由天山涌出，入亚拉湖。哥墨河在撒马耳干地流出，两岸丰盛，多物产。亚拉湖方圆七千里，内有淡水，非若他湖之尽咸也。哈萨之地多湖，悉咸水，罕雨多尘。所有居民，各分种类。其土民称曰他益，与白西人风俗略同。其馀属土耳其者，或乌士百之族类，共三十二宗派。身矮而壮，面红。以布包首，亦穿靴，非若他夷之赤足也。女则遍身丝缎，颇聪明，咸奉回回教。其游牧西方者多此族，反复无常。日骑马，恣虏掠，四方畏之。在西北哈萨克之种类，或事俄罗斯，或服中国，野性难驯，专以抢掠为事。其乌士百之种类，则勤耕安分，造绵布绸缎，或帽或纸等货。多使奴，皆外国贩来者。亦有五印度国所到之商贾，其要市在俄罗斯界，每年驼千三百只，载货赴市。其新疆所来之汉商亦不少，贸易兴旺。喀什噶尔、叶尔羌、和阗各商往来者，恒不绝焉。

西域民多是土耳其、蒙古各族类，所自出此时，国地已分。最大者曰布加拉国，即布哈尔。中央有丰有饶，郊外多沙，天多旱雪，连三四月不消。南方曰巴勒，与甲布交界。甚热，多瘴疠。其都曰破加拉，名邑也。北极三十九度四十三分，偏东六十四度五十五分。连邑之处，高于海面百二十丈。居民十五万。内有书院、回回庙、大房宇。便通商，海外之商云集。奉回回教，其君听命于国内之教师。东四十里有撒马尔罕，古城居民万口，多古迹。在南方巴勒之间，亦有古城，居民在西方二十里外。有乡邑四百馀处。居民甚罕。

尹土斯，在亚母河之南，即《元史》之阿母河也。谷间甚燥热，居民不多。与其邻国补答山战，尽有其地。即巴达克山也，地产红玉、青金。

北方之南有小地，是各夷目所管者。此地并叶尔羌中间，有巴黑坦，地高于海三十丈，气候甚冷。山阿盛夏犹有雪，五谷不登，其居民系哈萨克之游牧，以肉乳为食。

布加拉东北曰哥干地，亦曰敖罕，古小国也。出绵花、蚕丝，与俄罗斯商交易，民务农，引河灌田甚巧。最大之城曰答金，居民八万，与俄罗斯国互市。

布加拉，西及里海，曰其瓦部，亦曰机窗，其君管土耳其南方游牧。虽事耕田，亦

虏卖人口。道光二十年，统兵二万，往侵俄罗斯国，冻毙大半。通市之邑曰阿耳云治，其夷目以掠人为事，却护往来商贾，以征其饷。其居民与俄罗斯世仇，英人屡劝和不果。

此地中间及里海土耳其，或曰耳哥曼族类，游奕无定处，惟养牲畜，食肉饮乳，无统属。产良马，奔速如电。居民约十四万。

白西亚交界最丰盛之墨味地，一种百倍，昔属白西国，为破加拉君攻有其地。

北方哈萨克，与蒙古无大分别，多奉回教，或耕田，或远游。惟冬时则附城邑，搭毡帐，不畏权势，忽驯忽叛。

西域之民，多不安分，惟严务防范，以免其肇衅，一生战端，则争斗不息矣。

《一统志》：塔什罕，在回部喀什噶尔之北一千三百里，东至布鲁特界，东南至那木干界，东北至右哈萨克部界，其贡道由回部以达于京师。汉为康居、大宛交界之地，北魏为九姓昭武所居，隋唐为安国、石国地，明达失于国地。居平原，有城郭，向有三和卓分辖回众。曰昭莫尔多萨木，曰沙达，曰吐尔占。旧为右哈萨克羁属。莫尔多萨木什者，哈萨克所置和卓也。吐尔占逐之，哈萨克以兵问罪，久而不解。乾隆二十三年，参赞大臣富德追讨哈萨克锡拉至其地，遣使抚定塔什罕回众。时吐尔占方与右哈萨克战于河上，因谕以睦邻守土之道，乃大感悟，与哈萨克释争相睦，即遣使奉表求内属。先是有准噶尔部逸贼额什木札布在其境内，即擒以献。其年遣使来朝贡。塔什罕之西南行数百里，逾锡尔河，又逾那林河（二河见右哈萨克部，及霍罕部），为赛玛尔堪城。又西南为噶拉克则城，又西为乌尔根齐城，又西为临达里冈阿泊，是为西海，西境于是尽焉。塔什罕城居平原，多园林，饶果木，土宜五谷，居民稠密，当葱岭直北四百里外。

《一统志》：霍罕东与布鲁特错处，西至哈什干，南至葱岭，北至那林河。那林河在葱岭西北，经流数千里，霍罕、安集延诸国濒之以居。大小泉源、支流不一，并会此河。其发源从布鲁特境，西行过安集延城之北，又西行过玛尔哈朗城，又西行过赛玛尔堪城之北（可证赛玛尔罕，即敖罕地），又折东南入于达里冈阿泊。泊广千馀里，为西境巨海，无有涯际。凡葱岭以西之水，咸归之。汉甘英穷临西海，即此水也（案：此误以咸海为地中海也）。《史记·大宛传》：大宛在匈奴西南，在汉正西，去汉可万里。有城郭屋室，其属邑大小七十馀城。《汉书·西域传》：大宛国王治贵山城，去长安万二千五百五十里，东至都护治所四千三十一里，北至康居卑阇城千五百一十里，南至大月氏六百九十里，北与康居、南与大月氏接，别邑七十馀城。多善马。北魏曰洛那国，唐曰拔汗那国，天宝初改名宁远国。

《一统志》：布哈尔，在拔达克山西二千馀里，其贡道由回部以达于京师。汉为难兜国，自后无闻。乾隆二十五年，回部底平，遣使颁敕谕。二十九年，其部长因拔达克山素尔坦沙，吁请以其属内附。《汉书·西域传》：难兜国王治，去长安万一千五百里，东北至都护治所八百九十里，西南至罽宾三百三十里。按《汉书》载乌秣国，西与难兜接，乌秣为今之拔达克山，难兜为今之布哈尔。其地位远近，正相值也。〈（源案：布哈尔，一作布噶尔，当巴达克山西北，正包敖罕西境。敖罕为大宛，则布哈尔为大夏无疑也。且难兜非大国，又不在大宛之西，决非其地。《史记》月氏为匈奴所破，乃远去西击大夏而臣之。大夏在大宛西有二千馀里妣水南，妣水疑即今之纳林河。今敖罕虽古大宛地，然止八城，不足全当大宛。而布哈尔包敖罕三面，属城百馀，则兼有大宛西境矣）〉。

《西域闻见录》曰：塞克，西域一大国也。在敖罕西，绝非回子种类。〈（敖罕西，则布哈尔也。布哈尔，正回教后裔，此全误）〉。称其王曰汗，部落数百处，各有统辖之人，皆其汗之阿拉巴图，事权归一，无跋扈叛弑之事。城池巨丽，人民殷庶，居室宽敞整洁，人家院落中，各立木竿向之礼拜。冬夏和平，风俗坦白。尚宴会，喜歌舞。人多力善射，发必命中。佩标枪五枝，长四五尺，取物于百步之外。与敖罕称敌也。〈（敖罕西境 敌，舍布哈尔其谁）〉。椿园氏曰：塞克，西域最远之国，去叶尔羌二万馀里。〈（既云接敖罕西境，则去叶尔羌亦不过二千里，即至鄂罗斯界，亦不过五千馀里，安得荒远至此。《松筠奏疏》言，敖罕西有布哈尔大国，统属百馀城，介鄂罗斯、哈罕之间，不应更有他国也）〉。西北与俄罗斯萨穆接壤，或曰兴阿喇克等国犬牙相错。大抵皆世俗所传之大西洋也，然而塞克之邦风朴民淳，人无欺诈，尚气节，敦廉耻，不得以荒远而鄙夷之矣。〈（源案：阿喇克，即哈萨克之音转，塞克即萨克之音转，盖布哈尔即西哈萨克国。乃讹而为阿喇克，又讹而为塞克，遂分一国为三国矣。哈萨克有四大部，左哈萨克其东部，右哈萨克塔什干其中部，布哈尔其西部也。此三部外，尚有北哈萨克近鄂罗斯，不通中国，疑即此所谓阿喇克者欤。左右二部为古康居，西北二部为古大夏，而分有大宛西境。明时为赛马尔罕地，自明末赛马尔罕分裂，敖罕得其十之三，布哈尔得其十之七，近日布哈尔又灭敖罕而有之。则兼并大宛、大夏之域矣）〉。

《西域水道记》：塞勒库勒，在叶尔羌城西八百里，为外蕃总会之区，达外蕃凡三道，自塞勒库勒南十四日程，曰巴勒提，又东南一日程，至其属邑，曰哈普伦。哈普伦南十六日程，曰土伯特，即藏地也。巴勒提西南二十九日程，曰什克米尔，地出砒蜡纸。又西南四十三日程，曰痕都斯坦，善镂玉，以上皆各自为部，不相属。自塞勒库勒西五日程，曰黑斯图济。又西南三日程，曰乾竺特。岁贡金一两五钱，又西四日程，曰搏洛尔，其地南即巴勒提，曾贡剑斧匕首。乾竺特西北九日程，曰拔达克山，其汗素尔坦沙献霍集占，首贡刀斧八骏。又北五日程，曰塔木干，又北三日程，曰差雅普。又西南三日程，曰浑渚斯。又西北三日程，曰塔乐罕。与噶斯呢为邻，自黑斯图济至塔尔罕，皆噶勒察种也。搏洛尔西二十日程，曰爱乌罕，亦曰喀布尔。乾隆二十七年，其酋爱哈默特沙攻痕都斯坦，杀其汗，其子逃窜，爱哈

默特沙取扎纳巴特城，以伯克守之。自居拉固尔城，又统至固珠喇特，攻克什米尔，执其头目塞克专。二十八年，贡刀及四骏，其属邑曰拉虎尔，距叶尔羌六十二日程。自塞勒库勒北三日程，曰滚。又西北二日程，曰斡罕。又西北二日程，曰差特拉勒，分二道。北一日程，曰罗善；西一日程，曰什克南。乾隆中有与叶尔羌、阿奇木、伯克鄂对为仇，肆凶暴，名曰沙关机者，即什克南头目也。又西北二日程，曰达尔瓦斯。自滚以下，亦噶勒察种。达尔瓦斯，北为喀尔提锦部，布鲁特罗善北为霍罕。霍罕城距东南塞勒库勒十日程，其属城曰玛尔噶浪，在东北一日程；曰安吉延，在东北三日程；曰窝什，在东南八日程；曰纳木干，在西南二日程；曰塔什罕，在西北四日程；曰科拉普，在西北五日程；曰霍占，在西南五日程；其大伯克自称曰汗，居霍罕城。其塔什罕城，旧为舍氏和卓，与摩罗沙木什二人分治。舍氏和卓渐强，摩罗沙、木什被其侵夺，与霍罕乞师复还侵地。舍氏和卓又会西哈萨克攻杀摩罗沙木什二子额尔德呢，遂攻塔什罕。丕色勒来援，哈萨克后得之，终入霍罕。霍罕与回部分界处，有二岭。曰噶布兰，曰苏提布拉克，额德格纳部布鲁特居之。岭东为回布岭，西为霍罕，霍罕西十五日程，曰布哈尔，亦大国。东南距塞勒库勒三十二日程，其属城曰鄂勒推帕，在东七日程；曰济杂克，在东三日程；曰拜尔哈，在东北三日程；曰噶斯呢，在西南十日程；曰坎达哈尔，在西南二十日程。

《职方外纪》：中国之北，迤西一带，直抵欧罗巴东界，俱名鞑而鞑，其地江河绝少，平土多沙。大半皆山，大者曰意貌，中分亚细亚之南北，其西北皆鞑而鞑种也。〈（案：意貌山，既最大，自当指葱岭言之，当云中分亚细亚洲之东西，原本作南北误也。若指阿尔泰山北干言之，则蒙古游牧部落在其南，不皆在山北，或指天山言之，则又不能西抵欧罗巴洲。观上文中国迤西一带，则南北字当为东西之误明矣。鞑而鞑即蒙古达子，又即达达里，皆谓游牧部落，特译音小殊耳）〉。气候极寒，冬月无雨，入夏微雨，仅湿土而已。人性好勇，以病歿为辱。人罕得遍历其地，亦无文字相通，故未悉其详。然大率少城郭居室，驾屋于车，以便迁徙。产牛羊骆驼，嗜马肉。以马头为绝品，贵者方得啖之。道行饥渴，即刺所乘马，沥血而饮。复嗜酒，以一醉为荣。此外诸国更有殊异不伦，如夜行昼伏，身蒙鹿皮悬尸于树，喜食蛇蚁蜘蛛者。有人身羊足，气候寒极，夏月层冰二尺者。有长人善跃，一跃三丈，履水如行陆者。人死不事棺槨，衣衾殓殓瘞埋，且有谓不忍委之丘陇者。此皆其国俗之殊异者也。迤西旧有女国曰亚玛作搦，最骁勇善战，尝破一名都曰厄弗俗，即其地建一神祠，宏丽奇巧，殆非思议所及。西国称天下有七奇，此居其二，国俗惟春月容男子一至其地生子，男辄杀之。今亦为他国所并，仅存其名。〈（即诸史所谓西女国也，今为他国所并者，谓并于南都鲁机也）〉。又有地曰得白得，不以金银为币，止用珊瑚。〈（邱长春《西游记》在葱岭西之大雪山，见太祖，回至石峡，遇征西军回，多携珊瑚。有从官以白金二镒，买五十株，高者尺馀，是其证也）〉。又以至大刚国，惟屑树皮为饼如钱，印王号其上以当币。其俗国主死后，舆棺往葬，道逢人辄杀之，谬谓死者可事其主。尝有一王会葬，杀人无数，此其西北之国俗然也。

又曰：中国之西北出嘉峪关，遇哈密、土鲁番，曰加斯加尔，多高山，产玉石二种。出水中者极美，出山石中者以薪火烧石迸裂，乃凿取之，甚费工力。牛羊马畜极多，因不啖豕，诸国无豕。自此以西曰撒马儿罕，曰革利哈大药，曰加非尔斯当，曰杜尔格斯当，曰查理，曰加本尔，曰古查，曰蒲加刺得，皆回回诸国也。其人多习武，若商旅防寇，非聚数百不可行，亦有好学好礼者。初宗马哈默之教，诸国多同。后各立门户，互相排击，持戒亦有数端。其大者在不得辩论教中事，谓教如此立，则当冥心顺受，虽理有未安弗顾也（案：杜尔格即度尔格，凡言斯当者，即斯单之音转。或作斯坦，或作土丹，或作速檀，或作算端，皆西域酋长之称也）。

《万国地理全图集》曰：葱岭以西，与中国交界，南及加布白西等国，北至俄罗斯藩属国，东接新疆，西至甲片湖，北极出自三十五度至五十五度，偏东自五十五度至七十五度。

纪昀《阅微草堂笔记》曰：海中三岛十洲，昆仑五城十二楼，词赋家沿用久矣。朝鲜、琉球、日本诸国，皆能读华书。日本余见其《五京地志》及《山川全图》，疆界袤延数千里，无所谓仙山灵境也。朝鲜、琉球之贡使，则余尝数数与谈，以是询之皆曰东洋自日本以外，大小国土凡数十，大小岛屿不知几千百，中朝人所必不能至者。每帆樯万里，商船往来，均不闻有是说惟琉球之落漈，似乎三千弱水，然落漈之舟，偶值潮平之岁，时或得还。亦不间有白银宫阙，可望而不可即也。然则三岛十洲岂非纯构虚词乎，《尔雅》、《史记》皆称河出昆仑，考河源有二。一出和阗，一出葱岭。或曰葱岭其正源，和阗之水入之。或曰和阗其正源，葱岭之水入之。双流既合，亦莫辨其谁主谁宾。然葱岭和阗，皆在今版图内。开屯列戍，四十余年。即深崖穷谷，亦通耕牧，不论两山之水孰为正源，两山之中，必有一昆仑确矣。而所谓瑶池悬圃，珠树芝田，概乎未见，概乎未闻。然则五城十二楼，不又荒唐矣乎。不但此也，灵鹫山在今拔达克山，诸佛菩萨骨塔具存，题记梵书一一与经典相合，尚有石室六百余间，即所谓大雷音寺，回部游牧者居之。我兵追捕波罗泥都霍集占，尝至其地，不过如斯。种种庄严，似亦藻绘之词矣。相传回部祖国，以铜为城，近西之回部云铜城，在其东万里，近东之回部云铜城，在其西万里。彼此遥拜，迄无人曾到其地。因是以推，恐南怀仁《坤舆图说》所记五大洲珍奇灵怪，均此类焉耳。

源案：蓬莱方丈，始自秦汉方士，史书之以见其妄，未有信之为实者，何劳考辨。惟《梁书》言毗骞国王，在南海中，去扶南八千馀里，其国王自古至今，长生不死，能作天竺书三千馀言，与扶南王相报，说其宿命所由，与佛经相似，此则明载正史，确凿可征。乃自明以来，西洋商舶，无岛不通，远穷南极，曾有此岛屿乎。止当辨毗骞，不当辨十洲三岛也。昆仑之为葱岭无疑，其地产玉，又上有龙池，故玉山瑶池之说，尚非无因。至灵鹫山在中印度，为今之痕都斯坦，其北之克什弥尔，始为北印度，又北始为拔达克山，则并非北印度境，距中印度境则数千里，乃谓诸

佛菩萨骨塔具存，殆同儿戏。至大雷音寺出西游演义，并非释典，何得回疆真有其寺耶。回部祖国，为天方、阿丹、默德那等地，在西印度西红海之间，《明史》载其职贡，本朝通其商舶，粤中所谓港脚白头回子，即其部类也。其地有教祖穆罕默德之墓，墓前有元石，凡各国回人皆岁往礼拜焉。在西藏之西，八千馀里（见《明史·回回历论》）》，并非渺茫之域。岂有彼地回人，舍其圣祖陵墓而向东礼拜之理耶。笔记虽小说家言，然纪文达负张华博物之名，恐惑观听，故录而辩之。

卷三十四

○东阿利未加洲

东阿利未加洲，滨临因里阿海东。自海岸以至西域，宽约五六百里不等。南自含摩那司，北至阿匿，海岸环绕，计长三千里。北广南狭，内有路巴达大山，其横纵起伏，长竟海岸。河二，路菲尼河，由摩新弥葵出海；匿弥西河，下流分四口出海。商舶以归，尔厘麻尼河口为最。土番面黑，颇工技艺。千五百年〈（明宏治十三年）〉间，葡萄牙人由兀贺峡至此地垦辟。南隅海岸，拒绝外人。故其中部落若干，酋长若干，甲所辖何地，乙所辖何地，幅员户口，政事教门，均未能悉。南有含摩那司、英汉门、苏华腊、麻尼加、摩加兰牙、摩新弥葵六部，俱葡萄牙所辖。北有山危麻、摩匿二部，阿丹所辖。

含摩那司，东界海，西界旷野，南界加富腊厘阿，北界英汉门。东阿未里加洲之南界，即由此而起。

英汉门，东界海，北界苏华腊，西南俱界含摩那司。地卑湿，水土恶。土番三千，犷好斗，有葡萄牙炮台守兵百五十。产颜料、象牙、黄蜡，岁值不下十万棒。又船载人口，售于摩新弥葵，辄十馀舟，每舟四五百口。

苏华腊，东界海，西界麻尼加，南界英汉门，北界摩嘉兰野。滨临海岸，滩沙日涨，非小艇不能登岸。土番是加付腊黎阿种类，常怀利刃，不受约束。葡萄牙初至，本一大市镇也。造筑炮台，以御土番。土产金及象牙，皆由染弥西河运至交易，今则改运莫新弥葵所属之归尔厘马尼河口，昔日市埠倏变穷乡，海舶间至，亦止棉花粗货。

麻尼加，东界苏华腊，西界旷野，南界含摩那司，北界摩加兰野。葡萄牙人于千五百六十九年〈（明隆庆三年）〉，率师夺据，筑炮台，开埠市，采金矿。金杂山石中，取之竭力，而产不旺。惟铜、铁、象牙与贩卖人口交易甚大。

摩加兰野，东界海，西界旷野，南界苏华腊，北界摩新弥葵。土番面光黑，厚唇鬃发。兵惟弓矢，无火器。闻其地前即摩诺摩达巴国，新摩其首部落也。后因割裂，各霸一方，其酋占牙麦腊者，即麻腊威湖之盗，据新摩部落，自称曰归底威。

莫新弥葵，东界海，西界旷野，南界摩加兰野，北界山维腊。葡萄牙所辖地，此为最大。近海岸六岛并属葡萄牙。摩新弥葵部落，在归尔厘麻尼河口之上。道路虽坦，水土颇恶。然葛〈（葛，衙署也）〉之华丽，甲于阿未里加洲。所设税口、公所，墉垣宏敞，近有坍塌。贵人僦从，服饰都丽，佩带多饰以金。居此者，葡萄牙人五百，阿丹人八百，土番约六千，黑番千有五百。炮台不甚坚，可御海贼，难拒大

敌。归尔厘麻尼，为国中大市镇。赤金象牙，贩卖人口，均由匿弥河运至。市埠鳞次，近因英吉利夺得达温峡与毛厘底敖司二处，阻贩人口过境，故市减大半。然每年运回葡萄牙者，尚不下四千口。厥凌岛在其对岸，旧无人居，葡萄牙人开辟其地，迁莫新弥夔之人居之。与马那亚司加大岛相近，常被其劫夺。归阿腊岛，亦葡萄牙市埠。孟麻沙岛，膏腴，产糖与五谷。般麻岛、匿西脉岛、孟菲阿岛，陆产固丰，其海中尤多珊瑚。以上皆葡萄牙所辖。其贸易以匿西墨岛为最。有炮台，设兵二百三十。几利斯底匿人五百，番奴二万一千八百有奇，土番约万人。产蜜糖、黄蜡、颜料〈（以上六国皆属葡萄牙）〉。

山维麻，东抵海，西抵旷野，北界阿匿，南界莫新弥夔，葡萄牙始至其地。向是苏恢里西人所据，今则分而为三：南隅腹地为牙尔腊人所夺，牙尔腊者，阿迈司尼阿国中土蛮也；南隅沿海诸岸，则为阿丹所夺；北隅有麻雅诺沙大部落据之，拒绝欧罗巴，不通往来。千七百七年〈（康熙四十七年）〉，有英吉利之船户驾三板船，登岸探访，被羁不返。由洋面遥望麻雅诺沙部落，半属茅舍，半属高大石坟，工作华丽，故欧罗巴人谓之埋人城。墨腊瓦者，麻雅诺沙之部落，贸易鳞菜，亦一大市镇也。

阿匿，东西抵海，南界山维麻，西北界阿迈司尼，西南抵旷野，为东阿未里加尽处。北岸对海，即阿丹地。阿匿土番种类甚杂，地尽沙石，土燥不宜播种。北多山阜，所运出土产除香料外，莫识何物。麻马腊亦一小部落，每年一会，所产香胶、没药、乳香、赤金、象牙。诸货毕至，商贾云集。阿丹所贸易之香胶、香料，大半由此购去，并闻内地运出者。距麻马腊二十日程，殆产自牙尔腊地也。阿匿尔在阿匿西北，与牙尔腊毗连。首都曰西腊，本阿匿旧地。俗奉马哈墨教，常与阿迈司尼阿争斗，日久两惫，各自分理。西腊贸易蕃庶，竟为阿迈司尼所夺。由此再进则皆山野，内有任尼罗国。遇新酋立时，即屠其旧酋媵妾大官，取血以饰宫室。〈（以上二国皆属阿丹）〉

《万国地理全图集》曰：东亚非利加，惟葡萄牙国开新地。其西北之方，被回回所据。其海边最低，到处稠林。所有人类，烈性野心，近于禽兽。其山内有药材，以及金沙。其葡国之权现衰，兵微将寡，以买人口为要，又将其奴送到广东、澳门、内地。族类狡戾猖獗。草木畅茂，禽兽繁殖，五谷不登。其葡之要地曰所弗刺、摩散北两邑，其回回之城，称曰墨林他。虽其海边长九千里，但无文学之士巡历纪载，故其情形难详。

东大岛，称曰马大狎甲，出南极自十二度至二十六度，长八百四十里，阔二百二十里。其中一带高山，巖岩险，溪瀑飞流，其山谷中多苏木、高竹、橙核等树。平地水泽，风景甚好。居民二百万丁，颇向化。道光年间，岛君延英国教师，劝民向学，文艺大进，多信服耶稣之教。王忽被王后毒死，驱逐善良，而招其匪类。其佛兰西国官，务开新地，亦无效而退。

其东方有英国之岛，称曰冒勒突。周围四百五十里，出白糖等货。每年运进者，价值二百七十万银两，凡所运出者百万两。

佛国据捕耳木屿，居民九万七千二百丁。出白糖、珈琲、丁香等物，每年价银百八十六万，但无停泊之港，每遇狂风，船难避坏。其三岛外还有群岛，多椰子。

○北阿利未加洲四国〈（即《职方外纪》之马罗可国、弗沙国也。古分二国，今分四国为佛兰西藩属）〉

阿利未加洲之北四国，曰摩罗果，曰阿尔尼阿，曰都尼司，曰特厘波里。四国同区，统而名之曰麻马里。南依大山，北滨地中海，地狭而袤长。东界伊揖，西界阿兰底海，计长二千里。南抵阿腊特斯山，北抵地中海，计宽自五六十里以至百馀里。阿腊特斯山，自东自西，长与麻马里等。最高之峰，千有三百丈，其余小峰，四五百丈，均在麻马里之境。山林深密，终年积雪。四国土番，皆麻密种类，容貌风俗，四国皆同。当国势盛时，文教与额力西相等，武功与意大里争雄。兼取得大吕宋之西栖岛，商埠云集，既强且富，名著海邦。何期盛衰靡常，四国均为意大里亚所灭，既又为回教之阿丹侵夺，设立加里甫统辖之。驻兵加尔湾，悉令改从回教之马哈墨教。毁其书籍，愚其耳目，并隔绝他国，不许往来。垂二百馀年，声教埽地，竟成野蛮，顽蠢几不可问。后值阿丹衰弱，各国始自为主。既而阿弥尼阿、都尼司、特黎波里三国，旋为都鲁机所灭，分设总理之官，在阿尔尼阿者曰尼，在都尼司者曰弥，在黎波里者曰巴札，遂均为都鲁机属国，屯兵镇守。是时土人分三种，曰摩罗，即都鲁机之人；曰阿丹，即回教之人；曰土番，即山谷土著旧人。摩罗踞城邑，嗜鸦片〈（采取本地所产麻依法配制，亦曰鸦片）〉；阿丹之人，则游牧迁徙，以毡帐为庐舍；其本地土番，多在阿特腊斯山，岩居穴处，铙猎为生。然都鲁机之兵，皆无赖横行，动辄戕官，盗劫四出，居民咸罹荼毒。惟摩罗果一部，未被侵夺，谨守疆域，其王亦勤政自强。都尼司、特黎波里二国，近亦复国自王。惟阿尔尼阿染都鲁机之俗，专掠欧罗巴各国商舶，惟被弥利坚、英吉利二国之船所败，既又劫佛兰西商船。佛兰西遂起兵捣其巢穴，设兵分守。然其人皆贼，很难与耦居，故佛兰西之兵，近亦退居海口。

摩罗果国，为麻马里极西之地，在阿特腊斯大山之后，幅员二十九万方里，人户千二百万口。土沃产丰，惟达非里部落较瘠。其国旧通声教，后王无道，遂为阿丹所夺。王既降为部酋，愈恣昏乱，所属兵亦如禽兽。垂二百馀年，遂成野人。近日复国，仍以摩罗果为国都。新王力革污俗，政事文学日渐起色。惟所行律法，仍用回教。且未设议事之官，临事仓猝裁决，并无旧章。骨肉时思篡夺，故叛谋迭见。护卫兵五千，与操防之兵，俱无纪律。田赋什而征一，牧畜二十而征一，岁得税饷银五百万员。领大部落二，小部落五十。

摩罗果，东界阿尔尼阿，南界沙漠，西界海，北界地中海。领小部落二十有六，产

杏仁、羊皮、象牙、蜜糖、黄蜡、树胶。

非司部，东界阿尔尼阿，西界摩罗果，南界阿特腊斯山。领小部落二十有四，产大呢、地毯、绸纱、手巾、帽。阿尔尼阿国，古时谓之卢弥尼阿。纵七百里，横自五十里至百五十里，户二百万口。旧与摩罗果同俗〈（可证古亦属于马罗可国）〉，迨阿丹夺国，悉改回教。二百余年，全失本性，蛮顽无知。土尚肥美，宜播种，山林柏橡丛茂，而习俗游惰，半多荒弃，以劫夺为生涯。又为都鲁机所据，设呢官以董其事，有镇守兵万五千。队伍皆无赖，不知王法，竟有绞死呢官，自择同伍骁勇代之者。土番之海寇亦自立一王，专劫海舶，所获资财，半归头目，半自裒分。至千八百十五年〈（嘉庆二十年）〉，始为弥利坚、英吉利船击败。旋有佛兰西船被其虏劫，人货俱尽。佛兰西于千八百三十年〈（道光十年）〉起兵捣巢，歼厥渠魁，尽有全国。设兵三万，防守其地。然腹地皆阿丹种类，常怀仇恨，故佛兰西之官兵，近日退居港口，不屯内地。

阿尔尼阿，东界都尼司，南界沙漠，西界摩罗果，北界海，在都尼司之东北，幅员二十四万五千方里，户口二百万名。领小部落五十有八，产羊皮、香料、蜜蜡、羊毛、纱呢、果实、珊瑚。

都尼司国〈（《职方外纪》作弗沙国）〉，在阿尔尼阿之南，东界特黎波里，南界沙漠，西界阿尔尼，北界地中海。地势平坦，宜播种。且北隅沿海，小岛百馀。较之阿尔尼阿，疆域差小。旧都于加尼达，近欧罗巴洲之南岸，互市甚盛，不亚于意大利。后为阿丹夺国驻兵，加尔湾、都尼司二部，勒改回教，尽失旧俗，榛狁无知。迨至千六百年〈（明万历二十八年）〉，又为都鲁机所据，设弥官以理政事。兵卒横行，官受挟制，民罹荼毒。近日酋长，遂背都鲁机而自立，改都于都尼司，悉除虐政，与国人更始。以土番顽蠢，广采才智，凡欧罗巴人，稍有才识者，虽微贱皆加任用。立规条，判曲直，约束番众，法度渐可观。幅员七万五千方里，户二百万口，领小部落二十有一，产绒绸、哔叽、番碱。

特黎波里国，在摩罗果之南，东界伊揖，南界沙漠，西界都尼司〈（亦古弗沙国境）〉，北界地中海。域内多山，惟北隅沃壤。然所产不赡于食，仰资邻国。其人先受愚于阿丹之回教，嗣受虐于都鲁机驻防之兵。后有巴札曰哈弥者，设谋备宴，邀其兵目三百会饮，伏壮士禽缚诛之，并尽屠其兵党，即自立为王，仍都于特黎波里。都鲁机衰弱，不能征讨，从兹不属都鲁机。哈弥约束部卒，除虐苏困，招徕欧罗巴技艺之人，教导土番。近日之王宽厚俭节，通好各国，外揽宾客，内化愚顽，较摩罗果等国政事尤整饬。领大部落二，小部落三十有三，幅员二十一万五千方里，户百万口有奇。

特黎波里，东界伊揖，南界菲山，西界都尼司，北界海，领小部落二十四。产呢纱、地毯、橄榄、金沙、象牙。

菲山，北界特黎波里东南，西界沙漠，在特黎波里之南，领小部落九。

○重辑〈（原无今补）〉

《职方外纪》曰：厄入多，近地中海一带，为马罗可国〈（即摩罗果国）〉与弗沙国〈（即都尼司国）〉。马罗可地分七道，出兽皮、羊，皮极珍美，蜜最多，国人以蜜为粮。其俗最以冠为重，非贵人老人不得加冠于首，仅以尺布蔽顶而已。弗沙地分七道，都城之大，为利未亚之最。宫室殿宇，极其华整高大，有一殿周围三里，开三十门，夜则燃灯九百盏。国人亦略识理义。厄入多之西，为亚非利加，地最肥饶，易生，一麦尝秀三百四十一穗，西土称为天下之仓。马逻可之南，有国名奴米弟亚〈（即南阿未利加土番）〉，人性狞恶，不可教诲。有果树如枣可食。其地有小利未亚，乏水泉，又千里无江海，行旅过者，须备兼旬之水。

《万国地理全图集》曰：亚非地中海边各地，古时归罗马国为藩属，嗣后蛮夷侵之，而东方回回又侵其地。然其居民劲悍，专在地中海劫商船，三百年来惊害各国，故佛兰西起水师渡海，以讨其罪而取其邦。其地名亚利额，居民三百万人。佛军奋威交战，大败回回人，自后设兵驻防，赋额悉准经制。其回回族暂退沙野，心怀仇怨，不时飞马而出，挺戟攻击。故佛国终年严兵防堵，保障封疆，国费最耗。然佛国誓服蛮夷，终不肯弃其地也。

吐匿回回在海边，长三百里，有十万丁，却已向化。织布、经理安分。每年运麦谷、橄榄油出市。

特利破里，在沙野中间，四围沙漠，狂风四起，道路崎岖。此内居民，皆以骑驼游牧，剽掠为生。马落可国，西北山地较广，居民六百万，地出蜡、药材、南果。昔时其国兵船，四海劫掠，获人即行囚禁，使服回教。今已挫其锐气，不敢出海也。至居民之规矩风俗，守其回教，执迷不悟。非崇其教者，不论何国，视之若仇。慚勤劳，好游荡。其衣以宽布缠身，首戴红帽，以巾裹头腰，插刀剑鸟枪。严气端容，安坐不动，虽不饮酒食鸦片者，亦食麻叶，如烟可醉。严防闺阃，不许出门，出则蒙帕，惟露其眼。其女以肥为美，尽避静幽，度日无事。所读之书，称为天经。禁食豕肉饮酒，通商不广，银钱罕得，男好骑射，艺皆精熟。

《地理备考》曰：北州地，属佛兰西兼摄者四国，一马罗各国，在亚非里加州之西北，北极出地二十七度起至三十五度止；经线自西二度起至十四度止。东至亚尔日耳国，西枕亚德兰的海，南连萨阿拉沙漠，北界地中海。南北相距二千五百里，地面积方四十六万七千七百七十里，烟户六兆馀口。地势由西南而东北，亚德拉斯山横亘其中。砂磧居多，田少而腴，饶谷、果、蕃、驼、马。土产铜、铁、锡、蜡、窝宅、绵花、熟皮、木料等物。河之长者曰木禄亚，馀河次之。四季温和，夏季酷热，海风解之；沙漠薰气，峻岭蔽之。汗位相传，人奉回教。国分六部，一马罗各

，一非斯，一苏斯，一达拉合，一达非勒，一西日美塞。国都昔在马罗各，今则迁于非斯部。其贸易尤盛者，乃马罗各部之磨加多尔城也。土人与天方国人贸易，皆结队而行。

亚尔日耳国，在亚非里加州之北。其国土在北极出地三十二度起，至三十七度止；经线自东七度五十分起，至西四度三十分止。东至都尼斯国，西连马罗各国，南接萨阿拉沙漠，北界地中海。长二千一百五十里，宽一千八百里，地面积方二十四万九千三百里，烟户二兆五亿馀口。冈陵络绎，东南尤甚。峰峦参天，冰雪凝积。沿海陡坡险峻，不易登临。河之长者曰支里弗，曰瓦低，曰的。田土极腴，人惰耕种。沙漠辽阔，土产金、银、铁、锡、矾硝、珊瑚等物。地气温和，人安物阜，惟多地震之患。国无君长，昔归土耳其国兼摄，今属佛兰西国统辖。奉回教，少技艺，鲜贸易。国分六部，曰亚日尔，曰冈土丹的纳，曰马斯加拉，曰的德利，曰萨布，曰卑北耳其。都城在亚日耳，建于山坡之上，楼台峻叠，风景相称。其通商冲繁之地，一西的非卢至，一萨尔日，一德内斯，一摩斯达科宁，一布日亚，一波科那，一冈土丹的纳。

都尼斯国，在亚非里加州之北。北极出地三十二度起，至三十六度三十分止；经线自东五度起，至九度止。东至的黎布里国，西连亚日耳国，南接沙漠，北界地中海。长千五百里，宽八百里，地面积方五万五千五百六十里，烟户二兆八亿口。少冈陵，多沙漠，河滨膏腴，馀地焦燥，沿海舄鹵。河之长者曰美日尔达，湖之大者名曰卢德亚。土产银、铜、锡、蜡、水银、卤砂等物。狮、象、猴、獐、山狗、野猫，结队成群。地气湿热，人物富庶。王由众举，而请命于土耳其国。奉回教，少技艺，然在此州尚为礼义之邦。商贾辐辏，内地尤盛，亦结队而行。国分二部，一的里几亚，一达拉几斯。都城建于湖滨高阜，街狭屋卑，惟宫殿庙堂颇峻丽，其通商多在海滨。

一的黎布里国，在亚非里加州之北。北极出地二十四度起，至三十四度止，经线自东六度三十分起，至二十六度三十五分止。东至厄日度国，西连都尼斯国，南接萨阿拉沙漠，北界地中海。长四千里，宽二千五百里，地面积方二十五万里，烟户二兆五亿馀口。少山陵，多沙漠。其的内河贯彻于中，地甚膏腴。产谷、果、皮、羽、蜡、绵花、硫磺、滑石、丹参、金沙，山禽野兽，蕃衍成群，尤多猛兽毒虫。昼暑夜寒。王位相传，仍请命于土耳其国。奉回教，少技艺，贸易结队而行。国分四部，一的黎布里，一巴尔加，一非山，一亚达美。都城建于海滨，屋宇壮丽，街道阔直，五方辐辏。其通商冲繁之地，一名勒波达，一名美苏拉达，一名奔加西，一名达尔内。

《地理备考》曰：北州之地隶大吕宋国兼摄者，一修达国，在马罗各国日巴拉大海峡之东北，金城汤池，烟户八千馀口。泊所不稳，贸易甚微。一北农的威勒斯，一亚虑塞马斯，一美黎辣，皆城池坚固。一加那里亚斯，其亚德兰的海之西北，有岛

二十，其大者曰德内里岛。湿热饶瘠，树林稠密。产酒、果、糖、蜜、黍、麦、豆、薯、丝、材木，泊所稳便，贸易繁盛。其巴尔马城，在加那里亚岛中，田土膏腴。德几塞城，在兰塞罗德岛中，有火山。

《外国史略》曰：亚非利加州北方，延地中海曰巴八里。北极出地自二十八度至三十六度，偏西自十一度三十分，偏东及二十七度十二分，阔千馀里，长六千六百里。西有高山，连及地中海。土平坦，少树木。藉井灌田，沙卤难耕。

一曰马鹿国，亦作马罗可，本州极西北之地。广袤方圆万三千里，居民八千五十万口。南及旷野，北及地中海、危押达海峡，东及大西洋海口，连佛兰西国。山岭连延，极高者千二百丈。内地膏腴，多蚂蚱害稻。海边沙地，亦出五谷、杏仁、枣、油、树膏，亦有矿出金、银、铜、铁。民多摩罗人，与亚拉国之回族，犹太国之农夫，皆西班牙驱来此地。人多黑面，奉回教，与天主教之徒战，故西班牙人见即虏之为奴，或被巡海船劫卖为奴，近始禁止。地产皮裘而无布，民好牧牛羊，不务农。马骏而少，故价昂。驼高有力，每年载出土物，约二万驼，而运入金沙、鸵鸟、翎、象牙、奴婢。皆与亚拉回人及印度人，由海通商，价银约二百万圆。地中海两港口，大西洋海滨三口。遇西洋船至，约束甚严。且回教轻傲外国，故贸易不兴。国分三大部，一马鹿，二非士，三他非勒。又分各小部，南边尚有土酋，自据小地。

此国自操全权，政令甚酷，草芥百姓，奴视臣下，上命是听，下不敢怨。无议事之官，国王任意出令，无敢谏者。各部设总兵税赋官，每年收饷约四百万员，内三十三万圆为各西国商船所给，以免马鹿海贼之扰。军士万五千，双桅师船二，战艇十，各地炮台二十四，英人昔据其北海一邑，旋即弃之，今惟佛兰西国尚据海口数城，以为防御。其都城曰非士城，居民八千。曰米贵城，居民五千。曰马鹿城，居民三万。此皆国主所驻，在高山之下。其君安逸，生子与民养之，十二岁乃回宫。

一佛兰西藩属地，曰押额国，一作阿尔尼，一作亚尔日。其疆域南及旷野，北及地中海，东连马鹿，西接土匿，广袤方圆四千二百里。古时此地极盛，商周间，犹太国氓所开垦也。汉时为罗马军所攻服，越六百年，遂自立国，嗣后亚拉回回据是地。晋高祖天福元年，有霸王创基，驱西班牙及摩罗之兵，于此地立国，垂数百年。自明正德以来及道光十年，贼匪屡掠商船，戮杀残虐。英吉利、荷兰、西班牙、佛兰西等国，迭轰其炮台，坏城烧船，仍为海盗，肆劫如故。佛国因调大军攻击贼巢，遂据其国。民多游牧，结党抗违，杀掠佛兵。佛国再调兵深入沙地，麇饷劳师，数年仍肆焚掠。道光二十四年，与马鹿一战，获大胜，海盗乃战栗。佛国设将军镇守是国，其守护兵士七万，帑费重大，惟管其城池，其郊外之游牧，仍不顺也。产物惟枣，佛国招集外氓来垦，但畏亚拉，不敢耕其田。此地昔分四部，今佛国所据者，一押额城，周十里，北极出三十度四十七分，偏东三度四分，居民二万三千馀，自佛兵据后，回教他徙。一阿兰城，周二十里，居民昔属是班亚，今顺佛国命贸

易。一破那城，及君士旦古城，距亚额东六十五里，居民二万。特米新邑，居民一万。山南地皆游牧，不归佛国管束，惟商贾深入旷野，与游牧贸易。

一曰土匿国，亦作都尼司，其城南及旷野，北及地中海，东连地陂里，西与押额交界。广袤方圆三千四百里，居民三百万。南方沙地多饶，西方田肥土茂，多嘉果，葡萄尤美。五谷蔬菜亦饶，驴马尤健，岁出牛皮十万张，羊毛二万石。海边珊瑚甚多，渔舟百六十只。其民向为海盗，扰地中海。道光元年，佛国军强平之，海贼尽敛。土耳其国，旧在此操权，军士向多土耳其人。土耳其旧都，距海十二里，屋卑街狭，居民十三万。改文邑，居民五万，城内回回庙极壮。加他俄城亦繁华，历二千年，今废不兴，每年饷三千万圆，兵士约一万五千。

一曰地陂里国，一作特厘波里，一作的黎布里，在土匿之东，乃沙野也。广袤方圆八千里，居民百五十万，半为贼。地虽广大，多沙无水，少物产。犹太人曾此贸易，后土耳其国调兵帅管之，约兵万五千，大战船一，小战艇十六。国人本皆海盗，今佛兰西平之。都城民二万五千，附近多古迹。

《瀛环志略》曰：泰西人记非尼西亚故事曰：非尼西亚，古商贾国，夏以前西土人闭户削迹，耕田凿井，俯仰自足，老死不相往来。不见可欲，其心不动。有夏中叶，智者创舟车，贸迁有无，居积财货，以此致富。西土名其人曰非尼西亚，译言客商也。始居于巴尼斯的纳海滨，后有立国于希腊者，曰德巴斯〈（详《希腊图说》）〉。希腊隘不能容，周厉王十年，有迁于地中海之南岸者，定都城于土罗〈（即今突尼斯地）〉更国名曰加尔达额〈（一作加大其）〉。时地中海南岸，荒秽未辟，人户稀疏。非尼西亚人，出其货财，建城邑，立市廛，垦田野，四方无业之民，群往归之。益治舟楫，流通百货，地中海南北两岸利权大半归其掌握，复跨海辟西班牙，建为藩部，国富兵强，一时无抗颜行者。越数十年而意大利之罗马兴。罗马初兴，甚微弱，且不习兵事，加尔达额视之蔑如。地中海有两大岛，曰哥尔塞牙〈（一作可耳西加，又作郭士喀）〉，曰萨丁〈（一作沙力尼阿，又作撒地尼，又作撒下）〉，皆附近罗马。加尔达额据之以逼罗马，罗马不敢争。又西治里岛〈（一作西基利，又作西西里亚）〉，与罗马南境相接，本属罗马。加尔达额以兵力强夺之，罗马亦不能取，由是益骄。

周显王年间，额力西之马基顿王亚勒散，得以大兵伐波斯，游兵至加尔达额，攻破土罗，屠八千人，国几亡。从此声威顿削，而罗马日益强。先是罗马习陆攻，不习水战，加尔达额胜则进攻，失利则张帆扬去，罗马无奈何。加尔达额有战舰穿漏，抛泊海岸，罗马得之仿其式，三月而造成百艘。有义略都者，讲求驾驶之法，简劲卒练为水军，往来海道日益娴熟，由是与加尔达额为敌。加尔达额尝侵罗马，虏其将勒孤罗，槛送罗马营，请易俘囚。罗马帅惜其才，将许之。勒孤罗张目叱之曰：亡罗马者诸君也，出战被俘，本国从无救赎之例，乃欲以一人坏国法耶。毅然反敌营，大骂而死。罗马军人人雪涕，勇气百倍，加尔达额败绩遁去，遂夺回三大岛。

加尔达额有夙将阿弥利加，与罗马血战数十年，称为能军。有子曰汉尼巴（一作阿尼己尔）》，幼敏慧，尝询父以兵法。父戏之曰：尔能矢志灭罗马，当授尔。汉尼巴即设誓于入必德尔之前（古时各国所奉宗祠之神，未详何时人），阿弥利加悉以韬略授之。汉尼巴既长，谋勇过之。伐罗马屡奏捷，年二十五拜为大帅。合西班牙之兵，大举伐罗马。登舟慷慨，酹酒海中曰：不灭大敌，有如此水。师抵罗马南境，破其边城，乘胜急攻，锐不可遏。罗马四战四北，南境诸城皆陷遂。渡厄伯落河，越比勒钮阿比斯峻岭，长驱直进，势如风雨。罗马属部西拉古萨亦叛，附加尔达额，罗马大震。罗马大帅发比约马西摩与众谋曰：虏气方盛，难与争锋，客兵利速战，宜坚垒以老其师，而别以奇兵袭其后。乃闭城拒守，为卑辞以缓攻，而遣别将马尔塞罗，收复古西萨拉城。因伏兵邀其归路，又遣西比扬潜以舟师渡海，袭其国都。汉尼巴方与罗马军相持日久，食垂尽，闻都城警报，急引兵回救。发比约马西摩率劲兵潜蹶之，而马尔塞罗伏奇兵突出邀击，汉尼巴前后受敌，兵大溃，死伤山积。弃輜重，登舟急发。西比扬侦其将至，率舟师邀截于海中，焚斩殆尽。汉尼巴以单舸遁，乞援于西里亚（一作西利亚）。西里亚者，亚细亚大国。时希腊诸部为罗马所困，亦求救于西里亚。西里亚王帅师救希腊，为罗马所败，狼狈东走。罗马军踵至，围攻西里亚，破之。汉尼巴仰药死，希腊诸国皆降于罗马。由是加尔达额，孤立无援，属部多离畔。自知亡在旦夕，顾以夙称大国，耻于纳款。汉景帝十年，罗马以大兵伐加尔达额，围土罗都城。土罗坚守不下，截妇女发为弓弦，罗马军死者千馀。罗马有大将，冒矢石进攻，城将陷，加尔达额阖城举火自焚。罗马毁其城为平地，因分兵略定海南诸部，复回兵急征西班牙。西班牙亦降，非尼西亚遂亡。

○南阿利未加洲各国

南阿利未加，三面滨海，一面界斯溜墨尔大山，华语雪山也。山自西而东，与海岸齐长，峰高千仞，四时积雪。南阿未里加诸山，无出其右。地分三国，山之南曰兀贺峡，今属英吉利。山之北曰磨舒阿那，山之东曰加付腊厘河，二者亦各有王。土人有六种，一英吉利，一荷兰，一和鼎图，一磨舒阿那，一加付腊厘河，一摩耶斯满。六种中，惟摩耶斯满居于斯溜墨尔山谷中，无头目，类野人。其河皆发源斯溜墨尔山，其南为冈都斯河，南流由苏加部落出海。东则额利霏矢河，东南流由麻哈尔斯出海。北则阿兰治河，环绕山麓，转历正西旷野而注之海。其加富腊厘阿之地，尚有数河，未详源委。

果罗里，东界加富腊厘阿，南西俱界海，北界斯溜墨尔山。山斗出海中，时有回风，舟行危险。本名曰阿付丹北司峡，华言暴风山也，嗣西洋改其名曰兀贺峡，言山峡情景可观（源案：东方语先能后所，西方语先所后能，如饮酒曰酒饮，登山曰山登。故不曰兀贺峡，而曰峡兀贺也）。峡长五百八十里，广二百馀里，平芜半

沙石，无青草，依山滨海，夹岸茂林，大田多稼。峡达稔其首部也〈（此亦当云达稔峡，西洋语倒耳）〉，依峡建城，始自荷兰。先得因里阿海岸，知此地堪为市埠，于千六百五十年〈（顺治七年）〉，创筑峡达稔，设官镇守。增户授田，商舶辐辏，始成乐土。英吉利于千七百九十五年〈（乾隆六十年）〉，率师争夺，荷兰以兵拒退之。不数载，英兵复至，连战竟夺峡地。土人三种，一英吉利，一荷兰，一和鼎图。英人多居峡达稔，近辟地于额利非驶河之左右，岁被水潦，舍田业商，已成市镇。荷兰人分处四乡，田地宽阔，争界请丈，启讼行贿。其官徇情偏断，专嗜膏粱。凡农事牧畜，委诸和鼎突，故争讼不息。东近斯溜墨尔山，兼练武事，以防摩耶斯满野番，故此方荷兰素称矫勇。和鼎突即果罗里之土番，服役于荷兰。半奴半佃，不辞力作。人将死，先攫其脏腑燎炙而食。疾走善射，能逐奔兽。以硝皮织席，造弓铸刀为业。喜歌舞，不信教门。领小部落七十九，幅员十二万方里，户十五万口。其首部曰峡达稔，为欧罗巴人流寓之所。背倚特步尔山，高三百五十八丈，其峡东西通衢，产酒、沉香、牛、羊、狮、豹之皮、牛角、象牙、独角兽牙〈（原本无部落）〉。

莫舒阿那国，又名弥珠阿那，东界加付腊里阿，西界旷野，南界斯溜墨尔山，北界马路鲁司。在果罗里与斯溜墨尔山之北，其首部曰古里查尼城，即国都也。宏丽甲于阿未里加洲，风俗半农半牧，技艺精巧。庐舍内木外土，雕刻彩饰，外围石垣为牧畜之所。女司耕，男司牧。惟王及酋长之妻妾，始免劳役。服长衣，饰以毛羽、珊瑚、珠宝。厚待外国，而与乡邻动辄争斗，不死不休。兼以劫掠为生，故不敢散处，惟聚居城郭与附郭之村庄也。土人见王，无贵贱之分，席地坐谈，以烟为酬酢。头目临阵，以兽皮蔽两臂，手持藤牌及箭，馀皆赤体交锋。俗佻，嗜歌舞，御人以口给。领小部落三十八，产铜铁皮。

嘉富腊里，在霏溜墨尔山之东。南界果罗里，北界尼腊俄阿，东界海，西界莫舒阿那。自海滨至此，约二三百里，馀界里数未考。土番有数种，曰丹母几，曰苏腊司，曰和伦顿氏司。状修伟，肤紫色。女番差卑小，略似欧罗巴，惟眼黑而光较有神。俗无定处，不耕种，以游牧为业。惟丹母几与邻近果罗里一种，尚能倾银熔铁。若苏腊斯和伦顿底斯两种，惟多膂力，无他技也。其王之加常札，畜壮兵万五千，倘遇警急，则有少年兵十万，故为邻国所畏〈（原本无今补）〉。

摩耶斯满山番本和鼎突种类，居于斯溜墨尔山谷，有如野兽，不耕种，专畋猎。登山蓦涧如飞，见人即杀，尤喜歌舞，星月之夜，啸跃达旦。春秋佳日，歌舞彻数昼夜〈（原本无部落）〉。

○重辑〈（原本无今补）〉

《新唐书》曰：自{艸拂}林西南度岭磧二千里，有国曰磨邻，曰老勃萨，其人黑而性悍。地瘴疠，无草木五谷，饲马以稿鱼，人食鹾莽、波斯枣也。不耻烝报，于夷

狄最盛，号曰寻。其君臣七日一休，不出纳交易，饮以穷夜〈（案：利未亚各乌鬼国，见史者始于此）〉。

《职方外纪》曰：更有一种在利未亚之南，名马拿莫大巴者，国土最多，皆愚蠢〈（即山牙腊土蛮，见阿迈司尼国志中）〉。气候甚热，沿海皆沙，人践之即成疮。黑人坐卧其中，晏然无恙也。喜食象肉，亦食人，市中有市人肉处，皆生齧之。故齿皆铦锐，若犬牙然。奔走疾于驰马，裸身涂膏，气膻甚。无文字，初欧逻巴人到此，黑人见其诵经讲书，大相惊讶，以为书中有言语可传达也。地无兵刃，惟以木为标枪，火炙其末，极铦利。性不知忧虑，若鸟兽然。闻箫管琴瑟诸乐音，便起舞不休。性朴实耐久，教之为善事，亦即尽力为之。为人奴极忠用力，视死如归。遇敌直前，了无避畏。其俗不虏掠，不崇魔像，亦知天地有主，但视其王若神灵，亦以为天地之主，凡阴晴旱涝，皆往祈之。王若偶一喷涕，举朝皆高声应诺，又举国皆高声应诺，大可笑也。喜饮酒，易醉。所产鸡亦皆黑，独豕肉味美，为天下第一，病者食之亦无害。产象极大，一牙有重二百斤者。又有兽如猫，名亚尔加里，尾后有汗极香。黑人阱于木笼中，汗沾于木，干之以刀削下，便为奇香。乌木、黄金最多，地无寸铁，特贵重之。布帛喜红色班色，及玻璃器。又善浮水，他国名为海鬼。其亚毗心域属国，有名谙哥得者，夜食不昼食，又止一餐，绝不再食。以盐铁为币。又一种人，名步冬，颇知学问，重书籍，善歌舞，亦亚毗心域之类也。利未亚之南，有井巴番者，众十馀万，极勇猛，善用兵，无定居。以马及骆驼乘载迁徙，所至即食其人，及鸟兽虫蛇。必生命尽绝，乃转他国，为南方诸小国之害。

《海国闻见录》：乌鬼国东北山与阿黎米亚相联，向西南生，出坤申方大洋，何啻四五国之远。其尽处曰呷，即中国支山入海尽处。曰表，表者，标也。佛兰西曰呷，英机黎曰岌，皆顺毛乌鬼地。是以红毛甲板船，从小西洋来中国者，由亚齐之北麻喇甲之南，穿海过柔佛，出茶盘而至昆仑，自呷而东，至戈什塔，自戈什塔而东，至亚齐。其海皆呼曰小西洋〈（原本戈什塔，当作戈什峡，又西南洋称小西洋亦误，盖利未亚洲方为小西洋）〉。人黑白不同，皆西域装束，长衫大领，小袖，裹头，缠腰。国富庶，产宝器、生银、洋布、丁香、肉果水、安息吧喇、沙末油、苏合油等类。以金为币，钻石为宝。

源案：此所谓呷者，指暹罗南境之新嘉坡而言，计西南洋中新嘉坡为第一峡，南印度戈什塔为第二峡，利未亚之大浪峰为第三峡。凡地之斗出海中甚长，如登莱类者，所谓峡也。呷塔皆即峡之别字。又案：赛马尔罕者，元时封藩统辖葱岭以西各国，至明中叶赛马尔罕已分十馀国，不尽为所属矣。近日更全变为回国，若敖罕，若布哈尔，若爱乌罕，若巴达克山，若克什米尔等，凡十馀国。而《闻见录》犹以古时赛马尔罕统称之，误矣。至又以赛马尔罕为噶尔旦之国，则误中又误矣。谓俄罗斯国惟限于西洋，而其与中国相首尾之东北万里概置不提，皆疏舛之尤者。书作于雍正，判于乾隆八年，在新疆未服以前，故传闻遥揣，举一漏百，故删节而辩正之。

于此。

《海录》：妙里士岛，西南海中岛屿也。周围数百里，为佛郎机所辖。凡大西洋各国船回祖家，必南行经葛刺巴至地问，然后转西少北，行约一月，可到此山。无土人，其所居皆佛郎机及所用乌鬼奴，土产乌木。由此向北少西，行约半月有奇，谓之过峡一路。风日晦暝，波涛汹怒。寒雪飘零，六月不息。舟人战栗，咸有戒心。其天气与妙哩上迥别，过峡后至一岛，谓之峡山，为荷兰所辖。天复炎热，但海阔风狂，波浪腾涌，舟行经此，遇风过猛，必须稍待风和而行。山亦无土人，唯荷兰及鬼奴居之。土产梨及牛黄。有大鸟莫知其名，其卵大数寸。由此更北行少西，顺风约七八日，复至一岛名散爹里。周围约百里，为英吉利来往泊船取水之地。无土产，有英吉利兵在此镇守〈（源案：此峡即《坤舆图》之大浪山，在利未亚州极南境）〉。

又曰：髻毛乌鬼国，在妙里士正西，由妙里士西行约一月可至。疆域不知所极，大小百有馀国。民人蠢愚，色黑如漆，发皆髻生。其麻沙密纪国、生那国、加补五辇国，皆为蒲萄亚所夺，又尝掠其民，贩卖各国为奴婢。其土产五谷、象牙、犀角、海马、牙橙、西瓜。

《海岛逸志》曰：鸽岛在西北之隅，和兰甲板船数十只，岁往通其祖家，必由此地停泊，更换舟工水手，装下伙食，然后再驶。盖其地当半途之间，华人在巴，有受其雇佣为舟人者，至此地必更和兰人，华人暂处于此，配船而还巴，不令往其祖家。然甲板船来往，相传来三去五，其来风水为顺，只有三月；往则水逆道纡，当须五月。又云将至之处，有暗海，不见日月，舟行二三日始出，盖天地之大，有不可思议者矣〈（即所谓大浪峰也，为小西洋利未亚极南之峡，凡船回大西洋者，过此曰过峡）〉。

《万国地理全图集》曰：南亚非利加地，为西洋人巡船来往，故知其形势。其山麓深入海中，各船赴印度、中国，必绕之而驶，是以船只往来不绝。其南方丰盛树木花果，千态万状。其牧场广延，五畜肥长，五谷亦运出售卖。又种葡萄树，出甘酒。雨后溪山苍秀，旱则沙漠不毛。其北方沙漠风起时，阴云四合，黑气满空。在此地虎狮象兕马鹿以及驼鸟，濯濯自在。又有黑面土蛮，穴居猎兽而食。其东方之类，则四肢百骸相称，赳武勇敢。葡萄牙船初到此地，荷兰见其形势合宜，故涉重洋而开埔头，垦田务农。且海风甚狂，浪叠千层，必得购料修船之地，是以荷国将本民移处内地，驱逐土人，或擒为奴。嘉庆十年，英兵船攻取此地。其城在南海边高山之下，其居民大半荷兰人。昼夜经营，各江涧河之处，皆建乡里。但散处不相联属，多隔沙野难渡，又牛车多渴死，故英开新地在东界也，每与其氓交锋相仇。其地袤延四方几万里，但居民六十万而已。运入运出货物，每年银百万有馀两。别开海口，奉耶稣之教师，进其内地，以教化之。又西海中有一孤岛，嘉庆年间，俘佛兰西王拿破仑流诸此岛。

《地理备考》曰：本州地为英国兼摄者，一为好望海角，即兀贺峡；一名大浪山，乃本州之要害也。在亚非里加州之极南，纬度自南十度起，至三十五度止；经度自东十六度起，至二十六度十分止。东至加弗勒里亚国，西枕亚德兰的海，南接南海，北连可丁多的亚国。长约二千里，宽约一千里，分二部十二府。首城名加布，建于达勒、暨良二山之麓。屋宇庙堂甚壮，五方辐辏，地气温和。海口险阻，泊所不稳，为欧罗巴往来亚细亚船必经之路，多于此采办水米食物焉。

一为塞拉勒窝内地，在本州之西，几内亚国之中。少稼穡，多山冈林木，猛兽成群，地气不和，弗便居栖。商旅每易中病，贸易多结队而行。首郡名非里城，设有总管衙门，附近皆受管辖。

一为哥斯达斗罗，即金滨也。金砂丰盛，因以为名。田土腴腴，产谷、果、金石、棉花、蓝靛、树胶、白蜡、皮革，贸易昌炽。地气酷热。首部名加布哥尔苏，设有总管衙门。

一为三达厄勒那岛，在亚德兰的海西南，纬度自赤道而南十五度五十五分，经度自第一午线而西八度九分。长四十里，宽二十五里，地面积方九十里。多山，少平原，地气温和。海滨尤瘠，内地腴腴。首郡名日弥斯城，设有管理衙门。此岛实为有名之处，佛兰西国君那波良者，殒命于此。详见《佛兰西国志》。附近各岛，皆属管辖。

一为毛里西亚岛，在印度海东南，纬度自赤道而南，二十度起至二十一度止，经度自第一午线而东，五十六度起至五十七度止，回环约五百里。地气燄烈，尚可栖居，田土膏腴。首部名波尔多卢义斯，设有总理衙门。其塞舌勒共三十岛，亚尔密兰德共十一岛，皆属管辖。

《外国史略》曰：此州极南方为大浪山，英吉利藩属地也。长约二千里，阔一千里，海滨周四百里。背山沿海平坦，内地渐高，其谷广延，离海愈远，愈多砂磧，无草木。产白矾、铅银，惟石盐颇盛。最南天气清爽，内地昼暑夜寒。高野阳亢，或三年无雨，人至喝死；及一雨，则又山野青葱异常，花草奇丽。产牲畜、五谷、葡萄、羊毛、羊油、沉香、象牙、驼翎、树膏等。民不农而游牧，乳油为食，射猎为业。半系荷兰人，耐寒暑，性朴实，厚待旅客，好游旷野，常有数千人出界围猎，与土族战斗。佛兰西人在此植葡萄，所迁之英氓，在港口东边开垦。土人曰合丁突，形污性驯，不似林中野蛮，人形兽心，亦不似东边之加非利、苏拉等族，贼盗为业也。

葡萄牙人于明弘治间至此海峡，以为赴五印度国海路之标准，风狂浪大，故称曰大浪山。往来之船，在此汲水采果，历久水中堆成磧路。荷兰于顺治八年开埠据之。乾隆以后，英人据焉。至今民益繁，境益辟，广袤五千四百里，居民十四万四千。

大半荒野，无可耕。地分东西两部，部各分邑埠。在峡口曰浪山邑，居民二万，街衢甚美，两旁高树，英官住焉。余与乡里无异。居民方半崇耶稣教，荷英日佛四国教师，皆赴此教化土蛮，故奉教之人日增。道光十四五年，各国进口船共三百五十八只，运出口三百五十只。所运进货计百六十二万两，所运出货百有八万两，税饷七万两。除浪山海峡外，尚有押峨亚海口进出之货，约百二十万两，羊豕约三百余万只，鸡鸭价约三十万两，总计万二千二百万有奇。屋宇、田亩、牧场，各价四千八十万两。

昔时西洋船必半年有馀，方能抵印度，故以此为中途要地，近日航海惯习，加以火轮，其迅如风，浪山海口无大用，况土蛮争斗，糜饷劳兵。英国调兵帅护守，亦以土人及荷兰之游牧为民壮，尚立土司以管理各部。道光十六年，所入国帑共四十七万四千两，所费者五十四万二千两，入不敷出。惟师船在亚非利加各海来去巡驶，以禁贩卖黑奴之船及海贼之船，故埠不可废焉。

《地理备考》曰：南州地隶英吉利者一，隶布路亚国兼摄者二，其自主者四。其隶布路亚者，曰昂可拉国。在本州西南公额国内，东界马梭巴河，西枕亚德兰的海，南连奔吉利，北接丹达河。地势崭岩，丛林稠密，山谷平原皆肥沃。河之长者曰里弗内，曰丹达，曰本各。地气酷热，海风清凉，产金银铜铁各矿。国分四部，一几达马，一送比，一敦比，一可完多。首部建于罗安达岛，设有总管衙门。又有分出之奔给拉国，东界沙漠，西枕亚德兰的海，南接星卑巴地，北连昂给拉。天时土产，与昂可拉国相仿而皆逊之。设有总兵官管摄，仍受昂可拉总管节制。

一曰莫山比给国，在州东南内。有七处为布路亚国兼摄，一给林卑，一莫山比吉，设有总管衙门，一几里马内，一塞那，一索发拉，一义能巴内，一罗林索马尔给斯。各派总兵官一员镇守，皆受莫山比吉总管节制，统计烟户几二万口。地气不驯，田沃产饶，贸易较昔冷淡。其莫山比给本国，在亚非里加州之东南，南极出地十度起，至二十五度止，经线自东二十六度起，至三十八度止。东枕印度海暨海岔，西界卢巴达山，南接加弗勒里国，北连桑给巴尔国。长约四千四百里，宽约一千里，地面积方四十六万里，烟户三兆余口。多山林，蕃野象，田土腴腴。金矿甚多，金沙满岸。地气不和，苦于栖止。有诸酋分摄者，有布路亚国管辖者，纷纷不一。其诸酋分摄者，如马古阿蒙，如木新卑等处，仍贡于布路亚。所奉之教，或耶稣，或回回，趣向不同，技艺寥寥，贸易颇盛。国都建于海岛，有布路亚国总管驻扎其地。

其自主之国四，一曰么诺达巴国，在亚非里加州之东南，南极出地十五度起，至十九度止，经线自东二十七度起，至三十一度止。东界蒙素拉河，西南接佛瓦拉山，北枕桑卑塞河，长宽皆约千里。崭岩参嵯，江河不一。其大者曰桑卑塞，曰马加拉，曰蒙索拉，曰卢安萨。沿河膏腴，产金铁、象牙、甘蔗、树胶等。地气熇烈，人民黧黑。昔日汗位历代相传，迨贼寇猖獗之后，列君分据，不相统属。技艺贸易俱

乏，各部惟么加郎瓜最强。

一曰加弗勒里国，在亚非里加州之南。南极出地二十三度二十分起，至三十三度三十分止，经线自东二十四度二十分起，至三十一度三十分止。东枕印度海，西连可丁多的国，西南接加布地，东北界么诺达巴国。长约四千里，宽约一千里，地面积方八十四万里，烟户二兆馀口。东方重山，馀多沙漠。河之大者马弗么那、巴加纳、波阿丧等，皆流于南方，是为本国之界。土产金银、铜铁、石类、珊瑚、琥珀等物，地气甚热。列酋分据，各为部落，不相统属。技艺贸易俱乏，惟以稼穡为业，各部惟二部居海滨，馀皆住内地。

一曰马达加斯国，在亚非里加州之东南。南极出地十二度十分起，至二十六度止；经线自东四十三度起，至四十九度止。四面枕海，南北相距约三千八百里，东西相去约一千里，幅员八千里，地面积方二十五万里，烟户二兆馀口。悬崖叠岭，瀑布飞流，林密谷敞，平原坦阔，形势实为壮观。由南而北山陵绵亘，江河众多，贯彻沃润。其长者曰么隆达瓦，曰达尔慕德，发源西冈，东注于莫山鼻给海岔。其海滨泽潞，瘴疠熇烈，中人每易感病。

田肥谷饶，各兽充斥，惟少狮、虎、象、马。产丝麻、蜜蜡、竹木、甘蔗、树胶、青黛、烟叶、白胡椒、沙谷米，又有五金之矿。宝石水晶，遍山多有，而土人惟铁是采。奉回教，少技艺，而贸易丰盛。通国部落，纷纷不一，诸酋分掇，不相统属。

一曰科丁多的国，在亚非里加州之南。南极出地二十三度起，至三十二度止；经线自东十三度起，至二十五度止。东至加发拉里地，西接亚德兰的海，南连加布地，北界星卑巴西国。长约二千五百里，宽约二千二百里，地面积方二十八万里，烟户四亿馀口。南北崇山，中央沙漠，沿海低陷，时有飓风。河之长者名曰科兰日，由东而西。河滨膏腴，饶物产。地气温和，人物咸宜。诸酋分掇，各为部落，曰哥拉那，曰那马瓜，曰达马拉，曰布书阿那，曰波支斯曼，名目不一。以牧养为业，怠于稼穡，亦少工商。

《外国史略》曰：南亚非利加西边地，半属土蛮，半属葡萄亚国。其属土酋者，一曰下危尼，广袤四千里，未详其内地。恒旱，少雨露，硫磺之气，蒸为烟瘴。河流纷歧，海口淤塞。有贩卖人口之市，曰南峨。一曰罗安峨，多有各国族类。河多鱼。多野兽。物产丰而民憚工作，故地荒芜。除养豕外，无他畜。一曰公峨，在海边，甚低，多泽潞。内地山高，赛利河流广而漫。居民极蛮丑。一曰安峨拉，皆山地，居民形体端正，绝异黑人之丑。物产蕃盛。明朝年间，葡萄亚国在此开埠，广立法度。百姓有进天主教者。一曰宾吴拉，地濒海。自南极九度延及十六度，密林高树，其土丰盛。民蛮，好杀，食人肉。

南州边地，自死门东向海滨延二百里，斗出海中为胜重海峡。居民多茅里，族类黑面，未向化。海口曰巴拉，运出加非、树膏、没药、驼鸟翎、金沙，通商亦旺。未详其内地。自胜重峡之西曰亚安，曰散西，曰贵罗亚等地，皆天方亚拉国所辖。其内地未详。港口曰马牙多撒，南极出二度一分，偏东四十五度十九分。散西巴通商最重，岁纳税饷银九万两，运出五谷、白糖。此皆土酋自主之地也。此外摩散比地，半归葡萄亚所辖。散比西河广且长。都会曰善那，曰摩散比邑，昔为通商大市，今衰，邑徧小。距此三里，节蛮族多瘴，未属其国管辖，山内产金沙等物。有冒险之商，务通亚非利加之路，每中途染疫毙，或被土蛮杀害，或失路死亡，无人成就其志。故内地情事，无可考。

又曰黑面人地，在旷野之南。偏西自十七度，及偏东五十度，北极出地自一十七度，东西千里，南北三百馀里。东西皆山，内有大湖，其源甚长，西流多支漫，将入海汇为泽。其湖长约六十里，偏东十五度。濒海地低，箐密不见日。树木倒则霉坏，烟瘴实甚。内地旷坦，多水草。自四月及九月，雷电交作，大雨滂沱。冬多风，仍吹热气，皱人皮肤，若连数日，其害尤甚，四海无此炎酷也。民惰，故荒芜，草有高三丈者。产树膏、安息香、及各香料、绵花、甘蔗、黛青，自然而生，不待人力。山象水马均高大，性猛。多猿，有慧绝似人者。水蓄昆虫，鳄鱼大有力。语音风俗皆异，鼻扁唇高，肤黝身短而健。北地之黑人，崇回回教。其内地亦拜偶像，杀人以敬神，近日颇知耶稣教。

《瀛寰志略》曰：阿非利加南土之岌朴（番谓山之尽头处曰岌，为欧罗巴东来必由之路。其地形锐入大南海，海水至此回薄，风涛猛烈异常，舟楫易于损坏，不得不谋修葺之所。又长途水米接济，荷兰之垦开此土，盖有所不得已焉。从前大西洋商舶东来，至岌朴必收帆寄碇。近年海道愈熟，收泊者十无二三，则亦无关轻重矣。

卷三十五

○西阿利未加洲各国

西阿利未加，分两大区。其一区起自色黎雅尔河以南，至安弥阿河以北，内有九国。一嘉约，二莽孟，三雅尔兰，四夫达多腊，五河洼尔，六马腊，七孟萨伦，八雅尼之稔里，大小各国，同属一区。佛兰西人遂合并两河之名以名其地，曰色黎安弥阿。九国之中，仅嘉约滨海，馀俱腹内。又有西腊氏国相毗连，在色黎雅尔河之北。

其安弥阿河以南至敏惟腊河，又有十四国同区。一霏落司，二夫达雅罗，三额林，四埃阿里，五阿寒氏，六那知弥，七弥领，八洼里，九尼门，十根峨，十一釜峨，十二雅门，十三安峨腊，十四敏维腊，皆滨海之区。地势平芜，偶有高阜，亦皆错出海中。名山巨岳，尽在腹内。横数百里，袤长约四千里，弯环参错，凡二十四国。

山以公山为最巨，由色黎安弥阿至东阿未里加之闷山，蜿蜒相连。境内河道皆发源于此山之西。有安弥阿河及色黎雅尔河、尼额河。山之南有来阿额兰尼河、米苏那河。其源远而阔者尼额河，由花罗来市直达阿兰底海；安弥河流最驶，由色黎安弥阿南入海；色黎雅尔河源较远，曲折淙洄，由色黎安弥阿北入海；若来阿额兰尼河、弥苏那河，俱在南隅，由根峨诸口入海。尚有色尔戈河、安萨河，未悉其源委。其海口距内地里数不等，欧罗巴人分疆画域，惟以河流分界，然亦止知濒海，莫窥内地。即阿丹地理所载，亦多臆度。

始耶稣纪岁千四百三十年〈（明宣德五年）〉，西洋有葡萄亚人，舟过麻牙那山麓，栖于阿尔厘岛，始访出北隅之色黎安弥阿，继寻得南隅之根峨等处。从兹沿海埠头，悉属葡萄亚。千六百四十余年，葡萄亚浸衰，其俄戈之地，即为荷兰所夺。虽旋取回，而色黎安弥阿又为英吉利、佛兰西所据。英人即在安弥阿河口立埠，佛兰西则在色黎雅尔河口立埠。两国皆有公司，各立炮台。出口货物惟金及人口最大。至内地情形，英吉利与佛兰西人讲求探溯，尚无端倪，而两国构兵，遂为中止。

闻其人户共二千百馀万口，大都厚唇扁鼻，邪而后仰，色黑发鬃，不装饰。无技艺文学，战斗虽悍，平居尚淳朴。不习教门，专祀匪底祇之神。或以大树大石，或以象牙、狗牙、虎牙、羊头、鱼骨，或树枝绳束等类，随意而指，即以为匪底祇之神。有供奉在家者，有位置在村庄者，立龛列祭，遇事祈祷。人死多焚财帛，谓资冥用。宰人作牲，以享先灵。嗜音乐，喜歌舞。多畜妻妾，常人多则一、二十，王则动百十计，而阿寒底那和弥两国酋长竟至数千。民居卑小，门高三尺，鞠躬而入，一妾一门，外围以墙，上下皆然。惟宫室廨署，略较爽垲，间施采饰，以别等级。男女皆喜带手镯、指环，或金或象，以多为美，即赤贫亦系铁镯。面绘红白，文身

刺肤。以手抐食，饮啖兼数人。产橡樟、杨柳、葡萄酒、无花果、桂皮、甘蔗、桑椹、薯、蒜、栗油、浮石、椰子、松柏树、龙血树、柠檬、桃、柑、李、蕉、果、西瓜、黄瓜、米粟、棉花、糖、席、材木、金、铜、钢、铁、象牙，计象牙岁值银约十五万员。

○色黎安弥阿十国

色黎安弥阿一区，内有九国，在西阿未里加之北，东界苏厘麻，西界海，南抵安弥阿河，北抵色黎雅尔河。东西距七百馀里，南北距二百五十里。大小九国，又土番三种，一曰野罗甫，一曰付腊司，一曰曼领峨。付腊司种类高大，鼻扁唇厚，面似橄榄。俗奉马哈墨回教，性尚平和，周济老弱疾病，与外来穷旅。游牧为生，随帐迁徙。曼领峨种类，面黑业渔，喜问讯，嗜歌舞，多娶妻妾。妻有过，挞之于市，以示惩警。野罗付种类，面黑，业纺织，善骑射。计数以五作十，无文字。

嘉约国，即野罗甫，在色黎雅尔河口，濒海岸，为色黎安弥阿区中之大国。惟一部落曰麻皆，即酋长所居。佛兰西人贸易其地，遂据河口筑炮台，又于对岸之俄黎岛设立部落，居人三千，为河口之保障。树木丛茂，产丰，多商贾。

莽孟国，在色黎安弥阿之东。附近色黎雅尔河内，有那达更山，金铁相间，掘至数尺许即有金粒，至丈许，则金粒成团。土番不善支撑矿穴，动致坍塌。色买腊山金在刚石之间，凿采费工。又有半山出产红石。

雅尔兰国，在色黎雅尔河之上流，地处极东，与满母比邻。佛兰西船曾商其地，获利倍。徒以水土不服，河道难行，恒被劫掠，遂不复深入其地。

夫达多腊国，在色黎雅尔河之下流，距海不远，河之南北，均其辖地。酋长回教种类，亦不能制其部下。

和洼尔国，近海蕞尔之区，酋长蛮野无匹，自称曰额利墨腊，犹华言王中王云。

马腊国，在安弥阿之北，距海甚近。酋长所居，即马腊部落也。境内有尼利弗里市埠，设有税馆，先属葡萄亚国，英吉利夺之，而于安弥阿河口筑炮台防守，溯流而上四十里，即比沙部落。英人虽有贸易，究不与内地尼额河相通，故交易不盛。

孟萨伦国，在马腊国之上，幅员较阔。土番约三十万，均曼领峨种类。

雅尼国、稔里国，均小国也。居于孟萨伦之上，厥土坟衍，产谷甲一方。再行四百里，即沙水并涌之地，多鳄鱼水鳉，岸则野兽成群，舟楫难驶。

西腊氏国，在色黎雅尔河之北，与前九国毗连为十。河源发自公山，至马腊之尼力弗里，出口经西腊氏境内者居半。

○安弥河以南至敏维腊河以北十四国

霏落司国，在嘉约之南。东界苏里麻，西界海，南界夫达雅罗，北界嘉约之安弥阿河。土厚产丰，鸡鸭蜂蜜尤蕃庶。欧罗巴人至此贸易，向例须曼领峨从中经纪，两家买卖不得见面，故不能径与通商。

夫达雅罗国，又名富腊司，在霏落司之东少南。东界额林，西南界海，北界苏厘麻。幅员约长三百五十里，宽三百里。一鼎磨，一黎弥里阿，一西耶腊里阿那，一腊达俄司，四大部落也。酋长居于鼎麻，常领千六百人，虏掠人口，卖与欧罗巴人为奴，祭祀用人为牲。土番皆付腊司种类，俗奉马贺墨顿教。西耶腊里阿那，滨临海岸，为英商市埠。由此至额林边界，约程二百。腊弥里阿，在弥斯腊那河口，为弥利坚市埠。南北长二百五十里，宽二三十里，土沃民惰，多无赖。产银铁、材木、皮、细布、棉花、糖油、象牙、苏木、黄蜡、胡椒。

额林国，在夫达雅罗国东南。东界埃阿里，南界海，西界夫达雅罗，北界苏厘麻。惟一部落曰鼎来，酋长居之。祭祀亦用人为牲，并有夫死而妻自杀墓前以祭者。别有一种教师，曰墨尔里，能专国中之权。其教师少年离俗，露处深林，修炼日久，能作怪异，能通奥妙，非但识其教中之理，并能审识案牒，方可谓之墨尔里。其地旧属葡萄亚，今尚有葡萄亚之人与土番杂处，土产胡椒。

埃阿里国，在额林国之东。南界海，北界梭难，东界阿寒氏，西界额林。领部落二，一曰腊后，滨海口；一曰耶格苏，居腹内。腊后所产象牙为最，欧罗巴人以土番犷恶，罕往贸易。土番言语，声在喉中，若野兽叫啸，骇人闻听。阿寒氏，又名峨戈尔，在埃阿里之东少南。东界那和弥，西界埃阿里，南界海，北界苏兰。幅员万四千方里，户百万口，并奴仆之数，则有四百万。领部落四，一吉戈司，一依尔弥那，滨临海边；一阿加腊，一准曼里，均在腹地。吉戈司，英吉利商贾所寓，有炮台。东行约五十里，即依尔弥那，为荷兰市埠，炮台甚多。海岸土疏，多沙而沃。产糖与包粟最丰，产金矿。土番暴躁，好讼。房屋閤整，每村设一会议之所，以高年掌之，审理讼狱。富家多以讼败产，屠人祭墓，酣宴数日。习俗男逸女劳，负重工作无非女，惟捕鱼则男耳。服色尚白，酋长以下，多系金镯。兵事或战或和，悉商之四官。春秋二祭，皆屠人祈福。酋长身死，辄戮千人以祭。先拘外国奴仆，并羁禁之。罪囚不足，则虏行人，故入市不敢独行，恐被虏也。妻妾以多为贵，酋长例有三千，并选姿色，稍忤意，辄戮死。并鬻人口与欧罗巴人为奴，其暴虐甲通洲。然酋长亦知慕欧罗巴之材艺，以教其人民。陈设器物皆精巧。其出口之货，惟有黄金。属地甚广，如领几、腊阿几、浯洼扫阿、广磨四国，皆其所辖。后又征服内地之雅漫阴达、那安麻诸国。

那和弥国，在阿寒氏之东少南。东界弥领，西界寒阿氏，南界海，北界梭兰。附近海岸，长广各二百里。其没海之地曰斯列哥士，华语奴仆岸也，本恢那国之地，其酋长恃富骄淫，遂为那和弥所并。风俗人情，与阿寒氏同，而残忍更甚。人死不殓不埋，挂于墙壁，任其腐朽。宫室庙宇，覆以人之天灵骨。酋长妻妾，例有三千。每年传集番女，挑选一次，上等自留，次者指配番官。邻近尚有阿那腊、那厄里、腊俄司诸属国。腊俄司祈雨，将少妇倒植神前。有犯死罪者，缢首树杪。阿腊那土产棉花、油、番碱、瓦器、铁器。

弥领国，又名弥阿佛腊，在那和弥之南少东，滨海，广约二百里，与洼里尼门二国同区。弥领地势低洼，恒患潦溺。产象牙，俗敬匪底祇神，国人见酋长当如见神，设有干犯酋长者，已科犯上本罪，再加褻渎神明规条，施以极刑。

洼里国，在弥领西南，滨临内河，地势卑湿，溪汊纷歧，皆狭不容舟。惟墨腊斯河较阔，源流亦长，直达阿兰底海。土瘠民稀，风俗略同弥领。

尼门国，在弥领东南，沿河逆流而进，约行六十里，即耶付连部落。酋长蛮野，战胜即聚其颅骨以造庙宇，以祀匪底祇之神。贩鬻人口，每年约二万。产象牙最多，其次油盐。

根峨国，在釜峨之南少东，北界釜峨，西界阿兰底海，南抵安腊峨，东界旷野，领小部落三。根我洼在内地，酋长所居也。马领麻、加敏那，均滨海涯。土番身体短小，面黑有力。俗惰罕耕种，树皮为庐，草席蔽体。地旷人稀，村小者百余人，大者数百人。人分四等，曰头目，曰钱粮户，曰耕户，曰家奴。酋长与头目多蓄妻妾，贩人口，市埠虽在海岸，而所贩之人，悉出内地运载而至。

釜峨国，在根峨之北，西抵阿兰底海，南抵根俄，东北俱界牙门。风土人情，略同根峨。

安戎腊国，在根俄之南，东界旷野，西界阿兰底海，南界敏雅腊，北界根峨。风土人情，亦同诸部。

敏维腊国，在根峨之南，西界阿南底海，东南俱界荒芜之地，北界根峨。沿海岸数百里，俱葡萄牙所辖。每年贩人口，约二万计。风俗同前诸部，产上铜。

○重辑〈（原无今补）〉

《每月统纪传》：利未亚之西，滨海有西尔得国，其地有两大沙，其一在海中，随水游移不定。其一在地，随风飘泊。所至积如丘山，城郭田亩，皆被压没，国人甚苦之。又有工鄂国，地亦丰饶，颇解义理。自与西客往来，多奉真教。其王又遣子

往欧罗巴习学文字，讲明格物穷理之学焉（西得尔国，一作西羈得国，今属英吉利夷埠）。

又曰：亚非利加海边，向有匪徒，驾船载火器，而以美酒玩物，卖与黑面奴，因此诱贩人口。又有列国贪利之夷目，侵伐邻境，虏掠生俘，赴海口贩卖。将奴三四百口拥挤下舱，继縲桎梏，闷不通风，臭气染病死者，不胜数。英吉利公会立法严禁，巡船到处搜探，一遇载奴之船，即捕送治以死罪。上年十月，兵船巡海，遇有贩奴舟泊于海隅，先放炮招降，既不肯投，遂冲锋掩杀，一人战死，六人受伤，竟夺获其船。赴葡萄亚埠头，其城之镇守官强索其贩奴船，英军不允，葡萄亚放炮轰击，英之水师愤怒，返棹启咨本国将帅，已领战船，赴彼雪怨。

《万国地理全图集》曰：西亚非利加之海，北系沙地，其黄道南北两地，深林密箐，瘴气弥空，外人不服水土，多患病。居民黑面卷发，扁鼻厚唇，愚钝无知，或崇回教。其土人不服一君，亦不立国家，但各自为族。袤延方圆三百六十万方里，约计二千万丁。颜色悦和，扬眉畅气，并不虑远。会时鲜衣裘舞，男女用金珠象牙浑身华饰，贫人大半裸体无羞。其僧诱惑庶民，杀人祭神，将各项树木禽兽为神而拜之，或用妖术灵符，殊可痛恨。其居室桧巢草寮。不用金银，惟以货易物。土肥饶产，不待人力，故民皆游惰，每临饿乏，则族攻族，类击类，而相吞。所获之俘，则卖为奴。外国船到此，以买其人口，将二三百人杂装船内，驶到各国贩卖，以种园耕地。如此黑族，蔓延四海，无处不至。故此英国发义怒，严禁贩卖。又排巡船恒驶海滨，往来捕治。

葡萄亚国初据此地，为荷兰所夺。后佛英两国，开海滨新地，建炮台，但恐山林瘴气，不敢入内地。西北海边葡国所据之岛，曰马太拉岛，初时遍地深林，焚烈种植，作葡萄酒卖与外国，每年价银三十万两。

加拿利群岛，有山岭，其最高者，百二十丈，名特尼勒山，为船之标准。此屿归是班牙国，亦出葡萄酒不少。

绿山头群岛，不毛之地，瘦岭枯山，其海濱出盐。群岛对面之海边沙漠，其南方西尼甲江，有佛兰西炮台，与居民贸易，布匹、金沙、树胶，每年来船三十只，货价银六七十万两。民人大半回回，中有数族，安分务商。

感北亚河，南流入海。有英国商埠，包兑包送之地。此江之南，开英国新地，称为狮山。产象牙、油蜡、皮、木头、树胶，价值银四十二万两。英人如获奴船，在此释放。又召教师开学，以传耶稣之道，虽顽蛮难化，虚费不貲，然援人于水火之祸，不独保其生命，乃引之履天道。其东南边，称曰危尼，中有花旗国新地。

更望南而往，其海滨一曰谷边，一曰象边，皆蛮民，猛力好战，攻接外船，性近禽

兽。一曰金边，乃英荷所建炮台，与土人通商之处。其百姓稍已入化，又立长老治之。金边之东，有大黑国，称为亚山地。其国王起兵与英交锋，又与邻小国结衅，今亦服之。国王娶妻三千，更赴南贩卖人口。再至南则到比勿海边，居民懍服其王，受死无怨，惟命是听。另有破岛，其埔头归是班牙国。其最南方称曰公我，被葡萄牙所占据，专贩人口。所建之城颇大，商颇盛。

《地理备考》曰：塞内冈比国，在亚非里加州之西，北极出地十度起，至十八度止；经线自西九度起，至二十度止。东至尼给里西国，西枕亚德兰的海，南接几内亚国，北界沙漠。长约二千七百五十里，宽约二千里，地面积方五十五万，烟户一京二兆馀口。平原沙漠相间，少山多林。河则塞地加尔河为首，冈比河、那禄河次之，故统名曰塞内冈比国。沃土丰产，谷果、药材、金、铜、盐、琥珀、纹石、象牙皆具。炎瘴特甚，惟五月至八月，阴雨，暑气稍降。土人色黑发卷，列酋分摄，或世袭，或选立，各霸一方。所奉回教。国以河得名，故通国分二十小国，在河南北，曰弗达多罗，曰弗达，曰罗，曰弗拉都，曰加孙，曰宾都，曰牙尼，曰弗义尼，曰乌黎，曰登的里亚，曰分达，曰加科尔达，曰邦布各，曰萨隆，曰加布，曰日的罗弗，曰新，曰乌阿罗，曰巴尔，曰加约尔，曰萨伦。

○西州各国补辑〈（此数国《四洲志》无之，今据他书补）〉

又《地理备考》曰：几内亚国，其上几内亚，在亚非里加州之西南，南极出地一度起，至北十一度止；东至沙漠，西南接亚德兰的海，北界塞内冈比国及尼给里西国，长约八千五百里，宽约三千里，地面积方一百零五万里。烟户一京馀口，民人多黑，卤莽无文。本国公山为尼给里，西及塞内冈比二国分界。海滨低陷，烟瘴触人。河长者名曰尼日尔、由尼给里，西贯彻本国，而注于亚德兰的海。其次曰塞勒郭安萨。田土肥饶，谷果丰稔，土产黄金、珊瑚、琥珀、纹石、甘蔗、烟叶、香料。地气炎热，夏秋则阴雨连绵。列酋分摄，各据一方。所奉之教，或拜山河，或奉禽兽，初无一定。技艺缺乏，耕种皆女。通国分为数十小国，其要者曰的马尼，曰古郎哥，曰苏尼马那，曰加布蒙德，曰桑固音，曰加瓦利，曰亚于的亚，曰达可美，曰亚尔达拉，曰巴达给里，曰拉各斯，馀未及载。

公额国，又名下几内亚，在亚非里加州之西南。南极出地一度起，至十七度止；经线自东八度起，至十八度止。东至日牙加地，西接亚德兰的海，南连星卑巴西亚国，北界上几内亚国。长约三千八百里，宽约一千四百里，地面积方四十四万里，烟户四兆馀口。地势东方多山，众河发源于此。其长者曰公额，又名塞勒，四面绕贯，田土最腴，产铜、铁、甘蔗、胡椒、烟叶、薯粉、象牙等。地气熇烈。技艺缺乏，贸易稀疏。列酋分摄，不属别国管辖者。分二十一小国，一罗昂额，一公额，一宾巴，一萨拉，一莫卢阿斯，一虎美，一加三日，一冈各白拉，一何国，一何罗合，一日仍加，一几苏阿，一古达多，一古宁加，一当巴，一里波罗，一几萨马，一塞拉，一白伦多，一难诺，一比黑。

其属列国者，曰星卑巴西国，在亚非里加州之南，南极出地十八度起，至二十五度止；经线自东十度起，莫知所至。西接亚德兰的海，南连科丁多的亚国，北界公额国。长约二千七百五十里，地面积方约三十四万里，烟户约二亿馀口。海滨艰险，平原饶薄，一望沙漠，人民萧条，猛兽充斥，国多无籍游民。

本州西南临海几内亚之地，凡荷兰、大尼、花旗，各国市埠，皆在其中。隶贺兰国兼摄者，名厄尔弥那城，建于几内亚国中。烟户约一万口，景色壮观，商贾接踵，设有总理驻扎其地，馀城皆受节制。隶大尼国兼摄者，曰给里斯的巴尔。其城在几内亚国中，地产饶丰，工良商众。设有总理，驻扎其地。馀城弹丸，皆受节制。隶亚美里加州花旗国兼摄者，在几内亚国，门苏拉多河滨，曰里卑利亚。其居民皆由亚美里加州迁徙，首郡名蒙拉维，学馆书库备具，商贾辐辏。

《外国史略》曰：西亚非利加海边地，通各国商埠者，一曰西尼安，在旷野之南，广袤方圆约三万里。多暑，盛烟瘴。民皆黑面，各有酋长，风俗殊异，好战斗。地或沙或壤，物产不由人力。佛兰西在此海边开埠，筑炮台，在路义峨利等岛建邑，土酋多畏其势。产谷、椰子、棉花、枣、黛青、烟、胡椒等货。英人及葡萄牙等国亦开埠，然甚微小。

狮山在海滨，长五十五里，阔六十里，卑湿多潴泽。内地渐高，惟欧罗巴人所居，地多产物。其黑面人，地极荒芜，土民稠密，饮水食树根，不肯工作。乾隆四十七年，英人在此开埠，方圆约十七里，严禁贩卖人口。常调师船巡驶，所获之奴，即送狮山，设教师，开学馆，以施慈政。居民约三万二千，后小邑乡里，务艺术，英国每年费银九十万两，以立此港。道光十六年，运入之货，二十八万七千两，运出者二十八万五千两。民寡而勤，故地虽褊小，能通商。

一危尼地，在西海滨。其通商各异埠，一曰谷油滨，自山内及米苏拉加地；一曰象牙滨，自巴马及亚破罗尼地；一曰金滨，自亚破罗尼及窝他河；一曰奴滨，在窝他河东边，最要者曰亚山地，曰他何米，曰押他，曰巴他义，曰拉峨等国。亚山地族类，权势甚重。百姓百万，织布锻五金，勇敢残酷。其君妃嫔四千，淫邪无度，死之日，杀千馀人以殉。可马西族类，亦在各海滨通商，英吉利、荷兰、大尼等国，各建炮台，调守兵以护贸易。属地褊少，居民亦罕。运出货价，仅数万金。此州内地甚广，部落多，民俗异。外国人未有入之者，故不识其形势。北方有地曰丁布土，大市也。北贾云集，驼马不绝。又布奴，近大湖，亦通商。又副拉，居民稠密，土酋豪健，常领兵以据其邻国。

卷三十六

○中阿利未加洲各国〈（《职方外纪》言，亚毗心域国，地极大，居本洲三分之一，则中阿利未加亦在其内，不止阿迈司尼也）〉

中阿利未加洲，地处中央，环以群山，沃野平旷，灌溉不竭，为全洲膏腴之最。西界西阿未里加，北界旷野，东界查湖，南界无考。长三千馀里，广千有馀里。山最大者曰闷山，自东至西，起伏绵亘，与洲境同其起迄，中阿未利加仅山之中央一隅耳。峰峦层叠，崖石嵯峨，有似倒塌炮台者，有似锐浮图者，形势不一。高者三千丈，崎岖与平坦相间，山内可种棉粟，并有城垣，依山而建。天炎土燥，而田畴不乏水泽，皆资闷山之灌溉。河道有四，曰尼厄河，曰孤卢尼河，曰菰弥河，曰瓜腊马河，皆发源闷山。而尼厄河最巨，源远流长，计三千馀里，总受诸河之水，由机里出海，诸国皆沿河建立。湖以查湖为敢阔，与磨尔农连界，长约六百里，宽约四百里，其水澄清甲天下。湖中小岛，各有居人，林深草茂，飞走藪泽。次为尼弥湖，虽不及查湖之大，亦一目难穷，此外皆小湖而已。幅员辽阔，内多小国，距海岸远，不与海国通往来。近四十年，始有冒险至其地，略悉情形，究无史书，难溯源委。读阿丹地理志，载千二百年〈（宋承安五年）〉，部内之人迁徙旷野之南，可见居于中阿未里加洲者，多阿丹之人。并闻先日有阿麻西尼司与翁弥阿尼司互争胜者，各自立国。其最大者嘉诺，曰萨加，曰磨尔农。嘉诺之南，产金最旺。

千四百年〈（明建文四年）〉，摩罗果大头目阿佛厘、加卢士统众至丁麻杜，夺得依机阿各地，立国称王，即名丁麻杜国，嘉时嘉诺亦属丁麻杜所辖矣。千七百年〈（康熙二十九年）〉间，又归于加斯那。千八百初年〈（嘉庆五年）〉，萨加睹头目曰兰华利荷者，自立为王，并服蒿司沙部、磨尔农部，遂成大国。不久分裂，为摩尔农头目所驱逐。蒿司沙各部落若俄墨、若色塞，同时亦各自王。即如丁麻杜国，自阿佛厘加卢士以后，即为摩罗果之属国。满马腊向称大国，所属之展里大部落，近已为头目阿马卢所据。各国政事，皆自专制，故无著名之邦，亦无统辖之主。蜗角蛮触，各长一方。其俗百官见王匍伏殿前，以首叩地。名国王死，屠人以祭，虽不若西阿未里加阿寒氏那和弥二国之多，然祀典用人，亦不能缺。王之所贵，不在宫室制度，而在妻妾货财，故国王宫室，仅加于民居一等，往往苦盖尘积，乳燕环飞，儿童裸露，朴陋无伦。而妻妾之多，则难以数计，凡监守各官以至服役，皆姬妾焉。部落长官，皆由民自推择。赋税无定额，军旅无纪律，惟摩尔农之兵，似有队伍，善长枪藤牌，行列方圆成阵，临战仅裹兽皮以御弓矢。萨斯睹国有兵六万。各国皆不习火铳，惟阿丹客商有火器，遇两国争斗，常以此解围。土产粟、米、棉花、洋靛、六畜、狮象、豹、蜂蜜、象牙、金沙、洋蓝布。各埠运货，并无车辆，全藉负载，贾于斯者，皆阿丹之人。由北阿未里加越历沙漠，缺水草，多盗贼。近日始知雇骆驼驮载，节省倍蓰。所运入者，如丝绸、呢、纸、珠、银器，利皆数倍。运出则黄金、象牙，奴仆居多。奴仆多自南山虏掠而来，非但贼盗，即国王贵官亦然。如莫尔农之王与曼那腊王之女为婚，曾会赴麻斯俄虏掠人口三千，以贺嘉

礼。境无沟洫，亦少衢道，荒陬旷野，信足穿越，或倒木横阻，或两水泛滥，行旅踟躅，马蹇仆吁。土番与阿丹之人杂处，仅学其技艺工作，从不习其回教文字。地素蛮野，较之通洲则尚知礼义，喜结交，惟俗尚掠夺。在他方尚以贫劫富，此则以富劫贫，习不为耻。凡事皆信匪底祇之神，其摩尔农蒿司沙两国，极欲修文，苦无教导。性喜歌舞，虽尊贵亦登场演唱，扬扬自得。土番面皆黑，即所谓乌鬼国云。

莫尔农，为中阿未里加洲强大之国。幅员七万五千五方里，户二百万口，在查湖之西。滨湖水乡美稼穡，多狮、象、熊、虎为害。领大部落八，钩加其首部落也，其次若安俄那、若安牙腊、若吾尼、若加领、若腊里、若加沙里、若阿尔磨卢农七部，湖山错壤，大小各别。而富庶以安俄那为最。始王其地者，本阿丹之人，嗣有依尔加尼者，起兵据国，放前王于附郭，逐官民回阿丹。其国中大官以蟠腹为美，首缠白布。其王接见欧罗巴人，则端坐龕中，外列侍从，陈兵护卫。性好斗而不轻捷，败则走步艰难，坐以待毙。土番黑面厚唇，朴鲁好斗，善纺织，精染洋蓝，耕种皆以女。国王所驻钩加部落甚小，居民万人。安俄罗为国中最大之部，居民三万，贸易集会约有十万。安牙腊、吾尼，亦两大部。北则加领部与旷野交界，居民骁勇。腊里部民仅二千。加沙力亦大部，居民善用药箭。阿尔磨卢农部落，近已荒废。

曼那腊国，在磨卢农之南，山谷土沃。领大部落八，以磨腊为首区，闷山最高之峰在其境内，陟巔远眺，疆域了然。土番不习教门，文身衣革。麻斯俄部落最为蛮野，好骑生马，衣山羊豹皮，取仇人牙齿串珠挂颈，以夸其群。那古尔腊，地处山谷，村堡坚固，好武斗胜，善用药矢。摩尔农兵侵之，为所败。

罗艮国，在查湖之南，为洲中最灵巧之国。接壤强邻，皆凶恶好杀，竟能立国保境安民，皆才智所致也。即以罗艮为首部落，街衢坦阔，距查湖仅四十里。产佳木香草，精染洋蓝布，不亚于摩尔农。钱用铁铸，形如马蹄。番妇容貌，在黑人中，为最端好。卑湿多蚊，惟日午暂息，馀时皆虫飞薨薨。

敏雅弥国，在查湖之东南，土域辽阔，土番勇战，衣铁甲，习长枪。摩尔农，器械尤备交锋，亦无纪律。

芜名地，在查湖之中，岛屿甚多。居于斯者，皆弥落麻之人。岛旁泊船千计，无非盗艇。土谣云：天未贻我粮，神未赐我牛与羊，只生膂力与诈肠，我居宛在水中央，不劫何以豪四方。磨尔农王欲禁之，无如何也。然所虏人口以作奴仆，尚不甚残虐，往往给以妻室。

蒿司沙，在尼厄河之西，幅员辽阔，界域莫详。壤燥宜麦，一岁再获，仓廩充实，果蔬既多且旨。土番皆阿丹之人，自耶稣千年以后（宋咸平三年），陆续迁至。

非其回教中人，无不被虏为奴，与西隅之黑番贸易。

沙加都国，即多谷鲁，在蒿司沙之西。土沃民庶，先居萨加都，近迁马雅利阿。城池壮阔，甲于中洲。墙高三丈，门户十二，日落即闭。王宫前面，方角开敞，四壁藻绘。萨加都之旧部落，近已颓毁。

俄墨国，山付腊国，均蛮地好斗。俄墨首部曰古尼阿，城池坚固，于千八百二十九年道光二年）>，蒿司沙率兵六万，侵之，为俄墨所败。山付腊首部曰沙弥，当嘉诺、萨加都两部之冲，专劫行旅为业。

雅那国，即嘉诺，为阿未里加腹内之地。疆域虽狭于旧，而商贾市埠犹甲诸国。嘉诺首部落也，周有十五里，居民约三四万。中央地洼而旷，水涵之后贸易聚焉。为一大市镇，有头目司市价，辨真伪。设有贱售贵，贗乱真者，则经纪受罚。日出登市，日入即散。又有奴仆市，两棚分列，男女各坐一棚。买者先观五官四肢，继令其步履，听其音语。市用小介壳为钱，谓之勾力士，四百八十枚值银一钱八分。

嘉司那国，在嘉诺之北，向称大国，前时之蒿司沙，曾属其管辖。城墉广阔，民居不及十之一，皆商贾所集。

色塞国，在嘉诺、萨加都二国之南，为中洲最沃之壤，产上米、蜜枣，沙厘阿其首部也。居民五万，田畴绣错，林麓葱蔚。色塞之南，亦饶水草。尚有小部落属其统辖。

加达国，居众山之中。村庄大小五百，领罗腊其首部也。地虽多山，而滨涉力河，土亦膏泽，贸易颇盛。惟土番蛮恶，前遇岁歉，尽屠外国商贾而食之。由领罗腊沿河而东，即阿那磨洼，皆加达属地也。

蒿司沙之西国，辖部落四，首即加雅东部，次即山尼阿部，次加达良部，次珊山部。加雅东美田畴。山尼阿在山谷之中，形势环拱，颇秀蔚。加达良曾属莫卢农之部落。珊山，贸易一大市镇也，人皆犷狠。

俗里国，疆域平旷，近尼厄河，常有水患。厥土润泽，最宜播种。俗勤力作，土番虽多为奴，然伶俐耐劳。首部即裕厘，甚宽阔，植木城而裹以铁。周三十里，居民蕃盛强勇。阿丹人常侵之，皆被驱逐。王宫俭陋，国王曾杀有名游士曰巴客，大受恶名后，遂优礼格腊白顿游人，以改前过。

洼瓦国，蕞尔地耳。而田畴膏沃，地当孔道都邑，居民不及二万，而蒿司沙之商贾荟焉。市陈百货，曲港连葢，管弦宵昼，行人至止，肴醴错陈。

磨尔俄，在磨斯沙洼瓦两部之西北。半多丛山茂林，几阿麻其首部也。王奉回回教，敬匪底祇神，宫殿设兵扈卫，宫室帷帐，陈设侈靡。土番骄傲斗，盗贼尤多，劫夺四出。

莫司沙国，在裕里国之下，首部落即名莫司沙，滨临尼厄河。河岸宽阔，下即大石滩，舟楫往来，素称危险。地宜五谷，前为阿丹人所据，后始杀逐阿丹，自立为国。前时游人巴客被害，即在此滩。

岩阿国，美田畴，多农商，西方富庶之区也。辖大部落五，曰岩阿，曰磨府，曰匿那，曰几司，曰查吉仙。原都磨府，近迁居岩阿城。周有十五里，民户未详其数。磨府今虽不复为都，而居民安之，尚称乐土。匿那在国南，几司在国北，若查吉仙，则山谷之中矣。王宫及民舍，墙皆苦覆，惟门楣多有雕饰。头目见王，曲跽尽礼。王多妃妾，难以数计。宫内之事，皆媵妾司之。凡祀神亦以人为牲，特不至阿寒氏、那和弥之多耳。国中间有小山，至高者三百丈。天气和暖，高下皆可布种。产粟、米、棉花，尤工机织，其布与尼霏国等。林木馨香，蜂蝶翩绕，花晨月夕，致堪游衍。

尼霏国，在尼厄河之东岸，亦富庶之区。居此土者半回回，半黑人。泥霏之黑人，又黑人中之灵敏者，奴仆皆工织机，故所织棉花，他国莫及。辖部落八，那麻其首部也，产五谷牛马，草席之佳，甲于通洲。菰尔府部落在其北界，城池坚固，贸易蕃盛，部民尽回教，男女无别。腊牙马及马尼磨两大部落，均依尼厄河之东岸，因阿丹侵扰，改迁西岸。巴达司在莫司沙之边界，沙俄司与腊麻相距不远，四水环绕，洲浮水面。工作精巧，所织棉布，通洲头目，无不购而珍之。有七百军船防守边界。伊牙部亦临河岸，长四里，多商舶〈（以上十九国，皆与西洋通市）〉。

以下附五部落，均自为酋长。

嘉公那部，仅有大村乡三，自立头目。虽不属泥霏国，而土番颇驯。

封那部，距嘉公那四十里，一大市镇也。再行四十里，尚有数部落，情形莫详。

磨卦部，亦在嘉公那之下，相距约八十里，大市镇也。商贾鳞萃，有头目经理其事。

机里部，在磨卦之下，相距约五十里。多商船，亦一大市镇。然土瘠歉收，其草牲畜不食，故居民皆渔蕉果河以糊口，产油最著。

伊磨部，在机里之下，相距约七十里。城池宽大，滨河口，亦市埠也。出口货物，油与人口居多。往来船舫，陈设器具颇似欧罗巴。夹岸多大宅，栽种芭蕉、椰子，

窗榭华丽胜于邻国，惟俗习骄汰无度，酗酒辄达宵旦。

以上中阿未里加腹地诸部也，尚有尼厄河上流各国，地土肥美略同，游人巴客道死，不及回国，莫详其所经历。而各大部落，亦略有所闻，附载于后。丁麻杜国，在中阿未里加洲边界，产黄金，光色射目，欧罗巴人常冒险至其地。部落辽阔，情形莫悉。方其盛日，蒿司沙各国，均属统辖。近数百年并己国反属于摩罗果矣。近日黑人为王，宫室民舍，半皆圆锐，形若蜂房。厥壤燥瘠，产不敷食，仰给邻国。由尼厄河沿流运至加墨腊津口，一日可至。以金矿甚旺，故商旅若鹜，多摩罗果、阿尔尼阿、都尼司三都之人。百货充刃，惟黄金、奴仆两种，交易最大。

麻西那国，在弥尼湖之旁，宜牧畜，距丁麻杜部落颇远。土番付腊司种类，酋长即展里酋之弟。

展里国，滨临尼厄河边，首部即名展里，酋长阿丹人，居民万口，贸易稍逊丁麻杜，而丁麻杜所需货物多购诸此，商贾皆富腊司、曼领俄莫、马腊、摩罗四种，间有黑番至此贸易。

莽马腊国，土旷而沃，色俄其首部也。尼厄河居中，宫室民舍依傍两岸，垩墙鳞比，街衢方轨，居民三万。南山所产金沙，皆运此出售。珊山领部落，贸易亦盛，居民万口。麻那母部落产盐，北界旷野，为摩罗人牧场。

加阿达国，皆沙土，首部落曰甘猛。加孙国，地小而沃，首部落曰孤尼阿加里。

沙达卢、根戈卢领、尼古墨、鲁古、富腊卢五小国，高阜多林木，河中产金沙。甘千部落，其大市镇也。每遇礼拜，三墟期焉。母里地多金，运此销售。产蜜糖、棉花、火器、火药、花布及欧罗巴货物无一不备（以上六大部五小部皆尼厄河上游之国，未与西洋通市）。

○重辑

《万国地理全图集》曰：亚非利加中地，北系沙漠，称曰撒哈拉。北极出自十五度，至三十度，偏西十五度，至东三十度。长九千里，阔三千里。其沙地，风吹堆积为山，炎热难行。但沙漠中，亦间有水草沃壤。其民大半由亚拉伯国而来，以劫掠为生。其驼若舟，动止醒睡，恒与人同伴。行路如患渴死，则杀其驼饮血，且胃内有存水解渴。由麦西国至西十日路，皆无人之地。至窄谷始有树木，而后抵非散国都，居民七万。向麦西南形势，距二千有百里，乃他弗茅地，其兵最耐辛苦。望南而往，则地补士、亚勒两族，贫穷好斗。沙漠外各地，皆有水草，居民愈多，大半黑面。其中有数国半从回教，恒执己见，若见白面之人则酷待之。风俗浇漓放僻，男逸女劳。凡耕田治舍，贸易工作，无一非女，故愈娶妻女，则愈富足。土君娶妇

必盈千。此内尼额，大河两岸沃饶，林树畅茂。自古及今，内地与外国，无往来之理，是以居民野心。近日英人用心周游其地，以考其来历，但不服水土，或染瘴，或被贼，或志未成就。近日又用火轮船进其内河，搜访其风俗，而水手死亡，船空往反，竟无成功，惜哉。

《地理备考》曰：尼吉里西国，又名苏丹，在亚非里加州之中，北极出地六度起，至二十三度止；经线自东七度起，至三十一度止。东至卢比亚，暨亚比西尼二国，西连塞内冈比国，南接几内国暨岳山，北界沙漠。长约六千里，宽约四千二百五十里，地面积方二百四十五万里，烟户约二京馀口。人黑色。地形埠阔，湖河与沙漠相间。河之长者，曰尼日尔，曰哥拉，曰要，曰沙利。湖之大者，曰沙德，曰的别，曰非德勒。濒河田多腴腴，土产稻、黍、麻、绵、靛、烟、谷、果、象牙、金砂、皮革等。地极炎热，多毒虫恶豸，外人到辄病死，故自古不通别国。奉回教，业农，罕技艺。国分二十二部落，各酋分摄，不相统属。曰波尔奴，曰巴耶尔美，曰北尔古，曰桑加拉，曰布勒，曰冈千，曰窝那苏勒，曰上邦巴拉，曰下邦巴拉，曰马昔那，曰巴难，曰的勒南，曰丁布各都，曰牙乌利，曰尼非，曰波尔古，曰牙黎巴，曰北宁曰瓜，曰公，曰加拉那，曰达公巴。

一中央旷野，此最广之沙漠，硤山不毛，独有野兽狮狼驼鸟等，其游牧亦渴饿易毙。西方之地，荒风压藤，暝暗如夜。居民罕少，野积枯骨。中一地有草木，然水泉咸。商贾希利，结群而往。族类各异，其中土亚勒地，好虏掠，然客宿其家，亦厚接之。若逢于野，即便劫掠。特布族类，在东方，颜色黑，惟食驼乳淡物，每遭土亚勒之虏掠。非散，在地陂里之南。土丰盛，长百里，阔六十六里。居民七万，统辖于地陂里之酋。其旷野与麦西国交界，海港颇通商，其旷野有佛庙，四方礼拜云集。此外多沙磧，无大部落矣。

○利未亚洲各岛〈（原志此洲不载岛国，今取泰西各书补之）〉

《职方外纪》曰：圣多默岛，在利未亚之西，赤道之下，围千里，径三百里。其地浓阴多雨，愈近日处，云愈重，雨愈多。凡在此岛之果，俱无核。又有意勒纳岛，鸟兽果实甚繁，而绝无人居。海舶从小西洋至大西洋者，恒泊此十馀日，樵采渔猎，备二三万里之用而去。又赤道南有圣老楞佐岛，围二万馀里，从十七度至二十六度半。人多黑色，散处林麓，无定居。出琥珀、象牙，极广。

亚细亚以西之地中海，与利未亚洲北境相首尾，有岛百千，其大者一曰哥阿岛〈（曩国人患疫有名医名依卜加得不用药石，令城内外遍举大火烧一昼夜，火息而病亦愈。盖疫为邪气所侵，火气猛烈能荡涤诸邪也）〉，一曰罗得岛，天气常清明，终岁见日，无竟日阴霾者〈（其海畔常铸一巨铜人，高逾浮屠，海中筑两台以盛其足，风帆直过跨下，其一指中可容一人，直立掌托铜盘，夜燃火于内，以照行海者，铸十二年而成，后为地震而崩。国人运其铜以骆驼九百只往负之）〉，一曰际波里

岛，丰物产，每岁国赋至百万。葡萄酒极美，又出火浣布，是炼石而成。地热少雨，尝连晴三十六年。土人散往他国，今稍稍凑集矣。

《地理备考》曰：本州之岛，分隶西洋各国管辖，其隶布路亚国者三处，皆设总管。一曰马德义辣岛，在亚德兰的海西北，长一百八十里，宽七十里，烟户一亿二万馀口。山势峭壁，气温和，土肥饶，谷果丰稔，葡萄尤盛。首郡名丰札尔。二曰布威尔德岛，在亚非里加州之极西，纬度自北十四度四十五分起，至十七度二十分止；经度自西二十四度五十五分起，至二十七度三十分止。内有十岛，大者名桑的可阿。烟户一万七千馀口，土产谷果、绵椰、药材、甘蔗、蓝靛、葡萄、烟叶等物。地燄烈，不害居栖，禽兽充斥，鳞介蕃衍。十岛中名桑非里卑者，出火岛也。三曰桑多美北林西卑岛，在本州西义内亚海湾中，分为二：一桑多美岛，回环四百里，地气不驯，而田廛产丰；一北林西卑岛，长八十里，宽六十里，地气温和，田土、禽兽、谷果，均与桑多美岛相等。

隶天方国者五，一几罗阿岛，在东方，幅员十数里，土产寥寥，四面险阻，船只难度；一蒙非亚岛，长三百三十里，宽三四十里，田土腴腴，物产丰盛；一桑西巴尔岛，长二百五十里，宽五十里，泊所稳便，贸易兴隆；一奔巴岛，幅员三百五十里，地多肥饶，土产木料，本岛为天方管辖者三分之一；一索哥德拉岛，长二百五十里，宽一百里，泊所稳便，地饶少泉，贸易无几，土产象胆、朱砂、禽兽等物。

隶土耳其国者，曰马苏阿。在亚比西尼国马苏阿海岛之中，烟户稀疏，泊所稳阔，商贾云集，地气燄烈。

隶佛兰西国者，曰圣卢义斯岛。田土膏腴，贸易兴隆。地气不和，一哥勒亚岛，泊所稳便，凡佛兰西船往亚细亚者，必至其处；一乌阿罗岛，贼多民散，四望空虚。以上各处，皆在塞内冈比亚国中。一布尔滨岛，在印度海，长一百八十里，宽一百三十里，烟户约八万五千口。土腴腴，气温和，内有火山，土产黑金、珊瑚、谷果、桂皮、绵花、烟叶、材木、香料，泊所不稳，有总管驻扎。

《外国史略》曰：亚非利加各洲岛其东方最广大者，曰马他牙士里岛，广袤方圆一万零五百里，长二千二百里，阔约四百五十里及七百里。南极出十二度及二十六度，偏东四十四及五十二度。其居民约四百万口，族类不一，形状甚美。此岛蕃毓，出五谷、百果、蚕丝、香料、黛青、牛畜、铜银铅。中央皆大山密林，有土酋管之。惟阿瓦族最大，近各酋归于一主。嘉庆间，部主聪明，召外国艺术贤士，教化土民。道光十五年，女王摄权，仇视耶稣门徒，半死杀戮。此地向通商，佛国每欲开埠，多染瘴毙。近女王与英佛两国肇衅。

补吞岛并所属之洲，三百二十里，南极出自二十度五十分至二十一度二十分，马岛东向之屿，一带皆山，判分此岛峰高千丈，无平坦地。多白糖、丁香等物，居民十

万，黑七白三，大半耕田。此岛葡萄亚所开，后佛兰西据之，产货甚多，恨无湾泊之港。

离此屿不远之茅勒士岛，在补岛东面，南极二十二度二十一度中间，广袤七百餘里，地面二万七千三百二十四顷。此岛丰盛，白糖最多，凡南洋之物皆有之。地有火山，草木蓊蓊。荷兰人曾至此，后佛兰西据之，遂荒芜，白面人其裔也。嘉庆年间，让与英国。黑面人五万三千。道光十六年，运进之物值银二百七十万两，船三百四十九只。所运进者，二百五十万两。英国调兵帅管之。黑面人无用，每雇唐人治其田，道光十六年，收税饷七十一万，所费四十一万七千两。

西识群岛，天气和美，洲有五产，白糖、椰子等，民少而食用足。港口无暴风，捕鲸之人皆泊此。

可摩利群州甚高，出各物。民所可他岛甚高，在亚丁海隅，系亚拉天方回族。地亢，出芦荟粟，皆崇回回教。

亚非利加西方之岛，一希里尼洲，在磐石上。土薄无多产，英人属地，商船往来要路。嘉庆十九年，佛兰西霸君波那良谪居在此。船由印度至者，在此云集。其升洲产鳖，商船卖之。一多马等岛，地荒芜，在危尼海隅。其林稠密，民皆匪类，属西班牙国，多烟瘴。一青群岛，属葡萄亚，有火山，天气亢旱，惟产绵花，居民屡遭饥馑。

加那利洲，属西班牙国，出葡萄。尼勒岛，居民十九万，山水最美。

又有绝美之洲曰马地拉，出美酒百果，与圣港屿皆属葡萄亚。居民十二万，地气清爽，英国人多留此医病养生。

◎大西洋欧罗巴洲各国总叙

叙曰：恭读康熙五十有年十月壬子圣祖谕曰：海外如西洋等国，千百年后，中国恐受其累，此朕逆料之言。夫康熙之世。荷兰效戈船，定贡期，意大里国备台官，佐历算，四海宾服。而大圣人已智周六合，虑深万世，何哉。地气自南而北，闻禽鸟者知之；天气自西而东，验海渡者知之。大秦之名闻中国，自汉世始；大秦之通中国，自明万历中利马窦始。大秦者，西洋之意大里亚国也。凡佛郎机、葡萄亚之住澳门，入钦天监，皆意大里开之，为天主教之宗国。代有持世之教皇，代天宣化。至今西洋各国王即位，必得教皇册封。有大事咨决请命焉。又请其大弟子数十，分掌各国教事，号曰法王。教皇犹西藏佛教之达赖喇嘛，而法王则犹住持蒙古各部之胡土克图（今澳门市埠属葡萄亚国，而其法王则亦意大里国人）。故自昔惟意大里亚足以纲纪西洋。自意大里裂为数国，教虽存而富强不竞，于是佛郎机、英吉

利代兴，而英吉利尤炽，不务行教而专行贾，且佐行贾以行兵，兵贾相资，遂雄岛夷。人知鴉烟流毒，为中国三千年未有之祸，而不知水战火器，为沿海数万里必当师之技；而不知饷兵之厚，练兵之严，驭兵之纪律，为绿营水师对治之药，故今志于英夷特详，志西洋正所以志英吉利也。塞其害，师其长，彼且为我富强；舍其长，甘其害，我乌制彼胜败。奋之奋之利兮害所随，祸兮福所基，吾闻由余之告秦繆矣。善师四夷者，能制四夷，不善师外夷者，外夷制之。

又案：明万历二十九年，意大利人利玛窦始入中国，博辩多智，精天文，中国重之。自称大西洋之意大利人，未尝以大西洋名其国。时佛郎机筑城室于濠镜，及明季亦旋弃澳而去，皆非今澳门大西洋。澳门大西洋者，明末布路亚人，以历法闻于中朝，礼部尚书徐光启奏用其法，并居其人于澳门，至今相沿，呼澳夷为大西洋国。《明史·外国传》自当专立布路亚国一传，以著中历用西法之始，及澳门有大西洋之始，乃仅一语附见意大利、佛郎机传中，遂至今如堕云雾。其实大西洋者，欧罗巴洲各国之通称。澳夷，特其一隅，不得独擅也。以其洲言之，则各国皆曰欧罗巴；以其方隅言之，则皆可曰大西洋；以其人言之，则皆可曰红毛。至《澳门纪略》以今澳夷为意大利国，亦误。意大利但行教于澳，其市舶兵舶，炮台洋楼及岁输地租，则皆布路亚国主之，无与意大利。

欧罗巴与利未亚之分洲也，以地中海界之。而欧罗巴一洲，复中亘一海，其袤几与地中海相亚，海北为瑞丁、那耳、威社等国，北界冰海，西史称别一天下，而是海独无专名，随国立称，难以举似。今以洲中海名之，犹朝鲜辽东之与登莱，中隔渤海矣。

卷三十七

《后汉书》：大秦国，一名犁，以在海西亦云海西国。地方数千里，有四百馀城，小国役属者数十。以石为城郭，列置邮亭，皆堑堊之。有松柏诸木百草，人俗力田作，多种树蚕桑，皆髡头而衣文绣，乘輜辘白盖小车，出入击鼓，建旌旗幡帜。所居城邑，周圜百馀里。城中有五宫相去各十里，宫室皆以水精为柱，食器亦然。其王日游一宫，听事五日而后遍。常使一人持囊随臣车，人有言事者，即以书投囊中，王至宫发省，理其枉直。各有官曹文书，置三十六将，皆会议国事。其王无有常人，皆简立贤者。国中灾异，及风雨不时，辄废而更立，受放者甘黜不怨〈（今西洋荷兰、弥利坚等国，尚用此俗）〉。其人氏皆长大平正，有类中国，故谓之大秦〈（观此知“大秦”乃中国人称彼之词，非彼国大号）〉。土多金银奇宝，珊瑚、琥珀、琉璃、琅玕、朱丹、青碧，刺金缕绣，织成金缕罽、杂色绫。作黄金，涂火浣布。又有细布，或言水羊毳，野蚕茧所作也〈（即今之大呢）〉。合会诸香煎其汁，以为苏合。凡外国诸珍异皆出焉。以金银为钱，银钱十当金钱一。与安息、天竺交市于海中，利有十倍。其人质直，市无二价。谷食常贱，国用富饶。邻国使到其界首，有乘驿诣王都，至则给以金钱。其王常欲通使于汉，而安息欲以汉绘彩与之交市，故遮阂不得自达〈（观此语，则知《安息传》中所言“土人告汉使赍三岁粮乃得渡海”，及“海中使人思慕死亡”之语，皆安息人所以恫喝汉使，不欲其通大秦也）〉。至桓帝延熹九年，大秦王安敦遣使自日南徼外，献象牙、犀角、毒瑁，始乃一通焉。其所表贡并无珍异，疑传者过焉。或曰其国西有弱水流沙，近西王母所居处，几于日所入也。《汉书》云，从条支西行二百馀日，近日所入则与今书异矣。前世汉使皆自乌弋以还，莫有至条支者。又云，从安息陆道，绕海北行，出海西，至大秦〈（此即今都鲁机及鄂罗斯相通之陆路）〉。人庶连属，十里一亭，三十里一置，终无盗贼寇警，而道多猛虎狮子遮害行旅。不百余人赍兵器，辄为所食。又言有飞桥数百里，可渡海北诸国，所生奇异玉石诸物，譎怪多不经，故不记云〈（《职方外纪》曰：百尔西亚西北诸国，皆为度尔格所并，其地有一海，长四百里，广百里，命曰“死海”。其西北有那多理亚未西界欧罗巴处，中隔一海，宽五里许。昔有一名王曰“失尔塞”者，造一跨海石梁，通连两地。今为风浪冲击亦崩颓矣。源案：度尔格国在死海之西北界欧罗巴阿细亚尔洲之间，今都鲁机国也。所云跨海石梁正与此地望相准，长止五里，盖塞外得水谓海之例，未为不经。而《后汉书》言飞桥数百里，则传闻之过也）〉。

《晋书》：大秦国，一名“犁”，在西海之西，其地东西南北，各数千里。有城邑，其城周回百馀里，屋宇皆以珊瑚为桷桷，琉璃为墙壁，水精为柱础。其王有五宫，其宫相去各十里，每旦于一宫听事，终而复始。若国有灾异，辄更立贤人，放其旧王，被放者亦不敢怨。有官曹簿领，而文字习胡，亦有白盖小车旌旗之属，及邮驿制置，一如中州。其人长大，貌类中国人，而胡服。其土多出金玉宝物、明珠大贝。有夜光璧，骇鸡犀，及火浣布。又有刺金缕绣及织绵缕罽。以金银为钱，银钱十，当金钱之一。安息、天竺人与之交市于海中，其利百倍。邻国使到者，辄廩以

金钱。途经大海，海水咸苦不可食。商客往来，皆赍三岁粮，是以至者稀少。汉时都护班超遣掾甘英使其国入海，船人曰：海中有思慕之物，往者莫不悲怀，若汉使不恋父母妻子者可入（此皆彼土人夸诩之词，妄以地中海为大海）。英不能渡。武帝太康中，其王遣使贡献。

《魏书》大秦国，一名“黎轩安都城”。从条支西渡海曲一万里（从条支渡海万里，非地中海乎，可证拂林为大秦矣），其海傍出，犹渤海也。而东西与渤海相望，盖自然之理。地方六千里，居两海之间（源案：自汉晋以来，皆误以地中海为大西海，故有赍粮数岁，始达大秦之诞说。独《魏书》始知其海傍出犹渤海，与中国渤海东西相望。自古言地中海者，莫先于此所云渡海曲万里者。以其纵长言之，南北横渡，实止三千馀里。所云地居两海之间者，大秦之北，又有洲中海，亦与地中海广长略半，皆渤海，非大西海也。故言西域，莫精于《魏书》）。其地平正，人居星布。其王都城，分为五城，各分五里，周六十里，王居中城。城置八臣以主四方，而王城亦置八臣分主四城。若谋国事，及四方有不决者，则四城之臣集议王所，王自听之，然后施行。王三年一出观风化，人有冤枉，诣王诉讼者，当方之臣，小则让责，大则黜退，令其举贤人以代之。其人端正长大，衣服车旗拟中国，故外域谓之大秦。其土宜五谷桑麻，人务蚕田，多璆琳、琅玕、神龟、白马、朱鬣、明珠、夜光璧。东南通交趾，又水道通益州、永昌郡。多出异物。大秦西海水之西有河，河西南流，河西有南北山，山西有赤水，西有白玉山，玉山西有西王母山。《玉为堂》云：“从安息西界，循海曲亦至大秦四万馀里，于彼国观日月星辰无异中国”。而前史云“条支西行二百馀日，近日入处”，失之远矣（此皆能破旧史之妄）。

《职方外纪》：天下第二洲曰“欧罗巴”，南起地中海，北极出地三十五度；北至冰海，出地八十馀度。南北相距四十五度，径一万一千二百五十里。西起西海，福岛初度；东至阿比河，九十二度。径二万三千里，共七十馀国。其大者曰“倚西把尼国”（吕宋），曰“拂郎祭”（即佛兰西也，祭旧误作察。案：祭音近机西，其作察则形讹也），曰“意大里”（与今志同），曰“亚勒马尼”（耶玛尼），曰“法兰得斯”（荷兰），曰“波罗尼”（波兰），曰“翁加里”（今并入西都鲁机），曰“大尼”，曰“雪际”（瑞国），曰“诺勿惹”（即那威国，与瑞丁合为一国），曰“厄勒祭”（即额力西），曰“莫哥斯未”（俄罗斯）。其地中海，则有甘的亚诸岛，西海则有意而兰大、谿厄利诸岛云（谿厄利即“英吉利”，其意而兰大，亦其属岛）。

凡欧罗巴洲内大小诸国，自国王以及庶民，皆奉天主耶稣之教，纤毫异学，不容窜入。国主互为婚姻，世相和好。财用百物，有无相通，不私封殖。其婚娶，男子大约三十，女子至二十外。临时议婚，不预聘，通国之中皆一夫一妇，无敢有二色者。土多肥饶，产五谷，米麦为重，果实更繁。出五金，以金银铜铸钱为币。衣服蚕丝者，有天鹅绒织金段之属；羊绒者，有毯罽销哈刺之属。又有苧麻之类，名利诺

者为布，绝细坚而轻滑，大胜棉布。敝则可捣为纸，极坚韧，今西洋纸率此物。君臣冠服，各有差等。相见以免冠为礼。男子二十以上，概衣青色，兵士勿论。女人以金宝为饰，服御罗绮，佩带诸香。至四十及未四十而寡者，即屏去，衣素衣。酒悉以葡萄酿成，不杂他物。其酒可积至数十年，当生子之年，酿酒至儿年三十娶妇时用之，酒味愈美。诸种不同，无葡萄处，或用牟麦酿之。其膏油之类，味美而用多者。曰阿利袜，是树头之果，熟后即全为油。其生最繁，又易长，平地山冈，皆可栽种。国人以法制之，最饶风味，食之齿颊生津，在橄榄、马金囊之上，其核又可为炭，滓可为碱，叶可食牛羊。凡国人所称资产，蓄大小麦第一，葡萄酒次之，阿利袜油又次之，蓄牛羊者为下。其国俗虽多酒，但会客不以劝饮为礼。俾犯醉者，终身以为诟辱。饮食用金银玻璃及磁器。天下万国坐皆席地，惟中国及欧罗巴诸国，知用椅棹。

其屋有三等，最上者纯以石砌；其次砖为墙柱，木为栋梁；其下土为墙，木为梁柱。石屋砖屋，筑基最深，可上累六七层，高至十馀丈。地中亦有一层，既可窖藏，亦可除湿。瓦或用铅，或用石板，或陶瓦。凡砖石屋，皆历千年不坏。墙厚而实，外气难通，冬不寒而夏不溽。其工作如木工、石工、画工、塑工、绣工之类，皆颇知度数之学，制造备极精巧。凡为国工者，皆考选用之。其驾车，国王用八马，大臣六马，其次四马，或二马。乘载碑马驴互用，战马皆用牡，骟过则弱不堪战矣。又良马止饲大麦及秆，不杂他草及豆，食豆者足重不可行。此欧罗巴饮食、衣服、宫室、制度之大略也。

又曰：欧罗巴诸国，皆尚文学。国王广设学校，一国一郡，有大学、中学，一邑一乡，有小学。小学选学行之士为师，中学、大学，又选学行最优之士为师，生徒多者至数万人。其小学曰文科，有四种：一古贤名训，一各国史书，一各种诗文，一文章议论。学者自七八岁至十七八岁，学成而本学之师儒试之，优者进于中学。曰“理科”，有三家：初年，学“落日加”，译言“辩是非之法”；二年，学“费西加”，译言“察性理之道”；三年，学“默达费西加”，译言“察性理”。以上之学，总名“斐录所费亚”。学成而本学师儒又试之，优者进于大学。乃分为四科，而听人自择。一曰“医科”，主疗病疾；一曰“治科”，主习政事；一曰“教科”，主守教法；一曰“道科”，主兴教化。皆学数年而后成，学成而师儒又严考阅之。凡试士之法，师儒群集于上，生徒北面于下。一师问难毕，又轮一师，果能对答如流，然后取中。其试一日止一二人，一人遍应诸师之问。如是取中，便许任事。学道者专务化民，不与国事。治民者秩满后，国王遣官察其政绩，详访于民间。凡所为听理词讼、劝课农桑、兴革利弊、育养人民之类，皆审其功罪之实，以告于王而黜陟之。凡四科官禄入皆厚，养廉有馀，尚能推惠贫乏，绝无交贿行赂等情。

其诸国所读书籍，皆圣贤撰著，从古相传，而一以天主经典为宗。即后贤有作，亦必合于大道，有益人心，乃许流传国内。亦专设检书官，看详群书，经详定讫，方准书肆刊行。故书院积书至数十万卷，毋容一字蛊惑人心，败坏风俗者。其都会大

地，皆有官设书院，聚书于中，日开门二次，听士子入内抄写诵读，但不许携出也。又四科大学之外，有度数之学，曰“玛得玛第加”，亦属“斐录”所科内。此专究物形之度与数，度其完者，以为几何大；数其截者，以为几何多。二者或脱物而空论之，则数者立算法家，度者立量法家。或体物而偕论之，则数者在音相济为和，立律吕家；度者在天迭运为时，立历法家。此学亦设学立师，但不以取士耳。此欧罗巴建学设官之大略也。

又曰：欧罗巴国人奉天主教，在遵持两端：其一爱敬天主万物之上，其一爱人如己。爱敬天主者，心坚信望仁三德，而身则勤行瞻礼工夫。其瞻礼殿堂，自国都以至乡井，随在建立。复有掌教者，专主教事，人皆称为神父。俱守童身屏俗缘，纯全一心敬事天主，化诱世人。其殿堂一切供亿，皆国王大臣民庶转输不绝，国人群往归焉。每七日则行公共瞻礼，名曰弥撒。此日百工悉罢，通国上下往焉。听掌教者讲论经典，劝善戒恶。妇女则另居一处而听，男女有别。

其爱人如己，一是爱其灵魂，使之为善去恶，尽享生天之福。二是爱其形躯，如我不慈人，天主必不慈我，故欧罗巴人俱喜施舍。千馀年来，未有因贫鬻子女者，未有饥饿转沟壑者。在处皆有贫院，专养一方鰥寡孤独。处其中者，又各有业，虽残废之人，亦不废。如瞽者运手足，痹者运耳目，各有攸当，务使曲尽其才，而不为天壤之废物。又有幼院，专育小儿。为贫者生儿，举之无力，杀之有罪，故特设此院，令人抚育以全儿命。其族贵而家贫者，耻于送子入院，更有两全之法。其院穴墙以设转盘，内外隔绝不相见，送儿者乘人不见置儿盘中，扣墙则院中人转儿入矣。其曾领洗与否，皆明记儿胸。异时父母复欲收养，则按所入之年月，便得其子。又有病院，大城多至数十所，有中下院，处中下人，有大人院，处贵人。凡贵人若羁旅，若使客偶患疾病，则入此院。院倍美于常屋，所需药物，悉有主者掌之。预备名医，日与病者诊视。复有衣衾帷幔之属，调护看守之人，病愈而去。贫者量给资斧，此乃国王大家所立，或城中人并力而成。月轮一大贵人，总领其事，凡药物饮食皆亲自验视之。各城邑遇丰年，多积米麦，饥岁以常价粢之，如所谓常平仓者。人遇道中遗物或兽畜之类，多觅其主还之，弗得主则养之。国中每年数日定一公所，认识遗畜。失者与得者偕来会集，如遇原主，则听其领去，如终弗得主，则或宰肉，或卖价以散贫。人若拾金银宝物，则书于天主堂门外，令人来识。先令预言其状，如一一符合，即以还之。不得主亦散于贫乏。

国中又有天理堂，选盛德宏才，无求于世者主之。凡国家有大举动、大征伐，必先质之此堂。问合天理与否，拟以为可然后行之。国人病危，悔过祈赦，则分析产业，遗一分为仁用，或以救贫乏，或以助病院，或以赎敌国所虏，或以修饰天主殿堂，一切仁事，悉从病人之意。遗于子孙，谓子孙之财，遗于仁用，谓己灵魂之财。其圣教中人，更有慕道最深，抛弃世间福乐，或避居于山谷，或入圣人圣女所立之会，而毕世修持者。其入会须发三誓，一守贞以绝色，一安贫以绝财，一从命以绝意。凡欧罗巴诸国，从十六七岁愿入会中，矢志守童身者，自国王大臣宗室以下，男

女不可胜纪。其女子入会后，惟父母至戚，得往见之，馀绝不相交接。其会中居屋，原极宏敞，亦自不碍游息也。其男子入会，例有多端，有专自修，不务化人者，有务化人，不能远游者，又有化人而欲及天下者。此则离本国，捐朋友，弃亲戚，遍历遐方，其视天下犹一家，视天下人犹一体，不辞险阻艰辛，虽啖人炙人之地，亦身历焉。惟祈普天之下，皆识真王而救其灵魂，升天以毕素志，此欧罗巴敬天爱人之大略也。

又曰：欧罗巴诸国，赋税不过十分之一，民皆自输，无征比催科之法。词讼极简，小事里中有德者自与和解。大事乃闻官府，官府听断，不以己意裁决。所凭法律条例，皆从前格物穷理之王所立，至详至当。官府必设三堂，词讼大者，先诉第三堂，不服告之第二堂，又不服告之第一堂，终不服则上之国堂，经此堂判后，人无不听于理矣。讼狱皆据实。诬告，则告者与证见，即以所告之罪坐之。若告者与诉者，指言证见是仇或生平无行，或尝经酒醉，即不听为证者。凡官府判事，除实犯真赃外，亦不先事加刑，必俟事明罪定，招认允服，然后刑之。官亦始终不加詈骂，即词色略有偏向，讼者亦得执言不服，改就他官听断焉。吏胥饬廩，虽亦出于词讼，但因事大小以为多寡，立有定例，刊布署前，不能多取，故官府无恃势剥夺，吏胥无舞文诈害，此欧罗巴刑政之大略也。

封内虽无战斗，其有邪教异国，恃强侵侮，不可德驯，如鞑而鞑、度尔格等者，本国除常设兵政外，又有世族英贤、智勇兼备者，常以数千人，结为义会，大抵一可当十，皆以保国护民为志。其初入会者，试果不憚诸艰，方始听入焉。会在地中海马儿达岛，长者主之。遇警则鸠集成师，而必能灭寇，成功他国。亦有别会俱仿佛乎此，即国王亦有与其会者。此又欧罗巴武备之大略也。

又曰：地中海有岛百千，大者曰甘的亚岛。曩有百城，周二千三百里，古王造一苑囿，路径交错，一入便不能出。游者须以物识地，然后可入。生一草名阿力满，少嚼便能疗饥。地中海风浪，至冬极大难行，有鸟作巢于水次，一岁一乳，但自卵至翼，不过半月。此半月内海必平静，无风波。商舶待之以渡海，鸟名亚尔爵虐。此半月，遂名为亚尔爵虐日云。

又曰：欧罗巴迤北一带，海岛极多。冬长暗数月，行路工作以灯。产貂类极多，人以为衣。又有人长大多力，遍体生毛如猱猴。产牛羊鹿甚多，犬最猛烈，一犬可杀一虎，遇狮亦不避也〈（源案：东北海黑龙江以下，有使犬使鹿部，捕貂为生，此西北地亦然，盖地近北海，故貂鹿犬所产相同）〉。冬月海水为风所击，尝涌积如山。人善渔猎，山多鸟兽，水多鱼鳖，人以鱼肉为粮，或磨鱼为面，油为灯，骨造舟车屋室，亦可为薪。其鱼皮以为舟，遇风不沉不破，如陆走，则负皮舟而行〈（源案：黑龙江东有鱼皮部，以鱼皮为衣，此亦西北海与东北海物产同之一证）〉。其海风甚猛，能拔树折屋及掇人物于他处〈（又曰：北海滨有小人国，高不二尺，须眉绝无，男女无辨，跨鹿而行，鸛鸟常欲食之，小人恒与鸛相战，或预破其卵，

以绝种类。又有小岛，其人性嗜酒，任饮不醉，年寿最长）〉。近谿厄利亚国，为格落兰得岛，其地多火，以砖石障之，仍可居处。或宛转作沟以通火，火焰所至，便置釜甑熟物，更不须薪，其火亦终古不灭。

《万国地理全图集》曰：欧罗巴列国，南至地中之海八搭峡海，隔亚非利加地；东南至黑海，连亚齐亚；北及冰海，东接亚齐亚，西及大西洋海，广袤圆方九百七十五万方里。长一万零五百里，阔七千五百里，居民二万万丁。其半地归俄罗斯，北极出自三十六度，至七十一度，自英都中线偏西十度，偏东三十六度。遍地江河支流，灌溉田亩，中间高岗崎岖，千峰险峻，由此延曼南北。大湖在俄罗斯国，由海隅深入其地，交通往来，自有转圜之易。古时此地林树稠密，群蛮游猎。商朝盘庚年间，希腊族种到俄罗斯而开新地，渐进教化。在地中海岛各地，与亚齐亚列王战胜，于是罗马国在以他里大兴，攻服欧罗巴之大半，化民成俗，四夷共服。惟有北方之野蛮，与罗马交战，屡获全胜。东汉献帝年间，匈奴侵欧罗巴东境，其土民迁移邻邦，一至罗马国之交界，尽力战斗，被罗马国荡覆君室。自创新鼎，异族者渐奉天主教，勉为良善。但无见识，其僧乘机弄权，敢作敢为。唐朝年间，回回前进，与西国接战。宋朝年间，千万居民离其本地，而往犹大国。百有馀年，与回回苦斗不息。自后欧罗巴内城邑大兴，并操自主之权，始知印书，知制火药，初造罗经。洎明嘉靖年间，舟楫无所不至。初寻出亚默利加大地，次到五印度国，后驶至中国。通商日增，见识日广。此时欧列国万民之慧智能高大，纬武经文，故新地日开，遍于四海焉。

《瀛环志略》曰：欧罗〈（或作友罗巴）〉一土，在亚细亚极西北隅，以乌拉大岭为界〈（详《俄罗斯图说》）〉，中国之所谓大西洋也。绝长补短，约得亚细亚四分之一。西距大西洋海，海水由西此湾环注入大地，曰波罗的海〈（一作“八得海”，俗名“黄海”）〉，转注东北分两汉，约三四千里。波罗的海之南，海水由正西注入大地，曰地中海〈（泰西名“墨力特尔勒尼安”，一作“美的德拉虐”）〉，由西而东，约七十馀里。再分小汉，注东北，成巨浸曰黑海〈（泰西名“勒必西”）〉，周回二三百里。环波罗的海，南尽地中海，黑海之北岸，为欧罗巴全土。其地自夏以前，土人游猎为生，食肉寝皮，如北方蒙古之俗。有夏中叶，希腊各国，初被东方之化，耕田造器，百务乃兴。汉初意大利之罗马国，创业垂统，疆土四辟，成泰西一统之势，汉史所谓“大秦”也。前五代之末，罗马衰乱，欧罗巴遂散为战国。唐宋之间，西域回部方强，时侵扰欧罗巴诸国。苍黄自救，奔命不暇。先是火炮之法，创于中国，欧罗巴人不习也。元末有日耳曼人苏尔的斯始仿为之，犹未得运用之法。明洪武年间，元驸马帖木儿王撒马儿罕，威行西域。欧罗巴人有投部下为兵弁者，携火药炮位以归诸国，讲求练习，尽得其妙。又变通其法，创为鸟枪，用以攻敌，百战百胜。以巨舰涉海巡行，西辟亚墨利加全土，东得印度南洋诸岛国，声势遂纵横于四海，现大小共十馀国。

波罗的海之东，有大城曰“彼得罗堡”〈（一作必特尔土木尔）〉，俄罗斯之都城

也。波罗的海之西岸，与大西洋海相表里也，形如葵扇下垂，曰“瑞兰国”。从南岸突出如臂，亘波罗的海之闕，与瑞国作凹凸之势，曰“璡国”。璡国之南，曰“日耳曼列国”，为欧罗巴之中原。日耳曼之东北，临波罗的海，曰“普鲁士”。日耳曼东南，曰“奥地利”。其东南临地中海，曰“土耳其”〈（土耳其有三土，此其西土，中东两土在亚西亚界内）〉。土耳其之南，地形如手掌拊于地中海，曰“希腊”。日耳曼之南曰“端士”，再南如人股之著屐于地中海，曰“意大里亚列国”。日耳曼之西北临海，曰“荷兰”。荷兰之南曰“比利时”；比利时之南曰“佛郎西”；佛郎西之西南曰“西班牙”；西班牙之西，临大西洋海曰“葡萄牙”。佛郎西之西北，有三岛雄峙海中，曰“英吉利”。

按以上各国，惟俄罗斯与中国互市，在西北陆路，不由海道。其至粤东贸易者，英吉利船最多，居各国十分之六。西班牙之船，大半自吕宋来粤东，称大小吕宋，不称西班牙。其船之多，几过于英吉利。而洋米之外，少别货。此外则奥地利、普鲁士次之，璡国、荷兰又次之，瑞国又次之。佛郎西货船每岁来粤，多不过三四只，少则一二只，所载皆呢羽锤表诸珍贵之物。葡萄牙即居澳门之大西洋，其本国商船来者甚稀。日耳曼之翰堡〈（一作昂不尔厄）〉、北闵〈（一作不来梅）〉两埠，间有货船来粤。比利时现求通商，船尚未来。意大里亚近分四国，商船无来者。土耳其系回回，希腊新造小国，向未通商。

按诸书述各国地域之正方里，各各不同，与中国开方法不同，不知其如何折算。其所列进帑、兵额、师船之数，复各书多不相合，殊不足据。所谓欠项者，乃国所欠于民之数。西土之例，国有兵事，则聚乡绅于公会，令其筹辨兵饷，皆贷于富商大贾，而岁偿其息。愈积愈多，或罄一岁之入，而不足以偿，则加税额以取盈焉。民之怨畔，国之衰弱，半由于此。

欧罗巴一土，以罗经视之，在干戌方，独得金气，其地形则平土之中，容畜沧海数千里，回环吞吐，亦与他壤迥别。其土膏腴，物产丰阜。其人情性缜密，善于运思，长于制器。金木之工，精巧不可思议。运用水火，尤为奇妙。火器创自中国，彼土仿而为之，益加精妙。铸造之工，施放之敏，殆所独擅，造舟尤极奥妙。篷索器具，无一不精。测量海道，处处志其浅深，不失尺寸。越七万里，而通于中土，非偶然也。

欧罗巴诸国，迤南者在北黄道之北，寒暑略似中原。迤北者在北黑道之南，积雪至五六尺，坚冰至三四尺。俗传西洋人畏冷，误矣。冬月室皆炽炭，衣毡数重，无著裘者。所传畏冷者黑夷，皆印度或南洋各岛人，与赤道相近，亘古未见冰雪，其遇析寒而瑟缩也，宜矣。

欧罗巴诸国来粤东，皆从大西洋海开行，沿亚非利加之西岸南行，至尽头之好望海角，俗名大浪山，乃转而东北。舟行至此，风涛最恶，彼土人惯于浮海，亦罔不栗。

栗危惧，过此乃额手称庆。浮印度海东北行入苏门答腊，葛留巴之巽他海峡，又东北而至粤东，计程约七万余里。俗称来三去五，盖由大西洋来中国约三月程，回国则须五月程，往返同途，而迟速不同者，非尽由风信之顺逆也。四海之水皆东趋，至尾闾而入大地，又从万派源泉，分流而出。由欧罗巴至中国则为顺流，由中国西旋则为逆流，故迟速不同耳。

欧罗巴诸国，纪年皆称一千八百几十年，非其传国之年数也。各国皆奉耶稣教，以耶稣降生之年为元年，至今凡一千八百余年耳。至各国祚数，或修或短，惟佛郎西传世最久。其余多者，亦不过数百年。且时立女主，族姓潜移，俗传西洋诸国，自古未易姓者，妄也。

西洋诸国，语言文字相同者，普鲁士、奥地利与俄罗斯同，地相接也。英吉利与米利坚同，西班牙与墨西哥以南诸部同，葡萄牙与巴西同，彼州本三国之所开辟也，余国皆不相同。

泰西人造屋外无墙垣，中无院落，惟层楼叠架，绕以回廊，遍开牖户。贱者处下层，贵者居上层，虽王宫亦如此。所称俄罗斯新都，王廷长四十五丈，阔三十八丈。旧都王廷广七十七丈，长二百一十丈，非指一宫言之，总其宫墙四隅计之，而中则自分层数、间数也。

欧罗巴之大界限，自地中海以外，一为州中海，横贯瑞丁、那威、大尼、普鲁社之南，峨、日、奥、佛、槌、瑞、意大里各国之北，亦名“黄海”，亦名“巴得海”，亦名“波的亚海”，皆此州之异名也。一为乌拉岭，即葱岭之北干，起白尔摩，北抵冰海，长四千馀里，分亚细亚欧罗巴二洲之界，俄罗斯跨此岭东西焉。其岭所连诸山，皆葱岭西北之干，蜿蜒回环，千曲百折，以抵海滨。信乎葱岭之大雪山，为古昆仑，巍为群山之祖也。

《地理备考·欧罗巴各国总叙上》曰：欧罗巴洲各国，建立始末，以额力西国为最，而额力西国之前，又系上古亚西黎亚与厄日度二国，开创风气。当中国唐虞之世，亚西黎亚国，政教昌隆。自夏后不降十三岁，嗣君尼亚斯不勤政事，国势渐衰。自后八百馀载，朝政日非，古史无所记载。惟厄日度国，代有明君，然古史但载兵革始末，而贤君善政，均未之述。自商王祖辛十二年，亚美奴非斯溺死红海，后西索斯的里嗣位，武备文事，极一时之盛。是时厄日度国，人约二千七百万馀口，传世七百十一载，每遣人民迁赴他方，开创教化。故亚德纳斯国，渐为声名文物之邦，实赖厄日度国人，前往其地变化之也。是时额力西国王，闻而向风，遣其能臣游说各国，因得十二国会盟，彼此相卫，岁遣使臣，再会于德尔摩比勒之地，议行善政。复思延国祚，必须立教，遂将德尔佛斯堂诸善士布施之资财，尽付十二国会议之人管理。缓急相关，并力御侮，是以伯尔西亚回国兵来侵，无不败北。偃武修文，二百馀载，航海四出，并至葛尔给斯等处，创建新国焉。

殷王廩辛六祀，亚德纳斯国王名“德修”者，武勇绝伦，自思十二部落，事权不一，遂欲合而一之。先得庶民之心，次散其附和首领之众，又裁汰国内各衙署，惟建会议公堂一所；设礼制，轻税敛，招徕远人；弹丸之地，竟成通都大邑，较额力西各处更盛。国中大权，尽归一人，尽革前此各部强霸衡行之习。其国人分三等，一则尊爵绅士，二则百工匠役，三则农夫庶民。因一等之人权重，故自德修王至哥德洛斯亚两世，特加惠于二三等之人，以分爵士之势。久之民志日骄，畸重之势，权遂归下。当周康王时，哥德洛斯王薨，其民以此后必无如先君之贤者，遂扬言惟玉必德尔为君，方可推戴。玉必德尔者，乃其国供奉宗神之首，示不欲更立国王也。遂立会议官，以执政事。从此额力西各国效尤，纷纷逐君革爵，设官擅政，风俗政治为大变易。惟亚德纳斯国人，初虽除国王之名，尚立哥德洛斯王后裔，为统领之官，曰阿尔干，势权与国君相等。越三百三十一载，当中国周平王时，国人复议阿尔干官，永执国政与君何异，嗣后州官三年一易。越五十五年，又议每岁分立九官，于任满缺退之时，必述职于民，以定臧否，人皆视为畏途。自后亚德纳斯国人，各自专擅，无复法度。国中诸才智士，复议创造法律，以约束其下。推达拉固主其议，其人性过严酷，纂修法制，罪无大小，尽定斩决，时人谓之血书。越数十载有梭伦者，当周灵王年间，修改律例，归于平允。遂按一国资财之多寡，分尊卑贵贱四等。其四等至贫贱之人，虽不得居官，至有通国会议公务，亦可参预。又恐人多语杂，因建议事厅、大理寺二署。其议事厅定额四百人，为庶民会议之所；其大理寺乃官府会议之所，其官必名望才德，由众推举。此梭伦所定政治章程，各国多效之者。

又有斯尔巴达国，其始亦如额力西，分列小国，而统于一君，历代相传，四百馀载。当周成王时，有兄弟二人者，同登君位，嗣后相传，皆系二君同治，至九百年之久，此事最为奇异。迨秦始皇时，葛黎厄美尼斯王践位，始复改为一君。其国政严禁奢侈，不用银钱，不丰饮食，皆练习武事，故富强善战。国中世守其教，视亚德纳斯国梭伦所立法度，更为悠久。当其时，伯尔西亚回国达黎约王兴兼并之意，又听阿德纳斯国人，诉请报复，步骑十一万，大举来攻。然伯尔西亚承平日久，士卒或习奢过度，或从役劳苦，不能如昔年之劲旅，于是亚德纳斯国中良将，简精锐万人迎敌，大破敌军。逾二十载，伯尔西亚国嗣王名舍尔时者，志图报复，率马步舟三军，数十万众，倾国大举。复攻额力西之亚德纳斯等国，各国齐心盟约，背城力战，破之，水陆全胜。然自后额力西各国，恃胜而骄，所获敌财，彼此侵夺。于是亚德纳斯与斯巴尔达二国，首先背盟，号召各小国，自相侵伐，干戈不休，日至衰微。越九十三载，当周显王时，遂为马斯多尼亚国王袭破，尽有额力西全国。开辟疆土，更广于额力西。其子阿勒山德里王，嗣为盟主。当周显王时，复率步军三万，马军五千，攻服伯尔西亚国，远至天竺诸处，无不归附。屡战屡胜，兼有欧罗巴州亚细亚州之半。迨殂后，其将帅等互相割据，事迹纷繁，建为东都，号君士但丁城。后为土尔其、希腊国所有焉。东汉时始为意大利国所并。额力西国自昔盛时，当周景王、显王时，二百馀载。文名显著之士，不可胜计。百工技艺，皆至精巧，玉必德尔与的亚纳二庙堂，尤天下第一壮观。虽东方各国尚不及诗书文字，绘画工

塑，无不奥妙，而军务尤所讲习，方行天下。至于海表，洵欧罗巴州开创之首国，在意大里之前者也。

欧罗巴洲，古时国最盛者，自额力西外，嗣惟罗马国，一统最久。其创建在成周中叶，其混一在西汉之中，分裂在东晋之末，其宗社全墟，在明景之世，祚历二千余年，自古无其强大悠久。然自昔至今，一兴一衰，为欧罗巴二次大变，亦欧罗巴之大关系也。当周平王时，环意大里亚皆强勇之国，而国王罗母洛者，与邻国战胜时，即收其精锐，归入营伍，并择其军器号令之胜己者，而效从之。每战胜一次，势力愈增，连年练战，上下皆善用兵，纪律严肃。且勤治国政，设立议事厅，选才智百人会议，法度无不尽善。其后四代贤君，国益富强。迨七世之君达尔癸伯者，残忍无道，败乱伦常，通国怒而逐之。嗣后遂不立君，惟推主师一人，以领兵；别推官长二员，代理国务，一年一易，此罗马国之大变局也。自后政事修明，国益富强，越数百年之久。环意大里亚诸部，尽归版图。

惟隔海之加尔达额国，实为劲敌，其国在亚非里加州海滨，以舟楫为贸易事。海滨两岸，皆归其掌握，延及欧罗巴之西班牙地方，遂雄据各岛。而罗马国人，亦畏其水军强盛，不敢阻遏。自后二国，常相抗敌。虽加尔达额风俗甚野，不如罗马国之法度，其兵多招募异乡乌合，亦不如罗马国士兵之纪律，然罗马止长陆战，而加尔达额国则舟舰娴习。迨交战二十余年，罗马国亦学习水战，取加尔达额国遭风漂入之船，以为程式，造成舟师一队。选水师将官，驾驶水战，而获大捷。两国仇忌日深，加尔达额国人有阿尼巴者，世为名将，父子祭神，誓灭罗马。讲习韬略，幼立战功，年三十五岁，即拜大师，引军渡厄伯洛河，逾峻岭，抵意大里亚国，进攻罗马都城。连败罗马之兵，收服各部。奈罗马国有三杰士，竭力战守，一曰发比约马西摩，则坚垒不战，惟游兵清野，佯败引诱，以老其帅。暂为羈縻于前，而亟整御备于后。一曰马尔塞罗，则率兵围困诺拉，收复馀城，以分敌军之势。斯二人者，罗马通国所倚重。至于西北扬，则尤为超卓，不在本国拒敌，而反提军远出，窥加尔达额，国兵大半外出，乘虚深入，随攻随拔，势如破竹，直抵其都。国人望风败溃，阿尼巴闻警，旋师自救，被罗马奇兵邀其归路，舟师迎击海中，全军尽覆。阿尼巴乘渔舟逃归，不得已纳款送质，并立盟约，非奉罗马国之命，永不得擅与别国交兵，时汉高祖六年也。

斯时诸国分而为二，一则为罗马与加尔达额二国之战场，一则额力西国土酋分据之属地，互相争斗。额力西分为三国，一名厄多里亚，一名亚加压，一名白阿西亚，会议立官，而额力西国王，仍为其地之长。其君暴虐失民心，而厄多里亚国人更恨之，乃迎请罗马国之兵至本国，协逐暴君出国，罗马遂胁额力西各处为藩属。厄多里亚各国，自悔失计，复乞师于西里亚国，以驱除罗马。而加尔达额国败将阿尼巴，亦往西里亚国求援，皆因西里亚新兼并犹太波斯，为东方强大之国。故希腊诸部，欲倚之以拒罗马。时西里亚心畏罗马之强，而阿尼巴力言罗马师疲易败，于是出偏师前往额力西，以助厄多里亚国。罗马军迎击败之，乘胜追北，围其都城，西里

亚国亦归臣服，于是希腊诸国皆献土，阿尼巴自杀，时汉孝惠帝五年也。

汉景帝十年，罗马大举伐加尔达额，围其都城陷之，因毁其城，略定其部属。复征服西班牙，置为部属。于是地中海南岸，仅馀两强国未服，一曰宾多，一曰玉占尔达。时宾多国恃有高哥斯山为屏障，兵亦强悍，故与罗马兵相持，二十年之久，始为奇岳所破。而玉占尔达国尤险，遂于汉元封五年，始征服焉。由是地中海南，亚非里加州各国，尽入版图。犹太麦西国，亦俯首归附。其地中海北欧罗巴境，亚马尼、佛兰西、无不臣服。又渡海征英吉利番，建为大部。西土数万里，无复抗颜行者。

然罗马国人民，自裁革王位以后，其议事官，原议一年一易，后因军事难更生手，渐有久于其位者。议事官之后嗣，世沐荣宠，偏庇姑息。其庶民，虽有例许为显职，得遇选举，然其所选，仍皆议事官之后嗣。民间才杰，皆不得进。以此上下人心不睦，且征伐诸国之后，偏染繁华，骄奢日甚。富贵子孙恃势凌人，诸将各拥强兵，悍不驯服，故外患既平，内衅渐启。幸边圉皆有重兵镇压，互相钳制，故国中变乱未作，若非东都西拉之兵，则罗马国早为大将马黎约军卒所擅据矣。先是西拉之兵，与马黎约之兵，积衅交讐，其黠民乘机倡乱，杀高爵子孙，民与绅斗，兵与兵斗，既而兵民绅分党相攻，同时并起，至相屠戮数万。时二大将出征东北夷族者，一曰潘沛，一曰塞萨尔。闻变旋师，共平内难，尽戮反侧十馀万人，国事乃定。于是大权尽归两帅，潘沛曾定麦西犹太各国，立功东北；塞萨尔，曾收服佛兰西英吉利，立功西北。二人威名相等，积不相下。而塞萨兼有文学，尤得民心。潘沛遂起东都兵攻之，为塞萨尔败诸希腊之地。潘沛走死，由是塞萨尔总大政，立法制，罗马大治。有议事官忌之，使刺客杀之。于是塞萨尔之兄子额达唯约，起兵复仇，夺回其国。遂即尊位，是为罗马复立国王之始，时汉建始二年也。是时欧罗巴利亚二州，及亚细亚西境，周回数万里，尽入版图。惟罗马国独立，行政于天下。四国之使，云集于罗马，皆纳款献赋焉。义地约比国，使人求和。巴尔的亚国，昔与罗马深仇，亦使人结盟和好。天竺国命使前赴会盟。其馀各国畏威怀义，无不奉命。水陆无警，兵革休息。于是额达维约王，亲闭仍讷庙门。仍讷者，乃其国之神也。凡有战斗之事，其庙门则启，若干戈宁静，则闭其庙门，以示偃武修文。从此四海升平，人物熙和，为西土极隆平之世。

越三载，当汉孝哀帝建平二年，耶稣乃降诞于如德亚国。罗马国之创始如此。至其文学技艺，古时亦未开辟，惟以兵农是习。迨胜额力西后，尽获其珍奇，嗣服阿细亚各国，复得其积贮。各国文艺精华，尽入于罗马。外敌既谧，爰修文学。常取高才，置诸高位。文章诗赋，著作撰述不乏出类拔萃之人。但除开国数君之外，馀多骄暴败常，视国人如奴仆，且国君既以酷虐待民，而己身又为骄兵所制，既使天下闻名悚惧，而其君反自畏三军，此则罗马国之大势也。初罗马征服各国之后，其边外夷狄，尚未收服，后嗣遂欲穷兵绝域，深入沙漠，穷追至北海，犁庭扫穴，伏尸百万，始能征服。然开地既广，鞭长莫及，国中既皆放辟邪侈之习，加以北地降王

，处之内地，生聚渐盛，报复不忘，各旋其本部，告以罗马人物之富丽，田土之膏腴，复述亲友死亡之惨，以耸土夷愤怒之心，遂倾国奋矛枕戈，并携妻子、奴仆、六畜、器皿，蜂拥四至。所过扫荡，遇室即焚，逢人即杀，肝脑涂地。及晋惠帝时，嗣王以御狄殒于阵。国大震，不得已，乃与之和。自罗马西都，迁于伯拉东都以避其锋，并将西都守河之兵，调赴东方护卫，自彻藩篱，以至故都守备单弱。东晋孝武帝二十二年，复分国为二王，以治东西二都。其后西都，屡为莪时族所侵。宋元徽三年，峨特围罗马西都，王出降，由是西都遂为罗马所据，惟东都仍称罗马国焉。夷酋科多亚塞者遂据西都，即位称汗，宫室焚毁，府库倾荡，阅数百载，倾覆尽矣。唐初回教之摩哈默兴于天方，兼并波斯，其势欲强罗马入回教不从，由是波斯回兵，数侵罗马东境。犹太麦西诸部皆陷，峡东地全归回教，仅馀希腊片土。元末，峡东尽归土尔其，数渡海峡侵罗马，吞其旁邑殆尽。明景泰二年，攻陷君士但丁堡城，罗马遂亡。罗马军旅最有纪律，至今犹传留为法。止因后不守先王之道，勤修政治，专以辟疆黜武为事。盛满必倾，外患骤至，辱国损威，千百年繁华富丽，皆成化外，良可叹息焉。

《欧罗巴各国总序下》曰：自罗马西都陷于夷狄之后，迨当唐中宗嗣圣年间，英吉利南边膏腴之地，归于萨索尼亚夷国；奥卢地，归于法郎古夷国；西班牙，归于厄都夷国；意大里亚及各邻近之地，归于龙巴尔多夷国。于是罗马国之政治、法度、技艺、文学等，扫荡仅存踪迹。政事、律例、风俗、衣冠、言语、人名、国号，尽变夷俗。自后数百年，欧罗巴风俗鄙陋。即显宦缙绅，亦不能读书识字。且因导引诸夷内攻之酋领等，以所得之地，与其大夫将军按职分授，而大夫将军等亦所在效尤，与其麾下分授地方，迫夺民田，迫使佃耕。又各部互相攻击，动辄挟制君上，无复纲纪，于是各国君筹议务结民心，以强己势，而分部酋之权。庶民始立会议公廨，选举官员，经理约束，国政渐变。昔之荒蒙惰慢者，皆讲习以开其智，勤奋以励其身。且夷狄攻破西都时，独东都伯拉未遭倾覆，国中文学事业，仍存一二。迨数百年后，其地又为大市埠。而天竺国之珍奇货物，巧妙工作，多往聚售。意大里亚国，始再与各国来往，复习文学之事。后又与欧罗巴各奉耶稣教之君会盟共逐回回，出如德亚国都。时各国三军或赴如德亚，或归本国，无不会集于伯拉东都，而列西国之生意实赖此创，始宋哲宗绍圣三年也。迨各国干戈休戢之后，有意大里亚国人，曰日威亚者，当元成帝年间，始造罗盘，以便舟行。从此意大里亚各国人，始赴东方厄日度诸埠，收买天竺土产，奇巧各物，归欧罗巴，甚获利益。时元大德年间至明建文帝年间也。

至耶稣一千四百年间，欧罗巴北方之人，无不奋营贸易。是时邻近洲中海之的纳马尔加、瑞典等国，海盗猖狂，及与意大里亚通商，结盟保护，而他方效之。于是亚里曼及佛兰地二国之八十城，亦约盟互卫。邻近别部，亦皆求和好，始公立贸易章程。各埠财物，积贮于佛兰地国之布卢日城及其邻近各城，皆为欧罗巴至富庶之福土。再奉耶稣教各君，往救如德亚之后，因与旧蒙古达尔哥斯丹各王结约，以拒土耳其回国。其奉使赴蒙古者，皆耶稣教中僧人，素好云游四海，远方绝域，无不历

遍。其首赴蒙古记录沿途古迹者，乃若翰加尔宾也。宋理宗淳祐六年，复有数僧赍教主公牒，投蒙古国王，恳其关照保护。嗣后往蒙古、印度等处者益多。迨明太祖洪武年间，蒙古国王达美尔兰者，人甚英武，印度远域，无不攻克。彼时欧罗巴人，已于蒙古部落充当兵卒。后携其火药炮位运用之法，旋归本国，较阿里曼国人所造更精至，是始讲求益善焉。蒙古国王达美尔兰薨后，欧罗巴之奉教诸僧，皆旋本国，遂以印度等东方之富丽丰饶，启发本国人，并言海面水路直达各处。先此西洋舟船，不过游弈亚非里加近处海边，后渐向南驾驶，于明孝宗弘治十年，驶越好望海角，始为赴东海及印度海之水路。彼时西洋人，有日讷瓦国人名哥隆波者，拟由西方而赴东方，国人皆谓孟浪之谈。复稟弗兰西、英吉利、布路亚三国王，亦皆不见用。最后得大吕宋国王赏发银币，备三大船，于明孝宗弘治五年，开行西往，越三十三日探得前途始有洲岛，及临近其地，并非印度，所遇人民言形殊异，即今之亚美里加洲地也。语详后卷，兹不及赘。再罗马国败废之后，欧罗巴余邦皆遭大幽暗，世衰道微，国人卤莽，文学攸斲。迄明永乐以后，复如田禾旱稿，得雨还苏，渐再知教化。况新寻得各洲淳然复兴，创造印撰书籍，百工技艺，交接贸易，故诸史推今世为极盛。

《地理备考》曰：欧罗巴虽为地球五州中之至小者，然各处文学技艺较之他处，大相悬殊，故自古迄今，常推之为首。其地纬度，离赤道往北三十五度起，至七十二度止；经度自巴黎斯第一午线西十二度起，至东六十度止。东连亚细亚，西至亚德兰的海，南统黑海及地中海，北至冰海，东西长约一万五千六百里，南北宽约一万零八百里，地面积方约五百九十一万六千里。

欧罗巴内外共十四海，回环穿绕。其至大者三，一名冰海，为北方之界；一名大西洋海，为西方之界；一名地中海，为南方之界。其余小者十一，一名白海，乃冰海之分派；一名巴尔的哥海，一名北海，一名漫沙海，一名一尔兰大海。以上四者，皆系大西洋海之分派。一名若尼约海，一名亚尔给白拉科海，一名马尔马拉海，一名黑海，一名亚索弗海，以上五者，皆系地中海之分派。一名加斯比约海，此海原天下至大之湖，是以俗名为里海，在欧罗巴之东，与各海均不相通。

欧罗巴地大半在北温道，其居北寒道者，只十二分之一。至于地气则分四等，第一自纬三十五度起，北至四十五度，乃热；第二自四十五度，至五十五度，乃温；第三自五十五度，至六十五度，乃寒；第四自六十五度，至七十二度，乃极寒也。四等之内，或热、或温、或寒、或极寒，皆有损其太过，益其不及。其临德亚兰的海一面之各国，冷则由南而北渐渐加甚，热则有海风解散暑气也。其临地中海一面之各地，冷则乍寒乍暖，不时变易，由西而东，以渐加增。热则随风更变，全无定准。而东方各处，较西方微觉凉爽。其枕亚西亚一面之各处，虽属严凛，然由南而北，无甚参别。热则因其冷之甚，反为炎酷。按四季而论，其第一、二、三等，虽各按时令，然皆有先后迟早之分。其第四等之地，只有二季。居北寒道各处，冰雪凝结，有越三月不夜之天，有数月尤长之夕，日只比晓悬于空中，故冬长而冽，乃因

久无日光之故也。夏短而炎，乃因常有日照之由也。

欧罗巴所产金银宝玉，较之他州虽属微鲜，然其所有铜、铁、铅、锡、煤、水银等矿及盐田，则胜于别处。

欧罗巴一州，地临北方者多，近赤道者寡，故凡热域之草木，实为难得。然而濒地中海各边，凡他州所有卉木百谷，亦皆有之。且诸物中草木五谷，皆以地道为限，莫能到处皆宜。即如阿利祿树与葡萄黍稷之类，产南方者，皆在赤道北三十六度以内，若四一九度外，则全无矣。欧巴离西方诸处，较之亚细亚东方北极出地同度者，颇为卑下。所产草木，甚为悬殊。除四海同生之草木外，其余皆止宜于二方极北之地，至于欧罗巴中央所产者，则凡高山，由巔至麓，树木最繁，花卉万种，然亦只宜此方，难移植他地。橡树在欧罗巴北方甚为高大，名曰树王，榿、松、桤、榆等树，乃北方所共有，黑杨、皂角等树，丛茂成林，亦在北方温道之末，惟松、桤二树最多。赤道往北六十八度外，殆无树木，至四十四度内，皆有。所产五谷，皆足以供欧罗巴一州之人。厄罗斯、伯罗尼亚、里曼等国，五谷丰登，除本国食用外，尚可外运。佛兰西地，苽麦甚丰。厄罗斯、伯罗尼亚、里曼皆有苽麦，意大里种粳稻，土耳其种黍稷。诺鲁威、苏益萨二国，在北方，五谷甚鲜，只有油麦而已。又至六十二度外，则无苽麦，还可。至四十六度，全无果菜。杂处欧罗巴各粮皆有，而南方犹茂盛，柠檬、橘子、阿喇祿果、桑葚、甘蔗等，皆聚于南方。葡萄乃欧罗巴至美至繁之果，或至四十五度，或至五十度，方无。黄麻、苧麻之类，欧罗巴中央用意栽种。桑树惟欧罗巴南方栽种，至于颜料、药材，在热道者较多于他处。其香料，亦生于热道者多，种类不一，然通行常用者，各国山中皆有之。

欧罗巴州所在生齿日繁，种植日甚，禽兽充斥，然较少于他州，尤少恶毒之兽。盖人烟日稠，户口繁滋，是以此一州人，每于恶兽毒虫，务将除绝。所产野兽，近日迹微。但高山尚有熊兽，毛色种类各异，其豺狼、狐狸、豪獾、二猪等，皆生于深山幽谷、旷野丛林之地。其麋鹿、狍兔、松貂、二鼠等，不缺于游畋狩猎之人。至于畜牲日增月盛，且其种昔尚矮小，今则配合于他方，所生皆高之雄骏。其至多者，乃马牛羊犬。至于野鸟，则鹰鹫、鹞鸢遍林皆满，家禽则鸡鸽鸭鹅，不可胜数。孔雀、白鸽、白鹤、乌燕，无不备具。外此或裸、或鳞、或介、或甲，种则繁盛，味则甘浓焉。

欧罗巴一州之人，共约二垓二京七兆七亿口，除回回国外，其余欧罗巴各国，皆奉耶稣教，大同予异，各从其门。

欧罗巴中所有诸国，政治纷繁，各从其度，或国王自为专主者，或国主与群臣共议者，或无国君，惟立冢宰执政者。

五州之内，皆有文学，其技艺至备至精者，惟欧罗巴一州也。其外各州，亦皆有之

，但未能造至其极。如镌刻、地理、音乐等书，通行各国者，皆欧罗巴人所著作。其铸造修制锤表、枪炮、风球、火船、阴晴表、寒暑针等有裨日用之器，及织造各色匹头，大半皆创造于其地。

欧罗巴古为鹵莽之州，后其地因近于厄日度，又连于亚西亚，故额力西国始得离暗就明，弃鄙归雅。且其民人才能敏慧，文艺理学、政治彝伦，靡弗攻修，以臻其至。时有非尼西国人，自亚细亚州至于本州南方，教以贸易事务，建立货局，招募商贾，其后加尔达厄国人始至焉。而额力西国人，遂泛海于意大里地立新国，即罗马也。是时不惟意大里诸地，归其所有，抑且英国及亚里曼等国，皆为其所得。及罗马叛乱之后，为北方夷族夺据，彼时天主教，既由亚细亚入于欧罗巴，又遍布于四方，传国数百馀载。迨夷狄占据后，所建新国非一，其奥卢地，归于法郎西人；其义斯巴尼亚地，归于维西哥多人；其英吉利地，归克萨索尼哑人；其俄罗斯地，归于古斯于的纳维亚人。嗣后，由大尼那威而至之海寇，占据佛兰西国之一部，由亚非里加而至之回人，侵犯大吕宋国之数地，而罗马国则归于天主教王管辖。其昔有各地，大半为佛兰西国所有，更定新国，创业垂统，欧罗巴现在诸国，乃耶苏降生后数百年间，始为建立。

卷三十八

布路亚国，古名鲁西达尼阿，与大吕宋毗连一区。西南俱界大海，东北俱界大吕宋。在耶稣未纪年以前，加达尼晏士侵夺大吕宋时，尚不知有布路亚。迨吕宋为阿丹攻击，割布路亚地请和，旋复兴兵灭阿丹，而夺回之。千二百年〈（宋宁宗庆元二年）〉，吕宋加色代尔部落嫁女于佛兰西之律兴釐〈（律，官名；兴釐，人名）〉，割布路亚地之北隅数部赠嫁。于是兴釐迁居北隅，日渐盛强。复兴师攻取南隅之义斯门、西弥里等处，遂建都于义斯门，立国称王。

千五百年后〈（明武宗正德年间）〉，驾驶舟师，东取沿海，西取南弥利坚洲之摩那济尔地。百馀年后，有塞麻斯田王往侵，布路亚军伍淆乱，自误截己兵，遂大溃。国王没，诸子争立，乞援于大吕宋菲里王，始定王位。自是国事受制于吕宋，边地被侵于荷兰。先感菲里王之德，继成仇隙。千六百四十年〈（崇祯十三年）〉，部众咸愤，起兵驱大吕宋之人，并废前王而改立新王，不受大吕宋节制。传至四代，国事废弛，边境俱失。维时大吕宋之麻密王，深念唇齿，既缔好于英吉利，复释布路亚之世仇，互市通商，故布路亚部落摩那济尔所产之金，始得进口。千八百有七年〈（嘉庆十二年）〉，佛兰西摩那巴底王，遣禹诺领兵往袭，布路亚仓卒无备，遂弃义斯门而走摩那济尔。旋得英吉利之助，始逐佛兰西，复其故都，其子遂即位于摩那济尔。国中官无常俸，不守廉隅。世禄之家，奴使小民，专擅骄纵，如大吕宋兵丁三万无纪律。自纠英吉利兵拒退佛兰西后，留英国兵帅助其训练，始成劲旅，近已不亚于欧罗巴各国。俗奉加特力教，所在多立庙宇。统计教师庙四百所，尼庵百五十所。为人骄惰，虚假鲜实，尚白好洁，贵富贱贫。河道三，鲁罗河之源发自吕宋，历本国之阿波多大市镇而注之海；达俄河之源，亦发自吕宋，历国都而注之海；惟密里俄河，自本国发源。沙中有金可淘，产羽毛、布匹、鱼、盐、煤、金、哔叽、鼻烟。

葡萄亚国即布路亚，东北俱界大吕宋，西南俱界阿兰底海，幅员三万八千八百方里，户三百五十三口，领大部落六，小部落五十，俗奉加特力教。

伊斯里麻鲁那〈（东界俱界阿领底，若西北俱界弥那）〉，领小部落十有二。

晏特釐多罗〈（东北俱界大吕宋，西界阿兰底海，南界特那斯阿满底）〉，领小部落四。

特拉斯阿满底〈（东界大吕宋，西界阿兰底海，南界敏那，北界晏特里多罗）〉，领小部落五。

弥那〈（东界大吕宋，南界伊斯特里麻鲁那，西界特那斯阿满底，北界阿兰底海）〉，领小部落十四。

阿领底若〈（东界大吕宋，南界阿尔牙威，西北俱界依士特里底鲁那）〉，领小部落十一。

阿尔牙威〈（东界大吕宋，北界阿兰底若，西南俱界阿兰底海）〉，领小部落四。

《皇清四裔考》：博尔都噶国〈（即布路亚国，一作葡萄亚，即住澳之大西洋国也。博都噶即布路亚三字转音）〉，在欧逻巴极西境，径七百里，西滨大洋，地分五道。四方商船，皆聚都城。有大河曰德若河，经都城西入海。通国大市凡六，水泉二万五千。国有二学，曰厄物辣，曰哥应拔，欧逻巴高士多出。此中有耶苏会士苏氏者，著陡禄日亚书最精。土产果实、丝绵，多水族，善酿葡萄酒，即过海至中国，不坏。园囿有周数十里者，禽兽充刃，异国名王过其地，往射猎焉。俗有仁会，恤孤寡茆独，商船至，或有死而无主者，收其行李，访其戚属，还之国。王随处遣官为孤子治家，长则还所有，且加益焉。明以前未通中国，雍正五年，表贡方物。乾隆十八年，复贡，命钦天监正刘松龄前途引导至京，召见赐宴。先是雍正五年朝贡，于常赏外，特赐国王人参四十斤，库缎二十五匹，磁器一百三十件，洋漆器六十六件，纸三百张，墨二十匣，字画绢一百张，及荔枝、酒、哈蜜瓜、松糕、茶糕、芽茶、香饼、灯扇、香囊等物，又加赏来使倭缎、磁器、漆器、纸墨、扇绢等物。至乾隆十八年，又特赐国王龙缎四匹，妆缎、花缎、线缎各八匹，百花妆缎十二匹，绫纺、丝各二十二匹，罗十三匹，杭绸七匹，册页一付，玛瑙玉器六件，珐琅器二种，漆器十九种，磁器三十三种，及紫檀、木器、画绢、香袋、香饼、纸墨、扇、茶，又加赏正使画绢、纸墨、扇、茶及文绮，又随敕书赐国王龙缎、片金各二匹，蟒缎、倭缎各三匹，妆缎七匹，花缎六匹，闪缎、花缎、青花缎、蓝缎、青缎、帽缎、线缎各四匹，绫纺、绸各二十二匹，罗十三匹，绢七匹。又因端阳节加赏国王纱四十匹，葛百匹，香囊、香串、宫扇、药锭等物，并正副使葛香囊、香串、药锭等物。盖念其远来，从优锡予焉。二十五年，广东南海县民林六，因缘入教，至于变易服饰，娶妻生子，经两广督臣李侍尧奏准，比照左道惑众为从例治罪，以维风俗，部议从之。其国东境为伊西巴尼亚，又东北为拂朗祭，又东北为法兰得斯，又东北为热尔玛尼亚、博厄美亚诸国。山川风俗见《职方外纪》。初博尔都噶国君乏嗣，伊西巴尼亚之君为其昆仲，乃权署其国事，后复自立君长，不相统属。乾隆初，博尔都噶国人傅作林以天文家来仕中朝，为钦天监。

《海录》：大西洋国，又名布路亚士，气候严寒。由散爹里正北行，约二旬可到国境。其海口南有二炮台，谓之交牙炮台，储大铜炮四五百架，有兵二千守之。凡有海艘回国，及各国船到本国，必先遣人查看，有无出痘疮者，若有则不许入口，须待痘疮平愈，方得进港。内有市镇七处，如中国七府。由交牙炮台进港，行数十里到预济{穴禺}亚，此一大市镇也。国王建都于此，有炮台，无城郭。又由此进则为金巴喇，亦一市镇。凡入中华为钦天监及至澳门作大和尚者，多此土人。又进为窝达，又进为维丢，其余为来鲁，为阿喇加，为渣比，皆大市镇也，人烟稠密，舟车

辐辏，各有重兵镇守。土番色白好洁，居必楼屋，器用精巧，色尚白。凡墙屋皆以灰涂饰，稍旧则复涂之。女人亦以色白者为贵。称王曰理，称世子曰黎番爹，王子曰必林西比，王女曰必林梭使，相国为干爹，将军为马喇亚乍。文官有五等，武官有九等。其镇守所属外洋埔头各土官，即取移居彼处之富户为之，亦分四等。一理民间杂事，一理人间斗争，一掌粮税，一掌出入船艘。本国岁差一文一武，到彼管辖。疆域大者，或差三四人，每大事则六人合议。若所差官未携眷属，则必俟土官四人熟议，合民情土风，然后施行，差官不得自专。若均有室家，则听差官主谋，土官多不与争，谓其患难相共也。

男子短衣窄裤，仅可束身，有事则加一衣，前短后长，若蝉翅然。官长两肩，别镶一壶芦形，金者为贵，银次之。帽圆旁直而上平，周围有边。女人上衣亦短窄，下不裤，围以裙，至八九重。年少则露胸，老者掩之。出必以宽幅长巾挂其首，垂至两膝，富者更以黑纱掩其面，纱极细致，远望之如云烟，价有价值二十金者。手中多弄串珠，富者则以珍珠或钻石为之，男女俱穿皮鞋。自国王至于庶民无二妻者，妻死乃再娶，夫死乃再嫁。凡婚姻，婿家必先计妆奁，父母但以女不得嫁为耻，虽竭家资不惜，而男之有妇与否，则不复计，盖又恃有妇家取偿也。婚不禁同姓，唯亲兄弟不得为婚。寡妇再醮者，虽叔侄亦相娶。凡婚必请于教主，教主许，然后婚。教主者，庙中大僧师也。俗奉天主教，每七日，妇女俱诣庙礼拜。凡娶妻男女俱至庙，听僧师说法，然后同归。男女将议婚，父母媒妁，必先告教主，教主则出示通谕，俾众共知。男女先有私约，许情告，即令各从其愿，虽父母莫能争也。妇女有犯奸淫各罪欲改过者，则进庙请僧忏悔。僧坐于小龕中，旁开一窗，妇女跪于窗下，向僧耳语诉其情实，僧为说法解罪。僧若以其事告知众人，则众以僧为非，其罪绞。凡男女有犯法，恐家主罪之者，至庙中求僧，僧若许为解释，以书告其家主，家主虽怒，不敢复罪也。人死俱葬庙中，有后来者，则掘其先葬，弃诸庙隅，而补葬其处。生死皆告于庙，僧为记其世系，然阅三世后，亦多不知其祖矣。

国王立，不改元，以奉天主教计其年。每年以冬至后七日为岁始，合计一岁而分十二月，不论月之合朔与否，故月有三十一日者。以月借日而光，为不足法也。冬至后五十馀日，国中男女，俱不肉食，谓之食斋，至四十九日而后止。将止三日，妇女遍拜各庙，谓之寻祖先。三日后，则庙僧将所藏木雕教主，置之庙堂，或置路隅，先见者，则遍告以为寻获，次日番僧及军民等，送置别庙藏之。大和尚出迎，穿大衣长至地，衣四角，使四僧牵之，为布幕，其长丈许，宽五六尺，用四竿擎其四角，择富户四人，人执一竿，大和尚在幕下，手执圆镜，中有十字形，仪仗军士拥之而行，见者咸跪道旁，俟和尚过而后起。其女人亦有出家为尼者，别为一庙，而扃闭其门户，衣服饮食，俱自窰进，终其身不复出。有女为尼则其家俱食禄于王，父母有罪，尼为书请乞，轻重咸赦除之。凡军民见王及官长，门外去帽，入门趋而进，手抚其足而嘍之，然后垂手屈身，拖足向后退数步，立而言，不跪。子见父，久别者，亦门外去其帽趋进把父腰，父以两手拍其背，嗅其面数四，子乃屈身拖足退数步，立而言，未冠则不抱腰。早晚见父母，俱执手嘍之，馀如前。兄弟及亲戚

相好者，久不相见，则相抱，然后垂手屈身。见长辈，如见父仪，而不相嗅。长辈而年相若者，亦相抱，唯卑者微悬其足。女见父母，幼则如男，长则趋进，执其手嘬之，退后两手掇其裙，稍屈足数四。见舅姑亦如之。亲戚男女相见，男则垂手屈身拖足，女则两手掇其裙，屈足数四，然后坐。女相见则相向立，各掇其裙，屈足左右团转，然后坐。朋友亲戚路遇，则各去其帽。出外携眷回家，有亲戚访问者，女人必出陪坐语。女人出外游观，则丈夫或家长亲戚携手同行，亦有一男携二女而行者，此其大略也。俗贵富而贱贫，其家富豪，则兄弟叔侄之贫者，不敢入其室，不敢与同食云〈（案：此所述该西洋各国风俗，非独葡萄牙也。以澳夷居中国最久，故《海录》以冠各国，并将全洲风俗系之）〉。

《澳门纪略》〈（乾隆十六年，宣城张汝霖撰）〉：西洋夷居香山澳，自明万历迄今几二百年，悉长子孙。其国上世有历山王，又号古总王，今有二王，曰教化王，曰治世王。治世者，奉教化之命惟谨〈（案：教化王最大者惟一人，驻意大里国总掌西洋各国之天主教，谓之教皇，犹西藏之活佛，非国国有之也。今来粤贸易各国从未有每国各二王之说，此篇所述澳门亦有法王，不过大僧师之称耳。若国中只有一法王，既来驻澳，其本国又安得有法王，岂能遥制数万里外乎）〉。澳寺番僧皆教化类，夷人贸易者则治世类，西洋国岁遣官更治之。澳素饶富，国初洋禁严，诸番率借其名号以入市，酬之多金，财货盈溢，今诸番俱得自市。又澳舶日少，富庶非昔比。大西洋去中国远，三年始至，稍西曰小西洋，去中土万里，大西洋遣酋守之。澳门头目，悉禀小西洋，令岁轮一舶往，有大事则附小西洋酋帅以闻，不能自达也。有地汶岛，在南海中〈（即地间岛，一作地盆）〉，水土恶毒，人黝黑，无所主，大西洋与红毛分据其地。有兵头镇戍，三年一更，遣自小西洋，由澳而后达于地汶，亦岁轮一舶往。澳夷罪不至死者，遣戍之，终其身无一生还者。其行贾之地曰马西，与之约，不得以所产市他国。康熙中，马西背约，私与他国市。澳夷怒，驾舶往所市之国责之。马西患之，遂相仇杀，死者三百余人，市道中绝。今所与市易者，曰哥所达岛，曰葛罗巴岛，曰吕宋岛。凡所往之国，海道不可以里计，但分一昼夜为十更，计由某达某路若干更云。

其人白皙，鼻昂而目深碧不旬，不畜须发，别编黑白发蒙首及颈，蜷然蒙茸，赐自法王，得者以为荣。其通体黝黑如漆，特唇红齿白略似人者，是曰鬼奴。明洪武十四年，爪哇国贡黑奴三百人，明年，又贡黑奴男女百人〈（案：海南太守以摩诃赠陶岷即此）〉。唐时谓之昆仑奴，入水不眯目，贵家大族多畜之。《明史》亦载和兰所役使名乌鬼，入水不沉，走海面若平地。粤中富人亦间有畜者，绝有力，可负数百斤，生海外诸岛。初至时与之火食，累日洞泄，谓之换肠。或病死，若不死，即可久畜。渐为华语，须发皆髻而黄，其在澳者则不蓄须发。女子亦具白黑二种，别主奴。凡为户四百三十有奇，丁口十倍之。

澳城明季创自佛朗机，万历中，总督何士晋令隳澳城台。天启时，徐如珂署海道副使，澳夷奔告红毛将犯香山，请兵请饷，请木石以缮墉垣。如珂昌言于两府曰：此

狡夷尝我也。已而夷警寂然，而澳垣日筑百丈。如珂遣中军领兵戍澳，谕之曰：墟垣不毁，澳人力少也，吾助若毁，不两日粪除殆尽。夷相喑视，自是稍戒心。今城固而庳，大门一，小门三，炮台六，大者曰三巴炮台，列炮二十八，上宿番兵。台垣四周，为砖瓮以置守夜者，台下为窟室贮焰硝。次则东西望洋，两台对峙，东置炮七，西五，余制与三巴略同。娘妈角炮台，在西望洋下，炮二十有六，南环炮台置炮三，噶斯兰炮台置炮七，设火药局于左侧。通计炮七十有六，大者六十一，余差小。铜铸四十六，余铁。其大铜铸者重三千斤，大有余，围长二丈许，受药数石。明时红毛擅此火器，尝欲窥香山澳，胁夺市利，澳人乃仿为之。其制视红毛尤精，发时以统尺量之，测远镜度之，靡不奇中，红毛乃不敢犯。今海宇承平，诸番向化，以此为天朝守海门，而固外围耳。

夷兵头遣自小西洋，率三岁一代，辖番兵百有五十，分戍诸炮台及三巴门。番人犯法，兵头集夷目于议事亭，或请法王至会鞫定讞，籍其家财而散其眷属，上其狱于小西洋。其人属狱，候报而行法，其刑或戮、或焚，或缚置炮口而烬之。夷目不职者，兵头亦得劾治，其小事则由判事官量予鞭责。判事官掌刑名，有批验所、挂号所。朔望礼拜日，放告。赴告者先于挂号所登记，然后向批验所没入。既受词，集两造听之，曲者子鞭，鞭不过五十，亦自小西洋遣来。理事官，一曰库官，掌本澳番舶、税课、兵饷、财货出入之数，修理城台街道，每年通澳金举诚朴殷富一人为之。番书二名，皆唐人。凡郡邑下牒于理事官，理事官用呈禀上之郡邑。字遵汉文，有番字小印，融火膝烙于日字下，缄口亦如之。凡法王、兵头、判事官，岁给俸一二千金有差，理事官食其所赢，不给俸。外红棍官二等，大红棍于夷人将歿时，察其赀财而籍记之，询其人以若干送寺庙，若干遗子女，若干分给亲属，详书于册，俾无后争。二红棍于夷人既歿，有子女俱幼不能成立者，即依大红棍所开应给之数，抚育其子女，而经理其馀财，待其既长婚嫁，举以付之。如无子女，悉归其赀于寺庙。其晨昏讥察如内地保甲者，曰小红棍，兼守狱。狱设龙松庙右，为楼三重。夷人罪薄者，置之上层，稍重者系于中，重则桎梏于下。有土窟委干牛马矢，炷火其中，名曰矢牢，皆无禄。凡中国官府如澳，判事官以降皆迎于三巴门外，三巴炮台然大炮，番兵肃队，一人鸣鼓，一人颺旗，队长为帕首靴裤状，舞枪前导。及送亦如之。入谒则左右列坐，如登炮台，则番兵毕陈，吹角演阵，犒之牛酒，其然炮率以三，或五发七发，致敬也。岁十月肖楮，为红毛夷，缚而走于市，诸番手椎追击之，詈而出，歌而入，晚则焚于野。明季红毛夺澳市，澳夷怨之，每岁有举，所以志之也。

番舶视外洋夷舶差小，以铁力木厚二三尺者为之，镗以沥青、石脑油，钉以独鹿木，束以藤，缝以柳索，其碇以铁力水杪，底二重，或二樯三樯。度可容数百人，行必以罗经。掌之者，为一舶司命。每舶用罗经三，一置神楼，一舶后，一桅间，必三针相对而后行。向编香字号，由海关监督给照，凡二十五号。前数年，尚有一十六号，近年止十三号，二十馀年间，飘没殆半。澳番生计日绌，其夷目舶税，上货抽加二，次加以五，又次加一。小艇曰三板，长丈馀。西洋俗以行贾为业，富者男

女坐食，贫者为兵、为梢工、为人掌舢。妇女绣巾带，炊饼饵糖果，粥之以糊口。凡一舢货值巨万，家饶于财，辄自置舢。问其富，数舢以对，贵微者附之。或数十主同一舢，每岁一出，出则数十百家之命系焉。出以冬月，冬月多北风；其来以四五月，四五月多南风。计当返则妇孺绕舍呼号，以祈南风。脱卒不还，相率行乞于市，乞者常千人。然性侈，稍赢于费，居室服食辄以华靡相胜，出必张盖乘舆，相见脱帽以为礼。

以冬至后七日为岁首，插柳叶于户，人相贺。岁三百六十五日，分为十二分，一分曰沙聂禄，三十一日；二分曰勿伯勒禄，二十八日；三分曰马尔所，三十一日；四分曰亚伯理，三十日；五分曰马约，三十一日；六分曰如虐，三十日；七分曰如略，三十一日；八分曰亚我斯笃，三十一日；九分曰斯等伯禄，三十日；十分曰畸多伯禄，三十一日；十一分曰诺文伯禄，三十日；十二分曰特生伯禄，三十一日。纪年以耶稣始生之岁为元年，称一千四百若干年。四时无节令，春秋亦无祀先礼。庆吊无牢醴币帛之仪，燕饮不修宾主揖让之节，饮酣则掷玻璃盏以为乐。每日晨兴，食已皆卧，闻两点钟而起，暮张灯作人事，夜分乃息。两点钟者日为午，夜为子也。

重女而轻男，家政皆女子操之，及死，女承其业。男子则出赘女家，不得有二色，犯者女诉之法王，立诛死。或许悔过，则以铁钩钩其手足，血流被体而后免。女则不禁，得一唐人为婿，皆相贺。婚姻不由媒妁，男女相悦则相耦。婚期，父母携之诣庙跪，僧诵经毕，讯其两谐，即以两手携男女手送之庙门外，谓之交印。庙惟天主大庙风信，三分番户而司其婚，馀皆否。尤薄于送死，家有丧，号哭不过七日。不炊，亲友馈之食。无棺槨，舁支粮庙公匣至，殓以布帛，覆以罩。僧鸣铎前导，赴素所礼拜之庙而葬之。既至出诸匣，富者入费多，许于天主前穴地槁葬，镌志姓名于石。贫者葬庙外，其富者又分费献诸庙，葬之日，争为鸣钟，其妻子迄无一送者，故僧以日饶。葬逾年，出骨瘞之他所。如尚肉，谓获罪不上升，僧鞭其尸而掩之，需其化而改葬。丧期或一年，或数月，有吉事则不至期亦释服。产子未弥月而夭，遍告戚友，聚而焚香，置诸盘，插花缠彩，送庙中葬之。僧劳其父母以镏，谓之仙童。遇黑奴无道，不匹配，锢之终其身，示不蕃其类也。无族姓亲属，白多玛著《圣教切要》，窃中土五服图，为同姓外亲四代之图，叩之澳夷实瞢如。门供十字架，谓之圣架，诸庙每日卯叩钟以迎神，酉扣以送神，是日三点钟，闻者必蒲伏持咒，虽道路不废（案：所述风俗，亦西洋各国所同，不独澳夷也。故以冠西洋之首）。

《贸易通志》曰：布路牙国民，昔豪于远贾，近日颇怠，其出入之货，每年不过几百万员。英吉利商船往市甚多，每年载八十馀万石，与其国易布帛、大呢。

《万国地理全图集》曰：葡萄亚，在欧罗巴列国之极西，东北连是班牙，东南乃大西洋海，北极出自三十七度三分至四十二度一十二分，偏西自六度一十五分。袤延

方圆十二万八千方里，国甚褊小，居民三百六十三万丁。所有江河，尽皆由是班亚国流出，若土罗、大莪等江是也。产葡萄酒及南果，英商以织造物件易之。每年所进价银七千三百万两，所出价银二百万两。其居民懒惰惮劳，诈伪好报仇。天主教之僧操摄国权，所有田亩多归之，是以积财自肥，而勤劳之农，不得自给。地土丰盛，而耕不勤。其国昔服罗马国，敬奉天主教，后有回回自亚非地征取全国。于元朝年间，其土民自愤，力驱回教，势成鼎足。于明朝时，国王专务算法，深通天文，选能干水手，驶南寻出新地。周绕亚非全地，竟至五印度国，最为西洋各国之向导。国民豪气大兴，冒浪冲涛，视死如归，不远万里，于明世宗年，直抵中国，在澳门踞住贸易通商。嗣后人心渐弛，所有新地马头以及各蕃属，或让给荷兰，或服属是班亚国，气力非昔。然其前世本国之人，在各新地娶妻生子，至今后裔讲葡话，崇葡教，不独流于澳门，尚遍于五印度各地也。其国王现系女主，不专主国政。今设议国政两班贵人，如其议不合众意，则女主所谕，亦不得遵行焉。国都系勒门，在大江边，大战舰能到之处。其殿庙最妙，其街污秽。屡结党乘机杀民报仇。阿破多设大书院，亦出葡萄酒。其国之西亚素群岛，多产南果，天气晴明，风景甚美。

《地球图说》：葡萄牙国，东北界大吕宋国，南西界大海，百姓约三百五十万。都地名力斯朋，城内民二十六万，统属天主教。其百姓昔极兴旺，能与西海通商，今大不如昔，且学校未广，民多怠惰。肤色颇黑，与西班牙国相似。土地膏腴，天时和畅。乾隆二十六年间，是国都城地震，屋宇倾颓，人民泯没者三万人。内有三大江，曰卦地亚那江、太古江、杜以罗江，另有亚非利加大洲之西海三岛，名马太拉岛、亚琐利岛、加法岛，与天竺国网买部内之俄亚城，并中国之澳门岛，均其所属。土产葡萄酒、盐、羊毛、布、油等物。

《地理备考》曰：布路亚国，古名卢西达尼，今称伯尔都加里，在欧罗巴州极西，北极出地三十六度五十六分起，至四十二度七分止，经线自西八度四十六分起，至十一度五十一分止（凡论经线，皆系自佛兰西国都第一午线算起，后皆仿此）。东北二方，皆连西班牙国，西南二方，皆至亚德兰的海。南北一千三百里，东西五百里，地面积方约五万一千二百五十里，烟户三兆五亿三万口。本国除海涯与河岸各平原外，余皆冈陵重叠，络绎不绝。河之至长者六：米虐河、黎马河、斗罗河、窝乌加河、萨阿都河、瓜的亚那河。湖至大者六：义土孤拉湖、勒敦大湖、隆加湖、色砂湖、萨斯卑洛湖、科比多湖。土沃产饶，地气温和，土产金、银、铜、铁、锡、铅、窝宅、水银、煤、矾硫、黄花石、砒石、寒水石、红蓝宝石、紫石英、吸铁石、宝砂、水晶、磁器等。

王位男女皆得嗣立，惟以长幼为序。奉罗马天主教，外国人守寓，或奉别教者不禁。工肆林立，技艺精巧。旧不立国君，惟设宰臣理政。后有非尼西亚国人兴兵克之，旋为加尔达厄国人驱逐，即主其地，三百馀载，又并于罗马。晋义熙五年，又为亚拉与隋窝二国分据。隋开皇五年，遂为哥度国王所取。唐景云二年，回人夺之。

宋绍圣元年，加斯德辣国王，因佛兰西国王之孙英黎给与回人交兵有功，赐以所克葡萄亚之地，妻以己女。厥后英黎给之子，袭职，于金熙宗天眷二年，大败回人，众立为王，是为本国开基之君也。其后历代渐次征服回人，开辟益广。明万历八年，国君绝嗣，大吕宋国王非里卑，乘时举兵占据。越六十载，明崇祯中，国人逐吕宋监守官，自立若翰为君。嘉庆十二年，佛兰西兵来侵，国君走据巴拉西利地。道光元年，复归本国，始立巴拉西利地，自为一国，不相管属。

旧分六部，今为八部，一义德斯勒马都拉部，乃国都也。建于德入河边，由河滨至于高陵，楼台叠起，景色峻丽，四方辐辏。一卑辣亚尔达部，一卑辣拜砂部，一亚零德入部，一亚利牙尔威部，一斗罗部，一米虐部，一达拉斯德蒙部，其国通商冲繁之地，或为内地大埠，或海滨马头。除八部外，尚有数处，归其统属。一亚索利斯海岛，在亚德兰的海，与本国东西相对，共有九岛，是为至大之岛。一马地义拉，一加玻威尔的，一安可拉，一三多美暨比，一莫桑比给。以上五处，皆在亚非里加州。一小西洋暨其属辖各处，皆在亚细亚州。一地门索罗尔等处，皆在南洋海中。

《外国史略》曰：葡萄亚国，于周朝时已通贸易，后罗马国攻服之，以为藩属。汉朝时，国日强，然屡被外国侵伐。唐肃宗时，并入回回国者三百年。宋朝时，攻败回回，军士欢呼，自此立国历二百年。贤王在位，招商航海，望西南而驶，遇岛即据，立新埠，远驶亚未利加沿海地方，渐近赤道之地，触热前进，绕过大浪山，遂抵五印度国，复东南驶一周，仍回五印度，时明弘治六年也。由此散布在南海各岛，于明正德十一年至中国，前驻上川，后至舟山、宁波、泉州，而据澳门。广通商之路，与日本贸易，获厚利。又别在亚默利加州之东南，开藩属国。嗣后国内之教师弄权，五爵恃势，王又好战，万历五年，亲出兵于亚未利加之北，以强伐回回，屡败战死。西班牙闻风即侵葡萄国，强据之，并乘间强取葡萄国藩属地之大半，荷兰亦攻击澳门，垂六十年，百姓大怨西班牙国。明崇祯四年，其大爵公侯，共驱西班牙兵师，国势再兴。据东南亚默利加之巴悉开埠，并五印度数港，与英国连唇齿，广通商市。乾隆十四年，约色弗王，号第一王，即位招贤改政，名扬海外，尽逐天主教擅权之士，而亲自摄权焉。嗣后佛兰西大起兵侵葡国，入据其地，国王逃避巴悉国。英国以婚姻之故，不忍坐视。大军于嘉庆十三年攻胜佛兵，与葡军合阵败敌，尽归其侵地，返其君。道光十四年，国王没，女王即位，与外国联姻，居民连年启衅，国帑尽空，欠项日积，虽将道院之财，悉充公犹不足用。幸其国畏天顺人，颇知自守。

其地东南及大海，西北连西班牙国，北极自三十七度至四十度，偏东自九度至十二度五十八分。其东北与西班牙交界，中亘山岭。其水一自西班牙来之他峨河，一为北方土罗河，大船可入。其谷最丰盛，山水形势最美，天气不暑不寒，故民不染病。其春时于十二月中起，二月多大风雨，四月收谷。但百姓未善耕田，故五谷不给。其嘉美之产，惟红白葡萄。国地方圆千七百二十二里，居民三百五十四万九千馀。

。附近之亚朔群岛，二百二十四里，居民三十九万一千，其面棕色，好作乐，喜游玩，不好饮食。其男之健者好航船，气量甚褊，有怨必报。惟北方之民有礼，厚待旅客，其贵人尤以礼自持。国中富者皆大爵，庶民有财者鲜。

葡萄牙人，固执天主新教，轻耶苏本教。国中教宗大师一位，教主二位，副教主十四位。男道院三百六十处，内居五千七百六十人，岁廩七千六百万圆；女院百三十八间，内居三千零九十三人；岁俸四千五百万圆。此时已籍其道院之大半入官，独存一大学院。土音与西班牙语相同，鲜文士，乏制造。其始建都于利士本，近峨河口，长仅一里，阔半里，无城，在港口建炮台为卫。乾隆十九年，地震，炮台坏，今复建之。居民二十万，建礼拜堂三百处，修道院六十四处。好善之家立病院，每年养病人万有六千，亦有育婴院，每年收婴孩千六百名。近城有道以引水，书院积书册八万本，都城为葡国最大之市埠，本地各行店二百四十家，外国百三十家。每年进口商船万二千只，英国大战舰每停泊焉。博多亦海边港口，居民八万。土罗河边，每年进口船千只，多运红葡萄酒，居民织缎袜等货，街衢洁净。益文邑，居民万八千。哥音邑，居民万五千。国之肄业院在此，学术之士，千五百名。葡国君多与外国婚姻，若办国事，必听命于乡绅五爵，不得径行。所入国帑，共千七百万圆，近时所入更少，其欠项至今仅还十分之一。步兵二万，骑兵三千，水师益少。大战舰二只，中战舰四只，二桅战船六只。

百姓三百五十四万九千馀丁，共八十二万七千馀家。道光十八年，所生之人九万九千零九十七，所死者六万七千五百名，小儿未及七岁者，五十一万名。亚非利加所属辖之民六十八万二千，亚细亚五十七万六千。

卷三十九

大吕宋国，在葡萄牙国之北少西，亦明以来住澳之大西洋也。四围皆山，中央平衍。在耶稣未纪年以前，为加达尼晏所据，开采银矿，政多暴横，居民苦之。时意大利国势方盛，请兵驱逐。因举国归意大利，心悦诚服，虽后值意大利衰微，犹不忍背。四百十八年〈（晋安帝义熙十四年）〉，有完那尔士、曷士二人，聚众雄长，各不相下，血战经年，曷士战胜，遂王吕宋，建都麻特义，设官分治三百载。阿丹国逾海往侵，力不能拒，弃国遁保山林。旋得渣力司马特尔力战三日，阿丹不敢进追，乃割国中部落之半归阿丹，议和。千七百四十年〈（乾隆五年）〉，曷士后裔之华里兰王，始破阿丹，日渐强盛。乘势攻击，获北墨利加之审斯果，继得南墨利加之毕卢，皆产金著名之地；并夺得阿细亚洲之蛮尼那岛，名之曰小吕宋；兼并旁近数部落，为海滨巨国。传至菲利王渐弱，身后诸子争立，牟满求助于佛兰西得立，虽不称藩于佛兰西，而感其援立，如小事大。政事旧归马约里衙门，因专权裁汰，别设士特干西尔衙门正副各一，众推公举，分理其事，以防专擅。后复朋党为奸，佛里王欲革不能，借助邻国始得裁废。近又新设戈底司，以备差遣。

大小战船百艘，护行兵二万五千，水陆兵共三十五万五千，水师先号强悍，后攻南弥利坚无功，遂以不竞。陆兵骁勇，旧甲诸国，百年来亦远不如昔。赋税岁征二千九百九十万员，市廛货物，凡易一手，纳税一次，重征叠敛，遂致萧索。国用岁需二百五十二万五千员，王宫中岁支五十四万员，宫禄七十二万五千员，战船费二百万员，水师兵饷七百二十二万五千员，陆路兵饷千三百二十五万员。常年出纳，有盈无绌，惟意外大兵大役不无匮乏，故国中积欠九万万员。俗骄好斗，不甚遵约束，然性灵巧，工丹青，尤喜音乐。节奏之妙，亚于意大利。国中俱遵加特力教，例禁两歧，有犯者治以焚如之刑。

河道五：达俄河、鲁罗河均源伊墨连山，由大吕宋而至布路亚出海。上游在大吕宋地内者大半，下游在葡萄牙地内者甚短，而舟楫云集，倍蓰于吕宋。俄阿里那河，自那满查发源，至葡萄牙出海。伊浚河，由北隅之加逵墨连山发源，历数部落而至东隅出海。俄斯那尔亏威河之源，发自西腊摩里那山，历数部落，至南隅之鲁加尔出海，商舶所汇聚，土产铅、水银、铁、丝、发毡、毛呢、布、琥珀、棉碱、沙纸。所属之密斯果毕卢，产金银，近已减少。今中国所行洋银，俱吕宋所铸，他国银钱罕。由澳门通市之始，先行吕宋货币云。

《贸易通志》曰：是班牙国，与葡萄牙相邻，其国连年混乱，商旅微少。所运出者，水银、铅、铁、橄榄、油果、红花、葡萄酒、蚕丝、羊毛，每年不过数百万员。〈（此条补入）〉

斯扁，即大吕宋国都，东南界海，西界葡萄牙，北界佛兰西，幅员十八万八千二百方里，户百二十四万八千口。领总部落十有六，大部落八十，小部落四百三十有七

。

纽加塞代尔〈（东界哇领含，西界伊塞那麻鲁，南界唵那鲁社，北界阿尔加色代尔）〉，领大部落七，小部落六十。

加达罗尼阿〈（东南界海，西界阿拉顽，北界佛兰西）〉，领大部落九，小部落三十有三。

阿腊湾〈（东界加达罗尼阿，南界哇领含，西界阿尔加色代尔，北界佛兰西）〉，领大部落七，小部落四十有三。

那哇腊〈（东南界阿腊湾，西界弥斯计，北界佛兰西）〉，领大部落五，小部落八。

。

洼领含〈（东南界海，西界纽加色代尔，北界阿腊湾）〉，领大部落四，小部落二十有四。

母社〈（东界哇领含，西界唵那鲁社，南界海，北界钮加色代尔）〉，领大部落三，小部落二十有二。

唵那鲁社〈（东界母社，西界波底牙，南界海，北界钮加色代尔）〉，领大部落十五，小部落七十有四。

阿尔加色代尔〈（东界阿拉湾，西界里稔，南界钮加色代尔，北界海）〉，领大部落六，小部落三十有七。

弥斯计〈（东界那哇腊，北界海，西南俱界阿尔加色代尔）〉，领大部落一，小部落十有七。

牙釐社〈（东界阿色都里斯，西北界海，南界布路亚）〉，领大部落五，小部落二十有五。

里稔〈（东界阿加色代尔，西界布路亚，南界伊塞特那麻鲁，北界阿塞都里司）〉，领大部落七，小部落四十有八。

伊塞特那麻鲁〈（东界钮加色代尔，西界大西洋，南界唵那鲁社，北界里稔）〉，领大部落七，小部落三十有二。麻育加岛〈（在国东，与哇领社近）〉，领大部落一，小部落三。

弥那加岛〈（在国东，与哇领社近）〉，领大部落一，小部落一。

依委沙岛〈（在国东，与哇领社近）〉，领大部落一，小部落一。

《职方外纪》：欧罗巴之极西，曰以西把尼国〈（即吕宋国）〉，南起三十五度，北至四十度；东起七度，西至十八度。周一万二千五百里，疆域遍跨他国。世称天下万国，相连一处者，中国为冠；若分散于他域者，以西把尼亚为冠〈（案：吕宋在明代甚强，所至攻取各岛，如台湾南之小吕宋，其一也，故分散他域者众）〉。以西把尼亚，本地三面环海，一面临山。山曰北勒捌阿，产骏马、五金、丝棉、细绒、白糖之属。

国人极好学，有共学在撒辣蔓加，与亚而加辣二所，远近学者聚焉。高人辈出，著作甚富。而陡禄日亚天文之学，尤精。古一名贤曰多斯达笃者，居俾斯玻之位，著书最多，寿仅五旬有二。所著书籍，就始生至卒计之，每一日当得三十六章，每章二千余言，尽属奥理。后人绘其像，两手各持一笔，彰其勤敏也。又有一王名亚丰肃者，好天文历法，精研诸天之运列宿之躔，撰成历学全书，世传岁差本原，皆其考定制，为一定图像，为今历家大用。又将国典分门定类为七大部，法纪极备。复取天主古今经籍有注疏者，不下千余卷，遍阅至十有四次，又纂本国自古史书。以身亲国政之人，傍及著述，种种如此，后世称曰贤王宜矣。此国人自古虔奉天主教，最忍耐，又刚果，且善远游海外，曾有绕大地一周者。

国中有二大名城，一曰西未利亚，近地中海，为亚墨利加诸舶所聚，金银如土，奇物无数，又多阿祯利果，有一林长五百里者。一名多勒多城，在山巅无泉，下山取水甚艰。近百年内，有巧者制一水器，能盘水直至山城，不用人力，其器昼夜自能转动也。又有浑天象，其大如屋，人可以身入于其中，见各重天之运动，其度数皆与天合。相传制此象者，注想十七年，造作三年，曾未重作一轮。其境内有河，曰寡第亚纳，伏流地中百馀里，穹窿若桥梁，其上为牧场，畜牛羊无算。有塞恶未亚城，乏甘泉，从远山递水，架一石梁桥，上作水道，擎以石柱，绵亘数十里。又一都城，悉皆火石砌成，故本国有言以西把尼亚有三奇：有一桥万羊牧其上，有一桥水流其上，有一城以火为城池也。

国中天主堂虽多，而最著者有三。一以奉雅歌黔圣人为十二宗徒之一，首传圣教于此国，国人尊为大师大保主。四方万国之人，多至此瞻礼。一在多勒多城，创建极美，中有金宝祭器，不下数千。有一精巧银殿，高丈馀，阔丈许，内有一小金殿，高数尺，其工费又皆多于本殿金银之数，其黄金乃国人初通海外亚墨利加所携来者，贡之于王，王用以供天主耶稣者。近来国主又造一瞻礼大堂，高大奇巧无比，修道之士环居焉。其内可容三国之王，水泉四十馀处。堂前有古王像六位，每位高一丈八尺，乃黑白玉琢成者。堂内有三十六祭台，中台左右有编箫二座，中各有三十二层，每层百管，管各一音，合三千馀管。凡风雨波涛，讴吟战斗与夫百鸟之声，

皆可模仿，真奇物也。又有书堂阔三十步，长一百八十五步，周列诸国经典书籍，种种皆备。即海外额勒济亚国之古书，亦以海舶载来贮于此处。其地原系旷野山林，后因造此堂，鸠工住集七年，遂成一城云。

以西把尼亚属国大者二十馀，中下共百馀。其在最西者，曰波尔杜瓦尔，分为五道。向有本王，后因乏嗣，以西把尼亚之君系其伯仲，乃权署其国事焉。其境内大河曰得若，经都城里西波亚入海，故四方商舶皆聚都城，为欧罗巴总会之地也。土产果实丝绵极美，水族亦繁。所出土产，葡萄酒最佳，即过海至中国，毫不损坏。国中共学二所，曰厄物腊，曰哥应拔。其讲学名贤曾经国王所聘，虽已辍讲，亦终身给禄不绝。欧罗巴高士多出此学，近有耶稣会士苏氏，著陡禄日亚书，最精最广，超数百年名贤之上，其德更迈于文。国都又有一地，界两河间，周围仅七百里，为高士聚会修道之所，有一百三十处，又有天主堂一千四百八十所，水泉二万五千，大方石桥二百，通海大市六处，由此可见其地之丰厚也。侯家苑囿有周数十里者，各种禽兽充刃其中，异国名王过其地者，往射猎焉。随处立有仁会，遍恤孤寡茆独，或给衣食，或助赀贿，或保护其家，或葬死者。商舶至或有死而无主者，则为收其行李，访其亲戚还之。种种仁事，他国虽各有会，莫如此中之盛。此外国王随处遣官，专抚恤孤子，理其家产，广其生殖，长则还所有，且增益焉。欧罗巴初通海道，周经利未亚，过大浪山，抵小西洋，而至中国贸迁者，从此国始。详见别纪。

《海录》：大吕宋国，又名意细班尼惹，在布路亚北少西，由布路亚西北行，约八九日可到。海口向西，疆域较布路亚稍宽。民情凶恶，亦奉天主教，风俗与布路亚略同。土产金银铜铁，多罗绒、羽纱、哔叽、蒲桃、酒、琉璃、番碱、钟表。凡中国所用番银，俱吕宋所铸，各国用之。佛朗机国，又名佛兰西，在吕宋北少西，疆域较吕宋尤大，沿海舟行四十馀日方尽。由吕宋陆行，约二十日可到。民情淳厚，心计奇巧，所制钟表，甲于诸国。风俗土产，与布路亚略同，亦奉天主教。所用银钱，或三角，或四方，中有十字文〈（案“意细班尼惹”，即“以西把尼亚”，音同字异）〉。

《万国地理全图集》曰：是班牙国，东连佛兰西国，西交葡萄地，南北及海而有海峡，隔绝亚非海滨。北极出自三十六度，至四十二度四十分，偏西九度十七分，至偏西三度十七分。方圆五十三万九千方里，居民千三百七十三万丁。其地之山成三带，自东而西通行，其最北者至长，分全国为三方。其北地崇山峻岭，夹以溪涧，无处可耕；其中央乃国都，天气燥暴，雨水罕得，草木不登，惟牧羊而已；其南方晴和，所产瓜果及所畜羊马驴骡，甲于他国。国民骄豪敢战，在家好逸惮劳，饮食节用。其五爵形容清俊，视庶民如草芥，但多贫乏，徒恃世爵之威，有名无实。男女并好弹琴歌舞，又好斗牛。古时国属罗马，后被东方回回突来攻夺，勒百姓改奉回教，于是回军操权，立国历七百年，占据南方。然天主教人不服，后世兴兵复仇获胜，剿灭回回，靡有子遗，独留其岩堡及殿廷瓦砾而已。明孝宗四年国王遣船寻

新地，赴到亚墨利加国，得其地金银之山，自开矿冶，每年所出之财无数。彼时是班牙国之富强，几为欧罗巴洲之冠。特其上下恃富而骄，内不勤生，外不修武，于是佛兰西国兴兵争之，英吉利又兴兵争之。吕宋屡战不胜，其战舰或被英夺，或沉于水，尽驱是班牙军，夺其产金银之地。所存者，东惟吕宋，西惟古巴而已。于嘉庆十二年佛兵侵国，居民同仇，英兵来助，协力击退，其民久经战斗，常有变国家之意，又择五爵绅士以办国政，现嗣位者乃国王之女。国饷银每年千八百万两，其兵八十万丁，陆军每年七百九十五万两，水师四百三十二万两，理刑名官各员，四十万五千两，文武三十二万四千两，王宫百五十一万五千两，国家欠项四万八千万两。前此恃外来之财，今金银产地皆失，故国用甚窘。国事惟僧是从，以僧为议士，各处建高大之殿庙，而设天后与各圣人之偶像，群会赛神拜像。其亩田屋宇，亦多为僧所据。随时施济，以市人心。其教主众民敬仰如帝君，为天主教最盛之邦。昔修道避世之男女几千万，此时异端渐废，国家籍其产业入官。其国分二十五部，国都马特，乃新城，内建大殿，有如城邑，费金无算。但其地沙野，草木不登，内地所有巴牙突、撒接曼加、瓦刺多勒等城，昔人户甚繁，今废衰。北海边威我、北破亚等城，有嘉海口，经理通商，在地中海边，巴耳所罗那以及加特等埠头，运出南果、酒油等货甚丰。加那他，昔乃回回之都，多古迹。多勒多与西味里，城广大，居民不少。国南两大岛，南果所产。

《地球图说》：大吕宋国，东南并界地中海，西界葡萄牙国，北界大西洋并佛兰西国，百姓约有千三百九十万之数。都城名马特城，内居民二十五万，宗天主教。民之文者弹琴行乐，武者斗牛尚勇，火轮船与火轮车亦少。国之北有崇山峻岭，中央高燥，草木难生。以牧羊马驴骡为业，天时和畅，果实倍繁。惜十馀年来，君民不睦，不时叛逆，现今国君是女主。又其南与亚非利加相近之处，有高山，上有炮台，现属英吉利管辖。再南方有地名义人答答，亦被英吉利占据。有江五：一伊伯罗江，一加大怪法江，一卦地亚那江，一太古江，一杜以罗江。虽大而浅，舟难深入。东南有三岛：一马实耳加岛，一米诺耳加岛，一伊非加岛。外此又有西印度之二岛与亚非利加之加拿利岛，并中国之小吕宋岛，均是国所属也。产葡萄酒、蒲提、子羊、毛布、绸缎、百果。

《地理备考》曰：大吕宋国，古名“意卑里亚”，今称“义斯巴尼亚”。在欧罗巴州西南，其国土在北极出地三十六度起，至四十四度止，经线自东一度起，至西十二度止。东南至地中海，西连葡萄牙国暨亚德兰的海，北接加斯哥尼海湾。西南距东北约二千四百五十里，东南距西北约二千零八十里，地面积方约二十一万八千七百六十里，烟户一京三兆九亿口。崇山峻岭，络绎不绝。河十二，注于亚德兰的海者七，注于地中海者五。湖三，一名亚尔不非辣，一名伯乍尔，一名加罗于达。平原山谷，靡弗膏腴，谷果丰登，禽兽蕃衍。地气冷，中热南暑。土产金银、铜、铁、锡、铅、水银、窝宅、煤矾、硝磺、矾砂、石膏、花石、砺石、青石、火石、蓝绿宝石、钻石、红玉、碧玉、玛瑙、琥珀、水晶、紫石、英石、榴珠等。王位男女皆得临御，惟以长幼为序。奉罗马天主教，严禁旁门。工作技艺，较欧罗巴州各

国稍拙，然工肆亦不少。通商贸易，陆少水多。在昔为加尔达厄国人所得，汉初归于罗马国。罗马衰弱，遂为北狄侵占。隋开皇末，为维西哥多人所取。唐睿宗时，又被回人侵据。彼时本国将军伯拉约者，乘回人不睦，遂激励遗民奋起驱逐，获大胜，众立为王，是为本国开基之王。后世渐扩邦土，分建数国，协力逐寇。明宪宗成化十五年，亚拉冈之君，既娶加斯德辣后，遂将列国归于一统。迨亚拉冈薨后，奥斯的里亚国大臣加尔罗斯者，以王婚嗣君位。康熙三十九年，加尔罗斯王薨，无嗣，遗命传国与佛兰西国王之孙非里卑。是以佛兰西与奥斯的里亚二国举兵互争，究为非里卑所得。嘉庆十三年，被佛兰西国王那波良者占据，立其弟为君。自后布路亚、大吕宋、英吉利三国，合军挫敌救之，复立前王之子非尔难多为君。迨道光十三年薨后，其女即位，乃大吕宋国现在之女王也。大吕宋国昔分十二国二部，今则连国外海岛，四十九部。

其国通商冲繁之地，内地大埠十，海边大马头八。除四十九部外，尚有数地归其统属，一搜达，一北嫩德威勒，一亚虑塞纳，一美里黎，一加拿里。以上各处，皆在亚非里加州。一固巴，一伯尔多黎海岛，皆在亚美里加州。一名小吕宋，一马黎纳海岛，皆在南洋阿塞亚尼州。

又有大吕宋属国曰“安多勒”，在其国之加达鲁尼部极边，山坡小谷之中，为塞哥勒河分派，巴利拉小河所穿者。其地长宽皆不及七十里，佛兰西国王与大吕宋国王，互相覆庇，其官除国人自立会议官一员外，尚有佛兰西国王与大吕宋国王派委理事官二员。其人民以土产材木及制造铁器，易谷果与日用所需各物。会城建于巴利拉河边，烟户约二千口。

《外国史略》曰：西班牙国，自古由海滨开垦，渐通贸易，后在北亚非利加州之甲他哥国设新埠，既而为罗马军所据，土人随其风俗语音者四百年。东晋恭帝时，有夷人自东至西，战胜据其全地。唐睿宗年间，回回人侵取南方与北方，崇天主教之民，力战七百年，不分胜负，回回之焰稍衰，而西班牙之势正旺。明弘治间，遂尽逐回回兼并列国，独称雄焉。维时各国各寻新地以通商，西班牙有驶西海之船，初抵亚墨利加州立新国，每年收银不下千万，亦时并旁国，名扬海外。其国专务天主教，其僧及其教司，皆统管庶民，有不信者，重罚。于是荷兰、英吉利两国，崇老教，与西班牙军力战八十年。荷兰获胜，然是时西班牙权在亚墨利加南北，地愈广，财日裕，又据吕宋群岛，传天主教。康熙三十八年，国衰，君废，改立新君，其国再兴。所通商半属英船，布帛呢羽等货，皆赴西班牙国。其国旧禁银出洋，因此生衅。西班牙结佛兰西军，共击英人，乃佛国之新君波那良，竟诱西班牙之君，至国逐之，而立其弟，以君西班牙国。其民不顺，英国助之，复立前王之子，时嘉庆十三年也。道光十三年，国主卒，其女摄权。固执新教，变乱未定，国帑如洗。其民有财者不肯借，而亚墨利加南北各藩属地，复尽驱其主而自操权，财涸军废，然固执天主教，终不悔悟也。

西班牙与葡萄牙为半土，东北连佛兰西，西及葡萄牙，南及地中海，与亚非利加州相隔，北及西班牙海。北极出自三十六度，至四十三度四十七分；偏西三度十七分，至九度十七分。地多山，北方山尤崇峻。中高气燥，水少草木不生。南方多晴，产物丰盛。东北界佛兰西，有险阻为保障。南北海港，大船能入。河曰他峨河，长百二十里，西流至葡萄牙国入大洋海。以伯罗河，长百里，西南流入地中海。危亚地那河，长百里。危他其威河，长六十里，皆南流也。国内无运河，货物难通；又无往来之路，故国帑如洗；道途不修，故防范难恃。其民人千二百五十七万，此际渐减。以其君禁不信天主教，即不准居住。后在藩属地之人，大获利迁徙益众，以故居民益少。

其爵之名，最多，为上下爵。其上爵最古，有产业权势，其下爵与庶民无异。男女入寺，往往遂绝俗不出，在内参禅。立修道院，盛财帛，招贵人入院念经。天主教之院，几占地之大半，甚殷裕，有权势，尊贵者，罔不畏之。自佛兰西侵后，道院之势渐衰，遂籍其产入官，以充公费。然道院中之教师，庶民至今引领焉，屡唆是非，使民不安。地方褊小，财帛不多，然可足食。全地半垦为田，半归五爵，其三分之一，归在城绅士，其六分之一，归道院之僧师。南方出米，并橄榄油、葡萄酒，不甚产木，其山产水银黑铅。民无巧思，少制造。其亚墨利加之生理，前获厚利，今则为各国所分，生意微少。其教师不好文，故儿童多不入学，女鲜识字。国内立大学院十七间，以神道设教。居民大半棕色，眼有光明，好施济，重礼拜，故罢工之日多，暇则以斗牛为戏。南方女多美。西班牙人崇天主教，祈祷念经，口内长称其名，临危时即恳吁马利亚之名，以为凭信。其民好逸而惮劳。

乾隆五十六年，各口入货银九千万圆，由藩属国运入者，八千三百万圆，其中金银四千四百万圆；外国所运出者，银四千九百万圆，藩国所运出者五千三百万圆，其岁收藩属金银之贡，三千五百万圆，杂货价值银二千万圆。然国帑犹时时缺乏，所立通商之公班衙久歇，于道光十八年外国所运入者，六千万员，运出者银二千六百万圆。铅山每年出五十万石，水银二十四万石。嘉庆三年，谷果计三千万圆，牲畜价银四千六百万圆，所出之矿四千三百万圆，杂货银千四百万圆。

国内设教主、教师、副教授、教先生、小教师、副师、修道、男女僧并教师等，一年所收之田共六千万圆，礼拜堂庙寺，共二万八千二百四十九间，修道之男女居焉。教师财日盛，权日重，屡与国抗，或反为所败。

国都在中地，曰“马特城”。居民十九万五千，地皆平坦，高于海二百二十七丈。内建礼拜堂七十七间，修道院六十二间。国君并朝臣居此，设大学院各术之堂十八间，以广志识。巴悉罗那城在地中海滨，居民十二万，港口极广，但水浅，大船不得入。其贸易甚盛，每年进口船千五百只，所出入货价计银千万圆。居民善造火器，花布丝缎。在海边，有军局铸火炮之地。别设病院、养婴院。悉威刺邑，居民九万六千，周三里半，有十二门，礼拜堂三十间，制烟之人千五百名。铺七百间，织

绸缎。城内设大学院，学生七百八名。加那他邑，居民八万，前回回族所建之城也。加得邑，居民七万，在地中海边，此港最广。昔与亚墨利加人于此大通商，四方立炮台，近地多产葡萄。瓦林西亚邑，在河边，山水清美，为一国之最。土田丰产，居民六万，其中二万二千织绸缎。马拉亚邑，在海边，亦通商之地。有甘葡萄酒。可多瓦邑，居民三四万。

西班牙今之女王年尚少，其母妃督同大臣代摄国事。居民千二百二十八万，城百四十五座，共万八千八百七十方里。全地分四十三部，外有在北亚非利加海边之城，在南方之岛，在西北之岛，在亚墨利加之岛，在吕宋之群岛。惟其臣不善理国帑，公项积欠五万零七百万圆。其利息至今未还，大累他国之债主。道光十九年，计所费用银五千万圆，文官百万圆，刑部二百三十万圆，内国务千四百万圆，军士水师九千六百万圆，欠项利息三千八百万圆。道光二十二年，国费至银万万圆，所收者六千二百万圆，其欠项一百五万圆，所入不敷所出。

步兵六万七千，炮手凡七千八百，军机营兵千二百，骑兵万三千，后营四万，尚有民壮五十营。军势虽广大，奈不能抚驭百姓，屡有叛衅。此时水师渐衰，仅数号兵船，朽烂在港口。

卷四十二

《地球图说》：佛兰西国，东界意大利国，并瑞西国、亚利曼国；南界地中海，并大吕宋国；西界大西洋海，北界英吉利、荷兰二国。百姓约三千三百五十万，都城名巴勒城，城内之民九十万，大半宗天主教，小半耶稣教。教民习礼仪，交接极殷勤。其言语系欧罗巴之官音，故列国官长统识其语。道光二十七年，民叛，国王逃避于英国。国民又自专制，不复立君矣。国南土地膏腴，天时和畅，果谷极盛。国之西北，土地硗瘠，草木难生。国中多书院，以习文武技艺，又设养济院，以济贫民。有大江四，即罗尼江，罗亚利江，西利江，伽伦江是也。产绸缎、葡萄酒、香料、酒、磁器、自鸣钟、时辰表、洋绒布、绵布、呢、羽毛、麻布等货。

《地理备考》曰：佛兰西国，古名奥卢，又名牙里亚。在欧罗巴州之中，北极出地四十二度二十分起，至五十一度五分止；经线自东五度五十六分起，至西七度九分止。东至巴敦、苏益萨、萨尔的尼等国，西统亚德兰的海，南接地中海暨比里牛斯山，北连满沙海暨北尔日加国。南北相距约二千二百五十里，东西相去约二千零六十里，地面积方约二十七万里，烟户三京二兆口。西北丘陵寥寥，平原甚广。东南二方，峰峦参天。河之至长者二十有一，湖之至大者则九。西北湿寒，东南燥暖。田土皆饶，生殖茂盛，土产金、银、铜、铁、锡、铅、水银、窝宅、煤、盐、信矾、宝石、钻石、白玉、水晶、花石、石膏、银朱、磁粉。王位历代皆男，册立以长。奉罗马天主教者十之九，奉别教者十之一。外国寄寓，所奉何教听其自便。工巧艺精，匠肆林立，商贾辐辏。

原本国在昔为塞尔达人所居，汉元帝初，被罗马国征服。迨罗马衰，又有北狄侵扰其地，南方各部，则为维西哥多人所取，西方各部，则为布尔给农人兼并，其余各部，皆归于发郎哥人。齐高帝建元三年，发郎哥首领戈罗维斯者，既逐各狄，遂据呀里亚国，自立为王，建国号曰发郎萨，即佛郎机国所由名也。天宝间，嗣王被废更立，冢宰北北诺为君，传及其子，不惟通国尽归掌握，而且西方各地，三分有其二焉。宋太宗时，王歿无嗣，国人更立公爵武额加卑多者为君，传至加尔禄斯薨后绝嗣，更立第三次非里卑之孙为君。于时英吉利国王有舅甥之亲，觊觎分封，乃举兵索地，至其孙加尔禄斯王立，干戈始息。乾隆三十九年，传至第十六次卢义斯，国势大乱。至乾隆五十七年，乃裁革王爵，更立会议官员，办理国务。越七载，又改立领事官三员，其首领名那波良者，因有弭乱除暴功，将勇兵强，平定国家，嘉庆九年，国人共立为王。嘉庆二十年，与英吉利等国战败，国人复立前王卢义斯者为王。及薨，国人更立其弟加尔禄斯为王，在位九载，因乱被废。道光十年更立卢义斯非里卑为王后，又两立两废。道光二十七年，遂不立君，仍复旧制，立领事官。旧有三十三部，大小不等。今改八十六名，或以经流之河为名，或以相近之山为名，其序如左：

第一部，壹里亚德佛兰萨，改为五府，一名塞纳府，乃本国都也。建于塞纳河两岸

，宫第雄丽，庠序美矣。桥梁街衢之宽直，园亭之雅致，四时山水，景色尤佳。制造精良，商贾云集。

第二部，法郎德勒，名诺尔府。第三部，亚尔多亚，名巴的加雷府。第四部，比加尔的亚，名索美府。第五部，诺尔满的亚，改为五府。

第六部。第七部，罗勒纳，改为四府。第八部，卖内，改为二府。第九部，安如，名卖内罗亚府。

第十部，北勒达尼，改为五府。第十一部，波亚都，改为三府。第十二部，可尼，名下沙兰德府。第十三部，森当日昂姑木亚，名沙兰德府。

第十四部，耳里亚内斯，改为三府。第十五部，都勒内，名音德勒罗府。第十六部，北利，改为二府。第十七部，尼威尔内，名聂维勒府。

第十八部，布尔波内，名亚列尔府。第十九部，马尔世，名哥留斯府。第二十部，黎木性，改为二府。第二十一部，科威尔内，改为二府。

第二十二部，亚尔撒斯，改为二府。第二十三部，法郎师官德，改为二府。第二十四部，不尔科尼亚，改为四府。第二十五部，里科内，改为二府。

第二十六部，德尔非内，改为三府。第二十七部，布罗温萨，改为四府。第二十八部，郎给德，改为八府。第二十九部，佛亚，名亚利日府。

第三十部，卢西隆，名东北里牛斯府。第三十一部，马耶内，改为九府。第三十二部。第三十三部，哥尔塞牙，名哥尔塞牙府。

其国通商冲繁之地，在内地大埠十七处，海滨马头十一处，除八十六府外，尚有所属地方在于各州之内，后释其州，再为详明。

《外国史略》曰：佛兰西国，古时亦山林之蛮夷，久渐向化。然性好勇，建屋不筑城，恶其障蔽拘禁也。战胜则取敌颇为酒器，使奴婢务农。以羊牛乳酪为生，衣其毛。女年将许嫁，则父母多招少年宴会，视女所爱者，以洗盘送之，即定聘焉。其丈夫操女之生死，随意可休妻，若女与人苟合，则其刑重，男誓报仇。然始严终怠，久亦渐逾禁矣。其教奉耶稣，以为天地之大主，不得以人之舍宇蔽之，故不建庙，每藁树间，以为神之居处也。人性猛烈，不肯安坐，好远游掳掠。于周安王时，侵罗马国之地，为所败。后破希腊国，又结群渡海，据英国之苏各兰岛。今其岛山内之顽民，皆其遗种也。佛兰西之南方，人多为商。往岁侵罗马国之役，其民尽出，日耳曼列族乘虚内侵，大获胜。而意大利者，亦夺其北方之地。

是时罗马国与佛兰西相仇，战争六十年。奈罗马之将军，名震海外，佛国难与之抗，因求和焉。汉宣帝时，罗马至佛国立新埠，且教其居民，服教化，遂变其土音皆习罗马国之语。垂二百年，通贸易。忽有中国东北方游牧之匈奴族类，举兵西向，戮杀男女老幼。而日耳曼，又渡河据其国，瓜分其地，列土操权。于唐元宗时，回回人来侵，佛国并力击退。于时佛国之大甲利王，与弟共励国政，武勇胜敌，迭举兵攻服未向化之撒逊回族，使归天主教。是时意大里国内乱，甲利王又率兵往取地大半，又侵西班牙国，击退回族，又与罗马教主议，再复罗马西，都之君号。甲利王虽久历战场，而好文教，招贤讲学，赏功绩，尚名分，智勇两全，为西海贤王。薨后，其子孙不能承先志，互战生衅，绝日耳曼之好。其爵士各据一方，海贼亦入攻其城，国势日弱。及元泰定四年，因藩国酋长僭号，佛君因减五爵之权，削其地，由是衅隙复肇。又与犹太国回教交战，数百年，阵亡满路。传至路义，号第九王，屡击回回，始则被虏，费十万金自赎。反国发愤修政，再攻回回。复疫作，军士多亡，赖非立王与罗马之教师，尽力战胜，于是佛国之众，推非立王即位。英吉利亦觊佛国之地，连年攻战，获胜，遂入其都。忽有佛国童女，激劝军士，众谓天助，奋力驱敌，英人乃退据海滨。嗣路义第十二王亦好战，与日耳曼交战，被虏赎回，是明正德十一年也。万历二十六年，显理第十三王即位，因国中克力斯顿之天主教与波罗斯特之耶稣教不和，争战，乃示谕各居民，崇拜上帝，各随所愿，民悦服，战息。旋被弑。

顺治元年，路义第十四王即位，五爵敬服，攻战屡胜。与邻国联盟，而英国为盟主。康熙五十四年，路义第十五王即位。乾隆三十八年，路义第十六王即位。皆不修政事，国库耗于妃妾，乃议增饷，以补国用，民心不服。正与欧罗巴列国交战，有将军那波伦者，佛国英雄也。乘虚擅权，百战百胜，威声大震。于嘉庆八年，篡位称尊号，在诸国以上。与英吉利、西班牙、破路斯、俄罗斯等国，战无不胜。于嘉庆十七年，倾国往攻俄罗斯国，长驱直入其都，被火焚溃而退。冰雪交侵，饥殍满路，于是俄罗斯与破路斯国连和合从，以驱佛军。日耳曼国又乘其后，又协英吉利东国等，合攻佛国。于是那波伦失位，退居小岛。复纠其馀党复国，英人又合破路斯军击之，那波伦败降，遂谪死于海岛，时嘉庆十九年也。其旧王再即位。及道光十年，众又不悦，作乱驱其君，嗣王号曰路义非立。至道光二十七年，复废，遂不立国王。

佛国为欧罗巴最美之邦，西南两际海，西及西班牙海隅，南及地中海，东连日耳曼列国，东南及瑞士、意大里等国，北及北义国。北极出自四十二度四分，至五十一度十分；偏东自八度二分，偏西四度四分。沿海无多港口，南有黑云海隅，在西班牙及佛国之间；西北必当海隅，北有那耳曼海隅。在地中海，佛兰西所属之撒丁岛，名曰各西甲。南流之罗尼河，长五十二里，两岸丰盛。西方之牙伦江，长五十里。罗亚利江，长八十里，其岸多葡萄。西北有西尼河，国都在焉，曰巴利。临瑞土地有白山，为众山之冠，高一千四百八十一丈，尚有峰高六百丈。在西班牙、佛兰西交界，又有溜山，高稍次之。其北山则平坦，四面环绕，负山表海，是以敌国难

侵。物产五谷，仅足自给。民嗜曲，亦种葡萄，最重于欧罗巴各国。遍地种葡萄，计二万顷。所出之酒，三万五百斗，六分之一为火酒。最美者为红葡萄酒，各国皆贵售之。计所产物，每年价银万四千四百万圆，运出者约千六百万圆。南方出橄榄油，最清贵。少林木，所需材料，多购自异国。田亩计二十三万顷，其中五十分种五谷，九分为草场，四分葡萄埔，十四分林，一分果木蔬菜园。计铜、铁、煤、锡、矿厂五百二十处，采矿者三万人。南方出丝，不足给用。海中渔舟最繁。其民奉天主教，旧有斋戒之例，男女皆食鱼，禁食肉。今则天主教稍息，而斋戒者亦少，故鱼之用，迥不如前矣。人多巧思，制造精妙。每年所造呢羽，计银一万零五百万圆。运卖他国者，七百万圆。其铜铁器及时辰表尤妙，花纸有名，磁器亦珍重，皮靴鞋极佳。每年所造各物，约六万万圆。国中贸易，每年陆路万五千万圆，水路二万三千万圆，运进银二万三千万圆，运出价银二万七千万圆。每年进口本地船四千八百只，外国船亦如之。渔舟万五千只。

城中学馆最大，又民间小学二万八千九百六十三所，学生计二百二十馀万名。其大学院三百五十八所，学生三万三千名，会学院一百所，学士二万三千六百名。

佛国素称知礼，他国皆就学焉。民谦和，喜舞蹈，性反复机变，终日歌舞游乐，男女佚荡。军士尚勇好战，陆兵有名，水师则屡被英吉利、荷兰所败。嘉庆年间，英国以战舰封其海口，其船俱不能出。其民崇罗马天主教，惟八分之一守波罗士特正教。国中有大教主十四位，副教主六十六位。昔五爵及教主，据田亩大半，百姓贫乏。后国大乱，驱杀五爵，教主教师等皆出奔，产歿入官。虽那波伦王在位，再立新爵亦仅存其名号，而权不如前矣。学士能诗能文，昼夜勤诵，故各国盟约誓辞，皆用佛国语。欧罗巴各国，无不以佛国之字为正宗。其内外医科尤卓越，又精历法，知天文，能读汉字，造木板印书。所制造药材，并各项料物，尤多新奇。自道光十年后，佛国王自操权，按国之义册，会商爵士乡绅以议国事。每年王宫所用之银二百四十万圆，世子每年俸银二十万圆。国之大臣如之，有司国玺之大臣，理兵部教门外国务之大臣，理水师藩属地之大臣，理国内务之大臣，工务农商之大臣，文学大臣。司刑之官，千六百三十员；审狱之司一千员。别有定商务拟断之司，派兵弁之司，与中国无异。其公会必派国之大爵有名望者，百姓中每年纳饷银五千员以上者，推为公会之乡绅，预论国事，能言之士最多。佛国富民最骄，动自专擅，屡结党作乱，与他国肇衅。以路义非立王之贤，又募壮丁为民之卫，而有财之民，莫能弹压焉。其国库入项，虽每年二万五千六百三十万员，而三年欠项共一万四千万员，其出项每年文官之禄，并工部、教门、教学等费五千二百八十有馀万圆，军士水军六千五百万圆，造桥路、造炮、建战舰千五百万圆，纳税二千八百四十馀万。所应交还之项，千二百二十五万圆。计一年所费过于所入者，七百四十七万圆。道光二十五年，更增兵数共计五十四万四千，马八万四千匹，坚城共一百七十八座，各有护兵。

郡县城邑，广袤方圆九千七百五十二里，分三十八郡，每部分府、州、县。至城邑

有居民五千者，共七百零九处；居民一万者，共二百七十四处；居民一万以上者，共四十九处；居民二万者，共二十五处；居民二万以上者，共四十三处。其都曰巴利城，居民九十万。国有大事，皆在议焉。外国来人繁多，城内旅馆六百馀，旅客不下十万。所用马车共计二万七千辆，每日寄出书信，约七万件，新闻纸八万五千张。各印书三千名，呢羽匠千二百名。税饷五百五十四万圆，赌场之租，百二十三万圆，市租二十六万圆。护兵万五千丁，别有壮丁十二营，立仁义之院以施药，共二十处，一处每年计收病人一万。所藏古今书籍，计八十万册。此皆国都以内之情形也。

南方大邑曰“利云”，在罗泥河滨，居民十五万。工织丝绸，然骄不安分。地中海滨，有马悉利邑，居民十四万六千，系通商之大口，每年进船六千只。有佛国水师船，筑城立炮台，以防范西方海边。璞托邑，居民九万八千馀口，商贾云集，运出之物，多红葡萄酒，埔头甚富。路安邑，居民九万馀口，在西尼河滨，商船来往，绵布所出。南方土路士邑，居民七万七千，多好学，与西班牙国交界。难得邑，居民七万五千，每年出入之船，计三四千，民善作铁器。同堡邑，居民五万七千，在来尼河日耳曼国界，坚城固垒，其城内礼拜堂塔最高，士民大半崇正教。利里邑，居民七万二千，在北方。亚面邑，居民四万六千，在西北方。尼墨邑，在南方，居民四万三千。密邑，在东方，最固之城，居民四万二千。甲音邑，居民四万。圣以典邑，居民四万。罗米古邑，昔时佛兰西君在此即位，居民三万八千。阿耳兰邑，在国之南，居民四万。门必勒邑，在南方，无雨多晴，居民三万五千。安额邑，民三万五千九百。林区邑，在西边海，居民三万五千。土伦邑，大海口，居民三万四千，佛国战舰皆泊此。亚威云邑，居民三万。难西邑，在意大里交界，居民三万。林匿邑，居民三万五千。必勒邑，海边最固之城也，居民二万九千。比散孙邑，居民二万九千，在瑞西交界。利摩义邑，居民二万九千。威撒勒邑，离其国不远，城内有大殿，多美园，其君随时所驻蹕也，居民二万九千。额那比利邑，居民二万九千。布罗义邑，在查匿海边，城坚港广，为佛国君往侵英国之要路。甲来邑，与英国附近，英人常据之，居民二万三千。西泥港口，可通商，居民二万五千。太益邑，居民二万五千。地云邑，居民二万四千。安额邑，在海边，与北义交界，坚固之城也。亚拉邑，居民二万三千。哥西加岛，去撒丁岛不远，方圆一百七十八里，其地多山，产五谷，居民畏劳，往往缺食。岛有十八邑，其中四邑系海口。五村，五百六十乡，居民十八万八千。

《瀛环志略》云：佛郎西，自乾隆三十八年王路易第十六〈（一作卢义斯第十六）〉嗣立，时华盛顿〈（一作兀兴腾）〉据亚墨利加起兵，英吉利攻之不克，佛人以全军助华盛顿，英不能支，遂与华盛顿和，而佛亦由是虚耗。王好渔色，内宠擅权扰民，民不能堪。乾隆五十四年，国大乱，寻废王弑之，立领事官三人，摄王政，以拿破仑为首〈（一作“拿破利翁”，又作“那波良”）〉。拿破仑者，佛夙将，用兵如神，征麦西有大功。主忌之，置散地。国人既弑王，拿破仑乘势鼓众，得大权。嘉庆八年，国人推戴即王位，恃其武略，欲混一土宇，继罗马之迹。灭荷兰，

废西班牙，取葡萄牙，兼并意大利、瑞士、日耳曼诸小部，割普鲁士之半，夺奥地利属藩，侵珽国，围其都城，战胜攻取，所向无敌，诸国畏之如虎。嘉庆十六年，以大兵伐俄罗斯，围其旧都莫斯科。俄人烧之而走，佛方旋师，而天骤寒，军士冻死者十七八。诸国乘其敝也，合力攻之，佛师大溃，故所得土全失。嘉庆二十年，各国遣公使会议于维耶纳（奥地利都城），凡拿破仑所侵地，各归故主。其间有分析，有合并，立盟约，不相吞噬。拿破仑既败丧，惭而避位，复立故王之裔路易（一作卢义斯），仍握兵柄。嘉庆二十一年，与英吉利战于北境，兵败被擒，英人流之荒岛，道光二年死。路易即位，数年卒。弟查理立（一作加尔禄斯），愚戇不任事，在位九年。国人废之，择立支属贤者路易非立（一作卢义斯非里卑），即今在位之王也。以道光九年嗣立，有贤声。

佛郎西颇重读书，学优者超擢为美官。其制宰相一人，别立五爵公所。又于绅士中择四百五十九人，立公局。国有大政如刑赏征伐之类，则令公所筹议；事关税饷，则令公局筹办。相无权，宣传王命而已。国有额兵三十万，战船大小二百九十只，水兵五万，船之大者，载炮七十二门至一百二十门。亦有火轮船数十只，巡驶地中海。其俗人人喜武功，军兴则意气激扬，面有矜色，临阵跳荡直前，议不返顾。前队横尸杂遝，后队仍继进不已。获胜则举国欢呼，虽伤亡千万人不恤，但以崇国威全国体为幸。其酋长沈鸷好谋，知兵者多。水战陆战之法，无不讲求。又好用纵横之术，故与诸国交兵，常十出而九胜。

按：佛郎西在欧罗巴诸国中，传世最久。自哥罗味开基，至今已千余年。中间虽迭遭变故，而代立者皆其宗党，未滋他族，未立女主，较他国之奕棋置君者，固无间矣。立法峻厉，贤君复六七作，危而不亡，殆有由也。

欧罗巴用武之国，以佛郎西为最。争先处强，不居人下。偶有凌侮，必思报复。其民俗慷慨喜战，有小戎驷铁之风。其用兵也，仗义执言，不似诸国之专于牟利。故千馀年中侮乱迭生，而虎视泰西，国势未尝替削。至拿破仑之百战百胜，终为降虏，则所谓兵不戢而自焚，又可为读武者之殷鉴矣。

佛郎西属地在别土者，亦有数处。如南印度之本地治利，南亚墨利加之歪阿那，亚非利加之阿尔及耳，印度海之布尔奔，得之不甚经营，弃之亦不甚惜，盖不以此为重也。

欧罗巴各国，皆以贩海为业，如英吉利、米利坚、吕宋之属，每岁商船至中国，多者百馀艘，少亦三四十艘。所贩鬻者，多棉花洋布粗重之物，至如洋米、胡椒、苏木、海参之类，皆从东南洋转贩，并非西产。独佛郎西商船最少，多则三四艘，少则一二艘。入口之货，皆羽毛、大听钟、表诸珍贵之物。盖其国物产丰盈，制作精巧。葡萄酒、大泥、绸缎之类，售之欧罗巴各国，即已利市十倍，不必远涉数万里而谋生。其航海而东来也，意在于耀声名，不专于权子母。国势既殊，用意迥别，

其情勢可揣而知也。

卷四十四

○耶马尼总记上〈（一作热尔玛尼，一作者尔麻尼，一作亚勒马尼，一作亚墨尼，一作日耳曼，一作阿理曼，一作亚咩里隔）〉

耶马尼，旧辖大小部落三十有奇，为欧罗巴洲巨国，于诸蛮中最强。当意大利亚攻取佛兰西、大吕宋时，耶玛尼遣其三臣将兵，乘意大利亚之空虚，往侵，无所获。至耶稣纪年五百之时〈（汉明帝永元二年）〉，所属塞循之人，取得英吉利岛，创建部落。又所属览麻之人，取得意大利亚部落。又所属挽特尔斯之人，取得大吕宋。又所属佛郎斯希鲁里麦晏奄斯之人，取得佛兰西数部落。当日盛强，震于海国。然所辖部落，塞循最蛮，常行反侧，征讨不息。其后，国势浸衰，佛兰西、意大利亚各部背叛而去，即本国旧部，若磨希弥阿，亦自称曰王，麻洼里阿、塞循、墨兰领麦、哈那洼四部自称曰禄，腊引自称曰巴，腊达引、敏斯特里威司、戈禄尼三部，自称曰靡宿。耶马尼之国遂分为九，各自专制。厥后，九国统归塞循管辖，塞循不保，始为佛朗戈尼阿所夺，继又为麻洼里阿所夺。至千三百年间，麻洼里阿不保，又为欧塞特里国所夺。嗣以各部群起，改遵波罗特士顿教，奥地里加国之王用兵禁止，不听，故温多里〈（奋勇之人，夷语曰温多里）〉等在利塞之地交锋三十载，奥地里加国不克制服，各部落遂得改教，欧塞特里仅有统辖耶马尼之虚名。至千八百年〈（嘉庆五年）〉间，又为普鲁社所夺，各部落不服普鲁社统辖，旋仍自立首领，各长其地，各子其民，不相统属，共二十五部，惟各部落之首领于每年咸集欧塞特里国会议一次，申明约束，毋相残害，各部中遇有大事，亦至奥地里加国会议，故犹称澳大利亚为上国〈（以上原本）〉。

○耶马尼分国一

麻洼里阿，本耶马尼部落也，值耶马尼之衰，遂与诸部背叛，疆分为九，自是以后，强者王，弱者臣，始推塞循为盟主，各部咸听其号令。继属佛朗戈尼阿，旋归麻洼里阿。至耶稣纪年千有三百时〈（元成宗大德四年）〉，又属于奥地里加国，维时，麻洼里阿仅存本有旧部而已，近百馀年前，始夺得腊引之数小部，并普鲁社之庵斯巴治弥鲁刺两小部，故至今尚称麻洼里阿为强国，政事设立两麻占：一为总领大官、大教师办事之处，一为首领教师办事之处。首领教师并管理文学馆、技艺馆。又每七千户，立一头目议事，其王每届三年，聚集两占麻之人及各处头目议事一次，除防守及兰威兵未载数目外，额设步兵三万六千五百六十六名，马兵六千四百零八名，大炮手三千三百五十七名，其兵自十九岁以至三十岁者充伍〈（原本）〉。

《贸易通志》曰：日尔曼国，其国被列君分治，民雅好文，不勤商务，产铜、铁、麻、布、五谷、酒、羊皮、玻璃、自鸣钟，北方港口曰翰堡，其进口出口之货计价七千一百五十万员，道光十二年，入口船千八百九十六只。其南沿江之城曰比里敏

，进口船千百馀只，所载入者，皆南洋、印度之物〈（此条补入）〉。

麻洼里阿〈（东南俱界奥地里加国，西界洼鼎麦，北界希西加司）〉，疆域平芜，城邑华丽，幅员二万九千四百六十四方里，户三百三十一万五千口，领小部落七十三。俗奉加特力教者二千一百六十万人，波罗特士顿教者千四百四十万人，馀俱尊奉由教。产盐、铁、木、玻璃、酒、纸、鸟枪、黄铜、时辰表、红铜器、金线、银线。

○耶马尼分国二

塞循，亦耶马尼旧部也，其人强蛮乐斗，外夺英吉利，内叛本国，与其王家兵戈不息。值本国衰弱，偕诸部群起背叛，各擅号令，嗣又恃其盛强，并胁诸部，后为佛郎歌尼阿所夺。递传至欧塞特里阿统辖时，番众竞改教门，欧塞特里阿王以兵禁止，终不能制。各部落既改教，塞循日渐衰败，非特不能保护诸部，即后得波兰所属之数小部亦旋失去，千八百一十三年〈（嘉庆十八年）〉，尚设兵三万七千，近兵仅满万。

塞循〈（东北界普鲁社，南界奥地里加国，西界哈尔领麦）〉，平坦饶沃，幅员七千四百六十四方里，户百有十九万二千六百四十六口，领小部落十有六。俗奉波罗特士顿教。产银、铜、铁、铅、纸、袈裟布、呢布、帽、袜、磁器。

○耶马尼分国三〈（今属英吉利）〉

哈那洼，南隅多山，国都在中央沙漠之地，昔亦耶马尼之部落，以塞循诸处背叛，遂亦自为一国，百馀年前既属英吉利管辖矣。其国设立底表第〈（官名）〉百员，管理各部落之事，如遇改易规条，增减税饷，齐集会议。额设步兵八千八百二十七，骑兵四千一百十三，兰威兵万有八千。

哈那洼〈（东界普鲁社，西界尼达兰，南界威塞华里阿，北界海）〉，滨海膏腴，幅员万四千八百六十七方里，户百三十万五千三百五十口，领小部落四十有六。俗奉波罗特士顿教。产铜、铁、红铜、白铅、盐、布、谷、木。

○耶马尼分国四

洼鼎麦〈（东界麻洼里阿，西界麻领，南界奥地里加国，北界麻领）〉，西有大山，馀皆平旷，昔为耶马尼国中最美之部落，后值耶马尼衰弱，遂与塞循诸部各自擅命，其王住扎什得额。设立占麻二，一各官办事之处，一聚集议事之所，每二年会议一次。额设步兵万，骑兵三千六百，大炮手二千五百。幅员七千七百六十九方里，户百三十九万五千四百六十二口，领小部落十有七。俗奉波罗特士顿教，产谷、

酒、畜牲、本、布、盐。

○耶马尼分国五

麻领〈（东界洼鼎麦，西界佛兰西，南界绥沙兰，北界麻洼里阿）〉，弹丸小部落耳，昔亦耶马尼所属，与塞循诸部同时分国。额设兵丁万，兰威阿兵万，兰斯端兵十万。地不甚平而极膏沃，幅员五千七百七十七方里，户百万有三千六百三十口，领小部落十有七。俗奉波罗特士顿教。产银、铜、铁、盐、谷、麦、布、苧麻、牲畜、自鸣钟。

○耶马尼分国六〈（三部同处）〉

希西加司部，东界麻洼里阿，西界威塞华里阿，南界希西览斯达，与希西览斯达为兄弟之国，俱弹丸小区耳。滨腊引河北岸属希西加司，南岸属希西览斯达，中隔一河，联以桥梁。希西加司有新旧二部，旧城蕃庶，新城华丽，昔属耶玛尼，后以塞循诸部背叛，遂亦自主，设奈伊立多以自理事。额万有八十，山林深密，幅员四千二百七十三方里，户五十三万八千七十三口，领小部落十有四。俗奉彼罗特士顿教。产银、铜、铁、谷、苧麻。

希西含麦部，在希西览斯达域内，幅员百六十方里，户万八千八百七十口，独部落〈（案：凡所属别无小部落者谓之独部落，犹中国无属县之直隶厅）〉。俗奉波罗特士顿教，先为耶玛尼之部落，后自设突支以治。

希西览斯达部〈（东、北俱界希西加斯，西、南俱界那肖）〉，在腊引河南岸，部落蕃丽，昔属耶玛尼，后亦设额兰突支以自主。额兵九千，饶沃多山林，幅员四千二百七十三方里，户六十一万九千四百七十口，领小部落五。俗奉波罗特士顿教。产铜、铁、苧麻、盐、烟、麦。

○耶马尼分国七

色西威麻〈（东界哈尔领麦，西界普鲁社，南界鲁那尔斯达，北界普鲁社）〉，土瘠而勤力作，幅员千四百二十七方里，户二十万一千口，领小部落二。俗奉波罗特士顿教，先属耶玛尼，后自为国。产羊、毳。

○耶马尼分国八〈（二部同处）〉

墨几领麦塞追司〈（东界斯特里司，西界领墨，南界普鲁社，北界海）〉，在耶马尼北隅，中有伊弥河，西岸塞追斯，东岸斯特力司。昔属耶玛尼，自与各处背叛，即设额兰突支以理政事。疆域稍阔，以塞追司为首部落，衢巷华丽，湖景映带，其

山多树而耕种歉薄。幅员四千六百五十五方里，户四十五万八千三百七十八口，领小部落十有五。俗奉波罗特士顿教。又有脉几领麦斯特里司〈（东南俱界普鲁社，西界塞追司，北界海）〉，在伊弥河东岸，先属耶玛尼，后设额兰突支以自治，斯特里司其首部也，仅如大村市，居民万人。闻先日有二女曾嫁英吉利国王。濒湖多树，耕种薄收，幅员七百六十方里，户七万一千七百六十九口，领小部落四。俗奉波罗特士顿教。

○耶马尼分国九

哈尔领麦〈（东西南俱界哈那洼，北界海）〉，在耶马尼之北，卑湿多芦苇，幅员二千二百五十二方里，户二十一万七千七百六十九口，先属耶玛尼，后亦设禄以自主，领小部落七。俗奉加特力教。

○耶马尼分国十

那肖〈（东南俱界希西览斯达，西北俱界腊引）〉，地多大山，濒缅河，幅员二千二百八十八方里，户三十万二千七百六十九口，先属耶玛尼，后亦设禄以自主，领小部落四。俗奉加特力教。产壳、酒。

○耶马尼分国十一

塞西俄达〈（东界鲁那尔斯达，西界希西加司尔，南界麻洼里阿，北界普鲁社）〉，壤沃市蕃，本耶玛尼所夺普鲁社之边地也，自与各部落叛后，即设禄以自主，幅员千一百六十三方里，户十八万三千六百八十二口。俗奉波罗特士顿教，富而好文学，设有书馆，藏书六万卷。

○耶马尼分国十二

色西各墨〈（东南俱界麻洼里阿，西界敏领王，北界鲁那尔斯达）〉，山野平旷，有宝矿，幅员五百五十七方里，户八万十二口，独部落。俗奉波罗特士顿教，先属耶马尼，后亦设禄以自主，兹禄之子为弥尔尼壬之王。

○耶马尼分国十三

塞西敏领壬〈（东界各麦，西界希西加司，南界麻洼里阿，北界威麻）〉，弹丸小区，分为两部落，塞西加斯尔幅员四百三十方里，户二万九千七百口。两部共辖于一王，以色西敏领壬为王居。俗奉波罗特士顿教，境内有沙尔孙凝大山，产盐、煤、铁矿。

○耶马尼分国十四〈（三部同处）〉

庵哈尔特肖〈（四围俱界都临几阿）〉，与庵哈尔曼麦、庵哈尔各凌同属一区，滨临伊尔敏河，间于塞循、麻洼里阿之间，幅员三百六十方里，户五万二千九百四十口，独部落。俗奉波罗特士顿教，旧属耶玛尼之部落，近亦设禄以自主，国虽徧小，曾产名人。

庵哈尔曼麦〈（四围俱界都临几阿）〉，幅员三百三十九方里，户三万七千有四十六口，独部落。俗奉波罗特士顿教，旧属耶马尼，近亦设禄以自主。

庵哈尔各凌〈（南界特肖，馀界都临几阿）〉，幅员三百一十八方里，户三万二千四百五十四口，独部落。俗奉波罗特士顿教，旧属耶马尼，近亦设禄以自主。

○耶马尼分国十五

墨兰斯温〈（东界普鲁社，馀界哈那洼）〉，地土肥美，贸易蕃盛，幅员千五百二十方里，户二十万有九千五百二十七口，独部落。俗奉波罗特士顿教，旧属耶马尼，近亦设突支以自主，突支驻扎乌尔分母特尔。前时，突支政事不平，部众离叛，嗣更立突支，与部众更始。

○耶马尼分国十六〈（二部同处）〉

斯厥先麦循那痠循〈（四面俱界普鲁社）〉，与斯厥先麦鲁那尔司达同属一区，先属耶玛尼，近亦设突支以自主，幅员四百三十二方里，户五万三千九百三十七口，独部落。俗奉波罗特士顿教。

○耶玛尼分国十七〈（二部同处）〉

和兴苏兰喜真人〈（四围俱界洼鼎麦）〉，与和兴苏兰色麻领人同属一区，弹丸小地耳，分为二部，先属耶玛尼，近设勃林士以自主，幅员百有八方里，户万四千八百二十口，独部落。俗奉波罗特士顿教。

和兴苏兰色麻领人〈（南界麻领，馀俱界洼鼎麦）〉，幅员三百八十六方里，户三万五千五百六十口，独部落。俗奉波罗特士顿教，昔属耶马尼，近亦设勃林士自理政事。

○耶马尼分国十八

利治丁斯鼎，在塞循所属之依支麻治大山内，幅员五十二方里，户五千五百四十六

口，独部落。俗奉波罗特士顿教，先属耶马尼，后设勃林士以自主，其勃林士本欧塞特里国人，家富为欧罗巴洲之冠。

○耶马尼分国十九

洼尔特〈（东南俱界希西加斯尔，西北俱界威色华里阿）〉，山野地也，幅员四百五十九方里，户五万一千八百十七口，领小部落二。俗奉波罗特士顿教，先属耶马尼，后亦设勃林士以自主。

○耶马尼分国二十〈（二部同处）〉

流斯额力司〈（东界塞循，西界塞栖阿尔鼎麦，南界麻洼里阿，北界普鲁社）〉，与流斯色力司共有蕞尔之地，在塞循边界，幅员百六十五方里，户二万二千二百五十五口，独部落。俗奉波罗特士顿教，先属耶马尼，后亦设禄以自主。

流斯色力司〈（东界塞循，西界塞栖阿尔鼎麦，南界麻洼里阿，北界组斯达）〉，幅员四百三十六方里，户五万二千二百五口，独部落。俗奉波罗特士顿教，先属耶马尼，后亦设禄以自主。

○耶马尼分国二十一

立比领底那〈（东界哈那洼，西界威塞花里阿，南界立比利摩尔，北界威塞花里阿）〉，在哈那洼之南，平壤膏沃，幅员二百一十二方里，户二万三千百十二口，独部落。俗奉波罗特士顿教，先属耶马尼，后设勃林士以自主。

立比利摩尔〈（东界哈那洼，北界立比领底那，西南俱界威塞花里阿）〉，亦在哈那洼之南，地方多山，树木丛茂，幅员四百三十四方里，户六万九千六十二口，独部落。俗奉波罗特士顿教，先属耶马尼，后亦设勃林士以自主。

○耶马尼分国二十二

汉麦即来粤贸易之胜波利国，在耶马尼之北，别属一区，至耶稣千年时〈（宋真宗三年）〉，耶马尼王始得其地，幅员百二十八方里，户十二万三千六百四十八口，独部落。俗奉加特力教，及背叛后即自专国，设立西匿士二十八人佐理政事，其西匿士由部众公举，家费十万以上者充之，四十年前，被佛兰西侵扰，大受残害，近已相安，土产糖，商贾云集。

○耶马尼分国二十三

墨里门〈（东界哈那洼，馀俱界哈尔鼎麦）〉，在威萨河口，幅员五十四方里，户四万八千四百三十二口，有新旧部落，旧部衢巷狭，房舍朴，新部极华盛。俗奉加特力教，前设官数人，事悉专断，近日必须会议，部众亦得预议。

○耶马尼分国二十四

佛郎弗〈（南界希西览斯达，馀俱界那肖）〉，濒临緬河，北岸佛郎弗部落，南岸沙治先部落，有石桥以通行入，幅员百有五方里，户四万七千八百五十口，独部落。俗奉加特力教，安分尚文，多藏书籍及精巧器物，贸易甚盛，岁交易二次。

○耶马尼分国二十五

鲁密〈（四围俱界脉几领麦）〉，幅员百十六方里，户四万六百五十口，独部落。俗奉加特力教，先属耶玛尼，后设突支以自主，贸易亦巨，四十年前被佛兰西侵扰，有墨鲁渣拒敌不胜，炮台被毁，嗣得威引那兵来援，始得退敌。

○耶玛尼国沿革〈（原无今补）〉

《职方外纪》：亚勒玛尼，在拂郎祭之东北，南四十五度半，北五十五度半，西二十三，东四十六度。国王不世及，乃其七大属国之君所共推者，或用本国之臣，或用列国之君，须请命教皇立之。国中设共学十九所，其气候冬月极冷，善造暖室，微火温之，遂极暖。土人散处各国，以为兵极忠实可用，至死不贰，各国护卫宫城，或从征他国，亲兵皆选此国人充之，本国人仅参其半。其工作极精巧，制器匪夷所思，能于戒指内纳一自鸣钟。地多水泽，冰坚后，人多于冰上用一种木屐，两足撮之，一足立冰上，一足从后击之，乘滑势一激数丈，其行甚速，手中尚不废常业也。又有法兰哥地人，最质直易信，行旅过者辄冒之，客或不答，则大喜延入，具酒食，或为计缓急未室者则妻之，谓此人已经尝试，可信托也。多葡萄，善造酒，但沽与他方过客，土人滴酒不入口，惟饮水而已，即他国载酒至亦不容入境。其属国名博厄美亚者，地生金，掘井恒得金块，有重十馀斤者，河底常有金如豆粒。有罗得林日亚国者，最侈汰，西土宫室，多用帷幔障壁，其王有一延客堂，四周皆列珊瑚、琅玕交错，俨一屏障。又有一大铙，制作极巧，二刻之间，可连发四十次。

《海录》：亚咩里隔国〈（即耶马尼国也）〉，在峡山正西，由峡山西行约一月可到，土番为顺毛乌鬼，性情淳良，疆域极大，分国数十，各有土王，不相统属，总名亚咩里隔〈（即志中所分一十五国也）〉，天气炎热，与南洋诸国同，中有一山，名沿尼路。近年，葡萄牙国移都于此，旧都命世子监守。由沿尼路西行十余日，至彼古达里，则为英吉利所辖，其余各国亦多为荷兰、吕宋、佛朗机所侵据，至此者，足多生虫虱，须常洗剔始已。土产五谷、钻石、金、铜、蔗、白糖。

《皇清四裔考》：乾隆十八年，钦天监正刘松龄者，热尔玛尼亚人，其国在博尔都噶尔亚东北五千里，其国王不世及，或用本国臣，或用列国君，请命教王立之〈（即所谓意大利之教皇也，各国王即位必得其札付乃立）〉，其土人散处各国，为兵极忠实，各国护卫宫城皆选此国人充之〈（即所谓耶玛尼之红面兵也）〉。工作精巧。所属有法兰哥地人，质直易信，多葡萄，善造酒，常沽往他处。又有属国名博厄美亚者，地生金，掘井恒得金块。有得罗林日亚者，最侈汰，其王一延客堂，四周皆列珊瑚，俨如屏障。由博尔都噶尔亚东北行，逾伊西巴尼亚、法兰得斯、拂朗祭，乃至其地云。

《每月统纪传》曰：阿里曼国，在欧罗巴列国之中间，比法兰西国更广大而蕃庶，但国主不一，犹中国昔时之列国诸王公侯伯等，各驻本都，分治其邦，推广文艺，遍设学院。公学院内所传之学理，有五六科，学校各有本校师学政教授。一者训示正教学，习上帝圣书，著耶稣之本源，如何由何国而生，如何区处际遇，令学士专心寻绎，此神善之学，先七八年间，读书于府学院，嗣后住公学院，三年毕，则进考试，若考得首，则为教师。二者例律学，亦满三年而考，考中为各落俗杂职正印升至总职。三者医学，如未经住院三年，未经考试者，终不许为医师。四者学习国政，凡农事、金厂、水利、江防、桥船、军器、百工，以及诸国财用、进考，既中，各依本分就禄，或掌田亩、百姓，或百计经营，无所不隶。五者杂学，凡古所传天文、地理、算术、草木、禽兽、鱼虫之学，金石之论，万物性情之学，考中者为府学教授。至于诸国之史是凡学，士所必知，欲进公学堂，先必知二三异国音语，凡汉人能通翻译者，皆得入其内。在阿理曼国大公学院之内，有学生一千，学正三四十人，皆受禄，无异官员，令各述学问，著书撰文。各公学院有灵台、天体仪、赤道仪、地平经仪、像限仪、地平经纬仪、玑衡抚辰仪、圭表等天文仪，别有医学院院内各科之艺。

《万国全图集》：日耳曼列国诸侯并兴，自专权势，与中国周之诸侯不异，但有大事则国王特命大臣赴公会中与列国会议，国中语音不异，所著之书亦同，其教门有二，即天主与异端，民性好学，务艺术，并中国之书皆读悉，今将各国列叙其情形焉：

一曰东部。有山岭，多出水银、朱砂、铁，其草场广大，牧马五万七千，牛二十七万五千头，羊三十四万五千头，国中有多恼大河，其都城曰味隐。居民三十万丁，巧造布帛，国王宫殿最壮，而躬亲节用，与居民如父子往来，和温待人，百姓固执天主教，最恨妖怪风水之说，而好饮食、音乐，女皆风流秀丽，但不守节，其耳城居民三万六千丁，其书院内藏书七万本，其近城有一圣处，为国人烧香拜像之所，厚奉金银器物，惟僧所诱惑。

一曰地罗里。遍地山岭，居民朴实好猎，佛兰西侵其国时，居民奋击退敌，因山地硠瘦，往往出游外方。

一曰以利亚。其南方及亚得亚海隅，多山洞谷，省会曰来巴，居民四万馀，造磁织缎，其海口曰得利益，每年所进船八千，其银馆本钱甚巨，国家准其居民尽力务事，不夺其时，又不塞通商之路，故生意甚盛。

一曰波希米国。其形如釜，四界山岭，其中广谷，产五谷、畜牲、铁、铜、麻，巧造玻璃器，运卖外国，不胜其数，会城曰巴壹，居民十万，语音与俄罗斯相似，其学院中士子八百八十三人，务文艺。

一曰默邻。在波兰东，地僻小，出麻及呢布，其阿里木号为坚城。

一曰拜焉部。乃南方之地，东连东国，广袤方圆九万方里，居民四百万丁，惟古俗是崇，拘泥不通，现其国君建书院，纳士接贤，以开茅塞，屡与佛兰西国结盟起兵，以攻日耳曼国之主，此时旧怨已息，国家七千人户中，听民推一才智之人赴京，会同办事。产物不多，民造美皮清玻璃等货。国都曰门占城，街市秀丽，与各国通市，居民勤力巧艺，故名扬四海，其时辰表初造于此城者，其名曰尼林山。又有城名曰雨山，又曰澳堡，今虽渐衰，尚多织布造器之匠。

一曰威丁山。西连拜国，其居民百六十万丁，四面山岭，多出葡萄酒与各佳果，其百姓大半奉事上帝，崇拜耶稣，其见识文学为他国所景仰。其国王驻在突甲都威丁之西，乃巴丁大侯邦。出豆麻、葡萄酒，山水清美，广袤方圆万八千方里，居民百二十万丁，国饷二百万员，都城曰甲利安。

一曰撒孙。南连拜东等国，北界出各项金、银、锡，虽五百年开其银厂，未穷尽也。古时日耳曼国之宝尽出是山，山内民人之粮，夏时掘矿为生，冬时巡游作乐，北方居民，礼貌和悦，朴实不欺，羊毳最细，可作呢布，别造磁器，过于中国。其都城曰德停，王殿及天主堂与收古迹之庄皆美过他国。在来责邑，每年二次设市，各商云集，尤多诸术书册，古本新本，万万难数，每年贸易货物价银三百万两。撒国西界有多列侯地方，昔撒君临死之际，将其基业分与子等，故多褊小之域。一曰威密大侯，居民聪明，地居纳贤，以都城为众士之集处。二曰撒可堡，地方更广，内有牧场，出金之山地，君之子乃英国女王之夫也。三曰撒黑堡屋，居民三万二千人，虽少而有大臣典军，如大国无异。四曰黑堡，乃最小地。五曰撒买宁，出盐甚多。

撒孙国之东北尚有三侯地，曰安合，又分三分，地虽不多，而城邑曼衍，其小都中，美园丛林，山水幽雅，游观者不能去。北界还有墨林堡两侯之地，平坦，出五畜，墨南属保林帅侯地，方圆千里，居民二十六万丁，国饷每年银二十万两。又保布远离者，系立北两侯，居民十万丁。互得侯，居民六万丁。又大素林两侯，居民六万丁。由此侯者，破鲁斯国王室出也。又策士两侯，居民九万三千丁。其最少者，乃光石侯，居民二万丁。此列侯虽无权势，却与列大国联姻，互相唇齿，其亲叔为

西国大王，亦与之平等往来。按日耳曼国例，各侯务各出兵丁，与国王合会防边，遇有国敌犯境，则合力拒逐，但列邦不守合和之议，常有争端，故嘉庆年间为佛兰西国所服，历六年之久，于嘉庆十六年，各部募兵四万攻拒，而佛军始散。

一曰汉那耳部。在撒丁之西，平坦袤延方圆四万方里，居民百三十七万丁，地大半多沙，近水始有腴田牧场，东方山岭出银、铜、铁、白铅，每年价银六十万两，不出五谷而多出蜜，国君于康熙五十二年被英国国民人奉召即位，昔与英国唇齿，但道光十七年再立新君，屡有争端，其都与国号同名。可{六一}延，乃大文学院，艺术之士于是兴焉。

汉那耳西南系墨西列侯地，一曰墨西加西耳，袤延方圆万三千方里，居民七十万丁，所起官兵万八千名，山出银、铁、铜。一曰黑西但邑，方圆二千三百里，居民七十六万丁，出葡萄酒、麻、烟等，内地城邑最大坚固者乃马因，炮台周绕，每拒退三万之敌。又那埽侯地为列君所分者，昔曾乘机驱逐荷兰所驻强兵，可谓忠勇。出葡萄酒与各项果实，不胜其数，其居民多富。又阿丁堡地在滨海，地瘠，然海口通商故地，仅三百四十八里，而有居民二十五万五千，每年收银饷二十万两。

在日耳曼国内尚有自主之城邑，不服国王，各自通商设官，以掌其政，一曰汉堡，在易北河口，系各国之易市，众商云集，其船只亦赴中国经商。于道光二十二年，其城大半焚毁。居民十二万丁，所进出货价银四千二百九十有馀两。一曰北悯城，居民四万二千丁，在威悉河滨，其船亦赴广东通商。一曰利北邑，居民二万四千丁，虽古城，然生意微小。一曰佛郎渡，乃最古城，形在河边，为各侯之公使会集，内有列国驻防之军，每年开大市，四方辐辏。

其地江河最长者来因河，由南至北，在日耳曼国之西出荷兰国入海，如汉人之黄河也。河滨活壤，产葡萄有名，沿河多古迹、奇峰，游客皆图画之。又多恼江在国中横流如带，其北方则易北等河也。国中居民因分服列君，风俗殊异，北方居民精神强健，最好学。南方东方之民好繁饮食。西南之民劳苦度生，其民往来不睦，常有争事。

卷四十六

○奥地里加国〈（一作欧塞特里，即《职方外纪》中莫尔大未亚也，图中博厄美厄即寒亚里也，又奥人呼曰双鹰）〉

奥地里加国，本耶马尼部落，后值耶马尼衰弱，遂自立国称王，因娶寒牙里之女王为妃，遂合寒牙里国为一。又蚕食耶马尼、波兰、意大里各国边境，增建部落，遂为欧罗巴洲大国。政事设贺官四人综理，其钱粮、讼狱无专官，如有控诉之事，在国都者，都内之官皆可断之，在各小部落者，则各地尊长及其塾师均可断之。岁征钱粮银六千三百万员。步兵十八万五千四百，骑兵三万八千四百，大炮手万七千八百，修理器械兵二千三百五十，出师开路修桥兵二万有六百。

奥地里亚国〈（东界俄罗斯，西界耶马尼，南界寒牙里，北界普鲁社及波兰）〉，幅员二十六万有二百九十五方里，户三千二百十三万四千有三十七口，大部落九，小部落二百八十五，别有寒牙里属国。

下奥地里亚部〈（东界寒牙里，西南俱界塞底里阿，北界阿巴）〉，本国四围皆山，幅员万五千一百八十方里，户二百有三万一千百三十口，境域辽阔，遂将部落分为二：曰上奥地里亚，下奥地里亚。下奥地里亚领小部落二十，产金、银、铜、铁、锡、铅、布、呢、水银、银朱、玻璃、宝石、丝发。

上奥地里亚部〈（东界寒牙里，西界磨希弥阿，南界下欧塞特里阿，北界磨那威阿）〉，多山，产五谷。领小部落十有八。

塞底里阿〈（东界寒牙里，西界沙尔斯麦，南界依尔那里阿，北界奥地里亚）〉，幅员八千五百六十方里，户八十三万九千百二十八口，领小部落二十有五。产铁器、呢布。

伊尔那里阿〈（东界格罗阿底阿，西界揽麻地，南界海，北界塞底里阿）〉，幅员万一千百三十九方里，户百有十三万八千五百零六口，地崎岖，领小部落二十。产苧麻、丝、谷、布、呢、磁器。

览麻地〈（东界耶玛尼，西界沙厘尼阿，南界巴海，北界绥沙兰）〉，本意大里亚部落，幅员万八千二百六十方里，户四百二十七万九千七百六十四口，领小部落七十有二，俗奉加特力教。

代罗尔〈（东界塞底里阿，西界绥沙兰，南界览麻地，北界耶麻尔）〉，在耶玛尼极西，崇山峻岭，冰雪不消。俗颇淳厚，尊奉加特立教。幅员万一千有六十八方里，户七十七万六千三百九十口，领小部落二十有七。产盐、木、烟叶。

磨希弥阿〈（东界磨那威阿，西界耶玛尼，南界沙尔斯麦，北界普鲁社）〉，为欧塞特里阿最沃之壤，周围大山，幅员二万有四百二十五方里，户三百七十四万八千三百六十一口，领小部落四十有七。设兵十二万五百二十有七。尊奉波罗特士顿教。产布、苧麻、树木、五金，以锡为最。

磨那威阿〈（东界牙里西阿，西界磨希敏阿，南界奥地里亚，北界普鲁社）〉，周围大山，其中沃壤，幅员万有三百二十一方里，户百九十九万四千八百五十口，领小部落二十有三。产呢、布、苧麻。

牙里西阿〈（东界俄罗斯，西界磨那威阿，南界寒牙里，北界波兰及俄罗斯）〉，本波兰国部落，土少沙多，山地皆沃，幅员三万三千一百七十九方里，户四百三十八万五千六百有六口，领小部落三十五。设那步尔、奈士、可腊治、西底士四等官，以综庶政。奉波罗特士顿教。产盐、谷、蜜、糖、树木。

○寒牙里国附记〈（一作博厄美厄，一作班那里阿，一作匈牙利）〉

寒牙里，俗旧犷悍，较耶马尼尤甚，那卢弥者，本寒牙里南隅各地总名，与意大里亚连界，意大里亚重兵镇守，扼其要隘。耶稣纪年四百〈（晋安帝隆安四年）〉，寒牙里之人阿士多罗士攻破那卢弥，率众前进，几将攻至欧罗巴洲之东方与阿细亚洲之中央，后有头目阿底那于底依士、那卢弥两处各设官兵，保障边徼。耶稣千年时〈（宋真宗咸平三年）〉，遂立为国，建都于孛利斯麦。传至雷士里俄列王，尤强勇，于千四百年〈（明建文四年）〉率众攻击意大里亚，回国而卒。其女伊利萨麻嗣位，旋嫁奥地里亚国之阿尔麦王，遂为其属国，中被波兰侵据，旋即夺回，继而土鲁机侵扰不已，直至威音那边界，百年受惠，经奥地里亚国力战，大胜，始不敢复寇。嗣迁都那摩，以格罗阿底、斯格那尼、寒牙里、特兰色洼尼四部落，路接土鲁机，画出边界，屯田养兵，六十家设一头目，无事耕田训练，有事百丁抽五，以御边徼。设官四等：一教师，一世爵，一问事官，一管各部落官。凡遇更例、立王、加税、添兵，则四等贺官齐集会议。番有二种：一曰麻亚，一曰加窝尼唵士。数家为一村，多处茅屋。习波罗特士顿教者五百万，习加特力教者二百有十万，馀俱习额力教。言语不同，耕种所获，自得八分，以一分归庙，一分归官。服色尚蓝，不剃发，编发辫，头戴小圆帽，外加阔边帽。产布、呢、金、银、铜、铁、铅、盐、煤、丝发、蜜、腊、烟、苧麻。

寒牙里〈（东界土鲁机，西界色底里阿，南界土鲁机，北界牙里西阿）〉，奥地里亚之属国也，幅员十三万三千方里，户千二百六十万口，大部落九，小部落二百九十有二。

下那卢弥部〈（东界上那卢弥，北界下那卢弥，南界斯格那，西界奥地里亚）〉，领小部落五十。尊奉波罗特士顿教。土产有酒、煤。

上那卢弥部〈（东界上底斯，西界下那卢弥，南界斯格那，北界牙里西阿）〉，领小部落六十有八。尊奉波罗特士顿教。产金、铜。

上底斯部〈（东界下底斯，西界上那卢弥，南界下那卢弥，北界牙里西阿）〉，领小部落三十有二。尊奉额力教。产荷碧尔石、杂果及酒。

下底斯部〈（东界特兰色，南界曼腊，西界上底斯，北界牙里西阿）〉，领小部落四十有三。尊奉额力教。产木、烟、牙硝、<卤见>。

曼腊部〈（东界特兰色，南界土鲁机，西北界寒牙里）〉，领小部落二十有八。尊奉额力教。

格罗阿氏部〈（东界斯格拉，南界土鲁机，西界依尔里阿，北界寒牙里）〉，幅员三千七百五十六方里，户六十一万四千口，边界多山，东隅平衍，语音异寒牙里。设立总管，遇大事至寒牙里会议，领小部落十有五。产谷、烟。

斯格腊部〈（东界寒牙里，南界土鲁机，西界格罗阿底，北界寒牙里）〉，在格罗阿底阿之东，幅员三千六百七十八方里，户三十四万八千口，领小部落十有六，土沃气和，音语庞杂。

特兰色部〈（东南俱界土鲁机，西北俱界寒牙里）〉，在加底唵山之外，地势崎岖，天时和暖，宜耕种，幅员二万三千五百九十四方里，户二百有二万七千五百六十六口，领小部落三十有二。尊奉加特力教、额力教、波罗特士顿教。产金、铁、盐、羊毛。

那尔麻氏部〈（东界土鲁机，西界海，南界都鲁机，北界依尔腊里）〉，领小部落六，俗强蛮。产谷、蜜、糖。

○奥地利国沿革

《海录》：双鹰国，又名一达犂，在祿古港口之西北，与单鹰国为兄弟，患难相周恤，亦奉天主教，风俗大略亦与西洋同，番舶来广东，有白旗，上画一鸟双头者，即此国也〈（案：双鹰旗即奥地利国，单鹰旗即普鲁社国，故与都鲁机毗连，广东人以其市舶旗所画呼之，非其本名也）〉。《贸易通志》曰：奥地利国，粤人呼为双鹰，土地甚广，产水银、朱砂、铜、铁、白矾、丝、绸、缎、五谷、酒、蜡、烟、皮毳，物产虽丰，民不务商，南有港口曰得尔士，每年进口货价二千万员，出口货价九百万员〈（此条补入）〉。

《万国地里全图集》曰：奥地利域东国，即欧色特里国也，北极出地自四十三度至

五十一度，偏东自八度至二十七度，南及土尔其国、亚得亚海隅、以他里列国，北接俄罗斯国、陂路斯国、日耳曼国，东至末他味地连俄罗斯国，西至日曼尼国、以大里国。东国所属，在日曼尼内，广袤方圆二十二万八千方里，居民九百八十四万丁。匈牙利邦，广袤方圆三十七万五千方里。以他里内各省，广袤方圆五万一千方里，民人四百一十七万丁。波罗国内各省，广袤方圆九万六千方里，居民四百零七万丁。答马地邦，广袤方圆一万七千方里，居民三十二万丁。另如其别族各丁，共计居民三千三百万人，所有之马共计二百二十万只。国内遍有七百七十七邑，六百三十六郊，二千二百二十四墟，六万九千一百零五乡。每年收国帑者共计银五千二百万员，国家欠银二万万员。太平之际，三军二十七万丁，战时七十五万丁，兵船共计三十一只。

又曰：东国未久立，宋元年间，一小邦诸侯，因其君智慧，日耳曼列侯推之为汗，其权势尚微，于明嘉靖四年，其汗获伯闵国，据之，此后，列国改崇波罗士特正教，惟东汗固执异端，力传加特力教，遇有民人不悦服者，即逼迫强之，或出国，或背教，倘敢抗违，则定死罪。后取匈牙利国，与土耳其战败，因要广教门，连三十年攻战，但正教各国力战，击退东军，强之议和，自后，其国地方愈广，又据低地并以他里大半，与是班牙国结为唇齿，佛兰西国忌其广大，往往开衅，干戈不息，佛兰西将武艺优娴，恒击胜奥地利，但议和之际，东国再加权复兴矣。现时欧罗巴各国权势最大者，第一英，第二俄，第三佛，第四奥也。其国商于广州互市，插旗画双鹰，故华人以双鹰国名之。

《万国全图集》曰：匈牙利邦之列地，一曰匈牙利国，其国一半山地，出金、铜，其馀平坦草场，多恼河横流其境，谷田五万顷，草场七万五千顷，林九万顷，园六万顷。其五爵弄全权，其农夫终身劳苦，所出者畜牲，每年山厂出金千五十斤，银四万一千斤，及葡萄、酒、麻、丹参、蜜各货。昔为东方游牧达达里所攻据，与列西国交战连年，嗣后奉耶稣之教，力勉进学，不期土耳其族奋兴，战服达达里，是以与东帝连和，共为唇齿，招之为王但因东政因时异宜之处，变通增减，国之绅士会议，各抒意见。其国都曰伯堡，居民四万一千丁，城于多恼河边，经营最盛。伯堡，居民六万一千丁，每年售出牲口不胜其数。伯堡对面为补他城，居民三万四千丁，其银场开在伸匿，居民万七千丁，采矿者居半，其铜山最旺。阿丁堡居民造葡萄酒，养豕每年八万只。刺固城每被土耳其军侵伐，五庙邑昔有文艺之名，四方贤儒所会集。得伯新邑，互市之地，其居民崇耶稣教。士额丁，居民三万丁，出烟，勤务作事。一曰七山地，匈牙利之东地，其山出金、铁，居民大半崇正教，不拜圣像，此时服东国，其都曰黑曼城，居民二万丁。冕城居民三万丁，与土耳其国贸易丰盛，文学院之儒千二百。一曰可刺地，土民勇战，因未向化，心野意巧，以农为生。产五谷、烟等货。匈牙利之南界各农，应募为兵，镇守疆境，遇土耳其军侵犯，则其乡兵冲锋突阵。塔马地城沿亚得亚海瘠地，其居民因地饶不能耕，捕鱼为贼，山生药材、野蜜，其都会撒刺小邑。加他罗城四面险固。

《地球图说》：阿士氏拉国，又名奥地利国，或曰东国，东南界俄罗斯、土耳其二国，西界瑞西国并亚利曼诸小国，北界波路西亚国。百姓约三千五百万，都城名未伊那，城内民三十万，三分天主教，余耶稣教、犹太教，各国徙居，言语杂出，或与亚利曼、意大里口音相似。内有一大江名拖地俾。属国颇多。土产金、银、铜、红铜、水银、盐、五谷等物。

《地理备考》曰：奥斯的里国，在欧罗巴州之中，其国土在北极出地四十二度起至五十一度止，经线自东六度起至二十四度，东至厄罗斯国，西连苏益萨国，南接土耳其基、意大里二国暨地中海，北界布鲁西、波罗尼三国，长约三千一百里，宽约一千八百里，地面积方约三十四万零二百四十里，烟户三京二兆口。峻岭叠起，冰雪凝积，河至长者十八，湖至大者十一，中、东二方田土膏腴，余地高燥，物产微鲜，气温和宜人。物产各种金石称富庶，男女皆得嗣位，以长幼为序。奉罗马天主教者过半，其额力西国暨加尔威诺、路得罗等各修教，奉者无几，至若入德亚古教，奉者尤寥寥。技艺精巧，匠肆林立，贸易丰盈。耶稣三十三载，汉光武建元九年，为罗马国征服，厥后越四百馀载，有北狄侵扰，唐德宗贞元七年，为佛兰西所克，改号曰奥斯的里亚，元世祖至元三年，亚里曼国君既获其地，以封其世子，其土地积方不及三万里。又越数十载，历代嗣君渐广邦基，与邻邦陆续结婚，附近各地，尽为所有。嘉庆九年，其国君进称可汗，嗣后虽曾被佛兰西那波良占据过半，嘉庆十九年，两国讲和后，侵地皆归还，仍为欧罗巴洲富强名邦。本国所属各地，虽有亚里曼、波罗尼、意大里、翁给里四者之名，然统分十五部，大小不等。

第一奥斯的里部。分而为二：一名下奥斯的里，一名上奥斯的里，其下者长四百一十里，宽三百五十里，地面积方一万里，烟户一百万馀口。维亚纳城乃国都也，建于达奴比约河岸，屋宇富丽，学塾、医院甚壮，百货骈集，人烟辐辏。其上者长五百五十里，宽一百八十里，地面积方九百三十里，烟户约七十七万四千馀口。首郡名灵斯。

第二义士的里亚部。长五百里，宽四百五十里，地面积方一万一千里，烟户约七十七万馀口。

第三的罗尔部。长六百里，宽四百五十里，地面积方一万四千四百里，烟户约七十四万馀口。

第四布威弥亚部。长一千一百里，宽七百里，地面积方四万九千里，烟户约三百二十八万馀口。此地昔为一国，迨后归服，方改为部。

第五摩拉维亚部。分为二：一名摩拉维，一名夕勒西。其摩拉维长者五百五十里，宽三百六十里，地面积方一万六千四百里，烟户约一百七十五万馀口。其夕勒西地面积方约有二千四百里，烟户约三十五万馀口。

第六壹黎里亚部。分为二：一名来巴士，一名的里耶德。其来巴士长一千一百里，宽九百里，地面积方一万八百三十里，烟户约六十四万馀口。其的里亚德地面积方约有六百四十里，烟户约五十万馀口，以上六部，皆与亚里曼国结盟，故名其地曰亚里曼。应出兵丁九万四千八百名。

第七加里细部。长一千三百五十里，宽五百里，地面积方四万二千里，烟户约三百二十三万馀口。此地昔为一国，迨后归服，方改为部。

第八布哥维纳部。长四百五十里，宽二百八十里，地面积方六千六百里，烟户约五十四万馀口。以上二部皆名曰波罗尼地，其加里细，昔为波罗尼国之地中国，乾隆三十七年归于本国管属，故仍名其地曰波罗尼。其布哥维纳昔为土耳其国之地，后归本国管属，改为部。

第九伦巴多威尼西奴部。长五百里，宽四百里，地面积方二万三千六百八十里，分为二：一名米郎，烟户约二百二十万馀口。一名威内萨，烟户约九十二万馀口。此部昔本意大利国之地，嘉庆十年，佛兰西国君那波良者立为一国，后归本国管属，改之为部，故仍名其地曰意大利。

第十翁给里亚部。长二千里，宽一千二百五十里，地面积方十七万一千一百二十里，烟户约七百五十五万馀口。此地昔自为一国，后归本国管属，改之为部。

第十一斯加拉窝尼部。长六百二十里，宽二百二十里，地面积方八千八百里，烟户约二十八万八千馀口。此地昔为一国，迨后归服，方改为部。

第十二哥罗瓦西亚部。长六百里，宽四百里，地面积方一万零一百里，烟户约五十六万馀口。此地昔自为一国，后归本国管属，改为部。

第十三达尔马西亚部。长八百七十里，宽一百五十里，地面积方八千三百里，烟户约三十万馀口。此地昔自为一国，后归本国管属，改为部。

第十四达郎西里瓦尼部。长七百里，宽六百里，地面积方三万零八百七十里，烟户约一百八十万馀口。此地昔自为一国，迨后归服，方改为部。

第十五边疆之地。共四处，合为一部：一名斯加拉窝尼，地面积方约有四千里，烟户约二十三万馀口。一名哥罗瓦西，地面积方约有八千一百里，烟户约四十万馀口。以上六部，总名曰翁给里，康熙十一年归于本国，均改为部。

此国通商冲繁之地，或在海边，或内地大埠。《外国史略》曰：奥地利国，亦名东国，中华称为双鹰，因其船旗名之也。本微国，宋真宗年间，日耳曼在东界别立君

长，以防范各国，且称之曰东境界，由此，东国之名起焉。迨元至元以后，与邻国或结盟，或交战，日增其地，于明景泰七年，东国之君并日耳曼国之地入版图，于明世宗嘉靖元年，与是班亚、荷兰等国交战不绝。是时，东国广袤方圆五千四百里，维时回回土耳其国群兴，恨东国崇天主教，再围其城，佛国又忌之，亦助土耳其军侵之，本国屡战屡败，几失全地，独存意大里地而已。乾隆四年，所掌版舆尚广袤九千零四十三方里，居民二千九百万。其君卒，女尚幼，欧罗巴列国结盟，共侵其地，于是其女婿嗣东国之位于乾隆二十年。其国后与外国结盟，欲灭破路斯国，七年力战而后退。其后嗣君明哲，屏斥奸邪，值佛国大变，其妹为佛国之后，被百姓所害，是以肇衅，四战四败，乃结平焉，于嘉庆十三年，东国君之女配佛国君波那里稔王为妃，两国和好。嘉庆四年，东国与峨破等国盟，共为唇齿，战胜佛国，尽复侵地，惜其民固执天主新教不改也。

东国地广袤方圆万一千一百八十八方里，居民三千七百三十一万八千，其他部在日耳曼国内者，在国东方，通计东国公地方圆七百五十六里，居民百八十五万。在多恼河两边广谷，四面有山，最高者六百五十二丈，中者六百余丈，下者四百余丈，遍山林木。其地面共二百万八千七十亩，其中六十万亩为荒地，常有水患，百二十八万为良田，七十八万为葡萄圃，六十五万为草场，八十六万为林藪，牧牲牛羊皆备。国都曰威音城，多恼河在焉，居民约四十万，城郭三十八座。河上有塔，高十四丈二尺，民好宾客。

二曰士大境。方圆数缺，邑二十，村九十六，男四十五万，女四十七万，昔居民崇耶稣正教，后迫君令，改崇天主新教。其地高于海面千五百八十一丈，其气冷，山虽多不高，计地三万五千九百顷，其中田七千顷，草场五千九百顷，园圃四千五百六十九顷，林千七百七十三顷，葡萄园五百四十八顷。山内有矿，产五金、石、盐、石灰，其所造最繁者为五金各器。其铁路甚广。其居民因执天主教，立教师千名，僧四百五十名，修道之女二十八名。

三曰来巴邑。广袤方圆三百七十里，居民四十八万七千七百口。亦多山，出铜、铁，其城中居民万三千口，通商之处也。

四曰地鹿邑。系意大里北边高山之地，广袤方圆五百一十七里，居民八十四万四百口，城二十二座，多冰岭，道路难行，溪流甚急，常涨溢为害，其水源能已痼病。气候冷，民多重瘤，年多耄耋。山产五金，民多畜牛，果木香橡最多，亦产麻，每年万有馀石。民多出外国生理，多巧术，能画像、雕刻，童孩入学者十万八千五百六十六名。产蚕丝，每年约十八万斤。其百姓属东国统辖。佛兰西于嘉庆年间侵其地，老幼男女各持械拒之，各国皆景仰焉。其会城曰印布。

五曰以利林。在亚得利亚海边，广袤方圆百四十四里，居民四十八万，多航海贸易。其会城曰地益，海隅最广港口也，因免税饷，商船云集，居民七万，由印度国所

来书信，俱由此交递各地。

六曰破闵国。即东国北方，广袤方圆九百二十五里，居民四百二十二万五千，言语与破兰音不甚异。此地古时列侯所管，唐朝年间，其居民奉天主教，与日耳曼国合为一，后多改变。明永乐年间，其王招纳贤能，知罗马天主新教为异端，故返耶稣本教，于是天主教人以火焚老教之师，居民持械与战，于明武宗正德年间，地归东国，而后息兵焉。明泰昌时，复争教肇衅，与邻国交战三十年，东国战胜，所失民人共七十八万口，但所存者，益严禁天主新教。其地北极出自四十八度三十三分，及五十一度二分，形势如釜，四高中低。田三万八千九百十六顷，葡萄四十四顷，园九千四百八十七顷，牧场六千百十六顷，潞泽三百三十四顷。气候甚冷，最大河益百末道等江也。其山出银、锡、铅、铁、硫磺、石灰，五谷足用。马十四万二千，牛九十七万四千，羊百三十四万九千。邑二百八十七座，各地分十六部，有天主教师、修道男女及大教师等，居民有艺术。岁造玻璃不下五十万员，价与水晶等。所织之呢亦日多。乐勤劳，习诗书。会城曰巴拉，居民十一万，其中六千为犹太人。屋宇甚多，居人稠密，有美殿，各艺士会焉。书院广大，亦有肄业者。

七曰默林。广袤方圆四百九十八里，居民二百一十九万三千口，崇正教者七十万，犹太人二万八千口。山高四百四十丈，居民多养牲畜，并多饿者。其风俗与破闵国不甚殊异。

在日耳曼国外之地，第一曰达马田部。本属意大利，在亚得利亚海隅右边，广袤方圆二百五十一里，居民三十九万八千口，近海多港口，又多洲，所居者渔人，山内多盗贼，村三十三座。乡人好饮酒，水土瘴疔，河甚多，入夏即涸。居民精壮，外多和善，心极狠毒。第三曰破兰。昔属地加利西，方圆千六百三十三里，居民四百八十六万六千，地皆平坦，众水所潞，中有丰田，多牛，多蜜，多林木，有熊、狼、兔。出石、盐、金砂、白矾，其居民大半为农，少聪明，鲜制造，崇天主教。五爵最多，每迫其民作乱。会城曰林伯口。第四曰云音部。广袤四千一百八十六里，居民千二百一十九万二千口。属此地者七山，广袤一千零百里，居民二百一十万二千口，与土耳其国交界之地七百里，居民百二十二万口。

云音之地，在土耳其北之国，梁朝年间匈奴苗裔所别立者也，数侵各国，后周太祖广顺年间败日耳曼之军，其国日兴，招贤士，布术艺。宋理宗绍定十六年间，蒙古人来侵，遍国遭杀，其王爱民如子，故兵退后，居民仍相聚自守。明景帝景泰年间，土耳其族强服希腊国，而云音王效死力战，亡者不胜数。明正德八年，其国王阵亡，云音国大半归土耳其国，嗣后民服老教，归上帝救主耶稣。康熙三十七年，其国归东国，强土耳其族来还侵地。乾隆四十年间，东国之君多募其兵以攻佛国。道光十四年，瘟疫广流，毙者二十万馀口，其民以此灾罪其管长，因作乱。然其地盛五谷，产良马，计牛四百万只，羊约九百万只。亦养蚕，每年出丝二百石。产葡萄，约有三百种。其山产五金，北地有川，其铁若在水多月能变为铜。其民言语各异

，务农，鲜制造。其天主新教师有财帛，自尊大。其五爵弄大权，待农夫如奴，不纳饷，有政务则招两公会聚议其事，东国之君，拱手听之，每年纳银五百万两。兵六万二千，又卫土耳其交界之民壮六万二千丁。其国都曰阿宾。曰必布，其地之大河，由土耳其国入海隅者，曰多恼江，其所属云音之地，一曰哥亚田。在亚得利亚海隅，与土耳其国交界，入云音版舆者，广袤方圆百七十二里，居民五十七万五千口，城七座，所属交界之民四十四万八千名，广袤方圆二百八十八里，城六座，其民甚愚，而兵甚伶俐，物产最多，未善造制，其山多高峰。

二曰土拉窝尼。在云音可亚田、土耳其中间，广袤方圆三百十里，居民六十万丁，有两河，时涨坏民地。多橡木，多瓜、烟、葡萄、胡丝、蜜、糖，其民愚多力，鲜制造，崇天主教，土音与破兰不异。其会城曰益悉，居民八千。又七山地方在云音东，山岭围之，故各国难侵，其地多出五谷、葡萄、木料、烟、马、牛及各项鸟雀，其山出五金，地甚高，各川所发源也。城百二十一座，村六十，乡二千五百八十六，百姓最勤劳，善积财，通贸易，由日耳曼运入者，每年价银八十万两，运出者五十万两。民崇耶稣本教，各乡绅依律例以筹议，东国君不得擅行。国饷每年约四十万两。其交界凡步兵四营，骑马一营，以时防范。其会城曰黑曼士达，造新布等，邑国地共方圆万二千一百八十八里，其居民三千七百三十一万八千口，军士四十六万九千，其日耳曼族千一百七十八万口。其山方圆八千七百里，最高之峰千二百丈，平坦之地方圆三千四百里，江河或入黑海，或亚得利亚海，或巴得之海，最大者多恼河，周回万有二百里，若中国长江。居民种类不一，有由亚细亚、中国之新疆来者，其属日耳曼者，厚重好施济，然纵欲疏慢。其属破兰者最愚，好饮酒作乐。属云音者敢死，有才能。庶民分四品：教师、五爵、良民、农夫，其教师俱服其官宪，教主则有大权势。其爵分三分，有世田，富财、骄傲。其良民亦分三品，或由君，或由大臣，或由地主管之，随所居之城邑而服役。农夫甚贫，服地主若奴焉，在交界之民，力防土耳其之侵。居民九分之一崇耶稣老教，余各奉天主新教。农困于徭役，虽田盛地丰，谷不足食，多由他国运入，外国所买牲畜马只，每年约三百五十万，出蚕丝约四十一万石，其羊毛卖与外国者，每年十万有馀石。

云音多葡萄，其林密而深，多木料，若分田按价，则共计银六十三万八千圆，谷田银三十万一千一百万圆，葡萄圃十一万四千四百万圆，林十万三千圆，草场五万九千六百万圆，牧场三万三千六百万圆，园地二万六千三百万圆。其产物之价六万五千万圆，养马二百三十一万二千只，骡三万二千只，驴五万九千只，牛百一十六万只，羊牛二百八十万只，山羊二百十六万只，豕六百三十万只。昔居民无制造，今渐学习，每年所织之呢、羽，运入者价银四万七千四百圆，运出者千九百六千四万圆，所运出之丝缎约八十五万六千圆，运入之麻布七十三万九千圆，运出之货三百九十八万四千圆。玻璃、磁器亦不少，制造之匠二百五十万丁。道光十八年，所运出货价八千九百九十四万五千圆，运入八千四百九十六万圆。船不远驶，共三千三百只，水手一万七千丁，火轮船十五只，其大船远航者，五百一十三只，东国之通商，在要要口曰多恼河面掘地开渠，以广河道，遍国流通，如平地焉。

论教化则东国只崇天主新教，不知有本教也，在书院之儒，务大学者四万八千，在庠序者二万五千余名，民之在学堂者百六十一万名，在小学五十九万名。都中淫风最盛。国多矿山，出五金、石、盐、石灰，计价银二千万圆，此时亦减。国有大臣六员，别有兵、刑、钱谷、工程、教化、大臣十员，其君亲民如子，时时游民间，以知其害恶。各国惟土君操权，云音等国则有五爵乡绅之公会，权过其君，每年公帑所收东国之银八千七百万圆，入不敷出，是以国家多出银票，然往往亏空，欠项四万万圆。其兵弁共计二十七万，水师中品船八只，下品船二只，二桅船三只，小船四十九只，共载炮五百一十门。

《瀛环志略》曰：日耳曼全国时，以奥地利为共主，诸部如畿内之侯，当查理第五王之兴也，掳佛王、服罗马、兼荷兰，声灵赫濯，几于霸矣，惜二教肇兵，貽谋不善，厥后，日耳曼列侯自王其国，无复臣主之分，奥虽疆土日辟而声威远逊，然西土论国势者，犹以峨、英、佛、奥为次第焉。

○波兰国〈（附格那耦。案：此即《职方外纪图》之波罗尼也）〉

波兰国，即古时之麻底阿，其人则斯可腊免种类也。语音庞杂，风俗强悍，当意大利盛时征讨各国，惟波兰未失寸土。自耶稣纪岁九百九十年〈（宋太宗淳化元年）〉，有摩尼斯老士始立国称王，建都于洼肖，迨千有四百年〈（明建文四年）〉，协稔女王嗣位，与里都阿那酋长查遮尔伦婚配，合为一国，仍曰波兰〈（里都阿那者《职方外纪》作里都亚尼，正在洲中海东岸，以与波兰合国故其海亦或名为麻底阿海云）〉。其后，国中土豪聚党数十万，擅权自恣，国王稍不如意，动辄废立，擅田土赋税，政自下出，王不能制。千七百七十余年〈（乾隆三十余年）〉，普鲁社、俄罗斯、欧塞特里阿三国遣人说波兰王，愿助兵诛锄顽梗，约割地酬劳，议未决。千七百九十有二年〈（乾隆五十七年）〉，三王合兵来攻，于是，被俄罗斯国夺去十部落，普鲁社夺去东普鲁社、西普鲁社、波新三部落，欧塞特里国夺去雅尔西阿一部落，波兰仅存洼肖与格那耦两部落，而格那耦近又不服统辖，波兰惟洼肖一区，然膏腴阜产，亦足供给，各小部落设有总领，如遇会议，各以兵自随，稍不合辄争斗，王亦置若罔闻，惟视其强弱而左右之，法旧严峻近改宽大，人咸欣悦，而各部落亦较前驯帖。

波兰国〈（东界俄罗斯，南界欧塞特里，西北界寒牙里）〉，幅员四万八千六百五十五方里，户三百七十万口，小部落四十有七，土人奉加特力教、由教、额力教。产布、呢、麦、木、谷。

格那耦〈（东南俱界牙里西阿，西界普鲁社，北界洼肖）〉在洼肖之南，地土肥厚，幅员五百方里，户二万四千八百口，土人尊奉加特力教。近自专制一方，不归波兰所辖。

○波兰国沿革

《职方外纪》：波罗尼，在亚勒马尼东北，极丰厚，地多平衍，皆蜜林，国人采之不尽，多遗弃树中者。又产盐及兽皮，盐透光如晶，味极厚。其人美秀而文，和爱朴实，礼宾笃备，绝无盗贼，人生平未知有盗，国王亦不传子，听大臣择立贤君，其王世守国法，不得变动分毫，亦有立其子者，但须前王在位时预拟，非预拟不得立，即推立本国之臣，或他国之君亦然。国中分为四区，区居三月，一年而遍。其地甚冷，冬月海冻，行旅常于冰上，历几昼夜，望星而行，有属国波多里亚地，甚易发生，种一岁有三岁之获，草、菜三日内便长五六尺。海滨出琥珀，是海底脂膏，从石隙流出，初如油，天热浮海面，见风始凝，天寒出隙便凝，每为大风冲至海滨〈（原无今补）〉。

《万国地理全图集》曰：波兰国内之地，一曰牙里西，林丛广坦，兼有沙，国出五谷、畜牲，林多狼、熊，献皮受赏。其土多出盐，百姓并拜天主圣像，信僧诱惑，民惟务农，不织布帛。其省会邻山城内有一文学院。一曰罗多麦，与牙里西为一国，其五爵代东帝治国政，百姓纳田赋税饷，待其五爵议定而后征收。其甲口城与其郊广袤方圆千五百里，居民九万三千丁，不服他国，城内多庙寺，繁尼僧通商邻地。

波兰国，昔日自主治民，因五爵相争，俄罗斯与奥地利、波兰两国分夺其大半，道光十二年，效死乱叛，然交战十馀合，不足抵御，自后仍归俄罗斯统辖。产五谷、蜜及木料，居民大半五爵之奴也。其都城曰挖稍城，居民十五万丁，其中三万犹太人，好攘夺。其东方称曰力刀地，与波兰国相仿，会城曰味里那，其内有文学院。窝希尼与破多里等部，昔归波兰国，遍处平敞〈（原无今补）〉。《地理备考》曰：耶稣一千八百十四载，有波罗尼亚国者，统归俄罗斯国，东至俄罗斯，西北皆连布鲁西亚国，南接加拉哥维亚国，长约一千二百七十里，宽约八百里，地面积方约六万三千七百里，烟户三兆九亿二万五千口，土地平坦，多湖河，饶谷果，产银、铜、铁、锡、煤、玉、纹石、硫磺、磁器等物，地气温和，一望平阳，无山障蔽，北风甚烈，所奉罗马天主教，或奉别教，概不禁止。技艺稍庸，匠肆鲜少。通国分为八部：一名马索维亚，乃会城也，每年由俄罗斯国王钦派总管官一员，驻扎节制。一名加拉哥维亚。一名三多迷尔。一名加利斯。一名鲁伯林。一名波罗谷。一名波达拉给亚。一名亚乌斯多窝。

又曰：加拉哥维亚国，原波罗尼国之地，当波罗尼国版图入俄罗斯国时，俄罗斯国王欲兼并一统，而奥斯的里亦欲据之，嘉庆二十年，各国公使齐集维耶纳地会议，将其地两不归并，另立一国，且议以俄罗斯、奥斯的里、布鲁西三部邦互相覆庇。北极出地四十九度五十八分起至五十度十六分止，经线自东十度五十三分起至十七度五十二分止，东北皆连波罗尼国，西界比里尼加河，南枕维世都拉河，地面积方约有六百二十里，烟户一亿一万四千口，本国一望平原，景色雅致，饶谷、果。地

气较波罗尼国尤暖，不设君位，黎庶自推官长理事，二载更易，奉罗马天主教，馀教亦不禁止，民人勤劳，贸易昌盛，会城建于维世都拉河岸，货物骈集，其加拉辣多慕拉哥尔、塞索维斯二处，温泉甚多，赴浴如市，乃本国人烟辐辏之地。

卷四十七

佛郎西之东、奥地利西、意大里亚北、日耳曼列国南有瑞士国，即绥沙兰〈（犹瑞丁称绥亦古也，一作苏益萨）〉。瑞人粗鲁，曩值意大里亚盛时，瑞亦以强称，率师攻击佛兰西，被意大里亚窥其空虚，遣兵往侵，几致覆国，不久旋为佛浪斯诸蛮夺据，裂为数国，以耶马尼为总领。传至哈士默，复合为一。嗣在鸦地东隅，择山谷形势，建筑险固之城，虽名属耶马尼，实专制一国。迨耶马尼无道，国中离叛，瑞国王恃城险可拒敌，兼有特尔之勇将，遂兴师与耶麻尼抗拒，连胜，从兹不受统辖。分疆域为十三部，以苏利赤为国都。百余年，复为佛兰西攻击，力不能敌，遂输诚于佛兰西。值西洋各国兵戈迭起，几作佛兰西，奥地利及俄罗斯三国之战场，民罹其荼毒，迨佛兰西波利稔王时始不受统辖，部众不愿立王，仅于麻尼各大部落议设总领并小官数员，权理国事。立法过严，复思离散，遂分二十二头目，各自为治，不相统属，惟于每年集五部落会议一次，递相轮次，周而复始，所以无非守土御敌之策。额兵三万二千，分隶各部，遇有事，按丁抽调，风俗俭朴，尊加特力教。文学以仁尼洼、疏留赤两部为最。河道三：蛮河自洼利斯起至仁尼洼湖止，阿河自麻尼发源至阿俄威阿止，吴河自额里渠至千斯顿湖止。产麦、谷、锤表、袈娑、布、麻布。

绥沙兰即瑞国〈（东北俱界奥地利国，西界佛兰西，南界意大里亚）〉，幅员万五千方里，户二百万有三千口，总部落二十有二，各设头目，不相统属〈（观此志注，断在洲中海之南不在海北明矣。彼图中涉海而北者，乃北方之瑞丁国，与瑞国判然二国也，则《海录》中在英吉利西少北一语谓瑞丁，非谓瑞国也）〉。

苏利赤〈（东界都耦，西界阿俄威阿，南界续地，北界斯渣付侯新）〉，领大部落一、小部落二十。

牙厘〈（东界奥地利国，南界额里渠，西界额腊力司，北界耶马尼）〉，领大部落六、小部落十有八。阿丙西尔〈（四围俱界牙尼）〉，领大部落二、小部落七。

都耦〈（东界奥地利国，南界牙厘，西界苏力赤，北界耶马尼）〉，领大部落三、小部落六。斯渣付侯新〈（东西北俱界耶马尼，南界苏力赤）〉，领大部落一，小部落五。

续〈（东界色锥斯，南界色锥斯，西界阿俄威阿，北界苏利赤）〉，领大部落一。

色锥斯〈（东界额腊力斯，南界乌厘，西界鲁沙尼，北界苏利赤）〉，领大部落二、小部落七。

额腊力斯〈（东北界牙里，南界额里渠，西界乌厘）〉，领大部落一、小部落一。

额里渠〈（东界斯渣付侯新，西界乌厘，南界底西那，北界额腊力司）〉，领大部落一。

底西那〈（东西南俱界意大里，北界额里渠）〉，领大部落二、小部落九。

乌厘〈（东界额里渠，南界底西那，西界麻尼，北界塞追司）〉，领大部落一、小部落五。

厘洼利斯〈（东界乌厘，南界意大里亚，西界洼利斯，北界麻尼）〉，领大部落四、小部落十有三。

洼瓦利司〈（东界里洼利司，西界仁尼洼，南界意大里亚，北界稔）〉，领大部落二。

麻尼〈（东界乌厘，南界厘洼利司，西界非里麦，北界梳留赤）〉，领大部落九、小部落三十有九。

唵那洼尔领〈（东界乌厘，南界麻尼，西北俱界鲁沙尼）〉，领大部落一、小部落四。

鲁沙尼〈（东界色锥司，南界唵那洼尔领，西界麻尼，北界阿俄威阿）〉，领大部落三、小部落九。

阿俄威阿〈（东界苏利赤，西界麻塞里，南界鲁沙尼，北界耶马尼）〉，领大部落一、小部落十有四。

麻色里〈（东界阿俄威阿，西南俱界疏留赤，北界耶马尼）〉，领大部落二、小部落十有七。

纽查底尔〈（东界梳流治，西北界佛兰西，南界稔）〉，领大部落二、小部落八。

稔部〈（东界非里麦，南界仁尼洼，西界佛兰西，北界纽渣底尔）〉，领大部落九、小部落二十有四。非厘麦〈（东南北俱界麻尼，西界稔）〉，领大部落三、小部落九。

仁尼洼〈（东界洼瓦利斯，西界佛兰西，南界意大利里亚，北界佛兰西）〉，领大部
落四、小部落三十有五。

案：瑞士，西北之山国也，东西南三界界山为境，如翠屏然，其东北界君士但湖，
西南界义尼威湖，自中部之路新地部西南有大山，亘百尼地之北。所罗顿地部、大
水之南，迤西而南，亘法奥地之西，义尼威湖亘其间。越湖而南，于湖东南径瓦勒
地部之西而西南、而南、而东南，绕他西那地部之西而北，径加律地部之南而东、
其孙地部之北而入日耳曼界。又绕其孙地之东而东南、他西那地之东入意大利国界
。其国之西北、巴悉邑西南有山绵亘，所罗顿地西、非布地西、义尼威湖西、义尼
威邑西、而南入意大利国西界。其由加律地西北一支、由亚实悉邑西而入日耳曼。
惟东北突奥地、正北士勒邑及路新地之东押奥地无山而已。

《万国地理全图集》曰：瑞国乃日耳曼、佛兰西、以他里三国中间褊小山地也，北
极出四十六度至四十八度，偏东自六度至十一度，广袤方圆五万七千方里，居民二
百万丁，高峰刺天，终年有雪，但其山水雄奇，远国之士每往遍游其地，欧国之大
河亦由此地流出。西方有湖，周绕密林，涧溪回环，鹿尘跃，无异园囿。其谷丰盛
，多产药材，又多牛畜，奶饼最香。其居民历六百年不服王化，游牧山谷，帐逐水
草，既无暴主苛政，各得其所，近日大半崇正教，拜救世主，其俗朴直而强健，是
以各国募其兵丁为王宫之侍卫，因效死忠，战最胜于各国之军焉。全地分二十二部
，在西南佛国交界，热尼瓦城建在湖滨。居民造时辰表，每年价银六百万两，所贩
于中国者大半，此城之民虽服瑞丁，然其贵人自主国政，最著之城，乃基坦敦害米
等邑。

《地球图说》：瑞西国又名瑞士国，东界阿士氏拉国，南界意大利亚国。西界佛兰
西国，北界亚利曼诸小国，百姓约有二百万之数，有至大之城，一名熟尼瓦城，然
非国王所建都也。国内分列二十二部，大半耶稣教，小半天主教，亦有书院以教养
幼士。民之言语，各随其地，北则亚利曼，西则佛兰西，南则意大利里等音。有山名
亚力伯，终年积雪，地多硗瘠，物产不多，大半牧羊，本阿士氏拉国所辖，昔有善
射者名得利，阿士底拉国官置苹果于其子首，令射之，一矢果落，而子不受害，由
是民不服，叛拒，自主其政，迄今六百三十年矣。道光二十八年，是国又不靖，尚
未和好。土产奶饼、药材、羊毛、布、时辰表、鹿等物。

《地理备考》曰：苏益萨国〈（苏、绥、瑞三字音近，亦犹瑞丁之作苏以天也）〉
，在欧罗巴州之中，北极出地四十五度五十分起至四十七度四十九分止，经线自东
三度四十三起至八度五分止，东至奥斯的里亚国，西连佛兰西国，南接奥斯的巴国
暨萨尔尼国，北界亚里曼国，南北相距约五百里，东西相去约七百五十里，地面积
方约二万四千里，烟户一兆九亿八万口。本国峰峦叠起，河之长者四，湖之大者十
四，山上则冷，平原则温，谷中则热，田土高则瘠，下则沃，平隰，产谷果，适敷
所需，草木丰茂，禽兽充斥。土产金银、铜、铁、锡、铅、煤、白玉、红玉、碧玉

、玛瑙、水晶、硫磺、硃砂、石膏、信石及各种花石等。至于朝纲，不设君位，惟立官长贵族等办理国务。奉罗马天主教者四及加尔威诺修教者六。贸易昌隆，匠肆林立。昔为罗马国统属，罗马衰，始为佛兰西、亚里曼等递取。元成宗大德四年，国人诛戮官吏，以避苛政，越八载，有乌黎、孰义的斯、翁德瓦里的三国，互相救援。明武宗正德八年，凡会盟者十二国。嘉庆三年，苏益萨国又为佛兰西占据，改为十九小国，迨嘉庆二十年，佛兰西国王那波良败绩后，苏益萨国复得自立，更有奥斯的里国会议为二十二部小国。素不养军，每国各按户口多寡应出壮丁若干，以防不虞。

其一给里孙。长二百五十里，宽一百八十里，地面积方三千八百八十里，烟户八万八千口，应出壮丁一千六百名。地居东方，通国分为三处，其三处一名给里孙，一名加德，一名森给里至。

其二伯尔尼。长三百里，宽二百里，地面积方四千七百六十里，烟户三十五万口，应出壮丁五千六百二十四名。地居中央，不设君位。

其三瓦来斯。长三百余里，宽十余里，地面积方约二千五百四十里，烟户七万口，应出壮丁二百八十名。地居南方。

其四瓦乌的国。长一百八十里，宽一百五十里，地面积方一千九百五十里，烟户十七万口，应出壮丁一千二百八十名。地居西方。

其五德西怒国。长一百三十里，宽一百二十里，地面积方一千四百八十里，烟户十万零二千口，应出壮丁七千八百零四名。地居南方，首郡并无常处，惟以北灵索内、卢加诺、罗加尔奴三地，迭相为首，每至六载，轮流更换。

其六桑牙禄国。长一百五十里，宽一百一十里，地面积方一千一百里，烟户十四万四千口，应出壮丁二千六百三十名。地居东方。

其七苏黎世。长一百二十里，宽一百一十里，地面积方一千二百四十里，烟户二十一万八千口，应出壮丁三千七百名。地居北方。

其八卢撒尔拿。长一百二十里，宽一百里，地面积方一千里，烟户十一万六千口，应出壮丁一千七百三十四名。地居中央。

其九亚尔科维亚。长百二十里，宽八十里，地面积方一千里，烟户十五万口，应出壮丁二千四百名。地居北方。

其十弗里不尔厄。长一百二十里，宽七十里，地面积方六百四十里，烟户八万四千

口，应出壮丁一千二百五十名。地居中央。

其十一乌黎。长一百三十里，宽六十里，地面积方六百七十里，烟户一万三千口，应出壮丁二百三十六名。地居中央。

其十二孰义的斯。长九十里，宽六十里，地面积方六百一十里，烟户三万二千口，应出壮丁六百零二名。地居中央。

其十三加拉利斯。长九十里，宽五十里，地面积方四百里，烟户二万八千口，应出壮丁四百八十二名。地居中央。

其十四牛弗砂德尔。长九十里，宽五十里，地面积方四百里，烟户五万一千口，应出壮丁九百六十名。地居西方，虽属不鲁西亚国王管辖，尚有国君分派之官四十五员。

其十五独尔科维。长百里，宽八十里，地面积方四百六十里，烟户八万一千口，应出壮丁千五百二十名。地居北方。

其十六翁德瓦里的。长八十里，宽六十里，地面积方三百三十里，烟户二万四千口，应出壮丁三百八十二名。地居中央，分为二处，其二处一名上翁德尔瓦里的，一名下翁德尔瓦里的。

其十七梭律勒。长一百二十里，宽八十里，地面积方三百五十里，烟户五万三千口，应出壮丁九百零四名。地居北方。

其十八巴勒。长八十里，宽五十五里，地面积方三百四十里，烟户五万四千口，应出壮丁九百八十名。地居北方。

其十九亚奔塞尔。长一百里，宽六十里，地面积方一百九十里，烟户五万五千口，应出壮丁九百七十二名。地居东方，分为内外二处。

其二十砂佛塞。长七十里，宽四十里，地面积方二百二十里，烟户三万口，应出壮丁四百六十六名。地居北方。

其二十一日内巴拉。长七十里，宽约二三十里，地面积方约一百二十里，烟户五万二千五百口，应出壮丁八百八十名。地居西方。

其二十二苏克。长五十里，宽三十里，地面积方一百五十里，烟户一万四千口，应出壮丁二百五十名。地居中央。以上皆自推乡官数十员理事。

其通商之地，曰巴勒，曰苏黎世，曰日诺瓦，曰森的加罗，曰加位利斯，曰挨里搔，曰牛弗砂德尔，曰名罗哥勒，皆大市埠。

《瀛环志略》曰：瑞士〈（瑞子、束色楞、绥沙兰、苏益萨）〉，在日耳曼南，奥地利西，佛郎西东，意大利北，东西约五六百里，南北约三四百里，万山叠峙，中峰高接霄汉、常积冰雪、欧罗巴大河多由此发源，山水清奇，甲于欧土，西境有官斯丹萨大湖，围以密林，萦以清涧，丰草芳褥，麋鹿群游，尤为幽胜。产五谷、药材，所造奶饵极甘香。居民大半以牧畜为生，夏月驱牛羊入山，秋冬乃返，国无苛政，风俗俭朴，数百年不见兵革，称为西土乐郊。古时地属罗马，罗马衰乱，北狄据之，旋为佛郎西所有，后为日耳曼所夺，其民戇勇，日耳曼选为亲军，临阵皆效死力战。初分三部，后分为十三部，皆推择乡官理事，不立王侯，如是者五百余年，地无鸣吠，西土美之，嘉庆三年，佛郎西摄王拿破仑〈（时拿破仑尚未即位）〉以兵力取入版图，改为十九小部，拿破仑败，各国公使会议于维耶纳益以牙错之日内巴拉牛、弗沙德尔〈（本属普鲁士）〉、瓦来斯〈（本属奥地利）〉三部，共二十二部，为瑞士国，仍其旧俗，共推乡官理事，酌地势、按户口拔壮丁御侮，诸大国不得钤制。

按：瑞士，西土之桃花源也，惩硕鼠之贪残，而泥封告绝，主伯亚旅自成卧治，王侯各拥强兵，熟视而无如何，亦竟置之度外，岂不异哉。花旗人甘明者，尝游其地，极言其山水之奇秀，风俗之淳古，惜乎远在荒裔，无由渐以礼乐车书之雅化耳。

卷四十八

○北土鲁机国〈（源案：此即古时额力西国，《职方外纪》作厄勒祭者也，与翁加国合成此国，其南境在阿细亚洲内者，曰南土鲁机。欧罗巴洲各国皆奉天主教，其奉回教者，惟此一国耳）〉

土鲁机种类甚多，原居鞑靼里中央、牙萨底斯之东北，与阿尔特山附近，其人伟躯赭面，不似蒙古鞑靼里人之瘦小，先日非国，仅一游牧回教耳，至耶稣千年〈（宋真宗咸平三年）〉，纠集诸部头目攻服邻国，由戈腊山而入巴社，夺得膏腴疆土，即在巴社立国称王，曰塞尔牙国，旋渡欧富腊底斯河，攻额力西，并攻阿丹，所至无敌，遂在小阿细亚又立国，曰罗翁国。后又有都鲁机之头目，攻胜西里阿等国，是时，阿细亚洲西边诸国咸属于都鲁机矣。恃其强悍横行侵并，天道好还，于是，欧罗巴各国与腊体讷国同时兴兵，夺其耶路萨陵、伊哥尼吾两部。维时，蒙古可汗亦由鞑靼里而攻其后，夺取巴社，并灭塞尔牙之王，皆在千二百十三年后〈（宋宁宗嘉走六年，金宣宗真祐元年）〉。嗣是，国中无数头目，各辖一方，而总辖于巴社之蒙古王〈（此元代征取西域，尽建藩封之时也）〉。千二百九十九年〈（元成宗大德三年）〉，有荷多曼者，少为海盗，后为西底阿头目，威服邻部，自立为王，遂为荷多曼国，其子荷占嗣位，旋夺得普鲁萨为国都。千四百五十三年〈（明景泰四年）〉，麻荷弥王又夺得额力西、观斯顿丁罗布尔二地，又攻击伊揖、麻马里、阿丹诸国，并格利弥阿之地，无不归附，威震欧罗巴洲。后又屡破寒牙里、威引那诸国，诸国连兵拒敌，丧师而返，复攻滨海罗尼士西普鲁及额力西各海岛，阻于石礁，不能进。千七百年〈（康熙三十九年）〉渐衰。千八百年间〈（嘉庆五年）〉，国王沉湎酒色，所属之巴札各据一方，其先日所取欧罗巴洲内各部落均起兵，尽逐土鲁机人出境，俄罗斯亦出大兵攻击土鲁机，屡战屡败，失去富庶数部落，从此不能复振。伊揖之巴札，原土鲁机旧藩，此时皆不受其统辖，巴札之兵，几灭土鲁机，卒割西里阿、巴里达两地，始讲解罢兵。政事与欧罗巴各国不同，权操自上，令出惟行弗惟反，国王谓之额兰西尼阿，西尼阿者，神影也，以为奉神命而来治国。国人怀前王荷多曼之德，故后世虽经变乱被弑，仍立其后裔王为本国回教之主，无敢訾议〈（与《西域闻见录》所述塞克国同）〉。

其设官有曰额兰威萨者，巡察城内货物真伪，额设六员，由巴渣官迁转。有曰加尼阿斯加者，校阅官军。曰利依斯分尼者，管理内外事务。曰特付那依分尼者，总理国库。曰直里弥依分尼者，总管水师官军。曰巴札者，管领官兵。曰磨尔那者，管理回教事务，兼掌教读书馆。曰麻富底者，掌理律例，为国中尊贵之人，王前佩剑仪制，与王略有少间。王见额兰威萨，趋迎三步，接见麻富底，趋迎七步。制反法令，悉由参定，作奸犯科，向无斩罪，增用椎钉地置死之条未尝施用，如有犯者，不过废弃而已。曰玉里麻者，专司案牒，由麻富底考试呈名，以听王定夺，审判案件，多有贿属。

宫中姬妾数百，多由巴札各属国竞献希恩。王无聘娶之礼，以至尊无人敌体，唯于群美中择立正妃一、庶妾七，余皆婢媵，如正妻废弃，即迁入旧宫，别立一人，王如薨逝，嗣王即将前王妻妾统禁宫中，有白阉人守外门，黑阉人供内役，因其丑黑可无防闲也。国中贵官燕居深厦，常有人侍立，其侍立之人，皆取机密不世者为其心腹，图充役者，多伪作朴实，以矮小聋哑为上。国库存贮总数秘莫能知，征税赋、支兵饷每年约计三百九十万棒。

兵有两种：一曰多孛那格里兵，乃当日荷多曼王精选壮士入伍，人给田三百余亩，遂为定制；二曰加毕居里兵，则随时考校入伍，孟夏孟冬大阅，昔日队伍为欧罗巴各国之最，近日远不如旧，而骑兵轻捷，尚精战斗，保守炮台，心力甚坚。国中遇有警急，招民为兵，未尝规避，惟行阵无纪律，所至虏掠，战则一鼓作气，长驱冲敌，衰则如鸟兽散，不知有节制也。

服饰风俗颇似东方，宽衣阔袖，与欧罗巴窄服相反，入户以去屐在外为礼。饮食箕坐，以手取食。女处深闺，与男子不接见，不通问，内外甚严，其人似勇实怯，似良实狠，似捷实惰，似庄肃实淫佚，似慷慨实吝啬。国中咸遵回教，以国王为教主，自夸其教之奥妙为别教所无，严酒禁，喜施舍，乐修馆廨，以居行旅，吸食鸦片，信符咒邪术，咒所禁者犯则处死。

文学浅拙，夺得额力西时，致额力西之文学几至毁灭，嗣有荷占王颇好文学，于普鲁萨部落大书馆，文人谓之马特勒西图，所赐甚厚，欲其久处肄业，以博玉里麻官职马特勒西图，文人有十等，年至四十岁方得上等，然其所学皆章句、辩论，不知格物穷理，反嗤他国所造千里镜、显微镜、量天尺、自鸣钟，谓是小技淫巧，其天文不识欧罗巴之历算而信阴阳家之选择，非吉日不敢行事。

其房屋、绘画、音乐等技，皆无巧妙，惟俗尚孝弟，其父母身后遗产，惟子弟得有之，外人无预。婚姻先议奁赠多寡，嗣议位置妾媵几人，庶出如嫡，若不生育，即结发之妻，亦许休弃，皆与欧罗巴相反。

其土人有三类：额力西人、由斯人、三角帽人，而额力西居其过半。由斯人即不见重所至，受人欺凌，皆以烧面为业，乃他人所不屑为之小贩。三角帽人伶俐俭朴，多在本国贸易，不甚外出也。额力西人较灵巧，有口辩，善交易，货无贰价，指天为誓，衣服尚长，以冠别贵贱。

自官府以至技艺人等，冠各有定制，饮食甚俭，无非菜蔬、橄榄、糖果而已，酒是回教所禁，而国王与贵人多好之，余皆不饮，各以鸦片代酒，食烟者众，每不及四十岁。土产地毡、羊皮、黄蜡、蜜、糖、鸦片、棉花、丝发、洋布、铜。

河道纷歧，在罗弥里阿首部落内有河九：马列沙河自大山发源，汇多尼箬河、野机

尼河、阿达河，合流南行，出地中海。哇达河汇特沙那河，合流出海；如斯特多马河、弥士多河、唵治加那斯河均南注于海；在摩尔达威阿部落有河四：温都河、西列河、密士特列河均自大山发源，勃律河通奥地里加国，四流汇合，同归那弥河，经麻尔牙里阿而出黑海。在洼腊赤阿有河八：斯载尔河自欧塞特里阿发源，阿鲁达河自大山发源，与荷尔特斯河、底流门河、阿日士河、单摩威沙河、惹林尼沙河、磨首河诸水交汇，由那弥河注黑海。在麻尔牙黑阿部落有河七：那弥河通奥地里加，阿底莫河、额力甘芷河、赞特腊河、珂斯马河、依斯加河、多斯河均归那弥河，与诸水汇流出黑海。在威沙阿部落有河三：依麻河、摩尔牙里奄河均归摩腊洼河，汇入那弥河入地中海。在格罗底阿部落有河四：沙威河通奥地里加国，与哇麻士河、摩士那河、雷那河三水汇归那弥河出地中海。在阿尔麻尼阿部落有河三：特领河、斯甘弥河、窝卒沙河，独流出地中海。在额力西部落有河四：马威荷河、沙林墨里河、阿斯勃罗波达河、希那达河，除马威荷河之水入湖外，馀俱分注地中海。

都鲁机国在欧罗巴洲各部落〈（黑海通连大海，东西南界海，北界俄罗斯、欧塞特里阿，西北界意大利）〉，管总部落十，大部落四十有六，小部落二百四十有八，大小岛三十有四。

罗弥里〈（东界海，南界海及额力西，西界阿尔麻尼，北界沙威阿、摩士尼）〉，领大部落八，小部落七十有五。

摩尔达威〈（东界黑海，西界奥地里加，南界洼腊治、麻尔牙里，东北界俄罗斯）〉，领大部落四，小部落三十有二。

洼腊治〈（东南界麻尔牙里之那弥河，西界沙威阿，北界摩尔达威，西北界奥地里加）〉，领大部落三，小部落二十有七。

麻尔牙里〈（东界黑海，西界沙威阿，南界罗弥里，北界摩尔达威之那弥河）〉，领大部落九、小部落二十有九。

沙部阿〈（东界麻尔牙里，西界摩士尼，南界罗弥里，北界奥地里加）〉，领大部落二，小部落二十有四。

摩士尼〈（东界沙威阿，西界格罗底，南界哈西俄威那、阿尔麻尼，北界奥地里加）〉，领大部落一，小部落十有二。

格罗底〈（东界摩士尼，西界意大利亚，南界哈西俄威那，北界奥地里加）〉，领大部落二，小部落五。

哈西俄威那〈（东界阿尔麻尼，西界意大利亚，南界海及意大利亚，北界摩士尼、

格罗底）〉，领大部落一，小部落八。

阿尔麻尼〈（东界罗弥里，西南界海，北界沙威阿、摩士尼）〉，领大部落六，小部落二十有一。

额力西〈（东界海，西界阿尔麻尼，南界海，北界罗弥里）〉，领大部落十三，小部落十六。

千地阿岛〈（在额力西之南少东）〉，领大部落二，小部落五。

○北土鲁机国沿革〈（原无今补）〉

《职方外纪》：厄勒祭〈（即额力西三字译音之转）〉，在欧罗巴极南地，分四道，经度三十四至四十三，纬度四十四至五十五，其声名天下传闻，凡礼乐、法度、文字、典籍皆为西土之宗，至今古经尚循其文字，所出圣贤及博物穷理者，后先接踵，今为回回扰乱，渐不如前。其人喜啖水族，不尝肉味，亦嗜美酒。东北有罗马尼亚国，其都城周裹三层，生齿极众，城外居民绵亘二百五十里，有一圣女殿，门开三百六十，以象周天，邻近有高山名阿零薄，其山顶终岁清明，绝无风雨，古时国王，登山燎祀，其灰至明年不动如故。有河水，一名亚施亚，白羊饮之即变黑，一名亚马诺，黑羊饮之即变白。有二岛：一为厄欧白亚，海潮一日七次，昔名土亚利斯多遍穷物理，惟此潮不得其故，遂赴水死，其谚云：亚利斯多欲得此潮，此潮反得亚利斯多。一为哥而府，围六百里，出酒与油、蜜，极美，遍岛皆橘、柚、香橼之属，更无别树，天气清和，野鸟不至其地。

又曰：翁加里，在波罗尼之南物，产极丰，牛羊可供欧罗巴一州之用，有四水甚奇：其一从地中喷出，即凝为石；其一冬月常流，至夏反合为冰；其一以铁投之便如泥，再熔又成精铜；其一水色沉绿，冻则便成绿石，永不化矣〈（案：翁加里，今并入北都鲁机，故附诸后）〉。

《海录》：祿〈（都律切）〉古国，在布路牙、吕宋、佛朗机之后〈（案：此都鲁机国也，祿，即都鲁二字之双声，疆域大而奉回教是其明证。云在吕宋、佛朗机之后者，言方向大概，非必接境）〉，在伊宣各国之北，疆域极大，本回回种类，人民强盛，穿大袖衣，裹头，服皮服，不与诸国相往来，西洋人谓之仍跛喇多者，犹华人言大国也，唯称中华及祿古为然〈（西洋称大国者惟中华及俄罗斯，《海录》中无俄罗斯者，专述海船贸易之国也。土鲁机兼跨欧罗巴、阿细亚二洲之境，故亦云大国）〉。

《万国地理全图集》曰：土耳其国，一作都鲁机，其地南接希腊国与群岛之海，北连俄罗斯、奥地利等国，东及黑海、马摩刺海湾、群岛海至海外，西至亚地业海。

隅，西北至奥地利国。北极出地自四十度至四十六度，偏东自十三度至三十度，广袤方圆三十万方里，居民八百万丁，北方之高岭，为土耳其交界，其多恼河为北疆，其平地不广，遍处山岭，沿海湾口甚多，北由君士但海峡与黑海相连，南由他他尼里与希群岛海交流。产棉花、烟、葡萄、南果、羊毛、羌花等货。其国古时列分，其居民族类各殊，至于土耳其为地主者，自新疆搬移亚齐亚西方。奉回回教。与蒙古族交战，败，自避山穴，招各盗贼据地，其头目号曰阿多曼，废国主而自立新国，时元成宗元贞五年也〈（按：此元代回回被蒙古军驱逐自葱岭以东窜往葱岭以西也。新疆乃本朝之名，元代则名别什巴里，此译者以今名称古地也）〉。其后裔专务攻击邻国，强之入回教。于顺帝至元年间，土耳其王督兵渡海峡，至欧罗巴地，胜败不常，两主继亡，巴牙屑王连战皆胜，于是蒙古大王侵国，巴牙屑王战败被虏，骄行渐减，其子孙如祖，复勇猛争战，于明朝景泰三年，攻取希腊之都，迄今为土耳其之国都也，连五十年得陇望蜀，攻击四方，伏尸遍野，自嘉靖年以后，王耽逸乐，臣下弄权，值俄罗斯国勃兴之际，肇衅相攻，俄罗斯百攻百胜，土耳其水陆战败，倘非列西国劝阻之，土耳其国则已倾覆，然佛兰西国恒救其危。道光元年，希腊畔之，土耳其力战，终不能胜，希腊遂自创立新国矣。六年后，土耳其再与俄罗斯死战，不胜，纳银千万员，又割交界各地以讲和。道光二十年，英国助土耳其王强服叙利地，但其国基已废，倾倒在旦夕，其妻妾奴共计六百口，择一位为其宠妃，初生子者为王后，殿内白黑阉官中，多黠慧便嬖用事。兵共十万，全国分二十八部，各部总领每弄权，下民，及其有罪，资业被籍入官，以充国帑。每年各税饷银千万员，欠项银四千万员，步兵九十四万丁，骑兵一十二万四千丁，大战舰八只，师船二十四只。今述土尔其各部如左：

路默利部。在东南方，居民大半土尔其人，好逸恶劳，惟勇攻战，节食禁酒，终日吸鸦片，饮珈琲，衣服甚美，以帕包头幘纒以吸烟之故，肩缩面瘦，形貌猥衰，坚执回教，藐视他人，尊贵者随意娶妻妾。其国都君士但城，在马湾边，乃罗马君士但丁汗于东晋年间所建，海港广，便各国商船所集。内有王宫，其广如城，其回回大殿，即昔耶稣门生之堂，山水美景环之。亚得安城，周围十五里，内有古殿。加利城，在罗马海湾，居民万七千丁，经商贸易。

路北不牙部。居民奉希腊教门，风俗话音与俄罗斯相近，其民安业勤劳。会城居民五万，由陆路通商顺刺，城池坚固，击退俄罗斯军，在此山隘，多恼河滨筑城设堡防备。

路西北布尼城，地多山岭，出铁，其中二分。奉希腊教门，怨恨土官，往往起乱。

息味部。向西北，居民奉希腊教，不服回回管辖，并力攻拒，国王强操政令。省会别甲邑，城池坚固，屡被敌伐守御不陷。

亚刺万部。在海边，地方崎岖，居民射猎好斗，天下精兵也。会城曰药翰尼那，昔其总领逆国主，连年守御，居民三万五千丁，土民猛毅刚直。黑坐义小部，遍路巉岩，民居山谷，颀陋勇猛。

瓦拉基地，长一千零八十里，阔四百五十里，居民九十七万丁，地平坦，河滨沆茫，田宜麦，野多群畜，土民崇拜救主耶稣，惟官吏横征私派，民皆忍受。其都布加力，居民八万丁。

东北末大味地。广袤方圆五万一千方里，居民五千万丁，西方多山岭，产五谷、南果、葡萄、烟、蜜、蜡、硝、盐、马、牛、豕，每年售马万计，恒时被虐主压服，亦蒙俄罗斯护恤以避土王之勒索。其都城曰牙西，在群岛中，据于地亚洲，周围千五百里地，海滨丰亩，其橄榄果成好油，居民好自专制，土耳其二十三年，强击而不能服之。大半崇希腊教门，其岛山水最美，居民万五千丁，岛之海口渐以沙淤，阻船进口。

《地球图说》：土耳其国，东界黑海，南界地中海并希腊国，西界亚得利亚海并阿士氏拉国，北界奥地里加及俄罗斯国，百姓约七百万之数。都城曰君士旦丁，内民六十万。述耶稣教、天主教、回回教、希腊教。其民首不戴帽，以帕围之，身穿长袍，席地坐，饮食不用匙、箸，以手搏之，尚信守约。土膏衍沃，栽种不劳，故其民怠惰，好战猎，吸鸦片。国王独揽政权，臣下无言责。民风男尊女贱，一男可娶数女。有大江名拖奴俾，中有高山，曰喜麦。产绵花、烟叶、架非、葡萄、南果、羊毛、羌花、鸦片、蜜、蜡、硝、盐、铁、马、牛、羊、豕、橄榄油。

《地理备考曰》：土耳其国分三州：一在欧罗巴州，一在亚细亚州，一在亚非里加州，地土广阔，烟户繁滋。

土耳其国在欧罗巴州之南者，北极出地三十六度二十分起至四十八度二十分止，经线自东十三度起至二十七度三十分止，东至厄罗斯国暨黑海，西连奥斯的里国，南枕地中海暨额力西国，北接厄罗斯、奥斯的里二国，长约二千五百里，宽约二千里，地面积方二十五万里，烟户九兆口，地势南方则山，嶄岩參崖，络绎不绝，北方则平原坦阔，湖河纷歧。河至长者九，湖至大者十，田土最腴，谷果极丰，南方所产草卉，移植本国靡弗适宜。林木稠密，药草备具，为欧罗巴州各国之最。产铜、铁、锡、铅、矾、磺、纹石等物。地气温和，惟污秽触犯，人多疾病。在昔，汗位历代相传，于今分为四国，或汗或王，称谓各异。教奉科马尔回教，别教需损资方不禁止。技艺平庸，除都会外，匠肆不多，所造仅敷所需，贸易兴隆，惟官长掣肘，庶民荒弃，是以国内生理皆外客经营。

本国昔属罗马国，迨罗马国西迁后，夷狄侵扰，元成宗年间，有非里日亚酋长，侵夺额力西国之布鲁萨地，僭称为王，号曰科多马诺国，传至其子，开辟疆土。越六

十一载，其孙默拉德者嗣位，攻陷安多黎诺伯勒城而建都焉。其子又拒退佛兰西、亚里曼二国来侵之师。厥后，蒙古人侵犯亚细亚州各地，本国之君巴耶西德者，前赴救之，为蒙古王达美尔兰所擒获。传至摩拉多者，占据英吉利国属地甚多，破翁给里亚国之兵，迨其子马何美德王攻克的诺伯拉城，迁都其地，此后，历代嗣君与欧罗巴各国交兵。康熙二十二年，本国始衰，师多败北。乾隆五十四年传至塞黎慕王，丧地于厄罗斯国，复失厄日度于佛兰西国，三年后，始再克复。嘉庆十二年国人变乱，两次废立，又立马科美德王，即现在之君也。通国昔分七部，今改四国：一土耳其基，又名科多马诺，一塞尔维亚，一袜拉几，一摩尔达维。其塞尔维亚等三国，皆自立为国，不归土耳其基统辖，但每岁纳贡于其国，以存旧属之谊。

其一科多马诺国。东枕黑海，西南至地中海暨奥斯的里国，地面积方约十五万三千里，烟户七兆口，君位世袭。国分四大部：一曰罗美里，首郡曰伯拉，乃本国都也，建于官士丹的诺伯拉峡，在黑海与马尔马拉海之间，从外而观，则楼台叠起，景色美丽；自内视之，屋宇朴素，街衢曲隘，然学、医各院，书库、浴室，靡弗备具，市廛林立，商贾云集，惟路涂污秽，瘟疫流行。一名波斯尼亚。一名西里斯的黎亚。一名曰萨壹尔。

其二塞尔维亚国。东至袜拉几亚国，西连科多马诺国，南接罗美里部，北界奥斯的里国，长约七百里，宽约三百五十里，地面积方二万二千五百里，烟户三亿八万口。侯爵世袭，通国分为十七府。建都于日索袜、达奴比约两河交汇之处。

其三袜拉几国。东南二方皆在达奴比约河，西连塞尔维亚、翁给里二国，北接摩尔达维国暨奥斯的里国，长约一千里，宽约五百五十里，地面积方三万一千一百二十里，烟户七亿九万口。侯爵世袭，通国分为十八部，建都于冬波维宜的萨河岸。

其四摩尔达维国。东至厄罗斯国，西连奥斯的里国，南接达奴比约河暨袜拉几国，北界厄罗斯、奥斯的里二国，长约七百五十里，宽约四百里，地面积方二万一千四百五十里，烟户四亿五万口。侯爵世袭，通国分十三部，建都于高阜之上，其通商冲繁之地，或濒海边，或在腹内。

《外国史略》曰：欧罗巴各国，惟土耳其基最广，居民聪明，聚集如云，罗马人降其地，数百年后，其旧君之裔复立国焉。

唐时，中国西界有土耳其族，望西迤邐，初与西域民战，自唐顺宗后，渐进回教，据印度西方犹太之地，南宋以后，欧罗巴各国以其占圣墓地，合军攻退之，后蒙古游牧又攻之，走匿山内。元武宗至大年间，有夷目曰阿士曼，招各山贼，恢复全地，再立土耳其族于亚悉亚之西，所虏之人，悉断其势皮为回回以入阵，死亡千万，更招他族少壮者为兵。

明初在欧罗巴希腊地立国，闻北地构乱，欲侵取各国，尽绝耶稣教，立回教，于明建文帝六年连败欧罗巴各国之军，所虏者几万人。后益务侵欧罗巴地，于明英宗正统四年再战数载，欧罗巴人败绩，自后土耳其势日浩大，于嘉靖二十九年摩含默号第二王即位，欲称雄盖世，甫立，即募水陆军攻据希腊之都，越五十年，土耳其攻伐四方，据其地，又伐意大利国。嘉靖七年，围东国之都，日耳曼各君皆畏其势，其地中海水师任意驶驾，惟登陆攻城每不克而退。二百五十年内阅十三君，皆知好武广地，但国无法度，后始设教师，布律法以治其民，其君惟听命于臣妾，歿后继子，尽杀其兄弟，各部兵帅，滥索居民，遂屡叛，君屡被废。越三百年，欧罗巴各国日强，而土耳其国尚与东国结衅，战争不息，于康熙二十一年，东国合力鏖战，大胜，尽复前所失地。于时，俄罗斯乘势攻土耳其，取其地，凡在黑海边之国，皆一一归俄罗斯，同天主教门之国俱叛之。土耳其军又驶渡攻麦西国，与英人交战，道光元年，所属希腊民亦叛焉，于是，英吉利、佛兰西、俄罗斯三国，皆集师以攻土耳其国，尽殄其水师，余众遂奔希腊，希腊人助以兵卒，复创立其国，其军伍训练，悉遵西洋法度，君颇聪明勤政，外国皆称颂焉。

土耳其，本列国也，居民各异，在欧罗巴广袤方圆九千五百二十里，居民千五百五十万，在亚西亚三万四千七百五十里，居民千二百五十万，在亚非利加方圆三万八千四百三十里，居民五百五十万。

在欧罗巴之地有三所，名为土耳其之属，其实服事俄国。

一摩道。广袤方圆八百零三里，居民四十五万，居东国俄罗斯之间，南连土耳其，北极出自四十五至四十八度三十分，多恼河并他匿得等河皆经流此地。多牧场，所畜蕃盛，亦出蜜蜡。其居民未向化，风俗不醇，皆因希腊以崇天主教。虽务农，鲜制造，有蚂蚱屡茹其田，五爵恣其勒索，故民最贫乏。务通商，其君受土耳其之敕命，然即位必先由俄国议准方能管其地，是以俄国之势益大。

一瓦拉基。在摩道之南，其西南两边与土耳其交界，西北与东国相连，北极出自四十三度四十分至四十五度三十分，广袤方圆千二百九十七里，居民九十五万，多恼河亦通此地，丰五谷，居民怠惰，无所经营，多缺乏，其君俯听俄国之命。

悉比焉部，北极出四十二度及四十四度五十分，广袤方圆五百六十里，居民九十万，北至东国、土耳其国，三方环山，多矿，但民不知掘，产五谷，多葡萄。其居民善养牲畜。无五爵，惟有农夫、匠、教师三品，各任贸易，不服外国，于明英宗天顺年，悉比邑与回回战败。越四百年，民苦酷政，故生异心，于嘉庆五年，众民啸起攻击，酷主因与国人盟。今所立之君甚聪明，招乡绅会集议论，各国称颂，岁贡于土耳其。募兵万二千以防御。

多恼河南边多建固城，其中最要者，系百牙拉，即土耳其军所守者。外有新立之国

，曰峨拉或黑山，广袤方圆六十五里，居民十万七千，在阿得利亚海边，土耳其终不能强服。居民自选头目，恣为海盗，亦贩卖牲畜，崇希腊之天主教。

布尼焉部分上下，在东国南及亚得利亚海隅，广袤方圆千零六十三里，居民八十五万，崇希腊天主教者三分之二，余为回回。多山林，出南果、葡萄、牲畜，造刀剑最精。都会曰撒拉约，居民六万，所寓悉茅舍。

布牙里，系广地，东及黑海，北连瓦拉基，广袤方圆千七百四十里，居民百八十万，东方平坦，出牛、羊、五谷、葡萄、铁、钢、蜜糖。居民所崇之教与前不异，其都曰所非亚。北方有坚城，四面环之。

亚巴尼部，在亚得利亚海边，广袤方圆七百里，居民三十万，语音各异，崇希腊之教。屡次叛逆。海边多支港，海贼所丛入。

土耳其最要之部曰路米里，广袤方圆四千四百里，居民六百八十万，多山磐腴田。君士旦，居民六十五万，本古城也，山水若仙界，昔所立天主礼拜堂，甚宏丽，今为回回会处。其城在七山下，有海峡，其街狭，宫殿大而不美，海港极广，多风，无巨浪。亚得利亚邑，居民十万。牙利邑，在海峡，居民八万。撒罗尼，居民七万，大半崇回教，惟希腊人能勤，土耳其人则惰。

群岛之最大者曰千地亚，广袤方圆八十八里，居民二十七万，周朝时极旺相，居民百二十万，久服希腊国，后意大利威尼得据之，此康熙四年也。山水甚美，山峰高七百二十丈，地丰盛，居民万二千，畏土耳其之酷，不敢垦作，其城与岛同名，居民万二千。道光年间，土耳其虏掠百姓，戮者不胜数。其他岛虽小，各出橄榄油、葡萄等物，多水师，为海贼所惧。古时，此岛各自为国，土耳其遏其势，归回教，中亦多商，在各港贸易，希腊之族，尤狡狴善骗。

土耳其君操全权，昔有嗣君畏兄弟分权，尽杀之，其政悉按回回法，立辅政大臣四员，又立教师以办法律及教门各事，其大臣统摄文武三军，兼理国事，各部设头目，经理百姓，每自恃富强，擅权与国主战，故多作乱，俄罗斯及他国争来攻之，幸欧罗巴各国为之防御得免。民分三品：一曰回回族，最尊贵；二曰徭事，是崇希腊等教之门人，亦同纳赋；三曰奴婢，即由外国所贩卖及本地所养者。其国之兵三十七万，岁入国帑银二千五百万圆，有大战舰、火轮船，水手多系希腊人。

《瀛环志略》曰：土耳其三方，古大秦东境〈（即意大利之罗马）〉，为西域，自古著名地，东方创辟最早，巴庇伦建国于前，西里亚代兴于后，犹太〈（一作如大，又作如氏亚，又作如德亚，又作儒德亚）〉即唐书所谓拂菻国、以色列之族由此兴焉，其国自夏、商历汉季，传世最久，令辟贤王，后先辉映，西土为希腊开基之地，君士但丁则罗马东都，比于雒邑，泰西远隔，神州礼乐车书之化，无由渐被

，而在彼土言之，则此数千里者，固商周之耿、亳、豳、岐声名文物之所萃也。

土耳其本回部贱族，窜身买诺，遗种繁滋，遭时衰乱，揭竿而起，恃其兵力，蚕食东西，遂使名城堕毁，典业散亡，文献无征，风流歇绝，三方之民，就俎醢之地而困膾污之俗者，数百年于兹。观泰西人所著书，西土之困于苛政也尤甚，胜广之徒，时时攘臂，而彼昏不知，犹晏然为羊车之游，亡可翘足而待矣。

泰西诸国，跨亚细亚、欧罗巴两土者，惟俄罗斯与土耳其。土耳其，疆域之大不及俄罗，而擅膏腴之壤，据形便之地，百年来无止戈之日。七椿园，讹为控噶尔，又以千馀年前一统之罗马移之土耳其，又称俄罗斯本其属国，控噶尔用东西迭驾之法，俄罗斯大困，增贡乞和乃免。此出乌巴锡诅咒之言，而《闻见录》信之，误矣。两国黑海亘隔，风马牛本不相及，自俄罗斯开高加索部〈（详俄罗斯图说）〉而与土之东壤接，又开波兰诸部而与土之西境毗连，其初构兵在乾隆中年，维时俄罗斯勃焉方兴，战攻甚锐，土耳其衰机甫兆，兵力犹强，胜败之数，大略相当，后则南风不竞，割讲频仍，近年内讧四起，危如累卵，然究未为俄所兼并者，则由英、佛护持而排解之也。欧罗巴人最恶回教，土耳其之昏虐，又诸国所鄙夷，英、佛于土非有所爱，特以俄罗斯北地荒寒，不长水战，故仅能比肩英、佛，未足定霸一方，若土耳其为所兼并，则地兼三海〈（波罗的海、黑海、地中海）〉，于欧罗巴已扼吭而拊其背，诸国其能晏然已乎。

卷四十九

《万国地理全图集》曰：希腊国者，土耳其邻国也，东、南、西三方至群岛海，北接土耳其国为半土，北极出地三十六至四十二度，长一千二百里，阔三百里，广袤十万一千方里，居民百九十二万。年运出一千有二百万员。产绵花、南果、羊毛、干葡、荀果、橄榄油、五谷、烟，天气和暖，岭险峡邃。

古时，希腊民艺术超众，博学通达，工师营筑庙殿，及今尚传古迹，其匠刻象如活人，其画工画山水林泉，摹写传神。周敬王十九年，白西国王率军兵立寨数里，旗鼓遍野，师船满海，水陆并攻，当时，希腊之民效死力战，击退敌兵，以后国人益豪志吞邻国。有马其屯王，倾国往攻，皆为白西王所败，侵至印度，国王病殒，帅臣分其国地，各自为王，缘此，希腊文字、语音广布各地，故希腊人教化天下，不论至何处，皆有其文艺，其诗书列西国人无及之者也。

东汉年间，罗马王强服四方，亦攻脍希腊，列国归入版图，国人失其壮志，自后乃变其战法，以蛮类攻击罗马西地，及东西罗马相分之际，其东帝恒驻于边，希腊始仍自为国，不受意大利节制，救世主降世五十年后，希腊民奉其教，弃绝神佛，惟拜独一真主，阅三百年执正教。此后，加特力教异端迷世，希腊见诱惑陷，如是，救世主道理渐衰，存其名而离其实，既而回回始兴，志吞希腊国，希腊连年拒敌，再夺再失，其嗣王复多丧德，虽列西国合军攻击，回回以据犹太国，亦不能守地而退，及土耳其于兴时，其回回如虎面翼，复力侵希腊国，强取其地。明景泰三年，土耳其国来攻，重城长堑，希腊民若釜中鱼，国民四散，三百七十年受侵不已，民不能堪，于道光二年愤起畔土耳其，列西国悯其雄气，各出精兵助之，土耳王不得已退军，封希腊，使自主，近日偃武息争矣。庶民好华，冠服效土耳其族，女梳其发为巧髻，身盖薄彻绵帕，男女悦歌喜乐。沿海港口甚多，土民好航海贸易，商贾巧而无信。国都曰雅典，宫殿古迹为万世建字之格式。古时，众士聚其城中，辩道论理，耶稣之门生保罗至其邑传道，其神庙皆倾倒，尚存古迹而已。

其所辖之部，一曰那破里。海口通商，居民万五千丁，得波敕撒城坚固，土耳其兵攻破之，多所杀戮，希腊民报其仇，再获城后，虐杀土耳其之人，以暴易暴焉。一曰巴答城，乃其海口，街道芜秽。墨所龙义城被希腊族人固守之。帖撒罗尼加城，居民六万丁，种绵及烟，勤劳度生。尚有群岛中归其国版者希达，屿虽硗，勤农经商，故其居民四万，饮食无乏，所有八摩海岛，于东汉和帝永元七年，耶稣门弟约翰流于此岛，上帝以天启传之。

又曰：希腊国沿海所有海湾，在东方曰君得撒，曰罗尼加其，南方曰尼鄂本多洲，曰益义那，曰那破里，其西方曰尔加地，曰勒颇多，深入其地，为微地，不成半土，称曰摩力亚。其山中多游牧野夷，希腊西边，又有倚阿尼等岛，居民共计十九万丁，所出橄榄油、干葡萄、酒、蜜、南果。其岛皆有土酋掌岛政令，与英国始战终

和，通商多日。《地理备考》曰：希腊国，一名厄肋西亚国，即额力西，在欧罗巴州之南，南界地中海，东西枕海港，北连土耳其国，长约七百五十里，宽约五百里，地面积方约二万零八百三十里，烟户七亿口，本国地势，巉岩参差，络绎不绝，湖河众多，皆非甚巨，岛屿湾峡，回环罗列，田土腴腴，谷果丰登，五金各矿，昔具今乏。地气温和，王位历代相传。奉额力西天主教，馀教亦不禁止，技艺不甚精。

一曰惹尼亚海岛。在欧罗巴州南，其国土在北极出地三十六度起至四十度止，经线自东十九度三十分起至二十三度十分止，在额力西国西南方，除诸小岛外，其至大者惟七，烟户一亿七万六千户，山势峻峭，石阜间隔，田土硗瘠，谷果敷用，地气温和。不设君位，民间自立官长理事，五载更易。技艺庸常，贸易甚盛。

本国昔属白西里国管属，嘉庆三年，为佛兰西国君那波良者克服，迨与各国战败后，各国公使齐集维耶纳地方会议，将本国另行建立，以英吉利国永为覆庇，英国派官辅理，凡有国务，与英国派官互相酌议。通国以七巨岛分为七部：一名哥尔佛，乃本国都也；一巴说，回环六十里；一三达卯拉，地面积方约一百五十里；一宜达架，长六十里，宽二十五里；一塞发罗尼，长一百五十里，宽约五六十里，回环五百五十里；一三德，长五十里，宽三十里，地面积方一百八十里；一塞黎各，回环一百八十里。其国通商冲繁之地三处，皆在海边。

《地球图说》：希腊国，东南西三面都界地中海，北界土耳其国，其百姓约七十五万之数，都城曰雅典，城内民二万。所述之教，昔与耶稣教相似，至今则大不同。其都城昔亦美大，后为土耳其国入境，毁城易俗，今城尚修筑未完。政事与群臣议叙，不自专。人性好航海贸易，故其水手眼灵手敏，然奢华，悦歌唱，女善梳髻，而性端淑，身盖薄彻绵帕。产葡萄、酒、橄榄油、五谷、蔦叶、绵花、南果、羊毛。再西有七岛，总名以阿尼，现归英国保护。

《外国史略》曰：希腊国，一名额力西，其文字原由东方来，商太丁二年，结群相斗，围古城，陷之，其国诗人能述其事。后各族类各立国，相仇。周夷王十六年，士巴他国立新例，并教以武艺，故其民善骑走，以勇怯为贵贱。后至周顷王十二年，在亚典国兴立法律，传及后世。此后立志通商，独士巴他国用铁钱，以物交易，不喜文学。时西国雄长海峡，所有小亚悉亚等国皆纳贡物，希腊人不服，西国遂攻之，希腊人因击退白西人，自此国势大兴，立水师官，文学显著，万民尊敬。维时，白西国王于周贞定王十八年，在海峡建桥，以侵希腊国，亚典人皆离其本地，登船以避敌，又与士巴他等族在关隘峡死战，破白西之军，走其国王，希腊人于是自为其主，实赖亚典人之力，而亚典人又擅权，增饷困民，驱其王而自立新王曰巴巴他，亲统大权，与列西国屡世攻击。汉景帝十年，为罗马军所降服，自后归罗马国者五百余年。

东晋哀帝时，罗马国封为东国，所驻之都曰君士旦丁邑，即土耳其君所居处，令改希腊拜偶像之俗。迨宋、齐间，有北方匈奴，岁来侵掠，屡和屡战。唐时，有回回亚拉国，侵占东方，即土耳其也，希腊国君死战，不能击退，驱希腊之君而自即位。明孝宗十五年，全地归土耳其，独有数岛为意大利威尼得国所据，于明万历元年，列岛亦归土耳其。希腊求援于同教门之俄罗斯，乾隆间，俄军逼迫土耳其，破其战舰，道光六年，英人与俄罗斯、佛兰西等国水师焚其战舰，择日耳曼之君以为希腊王，又皆出财以佐其国帑，又责土耳其勿再扰其界，道光十三年，希腊人遂为国如初。

英吉利藩属地之以云群岛，在希腊之西，共有七岛，最广大者曰可赋岛。西法罗尼，散地耳，广袤方圆四千七百里，居民十七万五千口，虽不出五谷，尚能产棉花、橄榄油、盐、鱼、南果等物，民之贫者，皆离本地，出外图生。昔此地有小国，后归罗马，嘉庆二年，佛兰西夺占此岛，英人驱之，于嘉庆十七年，招该岛之乡绅会议国政，且调兵士四千守之。其居民有志能学，且勤工匠。

《外国史略》曰：希腊国，微地耳，北与土耳其国连，东西北三方及群岛之海，广袤方圆八百六十八里，居民九十三万三千口。其属多小岛，遍地分二十四部。在摩利亚微地，田地居十分之五，山林、川湖、树菜等圃各居十分之一，农夫约十万，所产五谷，不足民用，必运自外国。别出颜料、葡萄、橄榄油、蚕丝、细果。海边人善捕鱼，民喜通商，道光二十一年，出入货共值四千三百七十五万二千二百圆，其商船三千一百九十七只，水手万八千六百名，内多为海贼。海港甚多，可避风。岛民颇向化，如叙刺岛、安多岛、米哥尼岛、希得拉岛、破罗岛，文墨狡狴。其都曰雅典，居民二万五千，无大屋宇，古多文艺。在摩利亚微地之会城曰得破勒撒，居民二万五千。在海隅最大之邑曰那波利，山水甚美，可巡游，多题咏焉。其王孙曰耳曼人，常召各郡贵人，助理其地，有七大臣，摄内外国务。国之欠项三千五百员，每年所入国帑约四百万员，军士共万二千，水师之舟三十四只，其贵人各相争斗。

按：额力西国沿革，别详欧罗巴州总叙，其希腊仅守其都城一区之地，故不以其全事载于此国，犹意大利沿革亦冠于欧罗巴总叙，不以入今列国中，反致全州沿革无纲领也。

《瀛环志略》曰：《泰西故事》云：上古之时，欧罗巴草昧未辟，人兽杂处，有虞氏之初，小亚细亚两河之间〈（已见前）〉有初立国者，曰巴庇伦〈（一作巴必鸾，又作巴必罗尼亚，详土耳其说）〉。夏后氏之初，阿非利加之北境有初立国者，曰厄日多〈（即麦西，详阿非利加说）〉。后有诺威氏之裔，曰日弯，建国于亚细亚之买诺〈（即土耳其中土）〉，其国人渐有渡海峡而西者〈（即他大尼里海峡）〉，始知有额力西广土。夏后少康二十六岁，买诺人有伯辣斯日者，始立国于额力西之北境，曰西西恩，逾九十馀岁，有厄日多人迁于额力西，名其地曰的丹，立国

未成，众思故土，散归。夏后孔甲二十一岁，迦南人议纳孤〈（一作桔木）〉抵额力西之南境，始鸠集人民，教以营宫室，种谷麦，昏蒙渐启。商王外壬十二祀，厄日多之洒的斯人洒哥落率其邑人迁于雅典，立国曰亚德纳斯〈（一作亚地拿）〉，始兴技业，立法制，辨伦类，造文字，额力西诸国，闻风效慕，荒陋之俗一变。

商王沃甲十三祀，亚德纳斯王昂非的安嗣位，是时，希腊分十二国，时有诟争，昂非的安恐诸国之自相攻，则心力不齐，无以捍大敌，乃驰使十一国，结为同盟，立公会于德尔摩比勒，每国遣使二人，岁二会，申约结，齐好恶，讲求利弊。又各出蓄积，贮于德尔佛斯堂，以备军储，每国以二人司之。由是，四邻辑睦，十二国如一国，外侮不生，晏然康阜。驾舟行地中海，懋迁有无，势益富强。当是时，十二国中惟亚德纳斯与斯巴达〈（一作士帕大）〉最大，诣小国制度皆效两国所为。

亚德纳斯王德修以商王廩幸六祀嗣位，时国人分三等：曰爵绅，曰百工，曰农民。爵绅多专恣剥民，工农贫乏，国浸弱，德修王患之，乃汰官司，裁署舍，抑损豪贵，躬揽大权，惠民招商，远方归之如市，技业日精，盖藏日富，遂为西国大都会。子哥德落斯嗣，守成法，益加惠于工农，由是爵绅无权，而庶民之势重。哥德落斯卒，庶民私议曰：贤主不可再得，传之贪残，民且重困，乃扬言曰：能以入必德尔为君者，当听命。入必德尔，西国所奉宗祖之神也。从此不立国王，以长官一人治事，曰阿尔干，以哥德落斯子孙为之，继序如王，而权体稍杀，越三百三十余年〈（周平王三十六年）〉，国人又以为不便，定议阿尔干三年而更，寻废阿尔干，立九官以治事，九官由众推选，以三年为秩满，贤则留，否则更，然事权纷错，奸宄日多。有达拉固者，以才学称，众公举修刑书，其性严刻，罪无大小，皆予殊死，时人号为血尽。行之数十年，国人侧足。周灵王年间，公举梭伦，重定法制，删其苛刻，酌情罪，归平允，国人大悦。复建议事厅一，法制司一，以资财之多寡分齐民为四等，每等百人，有兴革则集议于议事厅，法制司设品官，定员数，选才德出众者领之，发号令，定刑赏，皆由法制司。区画精详，舆论翕然。方亚德纳斯之废王而立官也，德巴斯首效之，诸小国亦纷纷效之。德巴斯者，旧本非尼西亚人〈（详阿非利亚图说）〉，其王加达慕斯于商王武丁年间立国于额力西者也。迨梭伦重定法制，诸国又效之。

斯巴达自勤利斯开国，传四百余年，至周成王十一年，有幽里寺德、那斯伯罗刻黎斯者，兄弟也，同即王位，自是国有二王，同朝治事，其制传八百余年不改，西土传为异事，至末造之噶黎厄美尼斯始改为一王。周夷王年间，其国有贤主曰利古尔厄，重定法制，与梭伦之法大略相同，而兵制尤为尽善。俗俭嗇，人壮武，尝伐米西奈国，灭之，得其膏腴之土，国势益强。是时，东方之波斯国方强，再灭巴庇伦，势张甚，顾额力西诸国，以外夷贱之，不加齿礼。会波斯有大将，本额力西人，波斯王厚遇之，擢其侄高班，其侄叛附亚德纳斯，亚德纳斯有罪人义比亚斯奔波斯，复挑构之。周敬王二十九年，波斯王以舟师伐亚德纳斯，乞和不许，于是额力

西诸国合纵御之，波斯破其大屿，燔其城，亚德纳斯大将率众破波斯于马拉多拉，夺其七船，波斯王达黎约惭愤死，子泽耳士立〈（一作舍尔时斯）〉，誓雪仇耻，以三万人伐额力西，造长桥于他大尼里海峡，长二千丈，以渡军，斯巴尔达扼险拒之，波斯军败走，坏其船四百艘，亚德纳斯以计诱其馀船入内港，围而斂之，泽耳士王大怒，倾国三十万众攻亚德纳斯，亚德纳斯弃城保于别屿，波斯毁其城，诸国咸来助战，争先陷阵，波斯军大溃，狼狈东走，泽耳士王乘渔舟遁。

先是，额力西诸国自昂非的安联盟之后，同心协力，屡破大敌，至是争取波斯遗财，颇有违合，亚德纳斯城扼海口，操形胜，且聚商舶，擅利权，斯巴尔达素忌之，既为波斯所毁，亚德纳斯人欲建复，而斯巴尔达阻挠之，由此两国交恶，盟约解散，诸小国各有所附，日启争端。

亚德纳斯之西有大洲曰西基利〈（即西治里）〉，属于加尔达额，有亚基庇亚底者，生长此洲，任侠好施，素得众心，见亚德纳斯衰乱，因募兵攻之，破其水军，斯巴尔达与亚德纳斯有夙嫌，乘乱以大兵围其都城，毁之，亚德纳斯遂为亚基庇亚底所据。由是额力西诸国互相攻，日益衰乱。已而马基顿兴〈（一作马斯多尼亚）〉，马基顿亦十二国之一，在额力西北方，初甚微弱，周显王年间，有王曰非黎卑，雄武有权略，与额力西诸国交兵，累战皆克，使客游说之，皆纳款为属国。王欲伐波斯，会中刺客死，子亚勒散得〈（一作阿勒山德黎）〉嗣位，年二十三，英略过人，周显王三十有五年，以三万五千人伐波斯，取小亚细亚〈（即买诺、叙里、犹太诸内）〉，波斯望风奔溃，其王弃营走，虏其妃后，因移兵巡行海上，攻破加尔达额之城都，屠八千人，并征服麦西〈（即厄日名）〉，堕其沿海各城，所向披靡，游其至五印度皆纳款，列东藩。波斯王悉起境内兵，决死战，王击破之，围其苏撒都城，会遘疾，旋师至巴庇伦，卒于军，诸将各引所部，据新辟之土自王，从此，额力西族散布西土，至汉初尚馀四国，曰厄多里亚，曰亚加压，曰白阿西亚。仍以马基顿为长。

马基顿王非黎卑，性强暴，凌侮属国，三国患之。时罗马征伐四方，兵力方强，三国密求援，罗马命将以大兵入其希腊都城，因兵胁三国降，三国悔失计，求助于西里亚〈（一作叙里亚）〉，西里亚者，兼小亚细亚诸部，即土耳其东中两土，为东方大国。时阿非利加之加尔达额国新败于罗马，亦赴西里亚求援，西里亚讬四国亡，势且及已，率轻兵救希腊，罗马迎击之，西里亚王大败，遁归，罗马兵踵至，围其都城，西里亚降，希腊四国闻之，皆纳土降，地归罗马，时汉惠帝五年也。

额力西诸国，建于夏、商，至汉初乃亡，凡历一千数百年，古分十二国，乃今西土耳其全境。新希腊则雅典一部，古亚德纳斯之南境也。其雅典都城最讲文学，为泰西之冠，凡西国文士，未游学于额力西，则以为未登大雅之堂也。

希腊新分十部，首部曰雅典〈（一作亚的架）〉，都城在海湾。曰亚德纳斯，自昔

为声名文物之地，今则市井寥落，景象萧条。亚尔哥黎大〈（一作拿破里）〉城在海口。曰脑比里亚，通商之大埔头也，亚加亚城在海口。曰巴达辣斯〈（一作巴答）〉，亦通商埔头，街衢污秽，商旅恶之。美塞尼亚〈（一作墨所龙义）〉，首邑曰亚尔加的亚，希之坚城，土人屡攻之，不能下。亚尔加的亚，首邑曰的黎波里萨〈（一作德破勒撒）〉，亦希坚城，昔为土耳其攻破，屠三千人，希人收复之，后尽戮土人之居守者。拉哥尼亚，海中大屿也，首邑曰迷斯达拉〈（一作希达）〉居民六万，土饶瘠而农作甚勤，兼务工商，故恒足以自给。亚加尔拿尼亚〈（一作尔加地）〉，首邑曰瓦拉说黎，在西界海湾。罗哥黎大首邑曰萨罗大〈（一作座撒罗尼加）〉，居民六万，勤苦力作，产绵花、烟。忧卑亚，西界一洲，首邑曰哥罗奔多〈（一作尼鄂奔多）〉。昔加拉大，首邑曰黑尔靡波利斯〈（一作摩力亚）〉，中有山岭，放流徒于此，以此著名。海湾甚多，东方曰君得撒、曰撒罗尼加，南方曰益义拿、曰拿破里、曰可伦，西方曰尔加地、曰勒颁多。希腊之西有群岛，曰各府，曰散他，曰藐刺，曰地亚其，曰客花罗尼，曰息利峨、曰散地，总名曰以阿尼岛，居民共计十九万。产橄榄油、葡萄干、酒、蜜、南果，岛各有渠，掌政令，属于英吉利。

卷五十

○英吉利国总记〈（原本）〉

英吉利，又曰英伦，又曰兰顿，先本荒岛，辟地居处，始自佛兰西之人。因戈伦瓦产锡最佳，遂有商舶往贸。于耶稣未纪年以前，蛮分大小三十种：居于西者，曰墨士厄；居于北者，曰木利庵斯；居于南者，曰西鲁力斯；居于糯尔和者，曰委力斯，曰矮西尼；居腹地者，曰萨，曰埂底伊。尚有诸蛮，俱居于弥特色斯。旧皆茹血，衣毳，文身，惟脉士厄数种，渐兴农事，创技艺，制器械，修兵车，各蛮效之。旋被意大利国征服，旋叛旋抚，至耶稣纪岁百五十年〈（汉孝桓帝和平元年）〉，分英地为七大部落：曰景，曰疏色司，曰依掩那司，曰委屑司，曰落滕马兰，曰伊什，曰麻可腊，与邻部塞循各自治理。八百年间〈（唐德宗贞元十五年）〉，委屑司之伊末，遂并合七部为一国。始名英吉利，建都兰顿，从此不属意大利。又二百年〈（宋真宗咸平三年）〉，为领墨攻击，遂属领墨。其后叛服不常，公举壹贺为王，传至显利二代王，先得爱伦，次得斯葛兰。显利四代王，即弃加特力教而尊波罗特士教。至显利七代王，娶依来西白刺为国郡〈（案：英夷称其王妃曰郡）〉，始革世袭之职，皆凭考取录用，开港通市，日渐富庶，遂为欧罗巴大国。

○职官

律好司衙门，管理各衙门事务，审理大讼，额设罗压尔录司四人，厄治弥索司二人，爱伦厄治弥索司一人，录司二十一人，马诡色司十九人，耳弥司百有九人，委尔高文司十八人，弥索司二十四人，爱伦弥索司三人，马伦司百八十一人，斯葛兰比阿司十六人，即在斯葛兰部属选充，三年更易。爱伦比阿司二十八人，即在爱伦部属选充，统计四百二十六人。有事离任，许荐一人自代。凡律好司家人犯法，若非死罪，概免收禁。

巴厘满衙门，额设甘弥底阿付撒布来士一人，专辖水陆兵丁。甘弥底阿付委士庵棉士一人，专司赋税，凡遇国中有事，甘文好司至此会议。

甘文好司，理各部落之事，并赴巴厘满衙门会议政事，由英吉利议举四百七十一名。内派管大部落者，百四十三名，管小部落者，三百二十四名，管教读并各技艺馆者四名。由委尔士议举五十三名，内派管大部落者，三十名，管小部落者，二十三名。由爱伦议举百有五名，内派管大部落者，六十四名，管小部落者三十九名，管教读并各技艺馆者二名，统共六百五十八名。各由各部落议举殷实老成者充之。遇国中有事，即传集部民，至国都巴厘满会议，嗣因各部民不能俱至，故每部落各举一二绅耆，至国会议，事毕各回。后复议定公举之人，常住甘文好司衙门办事，国家亦给以薪水。

布来勿冈色尔衙门，掌理机密之事，供职者先立誓，后治事。

加密列冈色尔衙门，额设十二名，各有执事，曰法士律阿付厘特利沙利〈（管库官）〉，曰律古色拉〈（管官）〉，曰律布来阿付西尔〈（管印官）〉，曰不列士顿阿付冈色尔〈（管官）〉，曰色吉力达厘士迭火厘火伦厘拔盟〈（管官）〉，曰色吉力达厘阿付士迭火哥罗尼士奄窝〈（管官）〉，曰占色拉阿付厘士支厥〈（管官）〉，曰法士律阿付押弥拉尔底〈（管官）〉，曰马士达依尼罗付厘曷南士〈（管官）〉，曰布力士顿阿付离墨阿付观特罗尔〈（管官）〉，曰占色腊阿付离律治阿付兰加司达〈（管官）〉。

占色利衙门，专管审理案件，额设律海占色腊一名，司掌印判事之职；委士占色腊一名，司判事之职；马士达阿付离罗士十一名，司判事之职。每判事，二人轮值，周而复始。扼冈顿依尼拉尔，司理算法之职。

经士冕治衙官，专司审理上控案件，额设知付质治一名，布依士尼质治三名。

甘文布列衙门，专审理职官争控之案，额设知付质治溢士知加衙门，专审理田土婚姻之案，额设知付马伦一名，布依士马伦三名。

阿西士庵尼西布来阿士衙门，额设撒久六，每撒久设质治二名，共十二名，专司审讯英吉利人犯，每年二次。依尼拉尔戈达些孙阿付厘比士衙门，每年审讯各部落人犯四次。

舍腊达文衙门〈（此官职掌原缺）〉。

历衙门，每年派马落百人稽查各部落地方，是否安静，归则具结一次。

额设律占麻连官，值宿宫卫；马士达阿付厘伙士，专司马政；色吉力达厘押窝，专司收发文书；特里舍厘阿付利尼微，管理水师船；勃列士顿，阿付厘墨阿付特列，专司贸易；委士勃列士顿阿付厘墨阿付特列，副理贸易；比马士达阿付厘伙士，专司支放钱粮；陂率马士达依尼拉尔，专司驰递公文；流底南依尼拉尔阿付厘曷南士，协理火炮；法士甘靡孙拿阿付厘兰利委奴，管理田土钱粮。押多尼依尼拉尔，即总兵官。疏利西多依尼拉尔，即副总兵官。爱伦额设律流底南阿付爱伦一，律占色腊一，甘曼那阿付厘贺些士一，知付色吉力达厘一，委士士厘沙腊一，押多尼依尼拉尔一，疏利西达依尼腊尔一，皆驻扎爱伦。

○军伍

额设水师战舰百有五十，甘弥孙百六十人，管驾水师战舰。水师兵九万人，水手二

万二千，英吉利陆路兵八万一千二百七十一名，阿悉亚洲内属国兵丁，万有九千七百二十名〈（此所述军伍之数，毫无夸张，取可信。盖此书本夷字，非翻成汉字者比也。惟无养兵饷数，是为疏漏之大者）〉。

○政事

凡国王将嗣位，则官民先集巴厘满衙门会议。必新王背加特力教，而尊波罗特士顿教。始即位国中有大事，王及官民俱至巴厘满衙门，公议乃行〈（民即甘文好司供职之人）〉，大事则三年始一会议，设有用兵和战之事。虽国王裁夺，亦必由巴厘满议允。国王行事有失，将承行之人交巴厘满议罚。凡新改条例，新设职官，增减税饷，及行楮币，皆王颁巴厘满，转行甘文好司，而分布之。惟除授大臣及刑官，则权在国王，各官承行之事，得失勤怠，每岁终会，核于巴厘满而行其黜陟。

○王宫岁用

甘文好司，岁输银二百五十五万员，凡有金银矿所产金银，与赃罚银，俱供王宫支发。称国王曰京，岁需银三十万员。称王妻曰郡，岁需银二十五万员。值宿官曰占麻连，管马官曰土底赫，管家官曰麻司达阿好司，岁需银七十七万员。护卫官曰班侍阿勒尔，岁需银三十七万五千员。此外尚有津贴罗压尔之宫，噙土达之官，吾官里士曼等官，岁需银八十五万员，综计每年王宫需银五百九万五千员〈（国用止述王宫，而不及官禄，兵饷金额，殊不可解）〉。

○杂记

兰顿国都银号一所，因昔与佛兰西战，亏欠商民本银四十二万四千一百四十一万有奇，息银万有六千九百二十七万有奇，书票付给，分年支取。河道先不通于各港，嗣经疏浚厄兰特冷河，长九十里，疏浚历士河，长百二十里，又浚依尔力斯靡耶河，厄兰精孙河，厄兰王尼河，四通八达。舟由港口至各部落，任其所之贸易大便。兰顿建大书馆一所，博物馆一所，渥斯贺建大书馆一所，内贮古书十二万五千卷，在感弥利赤建书馆一所，有沙士比阿，弥尔顿，士达萨，特弥顿四人，工诗文，富著述，俗贪而悍，尚奢嗜酒，惟技艺灵巧。土产麦豆稻，不敷居食仰资邻国商贩，千八百年，各国封港，外粮不至，本国竭力耕作，粮价始略减。所产呢羽，皆不及佛兰西，纺织器具，俱用水轮火轮，亦或用马，毋烦人力。国不产丝，均由他国采买。

英吉利国在欧罗巴极西之地，四面皆海，南距佛兰西，仅一海港，东近荷兰罗汶，东临大海，与士千里那威耶对峙，西抵兰的，北抵北极洋。幅员五万七千九百六十方里，户口千四百一十八万有奇。国东平芜数百里，西则崇山峻岭，大部落五十有三，小部落四百八十有五。

弥特色司部〈（东界伊什，西界墨经含，南界舍利，北界赫治）〉，领小部落三，兰顿国都其首部也。都在甜河北岸，东西距八里，南北距五里，户口百四十七万四千有奇。兵四千四百名，产金银时辰表珍宝波达酒。

落滕马兰部〈（东界海，西南皆界斯葛兰，北界特尔含）〉，领小部落十有七。艮马伦部〈（东界特尔含，西界海，南界兰加，北界斯葛兰）〉，领小部落二十有三，产铅。

育社部〈（东界海，西界兰加社，南界郡弥，北界特尔含）〉，领小部落四十有三，产粗呢、白矾、白呢、绵花、地毡、细呢。

委士摩含部〈（东界育社，西北皆界艮马伦，南界兰加社）〉，领小部落七。

兰加社部〈（东界育社，西界海，南界支社，北界委士摩兰）〉，领小部落十有七，有兰加士达炮台一所，产呢布、盐煤、波达酒。

支社部〈（东界那弥，西界佛凌，南界奈勒社，北界兰加社）〉领小部落七，有士顿博炮台一所，土产盐。

那弥部〈（东界纳鼎含，西界士达贺，南界利达洗，北界育社）〉，领小部落七，土产磁器铁铅煤。

讷鼎含部〈（东界领戈吾社，西界那弥，南界利洗达，北界育社）〉，领小部落八。领戈吾社部〈（东界海，西界讷鼎含，南界感密利治，北界育社）〉，领小部落二十二，土产呢长羊毛。

勒伦部〈（东北皆界领戈吾社，西界斯达，南界落含社）〉，领小部落三。

利洗达部〈（东界勒伦，西界洼隘，南界落尔顿，北界讷鼎含）〉，领小部落六，产毡袜。

斯达贺部〈（东界那弥，西界余勒社，南界窝洗斯达，北界支社）〉，领小部落七，产煤铁盐。

余勒社部〈（东界斯达贺，西界闷俄脉里，南界希里贺，北界支社）〉，领小部落九，产橡木。

佛凌部〈（东界支社，西界领糜，南界领弥，北界海）〉，领小部落二。

领弥部〈（东界佛凌，西界格那完，南界闷俄脉里，北界海）〉，领小部落五。

格那完部〈（东界领弥，西界敖额里西，南界麻里垣匿社，北界海）〉，领小部落四。

敖厄里西岛部〈（南界格那完，东西北俱界海）〉，领小部落四，产铜。

麻里垣匿社部〈（东界闷俄脉里，西界海，南界加里凝，北界格那完）〉，领小部落四。

闷俄墨里部〈（东界余勒社，西界麻里垣匿社，南界那落社，北界领弥）〉，领小部落三。

加尔里部〈（东界墨力诺，南界格尔马廷，西界海，北界麻里垣匿社）〉，领小部落三，产铅。

拉落社部〈（东界希里贺，西界加里凝，南界墨力诺，北界闷俄脉里）〉，领小部落四。

希里贺部〈（东界窝洗士达，西界墨力诺，南界满茅治，北界余勒社）〉，领小部落五。

洼洗士达部〈（东界洼隘，南界俄罗洗士达，西界希里贺，北界斯达贺）〉，领小部落五，产磁器细呢。

窝隘部〈（东界落尔含，西界窝洗斯达，南界恶斯贺，北界斯达贺）〉，领小部落七，产铜扣针。

落斯含顿部〈（东界韩鼎伦，西界洼隘，南界墨经含，北界利洗达）〉，领小部落五。

韩鼎伦部〈（东界戈密力治，西北皆界落含顿，南界脉贺）〉，领小部落二。

感密力治部〈（东界萨，西界韩鼎伦，南界赫贺，北界领戈吾社）〉，领小部落四。

落尔和部〈（东界海，西界感密力治，南界萨，北界海）〉，领小部落一十五，产羽毛呢哔叽五采缎。

伊什部〈（东界海，西界赫贺，南界景，北界萨贺）〉，领小部落三十，产麦呢。

萨部〈（东界海，西界感密力治，南界伊什，北界落尔和）〉，领小部落七，产短羊毛。

赫贺部〈（东界伊什，西北皆界墨经含，南界敏特塞司）〉，领小部落四。

脉贺部〈（东界感密力治，西界墨经含，南界赫贺，北界韩鼎伦）〉，领小部落五。

墨经含部〈（东界赫贺，西界恶斯贺，南界脉社，北界落含顿）〉，领小部落五。

恶斯贺部〈（东界脉经含，西界俄罗洗斯达，南界脉含，北界洼隘）〉，领小部落五。

俄罗洗斯达部〈（东界恶斯贺，西界满茅治，南界稔社，北界窝洗斯达）〉，领小部落八，产细呢铅布煤。

墨力诺部〈（东界希厘贺，西界格马廷，南界厄拉磨凝，北界拉落）〉，领小部落三。

格尔马廷部〈（东界墨力诺，西界宾吕鹿，南界海，北界加里凝）〉，领小部落三。宾目鹿部〈（东界格马廷，西西北皆界海）〉，领小部落四。

额腊磨凝部〈（东界满茅治，西界格马廷，南界海，北界墨力诺）〉，领小部落七，产铁锡马口铁煤。

满茅治部〈（东界俄罗洗斯达，西界厄腊磨凝，南界海，北界希里贺）〉，领小部落三，产绵花、羊毛、铁、煤。

戈伦和尔部〈（东界里完，西西北皆界海）〉，领小部落一十七，有戈伦和尔炮台一所，产铜铁锡。

里完部〈（东界疏马什，南界海，西界戈伦和尔，北界海）〉，领小部落二十三，土产锡。

疏马什部〈（东界稔社，北界俄罗洗斯达，西界海，南界落尔什）〉，领小部落十

四，产羊毛。

落尔什部〈（东界含社，西界里完，南界海，北界疏马什）〉，领小部落十。

稔社部〈（东界含社，北界俄罗洗斯达，南界落尔什，西界疏马什）〉，领小部落十一，产大呢、小呢、铁、细地毡。

含社部〈（东界舍利，西界稔社，南界海，北界脉社）〉，领小部落十六，其首部距兰顿甚近，产橡木。

疏色司部〈（东界景，西界含社，南界海，北界舍利）〉，领小部落十六，产棉花、羊毛。

景部〈（东界海，西界舍利，南界疏色司，北界伊什）〉，土旷而沃，物产丰盛，所属落洼之新圭博，在国之南，海舶出入要港，距兰顿甚近。对海即是佛兰西，实兰顿咽喉之所。设立落洼大炮台，水师巨舰多泊此，及渣咸两地，所有军装器械，火药火炮，均贮渣咸库，领小部落十七。

舍利部〈（东界景，南界疏色司，西界含社，北界兰顿）〉，领小部落七。

脉社部〈（东北界皆恶斯贺，西界稔含，南界含社）〉，领小部落五。

特尔含部〈（东界海，西界艮马伦，南界育社，北界落滕马兰）〉，领小部落九。

萌岛部〈（四面界海）〉，与艮伦对峙，领小部落四。

○英吉利所属斯葛兰岛附记

斯葛兰地，三岛相接，一河中流。东南平旷，西北多山。本爱伦之人所辟，中为斯葛司与毕斯割据东南，遂名其地曰斯葛司。又有士特那腊里律割据西北，于耶稣纪年五百时〈（南齐永元二年）〉，并吞斯葛司，建部落于阿果律山上，传二百五十馀年。为塞循之根尼刺所灭，易名斯葛兰。后有布鲁士与巴利葛互争，英国之壹贺王，以兵助巴利葛，立为王，传至士都轧，无道，部众渐怨，于千六百有三年〈（明万历三十三年）〉，英吉利遂乘间灭之。以伊邻麻社为首部落，设官通商，然其众心，至今向士都轧而不向英国也。伊邻麻社首部落，设色孙衙门一所，官十五人，以听讼，益士知加衙门一所，以征赋税，岁征银二千三百八十五万员。甘文好司一所，执事四十五人，皆由官民公举。大书馆一所，贮书十万卷，习俗固执，胆大经营。河渠五，火腊河，发源边罗冕山麓，至付利刺阿港出海。珂来底河，度稔河

，均源于揽绯里斯社，一由腊纳社出海，一由麻邑出海。又有一河，发源和化，至拔社分流，一经行出海，曰底河。一环绕而至曼付社出海，曰泗比河。

斯葛兰〈（东南界英吉利，西北界海）〉，幅员二万九千六百方里，户二百三十六万三千八百四十口，大部落三十，领小部落三百三十八。

伊邻麻社〈（东界哈领顿社，南北界海，南界北墨尔社，西界领利俄社）〉，领小部落七。

领利俄社〈（东界伊邻麻社，北界海，西界斯达凌，南界伊邻麻社）〉，领小部落三。

慕斯麻社〈（东南界英吉和，西界揽绯里斯社，北界麻威壹社）〉，领小部落九。

揽绯里社〈（东界 慕斯麻社，西界埃野社，北界那纳社）〉，领小部落十有四。

加尔格墨利社〈（东界揽绯里社，南界海，西界稔达温，北界埃野社）〉，领小部落七。

稔达温社〈（东界加格墨利社，西南界海，北界埃野社）〉，领小部落五。

埃野社〈（东界揽绯至社，南界稔达温社，西界海，北界凌埠流社）〉，领小部落十有七，产呢煤盐。

凌埠流社〈（东界那纳社，南界埃野社，西界海，北界揽麻顿社）〉，领小部落四，产布纱袈娑布。

那纳社〈（东界斯达凌，南界凌埠流社，西北界阿埃尔社）〉，领小部落十有二，其首部有那纳炮台，产布纱羽毛纱。

比墨司社〈（东界西尔格社，南界揽绯里社，西界那纳社，北界依邻麻社）〉，领小部落三。

西尔格社〈（东南界 慕斯麻社，西界比墨司社，北界依邻麻社）〉，领小部落三。

麻壹社〈（东界海，南界 慕斯麻社，西界依邻麻社，北界哈领顿社）〉，领小部

落十。

哈领顿社〈（东北界海，南界麻壹社，西界依邻麻社）〉，领小部落五。

斯达凌社〈（东界领九俄社，南界那纳社，西界揽麻顿社，北界拔社）〉，领小部落八，其首部有炮台二所。

揽麻顿社〈（东界斯达凌社，南界凌埠流社，西北界阿埃尔社）〉，领小部落二，其首部有炮台。阿兰岛〈（在千代耶之东，埃野社之西）〉，领小部落一。

阿埃尔社〈（东界拔社，南界海，西界海，北界英哇尔社）〉，领小部落三十七，其首部有炮台二所。

拔社〈（东界和化社，西界阿埃尔社，南界斯达凌社，北界英哇尔社）〉，领小部落二十四。

噶利满兰部〈（东界邑匪社，南界海，西北界拔社）〉，领小部落四。

邑匪社〈（东界海，西界噶里满兰，南界海，北界拔社）〉，领小部落十有三，其首部有经哈伦炮台，产大花缎、煤。

和化社〈（东南界海，西界拔社，北界阿麻领社）〉，领小部落十有二，其首部有炮台二。

经加那引社〈（东南界海，西界和化，北界阿麻领社）〉，领小部落七。

阿麻领社〈（东北界海，南界和化社，西界曼付社）〉，领小部落二十九。曼付社〈（东界阿麻领社，馀三方原缺）〉，领小部落八。麻立社〈（东南界曼付社，西界泥伦，北界海）〉，领小部落五。

泥伦〈（东界麻立社，南界英哇呢斯社，西界罗士社，北界海）〉，领小部落一。

英哇呢斯社〈（东界阿麻领社，西界海，南界阿埃尔社，北界罗斯社）〉，领小部落三十八，产布。

罗斯社〈（东西界海，南界英哇尼社，北界沙特兰社）〉，领小部落二十六。

沙特兰社〈（东界结尼司社，西界海，南界罗士社，北界海）〉，领小部落一十三

。

结尼司社〈（西界沙特兰，东南北皆界海）〉，领小部落十一。

○英吉利所属爱伦国附记

爱伦在英吉利之西少北，独峙一岛。佛兰西始开垦，公举头目综理阔略。耶稣纪年九百，始属于领墨。二百余年，为英吉利侵夺，以腊墨领为首部落，设官约束。法令严刻，止准货物运售兰顿，不许通他国。部众劫于威心，皆不服，遂于千六百四十年〈（明崇祯十三年）〉，聚众屠杀英人四万，尽驱馀众出境。旋为兰顿兵平服，后乘英国与弥利坚连年争战，爱伦人始得渐与他国贸易。千七百九十八年〈（嘉庆三年）〉，英国与佛兰西争战，佛兰西阴结爱伦人为助，爱伦遂复。叛军无纪律，佛兰西不及救应，数月，仍为英吉利所平。自后英国亦敛其苛政，设爱伦总理大员，驻扎腊墨领，并建书馆，贮书十万卷。赋税，每年征收银二千二百万四百七十六员。河道三，麻罗河，自领塞发源，至瓦达贺港口出海。杉冷河，自阿兰山发源。摩目河，受各湖之水，汇归杉冷河，由利墨里港口出海。产豆麦牲畜，郭地产金沙金块，每块有重二十四两者〈（郭地名）〉。爱伦四面皆海，在英吉利之西少北，幅员三万方里，户口七百七十六万七千四百有奇。大部落三十有二，小部落四百四十有二。

岭部〈（东界海，西北界密，南界温罗）〉，领小部落六，产银。

吉尔那厘部〈（东界温罗，南界加楼，西界亏引斯加温逮，北界密）〉，领小部落十三。

奄特林部〈（东北界海，西界伦，顿那厘，南界那温）〉，领小部落十有六，其首部曰敏尔化戍，有大炮台，产夏布棉布。

伦顿那厘部〈（东界奄特林，北界海，西界伦俄尔，南界带伦）〉，领小部落十有二，产布。

伦俄尔部〈（东界带伦，西北界海，南界化蛮那）〉，领小部落二十有九。

带伦部〈（东界伦顿那厘，西南界摩那寒，北界罗尼俄尔）〉，领小部落二十，其首部有大炮台。

腊温部〈（东南界海，西界阿马，北界奄特林）〉，领小部落二十，产夏布。

阿马部〈（东界那温，西界摩那寒，南界律，北界带伦）〉，领小部落八，产夏布。

。

摩那寒部〈（东界阿马，西界化蛮那，南界密，北界带伦）〉，领小部落九。

化蛮那部〈（东界摩那寒，南界带伦，西界里特临，北界伦俄尔）〉，领小部落九，产麻。

加完部〈（东界摩那寒，南界密，西界里特临，北界化蛮那）〉，领小部落九，产夏布。

里特临部〈（东界加完，南界朗贺，西界色厘俄，北界海）〉，领小部落七，产布。

色里俄部〈（东界里特临，西界麻约，南界罗斯感门，北界海）〉，领小部落十有一，产布。

麻约部〈（东界色里俄，西北界海，南界牙尔卫）〉，领小部落十有九，产布。

牙尔卫部〈（东界罗斯敢门，西界海，南界吉利野，北界麻约）〉，领小部落三十有六。

罗斯敢门部〈（东界朗贺，西界麻约，南界牙尔卫，北界色里俄）〉，领小部落十有二。

朗贺部〈（东南界卫色密，西界罗士感门，北界里特临）〉，领小部落六。

卫塞密部〈（东界密，西界罗斯敢门，南界经士加温，北界加完）〉，领小部落八。

密部〈（东界拉墨领，南界吉尔拉里，西界卫色密，北界摩那寒）〉，领小部落十有六。

律部〈（东界海，西界摩那寒，南界密，北界阿麻）〉，领小部落七，产夏布羽毛纱。

经士加温部〈（东界吉尔拉里，西界牙尔卫，南界亏引士加温递，北界卫色密）〉，领小部落八。

格列野部〈（东界底比那里，南界里敏利，西界海，北界牙尔卫）〉，领小部落十

有六，产铅铁煤。加里部〈（东南界郭，西北界海）〉，领小部落二十有一。

郭部〈（东界哇达活，南界海，西界加里，北界离敏里）〉，领小部落三十有二。

离敏里部〈（东界底比那里，南界郭，西界加里，北界吉列野）〉，领小部落十有四。

底比那里部〈（东界吉尔景尼，西界离敏里，南界哇达贺，北界牙尔卫）〉，领小部落二十有三。

哇挹贺部〈（东界温斯稔，西界郭，南界海，北界底比那里）〉，领小部落十。

吉尔景尼部〈（东界加楼，北界亏引斯加温逮，西界底比拉里，南界哇达贺）〉，领小部落十有一。

亏引斯加温逮部〈（东界吉尔拉里，西界底比那里，南界吉尔景尼，北界经斯加温）〉，领小部落七。

加楼部〈（东南界温斯贺，西界吉尔境，北界吉尔那里）〉，领小部落五。

温罗部〈（东界海，西界吉尔那里，南界温贺，北界那墨利斯）〉，领小部落十有二。

温斯贺部〈（东南界海，西界哇达贺，北界温罗）〉，领小部落十有六。

卷五十一

《英国论略》〈（新嘉坡人所撰）〉：英吉利国，乃海中二方屿也。其南大岛曰伦敦国，北岛曰苏各兰国，两国共名英吉利。又有小岛称为倚耳兰，鼎足环峙〈（道光二十二年，英夷在江宁与当事议款，其文书曰英国之以耳兰墩云云，盖其兵帅义定渣，乃以耳兰墩人也）〉。南及英海峡，隔佛兰西国，北及大北海，西至大西洋海，东距荷兰国不远。英岛延袤二十六万一千方里，户千有五百万口。耳兰岛延袤九万六千方里，户七百万口。本国虽褊小，而除本国外，所割据他洲之藩属国甚多。若地中海岛，则有十四万户口；若亚非利加、海滨新地，则有二十五万三千户口；若五印度各藩属，则有八千四万口；在北亚墨利加接花旗国地，则有百五十万口。并其洲东群岛，白黑居民，八十二万口，别有新荷兰岛，当中国南洋万馀里，人户岁岁增益。此等属国，互相离远，无陆可通，惟以舟船联络。本国生齿殷繁，岁有几万，离家开垦新地，建邑造船，故其人散布天下。无论何埠，皆有英商贸易。

其人肌肤白发则自黄白红黎各色皆具，中多有红毛，故以红毛称之。剪发留短，其瞳睛或蓝或棕或黑。其女美艳闻四海，男四时衣呢戴毡，内衬汗衫，外罩背心短衫，内外二裤，冬则外套长袍，足蹑皮靴，女衣用绸缎及各洋布，随风俗，依时式，百变千式，首戴大帽，面挂薄帕，身衣长衫三四重，最好洁。首饰珠宝，不计价值，归必购各国之珍，以贻女妾。民日三餐，早饮茶加菲等暨面包饼饵，牛乳油，午后大餐牛羊鸡豚鱼菜，惟荷兰薯，甲乎各国。居宅高广数层，垩饰精丽，墙贴华纸，板铺花毡，户垂帷帐，周悬山水之图，庶民惟拜天主，尽绝道释，不奉异神。其教有二：一曰洗礼，一曰圣餐。城邑乡里，各派教主，每七日一礼拜，老幼男女，聚集殷堂唱诗，赞美教主耶稣之德，祈福忏罪，而后听教，教主尊若官府。英国近北海，故甚寒，其天气不定，今日晴霁，明日霏霭，夏暑而不热。水果佳甚，国有良马绵羊，其毛以造呢羽，猎犬以捕野牲。国内约计马百二十五万只，牛驴五百五十万只，田二百有七万三千顷，有麦无米，不赡于食，必由外国运至。山多石炭锡铁铜，百货皆来自外国。国中无论男女，皆习文艺，能诗画，兼工刺绣。婚姻必男女自愿，然后告诸父母，不用媒妁，惟拜教主，祈上帝，婿则以戒指插新妇之指，即为夫妇。因上帝原初止造一男一女，故不能娶二妇，亦不许出妻。多有男终身不娶，女终身不嫁者。父母产业，男女均分，不能男多女少，嫁则婿受其贄焉。倘违禁娶两女者，其罪流国人相接，除帽示敬，尊坐卑立，惟跪拜上帝。即见国王，亦不拜也。

英人有三品：一曰五爵，二曰绅士，三曰庶民。五爵惟其长子世袭，其余皆为绅士。不论何等人，皆可供职，其教士之长，大者等于五爵，下者如中国塾师，必学三四个语音。通经能文，精历法，明测验推步，然后可以教人。其医皆有考试，考中方许治病。其讼师学法律，亦有考试。画师画山水林泉及塑像，皆以逼真为贵。不似中国白描写意，虚多实少。农夫共计九十七万八千有馀户，田地瘠饶，故设奇器

引水以溉之，围以篱笆，有似园圃。英人最好花园果林，五爵皆有猎场。冬月则盖暖室，内排各种蔬菜果树及远方异种草木，温养发芽，故四时常有异果名花。机房织造，不用手足，其机动以火烟，可代人力。以羊毛与棉花纺成洋布大呢羽毛，皆自然敏速。道光十八年，所制出丝绸布帛铜器百货，计价银三百万两有馀，绵布计银万有二千四百万两，绵线计银二千七百六十万两，铁条与铁器计银九百四十万两，麻布计银九百六十万两，羽呢等货计银千有三百八十万两，共计一年运出之货，价银二万一千六百四十万有馀两。而国内所用货物，不在此数。皆务工勤商，早夜经营之效。由人烟稠密，户口繁滋，田园不足于耕，故工匠百有三十五万户，多于农夫三之一。不止贸易一国一地，乃与天下万国通商也。

所运进广州府之货物，如海菜、沙血蝎、洋蜡、槟榔、海参、燕窝、冰片、血珀、阿魏、息香、牛黄、乌木、红铜、珊瑚、玛瑙、绵花、绵纱、儿茶、青石、火石、象牙、犀角、白米、鱼翅、鱼肚、槟榔膏、玻璃器、锡铅铁钢、没药、乳香、胡椒、苏木木香、红木、檀香沙藤、自鸣钟、时辰表、大呢、羽缎、哔叽、小绒、洋布、花布手巾，所有运出者，茶叶、湖丝、绸缎手巾、紫花布、夏布剪绒、绉纱、纹布、花幔、丝绢、绣绢、牙器银器、漆器、云母、草席、磁器、白矾、笙竹、硼砂樟脑、桂皮、桂油、桂子、硬饭头、铜箔、雄黄、牛胶、膾黄、澄茄、纸、墨、铅粉、麝香、大黄、白糖、冰糖、糖果、姜黄、银朱等货，一年间所出入之货，价值不下银二千二百万员，而雅片不在此数。除大清国贸易外，尚有与花旗列国贸易之货。在道光十六年，共价银三千六百万两，其外国货运入本国海口者相仿。所用商船，大小万有四千五百余只，水手十四万八千名，道光十七年，外国船到英国埠头者，大小七千四百余只。每年所纳税饷，共计银六千六百万两〈（按：此数不可信，考上文，每年货价出入不过数千万，税饷不过税其十一，安有竟与货价银数相埒之理？是为夸诞不情）〉。其广推贸易之法，有火轮船，航河驶海，不待风水。又造历轱路，用火车往来，一时可行百有八十里。虞船货之存失不定，则又约人担保之。设使其船平安抵岸，每银百两，给保价三四圆，即如担保一船二万银，则预出银八百员；船不幸沉沦，则保人给偿船主银二万两。其通国行宝为金，每金三两，分作银价二十二块，其银再分铜钱，兼用银票，钱钞楮币，与金银同价。

当中国汉朝时，英民犹未向化，游猎林中，值罗马国兵来侵，降服大半〈（按：罗马国，亦作罗汶国，即意大利亚也）〉，东国野族，蜂起攻击，土人逃匿山林，英地尽为各国所据。渐奉耶稣教，始知风化。宋朝年间，有邻部那耳曼者，渡海力据英境，强役土民，不及二百年，两族合成一国，勤劳速兴。当明之季，英百姓尽崇正教，通文字，自弃旧俗，权势益增，民人敢作敢为。兵船出巡四海，屡拒退外国之兵。且文艺大兴，博览经典、法术、武艺，不可胜数，但其语音，与汉语大不同。其言长，切字多，正字少，只二十六字母，是以读书容易，数日间即可学之。故此学者无不通习文艺，如国史、天文、地理、算法，不晓者则不齿于人。目前王后主国，年尚少，聪慧英敏，众民悦服。贵臣共十二人，为管国帑大臣，审办大臣，持玺大臣，户部大臣，内国务宰相，外国务宰相，管印度国务尚书，水师部大臣，

贸易部大臣，兵部大臣，此外尚有议士协办大臣等，皆理政事者也。设有大事会议，各抒己见。其国中尊贵者曰五爵，如中国之公侯伯子男，为会议之主。且城邑居民，各选忠义之士一二，赴京会议。国主若欲征税纳饷，则必绅士允从，倘绅士不允，即不得令国民纳钱粮。若绅士执私见，则暂散其会而别择贤士，如有按时变通之事，则庶民择其要者，敬禀五爵。乡绅之会，大众可则可之，大众否则否之。

每年税饷田赋入国帑者，共银万一千一百万两。除国用外，所馀不及百万两，若越于此数，则减税饷。国之欠项共银二十三万六千七百万两有馀，每年利息八千八百二十四万有馀。施济闾阎，每年银二千五百万两〈（利息及施济两项银数皆不近情，不足信）〉，其银乃各屋主良民所捐。又教师抽国产十分之一，每年银共四百万两。弁兵十九万丁〈（此据《地理志》及新闻纸数目，原本作九十万，非诞即讹）〉，此外另募于五印度国若千万丁，以镇守边境，水师兵船大小六百有十只，水手四万名，中有大舰，每只载大炮百有二十，或一百，或九十，或七十四，或六十门；其中等者或四十四，或二十八门；其小者或二十，或十，或六门也。自嘉庆十九年西方列国大臣会议结和戢兵，以后兵船惟巡海护货而已〈（原无今补）〉。

《贸易通志》曰：英吉利本国，止产锡铜煤炭，然其国人好利争胜，精技艺，治船械，不惮险远，故凡他国物产皆聚于伦敦国都，百姓插英吉利商船共计二万二千四百三十五只，载三千九百二十七万石，水手十有六万，别有小船十二万九千八百二十六只，水手五十八万。其最大之埠头为伦敦、利味埔、里胡里新堡、牙尔木、牙腊士、莪力亚、比耳亭、伯利、木可耳奇、土比林、比利法等处。外国进口之船，四千五百四十二只。道光十三年，货出口者三万二千万员，进口者二万一千万员。

《职方外纪》：欧逻巴西海迤北一带，至冰海，海岛大者曰谙厄利岛〈（即英吉利）〉，曰意尔兰大岛〈（英夷属岛）〉，其外小岛不下千百。意而兰大岛，经度五十三至五十八，气候极和，夏热不择阴，冬寒不需火。产兽畜极多，绝无毒物，其国奉教之初，因一王宫之婢，能识认真主，遂及王后国王以讫一国〈（其地有一湖，插木于内，入土一段化成铁，水中一段化成石，出水面方为原木也。旁一小岛，岛中一地洞常出怪异之形，或云炼罪地狱之口也）〉，谙厄利亚，经度五十至六十，纬度三度半至十三，气候融和，地方广大。分为三道，共学二所，共三十院〈（其地有怪石，能阻声，其长七丈，高二丈，隔石发大铙人寂不闻，故名聋石。有湖长百五十里，广五十里，中容三十小岛，有三奇事：一，鱼味甚佳，而皆无髻翅。一，天静无风，倏起大浪，舟楫遇之无不破。一，有小岛无根，因风移动，人弗敢居，而草木极茂，孳息牛羊豕类极多。近有一地，死者不殓，但移其尸于山，千年不朽，子孙亦能认识。地无鼠，有从海舟来者，至此遂死，又有三湖，细流相通达，然其鱼绝不相往来，此水鱼误入彼水辄死。傍有海窖，潮甚时，窖吸其水而永不盈，潮退即喷水如山高。当吸水时，人立其侧，衣一沾水人即随水吸入窖中，如不沾水，虽近立亦无害）〉。

《万国地理全图集》曰：英吉利国，乃海中两屿，其大者分二方，南曰英兰，北曰苏各兰，两者共名英吉利。其小岛曰倚耳兰，中隔海港，相离不远。北极出自四十九度五十八分至五十五度四十五分，偏东自二度至四十二度，英岛袤延方圆二十六万方里，居民一千五百万。耳兰岛九万六千方里，居民七百万丁，其海滨隅{奥土}，港汊分歧，市埠遍布。苏各兰海之群岛亦稠，英国距荷佛两国不远，一日可渡，用火轮船，仅需半日。苏各兰之北，山岭不绝，与英岛之西相同。其山硤沙，其坦地则丰产。至以耳兰岛，则泽渚广延焉。英吉利岛徧小，其河不大，故国都即在但士江边，大船易入。山出石炭锡铜铁铅，而石炭最多，每年价银千万两。产骏马牛羊，共马百五十万，黄牛三百九十七万，羊二千六百二十四万。产大小麦谷，其谷不足食，必由外国运入。居民不织布，乃制铁纲机关而造之。每年所造呢羽哔叽等物，共计银千八百万两，其棉花布银，每年一万零二百万两，每年用棉花四十万七千石以织之，皆由外国运进。其务织者，共四十九万三千名，其机关巧细，但弱女幼子，亦可容易动之也。所用丝，由意大利及中国运入，所织价值，每年银三千万两。铁铜造铸机关，鸟枪大炮刀剑各项器械，价值银五千一百万两。道光十八年，所运之货，计价银一万四千八百万两，所运进者，其计银一万七千九百四十万两，故国用充裕。

英国现摄权者为女王，号捷胜，尚少年，聪慧英敏，经嫁与日耳曼之君。其大臣共十二位，谓管国帑大臣，审事大臣，持玺大臣，户部大臣，内国务宰相，外国务宰相，管印度国务大臣，水师部大臣，贸易部大臣等，馀有议士协办等，以治国政。又有大爵公侯，会议政事，又立绅士会以询问政务，筹办国饷。人稠地狭，田园不足于耕，只得外徙新地，昔皆往花旗国，今亦移至亚齐南之大地矣。英吉利分南北东西之部，南方七部，苏悉北干地苏利汉威利突悉等部，在此地海边有造船之广厂，英国兵船与商船所云集之处称谓港口也。各兵船回家之时，即到其口修理。其南方遍处山岗，树林荫，河流清，春夏万红千紫，其城邑乃干得布利教师所驻，大有殿堂，又绿威，系水手受伤之后，老迈所退之院。又风素耳地，乃王室隐逸避静之宫殿。东方各部，曰以邑，苏弗，千桥，匈丁敦林君，那耳威城，广追呢布，千桥邑，乃大英有名之书院，学儒攻书之地。中央各部，曰中悉瓦威士答弗，特未若丁翰，墨度，不敬翰，屋度，北翰敦，来悉特，北度其中系国都兰敦，居民百有四十七万四千名，其保罗殿堂特异，可纳罕超卓，其西殿亦然。两堂内立英杰名师之像，以旌其德。若论其通商，则远国之船，每年进其口者，一千零五十七只，英船进者，三千七百三十只。所有公银铺，每年所税本银，六千万两。如有财而欲置之安稳，则缴于银铺也。其城之穹桥下路各有奇异，其屋度，乃国之古书院，其北明翰，专造刀器铁皿。

北方各部分兰甲、突翰、北匈、西野、君北地，与苏国交界，其都系约古城，内建广大之殿。新堡系石炭之大门口，曼识特系属织造各项布之大邑。里味池系英国第次之港口，与花旗国广开通商，其居民二十万丁，另有大城邑，建于其国内。

西方各部，曰织执黑<广支>度、门口、窝悉、五悉、孙悉，有海边，有港口，曰北多里、曰北来口，在最深之海隅，其八邑有人，夏月集会玩赏之处。

瓦勒部之居民，系属土蛮，言语不同，山岭险隘，此时众民向化，勤劳牧羊，出石炭焉。其城邑最少。苏各兰岛，南方丰沃，北方饶瘠，居民百计经营不知辛苦，远商外邦，故地寒而家富。其民奉拜天主，敬畏耶稣。分三十二部，其会城曰以丁堡，街舍最整，加刺我，织造布匹，运出者每年价银千馀万两。绿诺邑，有海港，亚北丁，系书院。

耳兰岛之居民，宽宏慷慨，宴会豪饮，惟奉加特力教。因崇其异端，惟僧是听，累生事端，甚激英国之怒。然其男上陈为兵，力战从不奔北。其会城曰土北林，南有港口，民十万七千。林勤马头，在耳国第三。北发乃马头第四。

英之海滨，多有海岛，南最大者，称为威地，山水清美，在佛海边，额西额耳西两岛，在西方，曼岛在苏葛兰一带，沿海撒多海岛，但天寒，麦谷难登。每年大半冰雪，其居民专务捕鱼。

《地球图说》：英吉利国，东南西北四面都界海，其二岛一名必力旦，一名爱耳兰。又南曰英兰岛，北曰苏各兰岛。英兰之民，约一千六百万，都城地名伦敦，城内民百五十万，大半耶稣教，小半天主教。国内义学不少，而极大书院有二：江一，曰坦米斯，土产羽毛布呢哔叽绵布羊毛布，绸缎磁器煤炭皮货锡铜铁铅等物。苏各兰之民约二百六十二万，统属耶稣教。盖二岛本系二国，明朝始合为一。土产羊牛煤炭羊毛布等物。再西方有一岛，名爱耳兰，百姓约八百万，城名特拔林。城内民三十万，大半天主教，小半耶稣教。民食蕃薯大麦奶饼豕肉。爱耳兰于嘉庆五年间，亦与英国并合，其民穷苦，岁徙居于花旗等国。

《地理备考》：英吉利国，在欧罗巴州之西北，北极出地五十度至六十一度止，经线自西三十五分起至十三度止，四面枕海，长约二千一百里，宽约一千零六十里。地面积方约十二万六千三百二十里，烟户二京二兆四亿口。山陵众多，峻峭者少。其在苏各兰岛内之奔内维斯山，乃通国之至大山也，高仅四百三十七丈。海岛甚多，四面回环，西面尤众。河之长者十三，湖之至大者八。通国田土稼穡，适敷所需，土产铜铁锡铅窝元硃砂纹石火石磁器信煤等物，地气温和，不时更变。暝雾阴雨，寒多暑少。王位，男女皆得临御，惟以长幼为序，奉者加尔诺修教，其天主教教，國中壹尔兰大之人，奉者过千。若路得罗等各修教，亦有奉之者。技艺精巧，商舶众多。

曩时居民皆塞尔达人分派，后有哥度国人募占其土，驱逐其人。汉孝宣帝五凤年间，罗马国用兵，三十一载乃克其地，统归一部，历代兼摄。至四百七十五载，当罗马国衰弱，为卑勒敦人所据，后加利多尼亚地人，频扰其地，因求安各罗人协助，

而安各罗人，反乘机占地，过半互分，七酋各霸一方。唐德宗贞元中，有豪酋平七国为一，旋有大尼国人据之。宋真宗天禧间，有给列尔美者，率舟师战败敌军，遂王本国。孝宗乾道八年时，君英黎给者，攻克壹尔兰大国，归于一统。元世祖至元中，嗣君并兼苏各兰国，归为一统。不久复分为二。明神宗万历三十一年，君薨无嗣，其苏各兰国王，因与先君姻戚，乃得临御本国，始合二国为一，称曰英吉利。乾隆四十年，所摄亚美里加州地，始行叛乱，驱逐英官，自立为国。乾隆五十八年，本国与佛兰西国交兵，九战方息。未几，佛兰西国君，复率舟师进攻，幸本国师船云集，拥塞河道不能进。嘉庆二十年，大败佛兰西于窝得尔禄，地方始安。道光十七年，给列尔美王薨后无嗣，其侄女维多里亚者接统，即本国现在之君也。本国有英吉利，苏各兰，壹尔兰大三国之分，其英吉利岛，分为五十二部。东方则六，一名多伦敦，乃国都也，建于达弥塞河岸。宫室之壮丽，工商之云集，货物之富有，皆欧罗巴州第一。西方则十二部，南方则十部，北方则六部，中央则十八部。其斯哥西亚，即苏各兰岛也，分为三十三小部，南方则十三部，北方则六部，中央则十四部。

其壹尔兰大岛，分为三十二部，东方则十二部，西方则五部，南方则六部，北方则九部，其国通商冲繁之地，内外不一。在海边者大半，在内地者三分之一。兼摄各地，五州之中皆有之。在欧罗巴州者，一名西利岛，大小共一百四十五座，地膏腴，丰谷果；一名漫岛，长百里，宽五十里，地面积方二百五十里，铁矿五谷，所产富庶；一名日尔塞岛，长四十里，宽三十里，地面积方七十里，山峻田腴；一名给尔尼塞，长三十里，宽二十里，回环百二十里，川野沃阔，四季温和；一名黑利科兰岛，人烟稀疏，惟多网罟；一名日巴拉尔大，在吕宋国内，延袤十馀里，三面环海，直接日巴拉尔大峡，惟一径达塞维里亚部，地势嶄岩炮台，城池甚固，风景壮丽，五方辐辏；一名马尔大岛，长七十里，宽四十里，回环二百里，谷果茂盛，天气温和，昔属意大利亚国，今则归于本国。别有各岛，在亚细亚州，未里加州，美里加州，阿塞尼亚州之中。

《外国史略》曰：英吉利国，三洲环峙，小屿无数，亦西北岛国也。上古未通他国时，本山林土蛮，文身射猎，杀人祭鬼，惟与佛兰西人海边交易，有意大利国之罗马民，于汉宣帝十八年来踞此岛。佛国出军渡海御之，不能胜，又率大小船八百艘进攻之，连年交战，终为罗马所据。延及苏各兰以北，越二百年，始有耶稣之徒，来此传教化俗。宋文帝二十五年，罗马国衰，又招日耳曼撒逊之族，来此争战，迄三百年，遂由欧罗巴之北海，顺流下，遍肆劫掠。岛民有阿里弗者，潜探敌营，归领军士，突袭破之，而国基立焉。后大尼国来侵，焚掠民物，于宋英宗二年居民力战胜之。此英国兴隆之原也。英国北邻佛兰西，屡交战，互相胜负。明宪宗二十年，两国战息，其民始自营生。从欧罗巴学火药火器，学印书务艺术，学罗针航海，向崇克力斯顿天主教，至是始改耶稣教。然执天主教之西班牙王不信，为高大战舰来攻，英国募水手乘小船，以攻其高舰，忽大风，敌舟触礁，损破大半，遁回本国。自后英国振兴，商船遍航四海，于明万历年间，始通中国。万历三十年，复并苏

各兰国，南北始合为一，但北岛之君欲立克力斯顿教，英人又逐之，而请荷兰之君以为之主。佛兰西恃强，屡与列西国交战，获胜，常思吞并。英人与他国连和，共为唇齿，以拒佛国。嗣后英国女王继位，竭心治国，选将练兵，战无不胜。佛国骄气渐敛，女王薨无后裔，于康熙五十二年，招日耳曼所属汉耶耳国之峨耳治为君。国益庶富，然常与佛兰西西班牙两国交战。当此时，英国于四方开新埠，因本国人稠地狭，田园不足耕，是以驶到亚默利加之境，开新埠，大兴贸易。既而欲增税饷，土民不从，且佛兰西西班牙又协助土民，于是亚默里利加人，遂自立国，即今花旗，名曰兼摄他国，亦名合众国，时乾隆四十七年也。

英国于大地之中，居西北隅。北极出地自四十九度五十八分，及五十度四十二分，中线偏东一度四十六分，偏西十度三十五分。国分三十部，大岛曰英吉利，曰苏各兰。小岛曰伊耳兰，苏各兰，居北方，天气甚寒，山高，少五谷，有草场，足资游牧。土民犷悍，言语不通，日肆劫掠。苏各兰之南，多物产艺五谷，今亦属于英吉利。英吉利地山平坦，水甘草肥，惟东方沙漠，无大河。南地则膏腴，饶物产，山虽不峻，而自北至南，绵亘直达国都。东北地有煤炭矿，西南地有锡铁，西为瓦里士部，山岭险隘，峒峡深邃，地饶而民良。伊耳兰岛西北多湖泽潴水，东南肥美，惜农无开垦之资。海港最阔者苏各兰。伊耳兰之西滨南有威地岛，崖谷奇峭，多异景，佛兰西港内有危耳尼日耳西等岛，伊耳兰海隅有漫岛，苏各兰西北有希白利群岛，北方有阿耳加群岛，最北有设兰群岛。此三岛，天气极寒，不生五谷，今不述焉。

英国无大河，最著名者为但西河，国都在焉，各国船皆泊于此。尚有得连地江，太西威邻江，士威江，威江，乌西江，其长者祇六十里。天气寒热均平，多雨露，故其气畅茂。田每亩比汉人六亩半，共一千三百七十四万六千九百馀亩，游牧草场二千六十五万馀亩，未垦地一千五十万亩，不足垦地，一千三百四十五万四千馀亩，统计五千七百九十五万二千馀亩。伊耳兰耕地，一千四百六十万三千馀亩，泽潴五百三十四万七千馀亩，湖四十五万五千馀亩，统计二千三十九万九千馀亩。物产较他国特异，因英船所至，多采奇葩，归国种植，天寒建暖房，护以玻璃瓦。马高大多力而驯良，最佳者价值三百两。牛亦高大，然止供乳肉耕田耳。绵羊毛造呢，山羊取乳，豕及五谷不敷食由他国运入。每年出铁价银二千万馀两，锡价银三十四万馀两，铅银八十三万馀两，煤炭最多，每年约二万四千馀石。

英吉利分四十邑，瓦利士分十二邑，苏各兰分三十二邑，伊耳兰分四部三十二邑。英都兰墩在但西河岸，英国大邑也，长六十里，阔四十五里。街市皆众，居民约二百万口。礼拜堂最大者保罗，礼拜堂长五十丈，阔二十五丈，高三十四丈。康熙年间，所建费银四百五十万两。其西方礼拜殿最古，国中名贤事迹，皆立碑于此，计之各商会馆及银局信局，尤他国所无。设学馆以传学术，有大桥跨但西河，泊船约万五千只，火轮大小九百只。建船厂以备修理，经费银岁计五百馀万，火车四万辆，载城内货物，出入都城。兰墩之东，有藏大炮及兵器之库，但西河，帆樯林立，

城内外街衢阗塞烟火万家，亦海外一大都会也。其次邑曰曼食悉，居民十八万，机房织造坊不可胜数，恒用火为机关。其三邑曰利威浦，居民十六万，为商贾之大埠，与各国通商，泊船千馀，多火轮船，贸易最大者，花旗国为首。其四邑曰百官舍，居民十四万，制造五金各器处也。有鸟枪局，日造万馀枝出售，又布茂士港口，设大战舰厂木，市肆甚繁。苏各兰都曰以丁布，居民十二万，此最嘉之地，邑建山上，街路高高下下，书院中务学术者二千馀人。甲拉峨港口，在海边，居民二十万，英国通商第三大埠也。各制造局匠十馀万，故产瘠而通商广。伊耳兰都曰突林城，居民二十万，民不好贸易，惟务耕勤学。大港口曰哥耳其，居民十万，每年进船三十只，地极褊小，多城邑，无陆路，皆以舟相通。英人数万，往垦其地，英国人矫健，鲜疾病，重信义。男女肌肤白，睛或蓝或白或黑，常衣呢，冠用毡，剃发须，性好洁洗浴。气候或暖或凉，故终年穿暖衣，内著汗衫，一日数换。民多寿，常服者外背心短衫，内外二裤，冬则长袍，蹑皮靴。女用绸裹手编其发，首戴大帽，面挂薄帕，衣长衫数层，珠宝饰首，屋宇广大，因地气寒湿，盖藏甚密。有层楼，地铺花毡，窗悉玻璃，房设火炉，壁悬山水图画，爱洒扫，晨则饮茶食干糍，酥油冷肉，午则小食，大餐用牛羊鸡鹅饼面，饮小酒，饱后始饮葡萄汁，以牛肉为上膳。民常食惟荷兰薯，而伊耳兰之小民更贫苦。

君民皆无妾媵，无鬻子女者，男二十四岁以上，自度有俯畜之业，方议娶。娶妻不用媒妁，与女子自订可否，诺则告其父母而聘定焉。聘后往来，以知其情性，乃集两家亲朋，赴礼拜堂，请教师，祈上帝，遂为夫妇。妇将已有业产财帛，俱归其夫，终身无贰。生子数日，携至礼拜堂，教师浸于水内曰施浸礼。男女五岁入学，习天道圣经，及国史等书。十四五岁后，各择士农医匠商贾为终身之业。国人每岁迁移他国，多不回籍，而户口加增如故。四十五年前，英吉利民一千九百十四万。三十五年前，加增一千二百六十万九千八百。二十五年前，共计一千四百三十九万一千六百名。十五年前，共计一千六百五十三万七千名。五年前，一千八百六十六万四千七百名。是知四十五年之内，加增人户八百万名。女多于男，每百人中，务农者十之三，农夫二十五名内，以五名为田主，开矿者十之一，制造者十之一，为商贾者十之二，馀教师、法师、医生、武士、水手，故英民分五等，一曰五爵，即与中国公侯伯子男无异，二曰乡绅、文武官、法师、教师、医生、大商等，三曰贾匠及田主，四曰雇佣水手及农民，五曰贫乏之人。每年赍恤银一千二百万两，伊耳兰大农夫十八万，小农夫十六万，佣工八十八万，制造各物之人四十万，商贾及各匠百一十五万，乡绅富户二十一万，工人六十万，男仆十一万，侍婢六十七万，不务业者二十三万。国学生馆计三万八千间，入学者百二十七万，馀人用费，或自出，或捐自他人，或出自国家。小儿自二岁以上，又立赤子学，女人办之。其大学藏书六万本，盛膳以供养之，必艺术贯通，乃推用焉。刑名算学皆仿是，其学医术者，除病院外，别有院藏人身骸骨支体，全身筋脉，俾入院者察之，以知病原施药焉。

庶民务贸易，勤计算习经营，不避危难，有大兴作，不惜重资捐创。农器便利，不

用耒耜，灌水皆以机关，有如骤雨，凡田一亩，每年出麦九石，豆十五石，红白萝卜二百余石，以饲牲畜。荷兰薯六十石，乃庶民所食，统计五谷田地约七百五十万亩，草场一千七百万亩。英人好猎，立苑囿围场，秋月驰马射猎，不捕野兽于山林也。

制造之匠，纯用火机关，所藉以动机关者煤炭，每年出煤五万二千五百余万石，矿深一百三十九丈，每年以一千二百万石，制火炮刀剑约价银五千一百万两。作工者三十万人，绵花多运自花旗，每年约三百四十五万石，价银四千二百八十万两。道光十五年运出绵布价值银四千六百五十万两，绵绸一千六百五十万两。古时英国绵布，皆由印度运回，获利甚重。今物价益减，工人多有缺食者。绵羊毛每年产九十三万石，由外运入者四十二万石，所造呢羽售于各国者，道光十七年价值银二千二十八万两，别有一百万两绒绵之价，其地织匠，共计四十万名。织造绸缎，每年用丝三十万石，前此多由欧罗巴列国买来，自道光二十三年以后，多由中国运入。道光十六年所买湖丝，共计银六百三十九万两，绸缎进口价银二百二十二万二千两。麻布莫妙于伊耳兰，道光十五年运出一千七百五十万丈，价值银一千一百二十万两，只供本国之用。每年书册纸四十五万五千石，纳饷银二百四十万两。他国运来之糖，每年约三百二千四万石，纳饷一千四百八十四万两，其质最粗，英人磋磨之，乃精且白。小酒税并造酒之器，一年约银一千二百八十二万三千两，火酒更广，饷银一千六百五十万两。

四面距海，民习水性，其先不出欧罗巴之外。万历年间，方远驶各海以开新埠，是时西班牙国，专揽外洋贸易，英国协力攻胜之。又与荷兰佛郎西交锋，获胜，沿海之国，乃皆通商。道光十八年，船共计二万六十六百只，别有载煤炭驶海各小船进口共计一万九十只。火轮船与花旗国往来，最大者长二十三丈阔三丈五尺，载一万九千一百石。尤大者载二万一千九百三十石，或用铁以作船身，久存不损。道光二十二年，运出之物，价值银一万四千一百万两。二十三年一万五千六百万两。二十四年，一万七千二百万两。二十五年相等。各国通商之数不在此，惟论中国而已。与中国贸易，二百余年，起于前明，其始最微，每年不过几万两。近始饮茶，而茶口加增，昔设大公班衙为贸易之总，于道光十四年，散局贸易更旺。自与中国结好以后，尤有增益。于道光二十五年，粤省进口船共一百八十二只，运货银一千七十一万五千员，运出货价，过于运进货一倍。往往以现银交易，所纳船钞税项，是年共计银一百六十六万四千两。厦门所进船三十三只，运入货价银四十四万二千两，所运出货价银四万六千两，共计钞税银二万三千五百两。福州进口船五只，进口货价二十万六千两，运出者并所不能卖者，二十万五千两。宁波进口船八只，所运进货价银三万一千两，运出货价价银五万三千四百两，共约钞税银八千二百七十两。道光二十五年半载内所进上海船七十二只，运入货价银一百三十二万八千两，所出者七十七万二千两，税钞银一十四万九千两，通商之起原极微，而今日极大，利益万万。至于鸦片不正项之贸易，尚在其外也。

英国字母最少，翻译中国四书五经及各著述，又刊印逐日新闻纸以论国政，如各官宪政事有失，许百姓议之，故人恐受责于清议也。礼拜堂计一万一千六百间，伊耳兰二千一百六十八间，每间立教师及监司。逢礼拜日集会，诵祷讲道劝人修德，其中尚有崇正教之人，不设监司，惟请教师而已。此耶稣教，大半在苏各兰，与以耳兰之天主教，各不相入。

国立宰辅大臣，共商事务，国家费用，先与乡绅会议，而后征纳。通行银钱，一面印王象，一面书钱之名。国王薨，有子立子，无子立女。前世女主即位者五君，今女君立已五年，屡出巡幸，任民观瞻，不宴处深宫也。宗室储君，各食公爵俸禄，亦赴五爵公会议事，其储君统诸军士，为水师大提督，外有国帑银库律例国玺，国内事务，藩属地，水师务，印度部，商部，兵部，各大臣，有要务则国王召议事百十三员会议，与中国军机都察院无异。其下各有董事，虽官有迁调，其董事不易。政务以国帑大臣为首，与大臣筹画，其乡绅之会，则各邑士民所推迁者。议国大小事，每年征赋若干，大臣贤否，筹画藩属国事宜，斟酌邻国和战，变置律例，舌辩之士，尽可详悉妥议奏闻，其五爵之会亦如之。遇国有大臣擅权，其乡绅即禁止纳饷，计乡绅六百五十八人，自每年十二月至次年四五月皆云集焉。若乡绅有罪，惟同僚能监禁之。英国之人自立，悉赖此乡绅，苟或加害，则众皆协力抗拒。

英国赋税火酒小酒醋纸于道光十九年共计银四千四百一十四万六千馀两，印遗书，印新闻，印票担保等牌，共银二千二十五万二千五百两，屋窗马车犬骡马只猎务，约银八百一十五万四千四百两，邮驿递信，收银七百三万八千八百两，共计银四千六百四十七万九千两，计入国帑银约一万五千九百万两有奇。惟田赋盐课两项系贫民所纳，其余赋税，皆富户日用之物而征焉。所出国帑军士钱粮，二千六十七万八百两，水师之费银，一千六百七十九万二千五百两，国之欠项息银，八千四百万有奇，火炮部四百八十九万四千两，文官俸禄银一百一十四万三千两，公使等俸禄银五十六万六千三百两外，尚有杂项之费用，所入仅敷所出。若所馀者多，则减税，所收者不足，则增税。经乡绅议定，每人一年收四百五十两，每一百必纳其三块，以充国帑，共纳银一千五百万两有奇。

通国所行之宝，系金块，价值银三两，分为二十银块，以此再分为十二块，亦用铜钱，十二块为一银块，以此铜钱再为四分也。但银钱重，船难多载，况计所有多不足用积贮又阻于通商，于是国立银局，内收税饷，出银票，以敷所用。道光初年所出银票，计价五千四百万两有馀，六年所贮现银三千万两有馀，故所最著者银票，在国中及大邑，任商人别立票来往川流，不须动支实项。非若他国银票滥用，致局少现银，受害无穷。列国中惟英国银局最信，各国之商，俱寄资取利焉。

道光二十二年，募军士十二万二千五百六十八名，骑兵侍卫三营，常步兵九十营，水师兵一百班，又募民壮二十万。各项战船，最大者十三只，载大炮百二十门，次者十二只，载炮一百门，又次者三十四只，载炮八十门，又次者二十五只，载炮六

七十门。所载兵丁水手，自八百至六百不等，外有巡船及各项火轮船数百只。

英国属地，自欧罗巴日耳曼海口起，曰黑峨兰。屿西班牙南嘴头，曰义巴塔固城，意大里亚，曰马他等岛，在希腊西。曰以云群岛，此岛为英国之门户，保护最谨。英国公班于五印度国所摄权之地，分四大部，北曰旁葛刺，东曰马塔刺，西曰网买，中曰亚甲所。结约各国地，曰槟榔屿新埠头锡兰岛，在亚非利加。英国据其浪山地，亚非利加之最南头也。西方曰狮山旱北亚，沿海堡。曰亚加刺，此地广袤，林密难悉。在东海边。曰押新孙岛，希利拿岛，在东边。曰貌力突岛，西悉群岛，在亚默利加之北方。曰下加拿他，上加拿他，新报苏威，新苏各兰，盖瓦岛，新寻地。曰西北荒地，又英人所据，在默西哥海隅内之岛也。安地亚巴、巴突多、米尼加、吉那他、牙买加、门悉拉尼、益吉路加、因新地、多巴峨、突多拉、安威刺、丁刺、巴哈马群岛、北母他，在亚默利加南方所居之地。曰地米刺刺等地，含士刺在新荷兰，奥大利亚洲，英人所据之地，在东边曰新南瓦勒地面山岛，其西方曰鹄港，南方人数未详。又有法兰岛，新亚兰岛，英人甫居之，香港岛，在亚拉百国西南之海峡。

卷五十二

◎大西洋

○英吉利国广述中

《皇清四裔考》：英吉利，一名英圭黎，国居西北方海中，南近荷兰，红毛番种也。距广东界，计程五万馀里。国中有一山，名间允，产黑铅，输税入官。国左有那村，右有加厘皮申村，皆设立炮台。二村中皆有海港，通大船，海边多产火石，王所居名兰伦、有城，距村各百馀里。王世系近者为弗氏京亚治，传子昔斤京亚治，传孙非立京亚治，即今王也。康熙间始来通市，后数年不复来。雍正七年后，互市不绝。初广东碣石镇总兵官陈昂，奏言臣遍观海外诸国，皆奉正朔，惟红毛一种，奸宄莫测，其中查有英圭黎诸国，种族虽分，声气则一，请飭督抚关部诸臣，设法防范。乾隆七年十一月，英吉利巡船遭风，飘至澳门海面，遣夷日至省城求济，广东总督策楞，令地方官给资粮，修船只，先是其互市处所，或于广，或于浙。二十二年，部议英吉利不准赴浙贸易，于是皆收泊广东。每夏秋交，由虎门入口，土产同西洋各国，而船械特多，制造尤巧绝。二十四年方严丝筋出洋之禁，两广总督李侍尧奏言近年英吉利夷商屡违禁令，潜赴宁波，今丝筋禁止出洋，可抑外夷骄纵之气。惟本年丝筋已收，请仍准运还，奏入报可。是年英吉利夷商洪任辉，妄控粤海关陋弊，讯有徽商汪圣仪者，与任辉交结，擅领其国大班银一万三百八十两，按交结外国，互相买卖，借贷财物例治罪。二十七年，英吉利夷商白兰等，求仍照前通市，两广总督苏昌奏准，照东洋铜商搭配绸缎之例，酌量配买，每船准买土丝五千斤，二蚕湖丝三千斤。其头蚕胡丝及绸绫绸匹，仍如旧禁止。不得影射取利，自是英吉利来广互市，每船如额配买，岁以为常，其明年并准带绸缎成匹者二千斤。

《海录》：英吉利国即红毛番，在佛朗机西南对海。由散爹里向北少西行，经吕宋佛朗机各境，约二月方到。海中独峙，周围数千里，民少而豪富。房屋皆重楼叠阁，急功尚利，以海舶商贾为生涯。海中有利之区，咸欲争之。贸易者，遍海内，以明牙喇曼达喇萨孟买为外，府民十五以上，则供役于王，六十以上始止。又多养外国人为卒伍，故国虽小而强兵十馀万，海外诸国多惧之。海口埔头，名懒伦，由口人舟行百馀里，地名兰伦，国中一大市镇也。楼阁连亘，林木葱郁，居人富庶，匹于国都，有大吏镇之。水极清甘，河有三桥，谓之三花桥。桥各为法轮，激水上行，以大锡管接注通流，藏于街巷道路之旁，人家用，俱无烦挑运。各以小铜管接于道旁，锡管藏于墙间，别用小法轮激之，使注于器。王则计户口而收其水税，三桥分主三方，每日转运一方，令人遍巡其方居民，命各取水，人家则各转其铜管小法轮，水至自注于器，足三日用，则塞其管。一方遍则止其轮，水立涸，次日别转一方，三日而遍周而复始。其禁令甚严，无敢盗取者，亦海外奇观也。国多娼妓，虽奸生子必育之。男女俱衣白，凶服则衣黑，武官俱服红。女衣其长曳地，上窄下宽，腰间以带紧束之，欲其纤也。带头以金为扣，两肩以丝带络成花样，缝于衣上

。有盛宴则令年少美女，盛服歌舞，宛转轻捷，富贵家女人，亦幼而习之，以为乐。军法五人为伍，伍各有长，二十人则为一队，号令严肃，无敢退缩。唯以连环枪为主，其海艘出海贸易，遇覆舟，必放三板，拯救得人，则供其饮食，资以盘费，俾得各返其国，否则有罚，此其善政也。其馀风俗大略与各西洋同。土产金银铜锡、铅铁、白铁、藤、哆啰绒、哗叽羽纱钟表玻璃、牙兰米酒而无虎豹麋鹿。

《英吉利国夷情记略》〈（歙叶鍾《进蓉塘寄味山房杂记》）〉英吉利不见《明史》，入本朝始通于中国。考地图，在中国西北百馀度。其国东西马行约三日，南北六日，馀地散处各州岛屿，与邻国分市，相距有数万里者。悉航海以通往来，荷兰在其东，佛兰西在东南，俄罗斯在东北，瑞国及米利坚在其西，大西洋即葡萄亚在西南，小西洋则在利未央之东，其馀小国无算。半环地中海，统名曰欧罗巴州。

州人皆遵耶稣教，耶稣生。东汉时，始知以三百六十五日为一岁，今称一千八百三十几年。以中国冬至后三日为冬至，十日为年节，耶稣生有天受能通各国土音创教劝人为善，后被恶人钉其体于十字架，剖割以毙，其徒号其教曰天主。国酋初不信，禁习颇严，后与他国相攻不胜，祈于其寺，忽云中现一十字架，遂以十字架为先锋，克敌，因大信奉。于是造礼拜寺，供十字架自郡国至乡间，在在皆有。男女七日一礼拜，无跪拜仪，以除帽为大礼。礼拜日，停工作，许嬉游，不知闰，故不以月系年，即以礼拜期为数。贵女贱男，自王至民，率一夫一妇，无妾媵，不分内外，妇亦与人往还。大约男以三十岁后，女以二十岁后，自相择偶，临时议婚，王则与邻国世互婚嫁，生子女成立后，即分以业，俾自治生，故配合多以财产较，亦有终身不嫁不娶者听。凡交游至，问其妻，不及父母，知俯育，不知仰事，交易铸银为钱，大小不等，以便市鬻。死时须记赀财于簿，或施入仁会，或分交游亲戚，子女咸无争竞。三日除服，不知祭祀。乡国以仁会赀，立贫院幼院病院，举公正之人董理，故通洲无鬻子女者。亦禁蓄奴婢，士农工商，各世其业。

国立太学，郡中学，乡小学，延师以教读，字横列不直行，笔以铅锥为之，分科以习，书医士各有字，彼此不相通晓。商之子女，皆习书算，仕有土地世禄，传付长子，农以稼穡为上，次果木收畜。土地皆属于王，荒土呈官，注籍往垦，以三十年为期。满则归官，出示招投各书，愿出价目，封贮定期开看，多者得，将价呈缴，始听耕作。期未满亦听转投，已满亦许接投。以是无地税，屋有赋，以架为额，高广不计。窗棂外向亦赋之。赋有四：一归王，一设巡逻兵分段了守，一养瞽目废疾，治兵再赋，每男妇许各雇一人司爨，役不有赋，雇他国人赋倍之。工分艺木石塑画，不许搀越，能出一奇物，得专利三十年。他人学作，有禁有测，度家专看罗经，行海商则自小历风涛，习操楫泅水，居室以白石为墙壁，木为梁栋，高垒五六层以避贼。次用砖，下用土，以白灰垩壁，使极光明。男短衣，色尚青白，冬呢夏羽，居常以布。悉单无棉夹裘，大衣长其后两幅，愈贵愈长，甚至丈馀者，数人在后，提挈以行，称为礼服。富者以金线缘帽及领袖以白表。女则珠玉锦绣为饰，极其华艳，男受女制。凡食，早则饮茶，食干糗，午小食，晡大餐，牛羊鸡鸭、咸烧炙

，饭则麦面，饱后始饮酒，食水果，不以箸，用刀叉匙，器用金银玻璃为上。尺曰码，每码约中国二尺四五寸，各国不一。斤曰磅，约十二两零。随身带笔簿，遇异闻异事则记然，诺以拉手为定，亦登于簿无遗忘，无翻悔。遇军事，治税赋，于亚勒马尼国选兵〈（即耶玛尼国，所谓红面兵也）〉，其人忠实，肯用命备，宿卫置巡逻，悉募于此，各国皆然，不以民也。若在东印度各国用兵，则在满刺加招募〈（满刺加恐当作孟加腊）〉，兵饷极厚，每于礼拜下日关领，一人需洋钱十元八元不等，计一月人需银二十馀两，盖自有身赋与其酋也。

有官话，通行一州之地，无奴婢，故无责打骂詈，亦无笞杖之刑。有犯镣铐手足，闭置暗室，视轻重定期满始释，富者赎，重者窜荒地，役使开垦，死罪以绳吊颈毙之。大逆不道，则有器如鼓状，内藏锋刃，纳人置于通衢，过者蹴使滚，此为极刑。凡传召以竹竿，为符节，至即随以行有深怨不解者，各请证人，至广场，架鸟枪于肩，约药力所及，背立，发火互击，中不中皆息。凡病死，医者不得其故，则剖其脏腑头颅，考验病之所在，著书示后，盖以既死则无所惜，此欧罗巴各夷情之大略也。

其下篇曰：英吉利国，前明始大。自大西洋葡萄亚通中国，乞得澳门以居，置买茶叶大黄等物，归售各国，各国慕之，闻风踵至。乾隆年间大开洋禁，以粤东为市易所，设洋商通事，西南各国麇至，惟俄罗斯船不许开舱，盖其国与我北方蒙古毗连，向有榷场互易，若再开东南市舶，恐碍蒙古生计也。至是澳夷始不得独擅其利，乃以澳门夷屋赁与各国居，止澳夷向有番差一人以约束，理词讼，司达一人治赋税。英吉利既常来，遂于乾隆四十几年间，创立公司。公司者，国中富人，合本银设公局，立二十四头人理事，于粤设总理人，俗谓大班，二班，三班，四班。外有茶师，写字，医生及各家子弟来学习者，共数十人，每年七八月，夷船到时，始至十三行夷馆，许雇唐人，买办食用，年终事毕，船归，各夷仍往澳栖止，驾船者有船主，统管一，舟人有大二三四伙长，测星日，看罗经，量刻漏，对洋图，以掌舵行舟，有写字人登记数目出入，有医生治疾病，有兵卫掌枪炮，有水手管风帆，以及搭客等。初年每舟不下千余人，牛羊犬马皆备。至澳报同知衙门，派渔船引水入泊黄浦，洋商雇西瓜艚船，驳货出入，嗣海道日熟，递次减少。今每舟不过三四百人，大西洋既不得专利，来船日少，佛兰西幅员阔，人民众，然富者始饮茶，贫者以炒豆代，故船久不来，荷兰货本薄，无多船他如单鹰双鹰黄旗等国，间有至者，惟英吉利公司商船最盛。然所市皆非本国土产，皆采买他国，尤以万达刺沙暨东印度各国采买最众，易茶丝等货，以归各国及俄罗斯西境，皆就近至彼国转贩。每年三四月间，英国海舶云集，其初不过数船，近年增至大舶二十只，益以小船，其茶叶收赋极重，约埒中国买价，又禁他人不得置，即船主伙长等人置者。到日交公司酌领价值，由是富强日盛。

有大二三四等头人以治政事。其酋所居城，名兰墩跨海汊造桥，上行车马，下过舟航，富贵家皆有苑囿，春秋佳日，礼拜之期，听男女游玩，夜则街巷遍悬油灯，行

者无庸烛，其费出于仁会，亦有诙谐杂剧，夜始演。作昼有禁，恐妨工作也。人性强悍，好土人，荷兰等国皆畏之，推为盟主，以时聘问，数年一会。各酋长至其国以申盟约，宴游累月，方各登航以归。惟米利坚夷不与相下。米利坚即中国所称花旗者，沃衍宜五谷，周亦数千里，人勤力作，常以馀粮济各国。设十二酋长，以理事，一酋死复公举之，必众服而后立。故其人最重行谊，无梗化，无催科，有军事方治赋。英夷常起兵攻之，十馀年不能胜，又禁谷麦，不糴与英兵，英兵益困，各国力为和解，始罢兵。米夷常指英夷为山狗性，如稍畏让，彼必追来，一返身相向，反曳尾而去，故兵虽解，终不往还也。

其在东印度各国采买，亦设大班诸人，遇有可乘隙即用大炮兵船，占据海口设夷目为监督，以收出入税。先后得有孟刺甲新埠，及新加坡等处，即葛刺巴本荷兰在前明所踞者，英夷亦曾夺之。近始仍归荷兰，其用兵饷费出于公司，各港所征税，公司得收三十年，期满始归其国王。凡用兵只禀命而自备资粮，以故到处窥伺，所恃惟枪炮，炮子用生铁铸，重者至三十斤，故所向无不披靡。至东印度，皆回民，仍各有酋长，英夷虽据其海口，亦未深入其内地，其回夷贸易中国者，所驾舶，亦需英夷测度以行，故用英夷旗号，名曰港脚。嘉庆十一二年间，有大班喇佛者，约孟刺甲兵头，以兵船十艘，窥伺安南，为安南所烬，无颜返国，以所馀三艘顺抵粤洋。喇佛又与内奸说合，欲占澳门不果，喇佛不能回复兵头，遂潜匿不出，不能开舱，此十三年秋冬间事也。其兵头竟趋澳，占据炮台，西夷仅保守大炮台，发禀告急，时总督吴熊光，巡抚孙玉庭，调兵戒严，饬澳门文武驱逐。夷兵虽回舶，然不去也。直待十四年春，喇佛给与金银带归以恤死难，方回，喇佛以此被革，改用四班益华成为大班。盖议欲占澳时，惟伊不肯署名，嘉其有识也。喇佛旋以忧死于澳。益华成之后，有大班吐丹东者，冀我大屿山为居止，寄信回国，求奇异物入贡。自粤趋天津口，天津盐政以闻，奉准入都朝见。该夷使等不能行跪拜礼，诏将贡物发还，即饬盐政护送回粤，此嘉庆二十二年秋事也。时总督蒋攸钰亦将就从事，不能如各国使臣仪，其初设公司，所来呢羽，立股分售与洋商，总商有三股四股者，散商有两股一股者。所买茶即以股分为则，其茶价照客价明加，每石有银十两八两不等，名曰饷磅，以此重啖洋商。收茶时，用以上下其手，洋商媚夷者，茶多溢额。如近年东裕行两股呢羽交茶，逾怡和四股之数，此明验也。洋商中贤愚不一，每年互相倾轧，倘有泄外夷之短者，该夷公司必知遇事挑斥，故洋商遇地方官，询以夷事，皆谬为不知。而中国用人行政及大吏一举一动，彼夷翻无不周知。

闻嘉庆年间，夷船到口，该大班等恭请红牌来省馆，诘朝穿大服，佩刀剑，到各洋行拜候，稍有名望之商，必辞以事不见。俟其再来，然后往答，迎送如礼，一惟洋商言是听。迺年来船益多，销茶益盛，洋商仰其厚润，于是夷船将到。洋商托言照应，过关即出远迎又复常踞十三行之英夷，知汉字能汉语，常矜其出入口税，饷每年几及百万。而澳夷货来甚少，税饷极微，翻得坐享澳门市易租赁之利，每欲效之，遇班中人新来，多方播弄。如道光七八年，于夷馆前立大马头，置围墙栅栏，其地为对河居民来往渡口，禀控大宪，屡禁不遵。迨奉廷寄，巡抚朱桂桢亲督拆毁，

该夷又将来船碇泊零丁洋面，不入口开舱，以八事入禀要挟。又纠各国夷，随声附和，惟米利坚夷不从，回称如我国有船至汝英国贸易，必遵汝英国制度，今来中国图觅利耳。如无利即请汝亦不来，何须喋喋也。维时各船主争噪，向例到即开舱，起货下货，不过一、二月，即开帆回，今久碇于外，不但货物霉蒸，一船数百人食用何出。大班部楼顿，庸懦无能，听二三四班许供给各船食用，自七八月相持至下年正月，大班见不能了，潜附便舟而去。适洋商以所定茶不交，一年费用无出，再约齐至澳解说。始于是月十四五日，入口开舱，三月初间，忽有火轮船目孟甲喇来乃该港，坐班及驻巡夷目专信申饬，令其作速开舱，毋误一年贸易。火轮船者，中立铜柱，空其内烧煤，上设机关，火焰上即自运动，两旁悉以车轮，自转以行，每一昼夜，可行千里，自该处至粤仅三十七日。据夷人云：道光初年始创造，不能装货，以通紧急书信而已，斯一奇也。是年秋，夷船到三班，边司大班，事益以肆，竟带夷妇寓十三行，出入必乘肩舆，翻不许洋商乘轿入馆，种种故为干犯。大宪慌以言，遂架大炮于夷馆两旁，设兵守护。居民愤懑，即他国夷亦谓天朝怀柔过甚，其肩舆乃东裕行司事谢治安所送，被官拿究瘐死于狱，嗣通事头人蔡刚，往谕蔡刚有胆识，善语言，厉声辩诘，始有畏意，撒去兵炮。夷妇，仍不肯遽回。盖洋商于奉谕饬查时，已具禀谓大班患病，需人乳为引，故带以来，俟稍愈即遣回澳，故该夷得延抗也。

先是道光三四年间，公司以缅甸西南必姑港，土产甚盛，发兵船占据，为缅甸所败。兵船来粤取饷，碇零丁洋面。本新安县属，有兵上岸。滋事，用鸟枪击毙数人，大宪责令洋商向大班索凶手，据称此系，过往兵船，未经入口，非我能约束，且带兵人，如中国官长，我乃贸易民人，岂敢往谕回复。适是时又有米利坚船，载佛兰西夷商在黄浦，以砂斗击卖水果人，落水死。报验船主，将夷送出正法。而新安数命，迄无以偿，后闻其兵船不回国，在外三年，始归该国，仍革去职事以其不能约兵丁也。近年该班等又欲于澳门寓馆前立马头，竖旗杆，商之澳夷。澳夷初答以此中国地方，非我所主，继思英夷在省，如此横行，倘洋商迎合，为之营干朦准，是澳为彼有矣。次日向该班改说，此地乃中国界我居住，已数百年，汝等来贸易，暂赁以居，现有十馀国在此如皆各立马头竖旗杆，是此澳为汝各国之地矣。该班妄念遂止。澳旁高山，西夷建一望海楼，面零丁洋，用大千里镜远观，可见数日后所到船，并能认知何国旗号。山后向有小路可上，原许一切人登眺，至是西夷不许该班登眺，翻将山后小路铲去，大路设卡，彼亦无如何。时有英夷在葛刺巴犯事，潜逃来粤，原告踪至控于澳夷目，将该夷拿禁炮台议罪，该班为之缓颊，不听，及令他夷往视，又为守者拒不得入，因相口角，一并拿禁。诸班哑忍，不能致辞，以上闻之，通事头人蔡刚，定非虚妄，然十四年间，英夷曾占据炮台，西夷仅得大炮台以守，幸大吏亲饬文武员弁驱逐，英夷始俯首而去。今此虽夷目裁抑，未尝非藉中国威灵也。又各夷尝颂中国之盛，实无比伦，他港贸易货物，每有售有不售者。至于置货，更非经年累月不能集，惟粤港无论何货，即压船之石，已烂之铁，及剪弃之碎呢片羽，一至即售，所置货值数百万。一二月即齐立可开航，此虽绕大地一周，无此港口也。故英夷来船，皆有木榜横列数十款，闻系申戒之词，盖不独彼国土产

，来此销售。而茶叶大黄，实彼生命攸关，况彼国赋饷所出，时虞封港，故告戒严极，无如夷性好强，又贪三十年之专利，而听积久盘踞奸夷之怂恿，以至屡行悖妄，苟非大宪镇静待之，几何不酿成事端也。近闻该公司之期久满，后日富商不得续入，屡屡控争，该国酋贪其重利，日事因循，迨以兵烦费重，加之在事头目各怀已私，亏折支绌，再二三年亦必散歇。公司一散，海疆可保永绥，盖党羽众多，势力始横，善治者必先设法解散，而后易于制驭。公司之夷迨来横甚，散后则各管各船，各自牟利，此为易制。然恐不知者翻以为忧，因备记之俾见者知所去取焉。

又曰，澳门所谓新闻纸者，初出于意大利国，后各国皆出。遇事之新奇，及有关系者，皆许刻印，散售各国无禁，苟当事留意探阅，亦可觐各国之情形。皆边防所不可忽也。

源案：公司散则易制，此语甚扼要领，不料十四年散后，粤督反行文英吉利，索其专派公司来粤，总司贸易，其来人即义律也。误听洋商簧惑之谋，遂启边防无涯之祸，惜哉！探阅新闻纸，亦驭夷要策。

《海防余论》〈（南海颜斯综）〉：广东有通洋之利，恐有通洋之患，诸国熙熙皆为利来，而英夷尤专为奇技淫巧，以易取中国之财。彼国无税亩之征，行什一之法，首务商贾，税课特重。其人深谋远虑，好大夸功，号令甚严，从无宽贷。用兵机警，国内人少，多募他国杂番，而督以本国武官，爱惜士卒，知难即退，即如商船船主，御下甚严，仿佛军法。水手人等有过犯，与头目应议鞭多少，立案生死不计，其俗谋夺人地，非必出自国主之意，所谓港脚者，不止克拏三处地方，散处海外，皆有大小兵船，时常巡徼，往来游弈头目，多有携眷，三五富人，群居咨议，欲占据某国之某地，告知国主，许往凑合钱粮，即抽拨各处之兵船，令往攻取。若战胜得地，其地利益，国主与出资之人均分。自有章程，前者夷兵到澳门，登岸进至黄浦，乃夷商公司所为，其明征也。各夷常说天下富庶无如中华，诸国所来，船多不觉其多，所来少不觉其少，无卖不尽之货，又买不尽此地之货，为海内第一，是天下更无大于中华。英吉利久有垄断之心，常谓濠镜澳西洋人可居，我辈不可居耶。其覬觐久矣。次则大屿山，货物艰于来往，若老万山，则孤悬海外，皆非其所属意。英吉利尝欲称帝，称可汗，诸国不服，仍王号其本国船，俗呼祖家，以别于港脚。白头港脚番志在牟利，虽为所辖，不乐战争，船上船主，必是英吉利。愚以为若有贫民陷夷，宜开一面网，许其自拔立功，加之重赏，足以疑惑其心。彼之伎俩，专务震动挟制桅上悬炮，登岸放火，占据各处地方，多用此法。然未敢尝试于大国之边疆，恐停贸易，则彼国之正头港脚之棉花，何处销售，茶叶等货，何处购买，彼之国计民生，岂不大有关系。彼若并阻，诸国之来船肆彼劫夺，则与之争斗者，当不止一国，彼能无虑及此哉。驭夷者必先得其情，而后有以消其桀骜之气，折冲万里之外，刍尧之语，聊备采择。

《瀛环志略》曰：英吉利〈（英机黎。英圭黎。膺吃黎。谳厄利。英伦的。及列的

不列颠) 欧罗巴强大之国也。地本三岛，孤悬大西洋海中，迤东两岛相连，南曰英伦(一作英兰) >，北曰苏各兰 < (一作斯哥西亚，又作师古泰) >，两岛南北约二千馀里，东西阔处五六百里，狭处三四百里。迤西别一岛，曰阿尔兰 < (一作耳兰，又作壹耳兰大) >，南北约七八百里，东西约五六百里。英伦南境，与荷兰佛郎西皆相近，舟行半日可达，距佛尤近。海港狭处，止六七十里，两岸可以相望也。其地古时为塞尔达土番部落，后为北狄峨特族所据。汉宣帝五凤三年，罗马大将恺散 < (一作人略塞萨尔) >，略定西北诸番，渡海平英伦，建为别部，属意大里者数百年，至今犹有罗马城阙遗址。前五代时罗马衰乱，峨特族卑勒敦人，据英伦，安各罗者，亦峨特种，亦悉众渡海，破走苏格兰两部，因胁降卑勒敦人。陈后主元年，据英伦立国，后分为七部，如列国小侯，时相攻伐。有部长厄伯德者，娶佛郎西王之女，女奉天主教，招教师来其国，为制礼仪，由是其国渐强。唐德宗贞元十六年，灭六部归于一。是时大尼国 < (即槌国) >，方劫掠海上，突以兵船入英伦，据都城，英人以厚赂缓兵，寻以计焚其船，自是大尼寇抄不已，居人逃窜，田野荒芜。王子有亚腓烈者，智略过人，幼时尝两赴罗马，与文士游，方嗣王位，而大尼以大众来攻，王乃伪为乐工，抱琴造敌营，请奏伎侑酒，因得纵观虚实，进兵决战，破其连营。是时佛郎西已陷北地，大尼迭侵扰，王枕戈寝甲，五十馀战而外患平。乃垦田劝农，招徕商旅，开学堂以译异书，立保约以弭盗贼，境内大治。王卒于唐昭宗年间。嗣王孱弱，大业遂衰，先是英伦以尚天主教，久之教师擅大权，王娶后，教师禁不令同室，王不听，教师劫后，以铁烙毁其容，寻毙之。王噤不能仇，由是王仅守府，国势不振，大尼复来侵扰，许以岁赂，始给银一万七千斤，后增至二万四千斤，而兵不止。

宋真宗十九年，大尼大举来伐，破伦敦都城，遂兼英，其王曰驾奴特，立治粗有条理。英人安之其子嗣位，苛敛好兵，英北族 < (英伦北部) > 有酋曰威廉 < (一作给列尔美) >，欲图兴复，复请于罗马教王，教王以英土封之。宋英宗治平年间，威廉率舟师伐英，破大尼王，进攻据伦敦，遂王英北族，凌英民，英民多反侧，王怒，驱英民十万众于林中，皆冻馁僵死。以其田宅赐北族，既而悔恨卒。显理第一王嗣，宋高宗二十七年，显理第二王嗣，有智谋，时天主教魁，参预国事，王有所拔擢。教魁辄阻挠之，群臣怒，杀教魁，王惧教王之加罪也。自守斋拜其墓，乃已。附近有伊琳大洲 < (即阿尔兰) >，王征服之，其世子刚猛好战，欲伐居犹太之回回族，先往聘修好，归途为他国所掳，以金赎回，后战死。其弟约翰嗣位，性强狡，好田猎，百姓疾之。又侮天主教教师，罗马教王怒，弃绝英民，息礼拜，闭殿堂，废其婚葬，禁饮酒食肉剃须，民皆怨，恫咎王。王不得已纳贡教王，由是权遂下移。民自择荐绅议政，不复关白，王愤甚，欲诛诸绅，诸绅欲招佛郎西世子为王。会王歿，华义都第三王 < (一作义都亚尔多) > 嗣，王有权略，平内难，与佛郎西构兵累年，互有胜负，其子嗣位，权复为绅民所侵。英有别部之酋，忽起兵攻王，夺其位。明建文帝元年，国人立显理第四王，募兵恢复，灭僭位者国乃定。显理第五王立，伐佛郎西胜之。显理第六王立，年尚幼，大臣摄政，时王宗分二派，一曰红玫瑰派，一曰白玫瑰派 < (因初分之弟宅植此两种花因以得名) >，两宗争王位

，自相屠攻，国大乱者数十年，藩属皆叛。明宪宗成化年间，显理第七王嗣位，削平内乱，四境乂安。王性机敏，长于吏治，称为贤主。显理第八王立，性强傲，尚豪华，喜怒不常。娶西班牙王女为后，因助西班牙伐佛郎西，后无子出之。再娶少艾，已而失宠，杀之。再娶又杀之。王有佞臣委以大权，偶迁意，立赐死，忠言至计如充耳，四国皆称为无道主。先是日耳曼人路得者，著书译解耶稣教旨，人多信之，王不谓然。手著一书驳诘之。王歿，嗣王崇信耶稣教，宽惠爱民，教士有法，举国喁喁望治，未几卒。其姊马利〈（一作马理）〉嗣位，赘西班牙王子为婿。禁耶稣教，国人不悦。

明嘉靖三十六年，女主以利撒毕即位，贤明知大体，勤于政治，英民颂之。是时荷兰不肯从天主教，为西班牙所攻，英女主以兵助荷兰，西班牙因移兵伐英，师船泊英港，忽大风激浪，船触焦石，半沉坏，英人以小舟围而歼之，片帆无返者，国势益振。是时苏格兰岛人布鲁斯，复自立为国，有女曰马理，姿绝世，初嫁佛郎西王为后，佛王早卒，马理归母家，父卒，嗣王位。选群臣美丈夫为夫，夫有别宠，马理妒之，夤夜遣客杀夫，焚宫以灭其迹。而赘杀夫者为夫，时国人已竞尚耶稣教，而马理仍执天主教，又杀夫。有邪行，国人围马理，将囚之，越城而逃。募兵决战，兵败降于英。英女主谓马理犯伦肇乱，下之狱，马理在狱十八年。复与狱吏奸，因逃去，英人捕诛之。万历三十一年，英女主卒，无子，苏格兰王热给斯者〈（一作惹米士）〉，女主之姻也。英人奉以嗣王位，复与英伦合为一国。时天主教之徒结党谋反，窖公会殿下，藏火药事发觉，悉诛死。万历四十二年，查理第一王立，性拗癖，好戏狎，不恤民隐，由是士民怨畔，公会皆散，税饷无所出。王将与佛郎西战，授甲无应者，师船未战而退。顺治四年，王募兵诛梗命者，国人与王战，虜士弑之。时有大绅负才望，摄王政以定国，自称保护主，申明法制，参以变通。英人称便与西班牙荷兰战，皆胜之。摄政数年，仓库充实，乃致位于先王世子，曰查理第二王，为人淫侈，多内宠，惰于听政，常与荷兰战。帅师者国之名将，入荷兰内港毁其战船，王由此愈汰，忽伦敦大火焚宫室，民居殆尽。已而瘟疫盛行，死者相枕藉，国势顿衰。其弟嗣位，素习天主教，强民相从，民习耶稣教久，不肯变，虑王之相难也。渡海招荷兰王为主，荷兰王率兵至，王奔佛郎西。

康熙二十七年，荷兰王入伦敦，即王位，号曰威廉第三王，雄武有大略，法度严明，百司任职，积粟如丘山，搜讨军实悉成劲旅，由是威声大振。方欲席卷西土，会歿无子。时日耳曼之汉挪瓦王若耳治，有贤声，康熙五十二年国人招请来英，奉以为王。王初莅英，不谙其俗，后为英故王之女，习于英事，相助为理，民大和。前王两宗苗裔尚存，起兵欲图恢复，王夷灭之。是时英商船通行四海，日益富强，与佛郎西交兵屡战胜，王卒，子若耳治第二王立，修法度，别等威，定亲疏，平讼狱，国称大治，伐西班牙获全胜，又伐佛郎西，割其藩属之在亚墨利加者。

乾隆二十三年，若耳治第三王立，举动好循礼法，亦称贤主，先是前明中叶，英人泛海觅新地，得北亚墨利加腴土，徙国人实其地，日渐垦辟，遂成沃壤。英人倚为

外府，后英国军兴连年，征税饷于亚墨利加，倍其常额。亚墨利加人据地起兵，英人攻之，八年不克，佛郎西与英世仇，倾国助之，英不能支，乾隆四十七年议和，听其自立为米利坚国〈（亚墨利加之转音即花旗国）〉。英国由是虚耗，已而五印度贸易日盛，英富厚过于昔时。五印度者一名温都斯坦，乾隆中年东印度之孟加拉，囚虐英商，英以大兵攻之，灭孟加拉，乘胜胁降东中南印度诸部，设四大部〈（孟加拉、麻打拉萨、孟买、亚加拉）〉，麻喇甲息力诸番族，皆归统辖。英人遍设埔头，帆樯云集，百货流通，富饶遂为西国之最。嘉庆年间，佛郎西拿破仑得国，侵伐四邻，废西班牙王，而以其弟王西班牙，故王求援于英。英起兵伐佛郎西，血战累年。嘉庆二十一年，破佛郎西舟师于海峡，以九万人登陆进攻，拿破仑率十万众御之于窝德尔禄，约日大战，自昧爽至日暮，枪炮之声震天地，数十里烟气迷漫，佛师大溃。英人乘势逐北，斩首二万级，禽拿破仑以归，流之荒岛。西班牙王复其故国，由是英国威振西土。王晚年得狂病，世子摄政，王卒。世子嗣立，有贤声，早卒。道光九年其弟嗣立，曰威廉第四，王初为水师总统，以厚德御下，不沽名誉，及即位，安民和众，不喜兵争，论者谓才能不越众，而德量有馀。道光十八年四月卒，无子，有女不慧，遗命立兄女维多里亚为王，即今在位之女主也。立时年十八，赘日耳曼撒可堡侯世子博雅那为婿。

英国之制相二人，一专司国内之政，一专司国外之务。此外大臣，一管帑藏，一管出纳，一管贸易，一管讼狱，一管玺印，一管印度事务，一管水师事务，皆有佐属相助。都城有公会所，内分两所，一曰爵房，一曰乡绅房。爵房者，有爵位贵人，及耶稣教师处之；乡绅房者，由庶民推择有才识学术者处之。国有大事，王论相，相告爵房，聚众公议，参以条例决其可否。辗转告乡绅房，必乡绅大众允诺而后行，否则寝其事勿论。其民间有利病，欲兴除者，先陈说于乡绅房，乡绅酌核，上之爵房，爵房酌议，可行则上之相，以闻于王，否则报罢。民间有控讦者，亦赴乡绅房，具状，乡绅斟酌拟批，上之爵房核定，乡绅有罪，令众乡绅议治之，不与庶民同囚禁。大约刑赏征伐条例诸事，有爵者主义。增减课税，筹办帑饷，则全由乡绅主义，此制欧罗巴诸国皆从同，不独英吉利也。

按：粤东之居夷自葡萄牙之居澳门始，维时尚方珍玩皆取办于粤，或不时给，辄为中涓所黻。适葡人有濠镜之请，当事利其居积货宝，便于贡办，又所谓欧罗巴者，尔时不知为何地，以为不过南洋诸夷之类，一枝暂借，无足重轻，非必贪其五百金之利也。葡萄牙本西洋小国，得此澳宅，如登天上，以其馀资广筑楼馆，绵亘万厦，欧罗巴诸国来粤者，倚为东道主人。其留粤收逋欠者，皆租其房屋，久居不去，诸夷之浸淫狎熟于粤东，则由澳门为之权舆也。林富一代名臣，而谋国之疏若此，语云涓涓不绝，将成江河，可不慎哉。

按：英吉利夔然三岛，不过西海一卷石，揆其幅员，与闽广之台湾琼州相若，即使尽为沃土，而地力之产能几何？所以骤致富强纵横于数万里外者，由于西得亚墨利加，东得印度诸部也。亚墨利加一土孤悬宇内，亘古未通声闻，英人于前明万历年

间，探得之，遂益万里膏腴之土，骤致不赀之富。其地虽隔英伦万里，而彼长于浮海，视如一苇之杭。迨南境为米利坚所割，所馀北境，虽广莫而荒寒，类中国之塞北。燕支既失，英国几无颜色矣。五印度在中国西南，即所谓天竺佛国，英人于康熙年间，在孟加拉购片土造屋宇，立埔头，乾隆二十年灭孟加拉，乘胜蚕食印度诸部，诸部散弱不能抗，遂大半为其所役属。其地产棉花，又产鸦片烟土，自中国盛行之后，利市十倍。英人所收税饷，五印度居其大半，失之桑榆，而收之东隅，抑何幸也。英人既得五印度，渐拓而东，南印度海之东岸，遍置埔头，阿喀刺达围取之缅甸，麻喇甲息力〈（即新奇坡）〉易之荷兰，小西洋〈（即印度海）〉利权，归掌握者八九矣。再东则中国，之南洋诸岛国，惟吕宋属西班牙，馀皆荷兰埔头，繁盛如噶罗巴〈（即瓜哇）〉，冲要如马尼刺〈（即小吕宋）〉，英人未尝不心艳之，而他人我先无由凭空攫取，然往来东道，以两地为逆旅，西与荷不敢少迁也。澳大利一岛，孤悬巽维，广莫无垠，野番如兽，英人亦极意经营，欲收效于数十年、数百年之后。至如亚非利加之狮山〈（又名西尔拉里阿尼）〉，辟荒秽而取材，南亚墨利加之特墨，践涂泥而耕作，盖四海之内，其帆樯无所不到。凡有土有人之处，无不睥睨相度，思 削其精华。而目前之倚为外府而张其国势者，则在于五印度。其地在后藏西南，由水路至粤东，不过两三旬，盖英人之属地，又已近连炎徼，而论者止知其本国，以为在七万里之外也。

英吉利岁入税饷，除还商民利息外，每年约得二千馀万两，所出亦二千馀万两，本国额兵九万，印度英兵三万，土兵二十三万，谓之叙跛兵。兵船大小六百馀只，火轮船百馀只，其兵水师衣青，陆路衣红，重水师而轻陆路，专恃枪炮，不工技击，刀剑之外无别械。

英吉利本国地形褊小，而生齿最繁，可耕之土，不足供食指之什一。北亚墨利加未分割之前，英民无业者，率西渡谋食，迨米利坚创据之后，英所馀北境之土，寒不可耕。虽得五印度广土，而其地本有居人，并无旷土，英人流寓虽多，终不能反客为主，故汲汲于寻新地。近年得新荷兰大岛，诛锄草莱，流徙罪人于此，贫民无生业者，亦载往安插，移民于八万里之外，其为生聚之谋，亦可谓勤且劳矣。

卷五十五

◎北洋

○大俄罗斯十八部

莫斯科部〈（东界阿那里麻，南界都腊，西界斯摩速，北界底瓦）〉本俄维斯旧都也。封域寥阔，故曰大俄罗斯。幅员万有五百方里，户百二十八万九千八百二十口，辖小部落三，兵二万二千，土番皆习额利教。北界近绥林，层峦叠岭，林木葱茏，天寒多雪。尚不害麦，亦产谷。佛兰西那波利稔王曾率师来侵，踞其国都，为火所焚，不战自溃，死者无算，败绩而遁。盖俄罗斯设计空城，伏火以待也。先是莫斯科之屋，庐墙用木板，上覆以瓦，或有以铁为门，以铁代瓦者，自遭兵燹，极目荒旷，行人常虞迷失。嗣后鸠工修筑，砖瓦崇丽，修庙则仿之鞑靼里，造衙署监狱则仿之佛兰西，而宝刹之轮奂，营帐之严壮，皆埒诸国。现存大锤一宽六十七忽〈（八寸，为忽）〉重二万二千顿，约值银七万棒〈（五员，为棒）〉大炮一，内宽可容坐一人，从未施放。

那窝俄落部〈（东界窝鹿那，南界底瓦，西界北特革，北界阿罗义斯）〉，地处北隅，并辖麻尔底濒海各地，为至蛮悍之区，不受约束，后为蒙古鞑靼里王所夺〈（疑即元太祖所。攻服之钦察也）〉至俄罗斯伊挽王始征服其地，幅员五万六千五百五十一方里，户九十一万五千五百口，辖小部落八，壮丽虽不及国都，亦俄罗斯至大之部落。

尼斯诺科部〈（东界加匱，西界窝拉里麻，南界水耶，北界果士多罗麻）〉，滨临窝尔牙河，为阿细阿洲，欧罗巴洲，各国商贾所聚，惟河涨时有淹之患。幅员二万五百零一方里，户百三十四万口，辖小部落五，土番皆习额力教。

阿那里麻部〈（东界尼斯诺科，西界莫斯科，南界阿匱，北界耶罗斯罗）〉，幅员万八千六百六十九方里，户百三十万六千零四十六口，辖小部落四，土番皆习额力教，产铁器。

底洼部〈（东界耶罗斯罗，南界莫斯科，西界伯斯果甫，北界诺科落）〉，附近窝尔牙河，幅员二万四千二百十三方里，户百二十三万三千三百五十八口，领小部落五。土番皆习额力教。

都腊部〈（东界阿匱，南界阿里尔，西界加鲁牙，北界莫斯科）〉，幅员万一千九百零四方里，户百零九万三千七百二十口，领小部落四。土番皆习额力教，产铁器，居人富庶。

加鲁牙部〈（东界都拉，西界斯摩速，南界阿里尔，北界莫斯科）〉，幅员万二千七百三十六方里，户百十五万九千六百口，领小部落四。土番皆习额力教。土腴产粗尼粗布，贸易蕃盛。

阿腊尔部〈（东界窝罗义斯，南界戈塞，西界渣尼俄甫，北界都腊）〉，幅员万六千七百七十九方里，户百二十七万零八十五口，领小部落五。土番皆习额力教，美田畴，产稻谷运售干比特革。

窝罗义斯部〈（东南俱界端戈沙斯，西界戈塞，北界旦摩甫）〉，附近端河。俄罗斯比达王，始得其地。幅员三万二千四百八十七方里，户百有四万四千八百二十口，领小部落十一。土番皆习额力教，土沃商贾盛。

斯摩速部〈（东界莫斯科，南界阿腊里，西界委的塞，北界底洼）〉，幅员二万二千零八十八方里，户百二十九万七千有五十口，领小部落六。土番皆习额力教，庙宇华丽。

伯斯果甫部〈（东界底洼，西南界委底塞，北界比特革）〉，在大俄罗斯之西，幅员二万二千二百九十三方里，户七十八万三千九百四十口，领小部落四。土番俱习额力教。

耶罗斯罗部〈（东界果斯多罗麻，西界底洼，南界窝拉里麻，北界窝麻那）〉，在大俄罗斯之中央，幅员万四千五百二十八方里，户百有二万二千九百九十口，领小部落五。土番皆习额力教。

窝禄那部〈（东界俄罗斯，南界巴母，北界阿占牙尔，西界诺戈落）〉，在大俄罗斯之北，幅员十六万三千七百有十二方里，户八十万零二千一百七十口，领小部落十有九。树木蕃茂，俗尚织机不产五谷，皆仰商贩，土番皆习额力教。

阿罗义斯部〈（东界门占牙尔，南界诺科落，西界么兰，北界阿占牙尔）〉，在大俄罗斯之北，幅员七万有七百八十九方里，户三十五万二千九百口，领小部落七。土番俱习额力教。多树少五谷，仰商贩。

阿占牙尔部〈（东界阿细阿洲俄罗斯，西界几摩，南界窝禄那，北界冰海）〉，在大俄罗斯之北，幅员三十四万六千一百三十三方里，户十六万二千六百六十口，领小部落四十有五。粮食俱由南方商舟运至，舟不回帆，至即折鬻为薪，以材木贱也。土番皆习额力教，俗皆业渔。

赫阿匿部〈（东南俱界旦摩甫，西界窝那里摩，北界都腊）〉，幅员万四千五百五十三方里，户百二十七万二百九十口，领小部落五，土番俱习额力教。

果斯多罗麻部〈（东界未压加，西界耶罗斯罗，南界尼斯诺科，北界窝禄那）〉幅员三万八千五百七十方里，户百四十二万二千七百口。领小部落六，土番皆习额力教。

戈塞部〈（东南俱界阿罗匿斯，西界渣尼阿什，北界阿腊尔）〉，幅员万四千九百五十四方里，户百六十一万一千有五口，领小部落五，土番皆习额力教。

○小俄罗斯三部

几富部〈（东界布尔多洼，西界牙尔西阿，南界卡循，北界阿尔希尼阿）〉土宜耕种，本俄罗斯旧地，前为鞑靼里、波兰两国所据，后复夺回。幅员万七千五百五十七方里，户百三十五万三千八百口，领小部落二十有二。首部落有新旧之别，旧城庙宇多荒芜，新城极壮丽。土番皆习额力教，俗尚洁，勤工作，屋墙俱饰以白，人多好胜。

查尼俄南部〈（东界戈塞，南界布尔多洼，西界敏塞，北界阿葛尔）〉幅员二万二千九百八十八方里，户百三十七万八千五百口，领小部落七，土番皆习额力教。

布尔多洼部〈（东界阿罗匿斯，西界几付，南界斯底里加那甫，北界查尼俄付）〉幅员万六千八百零十方里，户百九十三万三千口，领小部落五。土番皆习额力教，土产谷麦，农商富庶。

○南俄罗斯五部

南俄罗斯，平衍宜麦，土番西底唵，最犷野至俄罗斯。北达王、加底尼里王时，渐归教化。

加底里部〈（东界端科萨斯，西界卡循，南界捣利达，北界布尔多洼）〉，千七百九十六年，波尔王始设部落招商贾，今则为俄罗斯国中等之埠。幅员二万九千七百五十五方里，户九十四万四千九百四十口，领小部落四，土肥而难于取水。

卡循部〈（东界加底里那斯拉付，南界捣利达，西界密沙拉米，北界几付）〉，幅员二万五千七百二十八方里，户五十二万三千六百口，领小部落十有一。

捣利达三部，又名格里弥阿〈（北界卡循，东南，西俱界里海）〉，在欧罗巴俄罗斯极南，幅员四万三千五百六十二方里，户四十三万七千四百口，领小部落四。小山层叠，螺髻可观，和暖称乐土。前属耶麻尼，后属鞑靼里，俄罗斯连年攻战而得之。

密沙那弥部〈（东界卡循，西界普鲁礼，南界里海，北界波那里）〉，幅员万八千一百一十方里，户三十一万口，领小部落八。

端戈沙司部〈（东南俱界欧色特里，西界窝罗匿斯，北界冰耶新麦塞）〉，幅员七万七千零三十四方里，户三十一万口，大小部落十有九。土番本鞑鞑里种类，修伟淳朴，富足好施，家居力作，征战奋勇，部落生杀自擅。所征赋税，每年稍助俄罗斯新藩兵饷而已。查加色，首部落也。滨临端河，常被水患，迁城高阜，仍其旧名。民免昏垫，而贸易不若旧部之便。

○加匱俄罗斯五部

加匱，领大部落五，加匱未压加、新麦塞冰耶、巴母本鞑鞑里之地，至千五百五十年〈（明世宗嘉靖三十九年）〉始归俄罗斯。

加匱部〈（东界阿临默，南界未压加，西界尼斯诺科，北界新麻塞）〉，幅员二万二千二百七十二方里，户百有十三万八千八百口，领小部落五。先时街道，咸铺木板，嗣因不戒于火，改用砖石。地多树木，产铜铁。土番普鲁社种类，勤耕种，精焠皮，制造番<卤见>。

未压加部〈（东界巴母，西界果斯多罗，南界加匱，北界窝麻那）〉，幅员四万七千三百八十一方里，户百二十六万九千五百口，领小部落十有二，土番普鲁社种类。产五谷，多运售于阿占牙尔，兼产铜、产番<卤见>。

新麦塞部〈（东界荷林墨，西界冰耶，北界加匱，南界端戈沙斯）〉，滨临窝尔牙河，幅员二万九千九百一十方里，户百有九万五千一百四十口，领小部落七，土番普鲁社种类。出产铜、铁、树木。

冰耶部〈（东界新麦塞，西界单摩甫，南界端戈沙斯，北界加匱）〉，滨临苏腊河，幅员万六千五百九十七方里，户百有四万四千八百口，领小部落五，土番普鲁社种类。勤耕种，地多树。

巴母部〈（东界阿细亚俄罗斯，西界未压加，南界荷林墨，北界阿鹿那）〉，幅员十二万七千零一十七方里，户百二十三万二千四百七十口，领小部落十有五，土番普鲁社种类。西隅之山，产铜铁尤旺。

○俄罗斯南新藩五部

俄罗斯南新藩之萨加社、纳希斯丹、诺尼阿、阿沙塔千、阿邻默五大部落，同属一区，内有高加萨斯大山，外临黑海、里海，壤地崎岖，不与各国往来。人皆化外，

恃其险僻，谓无人敢侵其境。未几诺尼阿蛮区，竟为巴社所夺，尚有滨海数小部，亦为都鲁机所夺。而萨加社等部落，是时又为俄罗斯所有。嗣因诺尼阿背叛巴社，俄罗斯率师征服，并得土鲁机所属之数小部，从兹滨海蛮区，悉为俄罗斯属地。土番皆习马哈墨回教，小谙文学技艺，劫掠为生。俄罗斯设兵设官，极力抚导，惟阿林墨部，近已归化，同于内地。次则萨加社，亦加驯服。阿萨塔干平地，多有鞑鞑里流寓之人，设勘〈（官名）〉管束，税其牛羊，尚遵法度。若诺尼阿纳希斯丹，则粗蛮如旧，因其地与巴社附近，欲藉其力以捍拒，虽有官弹压，羁縻而已。

萨加社部〈（东界纳希斯丹，南界诺尼阿，西界黑海，北界阿萨塔干）〉，境内崇山峻岭，最高曰高加萨斯山，千三百二十丈，终年积雪。土不饶而宜麦。领小部落十有四，首部曰摩斯诺，设有炮台，地极崎岖。自俄罗斯辟山路，造桥梁，五年始蒔。设总领一人及玉士领千五百名。玉士领，武官也。所乘马皆雄壮善走，兵器弓矢鸟铳，甲坚能御铳弹。所蓄奴仆分二等，一备战阵，一司耕作。其备战之奴仆，多至万人，修伟赳战。女多妍丽，出则以布蒙面，蹑木屐，童女以皮束下体，钉以银扣，俟嫁时夫亲释之。生儿女，三四岁，亲朋即抱去抚育，教习事业，无异亲生。男至堪临阵，女至可婚配，始还其父母，谓亲自鞠养，恐其溺爱也。机土腊小部落，濒氏力河，市埠万家，而都鲁机之阿敏阿人，十居七八，产丝发及酒。

诺尼阿部〈（东界纳希斯丹，南界都鲁机，西界黑海，北界萨加社）〉，岩峦盘互，万木参天，山深多矿。本巴社之地，因国王与俄罗斯交兵，征国中年不及壮之丁，尽入营伍，愤怨背叛，原欲自制，方而不意复为俄罗斯所得。领小部落二十，土番壮勇，而女多美。户三千馀万口，习额力教者大半，习马哈墨回教者仅小半。其俗权贵之家，御仆残刻，无论田之饶沃倍额收租，不计耕奴冻馁，故赤贫甚众。劫掠四出虽良农负耒而耕，亦必手械自卫。特付里斯，首部落也。俗旧淳朴，今渐华靡。有习武馆，军装库，互市蕃盛。

阿萨塔干部〈（东界海，西界萨加社，南界端苛萨斯，北界阿林墨萨）〉，地多旷野崇山，领小部落四十有一，首部落濒里海。巴社之丝发宝石诸货，皆售诸此。土番亦富足，善贸易，贫者捕鱼为生。东南隅有阿喇湖，可以煮盐，格廉敏为旧时首部，今虽颓废，居民尚七万馀，内有英吉利、佛兰西、巴社、印度各国之商，而都鲁机国之阿敏尼阿人最众。

阿林墨部〈（东界阿细亚洲俄罗斯，西界加匭，南界阿萨塔干，北界帕尼）〉，界阿细亚欧罗巴两洲之间，地多草埔。东隅有河，发源乌腊岭山中，谓之乌拉领河，境内南历阿萨塔干而注里海。辖小部落三十有三，阿林墨本，首部落也。缘近边界，改移总领官于乌腊，故近日以乌腊为首部。土番顽梗，今渐入化鞑鞑里之人。每年贩马至者万计，羊约六万。

纳希斯丹部〈（东界里海，南界巴社，西界诺尼阿，北界萨加社）〉，近海岸，土

膏沃，领小部落十有三。

○北洋俄罗斯东新藩在阿细亚洲内地〈（与蒙古满洲相毗连之地）〉

悉毕厘阿国，在阿细亚洲之东北隅，俄罗斯藩属也。东界大洋，与弥利坚洲对峙，中隔一峡，谓之墨领峡。西界乌拉岭，岭高仅三百馀丈，而长则自北海而至加斯比庵海〈（即里海也）〉，阿细亚与欧罗巴，即以此岭分界。中有一路，可通车马，实为两洲之关键。北抵冰海，南以阿尔台山为界。阿尔台山起处，距乌拉岭不远，自西而东，直抵海岸，最高之峰二千丈，有出火焰者，山北为悉比厘阿山，南即蒙古伊犁鞑里黑龙江等处也。其地旧为鞑里游牧之所〈（观此则俄罗斯东北亦旧为游牧国，故佛经谓北方为马主。元太祖封其长子术赤于阿罗思，故云亦游牧国也）〉，额利西罗汶国，亦有人往焉。生齿日蕃，分族类，立头目。其萨克阿左右之地界，连悉比厘阿者，为鞑里，凝匿士王所得〈（凝匿士王，似是元代藩封）〉。阴遣人侦探悉比厘阿形势，欲越阿尔台山，而取山北地。路险崎岖不果，迨俄罗斯自立国，不属鞑里统辖。有俄罗斯之商，至悉比厘阿海岸贸易，以洋货易皮货，日渐蕃盛。交结头目，盛夸俄罗斯之富庶。各头目惑之，间有率属至俄罗斯者，睹其国都市廛宫殿之壮丽，倾心归向岁贡方物为藩属。俄罗斯遂于近海之乌弥河口，建炮台，扼要害，不劳一兵一矢，而悉比厘阿，悉为俄罗斯所有。然地旷人稀，乃取国中罪人，谪戍于此，以罪名之轻重，分派力役。

及至伊挽洼尔西二代王时，恐生内患，将附近国都之鞑里人，驱之加斯比庵海〈（即里海）〉，旋得端戈萨司之战士，用为前驱，恢复侵地，遂统大兵，欲尽驱鞑里之人。鞑里有豪健头目耶尔麻不服，领部众六千馀，东据悉比厘阿，欲自立国而力不敌，仍臣服于俄罗斯。耶尔麻旋为其部下所杀，于是俄罗斯王复移驻防阿磷之兵，辟地至华尼西阿。其居民曰倪俄斯族，土沃淳良，大兵甫至，争贡皮裘。复沿庵雅腊河而上，几至雅克萨〈（即黑龙江，雅克萨城）〉，其居民曰模腊斯蒙古，强悍异常〈（即索伦）〉。俄罗斯惮于前进，改沿里那河左而行，崎岖冰雪，一片荒旷，惟产貂狐最贵。既而端戈萨司之兵，不畏冰雪，往来其地，五十馀年。

至千六百三十九年〈（太宗文皇帝崇德四年）〉，有端戈萨司之弥特厘者，直至东洋荷葛斯海岸，侦探道路，复增兵前往庵雅腊河以至麦加湖远近之地，无不征服〈（此即康熙初年俄罗斯与我朝争黑龙江索伦地之事）〉。由彼径抵黑龙江适遇满洲兵至，与之交锋，俄罗斯败归山后〈（阿模尔河，即黑龙江。麦加湖，即呼伦贝尔泊也。山即外兴尔大岭，职方外纪图谓之东金山）〉，故濒江荒地，仍属满洲。后即以此为界，俄罗斯自此固守边疆，抚其所得之地，较之当日阿列山达王西沙尔王时，幅员辽阔，不啻倍蓰。由是欲穷东界所极，是否与阿弥利坚洲相连，抑或东洋有海间断，并欲于阿细亚洲之西，直抵印度，已得捷径。惟阿细亚洲东方，与弥利坚洲断续之处，屡访之先日兰顿荷兰商舶，未得端倪。比达额列王，亦曾募荷兰人

，操舟访察，无获，旋令雅古萨各官〈（雅古萨，乃俄罗斯东方部落，非黑龙江之雅克萨也）〉，遍考史记，亦无纪载。惟云里那河、因底雅加河、阿腊斯加河，水皆北流注海。

千六百四十八年〈（顺治五年）〉，有端戈萨司头目特斯纽及孤底那二人，相继舟访，只言阿细亚洲与弥利坚洲不相连。千七百年〈（康熙三十九年）〉，取得甘查甲，其地斗出东海大洋，风土迥异，似别有天地。其东之少南，即日本国所属之萨牙莲岛、热斯梭岛。正东边界，则与欧罗巴滨海诸国相连。并得弥利坚洲一小隅之地及附近海岛，报至国都，而比达额列王已逝，其女加特腊因嗣位，于千七百二十年〈（康熙五十九年）〉，继述父志，复遣官一士般麻、一芝利果、一墨领，携熟谙天文地理之特里斯列，乘船东迈，一无所获。千七百二十八年〈（雍正六年）〉，墨领复至东隅，仅考明阿细亚与弥利坚中隔一峡，虽不相连，而相距不甚远，遂以已名而名其峡曰墨领峡，从兹不复遣使矣。按悉毕厘阿，国分二域。西二部曰都莫斯，曰科利弗。东二部曰雅古萨，曰甘查甲〈（英夷图称此为四省，盖四大斯科也，与中国相首尾）〉。四部之城池，又以都莫斯雅古萨为最巨，其王独揽国权，虽有世家公卿，莫敢专政。广兴文学，以化边鄙，声名文物，日进于旧。然因地制宜，故与欧罗巴之俄罗斯，法度稍异，且距俄罗斯国都遥远，凡在悉毕厘阿之加弥业〈（贵官名）〉每自专擅，不为百姓所服。幸当日甫得其地，即将本国之人，分徙侨居，尚知王化。主客相维，故至今无敢背叛。水师官弁，多侵船料以肥其私。近日力惩前辙，兵共二万二千，半住都莫司，半住雅古萨，派守各口炮台者十之六，派防南界者十之四。因当日取悉比厘阿者，皆端戈萨司之兵，故仍以其人充伍。此外尚有甘查甲部，地处极边，屯兵较内地尤众。悉比厘阿所居之人，有两种，一流寓，一土著。流寓者，或因官寄籍，或本国迁徙良民，及谪配之人，亦有所俘绥领将士，流戍此地，究皆官裔，无僇鄙之习。其罪犯定例，重者开矿采金，轻者酒馆服役，约束綦严。其迁徙良民，授亩而耕，岁输丁银，拉布尔八。只征男丁，而不征女。土著者，西南隅，近哈萨克，皆回教。东北隅，近蒙古，则信奉刺麻教。文学技艺，当推都莫司、雅古萨两部。在都莫司者，多流寓之人；在雅古萨者，多武官客商。

千七百九十年〈（乾隆五十七年）〉，创书馆，贮史书，设梨园大略与欧罗巴相等。敬宾客，耽曲蘖，居则板屋，食亦俭薄，无非葱蒜鱼肉牛马乳，面多紫黄，似蒙古。慷慨勇猛，非耕牧，即射猎。极北严寒，多不出户。产米谷、大麦、小麦、粗麦、石盐、石髓、石奶、油、野鸭、雁鹅、牲畜，器用有大呢、玻璃、金银铜铁铅、红宝石、青金石、钻石、水晶、绿晶，别有一种石，刀切成片，可代玻璃。皮毳则灰鼠、貂鼠、白狐、黑狐、红狐、海狐、海虎、海獭。壤沃厚，易播种，五金产自乌拉岭及阿尔台山，并有沙漠千有馀里，中亦产金。

千八百二十八年〈（道光八年）〉，三处产金五十三趸，铜三万五千五百趸，铁六万六千趸，银三十三万四千棒。近日银矿不旺，岁产不过四五六万棒。采取五金，约

万有三千余人。皮货俱运售于都莫司雅古萨，东洋遥远，北海阻冰，或行数日无人烟。河道纡曲荒远，萑苻出没，贸易跋涉，艰难无匹。徒以产丰利厚，故商旅不绝，冒险争骛。甘查甲物产尤甚，运至雅古萨，征税甚轻，以货易货，大都烟酒刀剑，玩物居多。中国恰克图城，为俄罗斯与中国互市之所，以皮货、呢绒、玻璃，易中国茶叶、大黄、磁器、丝发棉花、烟叶、磁器，每年交易约值二三十万棒。大湖二，一巴西达湖，由波洼出海，一麦嘉湖，在阿尔泰山之北，雅古萨之东南，众水所汇，最为灏淼。河十有四，乌弥河，自科利弗大山发源，纡绕北流，中途会走领河野代士加河，并汇伊新河，都莫尔河诸水，由麻洼尼士加而注之海。因尼西河，自鞑鞑里发源，北流至朱尔戈河，会依那维河，至都录山萨，又会党俄士加河，阿牙那河，里那河，由豆定萨而注之海。因底牙加河，阿那斯加河，珂里马河，阿那底河，均发源阿尔台山，仅阿那底河一水，趋东海，馀俱北流而出冰海。

都莫司部〈（东界雅古萨，南界鞑鞑里，西界欧罗巴、俄罗斯，北界海）〉领大小邑三十九，产金银铜铁锡五谷皮货马酒材木脂膏。

雅古萨部即悉比厘阿首部〈（东界甘查甲，西界都莫斯，南界中国，北界海）〉，领大小城五十有三，产银铅皮货。

科利弗部〈（东界雅古萨，西界鞑鞑里，南界中国，北界都莫斯）〉，领大小城十，产金银铜铁铅。

甘查甲部〈（东界海，西界雅古萨，南北俱界海）〉领大小城十七，产皮货海马珍宝。

○重辑〈（原无今补）〉

《地理备考》曰：亚悉亚州之地，隶尼罗斯国者曰西卑里，曰日尔日，曰是尔弯，曰亚尔美尼，曰义米勒多，曰明哥勒里，曰达日斯丹，曰西尔加西，曰亚巴西，曰高加索，各等处序列于左。〈（案：西卑里，一作西比利，一作悉毕里，一作细密里，皆译音之殊）〉。

西卑里，在亚细亚州之北，纬度自北四十八度起至七十度四十分止，经度自东五十度起至一百八十九度止。东枕白令科各度斯各二海，西连乌拉尔山，南接达尔给斯丹蒙古满洲三国，北界北海，长一万三千里，宽五千馀里。地面积方约五百六十六万九千四百五十里，烟户一兆馀口。地势平坦，海滨瀉卤，南方峰峦参天。湖河甚多，河之长者曰科比，曰日尼塞，曰亚那巴拉，曰勒那，曰英的日尔加，曰哥义马，曰亚那的，曰亚木尔，曰义尔的土。湖之大者曰拜加尔，曰亚的音奴，曰德合尼，曰比牙星各，曰苏迷，曰沙加德森。至于田土，北方土旷人稀，西南膏腴丰茂，土产金银铜铁锡铅矾硝硫磺硃砂信石纹石磁器，各种兽皮。地气严寒，多冬少夏。

所奉之教或回、或释、或大秦、或天主，趣向不一。技艺平常，贸易丰盛。其地有镇部郡三者之分，其镇则四，一名德波尔斯各，一名多木斯各，一名耶尼塞斯各，一名义尔古德斯各；其部则二，一名科慕斯各，一名亚古德斯各；其郡则二，一名科哥德斯各，一名冈扎德加。

日尔日亚，在亚细亚州之西，纬度自北四十九分起至四十二度四十八分止，经度自东四十一度起至四十五度止。东至是尔弯地，暨加斯比约海，西枕黑海暨亚尔美尼亚地，南接土耳其亚、白尔西亚二国，北界高加索山。长约一千里，宽约六百馀里，烟户三亿口。境内崇山峻岭，田土腴腴，草木禽兽，无不繁衍。地气参差，寒暑俱极，技艺庸陋，贸易冷淡，首郡名的非利斯。

是尔弯，在亚细亚州之西，纬度自北三十八度四十分起至四十一度三十八分止，经度自东四十二度四十分起至四十七度三十九分止。东枕加斯比约海，西连日尔日亚地，南接日尔西亚国，北界达日斯丹地，东西相距八百里，南北相去五百里。地面积方约一万二千二百里，烟户一亿五万口。境内峰多积雪，田土膏腴，生物茂盛，四季温和，技艺庸常，贸易萧疏，首郡名巴古。

亚尔美尼亚，在亚细亚州之西，半属土耳其亚国兼摄，半属厄罗斯国兼摄。其属厄罗斯者，又名黑里弯，昔为白尔西管辖。道光八年始为本国兼摄。东北界日尔日亚地，西连土耳其亚国，南接白尔西亚国。长宽皆约七百三十里，地面积方约九千九百里，烟户一亿六万口。境内冈陵平原，互相间隔，土饶谷果，地气温和。西北地名黑里弯，东南地名那各斯齐弯。

义米勒多，在亚细亚州之西，黑海之边，冈陵重叠，平原沃壤。甚少土产，材木、鱼类充斥，土人弗取，地气温和，人安物阜。首郡名古泰西。

明哥勒里亚，在亚细亚州之西，东至义米勒多地，西枕黑海，南接日尔日亚地，北界西尔加西亚地。长约五百里，宽百五十里，烟户约十万口。境内冈陵络绎，多树林，少陇亩，果实茂盛，禽兽充斥，土产丝酒。首郡名宋鼻。

的达日斯丹，在亚细亚州之西，纬度自北四十度三十三分起至四十三度四十八分止，经度自东四十三度三十分起至四十六度四十分止。东枕加斯比约海，西连西尔加西亚日尔日亚二地，南接是尔弯地，北界高加索部。长约九百三十里，宽约二百二十里，地面积方约一万二千里，烟户二亿六万口。境内崇山峻岭，湖河甚多，田土腴厚，葡萄成丛，不植自生，禽兽蕃衍，鳞介充斥，产锡铁硫磺。地气不一，冷热互异，技艺萧疏，贸易清淡，首郡名古巴。

西尔加西亚，在亚细亚州之西，纬度自北四十一度五十二分起至四十五度十一分止，经度自东三十四度二十分起至四十四度四十五分止，东枕加斯比约海，暨达日斯

丹地，西界黑海，南接日尔日亚地，北连高加索山，长约二千里，宽约五百里，地面积方约二万七千七百三十里，烟户二亿六万馀口。境内峰峦参天，夏雪凝积，湖河甚多，灌溉田亩，产谷果丝绵。地气互异，平原温和，高陵寒凛。其地一名大加巴尔达，一曰小加巴尔达。

亚巴西，在亚细亚洲之西，纬度自北四十二度三十分起至四十四度四十五分止，经度自东三十四度四十八分起至三十八度二十一分止，东至明哥勒里地，西连西尔加西地，南枕黑海，北界高加索山，长约八百馀里，宽约五百里，烟户一亿九万馀口。境内冈陵与平原相间，田土腴腴，生殖蕃衍，土产蜡蜜熟皮等物。其地一曰大亚巴西，诸酋统摄；各分部落；一曰小亚巴西，隶厄罗斯国兼摄。

高加索部，在亚细亚洲之西，纬度自北四十度起至四十五度止，经度自东三十五度起至四十七度止，东枕加斯比约海，西连西尔加西地，南接高加索山，北界黑海，长约二千馀里，宽约七百二十里，地面积方约四万五千里，烟户一亿三万口。境内山陵绵亘，陇亩腴腴，间多潟卤，土产蜡蜜牛狐貂鼠海虎各皮。地气温和，人安物阜。首郡名斯达窝罗波尔。

《地球图说》：西比利亚国，东界大东洋，南界满州并蒙古，西界欧罗巴大州，北界北海。其百姓约七百万之数，所述之教，回回教，希腊教，释教。所习之艺，渔猎商贾。凡俄罗斯之居民犯罪咸迁徙于此，与中国贸易之处，名甲他城。地势东南西三方俱高，北方平坦。惜近北极之处，终年冰雪，五谷不登，草木野兽繁殖，人迹稀少。土人每用木屐车一乘，负以五大犬搭辔驰驱。南方颇温和，略堪栽种，内有盐湖数处，名不详述。又有伊士江，胡壁江，里纳江，此三江之大甲于亚细亚洲。产金银铜铁金刚石、兽皮。

卷六十

案：粤人称曰“花旗国”其实“弥利坚”，即“墨利加”，又作“美理哥”，乃洲名，非国名也。西洋称部落曰“士迭”[1]，而弥利坚无国王，止设二十六部头目，别公举一大头目总理之，故名其国“育奈士迭国”[2]，译曰“兼摄邦国”。

育奈士迭国，在北阿墨刺加洲中为最巨之区，其地自古不通各洲，土旷人稀，皆因底阿生番游猎其间，耶稣纪岁千二百九十二年〈（宋祥兴十五年）〉。吕宋之戈揽麻士，乘船西驶，始知此地，创立佛罗里达部落，开垦兴筑，将二百年，辟地未广。千五百八十四年〈（明万历十二年）〉，英吉利女王衣里萨柏时，有英吉利人，往弥利坚海岸开垦，大吕宋人拒战，英吉利人败走。英国女王依里萨柏，遂遣勇将精兵往垦其地，无人敢阻，遂名其地曰洼治泥阿。续遣二臣协创部落，复垦罗阿录之地。英国占士王遂设甘巴尼二员分治之，一曰兰顿甘巴尼，一曰勃列茂甘巴尼。又于所属各部落，增设冈色尔之官，而总辖于兰顿之冈色尔。又遣三巨舶，每舶载百有五人，濒河建筑部落，即以国王之名名之，曰占士部落。千六百有七年〈（明万历三十五年）〉，英人与土人争斗，英之首领士弥，为土目包哈但所擒，自后英人不敢横行，惟与土人互相姻娅，生齿日炽。千六百二十一年〈（明天启元年）〉，英国设总领于洼治尼阿，是年严禁波罗特士顿教，斯教逃出数百人由荷兰驾舟至弥利坚开垦，创建城邑曰纽英兰。千六百二十八年〈（明崇祯元年）〉，复得沙廉地，即今马沙朱硕士部落，自设总领，自立律例。千六百三十二年〈（明崇祯五年）〉，觅出纽含社。千六百三十五年〈（明崇祯八年）〉，觅出勃罗威电，次年开出衰弱底格。千六百三十八年〈（明崇祯十一年）〉，复开出纽含汾，并历年在海岸所垦之缅地，均建筑城邑，设官治理，尚有欧罗巴人续垦洲内各地。千六百四十二年〈（明崇祯十五年）〉，英国女王马里阿敕加特力教之律官，来治此地，亦以国王之名名之，其地曰马里兰。千六百六十三年〈（康熙二年）〉，英国查尔士王，令数臣往垦弥利坚南隅，即今之戈罗里那，亦以国王之名名之，其首部落曰查尔士顿。后又扩地开疆，遂分为南戈罗里，北戈罗里。明年英国复夺取荷兰与绥林所垦之纽育，纽惹西，若地拉洼三部落。至是千六百八十年〈（康熙十九年）〉，英吉利水师官威廉边者，复开宾西尔洼尼阿部落。千七百三十二年〈（雍正十年）〉，英人复垦若治阿之地，竭心力，历艰险。至千七百五十二年〈（乾隆十七年）〉，始成部落，无异于戈罗里，计英吉利占士王，至查尔士王，二代所得阿弥利坚洲内之部落，十有六区悉将因底阿土番驱之遐陬。千七百五十六年至六十三年〈（乾隆二十一年至二十八年）〉，复兴兵夺据佛兰西国所垦之加那达佛罗里达两大部落，除墨西哥一国外，凡欧罗巴人所垦阿弥利坚洲部落，归英国者十有八区。盛极生骄，强征税饷，部众吁免不听。千七百七十六年〈（乾隆四十一年）〉，土众愤怒，次年遂约佛兰西、大吕宋、荷兰诸仇国助兵，恢复爰议，以戈揽弥阿之洼申顿为首区，总统兵马称为育奈士迭国，与英国血战七年，客不敌主，大破英军，国势遂定。千七百八十三年〈（乾隆四十八年）〉，即有附近弥斯栖比各部落前来归之。千七百九十二年〈（乾隆五十七年）〉，有根特机部落，率众附之。千七百九十六

年〈（嘉庆元年）〉，地尼西部众咸背英吉利而附之，洼门部落在阿希阿地开垦，历十四年之久，始成部落，于千八百有二年〈（嘉庆七年）〉，即来归之。因底阿那伊里内，斯西隅之阿那麻马，同弥斯西比极南近海之佛罗里达地，马沙朱硕斯以及弥斯西比东边各部落米梭里诸部落，于千八百十六年至二十年〈（嘉庆二十一年至二十五年）〉，先后归之。千八百三十六年〈（道光十五年）〉，阿千萨斯，米治颜同时附之。此外尚有弥斯栖比西隅之雷栖阿那一部落，亦以价赎诸佛兰西，而归育奈士迭管辖，统计设立育奈士迭。以后凡六十年创建大部落，二十有七称大国与英吉利为劲敌。

政事自千七百八十九年〈（乾隆五十四年）〉，议立育奈士迭国，以戈揽弥阿之洼申顿为首区，因无国王，遂设勃列西领一人，综理全国兵刑赋税，官吏黜陟。然军国重事关系外邦和战者，必与西业会议而后行。设所见不同，则三占从二，升调文武大吏更定律例，必询谋佥同定例。勃列西领以四年为一任，期满更代，如综理允协，通国悦服亦有再留一任者，总无世袭终身之事。至公举之例，先由各部落人民公举，曰依力多经各部落官府详定，送袞额里士衙门，核定人数，与西业之西那多里勃里先特底甫，官额相若各自保举一人，暗书弥封存贮公所，俟齐发阅，以推荐最多者为入选。如有官举无民举，有民举无官举，彼此争执，即由里勃里先特底甫于众人所举中，拣选推荐最多者二人，仍由各依力多就三择一，膺斯重任，其所举之人，首重生于育奈士迭国中，尤必居住首区历十四年之久，而年逾三十五岁，方为合例，否则亦不入选。

设立副勃列西领一人，即袞额里士衙门，西业之首领若勃列西领遇有事故，或因事出国，即以副勃列西领暂理，其保举如前例。

设立袞额里士衙门一所司国中法令之事，分列二等，一曰西业，一曰里勃里先好司〈（好司二字，犹衙门也）〉。

在西业执事者，曰西那多，每部落公举二人承充，六年更代。所举之人，必居首区九年，而年至三十岁者，方为合例。专司法律，审判词讼，如遇军国重事，其权固操之勃列西领，亦必由西那多议允施行。常坐治事者，额二十人，曰士丹吝甘密底，无额数者，曰甘密底皆西那多，公同拈阄，以六月八日为一任，期满复拈阄易之。

在里勃里先好司执事者，曰特底甫，由各部落核计四万七千七百人中，公举一人承充，二年更易。所举之人，须居首区七年，并年至二十五岁者，方合例。以现在人数计之，特底甫约二百四十二人，立士碧加一人〈（士碧加头目也）〉，总司其事。凡国中征收钱粮税饷，均由特底甫稽核，官府词讼，则特底甫亦可判断。常坐治事之士丹吝甘密底，每年于三月初四日，由士碧加于各特底甫中拣派二十九人，以六人专司会议，其余或理外国事宜；或设计谋；或理贸易；或理工作；或理耕种；

或理武事；或理水师；或理公众田地；或理案件；或理驿站；或理因底阿人事件；各司其事，以一年期满，再由士碧加选代。

每岁十二月内，第一礼拜日则滚额里士衙门之西那多，里勃里先衙门之特底甫齐集会议；或加减赋税；或国用不足，商议贷诸他国，贷诸本国；或议贸易，如何兴旺，铸银轻重大小；或议海上盗贼，如何惩治；或国中重狱有无冤抑；或蒐阅士卒增益兵额；或释回俘虏；或严立法律，惩服凶顽；或他国窥伺，如何防御，一一定议。至岁中遇有仓猝事宜，随时应变，又不在此例。

其专司讼狱衙门，在洼申顿者，一曰苏勃林，在各部落者，曰萨吉，凡七。曰底士特力，凡三十有三，各以本国法律判断。

苏勃林衙门一所，专司审讯，额设正官一员，副官六员，每一人分辖一萨吉，凡国内大官之讼，或案中有牵涉大官之讼，或本属萨吉所辖部落，与别萨吉所辖部落，不睦争执之讼，均归其审断。

萨吉衙门七所，每萨吉辖底士特力四五属不等。凡属下部落之狱，有罚赎银百员以上者，或所犯之事，例应监禁六月者，俱归萨吉审判。

底士特力衙门，三十有三所，每底士特力辖部落多寡不等。凡属下部落有犯轻罪，与在洋不法者，俱归底士特力审断。按其情节轻重，拟议罪名，间有不能结案者，送萨吉审断，或与萨吉会讯。

每部落设底士特力阿多尼一员，麻沙尔一员，底士特力阿多尼，专司缉捕理所属官民讼狱，麻沙尔会同萨吉底事特力等衙门，审判部内之事。国中于袞额里士之外，又设立士迭西格里达里一人，仁尼腊仁尼腊尔二人，在国中治事。以士迭西格里达里为首，若行军则以两仁尼腊尔为首，俱听勃列西领调遣。又三人会合副勃列西领，为加弥业，掌国中印信，法律章程，官府文檄，及他国来往文书照票，兼理巴鼎荷非士，存贮文案。凡加弥业总理邻国相交之事，内分五等，曰勃罗麻的模里敖，曰袞苏拉模里敖，曰龛模里敖，曰阿支付士，曰巴鼎荷非士，各执其事。

其赋税设立西格里达里荷，非士袞多罗拉二人，敖底多五人，里尼士达特列沙那疏里西多等官，专司征收支发，岁报其数于袞额里士衙门，以候稽核。其武事额设里贵西循模里敖官，芒地兰模里敖官，兵饷官，管理因底阿土人事务官，督理火器官，绘图丈量地亩官，其总兵曰仁尼腊尔因智甫官，统辖官兵。分东西二路，东路总兵统辖緬地，纽含社，马沙朱硕斯，洼门袞特底格，律爱伦，纽育纽惹西，地那洼，马里兰，洼治尼阿，南戈罗里，北戈罗里，佛罗里达宾西尔，洼尼阿，若治阿，根特机，地尼栖，阿希阿，弥治颜等二十部之兵；西路总兵统辖阿拉麻马，弥斯西比，雷西阿那，阿千萨士，因地阿那，伊里内士弥梭里，威士袞申，达多里等十一

部之兵。国中节啬养兵甚少，设马约仁尼那尔官一员，墨里牙底阿士仁尼那尔官三员，戈罗尼尔官十九员，副戈罗尼尔官十五员，马约官二十八员，急顿官百有四十员，领马兵两队，炮兵四队，步兵七队，以及制造火器兵器绘图工匠，统计仅战兵七千有六百名，每年支发兵饷银九十八万八千三百七十七员，津贴兵丁银四十九万五千五百员，每兵岁饷银，将二百员。兵少饷厚，故训练精强。又制造军装器械银，三十三万员，存贮军器库银二十三万一千五百员，瓜达麻士达底入门银三十三万二千员，国中防守地方汛兵银一百三十万员，各处防守炮台兵银二十万员，此守兵在战兵之外，共计战守兵饷及修理器械，共需银三百八十七万七千三百一十七员。

千七百九十八年〈（嘉庆三年）〉，设立管理水师书记衙门。千八百十五年〈（嘉庆二十年）〉，始立管领水师官，兵船不甚多，而与英吉利交战三年，地险心齐，水战练习，其名遂著。原设大兵船十五只，中兵船二十五只，小兵船二十三只，火烟轮兵船一只，近年因船不敷用，增修兵船，复设船厂七，雕刻厂二所，历年支发水师银，二百三十一万八千员，修船银百有六万五千员，津贴银七十八万二千员，修船厂银七十九万八千一百二十五员，水上费用银四十三万八千七百四十九员，巡察南极费用银三十万员，共需银五百九十万有奇。

波斯麻达仁尼腊尔衙门，掌理国中水陆邮程递报之事，计递报道路，约十一万二千七百七十四里，每年往来路程，约二千五百八十六万九千四百八十六里。各处信驿，计万有七百七十所，历年往来驿费银二百七十五万七千三百五十员。历年约收信价银，二百九十九万三千五百五十六员，综计出入，有盈无绌。

国中原在非腊特尔非阿设铸金银局一所，千八百三十五年〈（道光十五年）〉，复在纽哈兰、北戈罗里、若治阿三部落，各增设一所，派官监铸，其炉灶器具机窍，皆以火烟激动，不烦人力，计每年倾铸金钱值银二百十八万六千一百七十五员，银钱三百四十四万四千零三员，铜钱值银三万九千四百八十九员，统值银五百六十七万员。

各部落自立小总领一人，管理部落之事。每部落一议事公所，其官亦分二等，一曰西业，一曰里勃里先特底甫，即由本部落各择一人，自理其本部之事，小事各设条例，因地制宜；大事则必遵国中律例，如增减税饷招集兵马，建造战船，开设铸局，与他部落寻衅立约等事，均不得擅专，所举执事之人，数月一更代。如分管武事，设立章程，给发牌照，开设银店，贸易工作，教门赈济贫穷，以及设立天文馆，地理馆，博物馆，义学馆，修整道路桥梁，疏浚河道，皆官司其事。其法律大都宗欧罗巴之律删改而成，征收钱粮税饷，通酌国中经费，出入公议，定额不得多取。

国中钱粮税饷，惟创业开国，军旅时兴，入不敷出，遂致亏欠民项，为数不赀。千七百八十三年〈（乾隆四十八年）〉，欠项仅四千二百万员。千七百九十三年，即

多至八千有三十五万二千员，官府历年筹补，止馀四千五百万员。千八百一十三年〈（嘉庆十八年）〉，因与英吉利交兵三年，即欠至万二千七百三十三万四千九百三十三员。迨至千八百一十六年〈（嘉庆二十一年）〉，兵戈寢定，二十年来，统计所还子母共二万一千二百万员。当开国之初，轻税薄敛，原可足用，自与英国攻战，供亿浩繁，及向佛兰西赎回雷西阿那，佛罗里达两部落，所费亦不轻。于千七百九十八年〈（嘉庆三年）〉，及千八百一十三四五等年，始加征户口田地房产，奴仆等项钱粮，每年或加一百七十五万，或二百万，或三百万，多少不等。千八百十六年〈（嘉庆二十一年）〉，停止加征，惟征收入口货物税饷，视贸易之盛衰为多寡，按千八百十六年所征税饷，多至三千六百三十万有奇。自此以后十年即仅收千三百万以至二千万员不等。千八百二十五年至千八百三十四年〈（道光五年至道光十四年）〉，自二千万至三千万员不等，近年日见减少，此外尚有出卖官地一项，其田地散在各部落，即先日价买佛兰西及因底阿土人田地，逐一丈量，画分当隰〈（当隰村庄也）〉。每当隰计三十六色循，每色循，计六十四埃加〈（埃加，一亩也）〉，除留出学校、道路、河道、基址，千六百有四万零二千四埃加外，馀俱由勃列西领出示招买。初定每埃加价值二员，先交半价，馀半期年交讫。嗣因欠价不缴者，二千二百万员，旋议减价每埃加定价一员零，先士二十五枚，不得赊欠。自后每年卖出田土价值，少则百馀万员，多则六百万员有奇。在千八百三十五年〈（道光十五年）〉，所得卖价，多至千二百万员，截至是年为止，计阿希阿丈出田土千四百七十万零三千一百六十三埃加，已卖者，千有六十万二千六百七十一埃加，得田价千有九百四十八万九千九百三十二员。因底阿那，丈出田土千有八百九十九万零四百四十七埃加，已卖者，八百三十九万零八百三十九埃加，得田价千有八十一万零百七十二员。依里内士，丈出田土二千一百五十七万四千四百五十九埃加，已卖者，四百三十四万零四百八十一埃加，得田价五百五十五万五千四百八十七员。阿那麻马，丈出田土二千九百九十一万五千零八十八埃加，已卖者，七百三十二万九千零三十埃加，得田价一千三百零万七千一百一十五员。弥斯西比，丈出田土千有七百五十二万五千八百二十埃加，已卖者，五千六百万零一千五百一十七埃加，得田价七百八十二万二千九百八十七员。雷西阿那，丈出田土六百四十五万零九百四十二埃加，已卖者，七十六万七千四百一十五埃加，得田价百有十六万二千五百九十一员。弥治颜湖东，丈出田土千有二百二十一万一千五百一十九埃加，已卖者，三百二十万零七千八百二十二埃加，得田价四百零七万二千三百九十四员。弥治颜湖西，丈出田土四百六十七万四千六百九十一埃加，已卖者，十四万九千七百五十五埃加，得田价二十一万五千一百八十九员。阿千萨士，丈出田土千有三百八十九万一千五百三十八埃加，已卖者，六十六万八千三百六十二埃加，得田价八十六万一千八百一十六员。佛罗里达，丈出田土六百八十六万七千一百三十埃加，已卖者，四十九万二千九百零九埃加，得田价六十五万七千零九十二员。统计已卖田土四千五百四十九万九千六百二十一埃加，未卖者万有二千一百三十九万七千四百六十三埃加，别有旷野荒郊田土，七万七千万埃加，已丈过万有二千二百三十万埃加，计卖出田价共六千七百八十二万零八十五员，除办理因底阿土人事务需银千有七百五十四万一千五百六十员，买雷西阿那部落需银二千三百五十二万九千三百

五十三员，罗佛罗里达部落需银六百四十八万九千七百六十九员，还若治阿部落银一百二十五万员，赎弥斯西比部落银店需银一百八十三万二千三百七十五员，地方官需银三百三十六万七千九百五十一员，丈量地亩需银七十八万六千六百一十七员，总共需银五千八百四十三万八千八百二十四员，综计出入有盈无绌。

弥利坚国，历年出纳款项，自千七百九十一年〈（乾隆五十六年）〉，开国起至千八百三十二年〈（道光十二年）〉征收税饷银五万九千四百九十万零九千零六十七员，田土赋税银二千二百二十三万五千二百六十员，人丁钱粮千二百七十三万六千八百八十八员，递寄邮信银百有九万一千二百二十三员，公众田土价银四千零六十二万七千二百五十员，债银及库中所出银单等项银，万有五千六百一十八万一千五百七十八员，银店股分利息，及出银店股分银，千有一百零五万二千五百零六员，杂项银六百四十二万八千八百九十二员。

历年支银文事需银三千七百一十五万八千零四十七员，邻国往来相交事件需银二千四百十四万三千五百八十二员，杂款需银三千二百十九万四千七百零三员，修整炮台银万有九千零五十三万八千六百四十三员，历次兵饷需银千有七百二十九万八千二百八十二员，别款兵饷需银六百七十一万零三百零七员，办理因底阿土人事件需银千有三百四十一万三千一百八十八员，设立水师兵船等项，需银万有一千二百七十万零三千九百三十三员，归还军需借项本利银四千八百九万员，统计征收银八万四千五百二十六万二千六百六十八员，除支发银八万四千二百二十五万零八百九十员，仍存贮国库银三百零一万一千七百七十八员。

千八百二十三年〈（道光十三年）〉所征各款钱粮税饷，除支发兵丁银二百四十二万五千四百零三员，行营口粮银三百五十万零七千四百八十四员，修造军器修补武备库共银五十三万零九百五十一员，修建炮台银九十六万一千四百八十员，修筑堤工银四十三万五千七百六十一员，浚河银二十四万员，建筑习武馆银十一万七千一百六十六员，办理因底阿土人事件银百有九十一万二千五百八十一员，水师兵船等项银三百九十万一千三百五十六员，还亏欠银百有五十四万三千五百四十三员，修道路桥梁银六十五万五千四百八十六员，立法各官公费银四十六万九千零七十四员，各路办事公费银六十五万八千六百零八员，审讯衙门支发银三十三万八千七百五十八员，修造路灯银三十一万三千九百三十员，修造税馆栈房零银二十五万零四百一十五员，丈量海岸银万八千五百一十三员，洼治尼阿疏浚运河银二十八万九千五百七十六员，与他国交往贸易事务银九十五万五千三百九十六员，共计千有九百五十三万五千六百八十一员，尚有盈馀银八百六十九万一千一百员，连历年盈馀贮库，共银千有百七十万零二千九百零五员。千八百三十四年〈（道光十四年）〉，征收税饷银千有六百二十一万四千九百五十七员，地租银四百八十五万七千六百员，银店息银二十三万四千三百四十员，出卖银店银三十五万二千三百员，杂税银十三万二千七百二十八员，支发文事杂项银八百四十万零四千七百二十九员，武事需银三百九十五万六千二百六十员，还国家亏欠银六百一十七万六千二百六十员，共计

征收银二千一百七十九万一千九百八十二员，核计本年亏欠银二百八十一万零四十七员。在于盈馀库项支销外，尚有馀银八百八十九万二千八百五十八员，存贮国库。

千八百三十五年〈（道光十五年）〉，征收各款钱粮税饷银千有八百四十三万零八百八十一员，除支发各项银千有九百二十七万六千一百四十一员，盈馀银九百一十五万四千七百四十员，共历年盈馀贮库银千有八百四万七千五百九十八员。

疆域东界阿兰底海，西界卑西溢海墨西果国，南界墨西果国之墨西根海，北界英吉利俄罗斯所属地，幅员二百三十万方里，以周围边界程途计之，径一万里内滨海岸者，三千六百里，滨湖岸者一千二百里。自卑西溢海至阿兰底海，东西距二千五百里，除国中各部落之外，西隅尚有地百三十万方里，未尽开辟，地势内辽阔外险阻，故虽英吉利兵亦不能再窥伺。

山陵最著者，在洼申顿，有阿巴腊止庵山，又名阿里牙尼山，高峰仅二百四十丈，而迤长袤延，通数部落之远，在北哥罗里有墨力山，其最高峰，亦不过五百一十四丈有奇，在国之西隅有落机山，峰高九百六十丈，此外山多未能悉载。

川泽分歧难以悉数，其最长者曰弥梭里河，自落机大山发源至雷西阿那出海，长四千五百里，其次弥斯西比河自威士褒申部落发源，至雷西阿那出海，长三千有百六十里，两河往来，舟楫最盛。此外苏比厘阿湖，休伦湖，安达里阿湖，均处边界，惟弥治颜湖，居于腹地，南北距三百六十里，东西距八十里，水深七十二丈，有弥支里墨机纳港，可通休伦湖。

国中地广人希，以近年生聚计之，自开国迄今，仅数百载，蕃庶数倍，在千七百九十年间〈（乾隆五十五年）〉，户仅三百九十二万九千八百二十七口。及千八百三十年〈（道光十年）〉计白男五百三十五万三千零九十二人，九十岁以上至百岁者二千有四十一人，百岁以上三百有一人。白女五百十六万八千五百三十二人，九十岁以上至百岁者，二千五百二十三人，百岁以上者二百三十八人。黑男十五万三千一百八十四人，百岁以上者二百六十九人。黑女十六万五千七百六十人，百岁以上者，三百八十六人，奴仆百有万二千零七十五人，百岁以上者七百四十八人，奴婢九十九万五千五百四十四人，百岁以上者六百七十六人。白瞎人三千九百七十四名，黑瞎人千四百七十人。白聋哑人，五千三百六十三名，黑聋哑人，七百四十三名。统共千有二百八十六万六千九百十九人。即丁口之衍蕃，征国势之炽盛，果能永远僇力同心，益富且庶，虽欧罗巴强盛各邦未之，或先国人多，由外域迁至，如居宾西尔，洼尼阿者，皆由耶麻尼言语近始更变；居雷西阿那，梭里依里内士，弥治颜等处者，皆佛兰西国之人；居阿希阿，因第阿那者皆瑞国与耶麻尼之人；尼纽育者皆荷兰国人。种类各别，品性自殊，因地制宜，教随人便，故能联合众志，自成一国。且各处其乡，气类尤易亲睦也。传闻大吕宋开垦南弥利坚之初，野则荒芜，

弥望无人，山则深林，莫知旷处，攘剔启辟，始破天荒。数百年来育奈士迭，遽成富强之国，足见国家之勃起，全由部民之勤奋。故虽不立国王，仅设总领，而国政操之舆论所言必施行，有害必上闻，事简政速，令行禁止，与贤辟所治无异。此又变封建郡县官家之局而自成世界者。

国中黑人居六分之一，其中亦有似黑非黑，似白非白者，种已夹杂，难辨泾渭，各部落中，不准黑人预政事，有数部落准其一体公举。其律例内载宾西尔洼尼阿纽育部落之人，皆得自主，惟黑奴子孙分属下等，凡事不得擅专。至千七百九十八年〈（嘉庆三年）〉禁止买卖奴仆，即逃走亦不准收回。嗣西北之洼治尼阿，弥斯西比各部亦禁携奴仆进口，自此兴贩少息，惟南隅产棉之部落尚有使用奴仆者。凡奴仆之例，重罪始经官治，小过家主自治，不得私置产业，学习文字，往庙拜神，必须白人带引。若因底阿之待仆人，则又不然遇礼拜日，每奴散谷十八棒至二十四棒，薯六十四棒，并酌给鱼肉。冬夏布衣下及奴之子女，又每二年人给洋毡，幼小者二人共得一毡，疾病设有医药，过其境，见其仆，皆工作不辍。啸歌自得，如逢礼拜，概停力作。其工役三日一派，能并日完毕者，所馀之日，或得自作已业，游戏无禁，其恩恤奴仆为诸部所未有。

风俗教门各从所好，大抵波罗特士顿居多。设有济贫馆，育孤馆，医馆，疯颠馆等类，又各设义学馆，以教文学、地理、算法，除普鲁社一国外，恐无似其文教者。其官地亩，以供经费，复有国人捐贖津贴。千八百三十四年〈（道光十四年）〉，在纽育所属各小部，义馆读书者共五十四万有千余人。岁支修脯，七十三万二千员，如纽惹西，宾西尔，洼尼阿，阿希阿，马里兰，洼治尼阿南戈罗里，鼎尼西根特机等处部落，亦皆捐设学馆，造就人材。又设授医馆二十三所，法律馆九所，经典馆三十七所，教人行医通晓律法，博览经典，通各国音语，近计非腊特尔非阿。藏书四万二千卷，甘墨力治藏书四万卷，摩士顿藏书三万卷，纽育藏书二万二千卷，衮额里士署内藏书二万卷，迺来又增学习智识，考察地理之馆，重刊欧罗巴书籍，人材辈出，往往奇异。

技艺工作最精，造火轮船，即纺织棉布，制造呢羽器具均用火烟，激机运动，不资人力。他国虽有，皆不能及。写绘丹青，亦多精巧，如急里委士士都挖纽顿阿尔士顿里士里诸人，皆以妙手名。

地膏腴丰物产。千八百三十四年〈（道光十四年）〉海产之干鱼腌鱼鱼油鳅鱼骨等物，约值银二百有七万零千四百九十三员。山产皮毛洋参木板船桅木树皮木料松香等物，约值银四百四十五万七千九百七十七员。田地家宅，所出之牛羊马猪麦面干饼薯谷米租麦苹果烟叶棉花豆糖洋靛等类，约值银六千七百三十八万零七百八十七员。工作所造香〈卤见〉、蜡烛、皮鞋、洋蜡酒、鼻烟、卷叶烟、铅锡器、绳索、桅缆、铁器、火药、糖、铜器、药材、布匹、棉纱、夏布、台雨伞、牛皮、麋皮、马车、马鞍、水车、乐器书籍、图画、油漆、纸札、笔墨、钉瓦、玻璃、洋铁、石板、

金器、银器、金叶、金钱、银钱、木箱、砖灰盐等类，约值银六百六十四万八千三百九十三员。

国中进口货物，茶叶、架非豆、红糖、椰子、杏仁、干菩提子、无花果、胡椒、香料、桂皮、豆蔻、米酒、冰糖、灯油、丝发、疋头、金线等类，其各国所出棉布，夏布、皮毛、染料、颜色、铜铁金银器皿、纸札、书籍。贩运进口者，交易之大以英吉利为最次，佛兰西再次，即弥利坚本国及海南之姑麻岛弥利坚西南之墨西哥国）》，若中国又其次也。此外通商之国，如俄罗斯、普鲁社、绥林、领墨、弥尔尼壬、荷兰、大吕宋、依达里、耶麻尼、散迭里、纽方兰（在弥利坚东北，属英国所辖之一大海岛）、黑底在弥利坚之南属佛兰西所辖之大海岛）、小吕宋、葡萄亚、阿非里加洲各海岛、都鲁机、果揽弥、阿墨腊、西尔芝利庇鲁等处，其余小国来贸易者，不计其数。以千八百三十四年（道光十四年）计之，英吉利进弥利坚口岸货物，约值四千五百五十六万六千有奇，出口货物，约值四千一百六十四万八千四百二十员，中国茶叶进口者，约计六百二十一万三千八百三十五员，在国内销流者，居六分之一。此外尚有丝发等项，百六十七万八千四百九十二员，共计值银七百八十九万二千三百二十七员。由本国出口运赴中国货物，计值银不过百万零四百八十三员。其余各国进口货物，多寡不一，统计货值万四千九百八十九万五千七百四十二员。千八百三十五年（道光十五年），各国进口货物，共计银万二千六百五十二万一千三百三十二员，出口运往各国货物，共计银万有四百三十三万九千九百七十三员。千八百三十五年（道光十五年）通国银铺五百有三家，资本大小不等，其最巨者三千有五十万九千四百五十员，小者亦有十馀万员。统计银铺资本共万有八千一百八十二万九千二百八十九员。

国中运河，长三千五百里，疏浚二十年，始竣。其不通河道者，即用火烟车陆运货物，一点钟可行二三十里。其车路皆穿凿山岭，砌成坦途，迄今尚未完竣，如值天寒河冻，亦用火烟车驶行冰面，虽不及舟楫，而究省人力，因底阿土人种类蕃多，屡因争战被戮大半，惟弥斯西比之东有因底阿土人八万，西有因底阿土人十八万。馀俱散处各部，中间自成村落，下窟上巢，有同鸟兽疾则倩师巫歌跳刺血诵咒，间用草木作药饵，信鬼好斗。行阵则佩符咒犷者食人，尤嗜犬肉，其头自服牛皮，饰以羽毛，颈悬熊爪，履白皮，握羽扇。受伤则头插红漆木签九枝，以彰劳绩，散处各部，不受约束。近渐导以教化，招徕其党给以房屋，耕织器具并设冈色尔官治之。各立界限，不得逾越，创书馆庙宇，岁提库银万员，公捐银四万员，延师教课。千八百三十五年（道光十五年），在馆肄业之童蒙已千五百矣，弥斯西比，弥梭里，平地中多有高陇，形似围墙，高自数忽，以至三四十忽不等（每忽八寸），宽二三十埃加（埃加，亩也），内多土堆，参差不一，粗沙乱石，或方或圆，或作数角，诸史并无纪载。有谓因底阿人所造之坟莹，第土蛮何解造作，或谓洪水泛滥，波浪激成者近是。

《万国地理全图集》曰：花旗国，一曰兼摄邦国，因船插星旗，广东人谓之花旗，

亦称之为米利坚，皆指一国也。南及默西可海隅，北连英藩属，东及大西洋，西至大洋海，北极出自二十五度至四十度，偏西自七十度至百有馀度，袤延圆方三百万方里。其山在西方，一带峰岭，馀地大半平坦。其最长之江，名曰米西悉江，北流九千九百里者而接米利大河，两水合而南流入海也。通舟之长河如瓦八地尼士河，干撒河，亚加那河，红河等。又造铁历辘之路，火轮之车，以便陆地转运，每一时行百八十里，水路则火轮船前后梭织，故其江河帆楫，奔驰不绝，如街衢无异。山出石炭、盐铁、白铅、金银，其林内有野牛及熊，其西方有海骡狐狸等兽。又出五谷蔬菜，可谓隆盛之邦。惟其东方耕种大辟，而西方尚土旷人稀，每年土民自西移东者千百计也。

明万历年间，英国船初到时，荒芜稠林，天气冻冷兼以土人暴行，遍处剽杀，而英民历艰难披荆棘，百苦备尝，坚据其地而攻其敌。于明万历三十六年，英国主驱逐加特力教，其民寻地涉海而抵亚默利加，赖上帝之恩休，始困终亨土民让地相给人户日增，遂分其国为列邦。二百馀年，英国欲加收税饷，其国公会之绅士不从，两国相争，较论长短，遇有商船载茶叶进口，居民并起，投其茶箱于海，彼此怒愤结仇与英兵交战，并结援佛兰西，是西班牙荷兰等国为助，齐心攻英。乾隆四十七年英国议和，于是花旗自立新国，不立国王，公择元首，凡事会议而后行。四年后则退职，又公择忠臣良士二位，以为都城公会之官，供职六年而退。设律例规矩，募勇征饷，与列郡邦结为唇齿，缘此称曰兼摄邦国。国库每年所收银四千万员以下，于道光十七年，其国补还军费，毫无欠项。文官俸禄四百七十六万员，水师四百五十七万员，三军四百三十万员，杂费三百八十万员，土费千三百万员，其三军上下一万丁。其水师武备甚善，屡与英国交锋获胜，其乡勇十万有馀，各地举壮丁当差，国民经营希利，算悉锱铢亦多怀普济之意，崇奉世主耶稣之教，舍身捐财，以招教师，颁文劝世，虽别国各开新地，而英民居其大半，是以语音文字规矩与英无异。出棉花五谷，造杂项布匹，通商最广。道光十七年，所运进之货共计银万四千万员，所运出者万一千七百万员，居民千四百万丁。二十年前尚止九百六十万，迅速增益，而各西列国之人，尚云集不已。所有土民，分给田土，安居乐业，最好进学，遍开序庠，以习法术、武艺、文学。

其列邦共计二十四部。所有最大之城邑，一曰破士敦城，在马撒主悉邦之都会，此地虽瘠，而居民营造勤奋，共计千七百万丁，通商万国，此城系大马头，四方所萃，文风甚盛，为全国之冠。一曰纽约城，乃国中最广大之美邑，居民二十七万丁，每年进船千五百只，进货价银三千八百万员，出价银二千三百万员，居民灵利温和。一曰兄弟爱城，在品林邦，昔时土人让给英国而收租值，因始终忠信守约，是以土人终不侵伐。待如远客，其城亦系马头，街市正直，其居民勤劳积财，运出之石炭铁皿布匹共计三百八十四万员，运进货物一千一百六十八万员。一曰巴里特摩城，在南地马头，居民不辞险阻，多出麦粉，造建快船，驶航如飞。一曰威额耳那城，乃初时开垦之地，人最聪明，国内忠臣襄政事者皆出是邦。产烟及粟米，洼申顿国都，以其始创国之人得名也。其南方之三邦，即南北甲罗里那以及热可加，乃出

棉花之地，此地惟黑奴务农，其白面之人，废时游荡，食烟饮酒恋声色而已焉。其西南之半地，曰纳利他城，内地尚有土人据之。与白族交战，连年未息。西南方马头，曰新阿耳兰，在大江口，居民七万，通商最大，运进之货，每年价银千四百万员，运出者三千五百万员，此城周绕泽潞，氛瘴晦冥，夏时民多染病。其西方之邦尚新开地，乃最先游猎之人，至此招集农夫垦种旷野，数十年而城邑乡里田畴并同内地，但有四万土人居此，为自主之邦。国家买其田而按例收其价，土人遂让之，而白面之类，为其地主也。此外西北各地，皆英吉利俄罗斯各商占据，捕野兽，用其皮，其中海虎等皮最贵，大半销卖于广东，土民身短而贫，人户甚罕〈（原无今补）〉。

《每月统纪传》曰：北亚米利加兼摄列邦辽阔，共有二十六部，又别有边地四部，共广二百四十万正方里。大清国共三百八十六万正方里，乾隆五十四年，米利加国三百九十二万丁，嘉庆四年五百三十万丁，嘉庆十四年七百二十三万丁，嘉庆二十四年九百六十三万丁，道光十年一千二百八十五万丁，由是观之，其人烟稠密，户口繁滋，年增月累，设连年如此加益数，百年后，其民繁多，过今大国也，其国城共二百八十九。康熙四十年，所产之物，卖与外国，共价银一百五十万圆。乾隆五十四年二千万圆，嘉庆四年七千九十万圆，嘉庆二十二年九千三百二十八万圆，道光五年九千九百五十三万圆，道光十年七千三百八十四万圆，道光十一年八千一百三十一万圆。进口货价，自康熙四十年，共银一百七十万圆，乾隆三十四年九百四十万圆，道光元年六千二百五十八万圆，道光七年七千四百四十九万圆，道光十一年一万三百一十九万圆，每年产物及制造货件，共银一万五千万圆，可观其国丰盛矣。其国帑出入，乾隆五十五年入一千二十一万圆，出银七百万圆；嘉庆十四年入一千四百四十三万圆，出一千三百六十万圆；道光九年入二千四百七十六万圆，出银二千五百七万圆；道光十年入二千四百八十四万圆，出银二千四百五十八万圆。故此输用出入，皆制有馀。道光九年，国帑项内，尚存银五百六十六万，乾隆五十四年，拖欠银七千五百一十六万九千九百七十四圆，今已偿清，可用其馀，垦荒地，开运河，保障封疆。计国中弁兵共万二千丁，壮民百二十六万丁，巨战舰十二只，中兵船十七只小兵船十六只，小舟七只〈（原无今补）〉。

《海录》：咩里千国，在英吉利西，由散爹里西少北行，约二月由英吉利西行，约旬日可到，亦海中孤岛也。疆域稍狭，原为英吉利所分封，今自为一国，风俗与英吉利同，即来广东之花旗也〈（案：咩里千，即弥利坚之音转，故言即广东之花旗。然以洲言，则其地数万里，岂得谓之孤岛，以国言，则二十七部落，富强为英夷劲敌，岂得谓之疆域稍狭，盖谢清高。但至欧罗巴洲未至弥利坚洲，故传闻不确不详）〉。土产金银铜铁铅锡、白铁、玻璃、沙藤、洋参、鼻烟、牙兰米、洋酒、哆啰绒、羽纱、哔叽，其国出入多用火船。船内外俱用轮轴，中置火盆，火盛冲轮，轮转拨水，无烦人力，而船行自驶，其制巧妙，莫可得窥小，西洋诸国近多效之〈（原无今补）〉。

卷六十二

○弥利坚国东路二十部〈（沿革分附各部）〉

弥利坚洲之育奈士迭国，分士迭二十有六。士迭，华言大部落也。达厘多里二，华言地方也。底士特力一，华言国都也。在各士迭之中，又各分冈底士，华言小部落也。惟雷西阿那所属之小部落，不曰冈底士，而曰巴里些士。尚有因底阿土番所属四部在外。

戈揽弥阿部，幅员徧小，间于马里兰、洼治尼阿之中。滨波多墨河，距阿兰底海二百里。千七百九十年〈（乾隆五十五年）〉，头目洼申顿所定，因以名其国都，为颁政判事会议之总地。创筑三城：一曰洼申顿，一曰查治当，一曰阿力山特厘阿，此三者，皆其都城，不在部落之数。地土燥湿不一，颇多胜景，河道通达，无论大小海舶，均可径抵都城，故贸易最盛〈（案此部乃国都，在二十六部之外）〉。

洼申顿城〈（国初十八百年创筑，街道平阔若棋局，车马络绎，中设加碧多尔一座，为议事公所。周三百五十忽。中央高，两傍低平，四围石砌，饰以白垩。有土人战阵之图，勃列西领衙门一所，亦用石砌。楼高两层，旁即文武官衙门，馀作书院、庙宇、民舍，并建桥梁可通阿力山特厘阿、查治当两部。千八百十四年，被英吉利人攻破，各衙门均被焚毁，后旋夺回修复。都内居民万三千三百七十九人，黑人三千百二十九口，奴仆二千三百十九口）〉。

查治当城〈（在洼申顿之西，中隔小河，相距三里，可谓洼申顿之外城。屋多砖砌，设有加持力书馆一所，公众书馆一所，读书幼童约四百名，铸炮局一所。商贾贸易以此为最，居民三千四百四十名）〉。

阿力山特厘阿城〈（在洼申顿对岸，相距六里，筑于小山。设有铸炮局，育婴馆，庙宇手工艺馆，商贾货物以麦面、烟叶两种为最。居民八千二百六十名）〉。

缅部，东北俱界英吉利所属之新垦地，西半界纽含社，南界阿兰底海。域内多山，著名之加达领山，高五百馀丈。在缅部之北，有阿尔腊牙时河，洼尔鲁士多河，阿鲁士多河，三水俱由英吉利所属之赞河发源，而注于缅地。在缅南之河道有北纳士葛河、根尼碧河，各长三百五十里，历曼峨而出阿兰底海。模士迄湖，长五十里，宽自数里以至十五里不等。缅地河多湖广，水居六分之一。原属马沙朱硕士之地，千八百二十年〈（嘉庆十五年）〉始来归附。创部落，立冈色尔之官，每年一更代，由众推举。所举之人，必居缅地经三载。而推举最多者，方得充之。若小部落理事官，即由总领选择，会商冈色尔委授。如奉委之人果贤，即可常供厥职，非如冈色尔之岁更也。幅员三万五千方里，户三十九万九千口有奇，领小部落二十有五，俗奉波罗特士顿教，加特力教。岁按户收先士四十枚，为书馆修脯膏火之费。土产

煤、炭、铁石板、木料、腌鱼，尤多巨木，先冬斩伐，待春涨浮出山谷〈（原本）〉。

《美理哥国志略》曰：明天启六年，有英吉利数人，始至基尼伯河畔，创立一乡。后数十年与马沙诸些合而为一。道光元年，始分立一部，曰緬部。东接新普伦瑞克地，西北连千尼底吉之南，此二地皆属英吉利国。西南连新韩赛部，南接压澜的洋。南界隔赤道四十三度五分，北界隔赤道四十八度，自南而北，则四度五十五分矣。西隔中线东六度三分，东极隔中线东十度三分，由此观之自东而西之地，则四度无疑矣。其地参差，不成方圆，故以其南北极东西极而言之，延袤与浙江省相似。其山则嶄岩不等，最高者五百余丈，万山环绕，水皆注大西洋。其南境海潮常长至二三丈，虽冬月严寒，冰难凝结。北境则寒沍，雪深四五尺，数月不消，水面冰坚，人马可渡。夏又炎蒸。故冬夏易于染疾。境南去西大洋，约五六十里，沙砾泥潦，产五谷为最，薊薺？次之。腹内地则腴沃高平，大抵地旷人稀，树木葱郁，山内产铁，禽兽有马、牛、羊、豕，林木有松、橡、桦、榆，果实有林、檣、桃、苦、提、梨、梅等。惟材木极贱，渔户岁得银五十余万，贸易有大小呢、棉花、纸、孰皮、蜡烛、铁器等物，而以木材为最。洋艘皆赖乎此。次则畜牛、羊、豕、犬，贩于他邦。又次有牛油、香〈卤见〉、蜡烛、靴鞋、石砖、铁等，每年出口之货，约八百余万，所收税饷约银三四十万圆。合计美理哥国贸易，緬部居十之五焉。道光十年，其居民共计三十九万九千四百六十二口。所务生业惟农、渔、商，无巨富，亦无极贫，皆暖衣足食。通部内分中部十，小部落三百。附基尼伯河新建会城，名奥吉士大。其官有四等，首领一人，副领七人，巡按十二人，赞议数十人。其总制巡按议处，皆以三十岁为例，由民公选。各官皆以每年正月初礼拜之第三日，会议其副总理七人，于巡按议处内，公选总理。每年俸银千五百圆。出缺则巡按之首署理。除副总理外，别有一善书助之。军务则总兵官保障封疆。每岁总理与巡按及议处同会议省律，法在必行其行之，必官上始。又省内有一正察院，其余分处各方。通省各员所用之项，共计银二十万圆为率。书院两所，别有大学公堂，乃儒者苦攻圣文之所。其乡中学馆，共三十间，此外童蒙之馆，各处皆有。每人岁捐银二钱八分，送交首事而已。别有圣教会所，共有五百余。每所内约六人至十人不等，内一师于每礼拜日升堂宣训。每年束修银六百圆至千圆不等。别有仁会数处，以济鰥寡孤独疾病之人〈（今补）〉。

纽含社部，东界緬，西界洼门，南界马沙朱硕士，北界英吉利所辖新地。城内峰峦层叠，其最高之洼申顿山，六百余丈。其河俱由外部落山涧发源入境，湖泽最巨者，为尼比西河。尼湖长二三十里，广十里，狭二三里。近渚遥山，螺翠掩映，沧涟澄漪，娱怀荡目。始麻臣俄、尼士二人，于千六百二十三年〈（明天启三年）〉，垦出那洼博士茂两处，旋与马沙朱硕士并一部落。千六百七十九年〈（康熙十八年）〉，复各分治，旋归附弥利坚国。设总领及冈色尔官，均于一年更易。领小部落二十一，幅员九千四百九十方里，户二十六万九千三百二十八口。俗奉加特力教，波罗特士顿教。设书馆千六百所，技艺馆三十五所。湖泽多鱼，民业渔贩，迺来泽

国，亦渐声教。土产洋参、冰糖、铜、铁、铅、木、牛、马、豕〈（原本）〉。

《美理哥国志略》：初，明万历四十三年，英吉利人始得新韩赛之地。迨天启三年，许其自立为政。后数十年，土人皆将其地与马沙诸些合为一部而不自专。及乾隆六年间，则自立为一部，改称新韩赛。东接缅部，北接干那大部，西接华满部，南接马沙诸些部，东南界洋海。南界南极出地四十二度四十一分，北界北极出地四十五度一十一分，西界隔中线东四度三十分，东界隔中线东六度。其地斜袤不正，广如浙江省四分之一。自北而南群峰秀峙，山路崎岖，其北山高者，六七百丈，南山次之，亦二三百丈。惟北最高之峰，积雪四时皓然，呼曰白山。山险峻，为通国之最。近北有小湖，南注干尼底吉大河，与华满部交界。又有大湖通贯美理麦大河，南过马沙诸些，复转入东洋，尚有各小河湖在外。天时略暖于缅部，土气清和，故民多寿，越百年而逝者，八十有三人。木最高者二十丈，厚径七尺，围二丈有馀。山内多铁矿，且多人参。农皆立会，彼此相助以广耕种。工匠不可胜数，其纺织之所约六十间，织呢绒之所三十二间。亦有以人力兽力而磨五谷之房，共六百有九间，以水轮锯木之房，共九百五十二间，每间用一二人掌之。其水力可抵百人。桥梁共计二十有五，其贸易罕商他国，惟贾本都。道光十年，民户二十六万九千五百三十三口，百年以前，不过万二千有奇而已。地分部八，小部二百二十。其波子某府城附近，东洋海艘所汇，港口为二十六部之冠。隆冬不冰，波涛不险，最大之洋艘皆可进口，故国中兵船于此湾泊。别有造船厂一所，炮台二座。部东濒海有一河，名庇士驾木瓜，有二桥，一长四十八丈，一长百七十五丈。会城在美理麦河畔，名曰公哥突城。户口四千，房屋稀少，惟有一石监，长七丈，阔三丈六尺，高丈四尺，监中五六十人工作其中。各官员与缅部同，各乡学馆千六百间，府学馆三十五间。会城内有一大书院，院内为师者十位，肄业者约二百人。教会共有五百馀，每会建一礼拜堂，每会约有八九百人，掌教者一人而已。仁会亦同〈（今补）〉。

洼门部，东界纽含社，西界纽育，南界马沙朱硕士，北界英国属地。境内多地，其最高之曼士非尔山，高四百馀丈。滚特底格河，由洼门发源，而达袞特底格入海。古勃连湖，广六百方里。始由英吉利人居马沙朱硕士者，首垦其地。六年后，佛兰西人亦至，千七百九十一年〈（乾隆五十六年）〉，即归附于弥利坚。以满比厘阿为首区，设立总领一，副统领一，并有立法衙门，行法衙门。其逐年更易荐举之方，与纽含社同。领小部落二十五，幅员一万方里，户二十八万六百五十口。俗奉加特力教，波罗特士顿教。设书馆千六百一十二所，并有技艺馆、医馆。一切费用，定例每一小部供给三月，周而复始。产铁器、布匹、棉纱、粗呢、牲畜，每年计铁器银七万五千员，布百五十忽，棉纱十一万二十棒〈（原本）〉。

《美理哥国志略》：万历元年，法兰西人由干那大地寻至华满。迨雍正二年，英吉利人托足于马沙诸些省，由渐而据之，乾隆年间，别创华满部。东接干尼底吉河，南北交界之度数，与新韩赛同，西接新约基部之汕比连大湖。其内地较新韩赛略广，南山连峰而北，至会城，分而为二，环抱左右。内多杉木，老叶未残，新叶又发

，时人呼曰绿山，即译名华满也。其中瀑布有流入千尼底吉大河者，有流入西之汕比连大湖者。其湖南北长四五百里，东西阔几十里。洋艘数十可航，更有联杉木为筏，贩运他乡，惟冬寒湖冻，舟不往来。北界有湖，名曰緬法喇美哥，长百里，广十里，又百里外有小湖水入之。嘉庆年间，夏月有人在大小湖之间，建一面房，欲决水磨麦，水忽涨发泛滥，百里之内庐舍皆没，湖亦不存。天时、土产、民俗，皆同新韩赛。但山上冬春，皆有积雪。山中产铅、铜、铁、锡，而铁尤旺。又产皂矾，每年不下万馀石。内分部十三，小部二百四十五，居民则二十八万零六百七十九口。会城在部中央，名曰满比理。首领、副领、理刑官各一，御史十有三。书院、教会等皆同新韩赛。惟各官会议之期不以正月而以十月〈（今补）〉。

马沙朱硕斯部，东界阿兰底海，南界袞特底格律爱伦，西界纽育，北界纽含社洼门。地崎岖多大山。千六百二十年〈（明泰昌元年）〉，英吉利人向奉加特力教者，以犯英国新例，逃至勃士茂，辟地而居。旋垦至洼治尼阿，与土人不睦，移垦马沙朱硕斯，生齿日盛。千六百九十二年〈（康熙三十一年）〉，复归英吉利国管辖，及各部落怨叛自立，遂亦翕然背英而附弥利坚。设立总领一，副总领二，并立法、行法、判事、衙门，每岁更易如例。其推举人之人，须居部内一年。曾输纳丁粮，方能举人。判事之官，即由统领率同冈色尔选择。定例亦是一年一更，如果率众，亦有再续一二年者。综计幅员七千百方里，户六十一万零四百口，领小部落二十有九，以摩士顿为首区。俗奉波罗特士顿教，加特力教。书馆二千三百九十七所，费用亦各小部轮给。土产铅、铁、白矾、石板、煤炭、大呢、布匹、鱼油、咸鱼，约值银四百六十七万二千七百四十馀员，布匹共七千九百二十万一千码〈（每码计华尺二尺四寸）〉。地虽崎岖，而道路桥梁，宽大平坦，行旅无滞〈（原本）〉。

《美理哥国志略》曰：曩者，英吉利人初至马沙诸些，名其地曰新英吉利。后分其地为六；曰緬，曰新韩赛，曰华满，曰马沙诸些，曰千尼底吉，曰罗底岛。而马沙诸些东濒大海，近海之地，陂陀稍平，近西则高山峻岭，与华满无异。又有千尼底吉河，由北之新韩赛、华满交界，流过是地，而入千尼底吉。其河流在西境，仅居地之一，东境则居其地之二矣。东北角又有美里麦河及四方各小河，港汊纷歧，岛屿亦众。大者曰南得吉岛。天时颇和暖，因其地远于北而渐近赤道也。每年春夏之际始雪，故至四月春晴雪散，万物始繁。地气如中国之江浙，民罕疾疢。山产金、银、铅、铜、铁，锡甚少，而草木、五谷、果实、禽兽，皆多于新韩赛、华满两部。业耕牧者十五七八，为二十六部之最，近年树桑养蚕日盛。工作之所，二百五十间，织布、呢绒、玻璃器及铅、铜、铁、锡各器。鱼船共万一千一百六十只，惟得鱼叶其肉而取其油，每年得资不下数百万圆。贸易亦多，然在二十六部，则居其次。内分大部十四，小部三百有三，居民六十一万零十四口。会城附东曰波士顿。然二十六部皆无城，故波士顿亦无也。城中房屋，或砖或石有高至四五层者。有一会议之馆，高一十丈，中有华盛顿石刻之像。客旅寓馆甚多，大者高五层，内房百八十间，时人称曰三山客寓。又其市所冠于二十六部。楼高二层，广长五十三丈六尺，有左右街。左街有六丈五尺，右街有十丈二尺，其市所名曰法内离阿。内外四面

皆通，百货闾溢，任求皆获。城内当留馀地，广百亩。围以阑干，外环树木，马牛不容践踏，故人烟虽极稠密，而地气得以疏通。城中文学最盛，书楼数所，内一楼藏书二万五千本，各楼共藏公书约七八万本。官吏士子，皆可就观，惟不能携归而已。通城学馆，每年用银五六万圆，济穷养疾之院亦如之。海内商船火船甚众，陆地之车用马四匹，或五六匹或一二匹，日行六七百里。其外更有火车，惟以火力旋轮，日可行千馀里。城外市镇亦多，大书院共六所，内一所自始建迄今已历二百年，为二十六部书院之首。内为师者三十五人，受业者三四百人，藏书四万本〈（今补）〉。

律爱伦部，东北俱界马沙朱硕士，西界袞特底格，南界阿兰底海。幅员千二百二十五方里，户九万七千一百九十九口。土不恶劣而寒冽，不宜种植，多捕鱼，贸易为生。始有马沙朱硕士之罗查威廉者，迁谪此地。千六百三十六年明崇祯九年〉，鸠众开垦，至千六百六十三年〈（康熙二年）〉，创筑部落，始属英国，后归弥利坚国。领小部落七，以波罗威顿士为首区。设正总领一人，副总领一人，会议公署一所，每季会议一次。设书馆三百二十三所，肄业学童万有七千。俗奉波罗特士顿教，加特力教。产铁、煤、石板原本）〉。

《美理哥国志略》曰：明崇祯九年，有马沙诸些人，初至罗底岛。乾隆五十五年，则自立一部，为二十六部中之最小。东北界连马沙诸些，南接压澜的洋，西接千尼底吉。内分中部五，小部落三十有一。其幅员仅如粤东之南海、番禺二县。居民九万七千二百一十二口。平原无高山，近城河畔有岛，故人呼曰岛部。所谓罗底岛者，即译名岛部也。岛上有小楼高十馀丈，楼上小房四围玻璃，每夜然灯数十，光与水映，俾夜行海艘，不致触岛沉礁。此皆国中首领及富户捐贖所设。各部滨海者，无不有之。地气又略暖于马沙诸些。会城名普罗费典，在部之东北，与马沙诸些相近。城南海港通洋艘，名曰新湾。其贸易多贩运出洋，故其人户虽不及马沙诸些之多，而贸易工作，竟能与马沙诸些相毗，惟棉布更胜之。又部内地平无高山瀑布，不能借水磨谷。每于海傍旷地，建楼高六七丈，上置风车，借风动轮而磨其谷。其境既小，各官往来会议不难，故每年三四次不等〈（今补）〉。

袞特底格部，东界律爱伦，西界纽育，南界海，北界马沙朱硕士。幅员七千七百六十四方里，户二十九万七千六百七十五口。西多大山，河最长者，袞特底格河。由缅地发源，经本部落五十里，至纽兰顿而注之海。土虽不沃，种植尚易，近已栽桑畜蚕。溯其开址之始，一为马沙朱硕士人垦出赤活之地，一为英吉利人垦出纽兰汾之地。千六百六十二年〈（康熙元年）〉，皆归英国管辖，遂并合为一。千八百一十八年〈（嘉庆二十三年）〉始归于弥利坚国。设立正总领一，副总领一，总会公署一所。更代推举如前例。领小部落十有三，以纽含汾为首区。俗奉加特力教，波罗特士顿教。书馆甚多，肄业学童八万四千。岁费银百有九十三万员。尚有医馆、律例馆，不在此数。土产牛、马、羊、骡、铜、铁、石板、鱼油、咸鱼〈（原本）〉。

《美理哥国志略》曰：明崇祯六年，马沙诸些人，始至干尼底吉寄居，其后渐次开辟，皆属马沙诸些。迨十二年，然后自立一部，名之曰干尼底吉。北界马沙诸些，东连罗底岛，西连新约基，南滨海，其方域有如中国直隶省十分之一。内有五山，高者七十馀丈，馀多平地。小河各处皆有，大者名干尼底吉河，径新韩赛、华满、马沙诸些三地，而后入干尼底吉注于海。南有大港口，水不生波，而且回环西注，而历地狱门〈（其地狭隘，江流旋绕，小舟难渡，故土人称为地狱门云）〉，出新约基也。沿河土地膏腴，近南尤和暖。百产皆有，惟无人参。居民以其地腴，故尤加意耕种。工作制造之物，布、棉、麻、布匹、大小呢纸、铁器等物。又一地每年作木时辰锤三万件，每件价约银六圆至十圆不等。馀物出贩无多，故洋舶亦少。分中部落八，小部落百有二十，居民二十九万七千七百十一口。会城有二：一曰哈得富耳，一曰新港某。哈得富耳在部中，附干尼底吉河。其新港在境南濒海。通共教会共四五百，每会于礼拜日，约千数百人，登堂听教。其学馆为二十六部之最，于新港会城之内。大书院有四，其一例学四年，然后随意学于三所。三所内一学圣文，一学医道，一学国中律例规条。四所为师者共二十人，受业者四五百人。于哈得富耳城内一大书院，名曰华盛顿。其外教哑与聋者一，院中有百数十人。所学之法皆以手指，其后二十六部皆仿此焉〈（今补）〉。

纽育部，东界洼门、马沙朱硕士、袞特底格，南界宾西尔洼尼、阿纽惹西，西北皆界英国新地。幅员四万五千六百五十八方里，户百九十一万八千六百口。域内多山，地亦平旷。山以朗答峰为最高，约三百馀丈。河以赤臣河为最要，长三百二十五里。此外河湖尽通舟楫。始兰顿之人于千六百九年〈（明万历三十七年）〉，开辟纽育，千六百六十四年〈（康熙三年）〉，设官治理。迨各部背英，而纽育亦于千七百七十五年〈（乾隆四十年）〉，归附弥利坚国。英国以纽育本我自垦之地，不甘遽叶，故兴师报复，大受荼毒。领小部落二十有四，以纽育为首区。设立正总领一人，副总领一人，均由人民公举。其立法之官，一曰西业，一曰阿新墨里。西业四年一易，阿新墨里一年一易。其审判讼狱者又分大小，即由西业选充，如大者果能供职，至六十岁始更易，小者五年即更。其推举必须白人年逾二十，居本部经一年者，方能出书荐人，否则不得预也。俗奉加特力教，波罗特士顿教。文学日盛，书馆万有一百三十二所，学童五十四万一千四百，费用银四十一万九千八百七十八员。尚有各技艺馆，不在此数。先浚运河，费官银千馀万员。其通各部车路多铁铸成，费亦不貲。土产铜、铁、铅、盐、牛、马、豕、羊、匹、头、玻璃等类，计每年工作之物约值银六千馀万员，未成器皿，亦值银四千馀万员。各家造织粗呢等物，亦值银二百馀万员〈（原本）〉。

《美理哥国志略》曰：明嘉靖二十四年，伊大里人始至新约基寄居，为荷兰服役。其时地属荷兰，故称之曰新荷兰。迨后顺治年间，英吉利人逐荷兰而夺有其地。英国王分封其昆弟名约者主之，与荷兰久战争，终为英吉利所得，名之曰新约基。其疆域有如中国之福建省，地形三角，惟东南角为海岛。东界干尼底吉、马沙诸些、华满等三部，东北角直至西南角，皆连干那大地，南接边西耳文、新遮些二部。土

地高下不一，惟东多峻岭。大者名亚罢拉既俺山，河不胜数，大者名活得逊河，自北流出千里入海，河阔三四里，来往洋舰可纳。于半河有湍瀑布之湖，名曰畜治。又西北之湖有二：一名晏爹利珂，一名伊里其。二湖之界半属部境。晏爹利珂湖，比于中华之鄱阳湖尤大。其水出而西流，其瀑布自上而下，高十六丈，声闻数十里。其地自南而北，千百馀里，故北之寒甚于南。每冬春之月，河冰可行车。水有可作盐，有可作药者，惟作盐更佳，每年约卖数十担。民耕种者居四之三，以地为田者居四之一。又部中首领，欲人设农圃会，故每部立一会。首领每年共送银一万员。其贸易为二十六部之最。土产出卖，每年共银二千三百馀万员，进口之货变价约银三四千万。各行工作会所约二百，每年卖出棉布约三百万，哔叽约三百万，铁器约四百万，帽约三百万，熟皮约三百万，所作之靴鞋约共五百万，所作之白纸约共五十万，玻璃约二十万。其运货，河有火船，陆有火车。若速行，每点钟可五六十里，慢行，每点钟可三四十里。内分中部五十六，小部七百六十二，居民百九十一万三千五百零八口。会城亦名新约基。在东南活得逊河口之东，千二十六部城池形势，当推此城为首。城南港口可纳洋舶，每月数百艘，皆可驶至城下。城外更有各市镇。逾河而北数百里，一镇名阿尔巴尼，一镇名推来者是也。部内总制等官，皆以二年为一任，二年后复选。议处三十二人，分四班，每班四年为一任，首班任满，则二班升为首班，别选八人为四班，周而复始。参议百二十八人，每年一任，会议以正月为期。按察院之大者有四：一、内巡抚一员，议处三十一员，正按察一员，副按察三员，每事皆会审定议。一、内按察一员，省内各事，皆专自办理。一、内按察三员，每事商办。一通部分为八巡道，每道一按察院。所有道内各事，皆自查办，其外州县司等小察院亦有四。每年大小学馆费银约一二百万圆。国中有一演武馆，在省内活得逊河傍，地名西角。内为师者三十人，学习者二百五十馀人，学刀枪炮械军器〈（今补）〉。

纽惹西部，东界海，南界地那洼，西界宾西尔洼，北界纽育。幅员七千二百七十六方里，户三十二万八百二十三口。北多大山，而平地多沃衍。有巴沙益河，总受各水，汇成深潭，澄泓涵演，怡人游眺。其初开地者一为绥林之人，首垦南隅沙临之地。嗣有荷兰人开辟东北。千七百二年〈（康熙四十一年）〉，始归英吉利管辖。迨各部落叛英吉利，遂即率众归附于弥利坚国。领小部落十有八，以特连顿为首区。设立总领，及立法之冈色尔，并总会公署一所，均由民人公举。其审判讼狱者，即由总领等选充。上等者七年一更，次等五年一更。国人须年逾二十，曾纳丁粮者，方准出书荐人。若妇人黑人，皆不得预。俗奉加特力教，波罗特士顿教。禁贩人口。近来文学亦有起色。产铁、白铅、石板、匹头等类。车路亦皆治铁为之〈（原本）〉。

《美理哥国志略》曰：明天启四年间，大尼国人始至新遮些寄寓，其后英吉利、荷兰、瑞典等国人渐至，其后英吉利尽逐各国自立一部，近始归美理哥。其地延袤比浙江五分之一。东南濒海，北接新约基，西接边西耳文。内分中部十三，小部百二十，居民三十二万七百六十九口。西南有底拉华小港通海。东界海，皆沙漠无山，

惟近西有小山。其东沙漠之地，夏令炎热倍于他方。由东而西地渐高，则炎热渐减。地土不美，耕种无多，工作贸易则胜别部。会城名铁链遁，其城近于底拉华〈（今补）〉。

宾西洼尼阿部：东界纽惹西，南界马里兰洼治尼阿，西界阿西阿，北界纽育。幅员四万七千方里，户百有三十四万八千二百口。城内有墨鲁山，高百余丈。此外大山尚多，未及测量。河泽虽多，不甚长广。如底腊洼河最巨，亦仅长三十余丈。其初开地者，本绥林之人。至千六百八十二年〈（康熙二十一年）〉，为英吉利将官威廉边所据。千七百九十年〈（乾隆五十五年）〉，始归附于弥利坚国。领小部落二十有七，以哈里士麦为首区。设总领一人，并总会公署一所。内有西业里勃、里先特底甫两官，赞襄诸事。均由人民公举，三年一更，如各部例。先日文学迂劣，千八百三十六年〈（道光十六年）〉，渐见起色。俗奉加特力教，波罗特士顿教。土产铁、煤、盐、马、牛、羊、磁器、布匹、大呢、玻璃、苧麻等，五谷尤丰。车有铁路，可通近部〈（原本）〉。

《美理哥国志略》曰：边西耳文之始，原康熙十九年，我国未立首领之际，尚属英吉利。于是有英吉利人姓边者，其父曾为水师大将，征伐捕盗，有勋劳于国，故以其地封其子。至康熙二十年，有船三只。至二十一年又有边船自至，其时尚未有欧罗巴人至此。土旷人希，故边向土人买此野地，今名之曰边西耳文。译云边之林野也。东接连新遮些省，东北接连新约基，西北直接伊里湖，正西界阿嘻阿、费治弥亚二地，南界连费治弥亚、马里兰、底拉华等三地。较之浙江略广。有押罢拉既俺山，自东北至西南阔数千里，高三四百丈，城不濒海，惟西北有伊里大湖，东有新遮些交界之底拉华河，其河水出而下注至省城之底拉华大湾。是故洋船常至城外。又押罢拉既俺山，有湿布下苏贵哈那大河，由此而南注马理兰部境东。不暑不寒，与新遮些无异，惟城外峻岭，则寒较胜。然过此以往，至西则又和暖，地土肥瘠，则东胜于西。山中多树木禽兽，而煤更盛，甲于诸部。土人每常掘地四五十丈取水作盐，亦有水可作药者。耕种不甚加意，以其地太广也。五谷以麦为多，果实以桃、梨、苹果为盛。工作则有呢绒、布匹、玻璃、铁器、木器各等，又有作烟柜之所，其烟柜在车则云火轮车，在船则曰火轮船，此皆赖水蒸之力，旋转而行。部内分为二巡道，五十一中部，五十一小部，居民百三十四万七千六百七十二口。城介底拉华湾、底拉华河之间，名曰费拉地。费至海约四五百里，城居底拉华河之西，四围皆九里十里方平，街衢广五丈至十一丈，无曲道小巷。省西有小河，河四十里外之上流，清如瀑布，于此有水车渡其水，上进至一小山，山上有池，池外有大铅管贯入，而复渡其水出也。其铅管斜下，透入城中地底，如中华之沟渠。由是各家地下，皆有铅管引水，各街地下，亦有铅管分流也。又街中家家各竖一管，以截其水，管上有一扭准，如欲放水，则扭出其准，欲止其水，则扭入其准。故炎夏洗街，家中用水，皆于此管焉。其管或铅或瓦为之，非比地下之必以铅为也。省城内有一博物院，广聚天下出类拔萃之人。官员每年以十二月会议，余与马沙诸些无异。大书院有七，每院为师者三四人，从学者一二百人。乡中学馆，在前时无多，今土人

合议，各人捐输，竟有一人乐助银二万者，馀亦捐题不少，教会遂多至八九百所焉〈（今补）〉。

地那洼部，东界海，西南皆界马里兰，北界宾西尔洼尼阿。幅员二千一百二十方里，户七万六千七百四十八口。地势平芜，南多潮湿，河渠不多，其大者墨兰地温河。不与他国贸易，惟与近部舟货往来。千六百二十七年〈（明崇祯七年）〉，始有绥林之人，开辟其地。千六百六十四年〈（康熙三年）〉，归于英国。千八百三十年〈（道光十年）〉，始附于弥利坚国。领小部落六，以那洼为首区。设总领一人，四年一易，荐举如前例。书馆百有三十三所，需费银十八万员。俗奉加特力教，波罗特士顿教。土产大呢、布匹、铁器等〈（原本）〉。

《美理哥国志略》曰：明万历年间，瑞典王遣使渡海至新瑞典地，后顺治九年，为荷兰人所夺，至康熙间复为英吉利人转夺，改名曰底拉华。于二十六部内罗底岛极小，而底拉华次之，仅当浙江省二十分之一。东与洋底拉华湾等分界，北与边西耳文为界，西南接马理兰。内分为三中部，二十四小部，居民七万六千七百三十九口。水路通海，通底拉华湾，并有数小河交汇，其运河长六十里，广十丈，深一丈。有山不高。地则西北为佳，东南时虞涨潦，土既不美，耕种者稀，工作贸易亦然。境内一城，名曰多发。官员、学馆、教会皆与边西耳文无异，惟大学未有建设，缘始与边西耳文本为一部，后分为二，故土人之规模动静，皆大同小异〈（今补）〉。

马里兰部，东界地那洼海，西南俱界洼治尼阿，北界宾西尔洼尼阿。幅员万有三千六百方里，户四十四万七千四百口。地多大山，平壤颇沃，河道四达，故海舶贸易甚大。其初英国律官，曰麻尔底摩者，领众二百至此开垦，父子相继。千六百三十三年〈（明崇祯六年）〉，值马里阿女王时告成，遂以王之名，而名其地曰马里兰。迨各部落叛英以后，马里兰亦归附于弥利坚国。领小部落十有四，以阿那波里为首区。设总领公署一所，荐举更代如前例。各部书馆，费用银五万员。文学渐起。俗奉加特力教，波罗特士顿教。产铜、铁、磁器、石板、麦、粟、鱼油、咸鱼、大呢、布匹〈（原本）〉。

《美理哥国志略》曰：明万历年间，英吉利人奏准女王，请往美利哥辟地，遂领二百人置买此地，名曰马理兰。马理者，王后也。兰者，地也。盖言王后之地也。海口在底拉华之东，边西耳文在北，费治弥亚在西南。内分二路，十九中部落，居民四十四万六千九百十三口。东接大洋，中贯遮士壁湾，北连苏贵哈那河，西连颇多麦河。东南濒海，地广无山，西北峻岭高三百丈，海滨甚暑，近山甚寒，东南土宜五谷果木。工作则有铁器、牙器、玻璃、纸料等。会城有二：一名霸地磨耳，一名安那城。书院有四，公贮书数百卷，境域当浙江四分之一。美利哥国都，半在部西，半在费治弥亚周四十里，名曰华盛顿。初未立都城时，与英吉利争战，以华盛顿为帅得胜，故以其名名都城。今为二十六部之公地，故各官亦公同理。事于其中〈

（今补）〉。

洼治尼阿部，东界马里兰海，南界北戈罗里，西界根特机阿希阿，北界马里兰，及宾西尔洼尼阿。幅员七万方里，户百二十一万一千四百口。地多大山，其高者有波威尔土山，四百馀丈。河渠甚多，最长之波多墨河，长三百六十里，商贾所汇也。初英国依里萨柏女王时，有英人在占士开垦告成。千七百七十六年〈（乾隆四十一年）〉，即自立为一部，归附于弥利坚国。领小部落五十有三，以里治满为首区。设总会公署一所，荐举更代如前例。书馆百所，学童万七千馀口。岁费银四万五千员。此外各部，尚有大书馆、大书院及技艺等馆。俗奉加特力教，波罗特士顿教。产金、铁、铜、铅、煤、盐、麦、粟、烟叶、棉花等。部落库中常贮银三百万员，备各款经费〈（原本）〉。

《美理哥国志略》曰：明万历三十四年，英吉利占士王时，有人至美利哥开一新地，立其城即以王占士之名名之。然地开辟人烟稀少，鸟兽交错，庐舍荒芜，迨后分茅列土之际，始名曰费治弥亚，译云贞女，意以颂赞女王也。东濒海，东北接马里兰，北接边西耳文，西边啍嘻阿建大基二部，南连典尼西驾罗连二部，二十六部疆域，此为最广，有如贵州省焉。省北有押罢拉既俺山，横亘边西耳文部，斜抵西南，有罗晏屋河，占士河，颇多麦河，啍嘻阿沙河，其外尚有数小河。境东濒海无膏腴，惟沿河皆沃土。境内之山，有一桥浮石生成，非由人力，桥底离水二十丈，桥阔数丈，傍多树木，掩映又有一石洞，口仅容人，而内深一里许，内有数石人，不知制自何代，时人呼曰龙洞。地广务耕种，多稻谷、果实、贸易亦众，内分为二路，又分中部落百有三，居民百二十一万一千二百七十二口。会城近东沿河，名里是满〈（今补）〉。

南戈罗里部，东界海，西南俱界若治阿，北界北戈罗里。幅员三万三千方里，户五十八万一千一百八十口。境内仅有特墨尔山，高有四百馀丈，馀俱培嵴，林木丛茂。初英国律官曰格拉领顿者，与依尔额兰威尔里等，奉渣尔士王之命，于千六百六十三年〈（康熙二年）〉，垦此即以国王之名而名其地，曰渣尔士顿。嗣与腊里开垦之地，亦经告成，总名曰戈罗里，地方辽阔，旋分南北两部。千六百八十年〈（康熙十九年）〉，英国续遣落机至此，又将南戈罗里，再分两部落，设官治理，不洽人心。千七百一十九年〈（康熙五十八年）〉并归为一。迨千七百九十年〈（乾隆五十五年）〉，亦背英而归弥利坚国，领小部落十有九，以果揽弥阿为首区。计幅员三万三千方里，户五十八万一千一百八十口。设正副总领各一人，并总会公署一所，荐举更代如前例。书馆八百一十七所，学童八千三百九十人，岁费银三万七千员。俗奉加特力教，波罗特士顿教。产铁、棉花、苧麻、丝发、谷稻等。河渠不甚长远，有铁路通邻部〈（原本）〉。

《美理哥国志略》曰：康熙五十九年，驾罗连之南，始有人托足。后康熙六十年，立一城曰查士顿。原与北驾罗连为一，迨雍正七年始分疆为二：号南驾罗连东南滨

海，北接北驾罗连，西南接磋治亚，地当中国浙江省四分之一。皆平地无高山，由东南而西北，则地渐高，故北有比底大河，贯境而注东南洋。又有散底河贯境而至南洋，西北交界有卸番亚河，亦斜入西而注南洋。海中自东而西多岛，其中参天材木不可胜数。故部内火轮船皆在岛内往来，不致遭外洋之风浪，东南多烟瘴，岁中常暑热，冬至不过稍寒数日，霜雪旋落旋消。西北地渐高，天气亦渐适中。东南濒海一二百里皆膏沃，多松橙。三百里外则沙漠无际，渐进而高，直抵西北，则又胜乎东南，与驾罗连北部相同。地多产金，不可胜用，贸易以棉花、谷米为最盛。境内无贩货之船，皆邻部之船，载运出境。内地分为中部二十九，居民五十八万四千四百五十八口。东方查士顿城最大，濒海，此外别无大城。会城名个伦备亚。其官员与驾罗连北部无异，惟北部无副领，此则多一副领，亦并无职事，惟遇首领缺出，则补其缺。教会约二三百，大书院二所〈（今补）〉。

北戈罗里阿部，东界海，南界南戈罗里，西界地尼燄，北界洼治尼阿。幅员五万里，户七十三万七千九百口。墨鲁山，亦有在境内者，最高之峰五百余丈，此外大山尚多，林木丛茂，河港歧分，最长之罗阿菴河，由洼治尼阿发源四百里。始英国之腊里垦此，与格拉领顿所垦之查尔士顿〈（即今南哥罗里拿内小部落）〉等处告成遂合为一曰戈罗里。与洼治尼阿毗连，故有谓戈罗里之北，即洼治尼阿。至千七百二十年〈（康熙五十九年）〉，分疆设吏，始各有其地，遂分戈罗里为南北两部。甫分，五十六年即背英而归附弥利坚国。领小部落二十，以腊里为首区，设立总领冈色尔等官，掌理政事，设总会公署一所，及书馆技艺馆。俗奉加特力教，波罗特士顿教。产金、铁、木料、粟、麦、洋蓝布、棉花、苧麻，工作器皿〈（原本）〉。

《美理哥国志略》曰：明万历十二年，英吉利人始至北驾罗连而得其地，以费治弥亚为邻，西以典尼西为界，南接驾罗连，东南滨海。方域比中国浙江略广。东南地平无岭，惟西北有押罢拉既俺山，时人或呼之曰盖山，或呼之曰铁山，又呼为烟山，皆以其山所有称之也。省东北有晏罗屋磋湾上河，其源自费治弥亚而入，过东南而注于海。东则有大河，及奈士，东南有呷非耳河，有压健河，源委皆在境内。其入海处激沙成洲，由是分流于班利哥亚，皮麻禄二湾。境内地气惟西为美，东多烟瘴。土产黄金，故掘地与淘沙者二万余人。计每年之金变价约银五百余万。其木多松，居民以松香为油，耕种甚寡，植物粟米为最，麦、棉、烟叶次之，人参亦间有之。货罕贩运出洋，因洋舶少也。分中部六十二，居民七十三万八千四百七十口。会城沿奈士河，名喇理。首领一员，参办七员，议处十数员，参处数十员，书院仅一所〈（今补）〉。

若治阿部，东界南戈罗里，南界佛罗里达，西界阿那麻马，北界地尼西。地卑湿，又复多山，墨鲁峰在境内者，约四百余丈。扎达湖，支河，由境内发源，而达佛罗里达入海，长五百里。此外小河尚多。初英国若治阿二世王时，闻南戈罗里，有因底阿大吕宋与弥利坚新垦之地，故于千七百三十二年〈（雍正十年）〉，遣将率兵

并徙国中贫民，至此垦边，遂以国王之名，而名其部曰若治阿。有大吕宋人在佛罗里阿者，设兵拒之。至千七百九十八年〈（嘉庆三年）〉，始归附于弥利坚国。初尚与阿那麻马，弥斯栖比之西边小部总为一区。至千八百二年〈（嘉庆七年）〉，始画出疆界，领小部落二十有八，幅员六万二千方里，户五十一万六千八百二十口。俗奉加特力教，波罗特士顿教。设总领西业里勃里，先特底甫等官。荐举章程均与戈罗里相同。各书馆岁用银万八千七百员。产金、铁、棉花、稻谷、木料、木器〈（原本）〉。

《美理哥国志略》曰：滨海之部，以磋治亚部为尽。自雍正十年，始有英吉利百余人，寄居于此，立一城曰卸番亚。迨雍正十三年，有瑞典与荷兰二国人至。其时境南有费罗里大地原属西班牙，其居人见有英吉利、瑞典、荷兰等国人至，遂与争锋，干戈数载始息。乾隆十八年，复有英吉利人至，始称为磋治亚部。东南抵海，东北界南驾罗连，北接典尼西，西连亚喇罢麻，南连费罗里大。方域如中国直隶省焉。北之押罢拉既俺山，至此而止。又有数河斜下东南洋，东北有卸番亚河，附城有阿结治河，又有亚拉达麻哈河，皆注南洋。地土气候，皆与驾罗连南部无异。北有石洞，其洞口高数丈，下有水，时人每用小舟浮入，至十五里之深，则有瀑布飞下，不知其源从何而始，不可复进矣。贸易耕种，皆与南驾罗连相同。土产棉花、谷米、烟叶等。省内分为七十六中部，居民五十一万六千五百六十七口。城之最大者附近卸番亚河，即以河名其城，会城则建于中央，名靡理治。教会三百余，大书院一所，各乡小学馆百所。土人有二族，其始不谙工作耕种政教，近则延师往教，多文墨之人矣。初费罗里大地广人稀，邑多土蛮。嘉庆年间，欧罗巴人与西班牙人争战，有美理哥货船，为西班牙人所劫，国中总领知之，起兵反讨于西班牙王，王见我国理直，惟货已难返，遂以费罗里大地偿之。是以斯地属美理哥，此乃道光十年事也〈（今补。西班牙即是班牙，皆吕宋之别称也）〉。

阿希阿部，东界宾西尔洼尼阿，南界洼治尼阿地尼西，西界因地阿那，北界弥治颜依里湖。地势高阜，少大山，多河渠。最长之模士经岩河，亦不过二百里。千七百八十八年〈（乾隆五十三年）〉，有西北方人，始至阿希阿之麻里达开垦，至千八百年〈（嘉庆五年）〉告成。设官两载即归附于弥利坚国。领小部落三十有四，以戈揽模士为首区。幅员四万五千方里，户九十三万七千九百口。俗奉加特力教，波罗特士顿教。设总领等官如前例。书馆二十间，经费由公田拨出。产铁、煤、盐、石板、粟、烟叶、稻谷、苧麻、牛、马、玻璃、棉花等。有河道可达港口，陆地有铁车路，以达邻部〈（原本）〉。

弥治颜部，地分二区，中隔弥治颜、休伦两湖交汇之水。其湖北一区，东界英吉利属地，南抵弥治颜湖，西界威士褒申，北抵苏比厘阿湖。有波古派大山，高二百丈，域内河皆北流，注苏比厘阿湖。仅东隅之仙马里，有土番八百人居之。馀俱荒旷，地广人稀，弥利坚亦仅有皮革公司，与土番贸易。虽设墨腊底炮台，尚无人流寓。其湖南一区，东北俱界英属地方，并休伦湖依里湖，西抵弥治颜湖，南界阿希阿

、因底阿那，三面包湖，惟南面平陆。沙土疏衍随地可种。有先左色付河，长二百里，通舟楫。其不通河者即有铁车路，邻部通衢，故城邑俱建在南区，而北区则尚无城邑也。弥治颜湖，广约八十里至百里，长约三百六十里。始佛兰西人于千七百年〈（康熙三十九年）〉垦其地，先筑底特律部落，即今首区也。迨各处开辟已成，于千七百六十三年〈（乾隆二十八年）〉为英国所夺，设达厘多里。至千八百三十五年〈（道光十五年）〉始附于弥利坚国。领小部落三十有九，幅员五万六千方里，户八万七千二百七十口。俗奉波罗特士顿教。设立正副总领，二年一易。判事之人，七年一易。荐举如各部之例，惟不拘何人，均可出书推荐，与各部不同。又新辟之地未详土产〈（原本）〉。

根特机部，东界洼治尼阿，西界依里内士弥梭里，南界地尼栖，北界因底阿那阿希阿。厥田惟中，中少大山，有河道，通各部，其最长之甘麻兰河，六百里。本因底阿土人游猎之所，时相争斗。千七百六十七年〈（乾隆三十二年）〉，有洼治尼阿、北戈罗里两处猎户，至此游猎，始引白人数十家迁居于此。襁负相望，人烟日盛。千七百九十三年〈（康熙五十七年）〉，遂归附于弥利坚国。领小部落三十有七，以佛郎贺为首区。幅员四万五百方里，户六十八万七千九百口。俗奉加特力教，波罗特士顿教。设立正副总领西业等，皆四年一易，里勃里先特底甫两年一易，判事之人即由总领选择，更易无定期。虽有书馆，尚未筹拨经费。产煤、铁、盐、洋消、麦、苧麻、烟叶、棉花工作等类〈（原本）〉。

《美理哥国志略》曰：建大基部，原属费治弥亚，乾隆三十有三载，有单爷利蓬者，徙居于此，建一舍，四围皆木。三十有八年，至者渐众，立一邑，名曰暇律士邑。四十有四年，与费治弥亚，分茅列土，不作附庸。四十六年，则与邻并立，而属美理哥国。其地延袤，与中国浙江无异，地居二十六部中央。东连费治弥亚，东北则喏嘻阿，西北则引底安伊理奈等，西有美苏里，南有典尼西。东有押罢拉既俺山，自东南连峰而入，地土稍高，瀑布流注，或南或北，或贯北而西往。东北有阿嘻阿河，自北而西，注于美士细比河，故又与喏嘻阿、引底安伊理奈等部交界。境内各河，皆注于斯，地居通国中央，故寒暑均平，土地膏腴，五谷果木不可胜用。亦有铁铅及煤，水源之咸者，可以作盐，有一泉水可作药用。山中之穴甚多，其大者上半载风从穴外而入，下半载风从穴内而出，竟不知风从何来，亦不知穴之深浅，曾有土人于上半载，以窗门掩其风秉炬而入，见其延袤高下不等，入行一日过五十里，犹不能尽，乃返，又经一日始出，其穴内之广可知矣。农圃则禾、麻、菽、麦、烟叶、苦墨等，惟麦甲于诸部。不通洋舶，故货物难运出外，惟用火船在国内贸易而已。分中部落八十三，居民六十八万八千八百四十四口。其中城市镇埠，以异士镇为大。喏嘻阿河为商贾通津。其次则历星顿镇，前此曾为省会，其中房屋工作贸易推为最美。会城在北，介千累士历星顿二镇之中，名法兰富耳，部内兵强将勇。官有首领议处参议等，首领议处，皆以四年为一任，参议几十人，每年一任，期满则由民别举。教会约四五百，大学公堂五所，各处小学馆，亦不甚多〈（今补）〉。

佛罗里达部，东西南俱界海，北界若治阿，平坦少高山，上夹沙石，卑湿异常。仙赞士河，自境内发源，入阿兰底海，长二百里。始大吕宋之般士底里晏，于千五百一十二年〈（明正德七年）〉垦此，名其地曰佛罗里达。至千五百六十五年〈（明嘉靖四十五年）〉，建有欧吴士代部落。千七百六十三年〈（明嘉靖六十三年）〉，为英人所夺。甫二十年大吕宋旋复夺回。于千八百二十年〈（嘉庆二十五年）〉，遂将全区售与弥利坚国。原居之人皆他适，留此者渔户农夫而已，近年招复流移，筑室日众。领小部落二十有五，以达那哈西为首区。仅设议事处一所，幅员共五万五千方里，户三万四千七百三十口。尚未设定官府，故不曰士迭，而曰达厘多里，犹华言不曰部落，而曰地方也。产玳瑁、蜜蜡、枣子、橙、石榴、无花果、甘蔗、棉花、洋蓝、牛、马、豕等，又产里付和木最坚久〈（原本）〉。

卷六十三

○弥利坚国西路十一部〈（内有土番四部）〉

阿那麻马部，东界若治阿，南界佛罗里达海，西界弥斯栖比，北界地尼西。土饶沃，丰物产。境内多山，不甚高。有单麦米河，长三百里，陆有铁车路，可达邻部，运载络绎，旧与若治阿弥栖斯比同区。至千八百二年〈（嘉庆七年）〉，始分为三部。至千八百二十年〈（嘉庆二十五年）〉，归附于弥利坚国。领小部落二十有六。以都士加鲁沙为首区。幅员五万二千方里，户三十万九千五百二十七口。俗奉加特力教，波罗特士顿教。设总领并总会公署一所。土产金、铁、棉花、甘蔗、洋蓝、石板〈（原本）〉。

《美理哥国志略》曰：亚喇罢麻部，旧地半属磋治亚，半属费罗里大，迨道光元年，然后合为一部。东界磋治亚，北界典尼西，西界美士细比，南界费罗里大，与美是哥海方域较之，磋治亚又略小焉。北有押罢拉既俺山，高约百馀丈，亦有数河，大者名亚喇罢麻河，皆流注磨庇理湾而出海。境内自南距北五度，故南方夏暑，北则稍有霜雪，亦不甚寒。故禽兽毋庸巢穴，土产稻谷、果实，皆三月放花，四五月成熟。境内炎热，土人至夏，常入山避暑。所产松皆弱小，稻谷多虚少实。其外南近美是哥海、并北近山者尽属膏腴、地旷人希、兽蹄鸟迹、交于野外、农牧时防猛兽。棉花为盛，次则甘蔗、稻谷、烟叶、果实，皆贩至磨庇理湾而出海。分中部落三十六，居民三十万零八千九百九十七口，别有土蛮数百。官员则首领副领各一，惟议处官多则五十，少则二十五员。会议以十月杪为期，会城建于磨庇理湾口因以为名。教会二百馀，大书院惟二所〈（今补）〉。

弥斯栖比部，东界阿那麻马，南界雷栖阿那海，西界阿千萨士雷栖阿那，北界地尼西。土饶林木茂，惟少大山。弥斯栖比河最长，在境内即有六百里。陆地亦有铁车路，以通邻部，旧属佛兰西之雷栖阿那地，千七百一十六年〈（康熙五十五年）〉，曾建有那支士部落炮台。于千七百六十三年〈（乾隆二十八年）〉为英国所夺，越二十年又为大吕宋所夺，与若治阿阿那麻马同区，嗣若佐治阿那麻马，自归弥利坚国，于是本部落亦遂全售与弥利坚，听其设官治理。领小部落二十有五，以热循为首区。幅员四万六千方里，户十三万六千六百二十一口。俗奉加特力教，波罗特士顿教。设立总领诸官及书馆。经费如前例。旧产烟叶、洋蓝最盛，近又棉花为最〈（原本）〉。

《美理哥国志略》曰：美士细比部，始自康熙五十四年，法兰西人初至寄居，有西班牙人亦欲其地，故二国相争，自此以为公地，后英吉利又与法兰西相争。迨乾隆二十七年，英吉利得之。嘉庆二年，始归美理哥。二十二年列为一部，东界亚喇罢麻，北界典尼西，西界美士细比河，南抵累斯安。比之中国直隶省略小，北有押罢拉既俺山，至斯而止。境北之土皆峻，故北河之水，有斜下注美士细比大河者，有

东下注亚喇罢麻者，惟境内之河，南注墨息哥海。地气寒暑，与亚喇罢麻不异，惟西无堤障，时受美士细比河之溢涨，地极膏腴，远胜亚喇罢麻。尤宜棉花，贸易亦惟棉花最盛。分中部落二十六，居民十三万六千八百零六口。会城名查基逊城，外附河名珠江，人寡贸易少。惟西南方之那吉士城，商贾云集，以其近美士细比河，火船洋舶，皆可贩运之故〈（今补）〉。

雷栖阿那部，东界弥斯栖比，西界墨西哥国，南界海，北界阿干萨士。地卑湿，少大山，肥饶各半，列河之源长二千里。经数部落，始至本境而注之海，其不通河路者，各有铁车路以运货。始佛兰西之人，垦弥斯栖比之西隅，原属雷栖阿那之地，于千七百六十三年〈（乾隆二十八年）〉均为大吕宋人所夺。千八百年〈（嘉庆五年）〉佛兰西人始复取回，越三年即鬻与弥利坚国。领小部落十有九，以纽哈连为首区。幅员五万五千方里，户三万四千七百三十口。设总领并总会公署一所，大书馆甚多，岁支银万五千员。俗奉加特力教，波罗特士顿教。产棉花、甘蔗、烟叶、洋蓝、稻谷、牛、马〈（原本）〉。

《美理哥国志略》曰：康熙十一年，法兰西人至累斯安地寄居，十九年，又随有至者。乾隆二十七年，以其地让于西班牙王，嘉庆四年，西班牙王返其地，七年美理哥国总领，议出银千五百万员，与法兰西王买之。后十六年立为一部。东界美士细比，北界倚阿干骚，西界墨西哥德合师国，南界墨西哥海〈（墨西哥国一作墨西哥，一作墨是可）〉。内地延袤与中国直隶省大同小异，东南地平，西北峰小不峻，多大河，南有数海岛，地气暑热，间有烟瘴。美士细比河水常涨溢，漫及会城。即南方亦常患潦。棉花、甘蔗之盛甲于二十六部。一农夫可种甘蔗十五亩、得糖五千斤，棉花价贱，有风柜可以去棉子而取棉花。每柜能当数百人之工。贸易则赖美士细比河，凡上游各部洋舶，皆云集于斯。分中部落三十一，居民二十一万五千五百七十五口。会城在东南方，离河口三百里，名新珂凉士〈（今补）〉。

因第阿那部，东界阿希阿，南界地尼栖，西界依里内士，北界弥治颜。土膏沃，山巔亦堪播种，茂树木。有洼麻时河，长三百七十里。陆有铁车路，可通各部，始佛兰西人于千七百年〈（康熙三十九年）〉，始开其地。千七百六十三年〈（乾隆二十八年）〉，为英国所夺，嗣随各部背英归弥利坚国。原与依里内士同区。千八百九年〈（嘉庆十四年）〉，始分为二。领小部落三十有四。以因地阿那波里士为首区。幅员三万六千五百方里，户三十四万三千三十口。俗奉加特力教，波罗特士顿教。立正副总领及西业，三年一易。里勃里先特底，甫一年一易，判事之人母论上等次等俱七年一易，均由民人公举。书馆经费由公田拨出。产洋参、煤、盐、铁、牛、马、粟、苧麻、蜜蜡、烟〈（原本）〉。

依里内士部，东界因底阿那，南界弥梭里地尼栖，西界弥梭里，北界威士袞申。地势平坦，茂林木，宜牲畜。弥斯栖比河，长五百五十里。始佛兰西人，于千七百年〈（康熙三十九年）〉先垦附近河岸地，建筑加河机，阿加士机部落。至千七百六

十三年〈（乾隆二十八年）〉为英人夺据。与因底阿那同区，千八百九年〈（嘉庆十四年）〉始分为二，千八百一十八年〈（嘉庆二十三年）〉，亦附于弥利坚国。领小部落二十有八，以湾达里阿为首区。幅员五万五千方里，户二十七万二千四百二十口。俗奉加特力教，波罗特士顿教。设立正副总领与各部一例。产盐、煤、铅、铁、铜、苧麻、烟叶、棉花、石板、麦、稻谷。其内地出产未能悉知〈（原本）〉。地尼西部〈（原本有目无志，今取美里哥国志中典尼西部补之）〉。

《美理哥国志略》曰：典尼西之始，仅有驾罗连北部，与费治弥亚等。人至后生齿日繁，嘉庆元年，遂立为一部。东界驾罗连北境，北界费治弥亚建大基二地，西界美士细比河，南界美士细比、亚喇罢麻、磋治亚三地，东南长袤。四面皆斜如浙江省。东有峻岭自北而南，横压数百里，与押罢拉既俺山相连，河流相通，地皆膏腴，不寒不暑。农圃之物除橙及无花果外，馀皆茂盛。工作则有铁器、棉、夏布匹等。其馀各物皆备，部内分为二路，又中部六十二，居民六十八万四千八百二十二口。会城建于中央，名那实城。官有首领议处，参议等，教会二三百，书院三所〈（今补）〉。

阿千萨斯部，东界弥斯栖比第尼栖，南界雷西阿那，西界因底阿，北界弥梭里。境内西隅有阿萨麻萨尼大山，未悉里数弥斯西比河，经境内四百里。其地原属弥梭里，千八百一十九年〈（嘉庆二十四年）〉，始分为达厘多里，至千八百三十六年〈（道光十六年）〉，即归附于弥利坚国。领小部落二十有四，以力特尔洛为首区。幅员五万四千五百方里，户五万八千一百三十口。俗奉波罗特士顿教，加特力教。设立总领及总会公署之西业，皆四年一易，里勃里先特底甫二年一易，审判之人由总领公署选派，上等者八年一易，次等四年一易。其公举之制，众口明言，毋须暗书，保荐此异于各部者。禁赌局赌具最严，奴仆有罪，视白人一例治罪无所畸重。

弥梭里部，东界依里内士，南界阿千萨士，西界威斯顿，北界威斯袞申境。少大山，林木丛茂。弥梭里河经境内，五百五十里，通舟楫。产白铅、砒礞、黑铅、铁、煤、盐、石板、牛皮、棉花、牲畜、粟、麦、稻谷。千七百年〈（康熙三十九年）〉，佛兰西人始至其地，先建仙罗依士、仙尼威委两部落。土番有二种，一曰格腊包士，即佛兰西人之后裔，一曰牙模士，即佛兰西人与因底阿土人婚配而生者，为黑白不分之人。作事灵巧特鲜专心，原与阿千萨士同地。至千八百一十九年〈（嘉庆二十四年）〉，始分部落，设职官，三载即附于弥利坚国。领小部落二十有三，以渣法甸为首区。幅员六万六千方里，户二十一万口。俗奉加特教，波罗特士顿教。设立正副总领二年一易，总会公署之西业四年一易，里勃里先特底甫二年一易，至判事之人即由总领等选派，久暂视乎其人。有书馆教文学，宽恤奴仆，有残害其肢体性命者罪之〈（原本案此志共列二十七部，而美理哥志略则止二十六部者，以首部戈揽弥阿乃国都，不列于部数也）〉。

○弥利坚国边地土番四部

《美理哥国志略》曰：新国边地，有一类人，言谈举止，皆出类拔萃，不知其始自何来。惟见其行藏，有如亚细亚之土蛮。方欧罗巴人始到之时，土人约有十数万，今则三四十万矣。计其地则有数十社。体肤赤而眼发黑光，其发长而粗，其身高而力，其心明且信。议事则知敬老，临战有进无退，惟遇有仇恨，辄若不共天，或受人欺负愠坐不言，审思良久，起即赴汤蹈火，务必雪之。倘被敌擒，则束手受戮，断无屈膝求免，此土蛮之性情也。惟无书籍，不知文字，亦不识耕织炊汲，茹毛饮血及啖果木菜瓜而已。平日惟业渔猎或歌跳赌博，病无方药惟求叱法之人。馀事则皆付之妇人也。炎夏腰围兽皮，冬寒则全衣皮毛。又有面涂五色，头插乌翎意示人以威也。虽有房舍栖身，不过篷簦。无金银铜钱诸币，但以树皮珠石相交易。惟立总理头目以议事。至道光元年，有新国人至其地，定章程，导以士农工商之事，风俗渐开。方英吉利据十三部时，间唆土蛮骚扰内地，及与新国交兵。英吉利欲募土蛮使为前驱，以攻新国，奈语言不通，土蛮不为其所用。而新国西边居人多与土蛮相习者，于是购募土蛮，授以兵器，教以队伍，别立一军以助兵锋。土蛮踊跃，用命尽力，屡败英兵，故新国之胜英吉利，土蛮亦不为无助焉。地在新国之西，落机大山之东，墨西果国之北，英吉利属地之南〈（原无今补）〉。

○弥利坚国因底阿土番四部〈（以下原本）〉

威斯滚申达多里部，在弥治颜之西。东界弥治颜湖，西界威斯顿，北界英国属地，南北距六百里，东西距五百里。多陵阜少大山，土饶易种，北隅多湖，其稔邦碧湖即弥斯西比河所发源也。弥梭里河在西隅边界，曲折环绕，经境内千三百里。此外尚有支汊小渠，可通舟楫。本因底阿土番所居。千八百三十年〈（道光十年）〉，始有弥治颜之白人迁往，有居弥斯西比河东者以威斯滚申为要区。遂创建部落炮台，尚未设官治理也。东有厄领比村，那洼厘阿村，南有弥尔弯机村，各建炮台民业工作。至勃拉伊里都珍村，多佛兰西贸易之人，约五六百。若弥斯西比河之西，亦称沃壤，产铅、铁、煤、炭尤丰。故弥利坚人于千八百三十二年〈（道光十二年）〉，即纠同土番夺得其地。于滨河之都模格创建部落，居民千二百人。少南之麦领顿村，居民六百人，筑炮台以保障。居西北者，稳底林阿土种类，约四千五百人。由此少东，则弥那靡尼种类，约四千人。居西南者，沙士贺纤士两种，约六千五百人，依阿威士种类，约千二百人。此外尚有因底阿之人，散处各方，种类不一，在北隅与英国所属交界之边米那村。弥利坚设有皮草公司，派人贸易，筑有炮台保卫。综计威斯滚申幅员，共有二十九万方里，弥利坚人在此者约计三万馀口，所开地不过十分之一。

威斯顿达多里部，即因底阿土人所居。东界阿千萨士弥梭里，南界墨西果，西界落机大山及墨西果，北界威斯顿底特力，幅员二十万方里。地土肥瘠不等，肥者产五谷蔬菜，牧羊取毛，为织羽毛之用。瘠者荒饶不毛，并有冬令薪烧不然，惟有一种

冬草以资炊火。落机大山在境内者，曰占士峰，高约千馀丈。其北隅尚有最高之峰，未及测量。阿千萨士河源自落机大山，而至阿千萨士部落，长千五百里，其水深广，为烈河、搔伙河，加那底淹河、那伙河、兰宁洼挹河、阿些治河、千萨士河所不及。此地乃弥利坚国给与因底阿土人猎牧之所。立书馆，起庙宇，给工作器具，冀渐化导。第种类亦多，有土著者，有自外迁来者，今将武士衙门于千八百三十六年〈（道光十六年）〉春所查明种类户口方里列后。

土番十四种

作岛斯种类，万五千口，居地二万三千五百方里，在阿千萨士之西。以耕种为业，产棉花粟米牲畜，亦颇富足，有出资数千金，作商贾贩盐工作之事。渐知文字，自立头目三人理事，四年一易，又设立法之冈塞尔三十名，一年一易，皆由民人自举。严禁贩酒入境。有弥利坚国所设庙宇六所，教师十三名，并于列河口岸筑炮台一所，近习声教，庐舍华整。

格力士种类，三千六百名，居地二万五千方里，在作岛士之北。土肥易耕种，其田皆以木围之，产粟米、麦、稻、蔬菜。屋虽不华而宽大。自立总冈色尔理事，并设有审判官、行法官。弥利坚亦于此立庙宇教师。

支罗机士种类，六千名，居地方二万二千方里，在格力士之东北。人多耕种，产盐及牲畜服色器血，屋宇略同。自立头目三人理事，立法之人分为两所，每年会议一次，并设审判与行法之官各二。其阿千萨士河岸，有弥利坚国炮台，并庙宇教师二十人，刊印书板。

阿些治士种类，五千五百名，居地方万一千八百二十方里，在弥梭里之西。原居之士著，半已归化。建房屋业耕牧，未入化者，随处栖止，周围插竹障以牛皮即为居室，淳朴而贫苦。

瓜包士种类，四百五十名，居地方百有五十方里，在弥梭里之西。其人比阿些治士略渐声教，且能诵读，惜无教师训导。

沙洼尼士种类，千二百五十名，居地方二千五百方里，在弥梭里之西。为因底阿种类中之最渐教化者。室庐耕牧，有书籍文字。弥利坚国曾造庙宇、设教师，刊书板。

千萨士种类，又名高搔士。千四百七十名，居地四千二百方里。在沙洼尼士之北，土著穷苦，与阿些治士种类无异。所居以篱为墙，上覆木板而泥其外。

地那洼士种类，八百二十六名，居地三千四百五十方里，在千萨士之北。俗与沙洼

尼士同，有弥利坚国所设庙宇教师。

机加布士种类，五百八十八名，居地方千二百方里，在地那种类之北。有头目独创教门，以为能知未来之事，其教中规矩，以为如犯恶事，欲赦罪过能不饮浓酒，不理毛发，每一礼拜，聚集诵经四次，即可悔解。附从入教者不过四百人。有弥利坚国庙宇，教师并炮台一所。

包尼士种类，约万名，与般加士种类八百名，共居地二万五千方里，皆旧土著。喏麻哈种类，千四百名，原土著，居地方若干，未悉其详。

喏多士种类，弥梭里士种类，共千六百名，居地方二千五百方里，亦原居土著。

西尼加士种类，二百五十口，沙洼尼士种类，二百口，共居地方二百方里。

委士种类，二百二十口，比晏机搔士种类，六百十口，共居地方二百五十方里。

比喏里阿士种类，加士机阿士种类，共百有三十二名，同居地方百五十方里。

阿岛士种类，二百名，居地方五百六十二方里。波达洼弥士种类，四百四十一名，居地方若干未详。以上十四种，俱已入化。此外种类散处无定，如阿力加那，士诗晏尼，士没拉弗，俄罗斯，稳特厘士，阿里巴哈士等种皆在化外。捕猎为业，榛狫无知，故白人少与交易。千八百三十五年〈（道光十五年）〉，弥利坚国遣兵征讨，始申约束，不相侵寇。

威斯顿特底力部，东界威斯滚申，南界威斯顿达多里，西界落机大山，北界英吉利属地。幅员约有三十方里。地势崎岖，人迹罕至，故不得其详。千八百五年〈（嘉庆十年）〉秋，有船户里威士由弥梭里河溯流而上得其来源于落机大山，石壁峭立，高有百丈，悬瀑飞流，河源湍激，舟行甚险，滨河时有崩坼。山麓树木丛茂，居于上段者，曼丹士，敏尼达里士，墨腊弗各种类。居于下段者，即底顿士然顿士西阿士各种类。千八百三十五年〈（道光十五年）〉，与弥利坚拒战者，此区人居多。土产山羊、鹿各种皮毛。

阿里颜达多里部，又曰戈揽弥阿达多里。东界落机大山，南界墨西哥国，西界比西非益海，北界英国属地，西隅近海。山岭虽多，而东隅落机山最大，其幅员里数未详。产木料、皮毛。有木曰摆树，高约二三十丈，围圆约有四五丈，干直无节，至杪始分枝叶，远望若伞然。并有一种，其脂如糖，秋收其子，作饼甚美，惜土人多伐为薪。境内河有阿里颜河，源自落机大山，长六百里。威士河，长千里。在戈揽弥阿河口之土蛮，不业农工，非渔即猎，凿木为舟，可载四五十人，所猎兽皮运至戈揽弥阿河口，与欧罗巴人易坏炮台、锅、白珠、蓝珠、烟叶、铁刀等物。土俗甫

生男女，即以物束头俾其顶鼻挺直，并饰脂膩为美观。间有佩熊爪、铜镯、蓝珠、白珠者，多以妻女出售，交易一就，任人调朋，不以为意。居东隅者，伊司律士，衣尼沙士，洼尔拉士，梭加尔士，金那士，左攀尼士等种，风俗言语略同。甫生子，以石枕头，经年始除去之，故其脑骨扁平。惟东南土著，与戈揽弥阿河口各种不同，察其土俗音语，似是由附近弥斯西比河迁至也。戈揽弥阿河之北岸，即弯戈洼岛，袤广百有五十里，林木葱茏，且多沙石，海涛冲激，其声如雷。居于斯者，食则海鱼，衣则兽革。此外尚有小岛，每岛即有一种类，各有头目，先有弥里士曾至其地，见其头目之屋约可容八百人，有饮食者，有坐卧者，仪躯粗莽，以人骨为饰。有库贮珍宝，其最大头目所辖。不过万有三千人，容貌原不恶劣，惟以赤土和黑沙涂面，令人望而骇恶。食则惟鱼，甚至以人为食，故市上贸易，多有人之手足〈（以上原本）〉。

卷六十四

○北墨利加洲内墨是可国〈（一作墨西哥，一作墨西哥原无今补）〉

《职方外纪》曰：北墨利加国，土多富饶，鸟兽鱼鳖极多，畜类更繁，富家畜羊，尝至五六万头，又有屠牛万馀，仅取其皮革，馀悉弃去不用。百年前无马，今得西国马种，野中生马甚众，又最良。有鸡大于鹅，羽毛华彩特甚，味最佳，吻上有鼻，可伸缩如象，缩之仅寸馀，伸之可五寸许。诸国未通时，地少五谷，今亦渐饶，新田斗种可收十石。又产良药甚多。其南总名新以西把尼亚，内有大国曰墨是可，属国三十。境内有两大湖，甘咸各一，俱不通海。咸者水恒消长，若海潮。土人取以熬盐，其甘者中多鳞介之属。湖四面皆环以山，山多积雪，人烟辐辏，集于山下，旧都城容三十万家，大率富饶安乐。每用兵与他国相争，邻国即助兵十馀万，其守都城，亦恒用三十万人。但囿于封域，闻人言他方有大国，土大君长辄笑而不信。今所建都城周四十八里，不在地面直从大湖中创起。坚木为椿，密植湖中，上加板以承城郭宫室，其坚木名则独鹿，能入水千年不朽。城内街衢宫室，又皆宏敞精绝。其国王宝藏极多，所重金银鸟羽。鸟羽有奇彩者，用以供神。工人或辑鸟毛为画，光彩生动。初国内不知文字，今已能读书，肆中有鬻书者矣。俗务农工，人尚尊贵，面目美秀。彼自言有四绝：一马，二屋，三街衢，四相貌也。旧事魔神，杀人以祭，或遭灾乱，则以魔嫌人祭少，故每岁辄加，多至杀人二万。其魔像多手多头，极其险怪，祭法以绿石为山，置人背于上，持石刀剖取人心以掷魔面，人肢体则分食之。所杀人皆取于邻国，故频年战斗不休。今掌教士人感以天主爱人之心，亦知事魔之谬，不复祭魔食人矣。其中有一大山，山谷野人最勇猛，一可当百，善走如飞，马不能及，又善射人，发一矢彼发三矢矣，百发百中。亦喜啖人肉，凿人脑骨以为饰，今亦渐习于善。最喜得衣如商客，与衣一袭，则一岁尽力为之防守。迤北有墨古亚刚，不过千里，地极丰饶，人强力多寿。生一种嘉谷，一岁可二熟。牛羊骆驼糖蜜丝布之类尤多。更北有古理亚加纳，地苦贫，人皆露卧，以渔猎为生。有寡斯大人性良善，亦以渔为业。其地有山，出二泉，稠腻如脂膏，一红一墨色。

《万国地理全图集》曰：默西可国，北连兼摄邦国，西南连巴拿马微地，东接默西海隅，西连大洋海。北极出自八度至四十二度，偏西自七十度至一百十七度，袤延圆方二百八十四万四千方里。与花旗国交界之地，乃平坦无木，遍处牧场，居民以牛羊为生。所有高山，大概六十丈，亦有出火之峰，屡次地震。亦有新山忽出，旧山隕落，江河不多，沿海港口有四。其天气不一，若自南至北，其冷热立变。民不勤劳，是以山内财币不出，运售他国者，独有乌木、红木、呀兰米与香料而已。其山出水银、铜、铅，亦有金，其最多者乃银。通计普天下所出之银，默西国居其三分之二。银矿厂共计三千座，所有每年银价值二千五百万员。中国之洋钱，大半由此国运出。是班牙未到其国时，居民颇向化，建庙筑坛，效物之像而画字，其国有土君，律例规矩与中国微似，今尚有大城之古迹，是班牙军侵其国而占据之。自乾

隆以来，每年出银千六百万员。其通商不多，每年六百万员，入出之货物价，乃其大概。嘉庆年间，佛兰西军与是班牙国争此地，居民不肯悦服新主，亦不愿服其故主，擅自专制。是班牙军攻之，众民效死鏖战而驱其暴。可惜国家未定，迭兴迭废，又与佛兰西国结仇，而卒求平。其国制度与花旗相似。其国家之公费，入不敷出，拖欠甚重。其居民分三类：一曰是班牙之后裔，实乃地主，其中亦有巨富素封之家。一曰土人，匾鼻大骨，以耕田度生，贫而好奢，好饮酒。一曰杂类，即白黑人等嫁娶所生。居民共计八百万丁。皆奉加特力教，惮劳好逸。英佛列国商贾，凿山开矿，因使费浩繁，其益少损重。此地分十五部，其国都居民一十二万丁。内有高屋巨宇，殿堂肃静，山川秀丽，柳杨相映。但因地势低，累次涨溢。亚加补罗可，乃西地大海口，昔时每年有吕宋大船，过海贸易，此时生意衰。安热里邑大殿堂，以金银妆饰，居民九万，敬十字架。乃东方之马头建于沙坦，船泊遭危，其通商甚盛，瓜他拉撒拉，近附银山之城。三十七年，所出之银，共万六千五百万员。居民七万丁。东半地称曰加里缚尼，实属沙碛，惟西北最丰盛，出各项水果。

其东北方连花旗国，系平坦土。所有花旗豪民，远游冒险，迁到此邦，勤力开垦而立其国，称曰特汲默西可。民不悦之，再三交锋，未分胜负也。麦西国南形势，危地马拉邦，昔归麦西哥之版图，今亦自立土主。产者牙兰米、乌红等木，金、银、药材、牛皮、靛饼，每年运出货价三百万员。山峻入云，时有地震。其居民与墨西不异，共计百九十万人口。其海滨英人入山伐木，务工者四千余人。所有巴那马微，地窄狭，故此智士设计开河。连东西洋大海，而造通中国之路。但因山硗硬，未知可否，若果能如愿，其利无穷。

《地理备考》曰：美诗哥国，一作墨西科。美里加州北区之西南，北极出地十六度起，至四十度止，经线自西八十九度起，至一百二十六度止。东至花旗、德沙二国，暨美诗哥海湾，西枕大海，南接瓜的马拉国，暨大海，北连花旗国。长约一万里，宽约三百里，地面积方约一百一十八万四千七百八十里。烟户约一京二兆馀口。地势中高边下，由东南而西北，冈岭层叠，峰峦参天，亘国中数千里，如人之脊。其中四火峰尤峻，总名曰烟山，即美理哥国之落机大山也。贯南北二州之地，随地异名。山之两面，平原甚广，河长者四，湖大者六。其地北境旷漫，有草无木，民以游牧为生。南广东饶瘠，而西膏腴，百卉繁生，果实皆备，土产五金、矾、煤、丝麻、蜡、蜜、水银、绵花、烟叶、甘蔗、胡椒、牙兰米，以及木材、香药。而大利则在于银，攻矿之厂，三千馀所。各国行用番饼，出于墨西科者三分之二。地气互异，海滨酷热难堪，内地温和。其地弥高，其热弥少，若高至四五百丈则有如芳春景象，人安物阜。倘或再高，气亦递寒，至于冰雪凝积。则数日间，四时景象，俱骈集焉。不设君位，国人各立官长，司理地方。朝内有正副首领，权理国政。所奉之教，乃耶稣公教也。初北州之地，自美理哥外，皆野番杂处，无部落，惟墨西科早建为国，有城邑，有坛庙，有王有官，肖物形而作字，有律例。有废城极大，云是千馀年前古迹，不知何代何名也。明正德中，大吕宋国遍据南北州，诸国地为藩属，亦侵据墨西科国，且以此国为各国之纲领。及嘉庆十五年，国人苦苛政，倡

变攻拒，十载始尽逐大吕宋，官兵自立国君。道光三年，国人复去王位，立官司理国政，如美理哥国之例。通国分十九部四郡：曰美诗哥，曰给勒达罗，曰瓜叔阿多，曰弥刷千，曰沙黎斯哥，曰萨加德驾，曰索诺拉，曰济华，曰都郎额，曰卓合回拉，曰新梁，曰达毛黎，曰桑卢意斯波多塞，曰委立古卢斯，曰布委巴刺，曰华沙加，曰济阿巴，曰达巴斯哥，曰千加敦其府，曰加里佛尼，曰新美诗哥，曰达拉斯加刺，曰哥黎麻。国都建于德斯古各湖西平原中，屋宇宏峻，风景清雅，街衢阔直。学医各院毕备，为本州富丽之一。其通商冲繁之地，有五大埠。

《地球图说》：麦西可国，东南西三面都界大海，东北界花旗国。百姓约有七百万之数，都城内民二十万。人分三类：一大吕宋后裔。二土人。面带棕色，鼻扁颧高，耕田为业。三杂类，即黑白二种，交相嫁娶而生。地势沿海低下，中有高山，积雪不消，内有火山，不时地震。北方旷野，牛羊是牧，马非家畜，任人拘执。道光二十七年，与花旗国决战，近日盟好矣。是国昔属大吕宋，嘉庆十七年，民心不服，群拒吕宋而自立为国。所宗天主教，国内黑人悉以捕鱼为生。天气最冷，五谷难出，故独垦海滨之土，而内地荒芜。五曰新本土威，在海边，袤延方圆七万一千方里。其江千五百里，皆深可行船。遍地肥腴，民不耕田，惟入林断木，春水浮送出港，卖行价银，即饮酒费尽而归。大城邑皆在江边，通商以木料为最。每年英民到者六千丁，还有间处给寓数十万丁。其会城曰约翰，乃最大之马头，与英国通商。六曰散约翰岛，乃老兵所移之处，出麦谷，可补邻地之缺。七曰新著大岛，袤一千三百里，延九百里，居民七万二千丁。乃鱼鳖之藪，夏时渔舟蚁集。兼种荷兰薯蔬菜，不植五谷，产鱼最丰。居民富裕，佛兰西之氓，猖獗屡叛，英官尝派兵讨之。

案：墨西哥有烟山，自米利坚西界来，称落机大山，因火峰最多故也。自危地马拉以南，至南亚默利加之极南，皆曰安达斯大山，长约一万馀里。

《外国史略》曰：麦西可国，北极出地自十五度，至三十三度，广袤方圆七万六千里，长六千里，阔自四百六十里及二千八百里。南及东洋海，连危亚地马拉地，北界花旗，东及海港，西及大东洋海。明武宗正德二年，是班亚人至此，尚未知其地之广大，八年复遣精锐兵数百深入，震以火器，降服其国，居民颇向化。有金银饰物，亦通文字，原系日本国难民留此之苗裔，今难详考。是班亚王贪其山多金银，设官管理，亦派师船防范他国。每年掘金银矿约一千三百万圆，大半运入是班亚，其居民屡缺用。道光元年，居民见花旗国自主开创，尽力效尤，驱除是班亚人，连年拒战。道光四年，遂自立国，合十五部为一地。虽是班亚屡图复据，因舟师不能直入而止。但麦西哥人不明政令，废立自由，二十馀载，臣民反复无常。掘矿虽旺，贼盗横行，白日劫掠，虽效花旗国之自强，而无花旗国之法度焉。其国海滨少港，船无湾泊，其小船入处浅窄，线港曲折，大碍通商。然遇有敌艘来侵，亦幸有此阻碍。中地高于海六百丈，其山峰高一千七百丈。北地高坦，其土硗确，多烟瘴，间有沃壤，则岁收百倍。内有四大湖，惟一湖水咸，有火山，时时地震。有银山，

每年掘出约二千三百万圆，金二百万圆。英吉利、日耳曼民皆争掘之。又出药材、颜料，所产牙兰米，岁值百五十万两，今亦消减。俗好骑马，执天主教，惟僧是听。居民亦务农织布，而其他物，必由外国运入。道光四年，运出之货一千二百万圆，运入者四百四十万圆，今渐加增。银局所铸印之银钱，每年约一千七百万圆，此时减少三百六十馀万圆，各商所出本银约七百七十万两，至今未偿，故公班衙多散。麦国之都城，居民十四万，在广谷近湖，街屋煌耀，甲于通州。东边海港曰他巴哥，古时与亚西亚，俄罗斯通商。今所收之税，每年约四十万圆。由中国所织之丝缎，每年有数船到贵里他罗，在大谷间。居民三万五千丁。附近此地，有古迹，亦昔时广邑，殿屋甚宏，不知何国何时所创。故墨西哥国，自古号为富强文物之邦，其开创在花旗国之前。又布益拉居民九万口，其礼拜堂最壮丽，乃是班牙国人所建。其西方港口，乃全地之大市，为西国云集之埠。附近炮台，乃是班亚所筑，费银二千八百万两。然地有烟瘴，居人易病。国地分十九部，东海边之加利弗尼，居民甚罕。其半地及禺加坦半地在东边，各有土酋。每八万人，择一贤士会议掌政令，麦西哥选首领以摄其权，公帑所收者，九百三十七万五千圆，所费者，一千八百万圆，多由他国借银，欠项往往不还。军士共计三万二千丁，武费九百六十万员，水师费一百三十万圆。

案：北墨利加形如飞鱼。西北有高山曰落机，自西北而东南，东偏有山，曰押罢拉既俺。有大河，曰密士失必，如中国之黄河，回环万馀里。其极北为冰疆，次南休仑湖，以北为英吉利荒地，中曰米利坚，三十六部，膏腴地也。其西南德沙国，德沙之西曰麦西哥。又南一线弯环，曰危地马拉国，英吉利地。西北为俄罗斯地。麦西哥之西北，米利坚之西，曰戈揽弥亚河。其北为阿里颜达多里地，其西有弯戈洼岛。其东曰威斯顿底特力，又南曰威斯顿达多里，皆因底阿土番也。新地者，湖之东也。农地，湖之西北也。花地，花旗国也。

○北墨利加洲西南四国〈（原无今补）〉

《职方外纪》曰：北墨利加之西南，有花地富饶，人好战不休，不尚文事。男女皆裸体，仅以木叶，或兽皮蔽前后，间饰以金银纓络。人皆牧鹿，若牧羊然，亦饮其乳。有新拂郎察，往时西土拂郎察人所通，故有今名。地旷野，亦多险峡，稍生五谷。土瘠民贫，亦嗜人肉，又有拔革老，本鱼名也。因海中产此鱼甚多，商贩往他国，恒数千艘，故以鱼名其地。土瘠人愚，地纯沙，不生五谷，土人造鱼腊时，取鱼头数万，密布沙中，每头种谷二三粒，后鱼腐地肥，谷生畅茂，其收获倍于常土。又有农地，多崇山茂林，屡出异兽，人强力果敢，搏兽取皮为裘，亦以为屋。其缘饰以金银为环，钳项穿耳。近海有大河，阔五百里，穷四千里，不得其源，如中国黄河之属〈（按花地农地近皆开垦，即弥利坚各部明时未有也）〉。

○北墨利加西方三国〈（原无今补）〉

《职方外纪》曰：北墨利加西为既未蜡，为新亚比俺，为加里伏尔尼亚。地势相连，国俗略同。男妇皆衣羽毛及虎豹熊黑等裘，间以金银饰之。其地多大山，一最大者，高六七十里，广八百里，长三四千里。山下终岁极热，山半则温和，山巅极冷。频年多雪，盛时深六七尺，雪消后一望平涛数百里。山出泉极大，汇为大江，数处皆广数百里，树木茂盛，参天蔽日。松实径数寸，子大于常数倍。松木腐烂者，蜂辄就之作房，蜜莹白味美。采蜜者预次水边，候蜂来随之而去，获蜜甚多。独少盐，得之如至宝，相传飮之不忍食。狮、象、虎、豹等兽，动辄成群，皮亦甚贱，雉有大者，重十五六斤。地多雷电，树木多被震坏。有小鸟如雀，于枯树啄小孔千数，每孔辄藏一粟，为冬月之储。

○北墨利加洲西北诸蛮方〈（原无今补）〉

《职方外纪》曰：北墨利加，地愈北人愈野。无城郭君长文字，数家成一聚落，四周以木栅为城。其俗好饮酒，日以报仇攻杀为事，即平居无事，亦以斗为戏，而以牛羊相赌。凡壮男出战，则一家老弱妇女，咸持斋以祈胜，战胜则家人迎贺，断敌人头以筑墙。若欲再战，临行，其老人辄指墙上髑髅以相劝勉，其女人则砍其指骨，连为身首之饰。人肉则三分之，以一祭所事魔神，以一赏战功，以一分给持斋助祷者。若获大仇，则削其骨长二寸许，凿颐作孔，以骨栽入，露寸许于外，用表其功，颐有树三骨者，人咸敬畏之。战之时，家中所有宝物，皆携而去，誓不反顾，以期必胜也。其尚勇好杀如此。盖由地本富饶，人家星列，又无君长官府以理法，断其曲直，故小小争竞，便相攻杀也。此地人多力，女人亦然。每迁徙，凡什物器皿粮糗子女，共作一驼负之而行，上下峻山，如履平地，坐则以右足为席。男女皆以饰发为事，首饰甚多，亦带螺贝等物，男女皆垂耳环。若伤触其耳及环，则为大辱，必反报之。所居屋卑隘，门户低甚，以备敌也。昔年极信邪魔，持斋极虔，斋时绝不言语，一日仅食菽一握，饮水一杯而已。凡将与人攻战者，或将渔猎耕获者，或将宴乐喜饮者，或忽遇仇家者，辄持斋，各有日数。耕者祀兔与鹿，求不伤稼。猎者祭大鹿角以求多获。鹿角大者，长五六尺，径五六寸也。有大鸞鸟，西国所谓鸟王者。巫藏其干腊一具，数百年矣。亦以为神，猎者祭之。巫觋甚多，凡祈晴雨则于众石中寻取一石，仿佛似物形者，即以为神而祭之。一日不验即弃去别求一石，偶值晴雨，辄归功焉。岁获新谷，亦必先以供巫，其矫诬如此。近欧罗巴行教士人至彼，劝令敬事天主，戒勿相杀，勿食人，遂翕然一变。又强毅有恒心，既改之后，永不犯也。俗既富足，又好施予，人家每作熟食置于门首，往来者任意取之〈（即弥利坚边地各土蛮）〉。

卷六十五

属俄罗斯者，在英吉利西，三面皆海，东隅与英连界，两国互争，迨千八百二十五年〈（道光五年）〉，始定疆界。其地与俄罗斯之亚细亚洲东隅中隔一海，对渡仅五十二里。幅员虽百有三十万方里，而部落惟监札加一区〈（一作甘渣甲，音译之殊在阿细亚之极东）〉。馀皆海中岛屿，人迹罕至。常时火焰，交秋即冰，土多不毛。人性驯良，不犷狃，窟地而居，覆以土，每一巢穴，人至百馀，俨若村落。前此麦厘舟至其地，登岸游行，忽陷地中，见有无数之人，在内工作。大抵居山者，衣食于禽兽，滨海者则捕鱼为生。其各岛之人，皆伊斯归毛士种类，习俗刚柔不齐。中有铜岛高千有三百丈，铜矿甚多，至今无人开采。惟附近居民耕种工作技艺，日渐精巧。邻近有戈底阿岛，长六十里，岛之北有谷港，谷港之前有尖沙，曰比士威林沙。居民肥短，头大面宽，鼻准如钩，各刺鼻唇，嵌饰珍宝。毳衣善渔，其渔艇多裹以鱼皮，俄罗斯人亦往贸易。第港口礁浅，此外小岛尚多，其最大者，有渣治达岛，阿弥腊兀岛，港汊纷歧。前人汪戈瓦洼至此，周历博访，欲寻一河直达赤城湖或达阿兰底海，竟不可得。渣治达岛内居人，多自俄罗斯迁至，谓之麻腊甫种类。新垦一区，曰纽阿占牙，内居千人。庐舍炮台，皆用木植。多产皮毳，海舶赴粤者，皆购焉，岁得值约银二十万员。俄罗斯近年所据之摩底牙港口，形势虽不甚长，然与纽加兀科海岸相连，故贸易亦蕃庶，《地球图说》：俄罗斯属国，在北美利加州者，东界英属国，南西两面都界大东洋，北界北冰洋。百姓约五万。其地西北多冰雪，终年不消，熊、野兽极众，遍地草木，人迹稀少，农事不兴。所居或房屋，山地多穴处。常与亚细亚人通商，皮货貂鼠海虎为多。盖此州极西北之一隅，名监札加〈（一作甘查甲）〉与亚细亚之极东北隅，仅隔海港五十馀里，故从彼地跨而有之。

《地理备考》曰：北州之地，隶大吕宋国兼摄者，一固巴岛。在亚美里加州北区之南，纬度自北二十度起，至二十三度止，经度自西七十六度起，至八十七度止，长约二千七百里，宽约五百里，烟户七亿四万馀口。冈陵重叠，河流贯沃。其长者曰高都，曰基内斯，曰挨又名黑人河。田土腴腴，产五谷、五金、水晶、铁石等物，地气南方燥热。地分三府，曰西府，首邑名合瓦那，建于北方海滨，泊所稳便，舳舻云集。曰中府，首邑名三达马里。曰东府，首邑名三的牙额。

一波尔多黎各岛，在亚美里加州北区之南，纬度自北十七度五十四分起，至十八度三十分止，经度自西六十八度起，至七十度止长约五百里，宽约一百五十里，地面积方四千五百里，烟户三亿馀口。由东而西，冈陵延袤，地气温和，生殖蕃衍，地分七县。

《地理备考》曰：本州之地，隶大尼国兼摄者，一曰义斯兰的亚。在亚美里加州北区之东北，纬度自西十九度四十分起，至六十六度四十四分止，经度自西十九度四十分起，至二十八度五十五分止，四面枕海，长约九百里，宽约七百五十里，地面

积方三万九千里，烟户五万馀口。乃北冰海大岛也。冈陵叠起，火山不一，湖河众多，贯彻沃润。河之长者曰维达，曰的科尔萨，曰合尔么萨，皆在南方。曰拉加刺，曰布鲁阿，皆在东方。曰挨沙拉，曰斯加尔方的亚，曰若古尔曰斯加巴达，皆在北方。湖之大者曰迷瓦，曰丁瓦拉株，曰非斯各株，其中有常吐热气者。土瘠惟产铜、铁、铅、玉、玛瑙、水晶、硫磺、纹石等物。地气严寒，不便居栖。地分三州，曰南州，首邑名勒给惟克。曰西州，首邑名斯达奔。曰东北州，首邑名马都鲁瓦。

一曰哥罗英兰的，又名襄的麻。在亚美里加州之东北，纬度自北五十九度三十八分起，经度自西二十度起。均未详所止，东北枕冰海，西南界巴非英海，长约六千里，宽约二千里，地面积方一百一十一万里，烟户二万四千馀口，多寒少暑，偶热则非常燄烈。土瘠产薄，人皆业渔。地分南北，南邑首名如列尼沙合，北邑首名厄日德斯。

一曰安的列斯，中有三岛。一、三达古如斯，长约八十里宽约三十里。一、三多美，长约六十里，宽约三十里。一、桑若汉，长约六十里，宽约三十里。皆在亚美里加州北区之南。地气温和，居栖甚便，土廩产裕，首邑在三达古卢斯岛中。

《地理备考》曰：本州之地，隶厄罗斯国兼摄者，有陆地，有海岛。陆地曰厄罗斯，美里加，在此州北区之西北，纬度自北五十四度四十分起，至七十五度止，经度自西一百三十三度起，至一百七十度止。东连新北勒达尼，西枕白令海，南接大海，北界北海，暨白令海峡。长宽皆约四千馀里，地面积方约四十万里，烟户五万馀口。峰峦叠耸，冰雪凝积，凜冽难禁，地饶产艰。共分九部，曰义斯基茂，曰基德内，曰朱克济，曰哥乃给，曰给乃塞，曰朱加至，曰乌加达世米于德，曰古卢至，曰新加里佛尔良。首郡名昔德加，建于海岛之中。又有四岛，分四部。地气严寒，田土硗瘠，以渔为业。

《外国史略》曰：俄罗斯藩属地，在此州者为西北边雪地，并所属屿。州广袤二万四千四百五十方里，民二万一千口。分三部，曰实查，曰木改略，曰甲若。又有冰屿曰雪腊加，曰甲查，曰古佳等地。其都城曰新天使魁，小邑也。俄人在亚西亚东北，恒以猎貂鬻其毳皮为生，后东貂渐减，遂到北默利加开埠，而产物不丰，有名无实，每年运出惟獭皮海虎皮甚多。

《外国史略》曰：英吉利藩属地在此州者，曰上下加那他。北极出地自四十二度至五十七度，偏西自六十一至八十一度，长四千六百里，阔约一千里，广袤方圆，万四千二百里，居民百十四万。北至冰雪地，南连花旗国，东连新本西威部及大西洋海，西及花旗国，并荒地。其山自海滨，入内地千馀里，中多平坦，西则密林。罗陵士河岸肥沃，居民聚集，以为乐国。此地湖大如海，河曰罗陵士，长四百五十里。地多材木、五谷、烟、麻、豆，及各絨毳、皮货。土蛮游猎无定，民大半以猎为

生。初佛兰西开此地，后英人攻据之，于乾隆年间，分为上下部。地广民希，天气甚冷，遂招远氓开垦。至今下加那他部，地未开垦者，只四分之一。纳饷银百四十万圆，守兵三千，民壮九万四千。上加那他部，未开垦者五分之一，纳饷七十一万圆，公费均同，守兵二千，民壮五万。此部分五郡，二百有八州，一百六十县，居民六十万。佛兰西苗裔，居五分之四。近十馀年所入新氓，约三十万，人户日增。都会曰贵北城，居民四万，在罗陵士河滨，通商大市也。运出材木不可胜数，门地屿在罗陵士河之中，亦通商。大半崇天主教，新来之氓，奉旧正教。伐木开垦，每年往来之船，约载二十七万吨，运出之货，每年值银六百万两，运入者值银五百四十万两。上加那他，分二十六郡，二百八十县。都会曰御城，最兴旺。上部居民久据广地，与下部匪徒结衅。抗英官宪，连年交战。花旗之民又助之，幸良氓助兵，弹遏其乱。英民谋食者多迁此开垦焉。

英人所据北亚默利加各地。东北曰拉巴突土民甚鲜，终年冰雪，设教师以化之。新开之地，广袤千六百六十里，居民九万，与拉巴突隔一海峡，地多泽潴，无产物，惟多鱼。英船每年运干鱼出六十万石，价三四百万员。水手二万，亦捕鲸鱼海犬，而售其皮骨与油。惟地饶气冷，食物必自外运入，居民产业，价值银约三千七百五十五万圆。每年利银千三百二十七万圆。运进之货五百八十一万圆，运出者五百六十二万一千圆，纳饷九万八千圆，公费十一万九千圆。都会曰圣纳翰，系通商之埠，居民八千。道光二十六年，火灾焚烧殆尽。益瓦地岛，广袤方圆一百里，居民四万三千，地丰盛。每年运入之货四千九万圆，运出者二十二万四千圆，纳饷银六万三千圆，公费银七万圆。新苏各兰，并化顿地嘴，广袤方圆六百七十里，兆顿一百十二里，居民十六万。地饶湿，出树木石炭，及海鱼等物。每年运入之物七百七十九万圆，运出者六百七十七万圆，纳饷银六十六万五千圆，公费七十一万四千圆。守兵八百，民壮二万三千。都会曰合里法，濒海通商，居民万六千。新本土威，广袤方圆千三百五十里，居民十一万。地多密林，民住河边，运出多材木，河流广大，往来便之。运进货价四百二十万圆，运出者二百九十九万圆，纳饷银四十七万六千，公费二十六万六千圆。民壮一万二千，土人本少，英国招氓辟荒，与西国无异。其总帅驻下加那他城，各地派有官职，然百姓亦自择乡绅，会议行事，英国派兵船巡驶，以保护之。

案：英夷属地，跨落机大山东西，居米利坚麦西哥之北，俄罗斯之东，东极胡孙海隅，地广惜不毛尔。

《地理备考》曰：北州之地，隶英吉利国兼摄者，曰新北勒达尼，曰北极之地，曰北尔慕达，曰安的列斯，曰卢加亚斯，曰古牙那，曰马加良英斯，分序如左。

新北勒达尼，在北州之北。纬度自北四十二度起，至七十八度止，经度自西五十三度起，至一百四十三度止。东枕巴非英海，暨达委斯海峡，西接大海，暨厄罗斯亚美里加地，南连花旗国，北界冰海。长约一万三千里，宽约七千里，地面积方四百

六十七万七千里。地分六境，一名下加那达，一名上加那达。两地长约二千里，宽约一千八百里，烟户一兆二亿馀口。湖河不一，贯彻沃润，河之长者三，湖之大者二。地饶产丰，地气虽寒，不害居栖。土产五金、煤、水银、烟叶等物。一名新布伦瑞克，南北八百里，东西六百里，地面积方三万七千五百万里，烟户一亿六万馀口。平原覃广，丛林稠密，湖河无几，土产谷果木料。一名新斯哥西亚，长约千里，宽约三百五十里，地面积方一万八千里，烟户一亿七万馀口。沿海饶瘠，北地宜稼，湖河众多，土产铜、铁、煤、滑石等物。一名桑若汉群岛，长约三百里，宽约百里，烟户一万二千馀口，田土腴腴，物产丰饶。一名德诺瓦，长约千里，宽约八百里，烟户七万馀口，崖岸峭立，沙滩罗列，冰雪凝积，地多不毛，丛林稠密，土产铁、煤、纹石、木料、皮革等物。

北极之地名分三境。一名北德温，纬度自北七十五度起，至七十七度止，经度自西八十度起，至九十五度止，地多寒冰，人迹罕到。一名北日尔，纬度自北七十五度起，未定所止，经度自西九十七度起，至一百十七度止。地多海岛，大者则四，坚冰凝积，惟夏稍消，可通舟楫，人烟寥落。一名巴非英巴利，在巴非英亚德孙二海之间，中多海岛，地极寒冽，土产甚鲜，人烟萧条。

北尔慕达岛，在亚美里加州北极之东，纬度自北三十一度五十五分起，至三十二度二十分止，经度自西六十四度起，至六十五度止。大小四百岛。大者曰北尔慕达，曰桑若尔日，曰桑达威，曰古卑尔，曰索美尔塞。首邑在桑若尔日岛中。泊所稳便，舟楫辐辏。安的列斯岛，在亚美里加州之中，纬度自北十度起，至二十七度五十分止，经度自西六十二度起，至八十七度止。其中岛屿大小不一，为英吉利兼摄者，惟十有八。地气炎热，田土腴腴，谷果药材，靡弗蕃衍。首邑名那密，在波罗维敦斯岛中，贸易兴隆，商贾云集。

卢加亚岛，又名巴合麻。在亚美里加州北区之东南，纬度自北二十度起，至二十八度止，经度自西七十二度起，至八十二度止，大小五百岛，大者十四。地气温和，田土肥饶，别有古牙那马加良英斯。

《地球图说》：英吉利属国，在北美里加州者，东界西洋，南界花旗，西界俄罗斯属国，北界冰洋。专猎野兽，故皮毳为重。有大城二：曰贵北，曰门答亚利。大江二。土产面粉、牛脯、皮货、木料、煤炭，所进之货火酒、火药、毡毯。东方有二岛，名新著地，新苏各兰。专捕兽渔鱼以为生计，荒寒不毛。北墨利加洲内，英吉利属地最大，亦最饶薄也。

北墨利加之英吉利新地，东界阿兰底海，西界俄罗斯属地，南界育奈士迭，北界冰海。本佛兰西人也。始耶稣千四百九十七年〈（明宏治十年）〉，佛兰西人操舟由鲜罗伦士河直至各地，辟土兴屯，经营百馀载，始创建部落，曰新佛兰西。设埠通商，又经百载，地辟民稠，当耶稣千有七百年〈（康熙三十九年）〉，英吉利人始

来其地，横行割据，遂构兵戎自千有七百五十六年后〈（乾隆二十一年）〉，血战者八年，竟为英吉利所夺。是时北墨利加洲已全并于英吉利，既而横征暴敛，各部咸怨，誓众倡义，尽逐英吉利官吏，自合并为育奈士迭国。并英吉利所自垦之部落，亦皆叛英而归育奈士迭国。于是英人所有者，仅佛兰西所旧垦之阿巴加那达，罗阿加那达，纽墨兰士垫，那洼士葛底阿纽方兰岛，勃林士遏岛，甲墨里顿岛，七部落而已。此七部仍佛兰西旧制，徭赋轻简，故免于背叛。政事与育奈士迭略同，每一大部落，立总领一人，冈色尔一所，俱由国王敕授。甘文好司一所，即育奈士迭所谓里勃里先好司者也。其官亦用育奈士迭国之例，会推公举，四年更代，其推举之例，凡部人岁纳钱粮，至时令四十者，或客民纳钱粮至五棒者，或收租息至十棒者，皆可举人。罗阿加那达，向设总领一人，冈色尔设官三十四人，甘文好司执事八十八人。阿巴加那达向设副总领一人，冈色尔设官十七人，甘文好司五十人。一切事宜，由甘文好司与冈色尔会议，复经总领核准施行。亦有必由国王敕准者，亦有必由国中巴厘满各官议准者。罗阿加那达所行法律六条，一英国巴厘满议准颁行之例，一向来所定旧例，一加那达相沿旧规，一佛兰西王国旧颁示谕条款，并罗汶国之法律，一英吉利所定之例，一总领偕冈色尔所定之例，一本部落内冈色尔甘文好司议定之例。有大狱，方用主理官，参酌英吉利、佛兰西两国法律而行。若常日行事，毋须主理也，所设主理之人，英吉利、佛兰西人各半以昭平允。阿巴加那达，全用英吉利之法律。若纽墨兰士垫，那洼士葛底阿，勃林士遏岛，纽方兰岛，甲墨里顿岛五部落，亦设总领各官，法律如阿巴。此外尚有马蒙勒士岛，孤悬海角，为罪人遣流之所而已。钱粮以贸易之税为正，供田赋甚少，其附近鲜罗伦士河之田，前属佛兰西时，分给各官，佃种收息。近日英吉利改归土民自耕，罗阿加那达遂收税饷银约八十万员。支給官禄公费约银五十万员。阿巴加那达，因修路浚河亏欠银约三四百万员。那洼士葛底阿，岁收税饷银约四十七万员，支发各款公费银五十三万四千三百八十员。纽墨兰士垫，岁收税饷银约三十四万员，支給各款公费银十九万五千员。纽方兰岛，岁收税饷银八万员，支发各款公费十三万五千员。勃林士遏岛，岁收税银三万八千四百员，支发各款公费银六万八千七百九十五员。综计历年税饷支应一切，无事则贍，有事则匱，故于千八百三十四年〈（道光十四年）〉，英吉利国王津贴两加那达部落文事银三万员，武事银百二十万六千员，津贴各部落文事银十万员，武事银约七十万员。居斯地者，面长色黝，准高唇厚，睛黑而灵动，俗尚礼貌，虽农夫隶仆相遇诸途，莫不免冠为礼。由先日在此开地者，多佛兰西贵人与官吏兵卒之后裔，故驯良敦睦，无犯上作乱之习俗。奉加特力教者多，波罗特士顿教者少。故每一部落，建立两教庙宇。并有尼庵，宅舍朴素，以泥涂木为墙而垩之，屋上先覆木板再铺石板。楼仅一层，皆无峻宇，终年有洒无扫，故埃尘污积，近年始学欧罗巴之洁净。悬画卉为饰，衣履亦同。英吉利食多豕肉，逢斋戒则以鲜鱼蔬菜为素，嗜酒及茶，无茶则以架飞豆汤代之。河最长者，鲜罗伦士河，次则荷多洼河，皆长千有馀里。此外若萨归尼河，额列河，先毛里斯河，马达瓦斯河，特连河，玷士河，敖西河，里治流河，佛兰西士河，召特里河，先阔河，里士底俄支河，缅甸河，比地千底嘴河，苏比那加底河，洼里河，厘洼步尔河，均不及鲜罗伦士、荷多洼两河源流之远。湖则与育奈士迭国交界。有苏比里阿湖，伊里湖，

休伦湖，在境内者则有安达厘荷湖，召特里湖，深戈湖，额兰湖。而诸湖之中，以苏比里阿湖为最巨。周三万有五千丈，产最稀，仅有稻谷、麦、烟叶、大麦面、木材、牲畜。

阿巴加那达，犹华言上部落也。东界罗阿加那达，南界育奈士迭国，西界荒芜，北界冰海。领小部落十有八，其首部曰若；又曰多伦多。

罗阿加那达，犹华言下部落也。东界阿兰底海，南界育奈士迭国，西界阿巴加那达，北界荒地。领小部落二十有六，其首部曰龟麦。

纽墨兰士垫，东界勃林士遏岛，南界阿兰底海，那洼士葛底阿，西界育奈士迭国，北界罗阿加那达。领小部落十有四，其首部曰佛里达力顿。

那洼士葛底阿，东界甲墨里顿岛，西南俱界海，北界纽墨兰士垫，勃林士葛岛。领小部落十有七，其首部曰哈里法士。

甲墨里顿岛，在勃林士遏活岛之东，那洼士葛底阿之北，领小部落三，其首部曰西尼。

勃林士遏岛，在纽方兰之东，那洼士葛底阿之北，领小部落三，其首部曰查罗氏当。

纽方兰岛，在甲墨里顿岛之东北，领小部落二，其首部曰鲜闰士。此外西北边地，尚有因底阿人所居未详。

马蒙勒斯岛，在大海之中，距弥利坚东岸六百里。小岛环之，约有四百，周围礁石，易于防守，而难于通舟。英吉利人于千有六百十二年〈（明万历四十年）〉，始往居之，当英国内乱时，土民多迁此避祸，有诗人注腊尔者，览岛峤之幽胜，触景题咏，流播海邦，故各岛多以诗得名。岛中地暖而不炎溽，草木四时葱郁不凋，鸡犬桑麻，不通外境，风泉云物，四顾闲寥，可为避世之乐郊。然土产仅木棉，无他货，故舟楫不盛，地旷民稀，遂为国中流人所戍矣。渣治首部落也，为各官治所，亦不甚广，仅如大村落〈（原本）〉。

《万国地理全图集》曰：北洲内英国藩属之地，土广人稀，北至冰疆，南连花旗国，东西及大洋海，北极出四十度至五十度。其地大半平坦，江河又多又长。其最长者称曰老林，暨以利翕大罗胡仑之湖也。海港罗布，其西方林木深邃，内多熊、狼、野兽。土人以毳皮出市。又产木料，可造船，每岁卖与英国价银几百万两。海滨近新著岛，鱼鳖如沙之多，夏时簇拥海面，不胜其数，各国渔船云集，捕而咸之。每年五谷、木料、皮、鱼各项所运出者，计价银八百万两，运进货价银九百九十万

两。民户一百二十一万丁。年年有英新氓进地，开垦伐木，故数年又可倍其人户也。其地有两大部，曰上下加那他。其上部袤延圆方四十二万三千方里，其河涌急滩溜瀑布飞流，即支瀚内千有馀洲，忽然江湖之水，汇集急流，到岸白浪掀天，忽而涸落数十丈，令人惊骇无已。其会城曰贵北，英民多迁其地，辟阡陌，垦荒地，不期成富。其下部，昔乃佛兰西国之新地，居民亦本出其国，尚存礼仪簪缨之族，全崇天主教，设寺建观，不务文，好歌舞。其会城曰门得亚利。三曰新鲜各兰，乃半地，天气最冷，自十月至三月，白雪满地。出铁、铜、石炭，其海中鱼亦繁多，居民安分。其都曰哈勒法，商船往来之市。还有大港口，但城邑颇少，通商亦微，每年入国帑银百六十万两，公费银百十八万两。四曰北敦头，虚悬海中，内有海港，民为奴仆，土产金少银多，铜、铁、铅、水银、菴谷、绵花、白糖、牲畜、靛青、牙兰米等物，居民多在南方，少在北方。

卷六十六

◎外大西洋

○北亚墨利加南境德沙国危地马拉国

《瀛环志略》曰：得撒，一作德沙，又作特扱，又名费勒多尼亚，在墨西哥之东，米利坚之西南，南面距海，长广皆约千里。地平如砥，田土极腴，草木畅茂，谷果皆宜。巴拉窝河由此入海，地气温和，烟户尚稀。奥草丛林中有瘴气，旧本墨西哥旷土，西班牙据之，米利坚贫民麋至，后遂叛西班牙，而附于墨西哥之卓哈回拉部。道光九年，又叛墨西哥，征之六年不服，乃听其自立国。无国王，惟择官司理事，土产木料为多。

《地理备考》曰：德沙国，又名费勒多尼，在亚美里加州北区之中。北极出地二十七度三十分起，至三十四度止，经线自西九十六度起，至一百零六度止。东至花旗国，西连美诗哥国，南接德沙海湾，北界花旗、美诗哥二国。长约二千馀里，宽约六百馀里，地面积方十七万一千五百里，烟户三亿二万馀口。西方间有冈陵，东南北一望平原，风景清旷，有河曰巴刺吾，又名北河。暨萨北那巴刺索哥，罗拉多奴耶塞德磷达的等，乃河之大者也。田土极腴，金石、草木、五谷，所产甚繁，地气温和。惟丛林稠密，中藏瘴气，远人易病。不设君位，庶民自推官长理政，所奉之教，乃罗马天主教也。技艺庸拙，贸易萧条。康熙三十年，为吕宋国人占据，迨美诗哥国不服吕宋时，本国接踵相继垦地，以民稀未能自立，故附于卓合回拉地合为一部。道光九年，国人起义，屡败美诗哥国之兵，越六载，遂自立为国。通国分二十七邑，曰阿刺巴麻，曰巴刺塞里，曰阿罗拉多，曰古曼治，曰哥里牙，曰公萨勒，曰阿黎斯布，曰厚斯敦，曰倭斯卑，曰日非勒孙，曰刺巴加，曰黎卑尔的，曰麻德科尔达，曰迷郎，曰迷兰，曰米那，曰那哥多士，曰勒黎委尔，曰勒夫日约，曰萨比那，曰三达古斯的音，曰三当多尼亚，曰桑非里卑，曰桑巴的黎西约，曰达那令，曰达拉委，曰瓦盛敦。都城名奥斯的音，建于巴刺索河滨，商贾云集，与后斯敦、卑沙尔二城，皆通商冲繁之地也。

《地理备考》曰：瓜的马拉国，在亚美里加州北极之南。其国土在北极出地八度起，至十七度止，经线自西八十四度四十三分起，至九十六度四十分止。东枕安的斯海，西界大海，暨美诗哥国，南接大海，北连美诗哥国，暨安的列斯海。长约三千六百里，宽约一千里，地面积方四十万里，烟户一兆六亿五万馀口。地势平原居多，中高边下。有安达斯山，由东南直达西北，峰峦叠起，火山甚众，有昼夜吐火不熄者，有或吐或熄者。湖河不一，河之长者八，曰桑若汉，曰么刺瓜，曰鸣卢阿，曰阿罗曼，曰波挨斯，曰科尔佛，曰苏麻新达，曰牙勒。湖之大者三，曰尼加拉瓜，广约一千五百里。曰良，曰阿的丹。土产谷、果、金、石、禽、兽、鳞介、木料、颜料、药材、香料、珍珠、琥珀、云母等物。地气互异，东则温和，西则焔热。

地多震动，每有不虞。不设君位，各立官长理政。所奉之教，乃罗马天主教也。技艺粗疏，贸易淡薄，本国昔为吕宋国兼摄，迨美诗哥不服吕宋时，本国亦接踵自附于美诗哥，迨美诗哥国君被废时，本国亦背之而自立国，不归统属。越十五载，国人会议将现在五部，改号五国，大小不等，民数不一。

一瓜的马拉国，长约一千四百里，宽约五百里，京都名新瓜的马拉，建于高厂平原之地，地气和，田土腴，百货骈集。

一桑萨尔瓦国，地面积方约有三万七千五百里，都城离瓜的马拉国约七百里。土饶产丰，地气炎热，火山甚多，技艺贸易皆盛，其通商冲繁之地五处。

一洪都拉斯国，长约一千二百五十里，宽约五百里。户口寥旷，地气湿热，田则膏腴，都城建于乌卢阿河滨，其通商冲繁之地三处。

一尼加拉瓜国，东西相距，南北相距皆约百八十里，烟户约十万馀口，气温土沃，都城建于高原，其通商冲繁之地六处。

一哥德黎加国，东西六百里，南北四百里，烟户约五百馀口。气温土腴，都城建于平原，其通商冲繁之地，一名加尔达额，一名波卢加。

《地球图说》：跨的马刺国，又名危地马拉邦。东南西三面都界大洋，北界麦西可国，百姓约有二百万，都城名跨的马刺城，城内民六万。天气较麦西可国更热，以地当赤道之故也。内多火山，不时地震。昔系大吕宋属国，今亦自主。风俗土产，与麦西可国相似。

《地球图说》又曰：北洲海岛，在跨的马刺国东面，隔海甚远，海岛约二十馀。天气和畅，至秋遇西风，则水坏庐舍。内有三大岛，曰苦伯岛，海低岛，热美加岛。其苦伯之岛，形势穹穹，中有高山，内有火山，不时地震。但大半属英国，其余属大吕宋，并佛兰西。百姓统有三百万之数，半述耶稣，半述天主教，其人九分黑孖，一分面白。土产白糖、冰糖、架非、酒、蔞、百果、诃子、绵花等物。

《外国史略》曰：危亚地马拉国，分十五部，昔属麦西哥。道光十九年，各部自立国，举首领，后再合，反复无常。地居南北墨利加一线相连之处，广袤六千五百三十里，居民百有十万。海隅港浅，船不能入，东有银山地出黛青，颇丰腴。

卷六十七

南墨利加洲之北，曰巴拿马，南北洲之界也。其正北曰可仑比三国，东北为各国兼掇地，其南伯西尔，其西孛露〈（其西南玻利非亚）〉又南为巴拉大河三国，其西智利，极南曰智加，此外则土蛮也。

○南墨利加洲南智加国

《瀛环志略》：巴他峨拿，一作八的哥尼阿，又作巴罗弥那，又名智加，南亚墨利加极南境，即世所传长人国也。地形如袜，北界拉巴拉他，西北界智利，东距大西洋海，西距大洋海，南距南海。南北约三千馀里，东西半之。其地草木荒秽，人皆野番，肢体长大，如常人一身有半。攫食野兽，不成部落，亦不与他国往来。地气严寒，如北亚墨利加之北境，又别无物产，故欧罗巴诸国，未尝过而一问也。极南临海之地，冰雪常凝，隔海对峙一岛，曰铁耳聂离依休勾。中间之港，名麦哲论，港内多礁，往智利秘鲁者，率取道岛南。狂风迅烈，昏雾迷漫，涛洑之猛，恶倍于大浪山，舟过人皆额手喜若更生。

《职方外纪》曰：南亚墨利加之南为智加，即长人国也。地方颇冷，人长一丈许，遍体皆毛。昔时人更长大，曾掘地得人齿，阔三指，长四指馀，则全身可知也。其人好持弓矢，矢长六尺，每握一矢插入口中至于没羽以示勇，男女以五色画面为文饰。

○南墨利加洲内金加西蜡国（原无今补。厄瓜尔多及委内瑞辣附

《职方外纪》曰：南亚墨利加之北，曰金加西蜡。其地出金银，天下称首。其矿有四坑，深者皆二百丈，土人以牛皮造软梯下之，役者常三万人。其所得金银，国王十取其一。七日约得课银三万两。其山麓有城，名曰银城，百物俱贵，独银至贱。贸易用银钱五等，大者八钱，小至五分。金钱四等，大者十两，小者一两。欧罗巴自通道以来，岁岁交易，所获金银甚多。故西土之金银渐贱，而米谷用物渐贵，识者以为后日当受多金之累。然获利既厚，虽知不能绝也。其南北地相连处，名字革单。近赤道北十八度之下，南北亚墨利加，从此而通，东西二大海，从此而隔，周围五千馀里。天主教未行之先，其国已预知尊敬十字圣架，国俗以文身为饰。土产白糖、烟叶、靛饰。世所称南墨利加州内可伦比国，即此也。

《地理备考》曰：哥伦比亚国，道光十一年，分为三国，不相统属。《慈释国志》仍以哥伦比亚国括之。

哥伦比亚国，在亚美里加州南区之北。其国土在北极出地十二度起，至南六度止，经线自西六十一度起，至八十五度止。东枕亚德兰的海，暨巴拉西利国，西连北卢

哥斯德尔黎加二国，暨大海，南接巴拉西利。北卢二国，北界大海。长宽皆约五千里，地面积方一百二十五万里，烟户二兆八亿馀口。本国地势，西多冈陵，东多广原，江河贯彻。河之长者九，湖之大者七。田土极腴，谷果最丰，产五金、水银、盐、煤、宝石、木香、药材、绵花、烟叶、蓝靛等物。丛林稠密，禽兽蕃衍，地气互异，海滨平原，熯烈难禁。惟内地高处温和，甚便居栖。不设君位，国人各立官长理事。所奉之教，乃罗马天主教也。其馀各教任人尊奉。技艺庸，贸易少。明孝宗宏治十五年，有意大利人，由吕宋国访据其地，分析为三。一名新加拉那大，一名委内瑞拉，一名塞多，各置官镇守。嘉庆十五年，国人因花旗国创建之后，亦聚众逐吕宋国守官，攻战八载，于嘉庆二十四年，自复其国，号曰哥伦比亚。越十二载，分为三国，不相统属。一新加拉那大国，东至委内瑞拉、巴拉西利二国，西枕大海，南接巴拉西利、厄瓜多尔二国，北界安的列斯海。长约三千里，宽约一千五百里，地面积方三十四万里，烟户一兆三亿二万馀口。地气湿热，北方为甚，田土膏腴，物产最繁。通国分十八部，曰波哥大，乃国都也，建于平原之中。馀地曰安的育基，曰内巴，曰马黎济大，曰波巴焉，曰巴斯多，曰布挨那温都拉，曰说各，曰巴那马，曰委拉瓜，曰加尔达日那，曰蒙波士，曰三达麻尔大，曰里约合沙，曰冬日，曰邦不罗那，曰索各罗，曰加萨那勒。

一厄瓜尔多国，东至巴拉西利国，西枕大海，南接北卢国，北界新加拉那大国。长宽皆约三千里，地面积方三十八万里，烟户六亿三万馀口。地气温和，甚便居栖，田土肥，贸易盛。国分八部，曰基多，乃国都也，建于山谷之中。馀部曰井波拉索，曰英亚不拉，曰瓜亚斯，曰马那比，曰官加，曰罗沙，曰委音。

一委内瑞拉国，东枕海暨古牙内地，西连新加拉那大国，南接巴拉西利国，北界海。长约三千五百里，宽约二千二百五十里，地面积方四十一万里，烟户八亿五万馀口。地气互异，平原熯烈，山谷温和，高阜严寒，土廩产丰。国分十二部。曰加拉架，乃本国都也，建于山谷之中，馀部曰加拉波，曰马拉该波，曰哥罗，曰都卢斯罗，曰美黎达，曰马黎那，曰亚不勒，曰瓜牙那，曰古麻那，曰巴尔塞罗，曰马尔加黎大。

《外国史略》曰：可伦比各地，自北极出地一度至十度，南极出地自一度及五度，八十八万方里。南连伯路巴悉等国，北及安特海隅，大西洋海，东连巴悉国，西连北亚默利加之巴那马峡，并大东洋海。此地旧属是班亚国，历三百十八年至嘉庆十四载，居民忽叛，是班亚国调军不能征服。道光元年列邦会议，听其自主与花旗无异，但人心不齐，道光十年再叛，分是地为三。分其西方曰新额那他，广袤一万七千三百九十五万里，居民一百七十万六千，分五部，十八郡。地产金，较亚默利加各国尤多，亦出铜石盐{艸哥}々加非青黛皮药材。其安特海港，乃名埠也，又加他义那居民一万，在巴那马微地，通商兴旺，每年船只二千，收帑银三百零七万圆。公欠项三千三百万圆，其都曰巴峨他城，居民三万。其东北方威尼稣拉国，地广袤一万八千九百六十里，居民六十九万六千，地分四部十郡。就地高下种麦，并加非

白糖等货。其都曰加拉甲，在安特海口，每年进出船一百只，运出加非{艸哥}々烟黛青等货，计一百四十万两。运入布匹及制造之物，约价一百七十五圆。其余海口，未大通商，每年收帑银二百五十万圆，公欠项二千万圆。其西南方黄道地方，即厄瓜多尔国。广袤一万五千三百八十五里，居民五十五万口，地分三部七郡。出木料{艸哥}々等货。每年出入之货，各约三百万圆，进出之船，百二十五只。危亚贵，系大港口，公欠项一千五百圆。其是班亚苗裔之民，耽逸乐，惮劳苦，好修饰，男女集会，歌唱饮食无节，惟土人稍知工作，众食西粟。火山高千八百丈，山岭极天，地势雄峻，惟阿利诺河边地低坦，多泽潴，草木繁盛，土民性猛好斗，惟养牲畜，未向化。

《瀛环志略》曰：可仑比亚，一作可仑巴，一作金加西蜡，南亚墨利加极北境也。西北至巴拿马，与危地马拉接壤，东界英吉利新地，东南界巴西，西南界秘鲁，北与西皆界海。纵横皆约五千里。西界安达斯大山，有火峰，以阿利诺，马加他二河为大。所称西班牙三部之新加拉那大，即金加西蜡之转音也。

○南墨利加洲内孛鲁国〈（一作伯路破利威国附原无今补）〉

《外国史略》曰：伯路国，一作孛露，又作北卢，广袤万八千五百八十方里。北连可伦比国，南接破利威国，东及破利威、巴悉等国，西及大东洋海。南极出地自三度至二十二度，偏西自六十五度及八十一度二十分。国分三部二十六郡。西方多山，高入云霄，此地高于海面百二十丈，地坦林密，山出金银。自是班亚开矿后，至嘉庆十四年，计共出金银十二万三千二百四十四万圆，又出水银铜胡椒绵花西米药材白糖，但不产食物，必由他国运入。缘是班亚人初到此国，见土人所用器，俱金银宝饰，因集土民勤掘，昼夜不息，运归本国，皆有货无价。是班牙人又自无制造之材，必由外国买运而至，故财易得易失也。近英人亦于此运金银返国，此地港口曰黑马城，港口有加老国，与花旗无异。

《职方外纪》曰：亚墨利加洲之西曰孛露。起赤道以北三度至赤道以南四十一度，大小数十国，广袤万馀里。中间平壤，沃野亦万馀里，地肥饶不一，肥者不烦耕治，布种自能生长。凡五谷百果草木皆上品，故本地人目为大地之苑圃也。其鸟兽之多，羽毛之丽，声音之美，亦天下第一。地出金矿，取时金土互溷，别之金多于土，故金银最多。国王宫殿，皆以黄金为板饰之，独不产铁，兵器皆用烧木钺石。今贸易相通渐知用铁，然至贵馀器物皆金银铜三种为之。有数国从来无雨，地中自有湿性，或资水泽。有树生脂膏，极香烈，名拔尔撒弥，傅诸伤损，一昼一夜，肌肉复合如故。傅痘不癩以涂尸，千万年不朽坏。有一种异羊，可当骡马，性甚倔强，有时倒卧，虽鞭策至死不起，以好言慰之，即起而走，为所使矣。食物最少，可绝食三四日，肝生一物如卵，可疗诸病，海国甚贵之。天鹅鹦鹉尤多，有一鸟名厄马，最大，生旷野中，长颈高足，翼翎极美丽，通身无毛，不能飞，足若牛蹄，善奔走，马不能及，卵可作杯器，今番舶所市龙卵即此物也。产棉花甚多，亦织为布，

而不甚用之，专易大西洋布帛，及利诺布，或剪马毛织为服。其地江河极大，有泉如脂膏，常出不竭，人取燃灯，或涂舟砌墙，当油漆用。又有泉水出于石罅，才离数十步，即变为石，有土能燃火，可当炭用，平地山岗皆有之。地震极多，一郡一邑，常有沉垫无遗者，或平地突起山阜，或移山至于别地，皆地震之所为也。故不敢为大宫室，上盖必以薄板，以备震压。其俗大抵无文字书籍，结绳为识，或以五色状物形以当字，即史书亦然。算数用小石子，亦精敏。其文饰以珍宝嵌面，或以金银为环，穿唇及鼻，臂腿或系金铃，复饰重宝，夜中光照一室。其道路自国都以达万余里，凿山平谷，更布石为坦途，以便驿使传命则数里一更，三日夜可达二千里。人性良善，不长傲不饰诈，风颇淳古，因其地金银最多，任意可取，故无窃盗贪吝，亦不自知其富，或反务细微无益之业以度日，但陋俗最多。近日天主教中士人往彼劝化，教之经典书文，与谈道德理义，始改往时杀人祭魔，驱人殉葬之俗，为善反力于诸国，有捐躯不辞者。其间亦有最恶劣之地，土产极薄，人拾虫蚁为粮，以网四角挂树而卧，盖因地气最湿。又有最毒之蛇，人犯之必死，故不敢下卧，恐寐时触之也。其土音各种不同，有一正音可通，万里之外，凡天下方言过千里必须传译其正音，能达万里之外，惟有中国与孛露而已。近有一大国名亚老歌人，强毅果敢，善用弓矢及铁杵。不立文字，一切政教号令，皆口传说，辩论极精，闻者最易感动。凡出兵时，大将戒论兵士，不过数言，无不感激流涕，愿效死者，他谈论皆如此。

《万国地理全图集》曰：伯路国，东至巴悉国，西及大洋，南连治里拉巴拉答等地，北交可仑巴。南极出自四度至二十五度，偏西自六十度至六十八度，其上下两地，共计袤延方圆二百七十九万里。山岭最高者，二百四十三丈，地场高于海面百二十丈，是以山下暴热，而高处冰凝。其海边旷沙不毛，内地则五谷丰产，但居民不务农，专开金银山矿。自是班牙国人至后，所开出者，广大无限，其著名之银山，称曰陂多西，高一百六十丈，周绕五千八百里，山坡自顶以下，皆各色矿。自开通以后，所出之银，共计七万二千万两。别有其他山出金。其江河沙内亦有金，故此居人各用心以出地下之库，并不理其地面之五谷蔬菜也。明万历年以后，是班牙国之军到亚默利加之时，风闻伯路地乃宝海金山，是以用心竭力，不顾阻碍，冒危忍饿而至其地，强服其土王，居民不能抵御，只得遵是班牙之命，又奉天主教。自后是班牙国派官防范，专其金银之利。道光年间，此居民亦驱其外敌，而自立土主，昔分两国谓之上下，此时再连合一国。是班牙国之后裔，好接远客，宽和礼貌，但惮劳好逸，以赌博为务，其通商不多，所出者药材与金银而已。其女眼波明媚，使人易迷，造酒善酿，痛饮必醉。居民二百七十九万丁。国都里马城，其马头曰加老港，又屈可城在内地，昔土君之都也。拉八邑，在高山中。

《地理备考》曰：北卢国，即孛路也。北极出地三度起，至二十三度止，经线西六十九度起，至八十四度止。东至巴拉西利、波里维亚二国，西枕大海，南接高北卢国，暨大海，北界哥伦比亚、巴拉西利二国。长约五千三百里，宽约二千五百六十里，地面积方七十八万三千里，烟户一兆七亿馀口。本国地势，西方崇山峻岭，东

方丛林广原，湖河无几，地震甚多。河之长者曰马拉良，曰阿不里麻，曰吾加牙勒，曰瓜拉加。湖之大者曰的加。田少腴腴，野多沙漠，土人虽勤，稼穡维艰。土产五金、水银、谷、麦、胡椒、绵花、药材、树胶、颜料、香料等物。地气互异，海滨温燥，山中调和，平原湿热，岭上寒冽。不设君位，庶民自立官长理政，所奉之教，乃罗马天主教也。技艺庸拙，贸易萧条。明世宗嘉靖三年，有吕宋国人访据其地，虐待其民。嘉庆十三年，佛兰西国率兵侵扰吕宋国。时各国接踵，谋自立，惟时吕宋兵众，事竟不果。越十三载，国人协同济利国军，侵利马城，败吕宋之兵，驱逐官员，自立为国，不归统属。未几民乱复兴，贼寇猖獗，以至国分为二。有高下之称，其后疆界虽析，挟嫌如故，通国分七部，曰利马，乃本国都也，建于利马各河滨。馀部曰阿勒塞巴，曰不诺，曰古斯各，曰阿牙古说，曰人宁，曰利卑达。其通商冲繁之地二处。

《地理备考》曰：高北卢，亦孛露之分国，一名破利威国，又作波里维亚国。在美里加州南区之西，南极出地十一度起，至二十四度止，经线自西六十度起，至七十三度止。东至巴拉西利、巴拉大河、合众二国，西连北卢国暨大海，南接巴拉乖国、济利国巴拉大河国三境，北界巴拉西利、北卢二国。长约四千里，宽约一千五百里，地面积方三十九万六千里，烟户一兆三亿馀口。本国地势有山谷，有平原，其安达斯山由北而南东西分歧，在东者峭壁参天，冰霜凝积，在西者峰峦叠起，火焰不熄。河之长者曰瓜卑，曰北尼，曰比哥麻约，曰马尔么勒。湖之大者曰的加。界于北卢之间，田土互异，东方膏腴丰产，西方硗瘠沙漠。至若土产与北卢国相等。地气高下悬殊，然东南西大抵温和，不害居栖，惟北方炎热为患。不设君位，立官理政，所奉之教，乃罗马天主教也。技艺庸，贸易少。本国与下北卢同为一国，迨下北卢违背吕宋时，本国亦接踵不受管辖。道光五年，乃去北卢自为一国。分设六部，曰朱基萨加，乃本国都也，建于平原之中。馀五部曰巴斯，曰扁鲁罗，曰波多西，曰哥沙邦巴、曰达古斯卢，都城曰乍尔加斯，会城曰巴斯达牙古叔，而波多西银矿最旺，初开至今，得银七万二千万奇。

《外国史略》曰：破利威国，一作波里维，即伯路之分国也，亦名高伯路。在伯路之南，地广袤二万七千方里，居民二百四十万口。地分十部，六十三郡，西及大东洋海，北及伯路，东及巴悉国，并巴拉危崖。中有高峰二千五百四十丈，为是州最高之山。草木蕃盛，人迹难到。其都曰加申城，居民一万二千，地甚高，又丰盛。其产银之山，昔时出银无数，名扬四海，今矿虽空然每年所入公帑，尚过于所出，约二千万圆。海港市颇兴旺，又有益赖口，迤贵基口，拉米口，及亚默利加之口，每年约进船各百只。又破利威，一名玻利非亚。

案：破利威在秘鲁之南，安达斯大山，自西北来环国之西面如带，其西浮沙浸海，斥磧不毛。山以东横岭错出拓为平原，膏腴之土，蔬谷皆宜。因地产金银，举国以攻矿为业，农事全荒，恒苦饥馑，居民皆西人苗裔，善待宾客，温蔼可亲，然好赌恶劳，贸易悉倩他国，故为西人所制。又善酿酒，终日沉醉，虽兼产铜、铅、水银

、胡椒、甘蔗、绵花、药材、颜料、香料，而利权归他人，土人方卧醉乡，呼庚癸焉，岂不惜哉。

卷六十八

○南墨利加州内巴拉大河国〈（巴拉圭及乌拉乖附）〉

《地理备考》曰：巴拉大河国，又曰阿尔仁的纳，在美里加州南区中。南极出地二十度起，至四十一度止，经线自西五十五度起，至七十二度止。在巴拉乖乌拉乖西，南北七千六百里，东西三千八百里，地面积方一百四十万里，烟户二兆馀口。内地东方平原旷广，西北重冈叠岭。河之长者九，湖之大者五，土饶产富，地气各殊，温和居多，夏雨连绵，雷电交作，山顶冰雪凝积。不设君位，庶民自立官长理事，奉罗马天王教，技艺颇精，贸易日盛。明武宗正德四年，为吕宋国人攻取，驻兵镇守。嘉庆十三年，国人不受辖制，效尤花旗，谋自立国，兴师攻战，越二载，逐去吕宋守官，自立国人摄政，不设君位。通国分为十四部，曰布宜诺塞利，乃本国都也，建于巴拉大河滨，因以名国。馀部曰音德勒里约，曰哥连德，曰三达非，曰哥尔多瓦，曰尼斯德罗，曰都古曼，曰萨尔达，曰如锐，曰加达马，曰里约委，曰桑若汉，曰桑卢意斯，曰门多萨。其通路闭塞，与他国罕交往，是以天主教之僧，于乾隆年间，自招土类教之成人。此后是班牙国之藩属，驱其占主。其国亦出茶叶，与武夷不同，饮之者醉后不醒。拉国之南，还有广地，曰巴他峨那，一片荒芜，人户不多，野人形貌魁梧。其天气甚寒，居民以猎兽为生，其最南之地，隔海岛，其内间之海峡，昔系驶伯路船之大路，此时望其岛之南而航，时时暴风，冰霜交作，最属危险。

《地理全图集》曰：拉巴拉他国，由治理国东延至大西洋海，辽阔平坦，袤延三百万馀方里。平坦浩渺，草树杂木。其大江与国同名，流长九千里，进海之口，阔九十里，北里可马河，与伯默若河汇之。游牧平地，是班牙人初至时野牛不盈十只，但带牡牝而牧放之，近日加增繁盛。其居民七十万，不重农务，惟捕野牲，食牛肉，售牛皮，歌舞赌博骑马而已，通商甚大，进口货价三千九百万员，所出者三千万员。虽自立主，但尊贵弄权虐民，律例未定，此时各部，取兼摄亚默利加国之号，但国权久废，各自专擅。其国都曰捕诺爱勤，居民七万丁，在大江之滨。山威多乃其马头，通商殷盛。内地尚有国曰巴拉吴爱，即巴拉乖〈（一作巴拉圭）〉之异名也。

《外国史略》曰：银国一名拉巴他国。东南连巴他峨尼，北及破利威，东连巴拉涯、乌路危等国，西连治利。广袤方圆四万一千里。居民六十万。其地广大平坦，在拉巴他河边。濒河地甚丰盛，其余大半荒芜，荆棘千里，百姓不耕，惟猎野牛，食其肉，卖其皮。河流甚长，其广如湖，入海处甚阔。国中有草，叶味如茶可饮。居民游牧，骑马奔驰，速如飞鸟。岁入公帑银七百万圆，出八百万圆，公欠项五千万圆。国都曰善为勒城，在拉巴他河口，因以名国，居民八万。所运者系牛马獭皮，每年三四百。外国船进口者各三四百只，运进英国布匹丝缎，各项价四百二十五万圆。此国昔与银国相合者，曰巴拉危涯，广袤四千一百七十五方里，居民十二万。

南连之国曰乌路危，广袤四千九百十五方里，居民十二万九千。其都曰文地威多城，大港口也，居民一万。与外国通商，岁约一千三百万圆，船二百余只，每年出入不绝。巴拉之都，曰亚孙西云，居民一万二千，通商未广。此外本州之北，谓之南墨利加州，内各国兼掇地埔头而已。安达斯大山在国之西，与智利界。

《地理备考》曰：巴拉乖国，在美里加州南区之中，乃巴拉大河分国也。南极出地二十度起，至二十八度止，经线自西五十六度起，至六十一度止。东至巴拉西利国，西南连巴拉大河国，北界高北卢、巴拉西利二国。长约二千里，宽约八百里，地面积方三十四万三千里，烟户二亿五万余口。本国平原广阔，山林稀疏。河之长者曰巴拉乖，在西方。曰巴拉那，在东南。曰波卢多，曰波德黎，曰多巴的，曰义巴内，曰比勒皆在北方。曰加那卑，曰的比瓜黎，皆在南方。每遇阴雨各河涨溢，积久难消，遂成大湖，水退泥淤，其地膏腴，产谷果、草木、大黄、血竭、桂皮、甘蔗、蓝靛、绵花、烟叶、茶蜜、牙兰米等物。禽兽充斥，鳞介尤繁。地气互异，湿热燥寒，各有不同，酋长统摄，所奉之教乃罗马天主教也。工商皆少。原本国于明世宗嘉靖五年，有意大利人据其地。越九载为吕宋所取，拨与耶稣会僧人管摄，后僧奏毋庸派设官守，并禁吕宋国人前往其地，以免日久篡夺，致废教规。吕宋国君，均依所请，是以二百年来，政事皆归僧摄理。乾隆三十二年，吕宋国王将耶稣会僧尽逐出境，本国遂附于加拉大河国为一部。派官镇守，迨吕宋所属各国不服统辖，驱逐守官，本国各地亦自分二十县。首邑名阿松桑，乃本国都也，建于巴拉乖河岸，因以得名。其通商冲繁之地五处。

《地理备考》曰：乌拉乖国，在亚美里加州南区之东南。南极出地三十度起，至三十五度止，经线自西五十五度起，至六十一度止。东至巴拉西利国，西界乌拉乖河，南枕亚德兰的海暨巴拉大河，北接巴拉西利国。南北千二百五十里，东西千三百里，地面积方八万三千里，烟户七万余口。南皆山阜，北则平原。有河曰巴拉大，曰乌拉乖，曰内哥罗塞波拉地等。贯彻沃润，故肥饶丰产，地气温和，不害居栖。不设君位，公立官长以司政事，所奉之教，乃罗马天主教也。工商皆少。原本国始为巴拉大河国之地，继为巴拉西利国所取，迨道光六年国人叛而自立，不归统属。各地分为九府，曰蒙德维罢，曰马尔多那，曰加内罗斯，曰桑若塞，曰哥罗尼，曰索黎奴，曰白三都，曰都拉各奴，曰塞卢拉尔科。国都建于巴拉大河岸右。

《瀛环志略》曰：拉巴拉他〈（一作孛腊达，又作巴拉大河，又作由乃的朴拉文士）〉，在智利东，隔以安达斯山。北界玻利非亚，东界乌拉乖巴拉圭，西南界巴他峨拿，东南距海。长约四千五百里，广约三千里。巴拉圭〈（或作巴拉乖，又作巴拉吾爱）〉，间于巴西拉、巴拉他中。长约一千八百里，广约八百里。乌拉乖，在巴拉圭南，长一千二百五十里，广一千三百里。

○南墨利加洲内伯西尔国〈（原无今补）〉

《职方外纪》曰：南墨利加之东境有大国，名伯西尔。起赤道以南三度至三十五度而止。天气融和人寿绵长，亦无病疾，他方有病不能疗者，至此即瘳。地甚肥饶，多奇异鸟兽，江河为天下最大，有大山介孛露者，高甚，飞鸟莫能过。产白糖，最多嘉木，种种不一，而苏木甚多，亦称为苏木国。有一兽名懒面，甚猛，爪如人指，有鬃如马，腹垂著地，不能行，尽一月不逾百步，喜食树叶，缘树取之，亦须两日，下树亦然，决无法可使之速。又有兽前半类狸，后半类狐，人足梟耳，腹下有房，可张可合，恒纳其子于中，欲乳方出之。其地之虎，饿时百夫莫可当，值其饱后，一人制之有馀，即犬亦可毙之也。饕餮之害如此。国人善射，前矢中的，后矢即破，前箭连发，数矢常相接，如贯无一失者。俗多裸体，独妇人以发蔽前后，凿颐及下唇作孔，以猫睛夜光诸宝石嵌入为美。妇人生子即起，作务如常，其夫则坐蓐数十日服摄调养，亲戚俱来问候，馈遗弓矢食物，有难以情理通者，然习俗相沿，亦莫觉其非也。地不产米麦，不酿酒，用草根晒干，磨面作饼以当饭。凡物皆公用不自私，土人能居水中一二时，复能张目明视，亦有能游水最捷者，恒追执一大鱼，名都白狼而骑之，以铁钩钩大鱼目，曳之东西走，转捕他鱼。素无君长书籍，亦无衣冠，散居聚落，喜啖人肉，西土常言其地缺三字，王、法、文是也。今已稍稍归化，颇成人理。其南有银河，水味甘美尝涌溢平地，水退布地，皆银沙银粒矣。河身最大，海口阔数百里，水入海中，五百里以内，尚为银泉，不入卤味。其北又有一大河，名阿勒恋，亦名马良温河，身曲折三万里，未得其源。两河俱为天下第一。

《万国地理全图集》曰：巴悉国，一作伯西尔国。东至大西洋海，西连路巴拉等国，南亦交巴拉，北连墨西哥，与佛兰荷兰等藩属。北极出一度至南三十二度，偏西自四十五至六十五度，袤延方圆九百七十二里。其地之山不高，而大半平坦。其江河又多又长，普天下至长者曰亚马孙河，其口似海。凡悉河，由南流北，鸟路愚爱河，自北至南，两者皆长江也。此国之林木深密，财产山积，惜人迹难到，百物自萌自槁，其国出红木、珈琲、棉花、白糖、药材、牛皮、烟焉。又出金沙金钢钻石各项宝玉。其居民无经营之心，由外国买来物件布匹，每年运出货其价银千五百九十三万两，出二千三百四十九万两。葡萄牙国船初到此国，一望荒地，渐加开垦。荷兰国兵夺取之，占据五十年复为葡萄牙驱逐。培植田稼，买黑面人口而用之。于道光年间，居民上下四百万丁，其中八十万白面之人，四十二万杂类，十五万自主之黑民，以及百七十二万黑奴。是时居民自恃有权，能自专制，逐绝本国，而自立旧王之世子为君，又取国之尊贵者，合力协心治理。其居民性惮劳，惟雇黑奴行作，自寻娱乐，而温待其奴，并非暴主也。其国都及其马头曰牙匿罗，其海口广大，光景最美，令初至者销魂。其居民百五十万丁，商船云集。又巴希亚马头，居民悦赌博，因陷溺日深，匪类夜间杀人。陌南捕可大城，居民七万丁。其地方一片平坦，居民惟骑马猎牛而已。贵城在内地，金沙刚玉所出，居民惟用心出百宝而不务农。内地之土人不多，野性强梗。在此地之北，尚有佛兰西新地，林树稠密，外人不服水土，染瘴多死。其都城曰加延。出番树与丁香等货，但因疫气，故人户疏罕，而国家罪犯徒流于此。荷兰亦开新地，名曰苏利南，在水泽之中，出白糖珈琲等货

。但其林内尚有遁去之黑人，屡次与土人勾串滋事。其都曰巴拉马利破美城。英国北夺荷兰地而居之。沆茫泥地，亦出白糖珈琲等货。将其地分三部，曰特默拉，曰益其坡，曰北彼治。其黑人大半在此耕田，产物多而费耗繁，是以其农无利。

《外国史略》曰：巴悉国，一作伯西尔国。北连危亚拉可伦比等国，南连乌拉圭，东及大西洋海，西连银国、破利威伯路等国。广袤十四万四千五百五十方里。北极出地自四度十七分及南极三十八度。地多山，甚荒芜，多河泽，饶材木，五金宝玉等货。古无人到。有葡萄国商船漂至其地，一见山岭广大，即占之。居民蛮猛不服，而无技艺，究为葡萄人火器所降服。后荷兰来争，暂据其地，旋不能守，葡萄亚再据之，创立巴悉国。居民共计六十万口，管是地者皆葡萄亚苗裔，其黑面人，则由亚非利加买运来，每年四五万口。居民崇天主教，物产最盛者，为白糖加非，又出米绵烟红木金刚石。地虽肥饶，百姓惟牧羊牛，种甘蔗，不种五谷，故屡遭饥馑。每年出金约值五万圆，金刚石值十万圆，运出货价三千八百五十万圆。通商之地，系牙匿罗都城，其进口船每年七百只。英国人十之四，花旗国人十之二。其北方尚有数海口通商，民间殷户，多外国人，此国君亦自称王，立公会以议国政。民不好学，故无学馆。每年所入公帑银千八百二十五万圆，公欠九千一百万圆。兵十三万，民壮二十万，大小战船一百二十只。其都曰牙尼罗城，居民二十一万。巴希亚城，居民十八万五千。巴拉城，居民二万八千五百。圣保罗城，居民四万五千。贵城，居民三万九千。美城，居民二万五千。白南布可城，居民六万二千。

卷六十九

○南墨利加州内智利国〈（原本）〉

《万国地理全图集》曰：南亚默利加地内之列国，俱各自主，除巴悉外，其余一切皆昔时是班牙藩属。北地称曰可仑比亚，东及大西洋海，西至大洋海，北连巴那马，南交巴悉伯路等国。北极出地自十二度至南极六度，偏西自五十八至八十度。袤延方圆七十二万方里，居民三百四十万名。遍地崎岖，峰高者二百一十四丈，其火峰令人震慑。两大河一曰阿利诺，一曰马加他，皆入大西洋海。地出珈琲、白糖、烟、靛等物，山川内有金沙珍珠、铜、银。但居民游惰，好赌博，通商尚微，男女并穿素衣，防女甚严，略同回教。其土蛮则狼心凶毒。其国家听庶民自主，因百姓连久与是班牙军攻击十败十胜，毕竟驱敌出境。此时大众嚣凌逞强，不安生事。其国之公欠太重，不能还本，又不能缴息，因分其国以听各自为主，四邦各自立国。著名之城邑，曰巴峨他，其马头曰加拉甲。内地贵多广厂，袤延甚远，终年晴和如春，园林花发，真可谓乐国焉。

智利国，在南墨利加州极南滨海〈（或谓即《职方外纪》之智加国，然彼称为长人，与此志不同，必非一地）〉。东界那孛腊达，西界卑沙非盖海，南界巴罗弥那，北界摩里威那。南北距千有四百里，东西距二百馀里，幅员十七万二千方里。其地多山，有十馀山常喷火焰，最高之奄底士岭，终年冰雪不消，其卑峰亦千有四五百丈，地多震动之灾。惟土肥美，宜稼植。耶苏纪年千有五百三十五年〈（明嘉靖十四年）〉，始有大吕宋之阿尔麻俄罗，跋涉艰险而至其地。千有五百三十八年〈（明嘉靖十七年）〉，有比特罗底、哇尔底威阿始据为国，与土人争战十年，千有五百五十年〈（明嘉靖二十九年）〉，始夺得智利大半之地，遂于滨海设立诸部落。惟有阿劳果部落不服，率兵往侵，屡岁不克，反致兵败被擒。自后吕宋虽常设计，欲服阿劳果之人，终不能得。除阿劳果以外，智利之地俱归吕宋矣。千有五百六十七年〈（明隆庆元年）〉，吕宋设头目仁尼腊尔管辖其地，虽不及它鲁墨西哥之盛，而土沃矿旺，亦足富强一方。千有八百之十年〈（嘉靖十五年）〉，智利闻欧罗巴各国扰攘，遂欲背吕宋而自专制，佛兰西遣人往说不从，竟自立新总领，以掌国事。次年四月，吕宋兵由它鲁来攻，智利兵败走，越奄底士大山而至孛腊达之免多沙地，求援于其酋山马定。遂与智利合兵攻拒吕宋，屡战始得志。复立智利，总领虽不称王，而自为一国，不复为吕宋所属。其国每万五千人，立一底表第以辖之别，设数贵人统辖。每年征收税饷银百有十万员，杂课二十万员，其在山底阿俄，支发银百有二万六千九百四十八员，千摄西俺，支发银三十六万员，哇尔底威阿，支发银十八万员，还欠项息银四十万员，共计每年支发银百有九十六万六千九百四十八员。除征收之项尚少银六十六万六千九百四十八员。于千有八百二十二年〈（道光二年）〉，会计已欠兰顿本银百万棒。国内兵丁与它鲁边界，额设防御查巡步兵七千五百，马兵三千，虽不甚习练，然勇壮善骑，遇有事之时，岁入不敷兵饷。水师军专派律哥治拉尼管领，六十门炮，大兵船一只，五十门炮，中兵船三只，小兵

船数只，俱由英国购去旧船。且国帑不足，恐难修缮坚固。户大约百有五十万口，俗与大吕宋人不同，朴鲁谨厚，相交以礼，好游敢战，女虽不读书识字，颇多聪明，能佐其男，故其酋之精明，自强立国创业矣。前时国人多奉加特力教，近多改波罗特士顿教。在各国未乱以前，国中尚无书籍，近日在山底阿俄部设书馆一所，藏书数千卷，槧板印刷，子弟肄业者四百人。赳赳文物，俗尚音乐，女子少习歌讴。贫人以竹与麻为墙，覆以树枝，仅蔽风日，富者所居，内尚修饰，外则涂墍。法律宽简，少奴仆，偶有一二，生子后即可自主。河道短狭，惟有毛里河弥荷河较大，源流亦不长远。常患地震之灾。千有八百二十二年〈（道光二年）〉，近海地方，忽然高起数仞，千有八百三十五年〈（道光十五年）〉，千摄西俺芝尔兰诸部落，俱被震毁，海水亦低，忽有回浪高二十仞，将各岸被毁之物，全行漂去，而海岸忽又高起数仞，船舶俱阁岸。土产金、铜、银、麦、酒、陶器。

《地理备考》曰：济利国，在美里加州南区之西。南极出地二十五度起，至四十四度止，经线自西七十二度起，至七十七度止。东至巴拉大河花旗国、暨巴达科尼地，西枕大海，南接乖德加海湾暨巴达科尼地，北界波里维亚国。长约四千五百里，宽约四百二十里，地面积方十五万五千里，烟户一兆四亿馀口。近海之地，峰峦参天，火山大者十有六。内多平原，少丘陵，湖河相间，河之长者十一，湖之大者八。田土极腴，物产最丰，地气颇温，惟多震动。不设君位，立官司以理国政，百工庸拙，商贾寥落。本国未为吕宋并吞之前，与北卢同为一国。明世宗嘉靖中，有吕宋国人访知其地富庶，调兵侵之，因水土不驯，衢路崎岖，且国人坚守，得地无几。迨乾隆三十八年，尽为吕宋国所取。嘉庆十五年，因花旗国拒英吉利自立，国人相效，亦背吕宋，逐守官自立为国。惟设官立法，意见不同，各不相睦，内乱复兴。耶稣一千八百十四载，复为吕宋国所取，战经四载，乃克复其国。通国分为八部。曰三的亚麻，乃本国都也，建于多波加尔马河岸。馀七部，曰阿分加瓜，曰阿固英波，曰哥尔乍瓜，曰卯勒，曰公塞桑，曰瓦尔的维，曰济卢埃。其通商冲繁之地凡四。

《外国史略》曰：治利国为南洲之狭地，广袤八千方里，居民七十七万九千口。东面皆高山，隔银国巴他峨尼，西及大东南洋海，北及破利威，南连巴他峨尼。南极出自二十五度及四十三度。全地分八部。山高千五百丈，岭常积雪，出金银，而多地震。且矿山无水草，不出五谷，惟兼出铜、硝、石盐，每年所出之银七十六万圆，金十六万圆，民多勤劳。英国船于道光十一年，运进货价一百九十五万两。此国亦到中华粤省通商，每年公帑收银百三十万圆，公费约百九十六万圆。公项欠银三百万两，军士三千，民壮虽勇，而无纪律。其都曰散地亚峨城，其地高于海面二百六十丈，其居屋各相离，如炮台之立墙。其国之大港口，瓦巴来所，系通商之大市，四方之船云集，昔系乡里，今居民有一万五千，大抵通商之效，故富庶最易云。

《地理全图集》曰：治理国，一作智利国。在伯路之南，乃沿大海之窄地。南极出

二十四度，至四十度其阔六百里而已。袤延方圆五十一万方里。一带高岭，在其东界愈至东方，亦愈磊磊若叠。中藏银矿，匠人自冰雪中，穿孔开道，每年出银八十八万两，金五十一万两，红铜愈多所出，又出五谷与各项鲜果。其居民尚农务，好接旅客，其女专务作乐弹琴，容仪丰雅。其国都曰散地亚峨，在茅林之中。其马头曰瓦拉巴，乃南方之城。交战连年为敌国所坏，当是班牙攻击之时，土人奋勇拒击，至今大半未归治里国统理。论治里人驱是班牙国军之际，水陆获胜，可谓赳赳武夫，此国家亦自立土主，但浮气轻躁，反复无常。

案：智利国，居落机大山之西，大东南洋之东，山海扼塞，雄踞一隅，其最北与银国隔山分界，曰斯音 反地，以南曰亚君加危。又南分三邑，中曰谷加危，东曰母尼罗撒，西曰瓦巴来所。又南曰毛利，又南曰怀孕地，又西南曰瓦地威，又少南曰亚拉乌亚那，其西南曰治罗岛。土沃矿旺，其俗温和好，各女有姿谷，善音乐。今西洋诸国行用番银，成色高者，欧罗巴印度所铸其常行者，分四种，曰墨西哥，曰秘鲁，曰玻利非亚，曰智利，成色高下不同，粤东人能辨之，闽人不能辨也。惟称为吕宋番，又称鹰仔番云。

○南墨利加州内各国兼摄地

《地理备考》曰：南州之地，属英吉利兼摄者，曰古牙那。在亚美里加州南区之北，纬度自北三度四十分起，至七度四十分止，经度自西五十九度起，至六十二度止。东至荷兰国兼摄之古牙那地，西南连哥伦比亚国，北界亚德兰的海。长约一千里，宽约三百八十里，地面积方三万五千里，烟户一亿四万七千馀口。平原广阔，丛林稠密。地分三州，曰义斯给波，曰德美拉利，曰比尔比塞，首邑名若尔口城，泊所稳便，市舶云集。

马禄义那斯岛，又名发哥兰，在亚美里加州南区之南。纬度自南五十一度起，至五十三度止，经度自西五十九度起，至六十五度止。内有九十馀岛，大者曰发哥兰，曰索勒达。地气温和，人安物阜，泊所稳便。

马加良英斯，又名火地，在亚美里加州南区之南，纬度自南五十二度三十分起，至五十五度五十九分止，经度自西六十七度十四分起，至七十七度十分止。中多岛屿，大者无几。地气严寒，不便居栖，田土硗瘠，物产维艰，首邑建于义斯达多岛中。

《地理备考》曰：本州之地，隶佛兰西国兼摄者，曰古牙郡。在亚美里加州南区之北，纬度自北二度十六分起，至五度五十五分止，经度自西五十三度五十分起，至五十八度三十五分止。东南连巴拉西利国，西接贺兰国兼摄之古牙那地，北界亚德兰的海。长约千六百里，宽约千一百里，地面积方七万六千二百里。地多荒芜，人烟寥落，首邑名加夜那，泊所稳便，而贸易冷淡。此外尚有兼摄数岛，在本州之中。

，一名马尔的尼加，一名瓜达卢卑，一名三德斯，一名马里亚加兰大，一名北约德尔，一名德西刺德，一名桑马尔丁。其桑马尔丁岛，二归佛兰西兼摄，一归贺兰所属。三岛总名曰佛兰西安的列斯。其岛地大小不等，泊所稳便，近年贸易日盛，往来如市。

《地理备考》曰：本州之地，隶贺兰国兼摄者，曰古牙那，又名苏里囊。在美里加州南区之北，纬度自北三度起，至六度止，经度自西五十四度起，至六十度止。东南连佛兰西古牙那地，西接英吉利国之古牙那地，北界亚德兰的海。长约七百五十里，宽约六百五十里，地面积方五万里，烟户九万馀口。中有一河，名曰苏里囊，由南而北，贯彻其地。其余大河曰马罗尼，曰萨拉美加，曰古巴那麻，曰迷给利，曰哥零丁。田土腴腴，地气不驯。首邑建于苏里囊河左岸，泊所宽阔，帆樯如织。此外尚有所摄七岛，皆在本州之中，总名曰贺兰安的列斯，其岛大小不等，土肥产丰，诸货骈集。

《地理备考》曰：南州地属布路亚兼摄者，曰巴拉西利国。在美里加州南区之东，本巴悉国之分地也。北极出地四度二十分起，至南三十三度五十五分止，经线自西三十七度起，至七十五度止。东枕亚德兰的海，西连巴拉乖、高北卢、可伦比，暨巴拉大河等国，南接巴拉乖、乌拉乖二国，暨亚德兰的海，北界可伦比国暨古牙那地。长约九千五百里，宽约九千里，地面积方二百五十六万九千八百六十里，烟户五兆馀口。冈陵平原相间，湖河甚多，贯彻沃润。河之大者十，湖之大者四。地气温和，田土极腴，稼穡最丰，草木药材香料禽兽鳞介金石，靡弗毕备。粤稽欧罗巴，亚细亚，非里加三州之出产，本国无不有之。而本国所产树木禽兽虫豸，他国多罕见。君位历代相传，所奉之教，乃罗马天主教也。此外各教任人尊奉，概不禁止，技艺颇精，贸易日盛。明孝宗宏治十三年，布路亚国人来据此地，迨大吕宋兵侵扰布路亚国时，本国亦为贺兰人所取。明怀宗崇祯十三年，布路亚国驱逐吕宋后，遂与本国逐去贺兰，复归布路亚国兼摄。道光五年，布路亚国君，封其世子伯德禄于巴拉西利，自为一国，不相统属。越六载，伯德禄返国传位于其子。国分十八部，曰里约热内卢，乃本国都也，建于海滨百货骈集，五方辐辏。曰圣宝卢，曰三达加达里纳，曰圣伯德禄，曰马德葛罗索，曰科阿斯，曰迷那日来斯，曰斯不黎多三多，曰巴义亚，曰塞耳日贝，曰阿拉科瓦斯，曰伯尔能布各，曰巴来罢，曰北里约哥兰的，曰西阿拉，曰标意，曰马拉良，曰加良巴那。其通商冲繁之地五处。

《外国史略》曰：南默利加州各国兼摄地四区，一英国所属之危亚那国，在亚利诺可河滨。大半藪泽，多烟瘴，土甚肥，出白糖加非各物。英人所据地曰益贵破，曰他马，曰拉利。居民产业之价，每年收银二千六百二十五万圆，运入之货七百万圆，出者二千一百万圆，公帑收四十二万圆，费用四十九万圆，兵士七百名民壮五千。一荷兰所据之地，曰苏利南。其都曰巴拉马利城，广袤二百二十六方里，居民六万四千，大半黑奴。多广林，时与荷兰交战。通商甚旺，运出之物，每年约二百五十

万两。一佛兰西所据者，曰加音尼。广袤五百二十里，居民二万四千九百口。地多密林，尚未开垦，为谪徙罪人之地，多染瘴而死，故多逃亡。一葡萄牙所据之地，属巴悉国。

○墨利加州极南方土番部落

《地理备考》曰：巴达科尼部落，在美里加州南区之南。纬度自南三十六度起，至五十六度止，经度自西六十五度起，至七十八度止。东枕亚德兰的海，西接济利国暨大海，南界南海，北连巴拉大河国。长约五千里，宽约二千里，地面积方六十六万六千里，烟户约二亿馀口。山林层叠，峰峦参天，冰霜凝积，永不消化。其名齐野的瓦美的加拉拿，三哥雷门的，乃火山之大者也。湖河众多，贯彻沃润。河之长者，曰内哥罗，曰加拉摩利斯，曰加雷额。湖之大者，曰大湖，曰德呼尔，曰哥罗瓜卑。田土不毛，其人有曰春济，曰尔不支，曰亚老冈，曰德灰勒各等名且总名之曰巴达冈，地名亦于此取焉。

卷七十

◎外大西洋

○南墨利加诸岛〈（原无今补）〉

《职方外纪》曰：南亚墨利加之岛，不可胜数。其大者为小以西把尼亚，为古巴，为牙卖加等。气候大抵多热，草木开花结实，终岁不断。产一异草，食之杀人，去其汁则甚美，亦可为粮。有毒木，人过其影即死，手触其枝叶亦死，觉中其毒，亟沉水中可免。有鸟夜张其翼，则发大光，可自照。野猪猛兽，纵横原野。土人善走，疾如奔马，又能负重，若足力竭后，以针刺股，出黑血少许，则疾走如初。取黄金，每岁限定几日，先期斋戒，以祈神佑。又有一岛，女人善射，又甚勇猛，生数岁即割其右乳，以便弓矢，昔有商船行近此岛，遇女子荡小舟至，射杀商船二人，去如飞，不可追逐。更有一岛，土人言其泉水甚异，于日未出时，往取其水，洗面百遍，老容可复如少。又有一岛，名百尔谟达，无人居，魔丛其上，其侧近海无风，恒起大浪，海船至此甚险，四十年间，曾有一船至彼，魔蓦登其舟，舟中人皆惊仆，独一舵师不为动，且诘问何物，魔即应言，舟中有何工作，我当代汝，舵师指授所为，魔一一与言相反，如命东即西，命行则止，舵师恍悟一法，乃颠倒命之舟，即疾行，甚如飞鸟，海道三万里，三日而至，抵家言起程之期，人皆不信，视所寄书中日月，果然其怪异如此。又有一岛，墨瓦兰尝过此岛，不见人物，谓之曰无福岛。又有珊瑚岛，以多生珊瑚树，故名之。有新为匿岛，甚大，其势貌似利未亚之为匿岛，故以为名，亦曰入匿。向未周绕此地，意其与墨瓦蜡尼相连，十馀年前乃知有海船过其南，见为一岛。经度起赤道以南一度至十二度止，纬度起一百六十五至一百九十止。其土风未详。《每月统纪传》曰澳大利亚为屿，四边滨大南海，及东南海也。南南极出地四十七度一十七分，北南极出地十度三十七分，西出地偏东一百一十四度二十八分，东出地偏东一百五十三度二十三分。

○西海诸岛

《万国地理全图集》曰：亚默利加西海之隅，群岛棋布，皆被欧罗巴列国所据，买黑面人垦种之，是以居民稠密。惟中多火峰，屡次地震，狂风辄作，走石飞沙。其岛之形势如弓弯。北极出自一十度至二十六，偏西自六十至八十四度。南及可危等国，北至缚即花旗国之半地。其小屿在南，北向益增。内有加勒岛，和暖丰产，同于南海群岛，出白糖酒珈琲珂珂子棉花等物。但因开垦劳费，所出货价贵昂，是以生意不盛。西班牙国初寻新地之时，到此等岛即开马头，攻逐土蛮，又买黑奴以耕垦，由此贩卖人口之弊起。及西班牙人后到南海大地之金山，遂弃此群岛犹敝踪，不复管辖。由是海贼群赴岛港藏匿，攻击是班牙国之商船，如此英佛荷丁瑞各国，又乘乱据占其地。及佛国大变之时，其藩属之黑奴即动干戈，将其白主一切戮杀，致万有馀人受害。嗣后土酋自立为主，是以英国人，仰体圣书福音之理，知贩卖

人口，不合律例，明背上帝，是以论饬所有藩属，岛内各黑奴一概释放。而颁银六百万两，赏还买黑奴之价，共放五十三万七千之奴，此等仁行殊属可赞焉。英国在此洲内所据之，岛如牙买加。有山下溪涧，灌溉田土，其农甚盛。而其会城京敦，被地震灭，且飘风毁坏。又安地禹亚吉等岛，古时归英国。而多米尼加山地多巴曾被地震，大半败坏，居民死者数千。地虽广而民惮劳，所运出之产，价银二百七十万两。荷兰在此洲内所居之岛，止两处，虽不紧要，其居民多发财。丁抹国，在此洲内所属岛，亦止两处，专务教其黑奴而释放之。瑞国亦据小岛，在北方，但其生意微少〈（原无今补）〉。

《地理备考》曰：海地岛国在美里加州北区之东南。北极出地十八度起，至二十度止，经线自西七十一度起，至七十七度止。四面枕海，东向波尔多黎各岛，西对矮买物、古巴二岛，东界安的列斯海，北接大西洋海。长约千五百里，宽约五百五十里，地面积方六万里，烟户一兆馀口。本国地势，山陵平原相间，海滨陡峭，河道甚多，其长者七。湖则无几。其最大者曰索马士，曰英黎几洛，曰多塞。田土膏腴，谷果丰饶，土产铜、铁、沉香、绵花、烟叶、蓝靛、甘蔗、加非、牙兰米等物。地气潮湿，民性不驯，不设君位，国人自立官长以理事。所奉之教，乃罗马天主教也。工商皆少。明孝宗宏治五年，为意大里亚国人所据，越数载，其东土为大吕宋国所取，西土为佛兰西国所获。乾隆五十六年，见花旗国自立之后，于是西土黑人首叛佛兰西国，其后东土之人亦接踵效尤，遂于道光二年合为一国，不受统属。国分六府，曰西府波尔德比零塞，乃本国都也，建于哥那威海湾。曰南府，曰东府，曰北府，曰东北府，曰东南府。

《地理备考》曰：本洲之地，隶瑞西国兼摄者，曰桑巴尔多罗美，乃安的列斯岛之一也。居纬度北十七度五十五分，经度西六十五度十分。回环约五十里，烟户一万六千馀口。田土肥饶，树木上品，泊所稳便，舳舻相继，首邑名古斯达维亚。

《外国史略》曰：南默利加海隅内，洲屿棋布星罗。自弗利他半地，延及南亚默利加岛屿，广袤方圆四千三百八十里，与亚西亚之南方相连。其地水多急溜，船率入之必遭危险。各岛之山高仅八丈，天气甚热，所产惟糖加非南果绵花，而罕谷米。是班亚初到此岛时，居民无多，不知工作，是班亚即在列岛开埠，广种植，买黑奴来此代耕。其后他国云集，或攻击是班亚而夺其屿，或开荒芜而设邦国，岛中居民多黑面，约二百九十万口，或两洋列国苗裔是巴亚人三十五万口，英吉利人六十万，佛兰西人三十万，荷兰人六千五百，地方约二千一百里，居民八十三万口，其中黑奴三十万口，自主之黑人十万口。英国所管者七十五万口，其中黑面人五十九万七千口。佛兰西所管者方圆六十里，居民二十三万三千口。荷兰所管者方圆十三里，居民二万一千六百口，大半系黑奴。大尼国所管者八里，居民四万五千口。瑞丁所管者二里半，居民千六百口。黑面人所管者方圆千三百八十五里，居民约一百万口。其中佛兰西人三万口。最大之岛曰海地，昔属佛兰西。乾隆五十八年佛国之叛奴，原听其自主，后叛乱，黑面人皆驱佛国官吏兵士遂自立为王。效花旗国，择

首领管国务，佛国屡攻伐不能克。军士四万五千，民壮十一万三千，水师小船六只。国帑收六百万两，公欠项四百万两。当佛国摄权之际，运出加非白糖数百万两，自乱后产物遂减。其都曰京港。又是班亚所属之古巴岛，长百五十里，阔三十五里，居民七十三万口，黑奴居三分之一。高山连亘，出金银石炭，多支河下流。进口之船，千八百八十九只，运出之白糖二十五万石，加非五十万三千石，运入之物共计千八百五十三万圆，运出之物一千三百万圆。其烟为众国所贵。其都系合瓦那，内有礼拜堂，甚煌耀，费银十六万。贵港屿，亦属是班亚。广袤百八十二里，居民二十八万八千，其园圃五千七百亩。所出者木料、白糖、绵花、米粟并加非、胡椒、烟、树膏，每年运入之货甚多，所出者亦然。

英人所据之岛，计共七所，别有他洲所据。牙买加岛之百姓，每年通商利银约六千万圆，运入者二千一百万圆，运出者二千八百万圆，出银二百一十万圆。守兵士三千三百，民壮一万八千一百。又巴哈马群洲，每年商利银二百一十万圆，运入者六十四万圆，运出者五十三万圆，公帑收银一十三万三千圆，出十四万圆。守兵士二百五十，民壮六百。又拉巴突等屿，每年商利银三千三百九十圆，运入之货四百六十六万圆，运出者千四百八万圆，国帑收银三十八万五千圆，出三十七万八千圆。守兵五百，民壮六千九百。又安地吴亚等岛，百姓所收千二百三十二万圆，运入之货二百一十圆，运出之物三百九十九万圆，入公帑二十一万三千圆，出公帑二十一万九千圆。守兵八百五十，民壮四千八百。又路齐亚岛，每年商利银二百一十万圆，运进之物四十五万五千圆，运出者五十八万一千圆，收公帑七万六千圆，所出均同。守兵三百，民壮六百。又三位岛，每年商利银九百三十二万五千圆，运入者二百一十万圆，运出者一百七十五万圆，公帑所收二十四万五千圆，出帑均同。守兵一千一百，民壮四千五百。又北母他等洲，每年商利银百一十二万圆，运进之货二百五十六万圆，运出者十八万九千圆，公帑收七万圆，出七万五千圆。兵士二百，民壮六百。此岛丰饶不一，产白糖、加非等。此藩属地，若无灾难，实海外最美之区。英人派官管理此岛，白面人不多，其黑面人则遍处散聚，有耶稣之教师，各处教之。又大尼荷兰等国，所据之洲甚微，今不悉叙。

《外国史略》：巴他峨尼地之南，所称火地之矮人，悉缺食物。终年冰雪，由大西洋望大东洋所驶之各船，随所称焉，义兰海峡，往来风甚烈。法兰岛，英人据之，以捕鲸鱼、海马、海牛，天气虽冷，尚有牧场，足养牲畜，并出各项食物，居民罕少，再南则冰雪之地，全无居人矣。

案：承平既久，人满为患，奸宄日作，财用匱乏，一切便宜苟且，比于剜肉医疮，势如养痍，终必溃败。彼昏不知，方借口庶哉之，叹生聚之，谋而不知，时势迥殊，后之辙，非前之迹也。欧罗巴人极意搜求新地，得片土即经营垦拓，遂使万古穷荒之僻岛，毕献精华，壮哉，南极未开新地附录。

《职方外纪》曰：先是阁龙诸人，既已觅得南亚墨利加矣。西土以西把尼亚之君复

念地为圆体，徂西自可达东，向至亚墨利加，而海道遂阻，必有西行入海之处。于是治海舶，选舟师，裹糗粮，装金宝，缮甲兵，命一强有力之臣名墨瓦兰者，载而往访。墨瓦兰既承国命，沿墨利加之东偏紆回数万里，展转经年岁，方茫然未识津涯，人情厌斁，辄思返国，墨瓦兰惧功用弗成，无以复命，拔剑下令舟中曰：“有言归国者斩”于是舟人震慑，贾勇而前。已尽亚墨利加之界，忽得海峡，亘千馀里，海南大地，又复恍一乾坤。墨瓦兰率众巡行，间关前进，只见平原潏潏，杳无涯际，入夜则磷火星流，弥漫山谷而已。因命为火地，而他方或以鸚鵡名洲者，亦此大地之一隅。其后追厥所自，谓墨瓦兰实开此区，因以其名命之曰墨瓦蜡，为天下之第五大州也〈（《四库全书总目》辨此云，中国地数万里。为一州，此海峡仅千馀里，亦指为一州，岂非荒诞。源案此书，言过海峡后始见海南大地，又恍一乾坤，非即以海峡为一州也。犹西洋来中国者必绕过大浪山海峡，始至阿细亚洲，非即以大浪山峡为州也。海南大地，据地球仪器考之，亦必确有数万里之地，在南极左右。但西人初至其地无人可访，又无暇周绕测量，是以仅言其略。实无以海峡当一洲之说。盖西人书所谓峡者有三焉，两洲相接细地相连如西红海之峡是也，两岛中断舟过其间如小瓜哇与下港之峡是也，海岸斗出海中形如箕舌，若南洋满刺加南印度戈什峡，小西洋大浪山之峡是也。是峡于后二者必居其一）〉。墨瓦兰既逾此峡，遂入太平大海，自西复东，业知大地已周其半，竟直抵亚细亚马路古界。度小西洋，越利未亚大浪山，而北折遵海以还报本国，遍绕大地一周。四过赤道之下，历地三十万馀里，从古航海之绩，未有若斯盛者。因名其舟为胜舶，言战胜风涛之险，而奏巡方伟功也。其人物、风俗、山川、畜产，与夫鸟兽虫鱼，俱无传说，即南度极数道里远几何皆推步未周，不敢漫述，以俟后之君子。

《澳门新闻录》曰：道光庚子，有佛兰西二船，往南极考察地方，船主阿威厘统理之。正月十九〈（即十九年十二月十五日）〉，直至南极之六十六度，遥望已见有地方，第三日离南极地不过五六里，遂遣小船向无冰处登岸上，拾取石块。地甚大，一望无边，阿威厘本欲细心考察。第五日，忽见离岸一带皆已成冰，不得已即回，第六日忽遭暴风，西厘船险几撞破，更不敢向南极驶去。南极下地方寒冷可畏，并不见有走兽等物，即海骡亦不见一只。阿威厘今既考察出此地，其名已列于本国行船之馆矣。

又云考察出南极地方之事，始于米利坚船而佛兰西人阿威厘今亦已考察至此，于一千八百二十三年，有捕获海骡之人名吻特厘，曾驾船驶至南极之七十四度，并无险阻，更为温暖。于一千八百三十九年六月十九〈（即十九年五月初九日）〉，阿威厘曾写信与噶拉巴之才艺馆，辨驳此事，云吻特厘所说，果真何不驾船直向南极驶去。阿威厘自言于二月十五〈（即十九年正月初二日）〉，驶至纽耶兰岛，同山威治岛之间，尚未到吻特厘所说之处，即见有冰山，阻其去路，一望无边，欲寻一缝隙前进，亦不能得。或者吻特厘到彼处时，适值冰山尽消，故无阻碍，得到七十四度，亦未可定。但每年额连兰岛出海渔船不少，岂无间遇冰消可至七十四度者乎，此阿威厘辨驳之语。但以理度之，愈近南极，天气应愈温暖，何以反天寒冰大，是

天气之冷暖，并不全系乎度数之远近，况船主巴里亦曾驾船到过南边七十五度之墨威厘岛，而船上之伙长人等亦仍在船面行走，二三点钟之久，始觉微寒而已。是巴里所到之处，比吻特厘更近南极一度，而天气亦不觉十分寒冷，更见吻特厘所言之可信，而阿威厘天寒冰大之说可疑〈（案：两极下皆太阳行度所不到，皆冷带也，距热带温带甚远，是冰阻无人物之说，甚确而南极下温暖之说，全无此理）〉。

又云考察南极地方之事，云有新回来之，阿弥利坚洲育奈士迭国温先呢士船，船主名威厘机士。此船离腮呢岛已八十日，正月十九〈（即十九年十二月十五日）〉，直驶至南极之六十四度二十分，见有地土，此船曾绕着南极海岸，游行七百里。因离岸稍近，常致搁浅，常为冰山所环绕，并历暴风不少，幸船未撞破。现在带有南极地方之石回来，有重至百馀磅者，考察出此地，虽无益于贸易之事，然可以释众人欲知南极有无地土之疑心。现在三船会合，即要到纽耶兰岛去，若幸得回纽耶兰，即在往南极考察。

《海岛逸志》曰：和兰欲胥南洋之地，开扩州府。以甲板船四，各持三载粮，从南海觅地方，望南迅发，穷极涯际，不见岛屿。经一年馀，至昏黑之处，云雾绕船，不辨天海，毒鱼怪鸟，窥人不避，日月无光，昼短只二三时，馀则长夜矣。骇惧而返，及至葛留巴，四舟仅存其二焉。

《每月统纪传》曰：地球面上，惟近中带者最为温热，离中带偏南北两边，皆有冬夏之别，寒热不等，至更远离中带两边，则寒冻尤甚，常有永不消之冰，英佛等国多有船到南北冰洋，勘察新地，因极南多过冰成大山，不无破船，是以先未察悉。去年有一船游奕南洋露出一大洲，在非利加及米利加二大洲之南，见有等岛，名为大风，此外无他生物，亦无果蔬可食，想其地极寒，恐种谷麦不生也。

卷七十一

叙曰：天祐下民，作之君，作之师，君长一国一时，师长数十国数百世。故自东海以至西海，自北极以至南极，国万数里，亿数人，恒河沙数，必皆有人焉。魁之桀之，纲之纪之，离之合之。语其纵，则西域自佛未出世以前，皆婆罗门教，以事天治人为本，即彼方之儒。自佛教兴而婆罗门教衰，佛教衰而婆罗门教复盛。一盛为耶稣之天主教，再盛为穆罕默德之天方教，皆婆罗门之支变。婆罗门教，游方之内者也；佛教，游方之外者也。语其横，则自中南东三印度，而缅甸，暹罗，而西藏，而青海，漠南北蒙古，皆佛教。自西印度之包社阿丹，而西之利未亚洲，而东之葱岭左右，哈萨克、布鲁特诸游牧，而天山南路诸城郭，皆天方教。其大西洋之欧罗巴各国，外大西洋之弥利坚洲各国，则皆天主教。与中国、安南、朝鲜、日本之儒教离立而四。语其支派则佛教分为三：一墨那敏教，即印度国旧教〈（一名兴杜教）〉；一大刺麻教，即西藏之黄教；一墨鲁赫教，即西藏之红教〈（一名墨低兰教）〉；天方回教分为三：一由斯教，即婆罗门旧教；一马哈墨教，即穆罕默德所创，行于阿丹者；一比阿厘教，则其兄子所传，行于巴社都鲁机者。

天主教总名为克力斯頓教，亦分三：一加特力教，乃意大利所行天主教旧教；一额利教；一波罗特士頓教。则诸国所后起，大都有不供他神，而尚供天主偶像画像，及礼拜前贤生日者。有一切不供，惟敬天者。有供十字者，有不供十字者。世传西洋惟英吉利一国独辟天主教，不知英夷所辟者加特力教。尔故英夷国王将立，则国人必会议约新王背加特力教，而尊波罗特士頓教，始即位。英夷何尝尽辟克力斯頓教哉。又有道教，散处各国，子身修炼，名巴柳士良教，欧罗巴、利未亚洲皆有之。特不及各教之纪年建朔云。自道术分裂。儒分八，墨分三，释道亦各分数支，同中立异，斗争坚固。于一教中且自相胡越，况欲并包殊族，泯其畛域，会其大同，此必不然之数。广谷大川异俗，民生其间，刚柔轻重迟速异。齐皇清能并回部，不能使天山南路舍回教，而被儒服，能服番蒙，不能使西藏、漠北舍黄教而诵六经。鄂罗斯兼并西北，英吉利蚕食东南，而不能使白帽、黄帽之方尽奉天主。故曰因其教，不异其俗，齐其政不易其宜，作南洋、西洋各国教门表。

国名 教名 暹罗 佛教 缅甸 佛教〈（南掌、老挝、整线各国并同）〉 国名 教名
小吕宋岛 加特力教〈（旧本土番无教门，明以来西洋据此地行教）〉
大瓜哇岛〈（即苏禄文莱等）〉 旧佛教，今回教 小瓜哇岛〈（即葛留巴）〉
旧佛教，今回教 亚齐岛〈（即苏门答刺三佛齐）〉 旧佛教，今回教

〈馀小岛无教门不录。〉

国名 教名 东印度榜葛刺 墨那敏佛教 南印度孟迈等地〈（锡兰山岛同）〉
墨那敏佛教 中印度温都斯坦
墨那敏佛教〈（温都斯坦今称为小白头回子，据此志尚属佛教）〉 西印度包社

旧佛教，今比阿厘回教〈（或曰即巴柳士良教）〉西印度阿丹
旧佛教，今马哈墨回教、由斯回教北印度克什弥尔旧佛教，今马哈墨回教
南都鲁机〈（兼有加特力教）〉旧佛教，今比阿厘回教、由斯回教

〈（此外若葱岭以西之哈萨克、布鲁特、巴达克山、爱乌罕、布哈尔敖罕，葱岭以东之八城回部自明以来，并改佛教为马哈墨回教，以非海国不列表）〉

国名 教名 东方伊揖国〈（国内兼有佛教）〉由教额利教、加特力教
东方阿迈司尼国 由教加特力教 东利未亚八部

〈（其六部属葡萄亚，教门未详，其二部属阿丹马哈墨回教）〉北利未亚四部
马哈墨回教 西利未亚二十四部〈（小国土蛮祀鬼，不知教门）〉南利未亚四部
〈（小国土蛮祀鬼，不知教门）〉中利未亚二十五部 马哈墨回教 国名 教名
葡萄亚国 加特力教 荷兰国

婆罗特士顿教〈（弥尔尼壬与荷兰同国而别奉加特力教）〉佛兰西国 加特力教
英吉利国 婆罗特士顿教 意大里国 加特力教 耶马尼国二十七部

〈（半加特力教，半波罗特士顿教）〉欧塞特厘阿国
加特力教、婆罗特士顿教〈（塞牙里与阿国亦兼有三教）〉波兰国 加特力教
绥林国 婆罗特士顿教 领墨国 加特力教 瑞国 加特力教 普鲁社国

〈（或由教、或鲁低兰教、或加特力教、或婆罗特士顿）〉北都鲁机国 阿比厘回教
部名 教名 大俄罗斯十七部 额利教 西俄罗斯八部 额利教 东俄罗斯五部 额利教
小俄罗斯三部 额利教 南俄罗斯五部 额利教 加厘俄罗斯四部 额利教
西南新藩俄罗斯五部 马哈墨回教〈（本回部故地）〉东北新藩俄罗斯四部
刺麻佛教〈（近蒙古部落故）〉国名 教名 北洲弥利坚国二十七部
加特力教、婆罗特士顿教 北洲智利国 加特力教、婆罗特士顿教

〈（其馀北洲内，墨西哥等国，南洲内孛露国，金加西蜡国，伯西尔国，智加国，教门未详）〉

《四洲志》载加特力教万有千六百万人。额利教七千万人。婆罗特士顿教，四千二百万人。由教，约四五万人〈（亦作由斯教）〉。马哈墨教，万有二千万人。巴柳士良教，七千三百万人〈（即道士教）〉。墨那敏教，七千万人。大刺麻教，五千万人。墨鲁赫教，四千万人。共计各教六万七千一百万人。案克力斯顿，乃西洋本教，或能悉其多寡，至西藏蒙古之佛教，新疆南路之回教，与各洲之道教，英夷何由籍其人数耶。又志中惟克力斯顿教三派，分载最详，至天方教，则阿丹志中既言回教中分为二，一曰色底特士教，一曰比阿厘教。阿厘者，穆罕默德兄子传教而小别其宗，乃各国志中，但概称马哈默教，无一曰比阿厘者。今惟巴社及都鲁机，知其为比阿厘回教，馀国则亦无从区别，当俟质诸天方之士。

卷七十二

叙曰：西域历法传中国者，唐有〈九执历〉，元有〈万年历〉，〈回回历〉。〈九执〉即天竺历法也。天竺以望后一日，至次月望为一月，故有白半月，黑半月之名。今西夷欧罗巴洲，及弥利坚州，各国历法，则与天竺异，而与回回历略同。皆以中国冬至后十日，为元旦。盖取太阳过宫最卑，行最疾之日，为赢缩起算之端。与中国冬至，太阳在赤道最南之日者殊科。然太阳之有南北，寒暑所由生也，耕敛所由节也，是为钦若授时之本，必当显然布告，非若赢缩之事，特台官逐日推算，以定二十四气七十二候，及晦朔弦望交食之时刻，百姓则可日用而不知也。且最卑有行分，约六十年行一度，即差一日，其始年在中国冬至前二十日，约计道光五十年后，即在冬至后十一日，再积三千馀年，以中国春分日为元旦矣。万年而后，元旦将在炎夏矣。中国与欧罗巴，同在赤道以北，中国以太阳在赤道最南，昼极短夜极长之日为冬至。冬日太阳在赤道南则斜照中国，故恒寒。夏日太阳在赤道北则正照中国，故恒暑。以此节耕敛颁，政事奚不可行。于欧罗巴，乃不以寒暑为岁时，不与物候民，事相关应何哉。或谓中土，居国也，囿于一方，独成其是，西夷行国也，日航大海，绕地一周，舟行日日千馀里，无庸候风，三日可更裘葛，今日至一地，而省民耕，明日至一地，即省民敛，不必以寒暑为岁时。此沉溺西法曲徇之论。夫西农各耕本国，不随市舶为迁移，西商遄鹜重溟，何预耕敛之省视。岂有人君，颁历不据本国之时令，而任无定之舟航。国朝曾取其人供职钦天监，考制仪器而不用其历法，盖知其与民事无涉也。今华夷通市，正朔相通，姑表其异同，以便稽览，其法足三百六十有五日为一年。每四年于三月内闰一日，其各月内大小日数，则正月三月五月七月八月十月十二月，各三十有一日。四月六月九月十一月，各三十日。惟二月止二十有八日。

今表两年为例如左：

中国历 西夷历 道光十八年戊戌 〈（西夷千八百三十八年）〉 **正月**小建甲寅
〈（西夷正月曰“然收阿厘”）〉 初一日 〈（西夷正月二十六日）〉 初六日
〈（西夷正月三十一日）〉 十一日 〈（西夷二月初五日）〉 二十一日
〈（西夷二月十五日）〉 **二月**大建乙卯 〈（西夷二月曰“飞普阿厘”）〉 初一日
〈（西夷二月二十四日）〉 初五日 〈（西夷二月二十八日，月尽）〉 十二日
〈（西夷三月初六日）〉 二十二日 〈（西夷三月十六日）〉 **三月**小建丙辰
〈（西夷三月曰“吗治”）〉 初一日 〈（西夷三月二十六日）〉 初六日
〈（西夷三月三十一日，月尽）〉 十一日 〈（西夷四月初五日）〉 二十一日
〈（西夷四月十五日）〉 **四月**大建丁巳 〈（西夷四月曰“族悖厘尔”）〉
己巳初一日 〈（西夷四月二十四日）〉 初七日 〈（西夷四月三十日，月尽）〉
十一日 〈（西夷五月初四日）〉 二十一日 〈（西夷五月十四日）〉 **闰四月**小
初一日 〈（西夷五月二十四日）〉 初八日 〈（西夷五月三十一日，月尽）〉
十一日 〈（西夷六月初三日）〉 二十一日 〈（西夷六月十三日）〉 **五月**小建戊午

〈（西夷五月曰“咩”）〉 初一日 〈（西夷六月二十二日）〉 初九日
〈（西夷六月二十日，月尽）〉 十一日 〈（西夷七月初二日）〉 二十一日
〈（西夷七月十二日）〉 **六月**大建己未 〈（西夷六月曰“润”）〉 初一日
〈（西夷七月二十一日）〉 十一日 〈（西夷七月三十一日，月尽）〉 二十一日
〈（西夷八月初十日）〉 **七月**大建庚申 〈（西夷七月曰“如来”）〉 初一日
〈（西夷八月二十日）〉 十一日 〈（西夷八月三十日）〉 十二日
〈（西夷八月三十一日，月尽）〉 二十一日 〈（西夷九月初九日）〉 **八月**
小建辛酉 〈（西夷八月曰“阿兀士”）〉 初一日 〈（西夷九月十九日）〉 十一日
〈（西夷九月二十九日）〉 十二日 〈（西夷九月三十日，月尽）〉 二十一日
〈（西夷十月初九日）〉 **九月**大建壬戌 〈（西夷九月曰“涉点麻”）〉 初一日
〈（西夷十月十八日）〉 十一日 〈（西夷十月二十八日）〉 十四日
〈（西夷十月三十一日，月尽）〉 二十一日 〈（西夷十一月初七日）〉 **十月**
大建癸亥 〈（西夷十月曰“多屋麻”）〉 初一日 〈（西夷十一月十七日）〉
十一日 〈（西夷十一月二十七日）〉 十四日 〈（西夷十一月三十日，月尽）〉
二十一日 〈（西夷十二月初七日）〉 **十一月**小建丙子
〈（是月初六日甲辰未刻冬至，西夷十一月曰“如民麻”）〉 初一日
〈（西夷十二月十七日）〉 十一日 〈（西夷十二月二十七日）〉 十五日
〈（西夷十二月三十日，岁终）〉 十六日
〈（西夷一千八百三十九年正月初一日）〉 二十一日 〈（西夷正月初六日）〉
十二月大建乙丑 〈（西夷十二月曰“厘森历”）〉 初一日
〈（西夷正月十五日）〉 十一日 〈（西夷正月二十五日）〉 十七日
〈（西夷正月三十一日，月尽）〉 二十一日 〈（西夷二月初四日）〉
道光十九年己亥 〈（西夷千八百三十九年）〉 **正月**小建丙寅 初一日
〈（西夷二月十四日）〉 十一日 〈（西夷二月二十四日）〉 十五日
〈（西夷二月二十八日，月尽）〉 二十一日 〈（西夷三月初六日）〉 **二月**
大建丁卯 初一日 〈（西夷三月十五日）〉 十一日 〈（西夷三月二十五日）〉
十七日 〈（西夷三月三十一日，月尽）〉 二十一日 〈（西夷四月初四日）〉
三月小建戊辰 初一日 〈（西夷四月十四日）〉 十一日 〈（西夷四月二十四日）〉
十七日 〈（西夷四月三十一日，月尽）〉 二十一日 〈（西夷五月初四日）〉
四月小建 初一日 〈（西夷五月十三日）〉 十一日 〈（西夷五月二十三日）〉
十九日 〈（西夷五月三十一日，月尽）〉 二十一日 〈（西夷六月初二日）〉
五月大建庚午 初一日 〈（西夷六月十一日）〉 十一日 〈（西夷六月二十一日）〉
二十日 〈（西夷六月三十日，月尽）〉 二十一日 〈（西夷七月初一日）〉
六月小建辛未 初一日 〈（西夷七月十一日）〉 十一日 〈（西夷七月二十一日）〉
二十一日 〈（西夷七月三十一日，月尽）〉 **七月**大建壬申 初一日
〈（西夷八月初九日）〉 十一日 〈（西夷八月十九日）〉 二十一日
〈（西夷八月二十九日）〉 二十三日 〈（西夷八月三十一日，月尽）〉 **八月**
小建癸酉 初一日 〈（西夷九月初八日）〉 十一日 〈（西夷九月十八日）〉
二十一日 〈（西夷九月二十八日）〉 二十三日 〈（西夷九月三十日，月尽）〉

九月大建甲戌 初一日 〈(西夷十月初七日)〉 十一日 〈(西夷十月十七日)〉
二十一日 〈(西夷十月二十七日)〉 二十五日 〈(西夷十月三十一日, 月尽)〉
十月大建乙亥 初一日 〈(西夷十一月初六日)〉 十一日
〈(西夷十一月十六日)〉 二十一日 〈(西夷十一月二十六日)〉 二十五日
〈(西夷十一月三十日, 月尽)〉 **十一月**大建丙子
〈(是月十七日己酉戌刻冬至)〉 初一日 〈(西夷十二月初六日)〉 十一日
〈(西夷十二月十六日)〉 二十一日 〈(西夷十二月二十六日)〉 二十六日
〈(西夷十二月三十一日, 岁终)〉 二十七日
〈(西夷一千八百四十年正月初一日)〉 **十二月**小建 初一日
〈(西夷正月初五日)〉 十一日 〈(西夷正月十五日)〉 二十一日
〈(西夷正月二十五日)〉 二十七日 〈(西夷正月三十一日, 月尽)〉
道光二十年庚子 〈(西夷一千八百四十年二月逢闰一月)〉 **正月**大建戊寅 初一日
〈(西夷二月初三日)〉 十一日 〈(西夷二月十三日)〉 二十一日
〈(西夷二月二十三日)〉 二十七日
〈(西夷二月二十九日, 月尽, 系有闰之年故多一日)〉 **二月**小建己卯 初一日
〈(西夷三月初四日)〉 十一日 〈(西夷三月十四日)〉 二十一日
〈(西夷三月二十四日)〉 二十八日 〈(西夷三月三十一日, 月尽)〉 **三月**
大建庚辰 初一日 〈(西夷四月初二日)〉 十一日 〈(西夷四月十二日)〉
二十一日 〈(西夷四月二十二日)〉 二十九日 〈(西夷四月三十日, 月尽)〉
四月小建辛巳 初一日 〈(西夷五月初二日)〉 十一日 〈(西夷五月十二日)〉
二十一日 〈(西夷五月二十二日)〉 **五月**小建壬午 初一日
〈(西夷五月三十一日, 月尽)〉 十一日 〈(西夷六月初十日)〉 二十一日
〈(西夷六月二十日)〉 **六月**大建癸未 初一日 〈(西夷六月二十九日)〉 初二日
〈(西夷六月三十日, 月尽)〉 十一日 〈(西夷七月初九日)〉 二十一日
〈(西夷七月十九日)〉 **七月**小建甲申 初一日 〈(西夷七月二十九日)〉 初三日
〈(西夷七月三十一日, 月尽)〉 十一日 〈(西夷八月初八日)〉 二十一日
〈(西夷八月十八日)〉 **八月**大建乙酉 初一日 〈(西夷八月二十七日)〉 初五日
〈(西夷八月三十一日, 月尽)〉 十一日 〈(西夷九月初六日)〉 二十一日
〈(西夷九月十六日)〉 **九月**小建丙戌 初一日 〈(西夷九月二十六日)〉 初五日
〈(西夷九月三十日, 月尽)〉 十五日 〈(西夷十月初六日)〉 二十一日
〈(西夷十月十六日)〉 **十月**大建丁亥 初一日 〈(西夷十月二十五日)〉 初七日
〈(西夷十月三十一日, 月尽)〉 十一日 〈(西夷十一月初四日)〉 二十一日
〈(西夷十一月十四日)〉 **十一月**大建戊子 〈(是月二十九日乙卯辰刻冬至)〉
初一日 〈(西夷十一月二十四日)〉 初七日 〈(西夷十一月三十日, 月尽)〉
十一日 〈(西夷十二月初四日)〉 二十一日 〈(西夷十二月十四日)〉
十二月大建己丑 初一日 〈(西夷十二月二十四日)〉 初八日
〈(西夷十二月三十一日, 岁终)〉 初九日
〈(西夷一千八百四十一年正月初一日)〉 十一日 〈(西夷正月初三日)〉
二十一日 〈(西夷正月十三日)〉 三十日 〈(西夷正月二十二日)〉

乌程陈杰曰：《西法》云，足三百六十五日为一岁，四年闰一日，恐亦言其略耳，盖如其言推之，每年岁实适合三百六十五日四分日之一。中国汉贾逵四分法也。西洋有太史第谷，定为三百六十五日二四二一八七五。用此数推之，每一百二十八年，闰三十一日则差一日矣。四年闰一日，则一百二十八年，应闰三十二日。又最卑有行分，不及六十年，即行一度，又应闰一日最卑之行。古小今大，约略计之。一百二十八年，当闰两日，以此悬揣西法，当以百二十八年，而闰三十三日。一千八百四十年，应闰四百七十四日。乃以三百六十五日，与一千八百四十年相乘，得六十七万一千六百日，加四百七十四日，得六十七万二千零七十四日。是自英国奉耶稣教之年之元旦日起，至其第一千八百四十一年之元旦前一日，止之日数也。其第一千八百四十一年之元旦前一日，为我中国道光二十年庚子十二月初八日甲子日，以中国历朝岁实递有增减，约略计之道光二十一年辛丑年前冬至日，上距汉平帝元始元年年前冬至日，得六十七万二千零五十日，两数相减，余二十四日，再减去十二月初八日，系在冬至后九日余十五日，是奉耶稣教之年之元旦日，在汉平帝元始元年年前冬至之前仅十五日耳。惟中国于太阳最卑，至元郭守敬始发之，尚未知有行分。至明季，始知有行分。我朝康熙乾隆年间，两改其行，汉晋唐宋实不可考。则当两汉之末，哀平之年，或在冬至前二十余日，亦未可知。梅文鼎据康熙戊辰瞻礼单算，得耶稣降生，在哀帝庚申年冬至前二十余日，窃疑是日为奉耶稣教始年之元旦日，非耶稣天主降生之日也。又曰哀帝元寿二年，庚申十一月之冬至，距唐高祖武德元年戊寅年前之冬至，六百一十七年。再距宋太祖建隆元年，庚申年前之冬至，又三百四十二年。再距元世祖至元年七年庚辰年前之冬至，又三百二十年。再距明太祖洪武元年戊申年前之冬至，八十八年。再距顺治元年甲申年前之冬至，二百七十六年。再距道光二十一年辛丑年前之冬至，一百九十七年。通计自汉哀帝元寿二年庚申十一月冬至起，至道光二十年庚子十一月二十九日乙卯冬至日止，凡一千八百四十年。约计六十七万二千零五十日。以现行岁差，及今道光二十一年前冬至日冬至时，在箕初度五十六分计之，汉哀帝元寿二年庚申十一月冬至日，在斗十八度。又今最卑过冬至十度十分，汉哀平之交应在冬至前二十度三十分，英夷当于冬至前二十一日除岁。

俞正燮曰，释迦文佛之生也，以中土二月既望，为角宿直日数至鬼宿直日，当中土三月八日，即佛生日。若以历法言之，则当日春分后二十三日佛生也。佛本行集经，上记兜率品，俯降王宫品并云取鬼宿日，然后入于母胎，迦叶三兄弟品云，此沙门鬼宿日生。今鬼宿明，不为余星所逼，其龙门决胜，此旁出之言，并可为确征。佛国月日，与中土不同，以宿直日，真佛日也。若树下诞生品云，春初二月八日，鬼宿合时生过去现在因果经云，二月八日生，四月七日降魔。瑞应经云，四月八日夜，明星出时生。其佛罗安国，渤泥国，或以为六月十五日佛生，佛西土人，安得以中宪论月日哉。佛说灌佛经，四月八日以期灌佛，摩诃漆头经，佛告天下人民，十方诸佛，皆用四月八日夜半时生，为春夏之际。殃罪悉毕，万物发生，毒气未形，不寒不热，时气和适，以今为佛生日。又汉末交州牟子博《理惑论》佛四月八日生，孟夏之月仲吕之时。此并中土之妄言，或《宏明集》所附益也。《佛所行赞》

则云三月八日生，元李翀《日闻录》云元初杭城，每岁三月八日迎佛，或新至番僧，犹有所受。唐元奘《西域记》佛国云，菩萨诞灵，以舍佉月后半八日。蓝摩国剃发，率堵波云，佛以吠舍佉月后半八日出家。摩揭陀国菩提树，东北人云，佛以吠舍佉月后半八日生，成等正觉，此并三月八日之明征。惟加毗罗代率堵国云，菩萨降圣母胎，当此中土五月十五日，诸部则以此月二十三日夜降母胎，当此五日八日，此并指其入胎之时，非出胎时。佛国上座部云，菩萨诞灵吠舍佉月后半十五日，此则一以为佛生三月十五日，小有不同。《晋法显传》云，舍卫城，年年常以建卯月八日行像。于阗国，四月一日至十四日行像。《西域记》又云屈支以秋分行像。是西土作佛事月日，无有言佛以巳月八日生者。长阿舍经，阿闍世王，二月八日沸星出时佛生，二月八日沸星出时出家，二月八日沸星出时成道，八月八日沸星出时取般涅槃。无垢施菩萨分别应辨经音义云。依诸经言，佛以鬼宿日生，成道出家，皆用二月八日。鬼宿合时，依日藏分经用二月九日曙，以夜分属九日。故《辽史·礼志》云二月八日，为悉达太子生辰。《金史·海陵纪》云正隆元年十一月癸巳，禁二月八日迎佛，其致误有由。经云二月后半八日者，佛国以中国望后一日至中国次月望为彼土一月。开元占经，有九执法，唐僧瞿云悉达治唐宪，以明庆二年二月一日起算〈（《唐志》云开元二年误）〉。其本术则云，白博叉二月春分朔，于是曜躔娄以起算，然则春分本中法。二月中鬼宿，当春分起算，角直之二十三日，合白黑博叉〈（言月自望至望白半月黑半月）〉则鬼直为后半八日〈（谓黑博叉之第八日）〉。节气中气不能齐则当朔望范之。取一岁之第一鬼宿日就西法以春分言，由中法二月十六日起，角直数之，则《西域记》所称佛国吠舍佉月后半八日生者，于诸说中为独合。佛本行经，佛苦行六年，二月十六日善生村主二女作糜，至二十三日供佛，十五日为一半，则二十三日是后半八日也。分别应辨音义言二月八日者，在西土一月之后半，当属西土之二月。而译者以中土二月当之，名差半月，实差一月。是说也，吾思之十年，读开元占经而始知之。〈（源案：俞氏考佛生年甚舛，而考佛生日则是，故分别存之。）〉

回回历法，西域默狄纳国王马哈麻所作。其地北极高二十四度半，经度偏西一百零七度，约在云南西八千八百馀里。其历元用隋开皇己未，即其建国之年也。洪武初得其书于元都，十五年秋，太祖谓西域推测天象最精，其五星纬度，又中国所无，命翰林李翀、吴伯宗，同回回大师马沙亦黑等译其书。其法不用闰月，以三百六十五日为一岁，岁十二宫，宫有闰日，凡百二十八年而宫闰三十一日，以三百五十四日为一周。周十二月。月有闰日，凡三十年月闰十一日。历千九百四十一年宫月日辰再会，此其立法之大概也。按西域历术见于史者，在唐有〈九执历〉，元有札马鲁丁之〈万年历〉。〈九执历〉最疏，〈万年历〉行之未久。惟〈回回历〉设科隶钦天监，与大统参用，二百七十馀年。虽干交食之有无深浅时有出入，然胜于〈九执〉、〈万年〉远矣。但其书多脱误，盖其人之隶籍台官者，类以土盘布算，仍用其本国之书。而明之习其术者，如唐顺之、陈坏、袁黄辈之所论著，又自成一家言。以故翻译之本，不行于世，其缺残宜也。今为博访专门之裔，考究其原书，以补其脱落，正其讹舛，为回回历法著于篇。〈（案：“默狄纳”即“默德那”之音转

。) >

卷七十三

叙曰：自生民以来，际天所覆，大一统之国惟中国。万里一朔，故正系王，王系春，以时改元纪号，整齐天下，编垂史册，各不相袭。此外，九夷八荒，自为风气，则皆各君其国，各子其民矣。苟各自为朔，将棼然杂出，奚从纲纪条贯矣。故印度、西藏、蒙古则以佛涅槃之岁后纪年，葱岭东西各回部则以天方穆罕默德辞世之岁纪年，大小西洋及外大西洋则皆以天主耶稣降生之后纪年，皆合数百十国数万里为一教，正朔不系君而系师，岂得已哉。《隋书·经籍志》言佛说灭度以后，正法五百年，象法一千年，末法三千年。耶稣生汉哀帝元寿间，上距周庄王十年。恒星不见佛生，阅八十岁涅槃，当周匡王六年，凡六百有二岁。而天主耶稣生，力距佛教此正法五百余年之，应汉元寿下距开皇十四年。回教穆罕默德辞世之岁，共五百九十四年，内除其生世数十载，正五百余年。驱僧毁寺，变西北诸印度为回教，此像法千年之应。是则自周至汉至隋，佛教东流，而天主与天方迭据印度，代兴持世，入主出奴，各乘气数皆悬记乎千载之前，而符合乎千载以下。天时人事，有开必先不翹五德迭王，文质递尚焉。而近日黟县俞正燮作释迦文佛生日论，独谓佛生于汉成帝元延元年四月丁丑沸星四面下至地之日，与耶稣同时，至隋世回教兴始为正法。五百之岁由其说，则佛生距汉明帝永平三年感梦之时，仅七十二岁，是佛与明帝同时。遽已名闻汉廷，光征帝梦，而白马驮经之使，竟当亲觐金容面聆口授乎。俞氏于汉永平之梦，则欲减佛寿为六十七岁以就之（以明帝永平八梦，必在佛灭后故），于像法千年，又以旃檀像至宋太平兴国始移东都当之（不以其离西土之岁而以其在中土迁移之岁，则此像至今尚存燕京旃檀寺，不将谓像法二千年耶。俞氏以佛授记旃檀像于佛灭度千年后，像往震旦，即使果如所论，而旃檀佛像以梁天监十年四月五日至扬都，距周匡王六年佛灭度时千有百载，亦正合千年之讖。若佛灭于汉章帝时则至梁天监仅四百余年耳，佛灭四百载旃檀佛像已离西竺适中土，安得谓西方像法垂千年乎）。辨证弥勤，踏盘弥远，天方教辟佛，天主教岂不辟佛，乃以正法之替，独归之回教乎。计道光二十有二年，距周匡王五载佛灭度之岁，凡二千有四百四十四年。距汉元寿初天主耶稣降生之岁，千有八百四十二年，距隋开皇十四载回教主辞世日，千有二百五十年。今列西洋年表，而以回教佛教年岁缀其后。

中国纪年 西洋纪年 汉哀帝元寿二年庚申冬至

西洋耶稣降生（上距周匡王五年佛涅槃之岁，六百有二年）

汉平帝元始元年（凡五年） 西洋耶稣第一年 汉孺子婴居摄元年（凡三年）

西洋耶稣六年 新莽始建国元年（凡五年） 西洋耶稣九年

新莽天凤元年（凡六年） 西洋耶稣十四年 新莽地皇元年（凡三年）

西洋耶稣二十年 汉更始元年（凡二年） 西洋耶稣二十三年

汉光武帝建武元年（凡三十一年）

西洋耶稣二十五年（案：耶稣三十岁即遭难，以后但称西洋）

汉光武帝中元元年（凡二年） 西洋五十六年 汉孝帝永平元年（凡十八年）

西洋五十八年 汉孝章帝建初元年〈（凡八年）〉 西洋七十六年
汉孝章帝元和元年〈（凡三年）〉 西洋八十四年 汉孝章帝章和元年〈（凡二年）〉
西洋八十七年 汉孝和帝永元元年〈（凡十六年）〉 西洋八十九年
汉孝和帝元兴元年〈（凡一年）〉 西洋百有五年 汉孝殇帝延平元年〈（凡一年）〉
西洋百有六年 汉孝安帝永初元年〈（凡七年）〉 西洋百有七年
汉孝安帝元初元年〈（凡六年）〉 西洋百十四年 汉孝安帝永宁元年〈（凡一年）〉
西洋百二十年 汉孝安帝建光元年〈（凡一年）〉 西洋百二十一年
汉孝安帝延光元年〈（凡四年）〉 西洋百二十二年
汉孝顺帝永建元年〈（凡六年）〉 西洋百二十六年
汉孝顺帝阳嘉元年〈（凡四年）〉 西洋百三十二年
汉孝顺帝永和元年〈（凡六年）〉 西洋百三十六年
汉孝顺帝汉安元年〈（凡二年）〉 西洋百四十二年
汉孝顺帝建康元年〈（凡一年）〉 西洋百四十四年
汉孝中帝永嘉元年〈（凡一年）〉 西洋百四十五年
汉孝质帝本初元年〈（凡一年）〉 西洋百四十六年
汉孝桓帝建和元年〈（凡三年）〉 西洋百四十七年
汉孝桓帝和平元年〈（凡一年）〉 西洋百五十年 汉孝桓帝元嘉元年〈（凡二年）〉
西洋百五十一年 汉孝桓帝永兴元年〈（凡二年）〉 西洋百五十三年
汉孝桓帝永熹元年〈（凡三年）〉 西洋百五十五年
汉孝桓帝延熹元年〈（凡九年）〉 西洋百五十八年
汉孝桓帝永康元年〈（凡一年）〉 西洋百六十七年
汉孝灵帝建宁元年〈（凡四年）〉 西洋百六十八年
汉孝灵帝熹平元年〈（凡六年）〉 西洋百七十二年
汉孝灵帝光和元年〈（凡六年）〉 西洋百七十八年
汉孝灵帝中平元年〈（凡六年）〉 西洋百八十四年
汉孝献帝初平元年〈（凡四年）〉 西洋百九十年 汉孝献帝兴平元年〈（凡二年）〉
西洋百九十四年 汉孝献帝建安元年〈（凡二十五年）〉 西洋百九十六年
汉昭烈帝章武元年〈（凡二年）〉 西洋二百二十一年
汉后主建兴元年〈（凡十五年）〉 西洋二百二十三年
汉后主延熙元年〈（凡二十年）〉 西洋二百三十八年
汉后主景耀元年〈（凡五年）〉 西洋二百五十八年 汉后主炎兴元年〈（凡一年）〉
西洋二百六十三年 魏元帝咸熙元年〈（凡一年）〉 西洋二百六十四年
晋武帝泰始元年〈（凡十年）〉 西洋二百六十五年 晋武帝咸宁元年〈（凡五年）〉
西洋二百七十五年 晋武帝太康元年〈（凡十年）〉 西洋二百八十年
晋武帝太熙元年〈（凡一年）〉 西洋二百九十年 晋孝惠帝元康元年〈（凡九年）〉
西洋二百九十一年 晋孝惠帝永康元年〈（凡一年）〉 西洋三百年
晋孝惠帝永宁元年〈（凡一年）〉 西洋三百有一年
晋孝惠帝泰安元年〈（凡二年）〉 西洋三百有二年
晋孝惠帝永兴元年〈（凡二年）〉 西洋三百有四年

晋孝惠帝光熙元年〈（凡一年）〉西洋三百有六年
晋孝怀帝永嘉元年〈（凡六年）〉西洋三百有七年
晋孝湣帝建兴元年〈（凡四年）〉西洋三百十三年 晋元帝建武元年〈（凡一年）〉西洋三百十七年 晋元帝太兴元年〈（凡四年）〉西洋三百十八年
晋元帝永昌元年〈（凡一年）〉西洋三百二十二年 晋明帝太宁元年〈（凡三年）〉西洋三百二十三年 晋成帝咸和元年〈（凡九年）〉西洋三百二十六年
晋成帝咸康元年〈（凡八年）〉西洋三百三十五年 晋康帝建元元年〈（凡二年）〉西洋三百四十三年 晋穆帝永和元年〈（凡十二年）〉西洋三百四十五年
晋穆帝升平元年〈（凡五年）〉西洋三百五十七年 晋哀帝隆和元年〈（凡一年）〉西洋三百六十二年 晋哀帝兴宁元年〈（凡三年）〉西洋三百六十三年
晋帝奕太和元年〈（凡五年）〉西洋三百六十六年
晋简文帝咸安元年〈（凡二年）〉西洋三百七十一年
晋孝武帝宁康元年〈（凡三年）〉西洋三百七十三年
晋孝武帝太元元年〈（凡二十一年）〉西洋三百七十六年
晋孝帝隆安元年〈（凡五年）〉西洋三百九十七年 晋安帝元兴元年〈（凡三年）〉西洋四百有二年 晋安帝义熙元年〈（凡十四年）〉西洋四百有五年
晋恭帝元熙元年〈（凡一年）〉西洋四百十九年 宋武帝永初元年〈（凡三年）〉西洋四百二十年 宋荣阳王景平元年〈（凡一年）〉西洋四百二十三年
宋文帝元嘉元年〈（凡三十年）〉西洋四百二十四年
宋孝武帝孝建元年〈（凡三年）〉西洋四百五十四年
宋孝武帝大明元年〈（凡八年）〉西洋四百五十七年
宋明帝泰始元年〈（凡七年）〉西洋四百六十五年 宋明帝泰豫元年〈（凡一年）〉西洋四百七十二年 宋主昱元徽元年〈（凡四年）〉西洋四百七十三年
宋顺帝升明元年〈（凡二年）〉西洋四百七十七年 齐高帝建元元年〈（凡四年）〉西洋四百七十九年 齐武帝永明元年〈（凡十一年）〉西洋四百八十三年
齐明帝建武元年〈（凡四年）〉西洋四百九十四年 齐明帝永泰元年〈（凡一年）〉西洋四百九十八年 齐主宝卷永元元年〈（凡二年）〉西洋四百九十九年
齐和帝中兴元年〈（凡一年）〉西洋五百有一年 梁武帝天监元年〈（凡十八年）〉西洋五百有二年 梁武帝普通元年〈（凡七年）〉西洋五百二十年
梁武帝大通元年〈（凡二年）〉西洋五百二十七年
梁武帝中大通元年〈（凡六年）〉西洋五百二十九年
梁武帝大同元年〈（凡十一年）〉西洋五百三十五年
梁武帝中大同元年〈（凡一年）〉西洋五百四十六年
梁武帝大清元年〈（凡三年）〉西洋五百四十七年
梁简文帝大宝元年〈（凡二年）〉西洋五百五十年
梁孝元帝承圣元年〈（凡三年）〉西洋五百五十二年
梁敬帝绍泰元年〈（凡一年）〉西洋五百五十五年 梁敬帝太平元年〈（凡一年）〉西洋五百五十六年 陈武帝永定元年〈（凡三年）〉西洋五百五十七年
陈文帝天嘉元年〈（凡六年）〉西洋五百六十年 陈文帝天康元年〈（凡一年）〉

西洋五百六十六年 陈主伯宗光大元年〈（凡二年）〉 西洋五百六十七年
陈宣帝大建元年〈（凡十二年）〉 西洋五百六十九年
隋文帝开皇元年〈（凡二十年）〉 西洋五百八十一年 隋文帝开皇十四年
回教始祖辞世之年 隋文帝仁寿元年〈（凡四年）〉 西洋六百有一年
隋炀帝大业元年〈（凡十二年）〉 西洋六百有五年 隋恭帝义宁元年〈（凡一年）〉
西洋六百十七年 唐高祖武德元年〈（凡九年）〉 西洋六百十八年
唐太宗贞观元年〈（凡二十三年）〉 西洋六百二十七年
唐高宗永徽元年〈（凡六年）〉 西洋六百五十年 唐高宗显庆元年〈（凡五年）〉
西洋六百五十六年 唐高宗龙朔元年〈（凡三年）〉 西洋六百六十一年
唐高宗麟德元年〈（凡二年）〉 西洋六百六十四年 唐高宗乾封元年〈（凡二年）〉
西洋六百六十六年 唐高宗总章元年〈（凡二年）〉 西洋六百六十八年
唐高宗咸亨元年〈（凡四年）〉 西洋六百七十年 唐高宗上元元年〈（凡二年）〉
西洋六百七十四年 唐高宗仪凤元年〈（凡三年）〉 西洋六百七十六年
唐高宗调露元年〈（凡一年）〉 西洋六百七十九年 唐高宗永隆元年〈（凡一年）〉
西洋六百八十年 唐高宗开耀元年〈（凡一年）〉 西洋六百八十一年
唐高宗永淳元年〈（凡一年）〉 西洋六百八十二年 唐高宗宏道元年〈（凡一年）〉
西洋六百八十三年 唐中宗嗣圣元年〈（凡一年）〉 西洋六百八十四年
唐武后则天〈（凡二十年）〉 西洋六百八十五年 唐中宗神龙元年〈（凡二年）〉
西洋七百有五年 唐中宗景龙元年〈（凡三年）〉 西洋七百有七年
唐睿宗景云元年〈（凡二年）〉 西洋七百十年 唐睿宗太极元年〈（凡一年）〉
西洋七百十二年 唐明皇帝开元元年〈（凡二十九年）〉 西洋七百十三年
唐明皇帝天宝元年〈（凡二十四年）〉 西洋七百三十二年
唐肃宗至德元年〈（凡二年）〉 西洋七百五十六年 唐肃宗乾元元年〈（凡二年）〉
西洋七百五十八年 唐肃宗上元元年〈（凡二年）〉 西洋七百六十年
唐肃宗宝应元年〈（凡一年）〉 西洋七百六十二年 唐代宗广德元年〈（凡一年）〉
西洋七百六十三年 唐代宗永泰元年〈（凡二年）〉 西洋七百六十四年
唐代宗大历元年〈（凡十四年）〉 西洋七百六十六年
唐德宗建中元年〈（凡四年）〉 西洋七百八十年 唐德宗兴元元年〈（凡一年）〉
西洋七百八十四年 唐德宗贞元元年〈（凡二十年）〉 西洋七百八十五年
唐顺宗永贞元年〈（凡一年）〉 西洋八百有五年 唐宪宗元和元年〈（凡十五年）〉
西洋八百有六年 唐穆宗长庆元年〈（凡四年）〉 西洋八百二十一年
唐敬宗宝历元年〈（凡二年）〉 西洋八百二十五年 唐文宗太和元年〈（凡九年）〉
西洋八百二十七年 唐文宗开成元年〈（凡五年）〉 西洋八百三十六年
唐武宗会昌元年〈（凡六年）〉 西洋八百四十一年
唐宣宗大中元年〈（凡十三年）〉 西洋八百四十七年
唐懿宗咸通元年〈（凡十四年）〉 西洋八百六十年 唐僖宗乾符元年〈（凡六年）〉
西洋八百七十四年 唐僖宗广明元年〈（凡一年）〉 西洋八百八十年
唐僖宗中和元年〈（凡四年）〉 西洋八百八十一年 唐僖宗光启元年〈（凡三年）〉
西洋八百八十五年 唐僖宗文德元年〈（凡一年）〉 西洋八百八十八年

唐昭宗龙纪元年〈（凡一年）〉 西洋八百八十九年 唐昭宗大顺元年〈（凡二年）〉
西洋八百九十年 唐昭宗景福元年〈（凡二年）〉 西洋八百九十二年
唐昭宗乾宁元年〈（凡四年）〉 西洋八百九十四年 唐昭宗光化元年〈（凡三年）〉
西洋八百九十八年 唐昭宗天复元年〈（凡三年）〉 西洋九百有一年
唐昭宗天佑元年〈（凡三年）〉 西洋九百有四年 梁太祖开平元年〈（凡四年）〉
西洋九百有七年 梁太祖乾化元年〈（凡二年）〉 西洋九百十一年
梁主璿乾化元年〈（凡二年）〉 西洋九百十三年 梁主璿贞明元年〈（凡六年）〉
西洋九百十五年 梁主璿龙德元年〈（凡二年）〉 西洋九百二十一年
后唐庄宗周光元年〈（凡三年）〉 西洋九百二十三年
后唐明宗天成元年〈（凡四年）〉 西洋九百二十六年
后唐明宗长兴元年〈（凡四年）〉 西洋九百三十年
后唐潞王清泰元年〈（凡二年）〉 西洋九百三十四年
后晋高祖天福元年〈（凡八年）〉 西洋九百三十六年
晋主重贵开运元年〈（凡三年）〉 西洋九百四十四年
后汉高祖称晋天福十二年〈（凡一年）〉 西洋九百四十七年
后汉隐帝乾祐元年〈（凡三年）〉 西洋九百四十八年
后周太祖广顺元年〈（凡三年）〉 西洋九百五十一年
后周世宗显德元年〈（凡六年）〉 西洋九百五十四年
宋太祖建隆元年〈（凡四年）〉 西洋九百六十年 宋太祖乾德元年〈（凡四年）〉
西洋九百六十四年 宋太祖开宝元年〈（凡八年）〉 西洋九百六十八年
宋太宗太平兴国元年〈（凡八年）〉 西洋九百七十六年
宋太宗雍熙元年〈（凡四年）〉 西洋九百八十四年 宋太宗端拱元年〈（凡二年）〉
西洋九百八十八年 宋太宗淳化元年〈（凡五年）〉 西洋九百九十年
宋太宗至道元年〈（凡三年）〉 西洋九百九十五年 宋真宗咸平元年〈（凡六年）〉
西洋九百九十八年 宋真宗景德元年〈（凡四年）〉 西洋千有四年
宋真宗大中祥符元年〈（凡九年）〉 西洋千有八年 宋真宗天禧元年〈（凡五年）〉
西洋千有十七年 宋真宗乾兴元年〈（凡一年）〉 西洋千二十二年
宋仁宗天圣元年〈（凡九年）〉 西洋千二十三年 宋仁宗明道元年〈（凡二年）〉
西洋千三十二年 宋仁宗景祐元年〈（凡四年）〉 西洋千三十四年
宋仁宗宝元元年〈（凡二年）〉 西洋千三十八年 宋仁宗康定元年〈（凡一年）〉
西洋千四十年 宋仁宗庆历元年〈（凡八年）〉 西洋千四十一年
宋仁宗皇祐元年〈（凡五年）〉 西洋千四十九年 宋仁宗至和元年〈（凡二年）〉
西洋千五十四年 宋仁宗嘉祐元年〈（凡八年）〉 西洋千五十六年
宋英宗治平元年〈（凡四年）〉 西洋千六十四年 宋神宗熙宁元年〈（凡十年）〉
西洋千六十八年 宋神宗元丰元年〈（凡八年）〉 西洋千七十八年
宋哲宗元祐元年〈（凡八年）〉 西洋千八十六年 宋哲宗绍圣元年〈（凡四年）〉
西洋千九十四年 宋哲宗元符元年〈（凡三年）〉 西洋千九十八年
宋徽宗建中靖国元年〈（凡一年）〉 西洋千有百一年
宋徽宗崇宁元年〈（凡五年）〉 西洋千有百二年 宋徽宗大观元年〈（凡四年）〉

西洋千有百七年 宋徽宗政和元年〈（凡七年）〉 西洋千有百十一年
宋徽宗重和元年〈（凡一年）〉 西洋千有百十八年 宋徽宗宣和元年〈（凡七年）〉
西洋千有百十九年 宋钦宗靖康元年〈（凡一年）〉 西洋千有百二十六年
宋高宗建炎元年〈（凡四年）〉 西洋千有百二十七年
宋高宗绍兴元年〈（凡三十二年）〉 西洋千有百三十一年
宋孝宗隆兴元年〈（凡二年）〉 西洋千有百六十三年
宋孝宗乾道元年〈（凡九年）〉 西洋千有百六十五年
宋孝宗淳熙元年〈（凡十六年）〉 西洋千有百七十四年
宋光宗绍熙元年〈（凡五年）〉 西洋千有百九十年 宋宁宗庆元元年〈（凡六年）〉
西洋千有百九十五年 宋宁宗嘉泰元年〈（凡四年）〉 西洋千二百有一年
宋宁宗开禧元年〈（凡三年，是岁蒙古铁木真灭乃蛮称帝）〉 西洋千二百有五年
宋宁宗嘉定元年〈（凡十七年）〉 西洋千二百有八年
宋理宗宝庆元年〈（凡三年。其三年元太祖殂）〉 西洋千二百二十五年
宋理宗绍定元年〈（凡六年。是岁蒙古太宗立）〉 西洋千二百二十八年
宋理宗端平元年〈（凡三年。是岁金亡）〉 西洋千二百三十四年
宋理宗嘉熙元年〈（凡四年）〉 西洋千二百三十七年 宋理宗淳祐元年〈（凡十二年
蒙古太宗殂，其五年定宗始立。阅三年殂又三年宪宗始立）〉 西洋千二百四十一年
宋理宗宝祐元年〈（凡六年）〉 西洋千二百五十三年
宋理宗开庆元年〈（凡一年。是岁蒙古宪宗殂）〉 西洋千二百五十九年
宋理宗景定元年〈（凡五年。是岁蒙古世祖中统元年）〉 西洋千二百六十年
宋理宗景定五年〈（凡三十二年。是岁蒙古世祖至元元年）〉 西洋千二百六十四年
宋度宗咸淳元年〈（宋度宗咸淳七年，蒙古始定国号曰元）〉 西洋千二百六十五年
宋帝显德祐元年〈（凡一年）〉 元世祖至元十二年 西洋千二百七十五年
宋端宗景炎元年〈（凡一年）〉 元世祖至元十三年 西洋千二百七十六年
元世祖至元十五年〈（凡三十二年）〉 西洋千二百七十八年
元成宗元贞元年〈（凡二年）〉 西洋千二百九十五年
元成宗大德元年〈（凡十一年）〉 西洋千二百九十七年
元武宗至大元年〈（凡四年）〉 西洋千三百有八年 元仁宗皇庆元年〈（凡一年）〉
西洋千三百十二年 元仁宗延祐元年〈（凡七年）〉 西洋千三百十四年
元英宗至治元年〈（凡三年）〉 西洋千三百二十一年
元泰定帝泰定元年〈（凡四年）〉 西洋千三百二十四年
元文宗天历元年〈（凡二年）〉 西洋千三百二十八年
元文宗致顺元年〈（凡三年）〉 西洋千三百三十年 元顺帝元统元年〈（凡二年）〉
西洋千三百三十三年 元顺帝至元元年〈（凡六年）〉 西洋千三百三十五年
元顺帝至正元年〈（凡二十七年）〉 西洋千三百四十一年
明太祖洪武元年〈（凡三十年）〉 西洋千三百六十八年
明惠帝建文五年〈（凡五年）〉 西洋千三百九十八年
明成祖永乐元年〈（凡二十二年）〉 西洋千四百有三年
明仁宗洪熙元年〈（凡一年）〉 西洋千四百二十五年

明宣宗宣德元年〈（凡十年）〉西洋千四百二十六年
明英宗正统元年〈（凡十四年）〉西洋千四百三十六年
明景帝景泰元年〈（凡七年）〉西洋千四百五十年
明英宗复位天顺元年〈（凡八年）〉西洋千四百五十七年
明宪宗成化元年〈（凡二十三年）〉西洋千四百六十五年
明孝宗宏治元年〈（凡十八年）〉西洋千四百八十八年
明武宗正德元年〈（凡十六年）〉西洋千五百有六年
明世宗嘉靖元年〈（凡四十五年）〉西洋千五百二十二年
明穆宗隆庆元年〈（凡六年）〉西洋千五百六十七年
明神宗万历元年〈（凡四十七年）〉西洋千五百七十三年
明光宗泰昌元年〈（凡一年）〉西洋千六百二十年 明熹宗天启元年〈（凡五年）〉
西洋千六百二十一年 明怀宗崇祯元年〈（凡十七年）〉西洋千六百二十六年
大清顺治元年〈（凡十八年）〉西洋千六百四十三年
大清康熙元年〈（凡六十一年）〉西洋千六百六十一年
大清雍正元年〈（凡十三年）〉西洋千七百二十二年
大清乾隆元年〈（凡六十年）〉西洋千七百三十五年
大清嘉庆元年〈（凡二十五年）〉西洋千七百九十五年 大清道光元年
西洋千八百二十年 大清道光二十一年 西洋千八百四十一年

梅文鼎曰：据西域斋期〈（江宁至鸿堂刻单）〉以康熙庚午五月初三日起，是彼中第九月一日，谓之勒墨藏，一名阿咱而月也，至六月初三日开斋，是彼中第十月一日，谓之绍哇勒，一名答亦月，是为大节。再过一百日，至九月十三日，为彼中第一月第十日，谓之穆哈兰，一名法而干而丁月，其日为阿叔喇济贫之期，谓之小节。鼎尝以回回历法推本年白羊一日，入第六月之第八日，与此正合。又据斋期云，本年庚午，圣人辞世，共计一千零九十六年〈（此太阳年）〉。考本单开圣人生死在本年十一月十四日，在彼为第三月，谓之勒必欧勒敖勿勒，又名虎而达。查西域阿剌必年，是开皇乙未，距今康熙为一千零九十二，干减一为一千零九十一，乃开皇己未春分，至今康熙庚午春分之积年。又查己未年春分，在彼为太阴年之第十二月初五日。以距算一千零九十一，减圣人辞世千零九十六，相差五年。逆推之得开皇十四年甲寅为圣人辞世之年，约计甲寅至己未，此五年中，节气与月分差闰五十五日。则甲寅春分，当在彼中第十月之初，圣人辞世既是第三月，则在春分前七个月为处暑月，即今七月也。自开皇甲寅七月十四日，圣人辞世，至今康熙庚午七月十四日，正得一千零九十六年，故曰共计一千零九十六年也。据此，则开皇十四年甲寅，是彼中圣人辞世之年。薛仪甫谓回回历盖以此而误。又按教主以第三月辞世，而其年春分则在第十月，今彼以第十月一日为大节，盖为此也。

《西域水道记》曰：喀城外，回教和卓祠堂门外，刻石柱纪年，一年一画。以派噶木巴尔初生为元年，派噶木巴尔于四月初十日成道，六十三岁而卒。嘉庆二十四年六月初二日，为彼中第一千二百三十三年之终。按回回术，有太阳年〈（彼中谓之

宫分)〉，有太阴年〈(彼中谓之月分)〉，斋期以太阴年为准，数至第十二月则斋，斋满日相庆为正旦〈(斋月即彼中十二月)〉。所谓月一日，又不在朔，以见新月为准。历十二月为一岁，有闰日，无闰月，故岁首无定月，大率每间二年，递早一月〈(如元年岁首在十月，三年则在九月，五年则在八月之类)〉。今以初二日为岁除，是用太阴法，见新月为岁首也。《明史》曰：三百五十四日为一周，周十二月，月有闰日，凡三十年闰十一日，言太阴年也。准此论之，计三十年应有一万六千三百一十一日，则一千二百三十三年，积四十三万六千九百三十四日又十分日之一。以回回岁实三百六十五日一百二十八分之三十一，约之得一千一百九十六年又一百四日半弱。从嘉庆二十四年六月初二日逆数之，当托始于唐高祖武德六年三月初三日也〈(源案：此所考与梅文鼎互异。然自昔皆称回教始于隋开皇初，则梅文鼎所考是也。此石柱所纪或回教第二世教祖托始之年，非穆罕默特之年欤)〉。

俞氏正燮，谓道家有老子化胡成佛之说，谓佛生周敬王二年，灭于考王三年，在老子出关西逝之后。僧徒力避此谤，故推而前之曰，周庄王九年，恒星不见时生〈(《魏书·释老志》、《隋书·经籍志》)〉。又推而前之，曰周桓王时生〈(释道安二教论《宋史·律历志》)〉。又推而前之，曰平王时生〈(费长房《历代三宝记》，及法苑珠林)〉。又推而前之，曰穆王时生〈(通历云佛以孝王元年入涅槃)〉。又推而前之，曰昭王时生〈(一唐僧智深《续集古今佛道论》，衡引《周书》异记二法苑珠林，三宋僧契嵩传法正宗记)〉。又推而前之，曰殷末生〈(晋法显《佛国记》，佛涅槃至晋义熙千四百九十七年灭，度当周成王时则生当殷武乙时)〉。又推而前之，曰夏时生〈(唐僧《道宣感通记》，又《蒙古源流》述唐太宗文成公主嫁吐蕃时，距佛涅槃二千七百五十余年。元太祖距佛涅槃时三千三百余年，皆当生于夏初，诞不可信)〉。源按：唐玄奘《西域记》云：佛灭之岁，诸部异议，言佛没至大唐龙朔三年，经千二百年。或云千三百年，或云千五百年，或云未滿千年。此诸说惟初二条庶近详实，盖唐高宗龙朔三年，当耶稣之六百六十三年，距周匡王佛灭之岁千二百六十五年。此乃质诸佛经正法像法之悬记，沸星下降之符验。印度相传之年，数信而有征，非避化胡之诮而推诸前也。佛灭度距耶稣生六百零二年，但除三四岁，即在五百余年限内。经举大数，不以三四载为损益。且佛母泥洹经言，正法当住千年以度女人出家减五百年，是则正法本自赢而缩。故佛力馀庆稍延数载，不足为异。若如道家化胡之说，谓佛生周敬王二年〈(《南史·顾欢传》引《道经·玄妙篇》)〉则灭度于考王三年，距汉元寿初耶稣之岁，仅四百四十二年。而正法五百更少，决不可合矣。故正史所载，佛生当周庄王，恒星不见，星陨如雨之岁。一则与佛经沸星出时，降生王宫之符应合，二则与佛经正法五百像法，千年之悬记合，三则与印度相传佛灭度，至唐龙朔千有二三百年之传闻合。请以息道释之讼，决今古之疑。

卷七十四

◎国地总论上〈（原无今补）○释五大洲

梵典分大地为四大洲，西洋图说得其二焉，而强割为五为四。考万历中，利马窦所绘《万国地图》及国朝南怀仁之《坤舆图说》，与天启中艾儒略之《职方外纪图》，皆以地为圜体。故分前后二图，其一南抵五印度海，北至鄂罗斯冰海，东尽日本朝鲜，西兼葱岭以西，是为中国阿细亚洲一作亚细亚，一作阿西阿）〉。其西北之欧罗巴洲，西南之利未亚洲，则皆以地中海为界。地中海以北，为欧罗巴洲〈（南抵地中海，北负冰海，广万有千二百五十里，长二万三千里）〉。地中海以南，为利未亚洲〈（北起地中海，南至大浪山海，广十度，东西长七十八度）〉。两洲之西，皆尽西洋大海，两洲之东，则皆与阿细亚洲相连。利未亚之东，则以西红海与阿细亚洲为界。欧罗巴洲之东，则以阿被河及北高海与阿细亚洲为界。此第一图也。又有南墨利加洲，北墨利加洲〈（墨利加今译为米利坚）〉，二洲一峡相连，中分南北。其地东南相距百有八十度，南洲南北四十二度，北洲如之，此第二图也。图中诸国，风俗物产疆域气候，瓜区豆剖，指掌画沙，质诸闽粤互市之番舶，重译猷琛之贡使，事多征实，语非凿空，似可以尽富媪之形势，穷四洲之方位。

然以说征图，实止二洲，无所谓四五也。《说文》：水中可居曰州。其谊盖起于洪水以前及降邱宅土以后，因而不改，后世偏旁加水为洲，故邹衍《谈天》，则裨海所环曰神州。释典论地，则咸海所画为四洲，是洲者四面皆水之名，未可以陆地所通，区为渚屿之国。今欧罗巴、利未亚之山，皆发脉葱岭，迤迤而尽于西海。是即以葱岭东西画为二洲尚不可，况于葱岭迤西之地，强指一河一泊为界。而《职方外纪》之阿细亚与欧罗巴二图，一则界以大乃河，一则界以阿被河，此二河者一在里海之西，一在葱岭之东，相去二十馀度，计五千馀里。循前图大乃河则西侵欧罗巴之界，依后图阿被河则东侵阿细亚之界，究竟此二河中五千馀里之地，属彼洲乎？属此洲乎？譬之剖中原为南北，图南朝者则以黄河为界，图北朝者则以江淮为界，毕竟此江北河南数千里，属南乎？属北乎？地中海本非西海，特以亘二域之中，袤将万里，阔二三百里，与西海相灌输，即《后汉书》大秦条支二国所隔之西海，是古书所言西海，皆即地中海。今既知有大西海环其外，而反指地中海南北为二洲，不蹈汉人故辙乎。至墨利加四面环海，地数万里，洵别为一大洲，惟不得以其中央地狭而判之为二，与前图同弊。西人既寻得墨利加之后，复念地为圜体，更西应亦可至东，因更航海西寻数年，复得南极下墨瓦蜡之地，因并南北墨利加为一洲，而以新得之地，为第五洲。然未尝测其南极高距之度数，江河入海之津口，衣冠人物之形状，以告天下后世。第言平原潏荡，萤火虫流，则尚未晤一人。虽至其地，与未至等。故佛经所谓四大洲者，西人止得其二，而馀未之闻焉。或曰此二洲者于释典四洲，当为何洲。曰阿细亚、欧罗巴、利未亚共为南瞻部洲也。南北墨利加则为西牛货洲也。

梵典言赡部洲中有四主，东人主即震旦，南象主即印度，北马主即蒙古哈萨克，西宝主即大小西洋。是欧罗巴、利未亚皆属赡部洲之明证。至北具卢洲，则隔于北冰海，故海船无绕北海而归之事。东神胜洲则阻于南冰海，故西舶虽能至南极左右，睹其地而不能遇其人。南怀仁《坤舆图说》顾辟释典四洲之谊，谓南洲当在赤道温带以下，不当以赡部为南洲。是盖泥南极北极为南北，不知释氏以北极南极分上下，而以前后左右为四方，同于儒家六合之谊。其谓天顶为北者，乃中土人一方斜睨之见。其实天顶辰极，岂遍于北，又安得以南极为南乎。释典又名四洲曰：南阎浮提，西瞿耶尼州，东弗婆提州，北郁单越州。故《起世经》言，南阎浮提日正中时，东弗婆提日则始没（西瞿耶尼日则初出，北郁单越正当夜半）。易地亦然。又阎浮提州所谓西方，瞿耶尼州以为东方，瞿耶尼州所谓西方，郁单越州以为东方，郁单越州所谓西方，弗婆提州以为东方，弗婆提州所谓西方，阎浮提州以为东方，南北亦然。《楼炭经》云：日绕须弥山，东方日出，南方夜半，西方日入，北方日中，如是右旋，更为昼夜。释典四大洲之谊如是，释典四方之谊如是，请以告西洋之分二大洲为四为五者，并以告西洋之泥南北二极，为南北者。

问：释典言佛降生，必于大地之中，故印度据南洋小西洋之间。释氏皆以印度为中国，他方为边地，西印度为天主所生之如德亚，及回教主所生之天方国，皆居阿细亚州之西，利未亚州之东，夹南海地中海之际。故天主教则以如德亚为中国，而回教以天方国为中国。其尊西印度，如佛教尊中印度等，是二洲适中之地，自古异人所挺生，然谓居二洲东西之中可也。其地皆偏濒南海，乌得为全洲之中。

曰：释典不言居赡部之中，而言居大地之中，则是据南北二极言之。二极之中为赤道，近二极皆为冷带，稍离极为温带，正当赤道下为热带，南洋各国，正当赤道下，距南北极度数皆均等，其地终年恒燠，是则正当地球南北之中，又正当赡部洲东西之中，故彼自命为中国也。使专据赡部洲言之，则正中莫如葱岭，而环葱岭左右，古今但为游牧部落，不闻产一英杰，何耶？故曰：东海有圣人出焉，西海有圣人出焉。圣人之出，必在海滨，扶舆磅礴之气，必至平原近海，如雍冀青兗，而后刚杀殆尽，冲和始鍾。惟是印度正当热带，地过炎燠，人多裸袒。而震旦则正当温带，四序和平。故自古以震旦为中国，谓其天时之适中，非谓其地形之正中也。西洋温带之地，则为地中海所占，而欧罗巴亦偏于冷带，利未亚亦偏于热带。故儒、佛、回教、天主教皆生阿细亚洲，天文算法奇器亦皆创自阿细亚，而后流被于欧罗巴洲。至利未亚洲之腹地，周万余里，万山环之，不与他国往来，故虽以麦西国亚毗心域国之声名文物，亦不通中国，而西洋市舶所至，则仅其边隅黑奴乌鬼之区而已。是则又以濒海为糟粕，腹内为精英，地不灵者人不杰，信哉（小西洋利未亚洲，濒海之地，多产黑人，欧罗巴商舟过之，多买为奴，供役使。《明史》谓之乌鬼，今沿其称呼，西洋为鬼子。然白夷与黑夷各产各地，相去数万里，岂惟非一国并非一洲。今谓黑奴为乌鬼可也，并谓白夷为白鬼则大不可）。至南北墨利加洲，地广数万里，与赡部洲同其大，明代始与赡部相通。而自明以前，其洲中数千载，不过草木蕃殖，游牧射猎，竟无创教治世之圣人。及各国开垦通商，始知有天方、

天主等教。释典言佛出世，必在浮提州，其三州皆无佛，乃竟并天主、天方之教而无之，则瞻部洲为四洲之冠何疑焉。欧罗巴、利未亚皆奉天主天方之教，而天主天方并产西印度，佛教则产中印度，与儒教产震旦相等。而欧罗巴未闻产一教主，则瞻部洲内又以阿细亚冠彼二洲何疑焉。

墨利加洲，当为释典之西牛货州，非臆度也。《坤舆图说》、《职方外纪》言墨利加州之孛露国，金加西腊国地出金银，天下称首，百物皆贵，惟银至贱。其矿有四坑，役者常三万人，国王什取其一，七日约得课三万。而《贸易通志》言北墨利加洲之麦西可国有金银厂，明万历至今，银岁出口者千馀万圆，岁进口货价千二百万圆。南墨利加洲之伯路国〈（即前之孛露也）〉，金银山最著。昔为西班牙夺据，岁出银数百万，至千万圆不等。近日国人恢复自治，开矿日旺。又云当明嘉靖时，西洋闻此金山银岭之名，于是西班牙、葡萄牙国，以兵夺据其地，所获无算，金条满屋，每骑兵各赐二万圆，步兵各赐万馀圆，武官各分数万圆。其后每年所出之数，金七百馀万圆，银千有百馀万圆。有某金厂，自开之后所出共计万万五千万圆，皆载回西班牙国，铸造番饼，广布天下。至今三百年，开凿无穷无尽。后因西班牙国兵暴虐，孛露人不服，起义驱逐，自立国王，招徕商贾，于是英吉利、荷兰之商，岁运银回国，约五六百万圆。银价渐贱，货价渐昂，始停止运银进口。俟他日银价起时，再运之以平价。然则天下贸易之商，莫盛于欧罗巴，金银之产莫盛于墨利加。一为西方宝主，一为西牛货洲，何疑焉。今广东贸易，惟弥利坚国，岁有进口银四十万圆，而欧罗巴则专以鸦片耗中国之币，故弥利坚于我有益无损，英夷于我有损而无益。

问曰：瞻部洲之西方宝主，南方象主，北方马主，则诚然矣。人则四方所同，何独以人主归之东方？

曰：请以西夷之书征之，澳门《新闻录》曰：中国人民居天下三分之一，生齿之繁，无国可比。即如俄罗斯，地方百四十一万四千四百方里，户口不过四千一百九十二万五千名。而中国只湖广一省，广不过十四万四千七百方里，已有户口四千五百零二万名。江南地方九万二千九百方里，户口即有七千二百万名。由此观之，中国只一省即抵佛兰西、英吉利、欧罗巴特厘阿三国之人民。又华事夷言曰：中国繁庶，甲乎四海，但即广东一省之人，可敌他方十馀国。各国皆地广人稀，即印度户口最稠，亦尚有旷土。中国则不惟平地皆田，即山巅岭侧，无不层层开垦，寸壤不遗。其散布于海外各国者，尚不知凡几，其繁庶诚四海所未有。由是观之，则东方之宜人，信矣。观墨利加洲南北数万里，明季欧罗巴各国争往开之，各辟草莱，立城市，竟如自古无人之荒岛。近即回部之西四城，膏腴可垦者，动数万顷，中国有之乎？至北方马主，不特蒙古、哈萨克、布鲁特为然，即再北而俄罗斯，其东北际海之地，亦产名马，以游牧为生，骑射为俗，见《异域录》及本志，则马主之说亦信矣。即其所言衡之，则四主中，亦自以人主为上。

问：西洋舟舶所至，止有二洲，则释典此外尚有第三第四洲信乎？

曰：此外必有二洲，不独释典言之也，即以西人所制地球观之，两洲实止居全地之半。自中国、日本以东，更无大国，其海跨越赤道，南北周八万馀里，且多在温带寒暑均平之区，尚胜地球北极下冷带有人之地，岂冷带有人而温带反无人乎。赤道以南，空地亦周七万馀里，其地在南极冷带者半，在温带者亦半，温带以下，亦必有国土居民。西人游迹偶至，名之曰墨瓦蜡泥加，而不能详其度数形势，岂既有其地，而竟无其人乎。然则东神胜洲，北具卢洲之地，即据地球所馀之空度，亦凿凿当有二洲又何疑焉。惟释典所云，南北东西四洲，实不以二极分南北，故自赡部以外，未可指其孰为东州，孰为北州。

○释昆仑上

昆仑即葱岭。葱岭即河源之阿耨达池，非弱水条支西海之地〈（《淮南子》十洲记》等）〉，非金城、临羌之石室〈（《汉书地理志》：金城即临羌县，西北有王母石室及弱水昆仑山祠。临羌在今西宁府。汉志特言望祭于此耳，未尝言昆仑山在其地）〉，非青海之大积石〈（《元都实说》）〉，非吐番之闷摩黎山〈（唐人刘元鼎说）〉，亦非后藏阿里之冈底斯山也〈（康熙中，理藩院主事胜住偕刺麻，绘西藏青海地图归奏如此）〉。盖前之一说，由误混昆仑于须弥。次三说由误执青海及吐番河为河源。最后一说由误指阿耨达山在西藏。

今不暇言弱水条支之荒诞〈（辨详于后）〉，与金城、积石、闷摩黎之浅近，请先辨冈底斯山。康熙时，回疆未入版图，奉使刺麻，惟知自侈蕃地山水，遂以后藏阿里之高山当昆仑，当阿耨达，谓天下三条四列之山皆祖诸此。故番语冈底斯，译言众山水之根，又以其山所出支河，译以马口、牛口、象口、孔雀口，附会于阿耨达四水。请先征其不合。一则儒言昆仑，释言阿耨达，皆居大地之中，今阿里西南徼外之冈底斯山，偏近南海，绝非域中。二则昆仑为河所源，今冈底斯山，距青海重出之河源五千馀里，距于阗、叶尔羌、喀什噶尔初出之河源，亦三千馀里，乌睹所谓河出昆仑者乎。三则阿耨达池出四大水分归四大海。今冈底斯山东出者，惟一槟榔江，会大金沙江入缅甸南海，其西出之狼楚、麻楚、拉楚三水，又皆合赴恒河，入南海，并无入东海、西海、北海之水。况康泰扶南传，恒水出昆仑山，中有五大源，则此后藏入恒河三支，亦非远源嫡派。四则言阿耨达池在山顶，非山麓，盖众山之太祖必为众水之天潢。今冈底斯山前面二湖，在麓非顶，且不通四面支河，安能为万水之源。五则《西北域记》言冈底斯山在乌斯藏西南，悬崖峭壁，积高凝冰，山巅清泉，百道奋涌争流，自巅至麓，既见又伏。四面如狮、如象、如马、如禽，西北走喀齐，西南走天竺，为各山之鼻祖。然广袤不及二百里，高才五百丈云云。是其高大不及葱岭十分之一，安能为宇内最高之山。

然则昆仑果安在？请十征之儒籍，一征之释典，一征之西洋图说，一征之本朝纪载

，而知众山之祖，乃葱岭而非冈底斯山，所谓河源出阿耨达者，乃葱岭脊上之大龙池。回语谓之哈喇淖尔果，为四大源所出之昆仑也。《山海经·西山经》曰：昆仑之丘，实维帝之下都，河水出焉。而南流注于无达，赤水出焉。而南流注于汜天之水，洋水出焉。而西南流注于丑涂之水，黑水出焉。而西流注于大杆。又曰：西海之南，流沙之滨，赤水之后，黑水之前，有大山名曰昆仑之丘。是盖以洋水西流，为注雷翥海之河，赤水南流，为注南海之恒河，黑水当为注北海之阿被河。惟河水南流，为注中国之黄河（吴省兰《河源考》，以赤水为喀什噶尔之乌兰河，黑水为叶尔羌之喀喇河，然经文别出河水于三水之外，不应复出河源，而黑水西流亦乖东注之义）。证一也。

《史记·大宛传》张骞使西域还，为天子言于阗之西，水皆西流，注西海，其东则东流注盐泽，潜行地下，其南则河源出焉，多玉石，盐泽去长安可五千里。其后汉使穷河源，出于阗，其山多玉石，采来，天子案古图书，名河所出曰昆仑。考张骞仅至于阗，未至葱岭，故有乌睹昆仑之语，而岭西水皆西流，则已闻诸于阗之人，是亦明。以葱岭为昆仑。盖汉时于阗国大，西有葱岭，曷尝以于阗南山当昆仑耶。南山脊外之水，能入西海耶。《水经注》引《凉土异物志》云：葱岭之水，分流东西。西入大海，东为河源，即《禹记》所谓昆仑。又言，葱岭在敦煌西八千里，河源潜发其岭，分为二水。一出岐沙谷，东流径无雷、依耐、蒲犁、疏勒、皮山、莎车各国为河源。一西径循休难兜、罽宾、月氏各国，至安息而注雷翥海。葱岭有国，名伽舍罗逝，此国狭小，而总万国之要道，无不由其城南。是昆仑确为河源，确居地中，分注东西各海，证二也。

《尔雅》：河出昆仑虚，色白，所渠并千七百，一川色黄。今星宿海甫出，即灿若黄金，安得色白，安有渠并，安得为昆仑之虚。惟葱岭河源，银涛练浪《西域·水道记》曰：登阿赖山颠望大龙池银涛一片，上涵天光），而其所并千七百渠者，即回部所受千百支干之水，皆在未至蒲昌海、星宿海以前。是《尔雅》色白指葱岭之源，色黄指星宿海之源。知河源为昆仑，尤必知河所初出之源，为真昆仑，证三也。

《尔雅》又言，西北之美者，有昆仑虚之璆琳琅玕焉。今葱岭产美玉（见元刘郁《西使记》），环葱岭之叶尔羌、和阗、温都斯坦，皆出美玉，诃青海所有，诃冈底斯山所有，证四也。

《汉书·西域传》河有两源：一出葱岭，一出于阗。于阗在南山下，其河北源与葱岭河合，东注蒲昌海。一名盐泽，其水亭居，冬夏不增减，潜行地下，南山积石为中国河。按蒲昌海即今回疆之罗布淖尔，受和阗河及葱岭南北河，是为二源。葱岭南河，出叶尔羌山中，葱岭北河，则出喀什噶尔西千馀里之大龙池。是为黄河最远之正源。故《史记》引《禹本纪》言河出昆仑，其高二千五百里，其上有瑶池。瑶池即大黑龙池也，出葱岭者其正源，出和阗者其旁源。葱岭河经喀什噶尔，东会叶

尔羌河，又东始会于阗河，源流广大，视和阗河数倍。和阗两岸沙积水多湮渗，而葱岭源数千里，或分或合不渗于沙，不隔于岭，自古数河源必于此。则推昆仑者必于此。虽于阗之旁源尚不敢并，况他说乎？证五也。

《山海经》华山七千七百六十七里，曰不周之山，东望渤海，河水之所潜也，其源浑浑泡泡〈（水经注）称盐泽之水，洄湍电转为隐沦之脉，即浑泡之谓〉。郭注渤海即盐泽。山形有缺不周匝处，因名不周。盖葱岭左干为天山，右干为南山，包回疆西南北三面，惟缺东面，形如半规，而虚其中，河源蒲昌海出焉。是则葱岭即昆仑，即不周之山。故《淮南子》称不周之山为天柱。而七千七百馀里，正葱岭距华山之里数，证六也〈（吴省兰《河源考》曰：西域大势，四隆中洼，而罗布淖尔适当其洼处。凡葱岭之东，嘉峪关之西，天山之阳，南山之阴，纵横数千里一涓一滴于是汇归，惟以东南方一隅为泄水之尾闾。虽流沙间隔千里，而水不流行于沙面，必贯输于沙底，虽无显赴之迹可决其潜发之源）〉。

魏游雅曰：《易》言，“天与水违行，今自葱岭以西，水皆西流，则易之所及葱岭以东耳。《说文》山上之高也，从北从一，一地也，人居山南故从北。中邦之居在昆仑东南，是则昆仑山为地之主名。故《说文》以山属昆仑。若冈底斯山，则在中国之西南，而中国在其东北，与《说文》中邦在昆仑山南不合矣，证七也。

昆仑众山太祖，故《十洲记》云：昆仑有四角大山，为其支辅。冈底斯山乃其南干之大宗，但可谓由葱岭南转而为冈底斯，岂反由冈底斯而发葱岭，何者？山之所趋，水亦从之。如果山脉自后藏，趋北转西，至回部而为葱岭，则其水皆应从山脉北流。何故后藏之澜沧江，之怒江，之龙川江，之大金沙江，皆由云南经缅甸、安南以入南海，无一北流之水乎。是知冈底斯山特葱岭南干之主峰。而葱岭北干则循塞垣，趋朝鲜濊貊与鄂罗斯分界，南干则包乌斯藏、滇、粤，尽于缅甸、暹罗与五印度分界。故《汉书》西域三十六国，惟在葱岭东者，皆属都护，而葱岭以西无之我朝声教所讫，亦以葱岭为断，虽元代初年尽吞葱岭以西各国，分建藩封，卒皆尾大鞭长不受控制，岂独兵力不逮，亦天地大气之自为界限欤，证九也。

《元史·郭宝玉传》：太祖征西域入铁山，屯大雪山前，谷中雪深二丈，乃祷山川神，封昆仑为元极王，大盐池为惠济王。刘郁《西使记》：逾别石兰，过忽牵河，土人言黄河源出南大山，地多产玉，疑为昆仑。是元人亦明知葱岭河源为昆仑，证十也。

更征释典。言昆仑即阿耨达山者，始于《康泰扶南传》及《佛图调传》〈（并见《水经注》阿耨达亦名无热丘）〉。言阿耨达池，出四大水，注四大海者，见于《长阿含经》〈（经云雪山山顶上有阿耨达池，纵广五十由旬。池东有恒伽河，从牛口出，从五百河入东南海。池南有新头河，从师子口出，从五百河入西南海。池西有博叉河，从马口出，从五百河入西北海。池北有斯佗河，从象口出，从五百河入东北

海)〉。及唐僧玄奘《西域记》〈(记曰,瞻部洲之中地者,阿那婆答多池也。即阿耨达在香山之南,大雪山之北,周八百里,西出缚刍河,入西北海。南出新度河,入西南海。东出克伽河,入东南海。北出徙多河,徙多河潜流地下,出积石山为中国河源。阿那婆答,即阿耨达之转音。新头河,新度河,皆印度河之转音)〉。而华严音义述之曰:香山顶上,有阿耨达池,四面各流出一河,东面斯陀河,出金刚师子口,南面恒伽河,出银象口,西面信度河,出金牛口,北面缚刍河,出琉璃马口。而阿耨达池所在,则《西域记》征之曰:自商弥国境东北,逾山七百馀里至波密罗川,川东西千馀里,南北百馀里,狭隘之处,不逾十里,据两雪山间。川中有大龙池,东西三百馀里,南北五十馀里。据大葱岭内,当瞻部洲中,其地最高也。其水澄清甘美,池东派一大水东流,东北至疏勒国,西界与徙多河合而东〈(汉疏勒国,唐之佉沙国,今喀什噶尔也,徙多河已见前)〉。西北一大流,与缚刍河合而西,至达摩诃国〈(按徙多河即斯陀河,缚刍河即博叉河,新头河即信度河一名。印度河,即恒河正源也。印度河复中分二流,为东西两恒河,同注南海。别详印度恒河考。缚刍河则西流,正支其达摩诃国,即今葱岭西之什克南部也。惟入北海之阿被河,虽出葱岭北干而不出龙池。故《淮南子》有黄水三周复所之说。盖重源潜发,犹罗布淖尔之发为星宿海。唐人不知此义故强以缚刍河为北注,而以印度河为西注,辨见恒河考)〉。此乃直指葱岭脊上之大龙池,为阿耨达池。即唐玄奘取经归途溺象之地〈(玄奘还至于阐国,上表云,今已越葱岭渡波密罗川还达于阐,为大象溺死,经卷众多,未有鞍乘)〉。亦即僧惠生至葱岭顶盘陀国,见脊水西流之地〈(《洛阳伽蓝记》:自发葱岭步步渐高,四日至顶约半天矣。汉盘陀国正在山顶,葱岭以西水皆西流,入西海。世人云是天地之中也)〉,亦即《唐书·西域传》所指热海之地。〈(《唐书》:葱岭水南流者经中国入于海,北流者经胡地入于海北。三日行度雪海,由勃达岭北行羸千里得细叶川,东曰热海,地寒不冻,川长千里,自此抵西海矣)〉。亦即元太祖军至雪山祷神封祭之地〈(见前《元史》条下)〉,亦即乾隆中,官兵追霍集占,未至拔达克山,沿岸鏖战之地。〈(乾隆二十四年,回酋霍集占将投拔达克山,官军追至哈喇淖尔,遥望五六十里外,有尘起,越二日,追及于和什克珠库岭,盖自池东追至池西也。拔达克山近古罽宾国道有三池,盘石阪临峥嵘不测之深,即经此龙池也。《北史》波知国有三池,大者龙王,中者龙妇,小者龙子,行人投祭乃过,亦即此也)〉。亦即道光初,官兵追张格尔至阿赖山顶,望脊水西流之地〈(阿赖布鲁特游牧地,在葱岭脊,汉盘陀国也。追张格尔事见《圣武记》,登阿赖望龙池,见《西域水道记》)〉。

知阿耨池则知河源,知河源则知昆仑。据大地之中,当万国孔道,且汇巨浸于万仞峰颠,分注四大海,宇内断无其匹。番语黑曰哈喇池,曰淖尔,以水色青黑得名。黑龙池之称阿耨达与称哈喇淖尔,华梵翻切皆同〈(阿达即哈喇之转音,耨即淖之殊字)〉。非若冈底斯之音义睽隔。且西番语谓雪为冈,梵语雪为底斯,合番梵皆谓雪山。无谓山水根之谊。审音辨物,其将安从〈(葱岭亦名雪山,亦名香山,而《西域记》则称在香山之南,雪山之北者。盖葱岭西北出之干为香山。故释迦氏谱引阎浮图,有葱岭西,据香山之说。其东出二干,一为回疆北路之天山,一为和阗

之南山，而南北二山皆可称雪，故《西域记》有葱岭据两雪山间之语。盖对文则别，散文则通，《坤舆图说》有高八十里之理弗依山，在葱岭以西鄂罗斯境内，其高次于葱岭，当即香山矣）〉。邹衍以后，异端蜂起，于是《十洲记》及《河图玉版》等书，混昆仑于须弥，以海水绕之为弱水，环之昆仑既不若是之大。后世若唐杨松筠以须弥为四大干山之祖，则又混须弥于昆仑，须弥又不若是之小〈（《西域闻见录》疑温都斯坦迤西大泽中高山即绕日之峰，尤为陋缪）〉。岂知释典起世经言，须弥为四洲地之中心，昆仑为阎浮提之中心，是梵书言须弥者地顶也，地心上值天顶，正北极下半年为昼夜之地。故言日月绕须弥，其外大咸海环之，于海中有四大洲，而昆仑特南赡部洲中之高山，乃须弥南面之一隅，乌得以当全地之须弥哉？是释典以昆仑为南赡部洲之中央，即阿耨达山，与《河图括地象》所称地中央曰昆仑，其东南万五千里曰神州之说合。与《穆天子传》昆仑去宗周涧万有一千里之数亦合。《山海经》地东西二万八千里，南北二万六千里，自积石千七百四十里，自积石出陇西郡至洛，准地志可五千馀里。又《穆天子传》天子自昆仑山入于宗周，乃里西土之数，自宗周水以西，至于河宗之邦，阳紆之山三千有四百里。自阳紆西至河首四千里，合七千四百里，又昆仑瑶池，去宗周万一千一百里。此并以葱岭为昆仑，故里数信而有征。非同他书，五万里、七万里、十万里、四十六万里之异说。酈道元顾不信，而信东方朔《淮南子》等书，幻等蜃市，诞拟蓬壶。岂性儒书所不合，抑释典所不屑道，西洋畴人所不屑谭。何者？南怀仁《坤舆图说》宇内名山凡九，自西洋高十三里之山起，愈东则愈高，有高二三十里者，有高四十馀里者，有高八十馀里者，其末最高之山，名曰高驾所山，在阿细亚洲境内，高百有三十里〈（详见本志总论第四十六卷）〉。夫中华在葱岭之东，则山脉自西来，愈西愈高，高至葱岭而止，西洋在葱岭西，则山脉自东往，愈东愈高，亦高自葱岭而始。山居东西正中。虽译名不同，而宇内高山独推亚细亚洲，为欧罗巴洲各山所不及，谓非葱岭而何。以万山之祖，当万国之中，谓非昆仑而何。

更征以本朝掌故。乾隆四十七年，遣使穷河源归，诏曰：《史记》、《汉书》皆言于阗之西，水皆西流注海，其东流注盐泽，潜行地下，南出为河源。今回部诸水，皆潴蒲昌海，伏地千里，至青海而始出，正犹济水之三伏三见。则昆仑当在回都之西，距此万里。康熙中，锡拉寻河源归，奏言贵德堡西，有三支河，名昆都仑。蒙古谓横为昆都伦，言有三横水，入于河也。然则回部所谓昆仑山者，亦当为横岭，而不当如元都实牵青海之昆都仑河，为回部之昆仑山，至矣哉。圣智周六合，圣训炳万古，如赫曦之豁蒙瞽。自后《皇清通志》，及松筠《西陲总统事略》皆本斯谊，曰黄河近源在星宿海西三百馀里，远源则为回部极西之葱岭，在喀什噶尔、叶尔羌西千馀里。蒙古谓天山冰岭皆名曰昆都仑，急呼则曰昆仑云云。虽语焉不详，要之昆仑当为葱岭，非青海非吐番后藏固已折衷。大圣诞告中外，使康熙世回部早同车书，则圣祖是论固当先高宗而发之。昔之有天下者，疆域褊狭，多不能有昆仑，能有昆仑，能知昆仑为河源者，皆自我大清高宗纯皇帝始。而拘墟瞽儒，犹或泥于康熙朝论定，未有知葱岭河源之后说者。岂以前说于阿耨达池，附会较详，而后说未之及欤。谨勾稽本末，具图及说，绎阐两圣人先后同揆之义，轩轩并揭天地，又

以谓国家抚有西域，主名山川，列正祭随祭者十有六，不当反遗昆仑，太祖非所以母元气纲，万灵符古者，祭海先河之谊。

○释昆仑下

问曰：昆仑之为葱岭，龙池之为阿耨达，信已。顾《释典》言四水分注四海，而今考玄奘《西域记》与徐氏《西域水道记图》则龙池所出，实止三水。东为中国河源，南为恒河、印度河同源，西为转𣎵河源。唐人欲合佛经四水，故以印度河当西注，以转𣎵河当北注。今子谓印度河即西恒河，与东恒河同源，分注南海，无西注之迹，然则转𣎵一河，将分注西北两海耶？又佛经言阿耨达四水，皆云绕池一匝，从五百河入于大海。后人袭其说，谓河源绕昆仑西北及南，而后东流者。官书驳之谓昆仑大山，非岛屿比，河安能绕其西北南三面，而复折东以行耶？

曰：是说也，惟《淮南子》得之。曰昆仑有疏圃之池，河水出其东北陬，赤水出其东南陬，洋水出其西北陬，黄水三周复其源。凡此四水地之神灵，以运万物，是明言昆仑流出者惟三水。河水即黄河，赤水即恒河，洋水即转𣎵河。其一则伏流潜发，犹《水经》述蒲昌海，洄湍电转，为隐沦之脉者。其为阿被河之潜脉无疑。《职方外纪》及南怀仁《图》曰，阿被河源，一出大布里山〈（即葱岭北干乌拉岭）〉，一出基台湖〈（即宰桑泊）〉，北注冰海，首尾七千二百里。河冻开时，有大冰如山岳，冲击两岸，旁溢千二百里，土人迁居入山避之。盖葱岭北干为乌拉岭，其岭西北有帕付林高山，峙出诸山之上，冬夏积雪，人不能至，即大布里山也。其低平处，高不过三百丈，而长则自北海至里海，为阿细亚欧罗巴二洲之界，亦为俄罗斯东北藩属之界，距阿尔台山起处不远〈（《四洲志》）〉。山巅岭上，随处流泉，虽最高处，亦甚泥泞。其岭东出乌拉河，托波尔河，俱东北归厄尔齐斯河，入北海〈（《异域录》）〉。案乌拉岭随地流泉，沮洳泥泞，即潜源重发，同于星宿海之证。故怀仁《图说》，谓大布里山，在俄罗斯境内〈（案《四洲志》称为乌拉岭，《异域录》称为佛落克岭。盖岭东出乌拉河，岭西出佛落克河，故各据所出之河以名之也）〉。岭西之水，下游会佛尔格河〈（一作窝尔加）〉。其水不北流，而南注八腾吉斯海。土尔扈特游牧其地，称之曰厄济尔河〈（《异域录》）〉。又赛马尔罕之纳林河，亦自东南来会之，是则葱岭以西，更无北注之水，其北注者惟乌拉。岭东之厄尔齐斯河，为北流第一大干。故怀仁《图说》，列阿被河于阿细亚洲，不列于欧罗巴洲也。盖转𣎵河出池以后，始汇于雷翥海，而后再出潜源。阿被河则不出池，即伏流地下，发于乌拉岭为潜源。观此而淮南三周复所之义明，而佛经阿耨达四水皆绕池一匝之谊亦明矣。

《山海经》言昆仑之丘，出河水、赤水、洋水、黑水，与《淮南》同，惟《易》黄水为黑水。考蒲昌海水青黑，重发于星宿川则黄。以此例阿被河。盖《淮南》预指其重源，故黄之，《山海经》惟据龙池之初源，故黑之也。唐代诸僧求北注之水于葱岭以西，而不得，于是强印度河为西流，强转𣎵河为北注。姑无论恒河诬谬，与

佛经不合，试问转刍河之水，果何归宿耶。夫转刍河为龙池西出之正流，即《水经注》所谓有妣水潜发葱岭西，径循休难兜闼宾国北，月氏、安息国南，与罗蚊谿水同注雷翥海者也。即《元史》之阿母河，亦作暗布河，亦作阿梅河，元设行中书省，以控制西域者也，亦即南怀仁《坤舆图》入咸海之阿书河。其上游曰亚被亚河，曰亚母湖者也〈（阿母阿书即转刍之音转）〉。其水右并叶河，叶河出葱岭北，原西北流，径石国、康国、米国、图何国、史国等地〈（见《大唐西域记》，一作素叶川）〉。即今纳林河，径敖罕西哈萨克入咸海者。左受乌浒河，径吐贺罗月支国〈（见《后汉书》、《新唐书》，一作马浒河）〉即《水经注》之罗蚊谿水，出阿耨达山之北，西径糺罗国四大塔犍陀卫国，至安息注雷翥海者。雷翥海即里海〈（一名咸海，一名北高海，一名加土比唵，一名腾吉思海，一名格腾里海，一名达里冈阿泊）〉。凡葱岭东之水皆潴蒲昌海即〈（罗布淖尔）〉，葱岭以西之水皆潴咸海。蒲昌海之水，伏流潜发于星宿海，为黄河以入东溟，则里海之浩荡渊渟，断无永潴而不发之理。故尝谓里海以西之大乃河，长二千四百里，分三道入墨阿的湖，以达地中海者。当为里海潜源重出之河。是转刍河，为西注正朝，而唐僧之强印度河为西注，又强转刍河为北注者，万不可通矣。盖葱岭北干曰乌拉岭，横抵北海。故葱岭以西之水，为乌拉岭所包皆不北注，而西南入里海。其北注者，惟葱岭东北之阿被河，潜源重发，一发于乌拉岭，一发于宰桑泊，皆汇归厄尔齐斯河，即阿被阿也〈（一作阿比）〉。后人纵或知阿被河即厄尔齐斯河，又以其不显出阿耨达池而疑之，又或不知厄尔齐斯河，有两源但知其出宰桑泊，即基台湖，而不知其出乌拉岭者，即大布里山，即葱岭北干。又或泥南怀仁图绘赛马尔罕于基台湖之上，则益疑之〈（此西图之大误也。赛马尔罕在葱岭西，其下游岂有注北海之水乎）〉。夫古者九能之士，山川能说，其非徒说形势分合之谓，其必察地理，脉水性，并其卓诡之状，隐潜之络，而了知之。昆仑阿耨达之三周绕匝，使不一证诸《淮南子》，再证诸《水经注》之蒲昌海，三证诸乌拉岭之随处流泉，沮洳泥泞，其不供下士大笑者，几希济水绝河而南，三伏三见，使不出中国而传自外夷，其不斥为诞罔者，几希〈（或曰黄水三周复其源此语非《淮南》所能创，果何据依，曰《穆天子传》天子升于昆仑，观黄帝之宫。释氏《西域记》，阿耨达山其上有大渊，水宫殿楼观甚大焉，是昆仑有黄帝遗迹，自非乘龙御天之大圣，孰能智周六合若此者乎。又《西域记》葱岭南接雪山，北至热池干泉。干泉者地方二百馀里，南面雪山三垂平陆，即今伊犁河所西汇之巴勒喀什泊也。葱岭得名以《西域记》山岭葱翠之说为正。颜师古谓产野葱，陋不足辩。至南怀仁等皆谓里海之水，浩荡甚咸，不通外海。独《海国闻见录》言，里海之水流出包社不知何据，岂误以印度河出自里海乎，置之不论可矣）〉。

卷七十五

○利玛窦《地图说》

地与海本是圆形而合为一球，居天球之中，形如鸡子，黄在青内。有谓地为方者，乃语其定而不移之性，非语其形体也。天既包地，则彼此相应。故天有南北二极，地亦有之，天分三百六十度，地亦同之，天中有赤道，自赤道而南二十三度半为南道，赤道而北二十三度半为北道。按中国在北道之北，日行赤道，则昼夜平，行南道则昼短，行北道则昼长。故天球有昼夜平圈列于中，昼短昼长二圈列于南北，以著日行之界，地球亦设三圈，对于下焉。但天包地外为甚大，其度广，地处天中为甚小，其度狭，此其差异者耳。查得直行北方者，每路二百五十里，觉北极出高一度，南极入低一度。直行南方者，每路二百五十里，觉北极入低一度，南极出高一度，则不特征地形果圆，而并征地之每一度广，二百五十里，则地之东西南北，各一周有九万里实数也。是南北与东西数相等，而不容异也。

夫地厚二万八千六百三十六里零百分里之三十六分，上下四旁皆生齿所居，浑沦一球，原无上下。盖在天之内，何瞻非天，天总六合内，凡足所伫即为下，凡首所向即为上，其专以身之所居分上下，未然也。且予至大西，浮海入中国至昼夜平线，见南北二极，皆在平地，略无高低。稍转而南，过大浪山已见南极出地三十六度，则大浪山与中国上下相为对待矣。而吾彼时只仰天在上，未视之在下也。故谓地形圆，而周围皆生齿者，信然矣。以天势分山海，自北而南为五带，一在昼长昼短二圈之间，其地甚热，带近日轮故也。二在北极圈之内，三在南极圈之内，此二处地居甚冷，带远日轮故也。四在北极昼长二圈之间，五在南极昼短二圈之间，此二地皆谓之正带，不甚冷热，日轮不远不近故也。

又以地热分舆地为五大洲，曰欧罗巴，曰利未亚，曰亚细亚，曰南北亚墨利加，曰墨瓦蜡泥加。若欧罗巴者，南至地中海，北至卧兰的亚及冰海，东至大乃河，墨何的湖大海，西至大西洋。若利未亚者南至大浪山，北至地中海，东至西红海仙劳冷祖岛，西至河折亚诺海，此州只以圣地之下微路，与亚细亚相联，其余为四海所围。若亚细亚者，南至苏门答蜡吕宋等岛，北至新增白蜡及北海，东至日本岛大明海，西至大乃河墨阿的湖，大海西红海小西洋海。若亚墨利加者，全为四海所围，南北以微地相连。若墨瓦蜡泥加者，尽在南方，惟见南极出地而北极恒藏焉。其界未审何如，故未敢订之，惟其北边，与大小瓜洼，及墨瓦蜡泥峡为境也。其各州之界，当以五色别之，令其便览，各国繁伙难悉，大约各州俱有百馀国。原宜作圆图，以其入图不便，不得而易圆为平，反圈为线耳。欲知其形必须相合，联东西二海为一片可也。

其经纬线本宜每度画之今且以每十度为一方，以免杂乱，依是可分置各国于其所，

东西纬线，数天下之长，自昼夜平线为中而起，上数至北极下数至南极。南北经线数天下之宽，自福岛起，为一十度至三百六十度，复相接焉。试如察得南京离中线以上三十二度，离福岛以东一百二十八度，则安之于其所也。凡地在中线以上主北极，则实为北方，凡在中线以下，则实为南方焉。释氏谓中国在南赡部洲，并诬须弥山出入地数，其谬可知也〈（案：西法以北极为北，南极为南，此天之南北，非地之南北也。释典则以北极为地顶，而东西南北四面环之，与南极北极无涉，盖北极为上南极为下，是上下，非四方也）〉。又用纬线以著各极出地几何，盖地离昼夜平线度数，与极出地度数相等。但在南方，则著南极出地之数，在北方则著北极出地之数也。故视燕京隔中线以北四十度，则知燕京北极高四十度也。视大浪山隔中线以南三十六度，则知大浪山南极高三十六度也。凡同纬之地，其极出地数同，则四季寒暑同态焉。若两处离中线度数相同，但一离于南，一离于北，其四季并昼夜刻数均同，惟时相反，此之夏为彼之冬耳。其长昼长夜，离中线愈远，则其长愈多，馀为式以记于图边。每五度其昼夜长何如，则西东上下，隔中线数一则皆可通用焉。用经线以定两处相离几何辰也，盖日轮一日行一周，则每辰行三十度，而每处相违三十度，并谓差一辰。故视黑龙江离福岛一百四十度，而缅甸离一百一十度，则明黑龙江于缅甸差一辰。而凡黑龙江为卯时，缅甸方为寅时也。其馀仿是焉。设差六辰，则两处昼夜相反焉，如所离中线度数相同，而差南北，则两地人对足底反行。故南京离中线以北三十二度，离福岛一百二十八度，而南亚墨利加之玛八作离中线以南三十二度，离福岛三百二十八度，则南京于玛八作人相对反足底行矣。从此可晓同经线处，并同辰而同时见日月蚀矣，此其大略也，其详则备于图云。

○艾儒略《五大州总图略度解》

天体一大圆也。地则圆中一点定居中心，永不移动，盖惟中心离天最远之处，乃为最下之处，万重所趋，而地体至重就下，故不得不定居于中心。稍有所移，反与天体一边相近，不得为最下处矣。古贤有言，试使掘地可通以一物缒下，至地中心必止。其足底相对之方亦以一物缒下，至地中心亦必止。可见天圆地方，乃语其动静之德，非以形论也。地既圆形则无处非中，所谓东西南北之分，不过就人所居立名，初无定准。地度上与天度相应，天有南北二极，为运动枢两极相距之中界，为赤道，平分天之南北，其黄道斜与赤道相交，南北俱出二十三度半，日躔黄道，一日约行一度，自西而东，奈为宗动天所带，是以自东而西，一日一周天耳。日轮正交赤道，际为春秋二分规南，出赤道二十三度半为冬至，规北出赤道二十三度半为夏至。规黄道之枢与赤道之枢，亦相离二十三度半，其周天之度，经纬各三百六十。地既在天之中央，其度悉与天同，如赤道之下，与南北二极之下，各二十三度半也，又二极二至规外四十三度也。分为五带，其赤道之下，二至规以内，此一带者，日轮常行顶上，故为热带。夏至规之北至北极规，冬至规之南至南极规，此两带者，因日轮不甚远近，故为温带。北极规与南极规之内此两带者，因日轮止照半年，故为冷带。赤道之下，终岁昼夜均平，自赤道以北，夏至昼渐长，有十二时之昼，有一月之昼，有三月之昼，直至北极之下则以半年为一昼矣。往南亦然。以南北距

度考之，其热不得不然也。其在东西同带之地，凡南北极出入相等者，昼夜寒暑节气俱同。但其时则有先后或差一百八十度，则此地为子，彼地为午；或差九十度，则此地为子，彼处为卯，余可类推也。人居赤道之下者，平望南北二极，离南往北，每二百五十里，则北极出地一度，南极入地一度，行二万二千五百里，则见北极正当人顶。出地九十度而南极入地九十度，正对人足矣。从南亦然。此南北经度也。至于东西纬度，则天体转环无定不可据七政量之，随方可作初度，而天文家又立一法算之，以宗动天一周，则日月行三百六十度，故每时得三十度。如两处相差一时，则东西便离三十度也。今两处观月食各自不同，则知差一时者其地方相离三十度，以此推之，东西之度可考验矣。或但以里数考之，古来地理家，俱从西洋最西处为初度，即以过福岛子午规为始，仿天度自西而东，十度一规，以分东西之度，故画图必先画东西南北之规，后考本地理离赤道之南北，福岛之东西，几何度数，乃置本地方位。譬如中国京师，先知离赤道以北四十度，离福岛以东一百四十二度，即于两经纬线相交处得京师本位也。但地形既圆，则画图于极圆木球，方能肖像，如画于平面则不免或直剖之为一图，或横截之为两图，故全图设为二种，一长如卵形，南北极居上下，赤道居中，一圆如盘形，南北极为心，赤道为界，又于二全图外，另各设为一图，曰亚细亚，曰欧罗巴，曰利未亚，曰亚墨利加也。而墨瓦蜡厄加则国土未详，图不另立云。图中南北规度相等，皆以二百五十里为一度，赤道之度亦然。其离赤道平行东西诸规，则渐近两极者，其规渐小，然亦分为三百六十度，其里数以次渐狭，别有算法，今画图为方者，其画线不免于稍变，毕竟惟圆形之图乃得其真也。

○艾儒略《四海总说》

造物主之化成天地也，四行包裹，以渐而坚凝。故火最居上而火包气，气包水，土则居于下焉，是环地面皆水也。元黄始判，本为生人，水土未分，从何立命，造物主于是别地为高深，而水尽行于地中，与平土各得什五，所潴曰川，曰湖，曰海。川则流，湖则聚，海则潮，川与湖不过水之支派，而海则众流所钟，称百谷王焉。故说水必详于海。海有二焉：海在国之中，国包乎海者，曰地中海，国在海之中，海包乎国者，曰寰海。川与湖占度无多，不具论。寰海极广，随处异名。或以州域称，则近亚细亚者，谓亚细亚海，近欧罗巴者，谓欧罗巴海，他如利未亚，如亚墨利加，如墨瓦蜡尼加，及其他蕞尔小国，皆可随本地所称。又或随其本地方隅命之，则在南者，谓南海，在北者，谓北海，东西亦然。随方易向，都无定准也。兹将中国列中央，则从大东洋至小东洋为东海，从小西洋至大西洋为西海，近墨瓦蜡尼一带为南海，近北极下为北海；而地中海附焉。天下之水尽于此，裨海大瀛，属近荒唐，无可证据。

海虽分而为四，然中各异名，如大明海，太平海，东红海，孛露海，新以西把尼亚海，百西尔海，皆东海也。如榜葛蜡海，百尔西海，亚刺比海，西红海，利未亚海，何折亚诺沧海，亚大蜡海，以西把尼亚海，皆西海也。而南海则人迹罕至，不闻

异名。北海则冰海。新增蜡海，伯尔昨客海，皆是。至地中海之外，有波的海，窝窝所德海，八尔马泥海，太海，北高海，皆在地中，可附地中海。

海岛之大者，附载各国之后。其小者，不下千万难以尽述。大率在亚细亚者，苏门答蜡，日本淳泥最大。在欧罗巴者，谏厄利亚最大〈（即英吉利国）〉。在利未亚者，圣老楞佐岛最大。在亚墨利加者，小以西把尼亚最大。在墨瓦蜡尼加者，新为匿亚最大。而太平海中，则有七千四百四十岛。此外有石礁或见水面，或隐水中。水中者船极畏之，又有沙渚，船值之则陷，此时尽弃船中重货，虽百万金钱所不恤，乘潮至方得脱之，否则断无出理。

地心最为重浊，水附于地到处就其重心。故地形圆而水势亦圆，隔数百里水面，便如桥梁，远望者不可见，须登桅望之乃见。其前或夷或险而海中夷险各处不同。惟太平海极浅，亘古至今无大风浪。大西洋极深，深十馀里，从大西洋至大明海，四十五度以南，其风常有定候，至四十五度以北，风色便错乱不常。其尤异者，在大明东南一隅，常有异风，变乱凌杂，倏忽更三十四向。海舶惟任风而飘，风水又各异道，如前为南风，水必北行。倏转为北风，而水势尚未趋南，舟莫适从，因至摧破。至小西洋，海潮极高大，又极迅急平，地顷刻涌数百里。海中大舶及蛟龙鱼鳖之属，尝乘潮势，涌入山中不可出。欧罗巴新曾蜡利夫亚大浪山，亦时起风浪，甚险急。至满刺加海，无风倏起波浪，又不全海皆然，惟里许一处以次第兴，后浪将起，前浪已息矣。海上虽多有风，独利未亚海近，为匿亚之地当赤道下者，常苦无风，又天气酷热，舶如至此，食物俱坏，人易生疾，海深不得下碇，舶大不能用橹，海水暗流及潮涌飘舶至浅处，坏者多在于此。海水味咸中有火性，又势常激荡，故不成冰，至北海则半年无日，气候极寒而冰，故曰冰海。海舶为冰坚所阻，直须守至冰解，方得去。又苦冰山，海中冰块为风所击，堆叠成山，海舶触之，定为齑粉矣。赤道之下则终岁常热，食物水酒至此，色味皆变，过之即复如常。凡海中之色，大率都绿，惟东西二红海，其色淡红，或云海底珊瑚所映而然，亦非本色也。又近小西洋一处，入夜则海水通明如火，西儒常亲见而异之，持器汲起满器俱火光，又滴入掌中，光亦莹然，可玩后来渐次消灭。

儒略辈从欧罗巴各国起程，远近不一，水陆各异，大都一年之内，皆聚于边海。波尔杜瓦尔国里，西波亚都城，候西商官舶春发入大洋，从福岛之北过夏至线，在赤道北二十三度半，逾赤道而南，此处北极已没，南极渐高，又过冬至线，在赤道南二十三度半，越大浪山，见南极高三十馀度，又逆转冬至线，过黑人国，圣老楞佐岛界中，又逾赤道至小西洋南印度卧亚城，在赤道北十六度。风有顺逆，大率亦一年之内可抵小西洋，至此则海中多小岛，险窄难行矣。乃换中舶，亦乘春月而行，抵则意兰，经榜葛刺海，从苏门答蜡与满刺加之中，又经新加步峡，迤北过占城暹罗界，阅三年方抵中国岭南广州府。此从西达中国之路也。若从东而来，自以西把尼亚地中海，过巴尔德峡，往亚墨利加之界，有二道，或从墨瓦蜡尼加峡，出太平海，或从新以西把尼亚界泊舟，从陆路出孛露海，过马路古吕宋等岛，至大明海以

达广州。然某辈皆从西而来，不由东道，故其途程经九万里也。行海昼夜无停，有山岛可记者，则指山岛而行，至大洋中常万里无山岛，则用罗经以审方，其审方之法，全在海图量取度数，即知海舶行至某处，离某处若千里，了如指掌，百不失一〈（此是初通中国时，故迂远旷日，今则火轮往返不过数月）〉。海舶百种不止，约有三等，其小者仅容数十人，专用以传书信，不以载物。其舟腹空虚可容，自上达下，仅留一孔，四围点水不漏，下镇以石，使舟底常就下。一遇风涛，不习水者，尽入舟腹中，密闭其孔，复涂以沥青，使水不进，其操舟者，则捆绑其身于檣桅，任水飘荡。因其腹中空虚，永不沉溺，船底又有镇石，亦不翻覆。俟浪平，舟人自解缚运舟，万无一失。一日可行千里。中者可容数百人，自小西洋以达广东，则用此舶。其大者，上下八层，最下一层，镇以沙石千馀石，使舶不倾侧震荡，全借此沙石。二三层，载货与食用之物，海中最难得水，须装淡水十馀大桶，以足千人一年之用，他物皆是。其上近地平板一层，则舶内中下人居之，或装细软切用等物。地平板之外，则虚其中百步，以为扬帆、习武、游戏、作剧之地。前后各建屋四层，以为尊贵者之居。中有甬道，可通头尾。尾后建水阁，为纳凉之处，以待贵者之游息。舶两傍列大銃数十门，以备不虞，其铁弹有三十馀斤。重者上下前后有风帆十馀道，桅之大者，长十四丈，帆阔八丈，水手二三百人，将士銃士三四百人，客商数百。有舶总管一人，是西国贵官国王所命，以掌一舶之事，有赏罚生杀之权。又有舶师三人，历师二人。舶师专掌候风使帆，整理器用，吹掌号头，指使夫役，探测浅水礁石以定趋避。历师专掌窥测天文，昼则测日，夜则测星，用海图量取度数，以识险易，以知道里。又有官医主一舶之疾病，亦有市肆贸易食物。大舶不畏风浪，独畏山礁浅沙，又畏火，舶上火禁极严，盖千人之命攸系。然其起程但候风色，未尝选择时日，亦未尝有大失也〈（《海岛逸志》曰大海之中，风雨昼晦，有黑云一片，如针下垂，渐低渐坠至海者，则水为之滌洄澎湃，远者无妨，近则烧鸡羽，放鞭爆，而水柜：水桶皆当谨慎用，绵被或用衣服覆盖，不然尽被吸去矣。海水味咸，腾而为雨则淡，是天地好生之德，不可测议者也）〉。

海产以明珠为贵，则意兰最上。土人取海中蚌，置日中晒之，俟其口自开，然后取珠，则珠色鲜白光莹，有大如鸡子者，光照数里。南海皆剖蚌出珠，故珠色黯黯无光。有珊瑚岛，其下多出珊瑚，初在海中，色绿而质柔软，上生白子，土人以铁网取之，出水便坚，有红黑白三色，红色者，坚而密，白、黑色者，松脆不堪用。大浪山之东北，有暗礁，水涸礁出，悉是珊瑚之属，猫睛宝石，各处不乏，小西洋更多琥珀，则欧罗巴波罗尼亚有之，沿海三千里皆是。盖为风浪所涌，堆积此地，土人取为器物。龙涎香，黑人国与伯西尔两海最多，曾有大块重千馀斤者。望之如岛然。每为风涛涌泊于岸，诸虫鱼兽并喜食之，他状前已具论。海水本皆盐味，然亦有不假煎熬，自凝为盐块者，近忽鲁谟斯处，有山五色相间，亦纯是盐，土人凿山石旋以为器，贮食物则不须和盐，盖其器已是盐，自生咸味也。又有海树，太平海内浅处生草，一望如林葱菁可爱。

卷七十六

○南怀仁《坤舆图说》〈（《坤舆图说》与《职方外纪》大同小异，凡雷同者不重录，惟此数条外纪所无故别出之）〉

先圣论地，初受造时甚圆，无深浅高卑之殊，惟水遍围其面而已。但造物者，将居民物于地面，则开取渊坎令水归之，致露干土。即以所取之土，致成山岳陵阜之类。试观海涯，无不倚山陵之足，江河多峡于阜岭之中，大约高山，多近深谷，可以验其原生之意也。然造成后，又有变迁。盖诸国典籍所记，高岸为谷，深谷为陵，古来未有者，或新发而始见之，乃地震所致，或风力，或水势所成也。若究其生山之故，不但饰地之观，竖地之骨，直于人物有多益焉。或以毓五金，或以捍四海，或以涌溪泽，或以茂林丛，或以蔽风雪，或以障荫翳，或以界封疆，或以御寇盗，或以辟飞走之囿，或以广藏修之居，无算妙用。则造物之原旨，以全夫寰宇之美而备生民之须耳。今摘天下各国有名高山，里数开列于左。

厄勒齐亚国，厄莫山高十三里一百九十二丈〈（厄勒齐即额力西，今北都鲁机国也，一作厄勒祭）〉。

西齐理亚国，昼夜喷火之山，名阮得纳，高十三里一百五十六丈。

西洋德纳里法岛，必个山高二十一里二百一十四丈。厄勒齐亚国，亚多山，高二十四里〈（即厄纳特赫国，在里海东南见《异域录》）〉。诺尔物西亚国山，高三十里零二十丈〈（一作诺勿惹国，即那威国也）〉。亚墨尼加洲伯纳黑山，高五十五里百二十丈〈（即耶玛尼国）〉。莫哥斯未国里弗依山，高八十三里零七十二丈。〈（地图作大布里山，在乌拉岭北，即葱岭北干也，在俄罗斯境内）〉。

亚细亚洲高架所山，高一百二十一里二百零四丈。〈（案各山自西而东以渐高，高至此山为最，盖葱岭也。见《释昆仑篇》）〉。

〈（案：此所列名山，惟详欧罗巴洲，东至葱岭而止，其阿未利洲，西南之墨溜斯大山，西北之亚大腊山，及阿细阿州西南之冈底斯山，西北之阿尔泰山，均未列及。）〉

○天下名河亚细亚洲

黄河，元朝图史载黄河，本东北流，历西域数大洲，凡四千五百馀里，始入中国，又东北流过夷境，凡二千五百馀里，始转河东，又南流至蒲州，凡一千八百馀里，通计屈曲九千馀里。

欧拂腊得河，长六千里，其流入海口处，阔四十八里。〈（即长江之异名也）〉

安日得河，长四千八百里，阔约五里，深十丈馀，分七岔入海，其水产金沙。〈（此即东恒河也，兼受冈噶江大金沙江以入南海，英夷图中一作安治市河，一作澈日市河，皆译音之殊）〉

阿被河，长七千二百里，此河开冻时，有大冰如山岳，冲击树木，排至两岸，旁溢一千二百里，土人迁移入山避之。〈（即额尔齐斯河，一源出基台湖，即宰桑泊也，一出大布里山，则葱岭北干也，大里布山，在乌拉岭之西北，亦名帕付林斯科山。其长直抵北海，为欧罗巴阿细亚二洲之界，在俄罗斯境内。或疑阿被河为葱岭以西之流，则何由贯乌拉岭而入北海，又何由列于阿细亚洲名川内乎。）〉

印度河，长四千里，入海口处，阔一百六十里。〈（亦名信度河，即西恒河也，与东恒河同源异委，亦入南海）〉

案：大金沙江下游入安日得河，统为佛经之恒河。惟英夷图中所绘不误，南怀仁图则大金沙由缅甸入海，与安日河各为海口，则安日得河不足统大金沙江，此一大■漏。

阿细亚水由俄罗斯入北海者，莫大于额尔齐斯河，及色棱格河，朱尔克河，源长流广，为北干三大水。与中国江河相并，图中除阿被河外，虽尚有北流之加西马河，听西味河，然不甚长远，且说中不列于名川，又误绘撒马尔罕于阿被河之上，此二大■漏。

克鲁伦河之水，由黑龙混同江入海，此东北一大干，图中有之而无水名，说中亦不及，此第三隙漏。

○欧罗巴洲

大乃河，长二千四百八十里，分三岔入墨阿的湖，注地中海。〈（墨阿的湖之水，由墨海以入地中海，南怀仁图大乃河字，当西向而反东向，与窝耳加河混淆不清，宜改正）〉

窝耳加河，长一千六百里，分七十二流入里海 〈（即异域录之佛尔格河，土尔扈特游牧此河西岸，亦名厄济纳河）〉。

达乃河，长四千八百里，入大海。〈（此非西洋大海也，即墨阿的湖之下游一名黑海，在里海之东，地中海之北，南怀仁立名不妥宜名黑海）〉

多恼河，长三千六百里，分七岔入海，其河有桥，长一十一里，高十五丈〈（此所入亦地中海）〉。

案：葱岭以西之水，莫大于佛经之缚刍河，元史谓之阿母河，乃出龙池入里海之正干，即怀图中之阿书河也。阿母、阿书皆缚刍之音转，乃图有之而说中所载名川不及之，此一大■漏。

又纳林河，亦出葱岭由敖罕布哈尔土尔扈特境入里海，亦一大干河也。图中虽有撒马尔河，而甚微短与撒马尔罕相去辽远，无以见其为一国之经流，故说中亦不与。窝尔加河并列名川，此二大■漏。

○利未亚州

泥禄河，长八千八百里，分七流入海〈（泥禄河即四洲志伊揖国之奈尔河）〉。

黑河，地内藏其水道，至二百四十里远有馀。

○北亚黑利加

加纳大河，海潮入此河，至一千六百里，流入海口处，阔二百四十里。

○南亚墨利加圣玛得勒纳河，长三千六百里。

巴里亚河，深十五丈，入海口处阔四百四十馀里。雅玛琐农江，长一万馀里，阔八十四里，深不可测，入海口处阔三百三十六里，其水势悍急，直射海水，至三百二十馀里，皆淡水。其两岸绵亘有一百三十馀国，语言风俗俱不同。

○南怀仁《坤舆图说》

海水自然之动，止有一，即下动也。凡外动为强，则非自然可知矣。其强动甚多，其一外风所发，风既不一，动亦不一。其二自东而西，凡从欧逻巴航海西向而行，则顺而速，东向而行，则逆而迟。此动非特大海，又于地中海可见其所以然。从太阳自东而西行以生焉〈（见风气说）〉。其三，自北而南，凡航海从北向南，必顺而速，从南而北，则必逆而迟。夏月行北海者，常见冰块之广大如城如海岛，曾有见长三百馀里者。从北而南流其所以然者，北极相近之海大寒，比年中多云雨，多冰雪，与赤道相近之海大热，每日海水之气甚多，被日薰蒸冲上空际，盖南海之势处卑，北海之势处高，故水北而南流也。

潮汐各方不同，地中海迤北迤西，或悉无之，或微而难辨。迤南迤东则有而大，至

于大沧海中，则随处皆可见也。第大小速迟长短，各处又不同，近岸见大，离岸愈远，潮愈微矣。地中海潮水极微，又吕宋国莫路加等处，不过长二三尺，若其他如大西拂兰第亚国，潮水长至一丈五尺，亦有一丈八尺至二丈之处。安理亚国隆第诺府，现长至三丈，其国之他处长至五六丈。阿利亚国近满直府，长至七丈，近圣玛诺府间长至九丈。此各方海潮不同之。故由海滨地，有崇卑直曲之势，海底海内之洞，有多寡大小故也。况月之照海，各方不同，则其所成功，亦不能同，其长退之度，或每以三候，或长以四候，或其长极速，即骑驰犹难猝脱，则一候倏淹覆四百馀里。而又一候倏归本所，又始起长之时，亦不同，大概每日迟约四刻，朔望所长更大尝推其故。而有得于古昔之所论者，则以海潮由月轮随宗动天之运也。古今多宗之，其占验有多端。一曰潮长与退之异势，多随月显隐盈亏之势。盖月之带运，一昼夜一周天，其周可分四分，自东方至午，自午至西，自西至子，复自子至东，而潮一昼夜概发二次。卯长午消，酉长子消，若随处随时，略有不同，是不足为论，别有其所以然也。二曰月与日相会相对，有近远之异势，亦使潮之势或殊，假如望时月盈即潮大，月渐亏而潮渐小。三曰潮之发长，每日迟四刻，必由于月，每日多用四刻，以成一周。而返原所，盖月之本动，从西而东，一日约行三十三度，从宗动天之带动，自东而西，必欲一日零四刻，方可以补其所逆行之路，而全一周也。四曰冬时之月，多强于夏时之月。故冬潮概烈于夏潮。五曰凡物属阴者，概以月为主，则海潮即由湿气之甚，无不听月所主持矣，即月所以主持海潮者，非惟光也，盖朔会时月之下面无光，至与吾对足之地亦无光，海当是时，犹然发潮不息，则知月尚有他能力，所谓隐德者，乃可通远而成功矣。是月以所借之光，或所具之德致使潮长也。如磁石招铁，琥珀招芥然，或生多气于海内使其发潮也，如火使鼎水沸溢然。

或问潮汐之为理者，何也？曰：一则以免腐朽之患，盖水久注必朽，一则以清外聚之垢，盖地上丕恶之积，由江河而归于海，乃潮长复发吐之也。一则辅舟航漂渡之事，盖潮长则从海易就岸，潮退则从岸易入海。观此则海潮之益不浅矣。造物主岂无意乎。或问海水之咸曷故，曰：多由于干湿之气之渗，证曰，凡滋味必从二气之杂，乃干而甚燥，必生咸，如灰溺汗等是也。则海既含多气，或风从外至，或日从内生，故其水不能不咸也。试用海水濯物，必温和干燥，较诸他水为浊。其沾濡如油，何也？其含土之干气故也。又试观海水，或流沙内，或被火蒸，必甘，何也？失土气之大分故也。又试取浮薄空器塞口沉于海中，其内所侵入之水必甘，因水从微孔入，少带土气故也。又从海气聚结之雨必甘，何也？气上时，其土之浊多坠失故也。观此多端，海水之盐，从上极干焦气而生也，明矣。虽然太阳之亢炎，亦能致咸，验之海面之水咸甚于海底者，近受日晕之射，而底之水日光不及故也。又试之夏月海水多咸于冬月，盖日轨甚近之所使然矣。

大地内多藏积水，常见凿矿者，多遇池渎湍涧，又随处掘井者，或浅或深，无不得水之源。又观干地屡开窍发水，而或成湖淀，或淹庐舍，因知地中若非函大积之水，定无是事也。又造物者初收水于深渊时，遗多分于地内，又随处开辟匿空隐渠，

以遍施润泽，正如人体内多备脉络筋骨，以运血气之润泽也。地本至干，非得水之润，自难凝结，又不能养育卉木、金石之类，济救人物之用，因知天地造成之初，地面即多发泉川江湖，以备后用。而江河溪泉多由于海水，证以四端。一曰天下大川日日入海而不溢者，必有他出，若无出而不溢，极难解矣。二曰江河之洪大者，若非源于海，安得有此大源，盖地内从气所变之水，万不足供大江之常流也。三曰从古尝有江湖泉川新出，其味如海之咸，其鱼亦如海内之形，则江河非由于海而何？四曰凡近海之地，必多泉川，愈远于海者，其川亦愈寡矣。

又江河虽多从海而出，但泉川亦有从气变生者。盖地中所藏多气既不能出外，又被围山之冷气攻之，因渐变洩而滴流，致成泉溪之水源。试观最高之山，大都有水泉，甚甘甚冽。若海水或相去甚远，其地或甚低，其水又浊且咸，何能致甘冽乎？又观人屋近于山麓，闭其户牖必多湿而发水何也，其内藏之气易变水也。矧山穴之内乎，又入山中诸洞旁多滴水成渚，乃溪涧水源之一证也。或问海卑地崇，水何能逆本性上流于地面乎，曰海水所由之匿空隐渠，必曲非直乃水因潮长时强入其内，不能复退，惟有渐进势不得不上涌矣。况星辰之隐德，必招摄海水以滋万物，而土为极干，又招水以自慰其渴，因济外物之须则水之上流也。观其私性为逆，观众物之公性则不为逆也。正如凡遇空时，水土必上，火气必下，而是上下之动者，论各元行之性为逆，论众物之性不逆是也。

《万国地理全图集》曰：诸水之汇聚，称为大洋，其最大者为太平海。在亚齐亚及亚墨利加中间，自东至西长三万三千三百里，自南至北阔二万四千三百里，西及大清日本等国，东交亚墨利加西边，其中多有群岛。次者大西洋海，东及欧罗巴亚非利加等地，西交亚墨利加。长二万五千二百里，阔一万六千二百里。其中大屿，四散海港繁多，为通商之大路。三者印度海，即在亚齐亚亚非利加南边，长阔均一万三千四百里。其中海岛最多。四者近北极之冰海，其长阔上下七千三百馀里。但因冰如山冻不可驶。五者近南极之冰海，其长阔不可量也。两山间至大之海，介欧罗巴亚非利加之中间，称地中海，长七千有馀里，阔一千九百里，其中海屿洲岛不胜数。黑海与亚得利亚海隅，及地中海相交大西洋海之东隅，系西班牙日耳曼巴刺得等海隅。西麦西可罗邻合顺巴分等海隅，海水之色如气者青，然夜间动水出火，若群萤动摇其深浅不等。大洋之中，断难量度，愈近岸愈浅。海中潮汐寰宇之阴湿，升降于水者，皆月主之，湿能下济，水则上升，如呼吸然。月之所临则潮起，为正摄，月之对冲潮亦为起，为反摄，故潮盈于朔，渐移三刻一十二分，对月到之位，而以日临之。次潮必应之，月望后东行，潮附日而西应之，月周天而潮亦应也。月绕地而行，潮亦绕地而行，惟潮有迟速大小不等。或有进六丈或一尺二尺而已，至潮有大小是随月所行，月行有高低，则潮生进退，月行高则潮小，月行低则潮大。其海潮皆有定候，每日昼夜两潮，如子午潮长，则卯酉潮退，但时刻各处不同。

庄廷勇《地图说》〈（乾隆五十三年，阳湖庄廷诀著有《海洋外国图编》，未见其书，见其二图）〉：地球浑圆全图，始于明神宗时，西人利玛窦及国朝南怀仁等所

进地球式及坤舆说。但其地球经纬分度以正面中国度线收狭小，而外域各国度线反放宽大者。据称地体浑圆，分绘作两半圆，应作中高之势，使阅者视正中则小，视斜侧应宽，庶合西洋线法云云。不知人视圆球，固当中面宽而侧面狭，今既于平幅绘图则当正中与边隅一律均匀，其经纬度已分曲直线，虽突面之体，人岂不可带左右视，即与视中线法同，何得如西人偏执迂见，致天度地面一图内有大小之殊耶。昔徐光启亦曾进万国经纬地球图，已无传本。今此图内经纬度线，核量匀派，其每度内应得水土界限，与西法旧图同，惟四隅之与中线，则概分均平，无大小偏陂之议，至西人旧图为幅寻丈，未便篋笥，且所书国土尚俱系前代名目，又图中混列虫鱼怪物，无关坤象大体，今并删除。祇仿其水土形局缩成尺幅，而外夷名称，悉遵钦定联方会览四彝图说等书。间或旁附旧名，便核同异至坤舆地圆之旨。《元史》札马鲁丁亦已言之，天有三百六十度，中界赤道分南北极以便推步，地亦如之，与天度相应。中国当赤道北，故北极常见，南极常隐，南行二百五十里，则北极低一度，北行二百五十里，则北极高出一度。地体浑圆，是以知地之全周为九万里。

又以南北纬度定天下之纵，凡北极出地之度同，则四时寒暑靡不同，若南极出地之度，与北极出地之度同，则其昼夜永短靡不同，惟时令相反，此之春，彼为秋，此之夏，彼为冬。以东西经度定天下之衡，两地经度隔三十度，地隔七千五百里，则时刻差一辰。凡时刻内刻之四分天即西过一度，相去一百八十度，则昼夜相反。自赤道南二十三度半，为南道即冬至限，赤道北二十三度半为北道，即夏至限。中国在赤道北，故日行南道，则中国昼短，日行北道，则中国昼长，日行赤道中则普天下昼夜均平。因以日轮行天之势，分山海为五带，即赤道间为中带，其地甚热，日轮昼夜长短匀平之间故也。一近北极圈，一近南极圈，此二处地甚冷带，远日轮故也。一在北极下中国昼长二圈之间，即北道夏至限，一在南极下中国昼短二圈之间，即南道冬至限，此二处皆为正带。一岁中日轮高下远近，得冷热往还相均故也。

又以全地块段之势，分舆地为五大洲。曰亚细亚者为中土，大清国南至吕宋亚齐噶喇巴，北至新增白腊冰海，东至日本岛，西至大乃河黑海西红海，小西洋等处。曰欧罗巴者，为大西洋，南至地中海，北至白海，东至黑海，西至大西洋海各岛。曰利未亚者，为西南洋，南至大浪山，北至地中海，东至西红海圣老楞佐岛，西至圣多默岛等处，其利未亚四围俱海，仅东北区尽西之海处微地，与西戎相连。大西人称若此处能与大西之地中海相通，则西舶可由此达小西洋至中国免绕利未亚之海，经大浪山风波，而又远二三万里也。曰亚墨利加者，是中国后面之地，全是海围，亦有数大国，于近赤道之宇加单处止微地，与南极下地相连，遂分南亚墨北亚墨二州。尽南为玛热辣尼峡，惟见南极出地，而北极恒藏焉。人物荒杳，从海北转，即中土属之瓜哇境矣。

大地同海，本一圆球，以入图分绘两面，阅者联东西为一，反复旋合观之，与得三百六十度全势。全图内十度作一格，使简约易览，其纬度自昼夜平线，分南北起至

两极，系平度，渐近极圈渐小，而尽于九十度。其每度之东西里分，应渐减除，其经度自两极疏分至赤道，系直度，其每度之南北经线，应准定二百五十里无减。自京师顺天府为经线，正中初度者，乃东方九十度内，定九五居中之义，馀经线为京师偏东偏西，循环合转，仍三百六十。今每幅经纬线，得一百八十度，而外围之大圆周亦仍三百六十度也。其各省府所定度位，则遵御制《数理精蕴》，以北极出地平，并日月交食各方，所测时刻天顶，推而定之。以中国所验而论，如春秋二分，日躔赤道时，于顺天府午正所测验，日离赤道天顶四十度，于最南之广州府午正所测验，日离赤道天顶二十三度，以二十三与四十相减，则馀十七度，即知广州距顺天南北隔地面亦十七度矣。再以合天交食之理定东西相去之广，以每年颁行月食，于最东杭州省城所验，较最西云南省城所验每差五刻五分，以刻分核度数，则知两省东西，相距二十度，是以舆图定两府东西隔二十度。馀他省府与全地各国，及海岛海面，俱依方测量，勿可混列也。其日出入方位，昼夜永短刻分，与夫交节气迟早时刻，各地不同处，自有颁行时宪，可与斯图外层之约略记载考核，或不甚舛。宣城梅文鼎曰：“极度晷景，常相因，知北极出地之高，即可知各节气午正之景，测得各节气午正之景，亦可知北极出其地之高，然其学非肤浅可窥。”今第以监定所测京省等处北极出地度，并以京师子午线为中，而较各省会地所偏之度，凡节候迟早月食先，后胥视此。

或问：古典籍记载，有言地之广大，东西南北曰四方，隅曰四维，总称八方，又曰四极，四游八之外，更有大九州。昔神农度地，四海内东西九万里，南北八十一万里，地厚与天等之说，今述地球兼水土，而圆周止九万里，何据乎？不知地体围圆九万里，非可臆见，以所定里数而测月食，分秒里差，核以时刻，如日随天行，一日一周地面，有十二时，较交食时分，得若千里，因知地兼海大围实九万里。再以北极出各地高卑，定南北准则亦九万里。但南北有两极不动之定位，至东西乃随各方人居处，论天与地，本无东西定位，慎勿泥古为胶柱之议。譬诸纪载，称有国土，从无日光，惟烛龙衔火相照。又有称天方仙界，日长无夜等说，固虚诞无凭更有可据者。如称奉使至北方，日皆长昼，即日入尚皆见博，烹羊胛未熟，而日又东升，以为其长昼可异，乃不知其时值夏秋间，至其地耳。如遇冬令岂知其地之人，皆伏蛰而避长夜，犹之台郡杂志载海中有暗罌，夷舶初抵是处，见其日亦长昼无夜，山青水秀，万花遍满，惜无居人。夷人谓其地美，留番众二百人住此，给以岁粮，俾为耕植次后原舟至，值山中如长夜，前留番众，无一存者，举火索之，见石上遗书言夏后渐成昏黑，且山多怪魅，所留人渐没矣。此等处所，同北极下之地，皆近极人九十度内乃夏则北有长昼，而南为长夜，冬则南有长昼，而北为长夜。至半年为日，半年为夜。恐闻者疑信未然，今将日躔南北带，冬夏二至限外，地面之昼夜时，列书刻以见昼夜长短，一定之理。可见太阳非独于九重天内居中，而于南北两极一百八十度内高卑上下以成岁，功亦在居中五十度内，吾人幸生中土，全仰太阳和煦如君父爱育之下，其极北极南地面，光气稍偏，虽曰大德好生，而冰海火地，人物亦罕，由少资生之道也。此外更辑有海洋外国图编，容别续出，以补前图之未尽。

○西洋人玛吉士《地理备考·叙》

水火有气而无生，草木有生而无知，禽兽有知而无义，人有气有生有知亦且有义，故最为天下贵也。是故君子以天为家，以德为本，以道为域，身躬由地而来，向地而归，灵魄由天而来，向天而归。人者不属此地而属天，何可轻忽人性之天，而背圣人之理乎？夫蛮狄羌夷之名，专指残虐性情之民，未知王化者言之。故曰先王之待夷狄，如禽兽然，以不治治之。非谓本国而外，凡有教化之国，皆谓之夷狄也。且天下之门有三矣，有禽门焉，有人门焉，有圣门焉。由于情欲者，入自禽门者也。由于礼义者入自人门者也。由于独知者，入自圣门者也。诚知夫远客之中，有明礼行义，上通天象，下察地理，旁彻物情，贯串今古者，是瀛寰之奇士，域外之良友，尚可称之曰夷狄乎？圣人以天下为一家，四海皆兄弟，故怀柔远人，宾礼外国，是王者之大度。旁咨风俗，广览地球，是智士之旷识。彼株守一隅，自画封域，而不知墙外之有天，舟外之有地者，适如井蛙蜗国之识见，自小自鄙而已。方今东西太平，远洋辐辏，凡洋艘到汉地通市，必绕地一周，围海数重，际天冥晦，不远万里而来相见，凡宇内穷极幽远，自日出之国以至冰岳之岛，洲与洲而相歧，国与国而相左，闭户陆居者，终身所未闻，皆远客身之所经目之所睹也。自非咨诸远人，则天文度数之远近，国土古今之盛衰，形势风俗之殊异，毕世其能想像乎？行舟沙礁之险易，到岸埠市之繁寡，即初涉商舶者，能遥度其津涯乎？诚欲扩智识而裨生人，其可以无是书。

○玛吉士《地球总论》

夫地球以土水二者为本。土则分为山谷、岛洲、磐石、沙泥。水则分为海、江、河、湖、渊、潭、涧、溪。上下周围，天涯到处，飞者飞，潜者潜，动者动，植者植，而皆不离于其面也。古之探访地球者，以所寻得之地，分为三州。一名欧罗巴，一名亚细亚，一名亚非里加，三者而已。及明宏治年间，始寻得新地，名之曰亚美里加，始合为四大州。后各驾舟历时，又寻出南海最南之澳大利亚大岛，且环以南洋众多各岛国或聚或散，因此新著《地理志》，人又以诸岛合为一州，命之曰阿塞尼亚。是以近日地球，始分为五大州也。一欧罗巴，二亚细亚，三非里加，四美里加，五阿塞尼亚。

又诸谙地理者，既知地球圈线周围共九万里，复以所得古今各处度量地面，周围约有积方二垓五京七兆九亿六万方里。五大州内所寻之地，所访之岛，所游至近之处，极远之邦，各方共计地约六京八兆八亿二万五千里。水则约一垓八京九兆一亿三万五千里。水陆二面两相比较，地则一分，水则三分。至于人数千亿，约分五种。或白、或紫、或黄、或青、或黑。其白者乃欧罗巴一州，亚细亚东西二方，亚非里加东北二方，亚美里加北方此数方之人，颜色皆白，面卵形而俊秀，头发直舒而且柔。其紫者乃亚非里加北方，亚细亚南方，除天竺及亚细亚所属数海岛不同外，其余颜色黑紫。鼻扁口大，发黑而髻。其黄者乃印度一国，及亚细亚南方，亚美里加

南方之人，其颜色皆淡黄。鼻扁口突，发黑而硬。其青者乃亚美里加人，其颜色大半青绿，面貌毛发，与黄者颇相等。其黑者，乃亚非里加人，颜色乌<黑干>，容凸颧高，口大唇厚，发黑而髻，有如羊毫，鼻扁而大，类似狮准。间亦有白色之人，居其东北则皆欧罗巴亚细亚二处人，曩时迁移彼地者也。又亚细亚南方及各海岛亦有黑人而形容体态，与亚非里加之黑人回殊。

夫天下万国之人，有下中上三等之分。下者则全不知有文义学问，止务渔猎游牧各处。中者则习文字，定法制立国家，但其见闻浅陋无深远。上者则攻习学问，修道立德经，典法度，靡不通晓，承平则交接邦国，礼义相待，军兴则捍御仇敌，保护国家。论五州万国之语言文字，约有八百六十种，欧罗巴语音五十三，其通用者十有七。一大西洋，一大吕宋，一意大里亚，一佛兰西，以上四者乃罗马国辣丁语所分派者也。一亚里曼，一贺兰，一弗拉萌牙，一大尼，一瑞典，一那华，以上六者，乃古调多尼加语所分派者也。一英吉利，其语乃辣丁调多尼加，二国所相并者也。一厄罗斯，一烘哥里亚，一伯罗尼亚，一布威弥亚，以上四者，乃古斯加拉窝尼亚之语所分派者也。一额力西，其语乃古额力西国所传者也。一回回，其语乃回鹘又，名回纥国所传者也。亚细亚语音，一百五十三，其通用者十有五。一回回，一天方，一伯尔西亚，一回纥，一中华，一满洲，一蒙古，一日本，一高丽，一琉球，一暹罗，一越南，一阿瓦，一印度，一西藏等语。亚非里语音一百一十五，其通者五，一伯尔卑勒，一壹的科鼻，一尼几里西，一哥布达，一桑哀等语。其天方语音亦通行于此州之北方。亚美里加语音，则有四百二十二，其至通用者，除土语外，多系别州之语，一英吉利，一大吕宋，一葡萄亚，一佛兰西，一贺兰，一大尼，一瑞西亚等语。南洋阿塞亚尼州语音百十七，其通用者，惟马来语音也。以上八百六十种，按省而分论之，约有五千余种，更按府县村镇而论，则其数莫能计矣。

○《地球推方图说》〈（弥利坚国人培端撰）〉

余尝考中华诸古书，多主地方而静之说，少有言地圆而动者。今试以大船游行海面至北极海，即见北斗星高在顶上，不能见南极。若游行南极海面，又见南极星亦高在顶上，不能见北极。可见南北之地皆圆。又试以船自广东向西开行，先过印度海，又向西南过亚非利加，又过南大西洋，南亚美理驾折向西北过太平海，然后直由西行，仍能回至广东，此又可见东西亦圆。故周行无碍，第地球圆图既列于前，恐未甚了目，故复推方而绘其全。凡分四大洲，曰亚细亚、欧罗巴、亚非利加、南北美理驾，各有图在后，至诸海岛皆不别列。

亚细亚洲幅员广大，为四土之最。东界大东洋海，南界印度洋海，西界北中海及红海至欧罗巴，北界北冰海。居是土者，东有大清国十八省，并内外蒙古诸部，新疆回疆朝鲜，又东海岛，如日本琉球其最著者也，南为暹罗缅甸南掌印度等国，西为前藏后藏波斯等国，西南为亚刺伯回部，西北为土耳其等国，再西为买诺所称小亚细亚者是，极北为俄罗斯界。俄罗斯之境土，虽十之六在亚细亚而国都建于欧罗巴

，则属之欧罗巴而已。

欧罗巴洲，在亚细亚西，以乌拉岭为界，西距大西洋海，海水由西北注入，曰波罗的海，由正西注入曰地中海，由西而东有巨浸曰黑海。汉初意大利亚之罗马国，创业成一统，中国称为大秦，五代攘乱散为战国，元末日尔曼列国在欧罗巴之中原称霸，自明至今大小共成十馀国，曰俄罗斯，曰瑞典，曰连国，曰尔曼，曰普鲁士，曰奥地利，曰希腊，曰瑞士，曰意大利亚，曰荷兰，曰比利时，曰佛兰西，曰西班牙，曰葡萄牙，至其雄峙海岛者，曰英吉利。

亚美理驾洲，地分南北，中如蜂腰，长约二万八千馀里。东距大西洋海，与欧罗巴、亚非利加二州相望，水程约隔万馀里，西距大东洋海，直抵亚细亚之东，其极西北隅，与亚细亚极东北隅，隔一海港。南亚美理驾，明时属葡萄牙、西班牙等管辖，至今分立数国，如可伦比亚、秘鲁、智利、巴西等，更有诸小国及群海岛，皆不赘叙。北亚美理驾，中国称米利坚者，是其民或从英吉利来，或从佛兰西来，后并立为一国。官以民情向往推迁粮以各部轻重自纳至其称花旗者，则因华人见其船挂花旗而名之也。夫本国有自主之权，至今不改。初英吉利与之构兵，经数年不解，至乾隆四十九年始议和。本国人立华盛为领首，自后每四年一易以为例，今幅员增广，户口日繁，已分为三十馀大部矣。人民物产，大约二十年之久则倍之，其农务工作兵丁贸易，赏罚刑法，来往宾使，修筑圯桥诸大事，皆由议事阁酌议，其乡学县学医学皆设馆，男女无一不读书，文质彬彬，称极盛焉。馀详国志。

卷七十七

○陈伦炯《天下沿海形势录》

天下沿海形势，从京师天津东向辽海，左延山海关、宁远、盖平、复州、金州、旅顺口、鸭绿江而抵高丽，右袤山东之利津、清河、蒲台、寿光、海仓口、登州而至庙岛，其登州一郡，陡出海东尽于成山卫，与旅顺口南北隔海对峙，海舶往盛京、天津者以成山为标准，此登州西北之渤海也。成山卫转西南，则靖海、大嵩莱、阳鳌山、灵山而至江南海州，此皆登州西南之海也。

海州而下，庙湾而上，则黄河出海之口。沙泥入海则沉实支条缕结，东向淤长，潮满则没，潮汐或浅或沉，名曰五条沙，中间深处，呼曰沙行。江南之沙船往山东者，恃沙行以寄泊，船因底平，少阁无碍，闽船遇此，则魄散魂飞。盖闽船底圆，加以龙骨三段，架接高昂，阁沙则碎折，更兼江浙海潮，外无屏蔽之山，以缓水势，故潮汐比他省为最急。苟乏西风开避，则舟随溜阁，靡不为坏，是以海舶往山东两京必从尽山对东开一日夜，避过其沙，方敢北向。而登莱淮海，稍宽海防，亦由五条沙为之保障也。

庙湾南自如皋通州而至洋子江口，内狼山，外崇明，锁钥长江，沙阪急潮，其概相似。而崇明上锁长江，下扼吴淞，东有洋山、马迹、花脑、陈钱诸山接连浙之宁波、定海外岛，而嘉兴之乍浦、钱塘之鳌子、馀姚之后海、宁波之镇海，虽沿海相连要疆，但外有定海为之捍卫，实内海之堂奥也。惟乍浦一处，滨于大海，东达渔山，北达江南之洋山，定海之衢山剑山，外则汪洋。言海防者，所当留意。江浙外海以马迹为界，山北属江，山南属浙，而陈钱外在东北，俗呼尽山。山大澳广，可泊舟百馀艘，贼舟每多寄泊。江浙水师，更当加意焉。由此再南历衢山、岱山而至定海，东南由剑山长涂而至普陀。普陀直东，外出洛迦门有东霍山，夏月贼舟亦可寄泊，伺劫洋舶回棹，且与尽山南北为犄角，山脚水深，非加长碇缆，不足以寄普陀之南。自崎头至昌国卫，接连内地，外有韭山吊邦，亦贼舟寄泊之所，此皆宁波之内海也。

自宁波、台州、黄崖沿海而下，内有佛头、桃渚、嵩门、楚门，外有茶盘、牛头、积谷、蜆壳、石塘、枝山、大鹿、小鹿，在在皆贼艘出没之区。而乐清束峙玉环，外有三盘、凤凰、北岙、南岙，而至北关以及闽海，接界之南关，实温台内外海径寄泊樵汲之区，不可忽也。闽之海，内自沙埕、南镇、烽火、三沙、斗米，北交定海、五虎而至闽安，外自南关、大嶙、小嶙、閩山、芙蓉、北竿塘、南竿塘、东永而至白犬，为福宁、福州外护，左翼之藩篱也。南自长乐之梅花镇，东万安为右臂，外自磁澳而至草屿，中隔石牌洋，外环海坛大岛闽安，虽为闽省九口咽喉，海坛实为闽省右翼之扼要也。

由福清之万安，南视平海内虚海套是为兴化，外有南日湄洲，再外乌丘海坛，所当留意者。东北有东永，东南有乌丘，亦犹浙省之南岬、北岬、韭山、衢山，江省之马迹、尽山也。泉州北则崇武獭窟，南则祥芝永宁，左右拱抱，内藏郡治，下接金厦二岛，以达漳州，金为泉郡之下臂，厦为漳郡之咽喉。漳自大武而南，镇海、六鳌、古雷、铜山、悬钟，在在可以寄泊，而至南澳，则闽粤分界矣。

泉漳之东，外有澎湖三十有六岛，而要在妈宫西屿头北港八罩四澳，北风可以泊舟，若南风不但有山有屿可以寄舶，而平风静浪黑沟白洋，皆可暂寄。惟洋大而山低，水急而流回，北之吉贝沉礁，一线直生东北，内皆暗礁布满，仅存一港蜿蜒，非熟习者不敢掉入。至南有大屿、花屿、猫屿，北风不可寄泊，南风时宜巡缉焉。澎湖之东则台湾，北自鸡笼山与福州之白犬洋对峙，南自沙马崎与漳之铜山对峙，延绵二千八百里。西面一片沃野，自海至山，浅阔相均，约百里，西东穿山至海，约四五百里。郡治南抱七鲲身而至安平镇大港，隔港沙洲，直北至鹿耳门，鹿耳门隔港之大线头、沙洲而至隙仔海翁隙，皆西护府治。而港之可以出入巨艘，惟鹿耳门与鸡笼淡水港。其馀港汊虽多大船不能出入，仅平底之澎船四五百石之三板头船，堪以出进，此亦海外形势以捍内地者也。南澳东悬海岛，捍卫漳潮，为闽粤海洋适中之要隘。外有三澎小岛，为南风贼艘经由暂寄之所，内自黄冈大澳而至澄海。放鸡、广澳、浅澳、靖海、赤澳，此虽潮郡支山入海，实潮郡贼艘出没之区。晨远扬于外洋以伺掠，夜西向于岛澳以偷泊，故海贼之尤甚者多潮产也。

赤澳一洋，自甲子南至浅澳、田尾、遮浪、汕尾、鲒门、港天、星平海，虽属惠州而山川人性，与潮无异，故立碣石镇以扼其中。自此而入粤省，外自小星、笔管、沱泞，福建头、大俞山、小俞山、伶仃山、旗而屿、九州洋而至老万山，鸟屿不可胜数，处处可以椎汲，在在可以湾泊。粤之贼艘，不但曾居海泊可以何劫，即内河桨船渔艇，皆可出海剽掠，粤海之藏垢纳污莫此为甚。广省左捍虎门，右扼香山。而香山虽外护顺德、新会，实为省会之要地。不但外海捕盗，内河缉贼，港汊四通奸匪殊甚，且其域澳门外防番舶，与虎门为犄角，有心者岂可泛视哉。生出十字门而至者万，此洋艘番舶来往经由之标准，下接崖门、三灶、大金、小金、乌猪、上川、下川、戩船、澳马、鞍山，此肇郡、广海、阳江、双鱼之外护也。高郡之电白外，有大小放鸡，吴川外有硃州，下邻雷州、白鸽、锦囊，南至海安。自放鸡而南至于海安，中悬硃州，暗礁暗沙，难以悉载，非深谙者莫敢内行。而高都地方，实藉沙礁之庇也。

雷州一郡，自遂溪、海康、徐闻、向南干出四百馀里而至海安，三面滨海，幅阔百里，对峙琼州，渡海百二十里。自海南绕西北至合浦、钦州、防城，而及交趾之江平、万宁州，延长一千七百里。故自海安下廉州，船宜南风，上宜北风。自廉之冠头岭而东，自龙调埠川、江永，安山口、乌兔，处处沉沙，难以尽载。自冠头岭而西至于防城，有龙门七十二径，径径相通。径者岛门也。通者水道也。以其岛屿悬杂，而水道皆通。廉多沙，钦多岛，地以华夷为限，而又产明珠，不入于交趾。是

以建海角亭于廉，天涯亭于钦。琼州屹立海中，地从海安渡，脉南崖州，东万州，西儋州，北琼州，与海安对峙。诸州县环绕熟黎，而熟黎环绕生黎，而生黎环绕五指岭七指山。五指西向，七指南向，周围陆路一千五百二十里。府城中路，直穿黎心，至崖州五百五十五里。万州东路直穿黎心，至儋州五百九十里。自海内港之东路沿海，惟文昌之潭门港，乐会之新潭那乐港，万州之东澳，陵水之黎庵港，崖州之大蛋港，西路沿海，惟澄迈之马岛港，儋州之新英港，昌化之新潮港，感恩之北黎港，可以湾泊船只。其余港汊虽多，不能寄泊。而沿海沉沙，有舟实为艰险，此亦海外稍次之台湾。惜田畴不广，岁仰耑于高雷，虽产楠沉诸香，等于广南，甲于诸番，究非台湾沃野千里可比。中国之海防，自辽而始，至琼而尽，首尾凡万余里。

○张汝霖《澳门形势篇》

濠镜澳之名，著于《明史》，其曰：澳门，则以澳南有四山离立，海水纵横，贯其中曰十字门，故合称澳门。或曰澳有南台北台，两山相对如门云。澳今西洋意大里亚夷人僦居，环以海，惟一径达前山，故前山为拊背扼吭地。北距香山县一百二十里而遥，南至澳门十有五里而近。其有寨自明天启元年始，立参将营，国初因之。康熙三年，改为副将，未几以左营都司代（何准道曰，康熙七年秋，海贼从寨右登岸，攻劫果福国村，副镇遂请移驻县城，坐令扼塞之地，武备损威）。相仍至今，五十六年。建土城，起炮台，兵防二门，外复建台，列炮各十。雍正八年，设县丞署。乾隆九年，建广州府海防同知署。增兵舍百间，而前山之势益重。东门外为教场，出南门不数里为莲花茎，即所谓一径可达者。前山澳山对峙于海南北，茎以一沙堤亘其间，径十里，广五六丈，茎尽处有山拔起，跗萼连蜷，曰莲花山。万历二年，茎半设闸官，司启闭。康熙十二年，建官厅于旁，以资戍守。出闸经莲花山下，有天妃庙，折而西南一山青巉巉，中嵌白屋数十百间，形繚而曲。东西五六里，南北半之，有南北二湾，可以泊船，规圆如镜，故曰濠镜，是称澳焉。前明故有提调备倭巡缉行署三，今惟议事亭不废。国朝设有海关监督行台及税馆，其商、僧、传、译、买办、诸杂色人多闽产。若工匠，若贩夫、店户，则多粤人。赁夷屋以居，烟火簇簇成聚落。其舟楫有高尾艇，有西瓜扁，又有省渡，石歧渡，新会江门渡，有洋船。石立庙祀天妃，名其地曰娘妈角。娘妈者，闽语天妃也。雍正七年，观风整俗，使焦祈年。乾隆十年，分巡广南韶连道薛馥先后巡视有记（薛馥《澳门记》：自香山县凤栖岭，迤南凡一百二十里，至前山又二十里，为濠镜澳，不至澳六七里。山嶄然断，亘沙堤如长桥，曰莲花茎，茎末山又特起，名莲花山。又伏又起，中曲拗长五六里，广半之。直坤艮是称澳焉。澳惟一茎系于陆。馈粮食，馀尽海也。以故内洋舟达澳尤便捷。遵澳而南放洋十里许，右舵尾，左鸡颈，又十里许，右横琴，左九澳湾峰，表里四立象箕宿，纵横成十字，曰十字门，又称澳门云。其东南百里间，为老万山，孤岛具营垒。山东北注虎门，属番舶入中国道。此山外则天水混同，无复山矣。而澳夷出入洋，则不于虎门，于十字门二门俱斜直老万山，十字门特近澳也。澳夷西洋族。自嘉靖三十年来此，岁轮麇集五百一十有五

，孳育蕃息，迄今二百有馀年矣。其户四百二十有奇，其丁口三千四百有奇。白主黑奴，内刺兵一百五十名，其渠目兵头一，掌兵理事官一，司库判事官一，司狱而总领于番僧一人。其教号天主，其业惟市舶。慧者肆天官术为庙者八，曰三巴，曰伽斯兰，曰大庙，曰板漳，曰龙嵩，曰风信，曰支粮，曰花王。附庙置狱，狱三重，薄罪圈拘，听礼拜庙即释。重则缚置炮口，击人海。为炮台六，曰东望洋，曰伽斯兰，曰三巴，曰南湾，曰西望洋，曰娘妈角。炮铜具四十六，铁具三十，大者六十一，小者十有五。凡庙若炮台，独三巴为崇闳焉。乾隆十年乙丑二月，予以巡海至此，偕海防印同知光任，香山江令日暄登乃台，译人次理事官前导，而兵目领番卒手布绣旗肩鸟铳一十二人排右。台方广可百亩，中有堂，西南指十字门，东望则九洲洋如列星罗几砚间下，即宋文天祥勤王经由之伶仃洋也。西望则三灶黄扬诸山，而北折而上为崖山也。转而内瞩，洲屿参互，水有艨艟哨桨之次比，陆有亭障壁垒之相望，前山寨附其背，虎门扼其吭，国家御内控外，大一统岂不伟哉！）＞。

澳东为东澳山，又东为九星洲山，九峰分峙，多岩穴，奇葩异草，泉尤甘，商舶往来必汲之，曰天塘水。其下为九洲洋，旁连鸡拍山，多暗礁。又东为零丁山，东莞香山，新安三邑画界处，下为零丁洋，又东至于旗纛澳，又东北不二百里，有二门，曰虎门，蕉门。蕉门南瞰大洋有暗礁，不能寄碇，与东洲门，金星门，可泊曾居漕船洋舶不由之。金星门之旁，有鸡笼洲小茅山。虎门即虎头门，大虎山峙其东，小虎山峙其西，双扉砦然，海水出入其中，横档山限之。所谓粤东山有三路，分三门，而以大庾为大门。海有三路，亦分三门，而以虎头为大门。东西二洋之所往来，以此为咽喉者也。横档山有东西炮台，与南山三门炮台，声势相应，虎门协副将领之。上有虎门寨，明万历十六年建，国初毁于寇。康熙二十六年建今寨于石旗岭，筑土为之，五十七年改建砖城，官兵自邑还驻之（薛馥《虎门记》，虎头门以虎山得名，山有二，西曰小虎山，东曰大虎山，如连珠巨浸中。稍折而东南，右横档山，左南山，相距五六里，岿然双阙。而海出入其间，界中外，故曰门横档山。首尾树炮台二，高水面约五十仞。南山炮台一，可三仞及水，俱宿目兵焉。循南山下十馀里，三门炮台二。三门者，山前突二石，插波划水为三也。目兵如各炮台数。横档南三十里许，为龙穴山。先置泛哨，今废。南山东南三四十里为校椅湾，略如郊关形，而已旷廓，外绝涯涘矣。虎山内外重洋，而门当其最深流处，番舶及内郡巨艘，必由以入，绝狮子洋，达广州，海中函谷关也。而门左右半浅洋，惟不任漕舶行，他舟纵所如寥平，闭外夷之门一，而开内攘之门且千矣。夫陆有冈，海有港，此胜败得失之地也。虎头门既城，石旗麓聚兵，千有八百八十八人，领于副总兵官，而偏师亦往往守港口，但使声援，罔有不及，逻调罔有不谨。重门击柝，以御暴客，庶其惩而毖后患哉。虽然海门以闭内外也，外困于内，变生于常道，必有制治于兵防之先者）＞。又名秀山，宋张世杰奉帝昺，退保秀山即此。由是逾狮子洋，入黄埔，是为今诸番舶口，虎门天启，海阔而多礁，舟触之立碎，番船至，必官给引水人导之入，固天设之险也。又虎门下有合兰海，每岁正月初三四五日，现城阙楼台车骑人物倏忽万状，康熙丙辰见戈甲之形，粤有兵变，盖海市也。

北则青洲山前山澳山，盈盈隔一海，兹山浸其中，厥壤硃，厥木樛嶙峋荟蔚，石气凝青，与波光相上下。明嘉靖中，佛郎机既入澳，三十四年，复建寺于兹山，高六七丈，闳敞奇。天启元年，守臣虑其终为患，遣监司马从龙毁其所筑城，番不敢拒。今西洋番僧，构楼榭，杂植卉果，为澳夷游眺地，又北为秋风角，为娘妈角，一山嵒然斜插于海，磨刀犄其西，北接蛇埗，南直澳门，险要称最。上有天妃宫，其前山迤北由陆道雍陌〈（明万历中设雍陌营）〉，逾径顶达凤栖岭，以至于县。

澳西不十里，有北山，下为北山村，沙尾村，西为灯笼洲，其与秋风角对峙者，曰南野角，旁为挂碇山，船可寄碇。又西为大托山小托山，大磨刀小磨刀山，有炮台上下二门，过此为虎跳门。崇祯十年，红毛驾四舶，由此门入广州求市，外有岛，广百馀里，是为浪白濶。明初诸番互市于此。嘉靖中始移濠镜。万历三十五年，番禺举人卢廷龙计偕入都，请尽逐澳中诸番，出居浪白外海，当事不能用。又西为黄杨山，上有张世杰墓，下为黄梁都，有巡检司，城方一里，都司戍之。稍南为咸汤门，外为三灶山，产盐，有大使领之。高澜山多鹿，元海寇刘进据之，明初平，有腴田三百顷，居民烟火，与三灶相望。

其南有四山，为内十字门。又二十里有四山，为外十字门。澳夷商舶出入必由之，有横琴山宋益王南迁泊此。丞相陈宜中欲奉之，奔占城颺作而殂。宜中遁，夜有火烧舟舳几尽。一名深井山澳曰井澳，横琴二山相连，为大小横琴。元末海寇王一据之。旁一山曰银坑，水最甘冽。又南五十里曰蒲台石，又东南为老万山。自澳门望之隐隐一发，至则有东西二山，相距三四十里。东澳可泊西南风船，西澳则东北风船泊之。山外天水混茫，虽有章亥，不能步已，岁五六月，西南风至，洋舶争望之而趋，至则相庆。山有人魑结，见人辄入水，名曰卢亭。相传晋贼卢循溃兵逃此，子孙皆裸体，尝下海捕鱼充食，能于水中住三四日不死。地多伏莽，山故名大奚山。有三十六屿，周三百馀里，居民不隶征徭，以鱼盐为生。宋绍兴间招降之，刺其少壮者，充水军，老弱者放归去。寨有水军使臣及弹压官。庆元三年，盐禁方厉，复啸聚为乱，遣兵讨捕，墟其地，以兵戍之，未几罢，后有万姓者，为酋长，因呼老万山。雍正七年，两山各设炮台，分兵戍之，与大屿山屯哨为犄角，则澳门虎门之外蔽也。

○英夷入贡旧案乾隆五十八年敕谕前一道

皇帝敕谕英吉利国王知悉，咨尔国王，远在重洋，倾心向化，特遣使恭赍表章航海来庭，叩祝万寿，并备进方物，用将忱悃。朕披阅表文，词意肫恳，具见尔国王恭顺之诚，深为嘉许。所有赍到表贡之正副使臣，念其奉使远涉，推恩加礼，已令大臣带其瞻觐锡予筵宴，叠加赏赉，用示怀柔。其已回珠山之管船官役人等六百馀名，虽未来京，朕亦优加赏赐，俾得普沾恩惠，一视同仁。

至尔国王表内恳请派一尔国之人，住居天朝，照管尔国买卖一节，此则与天朝体制

不合断不可行。向来西洋各国愿来天朝当差之人，原准其来京，但既来之后，即遵用天朝服色，安置堂内，永远不准复回本国，此系天朝定制。想尔国王亦所知悉。今尔国王欲求派一尔国之人住居京城，既不能若来京当差之西洋人在京居住，不归本国，又不可听其往来，常通信息，实为无益之事。且天朝所管地方，至为广远，凡外藩使臣到京，译馆供给，行止出入俱有一定体制，从无听其自便之例。今尔国若留人在京，言语不通，衣服殊制，无地可以安置，若必似来京当差之西洋人，令其一例改易服饰，天朝亦从不肯强人以所难。设天朝欲差人常住尔国，亦岂尔国所能遵行，况西洋诸国甚多，非止尔一国，若俱似尔国王恳请派人留京，岂能一一听许，是此事断难行。岂能因尔国王一人之请，以致更张天朝百余年法度。若云尔国王为照料买卖起见，则尔国人在澳门贸易，非止一日，原无不加恩视，即如从前博尔都噶尔亚意达里等国，屡次遣使来朝，亦曾以照料贸易为请，天朝鉴其困扰优加体恤，凡遇该国等贸易之事，无不照料周备。

前次广东商人吴昭平，有拖欠洋船价值银两者，俱飭令该管总督，由官库内先行动支帑项，代为清还，并将拖欠商人重治其罪，想此事尔国亦闻知矣。外国又何必派人留京，为此越例断不可行之请。况留人在京，距澳门贸易处所，几及万里，伊亦何能照料耶。若云仰慕天朝，欲其观习教化，则天朝自有天朝礼法，与尔国各不相同，尔国所留之人，即能习学，尔国自有风俗制度，亦断不能效法中国，即学会亦属无用。天朝抚有四海，惟励精图治，办理政务，奇珍异宝，并不贵重。尔国王此次贡进各物，念其诚心远献，特谕该管衙门收纳，其实天朝德威远被，万国来王，种种贵重之物，梯航毕集，无所不有，尔之正使等所亲见。然从不贵奇巧，并无更需尔国制办物件，是尔国王所请派人留京一事，于天朝体制既属不合，而于尔国亦殊觉无益，特此详晰开示，遣令贡使等安程回国。尔国王惟当善体朕意，益励款诚，永矢恭顺，以保父尔有邦，共享太平之福。除正副使臣以下，各官及通事兵役人等，正赏加赏各物件另单赏给外。兹因尔国使臣归国，特颁敕谕，并锡赉尔国王文绮珍物，具如常仪。加赐彩缎罗绮文玩器具诸珍，另有清单，王其祇受悉朕眷怀，特此敕谕。

○乾隆五十八年敕谕后一道

皇帝敕谕英吉利国王，知悉尔国王远慕声教，向化维殷，遣使恭赍表贡，航海祝釐。朕鉴尔国王恭顺之诚，令大臣带领使臣等瞻觐，锡之筵宴，赉予骍蕃，业已颁给敕谕。赐尔国王文绮珍玩，用示怀柔，昨据尔使臣以尔国贸易之事，稟请大臣等转奏，皆系更张定制，不便准行。向来西洋各国及尔国夷商，赴天朝贸易，悉于澳门互市，历久相沿，已非一日，天朝物产丰盈，无所不有，原不藉外夷货物以通有无，特因天朝所产茶叶磁器丝斤，为西洋各国及尔国必需之物，是以加恩体恤，在澳门开设洋行，俾得日用有资，并沾馀润。今尔国使臣于定例之外多有陈乞，大乖仰体天朝加惠远人抚育四夷之道，且天朝统驭万国，一视同仁，即广东贸易者，亦不仅尔英吉利一国，若俱纷纷效尤，以难行之事，妄行干渎，岂能曲徇所请，念尔国

僻居荒远，间隔重瀛，于天朝体制原未谙悉，是以命大臣等向尔使臣详加开导。遣令回国，恐尔使臣等回国后稟达未能明晰，复将所请各条缮敕，逐一晓谕，想能领悉。

据尔使臣称，尔国货船将来或到浙江宁波珠山及天津广东地方收泊交易一节，向来西洋各国前赴天朝地方贸易，俱在澳门设有洋行，收发各货由来已久。尔国亦一律遵行多年，并无异语，其浙江宁波直隶天津等海口，均未设有洋行，尔国船只到彼，亦无从销卖货物，况该处并无通事，不能谙晓尔国言语，诸多未便，除广东澳门地方仍准照旧交易外，所有尔使臣恳请向镇江、宁波、珠山及直隶天津地方泊船贸易之处皆不可行。

又据尔使臣称，尔国买卖人要在天朝京城另立一行，收贮货物发卖，仿照俄罗斯之例一节，更断不可行。京城为万方拱极之区，体制森严，法令整肃，从无外藩人等在京城开设货行之事。尔国向在澳门交易，亦因澳门与海口较近，且系西洋各国聚会之处，往来便益，若于京城设行发货，尔国在京城西北地方，相距辽远，运送货物亦甚不便。从前俄罗斯人在京城设馆贸易，因未立恰克图以前，不过暂行给屋居住。嗣因设立恰克图以后，俄罗斯在该处交易买卖，即不准在京城居住，亦已数十年。现在俄罗斯在恰克图边界交易，即与尔国在澳门交易相似。尔国现有澳门洋行发卖货物，何必又欲在京城另立一行。天朝疆界严明，从不许外藩人等稍有越境搀杂，是尔欲在京城立行之事必不可行。

又据尔使臣称欲求相近珠山地方小海岛一处，商人到彼即在该处停歇，以便收存货物一节，尔国欲在珠山海岛地方居住，原为发卖货物而起，今珠山地方现在洋行，又无通事，尔国船只已不在彼停泊，尔国要此海岛地方亦属无用。天朝尺土俱归版籍，疆址森然，即岛屿沙洲，亦必画界分疆，各有专属，况外夷向化天朝，交易货物者，亦不仅尔英吉利一国，若别国纷纷效尤，恳请赏给地方居住，买卖之人，岂能各应所求。且天朝亦无此体制，此事尤不便准行。

又据称拨给附近广东省城小地方一处，居住尔国夷商，或准令澳门居住之人，出入自便一节，向来西洋各国夷商，居住澳门贸易，画定住址地界，不得逾越尺寸，其赴洋行发货夷商，亦不得擅入省城，原以杜民夷之争论，立中外之大防。今欲于附近省城地方，另拨一处，给尔国夷商居住，已非西洋夷商历来在澳门定例。况西洋各国在广东贸易多年，获利丰厚，来者日众？岂能一一给拨地方分住耶。至于夷商等出入往来，悉由地方官督率洋行商人，随时稽查，若竟毫无限制，恐内地夷人与尔国商人，间有争论，转非体恤之意。核其事理，自应仍照定例在澳门居住，方为妥善。又据称英吉利夷商自广东下澳门由内河行走货物或不上税，或少上税一节，夷商贸易，往来纳税，皆有定则，西洋各国，均属相同，此时自不能因尔国船只较多，征收稍有溢额，亦不便将尔国上税之例独为减少。惟应照例公平抽收，与别国一体办理，嗣后尔国夷商贩货赴澳门，仍当随时照料，用示体恤。

又据称尔国船只请照例上税一节，粤海关征收船料，向有定例，今既未便于他处海口设立交易，自应仍在粤海关按例纳税，毋庸另行晓谕。至于尔国所奉之天主教，原系西洋各国向奉之教，天朝自开辟以来，圣帝明王垂教创法，四方亿兆，率由有素，不敢惑于异说。即在京当差之西洋人等居住在堂，亦不准与中国人民交结，妄行传教，尤属不可。以上所谕各条，原因尔使臣之妄说，尔国王或未能深悉天朝体制，并非有意妄干。朕于入贡诸邦诚心向化者，无不加之体恤，用示怀柔，如有恳求之事，若于体制无妨，无不曲从所请。况尔国王僻处重洋，输诚纳贡，朕之锡予优加，倍于他国。今尔使臣所恳各条，不但于天朝法制攸关，即为尔国代谋，亦俱无益难行之事，兹再明白晓谕尔国王当仰体朕心，永远遵奉，共享太平之福。若经此次详谕后，尔国王或误听尔臣下之言，任从夷商将货船驶至浙江天津地方欲求上岸交易，天朝法制森严，各处守土文武，恪遵功令，尔国船只到彼，该处文武必不肯令其停留，定当立时驱逐出洋。未免尔国夷商枉劳往返，勿谓言之不预也，其凛遵毋忽，特此再谕。

○奏英夷贡表转进折〈（乾隆六十年十二月粤督朱粤关舒奏）〉

奏为英吉利国呈进表贡，奏明请旨事。据洋行商人蔡世文等禀称，据英吉利国大班披朗，称伊国王备具恭进大皇帝表文方物，由本国夷船寄粤，令伊面见总督关部大人，将表贡赍呈，转求代奏等语。臣等当即传见该大班，据将夷字正副表二件，伊国自书汉字副表一件，贡物一分呈出。臣等公同阅验，其汉字副表虽系中华字书而文理舛错，难以句读，随令通晓该国字书之通事，将夷字副表与汉字表核对，另行译出。臣等核其文义，缘该国王因前年贡使进京，仰蒙皇上怀柔体恤，赏赉渥优不胜喜欢感激，是以备具表文土物呈进，以表悃忱。且声明前年天朝差大将军带兵到的密地方，伊国曾发兵相助，此事在从前贡使起身之后，他们不曾得知，是以未在大皇帝前奏明等语。臣等询问该大班的密是何地方，据云在中华西北地方，与本国海道毗连等语，是的密似即系廓尔喀地名，其所称曾经发兵相助之语，措词极为恭顺，而又意存见好，外夷慕化输诚，益仰德威广被。惟是各国进贡，向系专遣使臣赍奏，今该国并无贡使来粤，止系该大班接到表贡，求臣等转奏，与例未符，谨缮录贡单同原表三件，恭折奏呈御览，其贡物如准赏收，俟命下，臣等另行委员赍送京师。

○乾隆六十年译出汉字夷表

英吉利国王雅治，管佛兰西并爱伦等处地方呈天朝大皇帝，我宗室议政大臣马甘尼，由天朝京都回到本国，带有大皇帝书信，所谕情由恩典，我心中十分感谢欢喜，所差贡使进的礼物，蒙皇上赏收，赍到御赐各物，当即拜领，足感大皇帝纪念。彼此虽隔重洋，但俱要望通国太平无事百姓安宁，蒙大皇帝谕称凡有我本国的人来中国贸易，俱要公平恩待，此是最大天恩。虽天朝百姓不能来我国贸易，若有来的，我亦要尽心一样看待，我已分付在港脚等处地方官员，遇有天朝百姓兵丁人等，务

要以好朋友相待，从前天朝差大将军带兵到的密地方，我国兵总亦曾相助。前贡使到京时，未得我们因都士丹地方音信，是以未曾将此事奏明，将来如有机会，亦可以表我的诚心，据贡使回称大皇帝万寿康宁，并称我将来年寿，仰托鸿福，均同一样。我心实在欢喜感激，惟望中华同外国永久共沐。天恩顺具本国些须土物，伏乞赏收，自英吉利国本都，呈一千七百九十五年六月二十日。〈（按：因都士丹即温都斯坦，译音不同，盖言贡使未接印度兵总之信息也。）〉

○嘉庆九年译出汉字夷表

英吉利国王雅治管爱伦等处地方，呈天朝大皇帝。从前太上皇帝，恩威远播，四海升平，今大皇帝仁慈威武，天下太平，均同一德。凡有本国人来中国贸易，俱蒙一体公平恩待，我因天朝百姓不能来我本国贸易，我已分付在港脚等处地方官员，如与中国相连地方，遇有天朝百姓兵丁人等，务要加意相待。即遇有别项事情，要我出力，我亦十分欢喜效力。我与佛兰西国前已修和，因和之后，伊国强横无理，是以我今复与伊国战争。我本意原欲和好无事，岂料伊国强横凌辱，致我不能忍受，又于海口地方设立重兵，显有歹意，我恐被伊国占夺，无奈亦只得设立重兵防守，并非意存好斗。我虽然与伊国战争，仍可照旧来中国贸易通好，并无阻碍。那佛兰西国海口，虽有重兵，我已用兵船围住，伊不能出口。此外又多派兵船护送，是以我贸易船只可保无虞。又幸遇大皇帝圣明，即使佛兰西国有着人到中国谣言疏间我国，我想大皇帝必不听信。再伊国不独存心想占夺我国，并欲占夺我之属国，伊国若兵力不能相敌，伊必另设阴谋，即伊国恃强设计我国，均能设备提防，可保无虞。查该佛兰西国内，已乱了十三年，佛兰西老国王，为人甚好，竟被伊国人弑害，深为可恼可恨。如今伊国有一人做了国长，存心无道意欲惑乱人心，使通国之人，不顾五伦，不畏天地，我想伊断不能惑中国。大皇帝英明素著，定然洞察其奸，恭祝大皇帝长享四海升平之福。具本国些须土物，伏乞大皇帝赏收，自英吉利本都一千八百四年五月二十二日。

○粤〈（督倭关延）〉奏片稿〈（嘉庆九年十二月）〉

查英吉利国王表内所称，与佛兰西国争斗及佛兰西国有着人到中国谣言疏间等语，查系嘉庆七年八月间，有在澳居住之夷目委黎多，寄信与在京居住之西洋人索德超，言英吉利国有大战船六只，近澳门停泊，恐有觊觎澳门情事。转呈管理西洋人大臣苏楞额具奏，钦奉谕旨查询经前督臣吉查明英吉利国护货兵船，均已陆续回国。其在澳门外湾泊时并未滋事，因该国向来恃强，住澳夷人是以惊疑等情，奏蒙圣鉴在案。今该国王表文所称谣言疏间之语，自系指前事而言。本年该国亦有护送货物兵船四只来广，随即护送货船回国，并无丝毫滋事且贸易夷船，英吉利国货物最细，较别国买卖殷厚，该国夷目夷商，均称恭顺。臣等窥测其隐，因与佛兰西蛮触相争，恐为离间，有妨贸易，故于表内特陈其事，密询洋商潘致祥等，亦佥称委系此意。该二国僻居东北海外，去粤东甚遥，断无虞别滋事端等语，似属可信，可以仰

慰圣廬。

○粵〈（督那关延）〉覆奏〈（嘉庆十年三月）〉

奏为英吉利国呈进表贡，接奉廷寄，恭折覆奏事。伏查外洋各国夷商，俱无兵船，惟英吉利国货船有兵护送，而该国商船亦无兵船，惟其国王货船，始有兵船四只护送。其兵船在虎门外，交易后随同货船回国，不准少有逗遛。臣等亦派有兵役防送，其余各夷国货船内，均有炮火器械，自资防范，于例原准携带，至该国原表称欢喜效力等语，隐跃其词，自系闻洋面盗贼不靖，或需伊等出力之意。查夷人不过沾沾计利，即如上年澳门夷目，愿备兵船二只，帮同师船出洋缉捕，臣延即以体制不符，且不能得力，与倭议以后，停止夷船协捕。于本年正月会奏在案而此二只洋船，迄今无踪，亦实无遭风失事等事。细揣其情形，不过藉协捕为名，可以免此二船出入纳税。而英吉利国自亦得闻此事，希冀效尤免税，又恐澳门夷船出力有功，或待彼国冷淡，其意不过如此，至各该国夷船，船只既大，多载炮火，向来洋盗俱不敢抢劫澳门等要处。又有师船巡防，不致少有疏失，可以无廑圣念。

○嘉庆二十一年七月奉

上谕此次英吉利国贡使到天津时，谢筵不遵礼节，至通州已称叩跪必能如仪，迨至御园，朕将次升殿，正副使臣俱托病不能瞻觐，是以降旨即日遣回。但念该使臣虽有失礼之愆，该国王万里重洋，奉表纳贡其意至为恭顺，未便绝之已甚，转失字小之意，因将该国王贡品内择其至轻微者，地理图四张，画像二张，铜板印画九十五张，加恩赏收。仍赏给该国王白玉如意一枝，翡翠玉朝珠一盘，大荷包二对，小荷包八个，交该贡使领赉回国，以示厚往薄来之意。该贡使等领到赏件，极为欣感，亦颇形悔怯，现已自通州起行，俟到粤后著蒋攸钰等仍照例给予筵宴一次，并谕以尔等福分浅薄，已至宫门，不能瞻仰天颜。大皇帝怜念尔国王慕化输诚，仍酌收贡件，并赏尔国王贵重品物，尔等应感激天恩，迅速回国，俾尔国王敬悉恩意。其未收贡件，均妥为照料上船，勿令损失。倘晓谕之后，该贡使等复将未收贡物，恳乞赏收，总以业经奉有明旨不敢渎请王言拒绝。钦此。

敕谕英吉利国王知悉，尔国远在重洋，输诚慕化前于乾隆五十八年，先朝高宗纯皇帝御极时，曾遣使航海来庭，维时尔国使恪恭成礼不愆于仪，用能仰承恩宠，瞻觐筵宴锡赉便蕃。本年尔国王复遣使赉奉表章，备进方物，朕念尔国王笃于恭顺，深为愉悦，循考旧典，爰飭有司，俟尔国使臣至日，瞻觐宴赉，悉仿先朝之礼举行，尔使臣始达天津，朕飭派官吏在彼赐宴，诂尔使臣于谢宴时，即不遵礼节，朕以远國小臣，未娴仪度，可从矜恕，特命大臣于尔使臣将次抵京之时，告以乾隆五十八年，尔使臣行礼悉跪叩如仪，此次岂容改异。尔使臣面告我大臣，以临期遵行跪叩不致愆仪，我大臣据以入奏。朕乃降旨于七月初七日令尔使臣瞻觐，初八日于正大光明殿，赐宴颁赏，再于同乐园赐食，初九日陛辞，并于是日赐游万寿山，十一日

在太和门颁赏，再赴礼部筵宴，十二日遣行，其行礼日期仪节，我大臣俱以告知尔使臣矣。初七日瞻觐之期，使臣已至宫门，朕将御殿，尔正使忽称急病不能动履。朕以正使猝病，事或有之，因祇令副使入见，乃副使二人亦同称患病，其为无礼，莫此之甚。朕不加深责，即日遣令归国，尔使臣既未瞻觐，则尔国王表文亦不便进呈，仍由尔使臣赍回。但念尔国王数万里外奉表纳赆，尔使臣不能敬恭将事代达愀忱，乃尔使臣之咎。尔国王恭顺之心，朕实鉴之，特将贡物内地理图画像山水人像收纳，嘉尔诚心，即同全收。并赐尔国王，白玉如意一柄，翡翠玉朝珠一盘，大荷包两对，小荷包八个，以示怀柔。至尔国距中华遥远，遣使远涉，良非易事，且来使于中国礼仪不能谙习，重劳唇舌，非所乐闻，天朝不宝远物。凡尔国奇巧之器，亦不视为珍器，尔国王其辑和尔人民，慎固尔疆土，无间远迩，朕实嘉之。嗣后无庸遣使远来，徒烦跋涉，但能倾心效顺，不必岁时来朝，始称向化也，俾尔永遵，故兹敕谕。

卷七十八

○粤东市舶论〈（清河萧令裕）〉

康熙二十三年，台湾郑氏平，海禁大开。二十四年，从疆吏之请，设江海关，浙海关，闽海关，粤海关，于是内地商舶，兼通南洋。荷兰助顺，先请互市，他岛夷望风景附，莫不瞻戴斗牛，梯航岁至。英吉利最后款关，其国皆在大西洋，荒远莫测，而自汉以来所通西域，仅至西南洋而止。然以《汉书》前后西域二传考之，则知西域之与西洋地虽相辽，俗不甚远也。班书称罽宾国王，治循鲜城，其民巧雕文刻镂，治宫室织罽，刺文绣，好酒食，有金银铜锡以为器，市例以金银为钱。文为骑马，幕为人面，其风气物类与罽宾同者。有乌弋安息之属，乌弋之钱，独文为人头，幕为骑马，安息亦以银为钱，文独为王面，幕为夫人面。今英吉利佛兰西荷兰诸国，善制钟表，穷极工巧，织罽之属，精妙绝伦，所用洋钱，亦以银铸。幕为人面，或为王面，斯其俗相近一矣。班书称安息国，画革旁行为书记，师古谓今西方胡国及南方林邑之徒，书皆横行不直下。今西洋诸国书旁行斜上，皆拉体纳字〈（今钦天监有书拉体纳字文）〉。鸟迹蛛丝，由左以达右，斯其俗相近二矣。班书自宛以西至安息国，虽颇异言，然大同自相晓知，其人皆深目多须髯，善贾市，争分铢，贵女子，女子所言丈夫乃决正。今西洋诸国，善贾争利，家事取决，常于女子，妇主资财，夫无妾媵，微不同者，深目鲜须耳，斯其俗相近三矣。盖大西洋之地，在《汉书》惟大秦国足以当之。范书言大秦国，亦云海西国，以金银为钱，银钱十当金钱一，其王常欲通使于汉，而安息欲以汉绘彩与之交市，故遮阂不得自达。至桓帝延熹九年，大秦王安敦，遣使自日南徼外，献象牙犀角玳瑁，始乃一通焉。直至明代万历中，利马窦入中土，而大秦人始通于中国。继以佛郎机、荷兰戈船相继至粤闽，故大西洋之通，自明代始。若天竺国，一名身毒，则西南洋非西洋也。亦于明季国初，为西洋诸国据其海口，设炮台，立市埠，今来粤贸易港脚白头夷附英吉利旗号者，即古之天竺国。于是，大西洋与西南洋始混而为一。征诸汉时西域之俗既如彼，验之今日南洋之舶又如此，岂非向背之故。振古如兹，怀诱之方，无远不屈者哉，夫象胥达志，情款非易通也。涨海浸天，帆樯非乐赴也。而黄支献见，汉以来始不绝书。番禺都会，唐以后舶乃云萃，可知殊裔之贡珍，视中华为天府。诸蕃之怀化，求市贾以自封也。昔之圣王稔其风尚，故结以恩信，招以货贿，蛮夷竭欢，象来致福，减戍守之费，兵革不兴，收征榷之赢，军储是赖，远览古今因时之制，得失之林，断可识已。是故趋利如鹜者，种人谿壑之常，因势要约者，函夏金汤之固。孟坚所谓汉多财物，必市乃得所欲。乃罽宾实利赏赐贾市，其使数年而一至者，真为得其情实也，知其情实而御之，有道矣。

或曰圣王分九州，制五服，务盛内，不求外。汉之蛮夷，通市货买，好辞为诈，多求使者护送，以事绝远。故孟坚谓盛德在我，无取于彼也。今南洋诸舶，抵我边境，什百为群，连樯相接，器则火炮蛮刀，人则趫捷狙犷。设有伏莽，坐见披猖，汉之已事，可得拟乎。应之曰，此未足以为虞也，军旅之事，必权衡于主客，洲岛之

俗，惟利益于贸迁，凡夷之必我资者二，而我之不夷患者二。番人性耆乳酪，胶结肠腹，惟大黄茶叶荡涤称神，一不得食，立致困病，异时恰克图口，不与俄罗斯通市，西洋各国市大黄于粤，每国限以五百斤，防其漏入俄罗斯也。比开关如故，红毛花旗诸酋合辞吁请，毋限定数，是知疵疠之祲，非药罔济，旗枪之用，在彼同需。今茶斤出口，岁计四五十万，频年交易，定有积存，然茶之为物，霉变易生，三岁以后，不可复食。如闻英夷夸诈，谓有三十年之蓄，此其欺罔，不辩自明，设有禁断，惊扰内作，其必我资者一也。番人近利尚功，以海商为世业，沿海埠头，竞思垄断，转相贩鬻，算及毫厘，其有别部杂港，思商中国，率为遮阂，用擅专利。又叩关之舶，珍货山积，来自本国，例讥重税，国主藉有税入，用供饷俸。住澳门者为大班，总其贸易，厚资本者为船主，统曰公司。他伙长水梢附货载舱，无不希收馀羨，用裨生计，举国上下，皆以中华为利藪，其必我资者二也。英夷窟宅，渺隔重洋，惟澳门租住，是其顿宿之所，澳夷虽甚贫薄，未易全以贿通，其米利坚佛兰西诸国夙与仇雠，不能统一，如有跳梁，使相攻击，以夷伐夷，正可抚为我用，故佛郎机之寇新会，卒以成禽〈（明嘉靖中）〉。和兰番之寓台湾，终归败遁，老巢既远，持久为难，其不夷患者一也。民非水火，莫能生活，番舶之来，商梢百数，近时洋米，载自吕宋，转饷无乏诚难与争，然万山以外，飓风堪虞，一入万山，粮道立断，加海水味淡秋冬变咸〈（潭洲迤北之洋，春夏清甘可饮，盖北江之所从入也，秋冬水涸海气上浮矣）〉。夷来下碇，每在秋冬，涓涓之滴，不堪入口，是故守炮台之险，绝奸民接济之路，断校椅之泉，截大屿龙穴之汲，以守岸为上计，不交锋于大洋，我逸彼劳，彼客我主，其不夷患者二也。去彼二患，守我二资，交易坦途，番客大至，航三万里之海，但有牵来，讥四十柁之征。都无检阅，兹非桷藩之善政。钦贤之遗规与且尤有说焉，凡夷之狡焉生心者，皆汉奸之导诱也。而汉奸之敢于煽惑者，皆执事之侵渔也。往夷货之来，有税有钞，有进口出口之规，有分头匹头之算，箱包漆木动辄规例之收，呢羽锤表咸入彤廷之贡，此取之在上者也。商保之船，必资规费，货销之数，按抽行用。黄埔一进，伯而丁胥之事例已多，省澳一往来而牌照之取求又伙，吏役之生活，仰给惟于舶来，蔬米之日需，翔贵由于买办，此取之在下者也。取得其道，则官吏乐输，而荒服有出涂之愿，取失其道，则商胡敛怨，而奸豪售贪狡之谋。何者，商行资用，类皆取自夷中，一苛于商，即商因而厚敛，一敛于夷，即夷从而伎求。厚敛者以官为市，而商或润其馀，伎求者引商为援，而夷斯逞其忿。始则规制弁髦，侈然而违犯，继则语言慢易，哢然而上侵。小则炮械森陈，阳为防护将牢之说，大则兵船飘忽，阴怀恫疑虚喝之谋。欲惩奸而畏首畏尾，欲大创而筹饷筹兵。盖贪纵侵凌于无事之日，不得不弥缝姑息于有急之秋也。苏轼谓絜廉哲人之细事，而古今边患，常生于贪。守边得廉吏则夷夏乂安，谅哉言乎！

市舶之通，人多同异。自英吉利横海上，骄嫚日闻，于是有为封关罢市之议者。应之曰，市舶者，岛夷向化之诚，沿海居民之利也。得之所欲，则瀛渤晏安，失其所营，则奸豪反侧。善谋国者，但当自计利害，不足与论是非也。方嘉靖时，海寇大作，毒东南者十馀年，其始因倭舶至闽浙互市，诸大姓及商贾多负其直，倭粮匱为

盗，诸大姓胁将吏捕逐之，兵且出又泄师期，令去约他日至偿其直。他日至负如初，倭大怨恨，而内地奸民复煽为乱，遂焚掠州县。巡抚朱纨至，首严通番禁，犯者置重典，又愤闽浙势家多庇贼，上疏言过激，中朝士大夫与为难，争掣其肘，劾纨至死。中外莫敢言海禁事，于是徐海汪直内讧，而倭乱成矣。乡使互市之倭，不亏其直，洋来之舶，不禁其通，则徐海汪直，公然贸易之商，日本佛郎机长此朝宗之集也。挟倭之贼以胁官，即挟官之兵以胁倭，诤张为幻，负直不偿，金鼓一振，毒逋四海，当时商贾酿祸，万死莫辞，而市舶既革，利权在下，港外交通，走险不择。朱纨通番之禁，殆亦因噎而废食者哉。郑晓称倭祸起于市舶，礼部遂请罢市舶，而不知所当罢者，市舶太监，非市舶也。可谓深切著明矣。今粤海通市，百有馀年，假令奏罢，停其来舶，洋行货直，类多賒贷，一时殷商垫给，既所不甘，疲商责偿，于何取办，势必远夷怨咨，要遮不去。而买办引水，渔船快蟹之徒，沙文马占〈（沙文者雇于夷马占通夷语者也）〉，通事洋货铺之属，惧于失业，潜为教诱，椎髻之俗，好乱由于性生。飞鸢之音集林忘其怀化，未形隐患，可胜言耶。且防边之策尤贵招徕，《汉书》谓匈奴贪，尚关市嗜汉财物，汉亦通关市不绝以中之，故知抚绥遐服。非财赂无以款通，怀畏远人，必负贩乃能要结也。夫中行说卫律之谋主，是汉患之内生也。卖马邑交易之无功，由衅端之自启也。如彼英夷不同冒顿，自为海贾，何暇远图，但使关市持平，夷商亲附，脱有奸猾，隐为诈虞，屏之远方，肆诸朝市，百蛮慑伏，岂敢动哉。然而体顺夷情，主平市价，必有以大服其心，乃使其无所借口。必先外藩无轻节府之意，而后款塞谨功令之遵。其要在于行禁肃清纲，首难以贿进而无取乎闭关封港，俾番商裹足而望洋也。《后汉书张奂传》迁安定属国都尉，羌性贪而贵吏清，前有八都尉，率好货财，为所患苦，及奂正身洁己，威化大行。班超谓任尚曰：蛮夷难养易败，宜荡佚简易，宽小过总大纲而已。夫小过之纠，不肯为其简易，财货之好，乃甘为其患苦，抑何方寸，岑楼不揣本而齐末之甚乎？君子是以知君卿之导利，推本信诚卢奂之清白，用怀远俗也。

鸦片烟，一名阿片，一名阿夫容，出英吉利属国。种红莺粟花，叶如靛青，子如茄，每根仅结子二三颗，熟时，夜以刀划皮分许，膏液流出，晨收而浸于水，俄顷出之，贮诸器，取叶暴干为末，杂揉其中，视叶末多少，以定成色。叶末半则得膏半，然后捏为团叶裹之〈（见《海录》）〉，有公斑，有白皮，有红皮。公斑为上，白皮次之，红皮最下。前代无此物，明时始入中国。龚云林《医鉴》，用阿片泥和糯米为丸，治百病，名一粒金丹。李时珍《本草纲目》云俗人房中术用之。雍正中，年希尧刊《集验良方》，鸦片屡见，初不言其吸食也。镶竹为管，或磁或银，挑烟于盒，如粒如丸，就灯而吸，倚枕侧眠。盖自乾隆末年始，嘉庆初食者渐多，特奉明禁，至今日而家喻户晓，俗不可挽。凡食烟之人，燃灯在榻，必两两对卧，左右移易，邂逅论心，用除嫌恨，名曰开灯。日久中病，应时而食，名曰烟引。引至而不得食，则四肢颓然，涕泗交下，刻不能支，吸烟数口，精神顿回，名曰过引引。深者日须三四钱，引少者以数分计。盛年柔脆，先零何早，筋力乍衰，髓竭乃槁，此食烟之状也。烟土之入，始在澳门，继归黄埔。今上初元，森严设禁，乃移泊于新安属之零丁洋，其地水路四通，凡福建天津江浙之泛外海者，皆必由焉。岛

民万馀家，皆蜑户渔艇，贩私为业。道光三四年，来趸船五六船，前总督阮元密奏请暂事羁縻，徐图禁绝。近则约十七八船，经岁逗遛，接递新烟洋船驶进鹿门，转入蛟门，以所载之土，运黄埔深井〈（地名）〉，有窟宅为奥援，有快蟹为护送，分售于会城之窑口。其送烟匪艇〈（一名扒龙）〉数十健儿，摇桨如飞，列炮械而行，比年澳门之押冬夷，往来省城，自觅各船交易。窑口之利又分而天津闽浙船，大率在省议价，到趸交土。他大吏之贡船差船，私携过岭者，岁又不知几许，此贩烟之众也。鸦片烟惟公班行于粤，各省类白皮，每白土一包，合三斤，直洋银二十一二圆。去窑口之沾润，规费之花销，番夷约得银十三四圆。贱时亦每包十三四圆，番夷约得银八九圆。每岁以一百万包计，番夷实得银千三百万圆不等。自馀价银尚七八百万四五百万圆。大抵水师有费，巡船有费，关役有费，营汛有费，差保有费，以窑口为授受，以烟价为取偿，世尽奇货之居，人竞染指之望，此售烟之利也。其害深，其习锢，其来远，其利溥，其人伙，其势横，法令之设，祇同于具文，根底之深，遂蟠于天下。说者谓番舶来货，亦贮趸船，异时禁之，税额将虞短绌，然关税之赢，百数十万，鸦片之耗千万有馀。岂贪其至轻，而忘其至重耶。夫赍财销竭，逾其人心，风俗之闲，鸩毒晏安，惰我坚甲利兵之气，职谋国是，不得不挽救力操也。然而有所操即有所遗，操其末者遗其本，操其伪者遗其诚，惟末是趋，而以伪相市，更反十年，而其效可睹矣。

粤东滨海之区，耕三渔七，幅员辽阔，民食不敷，岁仰广西桂柳梧浔诸府之接济，设遇粤西年荒，诸府闲余，则粤东米价翔贵，小民粒食维艰，惟洋米产小吕宋国，地在闽粤之南，土沃水膏，不耕而获。稻米一石，值银数钱。由海道来广，不过六七口。粤关市舶，每载八口。乾隆八年，钦奉谕旨，凡遇外洋货物来闽粤等省贸易，带米一万石以上者，免其船货税银十分之五，带米五千石以上者，免其船货十分之三。其米听照市价公平发粜，仰见圣谟广远轸切民依灼知，开禁南洋，为控制外番起见。国家富有四海，并非需此税银，与其以茶叶大黄易呢羽锤表无用之物，不如助筹足食利赖闾阎。训典煌煌胜算操而垂裕远也。自司榷者专利自封，多不以此为便，奉行日久，旧制渐湮。嘉庆十一年以后，续来米舶，粤关止予免钞，飭令空船出口。由是夷商无利，来米顿稀。道光四年，总督阮公，奏请各国夷船专运洋米来粤，免其丈输船钞，所运米谷，起贮洋行棗卖，原船载货出口，一体征收税课。得旨允行，一时黄埔澳门，岁增米十馀万石。然各国来粤米船，均系零星小贩，并非资本充裕之夷，每船载米三四千石及一二千石不等。虽有出口货物，其数不甚相悬，洋米之获利既微，出口之税银仍纳，所免进口钞规，始犹抵敷关费，渐且不足取偿。缘阮公入告之时，仅据县禀议行。其乾隆八年，宽免米船货税之恩旨，未经查明声叙，是以但能导夷船之岁至，而不能使洋米之积馀。可以收效于会城，而未得推行于全省。本年旱稻收获，仅及六成，秋冬亢旱，晚稻不足三成，来岁青黄不接之际，即查照乾隆嘉庆年间成案，飭商采买洋米回粤棗卖，将来平其市价，非不可转歉为丰，而暂时举行，究非永久之善策，似应奏援乾隆八年旧例。嗣后凡遇外洋夷船并无别货携带专运洋米来粤五千石以上者，免其出口货税十分之三，一万石以上者，免其出口货税十分之五，其载米不过五千石以上者，仍照道光四年成案，

止免进口钞规，不宽出口货税，以广皇仁而昭限制。如此则外洋米谷进口愈多，以关市之征资积贮之益。然而议者或曰天朝民食，岂藉外洋，榷货免征，且将亏税。夫茶马者，西北之利也，以内茶易番马，不得谓中国之战骑取给于夷也。通其地之有无，使所产不归红腐，收其土之蕃育，使所积皆我边储。神明之用，因应无方也。若粤关正额盈馀，岁需银九十万两，比年奏销，常溢收四五十万，其中进出货物，以英吉利公司夷船为大宗。英吉利风俗，向来精勤织作，所制呢羽洋布纱线等物，非中国无以流通，洋米产小吕宋等处，不过一隅之地，又距英吉利国都方万余里。使进口洋米，出口减税，止港脚花旗诸夷，闻风兴贩，亦无过十之五六。英吉利阖境民夷，必不容废其织作，专以贩米牟利。是进口之呢羽如常，即出口之货税无减，粤关正馀之数，岁终岂虑悬绝耶。且即关税稍绌，而藏富于民，备户口之流亡，免司农之赈贷，以下益之有馀，补上损之不足，经国之远猷，绥边之至计。詎与天头会箕敛者，较短絜长耶。或者又谓米非洋产，买自边郡，船若畅来，尽携鸦片。此皆参随巡拦之属，造为飞言，阻挠善政，以自殖其私不知内米洋米味各不同，市价番价岂甘折阅，况零丁趸船自贩烟土，即洋米不通而货船独不赍夹耶夫。洪范八政一食二货，因货通而食足，交易而退，各得其所，裁成辅相之方，莫善于是，是在当路君子之勤求民隐而已。谨议。

源案：此议洋米，但知小吕宋而不知暹罗，及新嘉坡、葛留巴、港脚诸地，皆岁岁运米入口，又不知运米一二千石者，亦准免税十之一，且有赏给米商顶戴。自康熙至乾隆叠次恩旨，具载《皇清通考》。四裔门别详东南洋吕宋、暹罗二国志内。

○粤东章奏一〈（两广总督林则徐）〉

窃臣等承准军机大臣字寄，道光十九年十二月十一日，奉上谕，本日据曾望颜奏夷情反复，请封关禁海，设法剿办，以清弊源一折，又另片奏澳夷互市货物，亦请定以限制等语，著臣等悉心妥议具奏。谨将察看筹议情形敬陈之。

查原奏以制夷要策，首在封关。无论何国夷船，概不准其互市，而禁绝茶叶大黄有以制伏其命。封关之后，海禁宜严，应饬舟师，将海盗剿捕尽绝。又禁大小民船，概不准其出海，复募善泅之人，使驾火船乘风纵放，而以舟师继之，能擒夷船即将货物全数给赏。该夷未有不畏惧求我者。察其果能诚心悔罪，再行奏恳，准其互市，仍将大黄茶叶毋许逾额多运，以为钳制之法等语。臣等查粤东二百年来，准令诸夷互市，原系推恩外服，普示怀柔，并非内地赖其食用之资，更非关榷利其抽分之税。况自上冬断绝英夷贸易以来，叠奉谕旨，区区税银，何足计论。大哉谟训，中外同钦，臣等有所秉承，无所用其瞻顾，惟将各外国在粤贸易，一律停止，则有尚颂从长计议者。窃以封关禁海之策，一以绝诸夷之生计，一以杜鸦片之来源。虽若确有把握，然专断一国贸易，与概断各国贸易，揆理度势，迥不相同。

盖鸦片出产之地，皆在英吉利国所辖地方，从前例禁宽时，原不止英夷贩烟来粤，

即别国夷船亦多以此为利。而自上年缴清趸船烟土以后，业经奏奉恩旨，概免治罪，即未便追究前非。此后别国货船，莫不遵具切结，层层查验，并无夹带鸦片乃准进口开舱。惟英吉利货船，聚泊尖沙嘴，不遵法度，是以将其驱逐，不准通商。今若忽立新章，将现未犯法之各国夷船，与英吉利一同拒绝，是抗违者摈之，恭顺者亦摈之，未免不分良莠，事出无名，设诸夷稟问何辜臣等即碍难批示。且查英吉利在外国，最称强悍，诸夷中惟米利坚及佛兰西，尚足与之抗衡，然亦忌且惮之。其他若荷兰，大小吕宋连国瑞国单鹰双鹰等国，到粤贸易者，多仰英夷鼻息。自英夷贸易断后，他国颇皆欣欣向荣，盖逐利者喜彼绌而此赢，怀忿者谓此荣而彼辱，此中控驭之法，似可以夷治夷，使其相间相睽，以彼此之离心各输忱而内向。若概与之绝，则觖望之后，转易联成一气，勾结图私。《左传》有云，彼则惧而协以谋我，故难间也。我朝之驭诸夷，固非其比，要亦罚不及众，仍宜示以大公，且封关云者，为断鸦片也。若鸦片果因封关而断，亦何惮而不为。惟是大海茫茫，四通八达，鸦片断与不断，转不在乎关之封与不封。即如上冬以来，已不准英夷贸易，而臣等今春查访外洋信息，知其将货物载回夷埠，转将烟土换至粤洋。并闻奸夷口出狂言，谓关以内法度虽严，关以外汪洋无际，通商则受管束而不能违禁，不通商则不受管束而正好卖烟。此种贪狡之心，实堪令人发指。是以臣等近日不得不于各海口倍加严拿，有一日而船烟并获数起者。可见英夷货去烟来之言，转非虚捏不然，以外洋风浪之恶，而英船仍不肯尽行开去，果何所图。

若如原奏所云，大小民船概不准其出海，则广东民人以海面为生者，尤倍于陆地，故有渔七耕三之说，又有三山六海之谣。若一概不准出洋，其势即不可以终日，至谓捕鱼者止许在附近海内，此说虽亦近情，然既许出洋，则风信靡常，远近难定，又孰能于洋面而阻之。即使责令水师查禁，而昼伏则夜动，东拿则西逃，亦莫可如何之事。臣林则徐上年刊立章程，责令口岸澳甲，编列船号，责以五船互保，又令于风帆两面及船身两旁，悉用大字书写姓名，以及里居牌保，惟船数至于无算，至今尚未编完。继又通行沿海县营，如有夷船窜至，该辖无论内洋外洋，均将附近各船暂禁出口，必俟夷船远遁，始许口内开船，其平时出入渔船，逐一验查，只许带一日之粮，不得多携食物，若银两洋钱，尤不可许随带出口，庶少接济购买之弊。至大黄茶叶二物，固属外夷要需，惟臣等历查向来大黄出口，多者不过一千担。缘每人所用无几，随身皆可收藏，且尚非必不可无之物，不值为之厉禁。

惟茶叶历年所销，自三十余万担至五十余万担不等，现在议立公所，酌中定制，不许各夷逾额多运，即为钳制之方。然第一要义，尤在沿海各口，查拿偷贩出洋，否则正税徒亏，而漏卮依然莫塞，是以制驭之道，惟贵平允不偏，始不至转生他弊。若谓他国买回之后，难保不转卖英夷，此即内地行铺互售，尚难家至日见，而况其在域外乎。要知英夷平日广收厚积，本有长袖善舞之名，其分卖他夷，独牟余利，乃该夷之惯技。今断绝贸易之后，即使从他夷转售一二，亦已忍垢蒙耻，多吃暗亏。譬如大贾殷商，一旦仅开子店，寄人篱下，已觉难堪，惟操纵有方，备防无懈，则原奏所谓该夷当畏惧而求我者，将于是乎在矣。至于备火船，练乡勇，募善泅之

人，则臣等自上年至今，皆经筹商办理，惟待相机而动。即各山淡水，上年本已派弁守之，始则夷船以布帆兜接雨水，几于不能救渴，继而觅诸山麓，随处汲取不穷，则已守不胜守，似毋庸议。总之驭夷宜刚柔互用，不必视之太重，亦未便视之太轻，与其泾渭不分，转致无所忌憚，曷若薰莸有别，俾皆就我范围。而且用诸国则不啻驱鱼，此际机宜，不敢不慎，况所杜绝者，惟在鸦片，即原奏亦云凡有夹带鸦片夷船，无论何国不准通商，则不带鸦片者，仍皆准予通商亦已明甚。彼各国夷人，原难保其始终不带，若果查出夹带，应即治以新例，不但绝其经商，如其无之，自不在峻拒之列也。又另片请将澳门西洋贸易定以限制，查上年臣林则徐先已会同前督臣邓廷桢，节次议及，嗣经核定章程，谕令澳门同知，转飭西洋夷目遵照。即如茶叶一项，每岁连箱准给五十万斤，仍以三年通融并计，以示酌中之道，其他分条列款，该夷均已遵行，至所请责令澳夷代英夷保结一节，现既不准英夷贸易，自可毋庸置议。

○奏弥利坚代英夷请款疏〈（参赞大臣杨芳等）〉

窃照英吉利逆夷，于二月二十四日，乘驾兵船，及火轮三板等船，欲进省河，经凤凰冈官兵，奋力击退，即于二十五日缮折由六百里驰奏在案。

是日米利坚国领事多利那，因该国货船，并不在禁止通商之列，先经琦善批准，带进黄埔贸易，适值英夷攻打虎门，被阻不得入口，闻凤凰冈官兵击退逆船，来向营盘稟诉。据总兵长春报知前来，当飭署广州府知府徐保纯带同通事译讯，据多利那称英夷既被击退，自不敢再有他求，惟念称兵犯顺，系英国兵头所作之孽，其带货商船，并未敢随同滋事，而因此阻滞年馀，不得贸易，在该商为其本国兵头所累，原不足惜。而我米利坚等国向来恭顺，不敢私卖禁物，蒙天朝恩准照常贸易，极为感激。乃到粤经年，被英国牵累，不能进埔开舱，以致货物霉烂，资本亏耗，现查英国夷商，情亦急迫，可否于此次击退兵船之后，姑准其商船一体贸易，庶各国不被英国妒恨，免致阻梗牵留。而英国货船在埔，其兵船即有顾忌而不敢滋事，似亦制服之一法等语。臣谕以该夷所言，虽亦近理，殊不知英夷肆逆逞凶，罪恶重大，实自绝于天朝，今蒙命将出师，特申天讨。即谓夷商并无助逆，究系英国之人，又安敢以通商为请。正词回复去后，是日逆船虽无动静，而探知退泊未远，臣料其早晚又必来扰，戒备益严，惟省城所存炮位，不如虎门之大，虎门炮台既失，炮亦随之，且外海师船，在虎门者，均被逆夷烧毁，别营舟师，刻难调集。虽有内河巡船，及招募水勇快艇，只能防而不能攻。臣与兼署督臣怡良等正极焦切，适于二十六日巳刻长潮之际，南风大起，该逆大小兵船添至七只，火轮船三只，三板船二十馀只，果皆乘风拥至，其时凤凰冈等处营盘，各放枪炮，击毙夷兵不少，而逆船恃其坚厚，且行且拒，冒死闯入省河，飞炮火箭，施放无数。幸各城上下内外，已将官兵壮勇，排列如山，不令少有空隙，且臣等先经示谕军民，以防御英逆与他寇不同，其炮弹能于远处裂开以烧房屋，而火箭又著物即燃，此时保卫城垣，首须扑熄火患，是以于列队兵勇之外，复逐段多添扑火兵丁，使房屋不烧，人心即定。虽是日

逆船炮箭施放不绝，而省城内外，周密巡防，并无一处失火，该逆见守城如此严紧，立即移窜空旷之白鹤滩中心，暂行下碇不敢逼近城垣，亦不敢复放炮箭，第仍虑其堵截上下游各船，则省中一切日用以及军火所需，皆无不棘手。正在分筹剿逐间，复据洋商伍怡和等，以各国领事夷商，于英逆带兵之人，无不交口斥骂，该兵船因见城上岸上，均各森严，亦即畏惧而退。

二十七八九等日，兵船及火轮船三板船，均陆续开离省河，惟各国夷人在粤，均望承平。谓英夷既经缴还定海，不敢更有他求，惟贸易一事系天朝二百年来，稠叠恩施，不得不代恳法外施仁，仍循旧制。呈出义律等所立笔据，有不讨别情，惟求即准照常贸易。如带违禁之货，即将船货入官字样，是其前此要求奸计，此时无可复施。惟臣等奉命督兵，祇知军务为亟，断不因各国连番环请，稍任懈我军心，即其笔据之言，虽曾寓目，仍如无睹，第既有此情形，理应据实入告，固不敢冒昧陈乞，亦不敢壅于上闻。至其所云贸易夷人，并未随同滋事，货船入口正可制服夷兵等语。臣暗访明查，尚非诞妄，而就兵机而论，亦有时以纵为擒，与其峻拒群夷，恐致一同觖望，或先从权制驭，借以密运深谋，伏候圣主指示机宜，不胜凛感悚惶之至。〈（案：所云不讨别情只求照例通商，是烟价香港皆不敢索，又许退出虎门也。非弥利坚夷目从中讲款不能有此机会）〉。

卷八十一

○《澳门月报》〈（论中国道光十九年及二十年新闻纸，两广总督林则徐译出中有四条，曾附奏进呈）〉

中国人民，居天下三分之一。地广产丰，皆土著。少习驾舟之事，才艺工作甚多。我皆不奇，所最奇者，惟中国之法度，自数千年来皆遵行之，在天下诸国中或大或小，无有一国能有如此长久之法度也。额力西国之梳伦，与孔夫子同时，各立法度。然额力西国已经数易其主，法度亦多更变。罗问国亦在孔子之时，当日强盛，平服天下一半地方，然今所剩之地甚微少。阿细亚西边诸国，前曾强盛过，迄今衰败，变为旷野。而今中国仍遵行其法度。现今西方诸国皆立国不久，只欲以兵戈相胜，一国欺夺一国。皆因其法度规矩不定，不遵约束也。中国非无变乱，不过暂时受害。乃有一主，即复统一如前。即平服中国之金朝元朝，必用中国之风俗律例。此可谓胜中国以力，而中国反胜之以文也。中国法律与由斯教之法律相同，中国人与外国隔别，又不习以兵火剿灭邻国，以为自己系上等之人，由斯教亦自负上等人，而遵守摩西士之法律，严拒外国人，正与中国同，皆是保守自己免杂风俗。正似罗问国加特力内之教，师终身不娶，不作差事，努力扶持教法，至耶稣一千年时，遂令通欧罗巴俱行遵敬此教。罗问教内之规矩，亦极严肃，其治罪之律例，正与中国律例相等，故中国惟自谓王化之国，而视外国皆同赤身蛮夷。

若论人民之多，即无一国可与中国比较。即如俄罗斯有一百四十一万四千四百四十六方里，城池亦宽大，人烟亦稠密，然户口不过一百九十二万五千名。而中国只湖广地方，宽不过十四万四千七百七十七方里，即已有户口四千五百零二万名。佛兰西地方，宽有二十一万三千八百三十八方里，户口三千二百零五万二千四百六十五名。而江南地方宽九万二千九百六十一方里，户口即有七千二百万名。欧色特厘国，宽二十五万八千六百零三方里，户口三千二百一十名。中国河南山西两省宽十二万方里，户口即三千七百零六万名。英吉利国宽十二万七千七百八十八方里，户口一千二百二十九万七千六百名。广东一省宽不过七万六千四百五十五方里，户口即有一千九百十四万七千名。是中国一省即可抵西洋三大国之人民。俄罗斯设立陆路兵丁六十万名，佛兰西陆路兵丁二十八万一千名，欧色特厘陆路兵丁二十七万一千名，英吉利国陆路兵丁九万名，在中国设立陆路兵丁七十六万四千名，在数国之中为最多。惟论及中国海上水师之船，较之西洋各国之兵船，则不但不能比较，乃令人一见，即起增恨之心。

中国不肯与外国人在海面打仗，惟有关闭自己兵丁在炮台内，又断绝敌人之火食，此或者是最好之法，亦系将来必行之法。然此法实难行，盖因各处人烟布满，居民只欲卖火食，所以在尖沙嘴铜鼓洋各处，火食亦甚易得。但要好待土地人方好，或者中国必用旧时待郑成功法子，将其沿海各岸人民，驱入三十里内地，不遵命者杀

。我思此法今亦难行，因遍处海岸皆系富厚城池。当日所以能行者以开国得胜之兵威也。

中国之火枪，系铸成之枪管，常有炸裂之虞。是以兵丁多畏施放，中国又铸有大炮，每一门可抵我等大炮四十八门。尚有许多大小不等炮火，惟中国只知铸成炮身，不知作炮镗，且炮身又多蜂眼，所以时常炸裂。又引门宽大，全无算学分寸，施放那能有准。又用石头铁片各物为炮弹，并用群子封门，子皆粗笨无力。兵丁或以五人十人为一排，百人为一队，不同我国分派之法。又中国兵丁行路，亦不同我等队伍密密而行，皆任意行走，遇紧急时，谁人向前，趋走极快者，即是极勇之人。中国兵丁，多用兵丁之子充之，以当兵为污辱。凡体面人不肯当兵，其钱粮甚少。遇征调便乘机勒索虏掠，居民见兵过，无不惊惧。由行伍升至武官，只要善跳善射，并无学问。尤要有银钱，就可买差使买缺推升，各省皆然。现在中国人买甘米力治船，又要扣留黄旗两船入官，此事不久，可见一番新世界。今暹罗安南，亦学别国制造兵船，故中国亦用此法。然有两种阻碍，一系中国水手愚蠢，难得明白精熟之人，必寻别国之人方会驾驶。一系工价太贱，若雇外国人不敷养赡，不肯为中国用。安南国船亦仍照旧制，只比中国师船稍好看，然亦不甚利便。暹罗国尚有西洋式样船数只，不过用以贸易，况其船舱制造不好。现在都鲁机人曾有西洋人指点装造好船样，然总不及欧罗巴。若中国人欲学外国之式制造师船，必寻外国人指点如何驾驶。凡有外国人肯为中国人所用者，初时必定应许多少工价，各样恩典，迨后定必被骄傲官府，骗其工价，并且凌辱。如荷兰人在日本国，务与西洋人相反，事事遵从日本法律，并助日本国捕陷西洋之人，毕竟得何好处。现在荷兰在日本之贸易，已减至两只船而已。

西洋人留心中国文字者英吉利而外，耶马尼国为最，普鲁社次之。顺治十七年，则有普鲁社之麻领部一士人，著书谈中国，现贮在国库内。又有普鲁社之摩希弥阿部落教师，亦曾译出中国四书一部。又有普鲁社之般果罗尼部落一名士曰阿旦士渣，著书论中国风土人情，但用其本国文字。嘉庆五年间，有人曰格那孛罗，熟谙中国文字，但恃才傲物。又有耶马尼国之纽曼，曾到广东回国，著一书论佛教，一书论中国风土，将带回许多书籍，与耶马尼诸国人考究，又翻出《诗经》一部。又有力达者，著《中国地理志》一本，说中国如极乐之国，令耶马尼人人惊异。又有耶马尼之包底阿，现在佛兰西国雕中国活字板，普鲁社人亦出财助成其事。又有欧色特厘阿一人曰庵里查，亦著一书论中国钱粮。

又曰：中国官府，全不知外国之政事，又不询问考求，故至今中国仍不知西洋。犹如我等至今未知利未亚洲内地之事。东方各国，如日本安南缅甸暹罗则不然。日本国每年有一抄报，考求天下各国诸事，皆甚留神。安南亦有记载，凡海上游过之峡路皆载之。暹罗国中亦有人奋力讲求，由何路可到天下各处地方，于政事大得利益。缅甸有头目曰弥加那者，造天地球、地里图，遇外国人，即加询访，故今缅甸国王亦甚知外国情事。中国人果要求切实见闻，亦甚易，凡老洋商之历练者，及通事

引水人皆可探问。无如骄傲自足，轻慢各种蛮夷，不加考究。惟林总督行事全与相反，署中养有善译之人，又指点洋商通事引水二三十位官府，四处探听，按日呈递，亦有他国夷人，甘心讨好，将英吉利书籍卖与中国。林系聪明好人，不辞辛苦，观其知会英吉利国王第二封信，即其学识长进之效验。

道光十七、八年，澳门有依湿杂说，乃西洋人士罗所印。由英吉利字译出中国字，以中国木板会合英吉利活字板，同印在一篇。序云数百年前，英吉利有一掌教僧，将本国言语，同纳体那言语同印，今仿其法。所言皆用中国人之文字，此书初出时，中国人争购之，因其中多有讥刺官府之陋规，遂为官府禁止。中国居天下人中三分之一，其国又居阿细洲地方之半，周围东方各国，皆用其文字。其古时法律经典，皆可长久，其勇敢亦可与高加萨人相等。性情和顺灵巧，孝亲敬老，皆与欧罗巴有王化国分相等。惟与我等隔一深渊，即是语言文字不通。马礼逊自言只略识中国之字，若深识其文学，即为甚远。在天下万国中，惟英吉利留心中国史记言语，然通国亦不满十二人。而此等人在礼拜庙中，尚无坐位，故凡撰字典撰杂说之人，无益名利，只可开文学之路，除两地之坑堑而已。

○《澳门月报》二〈论茶叶〉

贸易中货物之利于人，并利于税饷，舍茶叶外断无胜于此者。中国每石茶叶收税饷二两五钱，又洋行会馆各费，每石抽银六员至九员不等。先日公司与洋商交易时，每石茶叶纳饷并费皆系六两七钱，比今减少。除中国省城税饷外，海中沿途尚有关口七八处，亦须俱纳税饷，俟到英吉利国，每棒税饷又纳银三钱七分五厘，统计茶叶税饷较之原值已加一倍。再加水脚各费，运至英国卖价，与武夷山买价，岂止加数倍耶。惟米利坚国税饷减少，故各埠茶价较贱。

茶叶销用极广，故我等于各地尽心栽种，欲敌中国独行之买卖，印度之阿山地方出茶，仅敷本地用度。后人于阿山上寻出地方栽种茶树，近已装茶出口。道光十九年兰顿已有阿山茶叶，均以为奇。其茶小种有三种，白毫有五种，后经茶师考察，此茶有伤原性，致有烟气苦味，皆由工人制造不善，须得尽用中国工人栽种，即与武夷无异。近年荷兰亦于所属葛留巴用力栽种，道光十八年已有两种茶叶。因此岛福建人居半，故所种茶树茂美。此外如新埠等岛，及西洋之没拉济尔亦用心栽种，徒费工钱而地土不宜，今皆废弃。

英吉利之外，米利坚人销用绿茶最多。一千八百三十三、四两年〈（道光十三年）〉，米利坚船由中国装出茶叶不下一千八百六十八万八千五百三十三棒，从前并无此数也。欧罗巴内地销用茶叶以荷兰俄罗斯两国为最，荷兰每年要销二百八十万棒，耶麻尼每年销用一百八十万棒或二百万棒，佛兰西在广东出口时茶叶虽多，然沿途分售，及到本国进口时数已减少，只销二十五万棒。然只用之以作医胆经之药材。因佛兰西酒多便宜，故不甚销中国之茶也。俄罗斯茶在北边蒙古地方买去。在

一千八百三十年〈（道光十年）〉，买去五十六万三千四百四十棒，在一千八百三十二年〈（道光十二年）〉，买去六百四十六万一千棒，皆系黑茶。由喀克图旱路运至担色，再由水旱二路分运娜阿额罗，其黄旗船绥领船普鲁社船所运茶叶皆不甚多。其印度各埠销用之茶，每年有英国六七船前去售卖，其阿支比拉俄各岛中茶叶系中国福建商人装出贩卖。中国人海船放到苏禄、文莱、路哥尼阿、新奇坡附近各处，系顺西北风驶去。英吉利人亦有在新奇坡买中国茶回国者，其茶均是上等。现在各岛每年销茶之数，年增一年，总而计之中国每年出口之茶叶有七千馀万棒，与鸦片贸易可以抵对。

现在中国人阻止贸易，致我国人皆尽心在东印度之阿山地方栽种茶叶，前此虽亦知其地宜茶，尚未甚尽心，今已奏闻兰顿本国，请免赋税，奉到示谕，设法鼓励。今已做出茶叶百九十箱，若更加多本钱，可以多种百倍也。近日英吉利攻服模定地方，其土亦宜茶，再请中国工人制造，即可得利。闻阿山茶树第一年每株可值先士六七十个，自此递年加增，及至六年后，即递年减少，约计五万二千六百忽，地方每年产茶可值劳碑银二百二十个。

我国王以小吕宋耕种不甚起色，下令凡有农器进口免税。凡有人肯栽洋靛等贵物，议公项如何奖赏，又肯垦荒栽种各物之人，如何赏给，令各官商议定夺。若有两家合栽架非树数至六万株者，给头等赏银八千员。四万五千株者，给次等赏银六千员。三万株者，给三等赏银四千员。并于架非出口时免税。凡栽种桂皮茶叶桑树者同之。凡栽种椰子树者，较架非树三等，每等加赏二千员，其栽玉桂丁香者，赏格较架非树加倍。凡栽种洋靛及糖蔗，及以上各树之人，准其自开斗鸡场，永不纳税。现在中国人，及印度人，本地人会合不过二十家。其耕种产业，上好糖不过二万棒，或产洋靛不过一万棒者，方其栽种时即不收地税，若有人代官府尽心耕种各树，五年之后，不但免其地税，并将五年内所纳税饷，加三倍给回。

○《澳门月报》三〈（论禁烟）〉

鸦片制造，一在八达拿，一在默拿〈（皆孟阿拉地方）〉。而孟阿拉各官设法加工，总要引中国人嗜好此物。在加尔吉达〈（孟阿拉首部落）〉税簿上，即可查出。每年鸦片到中国多少，到别处多少，无不列明。近来六年间，孟阿拉出产七万九千四百四十六箱，内有六万七千零三十三箱到中国，故鸦片乃是中国最销流之物。今将其数目开列于下。一千八百三十三年〈（道光十三年）〉，中国七千五百九十八箱，各处一千八百一十箱。三十四年〈（道光十四年）〉，中国一万二百零六箱，各处一千七百九十箱。三十五年〈（道光十五年）〉，中国九千四百八十五箱，各处一千五百一十箱。三十六年〈（道光十六年）〉，中国一万三千零九十四箱，各处一千七百五十七箱。三十七年〈（道光十七年）〉，中国一万零三百九十三箱，各处二千二百十三箱。三十八年〈（道光十八年）〉，中国一万六千二百九十七箱，各处三千三百零三箱。此但系孟阿腊一处鸦片数目。除孟迈等处所发卖在外，每

年印度所收鸦片税饷，自五百万至一千万员不等。故巴厘满遂以印度为属，国中之第一，以近来论之，鸦片运到中国者，从古以来实无多过于今日，总因孟阿腊官府贪心所致。故孟阿腊港口贸易，较之孟买尤大，计所纳税饷多于地租，每年解至英国之银，约六十三万九千棒〈（合三百一十五万员）〉。连存留在印度以及各官所用之银，大约有二百万棒〈（合一千万员）〉。故英国受鸦片之利益不少，亦以此招中国人之忌。

在印度鸦片之税，英国多年得孟阿拉地税银四百二十二万九千七百十二员，地税外又征收饷银，现在常例外，再加四款税饷。第一款种波毕之时，即须上税。第二款波毕成熟之时，以估价之多少上税。第三款于取波毕汁之时，亦须上税。第四款于出口之时，又要上税。合计收饷银连地税，共收银九百六十八万四千餘员。除公司贸易外，餘地皆禁止不准栽种，以免走私漏税之弊。但除英国所辖地方外，他国亦有出产鸦片者，如麻尔洼地方亦种，波毕且制作好，价值昂。先年麻尔洼鸦片有公司包揽时，三分中只有一分由孟迈出口，二分由布路亚国所辖之拿孟出口。及近二年去此包揽贸易之后，今却有十分之九由孟迈出口，只一分由拿孟出口。因此英国逐年得孟迈鸦片税饷银百万员，此法度之好无穷。故今鸦片之税饷，在英国实在难去。

一千八百年间，中国准鸦片进口，以药材上税，及后奉旨禁止，而广东官府仍准鸦片趸船长湾在黄埔，距省有十二里。至一千八百二十年，鸦片进口太多〈（道光二年）〉，故令趸船出口，不准湾舶黄埔。由是湾零丁洋及澳门急水门等处。又议定规银每箱若干，自总督衙门以及水路文武官员皆有之。惟关口所得最多，或在船上取，或在省城交收，皆逐月交清。亦有将鸦片准折，每次自一箱以至百五十箱为止，却无定数。此走私之光景，着实可痛。正犹西洋人好饮辣酒，都鲁机及印度无来由人好食生鸦片，皆害人性命之物，而争食不已，以致印度及麻尔洼〈（亦印度自主之国未属英吉利者）〉，各相争种。若想印度人不栽波毕，除非中国人不食鸦片。若想中国人不买鸦片，除非印度不栽波毕，二者皆所不能。

鸦片乃印度各官养成，后又得巴厘满甘文好司示谕允准。而印度之官利其税饷，于二十年间，每年有七百五十万员税饷。近来数年已至一千餘万。在英吉利属国中最为资财之藪。自广东公司散后，其公司之人，即作鸦片买卖，又将卖鸦片之银买茶叶回国。而英国之茶叶饷亦甚大，故国中所受鸦片利益不少。今义律缴销二万餘箱，如此英国岂不破费一千二百五十万员。此刻我等可为贩卖鸦片之人贺喜，缘鸦片买卖，原是一件就要崩倒极危险之事。久在其头上，西边之善人老实人，久已为之痛哭。兹竟如此平安收场，实意想不到，故我等为其喜不可言。

前在一千七百三十七年〈（乾隆三年戊午）〉，带来鸦片不过四千餘箱，前时鸦片准纳税进口。至一千七百九十六年，才禁止〈（嘉庆元年丙辰）〉。一千八百三十六年〈（道光十六年丙申）〉，又欲如前纳饷进口，奏而未允，其时已多至三万餘

箱。因恐外国以鸦片易换纹银，又必多开银矿，致竭中国之财源。中国乃天下生齿繁盛出产最丰之国，若以鸦片易纹银，犹如拔取其国中之精华。如中国之约纱，佛兰西之小带及烟叶皆英国所禁，又如英国之疋头，为陷麦所禁（陷麦乃耶马尼国部落）。中国禁鸦片，犹如佛兰西之波利稔王禁英人不准至本地贸易相同。虽是严禁，皆不能行。缘鸦片趸船泊在外洋，外国人未尝自带进口，系中国走私船执其所买之鸦片单，驶至趸船，凭单交土。而中国人带进内地者，用重银贿赂官府，求其佯为不知，所以有鸦片贸易罪过论。系地尔洼于一千八百三十九年（道光十九年）在兰顿所作，以为不独坏中国人之风俗，且使中国人猜忌英吉利人，令两国通商事情有碍，且有走私之恶名。

特尔达说零丁洋系中国荒地，并无兵房营泛保护，可以任外国人停泊。然忆在一千八百二十八年，挪威额达船上水手为人所杀，中国亦将凶手捉获施刑。又一千八百三十五年，英吉利多罗顿船被劫之事，亦系一件证见。是中国人在相近自己海岸上，施行其政治，以保护他国之旗号。故亦可在彼处地方行其所立之章程，不得谓在零丁洋面贩卖鸦片，系合法之事。只好说贩卖鸦片之船只，比中国水师船布置更好，格外坚固而已。

鸦片贸易，英国人带至中国，每年约有一千二百余万棒，银计六千余万员。鸦片系印度之波毕所作，即如我国比酒仁酒系薏仁所作。墨兰地酒系额立所作，皆恶酒也。有智之人，恐受其害，多不敢饮而饮葡萄酒白酒。然饮仁酒比酒之人，亦不能禁绝。如英国人要弥利坚人除去黑奴，及要俄罗斯人除去其耕田之奴仆，并要中国人除去妇人裹足之事，改换其法律，准人遵从各样教门。惩治溺死儿女，待外国人如本国人等事，中国其肯从之乎。又如英国禁止浓酒之事，其始斯葛兰爱伦兰墩销售浓酒，其酒税为国中税饷之最，其后因浓酒害人，加重其税饷，俾其昂价则穷人饮之者少，乃走私日多，饮者亦日多，徒漏税饷而无益于禁酒。当英吉利国王渣治第一管国时，定例每棒浓酒收税饷，时令两个半只准领牌零卖不准开设馆。又出赏格，凡有一小杯酒未纳足税罚银一百棒，给与报信之人。读此例者，皆满身汗流。凡有身家之人，皆知禁止。而浓酒贸易，遂落于下等不堪之人。此等人无产业可罚，放胆走私，且将报信之人满街驱逐。两年间积案万有二千人，每年国中销流浓酒，尚不下五千六百万棒。一千七百四十二年，始仍准人领牌开浓酒馆。减少税饷与中国禁鸦片事无异。

中国人若以鸦片贸易同英国讲论，英吉利国王定肯禁止。贩运鸦片到中国，即印度栽种波毕之事，亦定可停止。而栽种别物，国家之税饷，及众人之利益，仍可再得。况现在鸦片贸易不十分大行，以致各处贸易利息，亦皆减少。看此时势惟有等候中国之事情定夺而已。今将缴与中国及存下鸦片之数目，开列在下文。义律缴与中国鸦片共计二万零二百八十三箱，值鲁碑二千五百万个。麻尔洼存旧鸦片一万二千箱，值鲁碑七百二十万个。存新鸦片二万三千箱，值鲁碑一千一百五十万个。孟阿拉存旧鸦片八千箱，值鲁碑三百二十万个。孟阿拉新鸦片二万二千箱，值鲁碑八百

八十万个。总共值鲁碑五千五百七十万个，该五百五十万棒有奇。

方缴鸦片时，义律立意赔补之，给与各船收单，并问各人要在印度收回鸦片。抑或要会单在国库内收银，时鸦片客商，皆愿得会单回国收银。义律遂写会单十七张，寄与国中管库官支银，并付回国中文书，限十二个月，由本国库给还所缴鸦片之价。今年广东围公司馆勒缴鸦片之事，正如我英国监禁佛兰西使者在炮台上，因我等关口官府，闻佛兰西使者在近哆洼地方，携佛兰西小带上岸，故将佛兰西使者监禁，待他缴上违禁货物后，方才释放，与今广东事一样。

闻义律望国王之命四个月即可回来，必待接到回信，方准船只进黄埔。近日所到之依里沙土地挖船，系八月初二日〈（中国七月十三日）〉自兰顿开船，云广东缴烟之事，兰顿于七月十三日〈（中国六月二十日）〉即已知道。国中之人皆摇动。自律衙门及甘文好司之官府，俱各相问，尚未接到义律之信。盖义律之信，系交阿厘尔船带往兰顿，大约总要十月间〈（即中国九月）〉才能到。又有兰顿所接孟迈及中国商船家信，说及缴烟之事，英国各皆警动即买卖亦不甚好。银铺利钱长至六分，又向佛兰西银铺借银四百万棒，又向花旗银铺借银八十万棒，交与银店支发。真是从未闻过如此之紧。茶叶价长至加二分，而各庄茶叶尚不肯卖，所有东边货物逐一长价。

十二月到兰顿之茶七万包，当卖去五万八千包，存下一万二千包未卖，所存下之茶，内有一半系带茶叶进口之人贮起，奈价甚高，卖出之茶叶比十月间价更贵。后因买者日少，价钱渐已减落。前月十六日接得印度信来说，自七月间广东已将英国贸易停止。遂致茶叶价值又复长价，至前月下旬，传说国家要与中国打仗，茶叶价更增长。自后市上卖茶之人，皆囤积不卖，买茶之人，到外购买，毫不能得，以致下等之黑茶绿茶，亦如常时好茶，并工夫茶一样价值。

中国围守夷人缴烟之信，七月三十一日〈（即六月二十一日）〉已到兰顿之因底阿好司都内各衙门，及贸易店银店俱有扰乱。是日在兰顿天色昏惨，米价亦昂贵，国中甚苦缺银，银价即已增长。湖丝前时价值不好，现今已大改变，所有茶叶尽皆起价，兰顿各物件无不昂贵。在此季内，孟迈地方，要到中国鸦片棉花，存下未去者，共计亏银六百万棒，真是大有害于利益。若再迟延不理，必倒塌许多贸易，地方穷困。

中国与英国贸易，而英国库中每年所得之税饷，不下四百五十万棒〈（约一千五百万员）〉。若一经停止，数月之间国中定必困乏。前时有公司时，各大班亦常虑及停止贸易之事，常要蓄积茶叶，以备两年之需，因散公司后，即无茶叶存蓄。缘散商贸易，茶叶到国立图即销，何能存积。现在英吉利，并米利坚二国，亦已鼓动禁鸦片，并即出告示定贩鸦片及食鸦片之罪。又出赏格求人做极好之告示，以禁止鸦片，又有鸦片贸易罪过论，系地尔洼于一千八百三十九年〈（道光十九年）〉，在

兰顿所作。以为鸦片不但坏中国人之风俗，并令中国人猜忌英吉利人，令两国通商有嫌恨，现在有许多仁爱之人，立为一会，欲禁止此贸易。其哲付里士，系此会著名之人。在孟阿拉建立医馆，同律山顿及沙渣治士当顿，共立此会，欲先讲明与众人，感动其良心，然后递禀回国。求律好司甘文好司及巴厘满衙门，各官府助理此会立定章程，必要巴厘满开口，分付东印度公司禁止不准栽种鸦片，方可禁止，变作他项正经贸易。

兰顿新闻纸内载云，律士丹合递一禀，讲论中国停止贸易，皆由鸦片犯禁起见，请国王将鸦片贸易停止。中国人禁止鸦片，系为风俗政事税饷，外国人即应遵其法律而行，现在众人皆说中国官府受规不管，禁止有名无实，又说中国拘禁我等使者，殊不思受规乃官府之事，而朝廷一知立即究办，安得说禁止有名无实。况义律并非使者，不过系代理人而已，若按英国律例，即应按各客商所有之鸦片，更加三倍罚银。今中国不过只将其鸦片收缴而已，然因致累我国正经贸易，亦受亏缺，所以不能任人再卖。

我等自知以鸦片贻害中国之，故为中国人所憎恶，常欲自解于中国，因思惟医道有益于人，于嘉庆十年有医生俾臣者，至粤教种牛痘一年，收所种小儿数千。道光七年有医加厘赤者，在澳施設眼科，五年中医愈华人四千馀。费去施药银千有八百馀棒，皆众人捐助。道光十五年，复有弥利坚国名医伯驾者，亦开外科，数年间医愈七千馀人。一切下证皆来就医，其馀轻证难以数计。所费银亦三千两，亦众人捐助，此皆伯驾不贪利，不厌烦，一片诚心所致。

卷八十二

现在兰顿国都中，有助官兵要打仗者，有助民人不欲打仗者，争论三昼夜，决以纸阄，各大官得九分战阄，方免争论。现在东印度英国属地及国中各部落，已出令各船装定军器，往东印度会合，又甘文好司分付，不准扰害中国地方。又云打仗之事，宜长久不宜短速，试问我等应将鸦片抛弃乎，抑与中国长久打仗，以保鸦片乎。看来中国究没有行过一事，足为我国攻打之故。

中国海岛约分三段，一广东海岛，其最大者在省之西南，其省之极东，即有南澳。若论泊船适中之地，莫好过尖沙嘴。二福建海岛，大者曰台湾，甚是富厚，有淡水、鸡笼二港口。其对面澎湖地甚瘠瘦，然为台湾必要之区。次即海坛，不及二岛之大，然人民居彼甚多。三浙江之海岛舟山，甚小然形势甚好，以之作贸易，必更兴旺于别处。因系中国中央地方如宁波、杭州、上海、苏州等处，往来必由之路，故亦紧要。我等若得如此一处地方，在彼立定，再得一处如新奇波海岸，可招集邻近地方到来贸易，又必其地所产足敷居民之用，且为贸易来往必经之港口，则所获利益不少。

广东谣传中国官府欲将省城外房屋拆毁以为城池之保障，此不足信。广东省城高有十忽，周围亦有炮眼，并无城濠，如欧罗巴各国无城墙之部落一样。凡工作手艺栈房贸易，多在城外，较城中更为蕃庶，岂能尽行拆毁，若行此法，则受害之人更多。

道光己亥十一月〈（即中国九月三十日）〉，新闻纸曰：得忌喇士船主遵义律之命，去攻打九龙山炮台，正在出力时，已经衰败，被中国打退。又另有三板几只，赶前帮助，亦皆退回，陆续归尖沙嘴。次日又预备有军器之杉板船，再去攻打，众船至亦皆觉得昨日之败，若不报复，英吉利旗号必定受辱。于天未明时鼓勇而去，岂知所预备之事，皆属枉然。是日又收回尖沙嘴，义律此事办理大错，无一件错事可以比之。诸事软弱，可悲可怜，此举原系保护我国旗号之体面，及我等自己之声名，理应极力攻打烧毁师船，拆毁炮台，以除所受之凌辱，今却如此收煞，我笑义律意见错又能忍受也。

道光己亥九月十二日〈（即八月初五日）〉，有大吕宋墨尔咩那两只桅船，湾泊在潭仔。清早五点钟时，被中国数船拢近，似是兵船，吕宋水手即扯起旗号，不久即见有两火船驶来，水手即放碇炼以避火势，后又有大艇两只，一在船头，一在船尾，纵火大烧时，又有许多小兵船拢来，满船俱是手执军器之人，趸船上人惊慌齐下水，又被中国人捞起，众人遂搜取船上物件，连水手衣服，伙长路程图，取去割下旗号，复放火烧船，约共值银二万馀员。将伙长水手及捞起多人，俱带回去〈（此趸船被逐未回国者）〉。

道光己亥十月二十八日〈（即九月二十二日）〉，英国两只兵船自澳门洋面起碇至虎门，因风被阻，延至十一月初二日早才到〈（共走五日方至虎门）〉。兵头士密，一到穿鼻洋，即禀求不要烧毁尖沙嘴湾泊之船，容在彼等候国王回信。或另设法卸货，递禀后退出三里听候批示，及至次早提督发回，并未启视，谕速交出凶犯。旋见提督师船出洋，将近英国兵船，士密先放大炮攻打，即有师船四只一同放炮回击，打了两点钟之久，因提督显其大勇，扶持船只致未大伤。我们华轮船上被提督炮伤船头并绳索等件，人亦受伤，速即退出，回到澳门洋面。义律、士密、马礼臣，随即上船赴尖沙嘴，赶回保护矣。

前时船主士密在尖沙嘴退出外洋，中国即以为是害怕他，缘中国是顺风顺水，直来奔击英船，仿佛就要全烧毁我等船只。士密等因在炮台下打仗，恐有危险，我等不能退步，所以及早退出。近闻九龙炮台新修更坚固，又闻多出师船并装满引火之物，明是要围两只兵船，待湾泊著，即向船放火。现在我等船湾泊铜鼓洋，潮水甚急，难于湾泊却利于中国人顺流火攻，甚于尖沙嘴，不知士密何故在此湾泊。

道光庚子七月初二日〈（即六月初四日）〉，香山县会同澳门同知出一告示，言奉总督之命，英国兵船近来离出海岸，足见不敢攻敌中国。兵威不过保护鸦片走私贸易，谕令师船封禁大小河口，以免英国兵船进来。除师船装载火炮器械出外洋毁灭夷船外，并令渔船蛋家出洋攻打。其家属官为资给养贍，所赏之银，亦比前时赏格，上所说最多不知可能准给否。然中国人预备攻打封港，兵船之事甚是勇壮。又闻有船百只，由虎门出来。

道光庚子新闻纸曰：二月二十八日〈（即正月二十六日）〉，有广东师船二只，及许多小火船烧然，向金星门之船吹来，幸被风水洄近岸边，烧了中国许多小艇，及外国底威尔大杉板船头桅，被烧不久救息。又有哥洼支麻里船，避火搁在浅滩，久方驶脱，其窝拉尼兵船上，当遣杉板将火船拨至岸上，离去各船，以免于险。闻各船上装有喷筒，不见开炮。是晚又有火船到来，皆不得顺遂，所喜是晚潮小风软。中国人若放得各火船得法，我等船必大受其害。此算是第一次，后来恐中国人若一练熟，驶火船有准即更有危险之事，切当小心堤防之。

道光庚子六月十三日〈（即五月十四日）〉新闻纸云：早上有十只火船，乘着猛流向金星门来，我等湾泊许多船，皆起碇以避其害，并放下在兵船上之杉板，将火船驱至岸上，惟闻炸裂之声，不能为害。当火船冲来时，有许多中国官艇拢来，欲望有着火之船，即行攻打，后见火船，不能成功，遂即驶回。只跳过两桅之特威尔船上，杀死水手几名，即跳下水去。火船样子皆甚好，满载引火之物，一对一对用炼炼起〈（以上皆林制军督广东事）〉。

道光庚子五月二十二日〈（即四月二十二日）〉，有希尔拉士船主穰西在福建南澳岛之西北，遇见八只中国商船，三只大舵船，外看全似买卖船，毫无分别。渐驶渐

近，船主才起疑心，分付预备，尚未停妥，那船已贴着我船右后梢，施放鸟枪。此时风静，又在打鱼洞中，我船不能离开发炮，亦只得放枪回拒。乃我之枪火放去，全不中用，因中国船用皮席遮蔽甚好，彼水手在席后地放枪火，甚稳定有准，又用火料数次烧着，皆救灭了，不致延烧船上绳索。良久风才起，我船方能转动开炮，海贼始行逃去。我船上水手五十名，被伤十五名，而船主穰西，受伤甚重，下腮及眼周身及腿，皆受重伤，心中甚可忧愁〈（此福建邓制军所募水勇攻剿之事，夷不知以为海贼也）〉。

又九月十九日〈（即八月二十四日）〉新闻纸曰：福建泉州来信云，布林麻兵船，帮同阿厘牙达兵船，在厦门与中国打仗，我之弹子，穿过中国师船，直打至岸上，共打沉师船数只。中国人遂连夜将各师船，驶回港口内。次日中国又择选师船装上火炮二百零四门，其中有极重大之炮，再与我等打仗。我兵因不能上岸，遂将兵船驶开至炮弹不及之处，然中国打至兵船之弹子亦不少，其炮弹有重至十八棒者〈（十二两为一棒）〉，兵船大桅之帆竿已被打折。中国又在港口及对面海岛，建炮台数座以为防守，前时派设兵船数只，封厦门港口，惟现在兵船遇了勇敌之后，大抵必去再请兵帮助矣。〈（此亦福建邓制军时事，以后新闻纸无考）〉

兰顿付来新闻纸云：现在甘文好司派设甘密底去查察仓库，并立定仓库之法，将去年所得之税饷，并去年国中之费用，民间所拖欠之税饷，一并列明。在一千八百四十年〈（道光二十年）〉，按大概情形看来，所收之税饷钱粮约有四千七百六十八万五千棒。另在印度公司所收之税饷钱粮，已有十五万七千棒，合共算来已有四千七百八十四万二千棒。计开本年还账之银二千九百四十三万九千棒，此外别样大庄使费银二百四十一万棒，其余各官俸银之类，约有一千七百四十五万一千棒，总共算来约费用银四千九百三十万棒。若将所收钱粮税饷之数与费用之数比较起来，即见得所入不敷所出。查前任管库官，为国中费用不足，故由库中出单揭下银一百万棒，以为文学馆之费用，此项已归于杂项大庄费用之数内。再去年库中曾出单揭下银二十六万棒，以为在爱伦地方各和尚之费用，此项亦系前任管库官拖欠下来之账，俱已归于杂项费用数内。除此两项之外，尚差一十九万八千棒。此数系归在本年费用之数内，现在尚未查清，所以不能得知是亏空不是。去年所收得之钱粮税饷，约有四千八百一十二万八千棒，去年费用银四千九百九十八万八千棒，除去所揭下为文学馆用之项，短少银八十六万棒。后又提出为军需费用银七万五千棒，合共算来短少费用银九十三万五千棒。在去年共计亏空银一百四十五万七千棒，然除却在上文所载为爱伦地方各和尚费用银二十六万棒之外，亏空银一百一十九万七千棒。又除却为付寄书信费用银二十五万棒之外，亏空银九十四万七千棒。又除去为军需等项费用短少银九十三万五千棒之外，实亏空银一万二千棒，并无着落。此系去年所收税饷并费用之数也。在本年所算清之数，论及各款费用，即有赔还账目和息银三千四百八十七万七千棒。奉两好司衙门之命，给出兵费银，为水师用六百万棒，为军器库用五百六十五万九千棒，为武备杂项费用银一百八十八万五千棒。其中多已出了银单，只存二百七十三万六千棒，未曾出单，为各官俸银一千六百八十八万

棒，总共费用银四千八百七十五万七千棒。此外尚有数款费用银，一系水师费用并各兵之工食，定必要丰，致可令兵力强勇，为此项已经提出一十万棒。后又为派设官府费去银七万五千棒。第二系加拿达〈（系在北阿米利坚洲英属地方）〉之费用，因本年查仓库之时候，比往年更早，所以尚未得知。前年加拿达之费用银，系五十万棒，去年加拿达费用银一百万棒，本年加拿达之费用银虽未得知，然就最少之数，且算三十五万棒。第三系与中国行兵之使费，皆系印度国家先支，然后国中给回，前时与瓜洼〈（系噶啦吧地方）〉打仗时，尚可以预料所用之银，故能先出银单，但与中国行兵之事，未知何时方能歇止，所以不能定其数目。况印度兵丁之费用甚大，所以更不敢预先料定，现在按东印度公司付来之数，自起兵后至五月初一〈（即三月三十日）〉已经费去银五万四千棒。若再行兵六个月之久，其费用必致有一十六万二千棒，连以上所用五万四千棒，算来即有二十一万六千棒，然其中有运载船之费。若打仗得久，即不必用运载船，如此看来，大抵一十五万棒，即可以足馀为打仗之费。除却自起兵后至五月初一〈（即三月三十日）〉所用之银外，即可留下一十万棒，以为再打仗六个月之费。此项兵费，乃系东印度公司先行支给，待至再查库时给回，此去年并本年查库各款之数也。再推算下年国中费用之大概数目，计还账目利息银，约要三千一百八十七万七千棒，为水师并军器库各项零碎银，约要一千六百八十八万棒，合共费用银四千八百七十四万七千棒。再加上水师费用银一十万棒，武备及水上派设官员费用银七万五千棒，为加拿达费用银三十五万棒，为与中国行兵事费用银一十五万棒，大概下年查库时，其费用必致有四千九百四十三万二千棒之多。此系一定必须之数，其馀尚有许多未曾列出。

○《澳门月报》五〈（论各国夷情）〉

俄罗斯系与中国素和好之国，俄罗斯近来屡欲攻击东印度。今此中国停止英国贸易之事，大抵亦系俄罗斯之阴谋，在京都内怂恿所致。然中国亦可发二万兵由缅甸入孟阿拉驱我等出海。

我等闻俄罗斯之权柄阴谋，大有害于我等东边之印度，西边之巴社等国，俄罗斯有书馆在北京，中国情事俄罗斯可以知悉。而我等并无人与北京来往，中国已知英吉利印度之税饷，皆由鸦片及茶叶棉花，故俄罗斯亦欲夺我等印度之税饷，令公司所属之地不能安静，亦已足矣，又何必再用别法来相害耶。一千八百三十七八年〈（道光十七八年）〉，我兵攻取印度西北，直到千拿哈，又至加布尔，已近西藏之西界，距叶尔羌戈什哈地方不远。边疆上驻有大兵，在此几座城与达机士顿并附近各国贸易极大。中国见我等先在印度不过贸易，后却全得了地方又得新奇坡，又似有谋澳门小吕宋之意，又似有犯中国之意，故中国将各埠头门塞，只准在广东贸易。又兼有俄罗斯人挑动，故用此胆大之法，中国向来不肯待我等与大西洋俄罗斯各国一样。我今要中国待我等与大西洋俄罗斯各国相同〈（其俄罗斯争印度一篇已录印度卷内，此不重出）〉。

印度付来之信，闻得俄罗斯已带兵攻打机注〈（系自主之鞑鞑里国）〉，数仗皆胜。又闻俄罗斯使者二三日内已离比特革〈（俄罗斯东都）〉往北京，不知此使者系学习中国文字十年照例替换之人，抑系讲论英国之事。纵系讲论英国之事，亦必数月方可到得。大抵俄使未到中国以前，我与中国事已闹开矣。凡中国人之思疑俄罗斯，比思疑别国更甚，断不肯听从俄罗斯人之言语，然我等亦必提防俄罗斯人之阴谋诡计。

新奇坡新闻纸云：暹罗国王闻我等攻敌中国之事，甚非笑轻忽我等以一撮之多，而攻打天朝无数之兵丁。现在暹罗国王将所有赴中国贸易之船，尽收回船厂。而在曼果〈（暹罗国都）〉贸易之中国人与新奇坡贸易之中国人，亦皆戏笑我等。可见中国人如何恃其人民之众。又曰国中新得作飞炮之法，可与佛兰西人斗胜。盖佛兰西人初用飞炮之时，英吉利人即十分留心学之，而佛兰西人于打仗时用兵船少而能胜英人者，皆因其火药胜于英吉利之火药。现在喏付厘亦说英吉利飞炮，与佛兰西飞炮一样，在英国试飞炮之法，乃建一只大坚固之船，无论船只相距远近，俱可施及。直飞至大船上，炮即裂开，将此船打成碎片，仅剩船底未坏，而片刻即沉海矣。用火药不过十一二棒，弹子内又包藏火药两棒半，亦少有烟，落下时亦无声。而远方闻之，如放八十棒火药之大炮，此亦国家之新鲜强勇，故国家封密，不令人知，惟佛兰西有此。

米利坚驳英吉利新闻纸曰：尔屡次争论，不过结上有云，若查出船上有一两鸦片，甘愿将犯人交中国官府正法，船货入官等语。尔岂不思英国屡次示知，义律云：凡到中国贸易之人，皆应遵守中国法律乎。我等若不夹带鸦片，中国人亦不能加以刑法，倘我等船只人民到英国若有违犯英国法律，岂能不按英国法律治罪。何以到中国遵中国律例即以为有辱本国之尊贵，前英国噶船色循船均具结进口，皆系公众道理。

又曰：米利坚旗号，已被英国鸦片贸易所污。因数月前有走私鸦片之船，扯米利坚旗号，在中国海岸来往。且有英吉利人口说，必要尽心尽力以陷害米利坚人等语。幸中国官府识破其奸，米利坚人方免受害。我今请问尔英吉利船，扯米利坚佛兰西黄旗各国之号，为公正道理乎？抑为不顾私利乎？又如缴烟时，鸦片价值每箱不过洋银二百五十员，何各英国人将烟卖与义律呈缴之时，又索价每箱五百员之多，欲望英国库中偿补之。我并非欲揭出英国人之短处，但果系如此，必更有许多不堪说之事，故不得不略陈之。

澳门西洋兵头复英吉利兵头士密信曰：英吉利人不要想我留英人在此居住，我亦必守中国人所定章程，不肯违背之。只是中国与英国两边之事，我皆不理。尔但说英吉利人不在澳门居住之难，不思及西洋五千人为英人亦受重累。所有贸易，皆要停止。尔若不念朋友之情，我即将近来几个月内所有之事，宣布与通天下人知道，求各国公议判断，尔所行之事，不独犯我国法律，乃亦有犯于英吉利国家之法律。

设欲停止正经贸易，不许外国通商，如日本近来二百年，不与外国往来之事，此必不能。彼时日本人之机智，与欧罗巴各国相等，即国中之强勇亦与欧罗巴各国相同。况彼时欧罗巴人，已得中国之利益，故视日本之贸易不甚要紧。今二百年来西洋各国行船之法，勇敢之心及国中财帛，俱已大增于前，在日本贸易之日浅，在中国贸易之日久，所以中国贸易，即难停止。

育乃士跌国〈（即米利坚国名）〉定必无打仗之意，其信内云，无论米利坚人在中国如何吃亏，育乃士跌国家，定必尽心调停平安而已。前因欧罗巴各国时常打仗，大吕宋各部落亦屡扰乱，所以米利坚凡事俱能忍耐，不肯同别国打仗。

英国人离省城后，因行为有不是之事，故中国人以此罪英国人。米利坚人系恭顺中国，得以照常贸易，前月问我等已议定暂在港外贸易之章程，独花旗不与和心，此系外国不能齐心会合之大害也。

米利坚人从前只欲作两边俱不管之人等语，观去年米利坚人缴鸦片时，只当系英吉利人之物，难道英吉利国家，便不赔补米利坚人所代缴之鸦片价值乎？但米利坚人如果欲作两边不理之人，即应停留在虎门外洋，方得平安，不应具结进口。米利坚人若果能长长两边不理，即可免却我等许多忧愁之事。

英吉利、欧斯特里、俄罗斯、普鲁社四大国，已经同都鲁机国立定章程，又将此章程写寄与伊揖国之巴渣官，但未曾会合佛兰西国，恐此事将来令佛兰西与英吉利两国不相睦。巴厘满衙门已命水师军添二千水手，又命即速整顿船只，佛兰西亦增添其兵丁，此事系两边错会了意，我等望其相友爱而定夺之。

卷八十三

◎夷情备采三

○华事夷言录要〈（此书两广总督林则徐译出，曾见于两江总督裕谦奏折）〉

火药外国未用时，中国已有之，罗针亦由中国海船行至西洋，磁器则近日西洋各国亦设窑仿造。而普鲁特之墨林部落尤多，终不及中国之泥细而精洁。惟种牛痘一法，系由西洋传至粤也。

中国之画，惟重写意，虚多实少，不如西洋之工细。而洋画人物，又是一片黑影，不独中国人嫌之，即西史载英国前代女王伊来西麻于写容时，亦不许写此黑影。

外洋有歌舞而无演戏，有火燎而无灯笼。兰墩国都街市皆以煤火通于墙筒，互相贯通，光明如昼，绝无纱灯纸灯。前此贡使律马加尼至北京，回经运河各镇市，灯光灿若繁星，归国夸述以为大观。

又中国药材，多是草木，外国药材，草木仅居十之一二。西洋医不诊脉，而中国及回回医皆信脉理，有二十四样脉，诊之即知其病何证。又西洋不择日，而中国钦天监凡举事必择吉日，西洋绝无此说。

前此西洋耶密等在京作钦天监，曾带西医与各官府往来，借行克力斯顿教，是以教师必先晓医道，方能为人所说。

粤省火烛一起，将夷馆及各街道烧成白地，与道光二年，兰顿国都之火烛无异。

西洋人皆短衣窄袖，惟白头回人长衣宽帽，时常剃发，与中国人无异。

中国最重文墨，多由寒微至贵，纽曼译出中国之书，言其政事最好。通阿细亚州无此善政，即欧罗巴洲之罗问、克力斯顿各大国政均不及。故称王化之国，惟武勇不如西洋。若中国而兼西洋之武勇，我等敬中国尤当不同。

前时有罗问国之耶密，奉使至北京，授钦天监，著有许多书籍，道中国之风俗，现在佛兰西各国，多有藏贮。使我等得知中国之风俗，皆应感耶密也。中国音语最难学习，近有波罗特士之教师勤力学习，是以马礼逊、米尔尼、麻士文三人俱能通中国语言文字。

佛教与回回教、克力斯顿教亦有分别，中国称为佛，日本称为释迦，蒙古称为刺麻，印度称为密他，缅甸称为偶麻，西藏称为麻哈母尼，暹罗称为波纳分教，其实一

也。佛生于加治麻国，在克力斯顿教一千年之前。如谓人死复生为禽兽鳞介，互相轮回，皆各教所无。而克力斯顿教中又分出二教，曰额力教，曰加特力教，皆以净水教化。现仙佛鬼魔及地狱皆一例观之，我思佛教之道理，未必能胜于加特力教额力教之道理。

昔年多麻士至中国传加特力教时，中国从教者仍信奉鬼神，以加特力教中，不禁人奉鬼神之像也。及耶密至中国观前所行之教，皆非正道，始删去许多敬奉鬼神之事。

孔夫子书系耶述用拉提纳字体译出，甚少精理，我等若信其不甚明白之书，以为中国儒教道理止于此，恐为耶述所误。

中国有回回之马伙墨顿教，各处建庙礼拜，又有由教，其人甚少，只散在乡间单身修炼。

中国人以欧罗巴为夷，皆由不通欧罗巴之语言文字。是以于麻六甲设书院教师，以教化中国之人。中国人之聪明灵变，除英吉利外，他国皆不及。

各洋商，名浩官、茂官、启官、教官、经官、明官、海官、三官、贞官，各通事，名亚担、亚东、亚江、亚兰细、亚周亚钦。

十三间夷馆，近在河边，计有七百忽地〈（每忽八尺）〉。内住英吉利、弥利坚、佛兰西、领脉、绥林荷兰、巴西〈（即巴社白头回）〉、欧色特厘阿、俄罗斯、普鲁社、大吕宋、布路牙等国之人。

广东走私之船，曰快艇，曰蜈蚣艇〈（以其多桨形似得名）〉，排列枪械每于黑夜由小河鱼贯而出，分赴各岸售私，专与官船相避。粤东汉港纷歧，熟习港歧，易于趋避，倘遇官船邀截，不及走避，即持械拒捕。

鸦片船皆下碇于伶仃洋，其岛高尖独峙，颇有居民，山可御东北风，若风暴将起，则驶往对面之金星门，否则被风吹出大洋外矣。

西洋种罂粟花曰波毕，其上等者在麻哈默那，次等者在麻尔注、孟买、加尔吉达〈（即孟阿腊首部落）〉，皆英吉利所辖东印度地。每箱载两满，每满各重六十七棒〈（十二两为一棒）〉，合中国秤，每箱百斤有零。其价自一千三百鲁卑，至一千五百鲁卑不等〈（五十五先士值一鲁卑，二鲁卑值一番银）〉。装箱后，用格拉巴船运至各国售贾。除印度外，又有回教之都鲁机亦产鸦片，每年亦有千馀箱运至中国，多是弥利坚船运之。凡装载鸦片之船，每船约载三百趸〈（每千六百八十斤为一趸）〉俟过七洲洋后，到伶仃洋。即有军器之船，在波湾泊，将鸦片移入有军器

船内。至夜有内地蜈蚣艇来接，载运至省城。此等船常有二三十只，与官船抗拒，其格拉巴船在伶仃洋守候，鸦片卖完时，扬帆回去。中国始由穿鼻洋跟至老万山，空放响炮，回称夷船尽已驱逐远扬。

粤省与外国交易番银，俱是用大吕宋之达刺洋钱，故外夷各带达刺番银，以买中国之货。近则出口之银比入口更多，以鸦片年增一年，烟价多于茶价也。

广东炮台外，砌有围墙，以防敌人上岸，攻我炮台后路，而墙皆脆薄，只好圈其兵丁不令外走，若以御敌即不能。夷船禁烧酒，同于中国之禁鸦片，水手好酒同于中国之嗜烟。盖水手在船尽受炎热，夜卧风露，加以烧酒之力，一饮则必醉，醉则必发寒热，往往不治，禁令虽严，而水手以酒为命，时时盗买，多藏于水桶，船主望见，但见是水不知皆酒也。

黄埔在水中央，周围皆洋货船，而内地尤帆樯如林，以外国贸易船比之，外国所纳税饷，不过本地百中之一，所以中国不甚希罕外夷在粤之贸易。

外夷雇中国人供役曰沙文，故华夷有事，官府辄先以禁买办火食，及撤退沙文为首务。嘉庆十二年，夷兵头特鲁厘带兵上澳，及嘉庆十九年，英兵头那列士到澳门时，道光十九年，律劳卑到省城时，均即封港停止贸易，驱逐沙文，打破夷馆，提拿通事，必待事定，始开舱发沙文也。

中国户口之数难考，即征收地丁人数亦难信，完钱粮时只家长一人出名。中国以六人为一户，西洋以五人为一户，如广东省城众即百万。古时户口，炀帝时共有八百九万户。一千一百二十二年海壮帝时〈（宋徽宗宣和四年）〉，有二千零八十八万二千户。一千二百九十年急赖间为帝时〈（元世祖至元二十四年）〉，有一千三百十九万六千户。一千五百零二年〈（明孝宗宏治十四年）〉有五千三百二十八万二千户。一千六百四十四年〈（顺治元年）〉清朝初减至二千七百二十四万一千户。乾隆间会共一万五千万人，以孟阿拉之户口方里，比较中国，中国约二万二千八百万。阿弥于乾隆四十二年住燕京，依官书计算中国户口，连无钱粮之人，共二万万人。佛达阿拉士译出部钱粮户册，亦有一万四千八百二十一万四千余人。与前二数比较，尚不甚相远，至近年人数日增，更可知。

中国产米，不敷日食，故准洋米进口，并免米船之税。近年米利坚、英吉利由小吕宋、葛留巴、新奇坡运至米不下二万二千八百十六趸〈（每趸一千六百八十斤）〉。而鸦片货物寄放伶仃洋，则不仅米船也。印度之人民极多，不须外米接济而反运米出口接济东西洋各埠。何以彼有馀，而中国反不足。且工作则中国更勤苦，饮食则中国更爱惜〈（印度凡食馀之物他人即不食之）〉。设印度地面而以中国人居之，获利尤倍。可见中国之蕃衍稠密，更胜于印度矣。按秧马礼逊之数〈（马礼逊官名非人名也，父子世习汉文，其子曰秧马礼逊，秧者，小也）〉，中国幅员一百三

十万方里，户口三万六千四十四万三千人，其地之辽阔，人之蕃盛，自古鲜有。

中国商欠固多，亦有外夷不清粤店之帐，即开帆回国者。粤店既不能禀官追还，而外夷不法，亦不能禀官处治。

俄罗斯不准船到粤，只准陆路带茶六万六千箱，计五百万棒。因陆路所历风霜，故其茶味反佳。非如海船经过南洋暑热，致茶味亦减。然俄罗斯亦托外国船只带货到粤贸易。

每年中国与各国贸易，并中国出口与外国贸易者约直银八千万员。以英吉利、米利坚为最大。

自公司散后，无人管事，洋商有再著大班来粤之请。英国遂派领事一人，律劳卑于道光十四年至粤，管理贸易，欲在粤设立审判衙门一所，并如英国设主里十二人以助审案。七月二十四日，律劳卑并未经洋商通报，突然闯进省河，中国总督大怒，遂停贸易禁火食，预备火攻，于是委船押同律劳卑下澳，律劳卑到澳，即气忿死。道光十六年，英国义律至澳，由广督奏称各国贸易，惟英吉利设有公司，四首商管束，曰大班、二班、三班、四班，其船定于七八月到广，以货换货，至次年二月出口，维时各大班请牌下澳，至七月间请牌上省。自公司散后，事无专责，前督卢曾奏请敕令夷商寄信回国，再遣大班来粤管理贸易。今十六年十一月接据夷人义律携一妻一子至澳，约束商人水手，惟不管贸易。

西洋饮中国之松萝茶、熙春茶，颇觉有损，疑中土人以害人之物，转绿茶为黑茶。何以我等饮此种茶，便觉有损，安南、日本、瓜洼〈（即葛留巴）〉等，亦产茶而不多，近则印度公司所辖之阿山〈（在缅甸北云南之西，西藏之南）〉产茶颇旺。

广东洋货税饷甚重，夷商屡禀官宪，且洋行会馆抽分，每百两抽内地卖家三分。公贮以备洋行倒塌，欠款无著者，即以此代偿。近因洋行欠项太重，公项不敷，遂仍各欠各还。第公项代赔之例虽改，而抽分如故，名为抽内商。而内商必增货价，则亦仍出自外夷贸易中矣。夷船进黄埔装载七百趸者，计其官费及引水通事一切，使费银将近五千圆。故非大船不能堪此重费。

康熙初，鸦片准作药材进口，每担纳税银三两，后又每包加税银二两四分五厘。至乾隆年间吸食日多，广督奏请奉旨严禁入口，嘉庆间，禁益严，初枷杖，后军流。

鸦片私趸船，初在澳门，后因住澳之布路亚人索费太多，业此者遂议改他地。于道光二年设立趸船，安设军器，抛碇伶仃洋。由葛留巴之船载至伶仃洋，过载趸船，

即卸载回帆，商人在省讲定价值，即先交银，写立发票，付与快蟹船、扒龙船，付伶仃洋运入省城。所过地方水师官，均已受贿放过，故近数年多至数倍。

嘉庆二十三年，印度鸦片进口者，只有三千二百十箱。道光六七年，九千九百六十九箱。道光十二三年，有二万三千六百七十箱。道光十六七年，即多至二万四千箱。计印度接济中国，鸦片居其大半。虽亦有销售别处者，总不若此地之多。此外都鲁机亦有千箱，能以入口。除鸦片外，亦有他税重之货，亦泊于伶仃洋，由快艇潜运货物至岸，偷漏税饷。此由道光五年加增海口税饷，始有此弊。后因广东洋米接济，奉旨免米船进口之税，因此鸦片及重货，多暗寄于未甚满载之米船入口。

有人言情愿断止鸦片一物，另开南边港口贸易可乎，我恐未必能行。盖天朝只准在粤贸易者，畏恶外夷，拒而远之，不许深入腹地也。

蒙古在西北之地，与欧罗巴相近，故饮食性情，颇近欧罗巴之人。

中国文字，天下闻名已数千年。才能迭出，甲于天下，许多道理规矩，皆与欧罗巴之国略同。只是疲懦不善于战，故为外国人所轻。若以中国人之才能而兼外国之刚强，则欧罗巴人视中国人又不同。想因承平日久，刚气已退，自知不善战，故每事只用柔治，其防守之兵有事只闻炮声而已。水师船遇西洋并无军器之商船，尚抵挡不住，何况兵船。且军器亦多废铁造成，年久并未修理整新，火药则烟方出口，子即坠地矣。

水师之无用，亦由不善调度之故。我见广东岸上粗工力作之人，甚是勇壮，即如中国水上之人，欧罗巴人尚不能及。若以欧罗巴人与岸上粗力人比，自更不能及。若拣此等强壮之人，充当兵丁，真可谓精兵。昔有大吕宋人到广日记云，中国之人若善调度，即为第一等勇壮之兵，言诚不谬矣。

○贸易通志

英吉利国，四面环海，以师船环守本国者百艘，其余分布各国市埠。每埠或数十艘或十馀艘不等，共计兵船五百三十艘，水师兵三万五千丁，连水手梢工共九万。佛兰西兵船三百有十艘，俄罗斯国百有二艘，弥利坚国五十四艘。其兵船大者载大炮百二十位，又次者七十位，此之谓阵舰。小者自六十位至三十位，又小者自二十位至十位，此以之出奇制胜。无事则以之护送商船，巡逻海贼，有事则以攻战。

夹板船顺风逆风，皆能驶驾，而无风则不能行。爰有智士深思天地间空中运动流转之物，惟风水火三者。今风力水力皆无可恃，惟有火力可借。火药之力能裂金石，震虚空，愈闷之则力愈大，岂不可以火轮代风轮水轮乎。于是以火蒸水，包之以长铁管，括柄上下张缩其机，借炎热郁蒸之气，递相鼓激，施之以轮，不使自转。既

验此理，遂造火轮舟，舟中置釜以火沸水，蒸入长铁管，系轮速转，一点钟时可行三十馀里。翻涛喷雪，溯流破浪，其速如飞。不论风之顺逆，风之有无，潮之长落，溜之上下，借阴阳之鞲鞲，施造化之鹿卢，巧矣极矣。弥利坚与欧罗巴隔海数月程，五印度与欧罗巴绕地数万里，而火轮遄驶不过四五旬。大则军旅，小则贸易，往返传命，有如咫尺。不疾而速，不行而至，非天下之至神，其孰能与于斯。且火机所施不独舟也，又有火轮车，车旁插铁管煮水，压蒸动轮，其后竖缚数十车，皆被火车拉动。每一时走四十馀里，无马无驴，如翼自飞，欲施此车，先平其险路，铺以铁辙，无坑坎，无纡曲，然后轮行无滞。道光十年，英吉利国都两大城间，造辙路九十馀里，费银四百万员。其费甚巨，故非京都繁盛之地不能用。近日西洋各国都多效之，此外又有火轮机。凡布帛不假人力而自成织，巧夺天工矣。然地有纡曲高下，不可行火轮者，惟在填平道路，将碎石壅地，使其平坦，两旁轨辙，以铁为槽，行时溜转如飞，则一马之力，牵六马之重。

西洋贸易不但航海，即其在本国水陆运载，亦力求易简轻便之术。一曰运渠，一曰铁路。运渠者如中国之运粮河，荷兰濒海多沙，船易浅搁，沿岸而行程途纡远，国人议开运渠，自国都至海长百五十馀里，阔五丈四尺，深二丈，火舰往来无碍，直抵都城。避险就安，费银五百万员，各商舟行此渠者，纳饷补费以备岁修。又其国内支河，四通八达，画舫安坐，昼夜遄行，沿岸村庄，绿杨穿映，有同江浙。其沟大抵阔六丈，深六尺，砖铺两岸，以马台舟，虽不如火轮之速，而安稳如衽席也。佛兰西国亦开大渠通湖入海，长二百二十里，费六百五十万员。英吉利水渠亦多。然近屿不长，所至通海，掘不甚费。弥利坚国，其始地广人稀，近日各国辐辏，四方流寓，垦辟日广，物产殷阜，乃大开六渠以通货。第一渠长千馀里，掘费二千二百万员，阔六丈，深六尺，每年纳饷二百馀万员。第二渠长千有八十里，掘费九百万员，每年纳饷百馀万员。第三渠长百八十里，掘费百十九万员，岁纳饷十万员。其余以渐短小，通计每年国帑关税，入多出少，共计三千馀万员，皆连河通市之益。至于无水可通，山险泥滞，运货维艰之处，则亦为石衢铁辙，以利车轮，虽不及火轮之速，然遇纡回高下之地，火轮无所施，则此又通其穷矣。故西洋贸易，但求一劳永逸，不为惜费苟安，而行渠行路之人，皆令纳课以备岁修，则又一举而上下两利。至海口停泊之所，若无天生形势拱抱，则风潮澎湃，舟易触礁，西洋各国于此险港，则外筑石塘以护其外，而海舶环泊其内，又筑炮台以御贼，则皆中国所无，亦中国所当法。

中国以农立国，西洋以商立国，故心计之工。如贾三倍，其国所立规制，以利上下者，一曰银票，二曰银馆，三曰挽银票，四曰担保会。前二者国王与商民分立之，后二者则商民自设之。银票如中国之楮币，国王出之，以时收纳循环不失信，故外便商而兼利国。银馆者如中国之银店，收银代为生息。但彼则国王自设之，或寄存银，或支借，或出票。荷兰国银馆始于万历三十七年，章程公正，各国取信。佛兰西国银馆，嘉庆间因军饷支用过当，所收银二千万员，一时倒败，其后更立章程，再开银馆，能收银九百万员而止。银馆最大者，推英吉利国都，始于康熙三十二年

，初止收七百万员。后至乾隆五十年，增本至万万五千万员，内借支国王四千馀万员，公信无欺。故各国商旅，皆愿存银其中，恃以无恐，赋税之出纳，皆存于银馆。弥利坚亦开银馆，道光十二年本银七千九百万员，嗣后十七年，其私馆败，银有出无入。近日复兴，人复取信矣。其他西国各有之，而此三国为最。不独国都有之，其各城通市私馆亦多。故银馆者民之库，国之帑，商贾之源，商民茆独，有所寄贿，则免其经营，贫商得以借贷，则资其转运。挽银票者，如中国之会票。凡西洋本国之商，欲赴广东贸易，挟重资，涉险远，甚为艰难，但寄票与驻粤之商，会银交易。又如英商欲向花旗商买货而无现银，则亦出票会银于售货之某地，而彼商欲买英货者，即于某地收兑其银焉。此三者，中国皆有此例，惟担保会则中国无之。其会有三，一曰船担保，舟航大洋，难保沉覆，假如船价二万员，载货五万员出海，每月纳会中银，每百两纳二三钱，设使船三月到岸，平安无失，所纳银存为会中公费。如或船货有失，视其损失之分数，如仅桅折货湿，会中按数偿补。如或全船沉溺，则会中即偿其半，但必实报实验，众力恤灾，从无推却。英吉利国都二十一会其本银或八万或五六万或三四万员不等，同休戚，共利害，岁终会计，有利均分，有害分受，要之利多害少。二曰宅担保，城市稠密，四禄堪虞，假如本屋价银二千，每年纳会中银二十员。不幸被灾，则会中亦代偿其半。三曰命担保，假如老妻弱子，身后恐无生计，每年于会中入五十员，死后如后嗣成立，无需赍恤则已，如贫不能自存，则会中贍其家，每年一千员。此四者，皆西国恤商之政，而尤要者则曰以兵船保护商船之法。如商船在海遇仇国及海贼来攻，则国之师船迅驶而来，或护其前，或殿其后，待商船各驶去收港，而师船列阵交战以退敌。凡交战之际，商船皆不得出港，倘擅动蹈危则担保会中不偿其所失，凡各埠贸易之银，皆由师船递寄，故师船寄课，为万全无失之策。

○滑达尔各国律例〈（米利坚医生伯驾译出）〉

尝思各国皆有当禁外国货物之例，其外国不得告诉委曲，而违此禁，亦不得以仁情推辞。若他告诉委曲，是不过欲利而已，该国必不以他得利，而违自己之禁，试思凡国有禁，皆有所谓而然也。

第三十七章

一禁立之后，如有犯禁船货物夹带出口或夹带入口，或带货漏餉则变价充公。第二百九十二条

打仗者是我们出于不得已，强逼而应有此事也。盖打仗者，有公私之分，或两国交战，或二主相争，所事皆出于公。而兵权亦出于公，此是也，私自两人相敌，此是性理之常，此之谓也。

予详审有应战有不战者，若情有可原，固无论人人皆欲战，岂不欲自保其身，自护

其地，而于当战之日，而竟不战者乎。然战合于人心，事自合乎天理，如匪盗打劫村场，谁不与之抗拒，是理所必然，势当如是，是故应战。应不战者，皆以合义为贵，非可苟焉而已也，今我说此应想一想于自己，但如英吉利国王，不与大臣同行事，虽用钱银，不逼迫百姓守兵械，他们为打仗，据实是必议大臣同行，与索军粮。

一当者〈（如父母打不孝顺之子女，此是应当也。但别人因我子女不孝之事，他将我子女打，所论之理，亦不应当打我之儿子也）〉

二职〈（如琉球人往别国忽遇大风，打烂船只，失水往中华去，此琉球人并无钱财，亦不能糊口不能回国，则要禀明此县，或日后方可回国，此是人情之职）〉

三或〈（如外国带鸦片往省，流毒射利，该本国不准他进口，亦不能告诉一说之事，此是理也）〉

四守法〈（往别国遵该国禁例，不可违犯，如违犯必有罚以该国例也）〉五公法者〈（但有人买卖违禁之货物，货与人正法照办）〉

六或〈（或各花旗人各司其事花旗之事，别国之人，往花旗去，立不能做此处兵丁也）〉七不论〈（不论别国人在此该国）〉

八或〈（如若英吉利国女王欲与佛冷西国打仗，但大臣思想无道理，此大臣不愿发一将，不发一银，何得战也）〉法律本性正理所载第三十九条〈（袁德辉译）〉

各国禁止外国货物不准进口的道理。贸易之人，有违禁货物，格于例禁，不能进口，心怀怨恨，何异人类背却本分，最为可笑。若不分别违禁不违禁，以及将本求利，均不准进口，可以含怨。即如甲国货物而至乙国，并不见有违碍，而乙国禁之，此谓之不是好意亦可含怨，已无遗碍。而又无实在明白说出其所以不准之理，立此等例禁，令人难以推测，算是与人隔别，断绝往来也。所立例禁，即如走私出口入口，有违禁货物，并例准货物偷漏不上税饷情事，有违犯者，将船并货入官充公。

一百七十二条

中国、日本国，无有照会某处之船准进，某处之船不准进，皆禁止外国人，不许进口。在欧罗巴洲中各国，除与有仇敌之数国，此外人人皆可游行，国国可以进口，一经准其进口，就当遵顺其律例。我思律例之设，原为保存身家性命起见，非关遵其例，即子其民之理，国家立法应须如此。而外国人一入其地，即该凛然遵顺，国家抚有天下，治理亿兆，而律例亦不止此。自法制一定，普天之下，莫不遵守，故

外国有犯者，即各按各犯事国中律例治罪，其治罪之意，不过令人保全身家性命也。

二百九十二条

兵者，是用武以伸吾之道理。有公斗、私斗。公斗系两国所兴之兵，私斗乃二家所怀之忿。以妥当道理而论，凡保护自身，及保全自己道理，自然可以有用武之道理。此等道理常在人心中，亦人人所共知。有些迂儒，用经典上义理，如己身已被人杀害，犹曰只好任他杀去，而已总不任杀人之名，此等错意见，终怕行不开。原其故，无非为避害保身，此亦人之常情。然兵亦不是乱用，若知夫天性所赋之理，不得已而用兵，总合夫道理，以仁义之津法而节制之。国中权柄是决断争辩，镇压伤害，禁止我们私自所欲伸之义理。欲与外国人争论，先投告对头之，王或有大权之官设，或都不伸理，可奔回本国，禀求本国王保护。核其可行则行，可止则止，若概而准之与外国人理论相对，则国中无一人不连累。其中人人亦可扰乱，何以保全两国和气，此系大危险之事。先要审定虚实，有何怨的道理，或是应该兴兵，或是应该不兴兵，或是须要用兵，国中方才太平，悉听国王裁夺，无此法度，何能一国太平。

如此惟国王有兴兵的权，但各国例制不同，英吉利王有兴兵讲和的权，绥领王无有此权。

英吉利王无有巴厘满衙门会议，亦不能动用钱粮，不能兴兵，要巴厘满同心协议始可。

卷八十五

曩見傳鈔火輪圖說，不能通曉，嗣見小樣船僅五六尺，其機具在內者未拆視。又於丁君守存處見一圖，俱有在內機具，與前圖相表裏。故會通其意，為之圖說。其尺寸就小樣船約之，質多用銅。大船未必盡然，會心之士，必毋泥執。

一曰架。銅為之下檻四根，長短各二，連成長方以為底。上梁四根亦如之。四角各豎一柱，而架成矣。其近前梁處，加一橫梁，从上直穿三圓孔。中一旁二，其后檻居中，亦从上穿一圓孔。其旁兩長檻，當橫梁之下，各有圓孔，則橫穿之。架之大小，稱船之艙。

二曰輪。後輪二，命為支輪，緣其小於前輪，取其支架，令平可陸行以抵舟也。形似車輪，兩輪共軸，軸端圓而軸中豎短柱一。柱端亦圓，為直軸入後檻孔中，則兩輪可前後轉，以便左右也。輪在舟內，前輪二，命為飛輪〈（名見《奇器圖說》）〉。緣輪體重而形圓，一周之重如一，故其未動也似多一重，而其既動也，則多一力，所謂已似無用，而能以其重助人力者也。輪心孔方，軸圓而樺方，輪隨軸轉者也。軸近樺處，各作一曲拐，曲拐外貫旁檻橫孔乃安輪，輪在檻外。而舟內外輪二，命為行輪，輪舟雙環，連之以版，或八片，或十餘片，用以撥水如槳然。在舟外兩旁，轂孔亦方。

三曰柱。曲拐二，皆運之以柱。為邊柱下端各作圓孔，以受曲拐，上貫橫梁兩邊孔，另有中柱貫橫梁中孔。三柱上齊連以橫栓，所以同其下上之也。中柱稍短，其下入于氣筒。氣筒頗粗，面有蓋，蓋心有管恰套中柱下端。密而寬，寬以利柱之下上，密欲其不甚泄氣也。气动中柱，則邊柱同動，而曲拐运转飛輪也。〈（附）〉氣筒機，具得自丁君傳來之圖，甲乙為總管，藏在鍋內，氣從甲下，行至乙，則分而為二，上由丙入己，下由丁入庚。乙內有舌如門扇，軸安左邊〈（如風箱中事件）〉，氣從乙入為舌所碍，不能兩管并進，必尋隙而行，辛為鐵條〈（即如申柱）〉入子孔內，戊為記版，以銅鐵為之〈（初疑太厘或夾皮如水炮中事件。丁君言在沸水熱氣中，皮難堅久，見風槍中事件，亦銅鐵也）〉。壬另一管，上通丁，下通癸。原稱癸為盤不類殆是筒也。內氣化水則入于此，癸外當另有盤貯冷水。癸浸其內，氣過盛使化水，不致毀裂機器也。氣尋隙行，假令隙在丙，舌必下而掩丁，氣全入己，則戊為之下矣。戊下已足，氣來不止，必尋隙入丁，舌自上而掩丙，氣全入庚，則戊為之上矣。夫己庚相等，則勢均力齊因子稍泄氣。癸能化水，自生呼吸，所以下上甚速，灵动微妙，不可思議。但曲拐之轉，因柱下上，可左可右，而飛輪一動，重助其勢，則左之必左，右之必右，自有順無逆矣。

四曰外軸。〈（內外）〉樞。軸內端方而外圓，連內方處，圓之入船幫，連外圓處，方之入輪轂。方端入內樞，圓端入外樞。內樞銅版一片，厚一分，闊七八分，長視飛輪。內徑稍殺，中作方孔，以受軸內端，版片兩端，各立短柱，入飛輪兩輻之

间。辐动则拨短柱，而轴随之转矣。外枢略同内枢，长视外轮，径稍盈则向内一折，使足函外轴，又向外一折，各作两孔，用两螺钉以固于船帮，中心作圆孔以受轴外端，所以管轮而利轴转也。

五曰外轮套，径足函外轮而止，内外两层，外为正面，全圆之，内为背面，半圆之连合以墙，亦半圆而止，所以围外轮，束水使上不旁倾也。半圆径边，安两合页，用螺钉固于船帮墙上。

六曰锅灶。锅下安灶，后开火门，锅边起墙，高及架，上有盖。立两柱夹之柱端，安横梁，中开孔，以螺钉固其盖。前有灶突高过于架以出烟，锅近上口，旁有一管，横曲上出，其端如碗以入水。碗底管旁横一柄，命为闭气柄，右推则开以入水，左推则闭不泄气。稍下复次第安两管，为出水管，皆横曲下垂，有闭气柄，盖为斟酌水之多寡设也。锅灶切近，内之后气筒，则在架前横梁之下，当是长管藏锅内，从项下垂，将至锅底，一折横行，至气筒处，以远滚气入筒也。曲拐左近，下有垂管，安闭气柄，想与气筒相通，盖欲泄气以泊舟，兼为气化以出水也。

七曰桅。两截参差相接，下载高过船舱，端作长方栅栏架，长约尺半，阔八寸，上可栖人，以窥远用炮也。八曰绳梯。上结栅栏架，下结船边。

九曰破风三角帆。有木如桅卧安船头，长四五尺，突出船头者三四尺。端系两绳，一附木系于桅根，一斜迤而上系下载桅上，成三角形略合句四股三之度。布作三角帆斜边及下边，安铜圈无算，套两绳上，逆风张之以破风，不逆则收之。然不能一捋便收必解绳方无碍，则用铜圈者为收折如扇，以省手搢之烦耳。

十曰破浪立版。舵版立舟底，高约及尺厚二三分，前齐舟底，后杀于底者寸馀。另附木片高称之，阔约一寸为之舵。舵干上入舟处，有木套形似碑。藏其机于内，高及胸上。端横出一轴，轴端有加版轮〈（名出《奇器图说》）〉。顺拨则舵左，逆拨则舵右。

十一曰全图。原传图说，言帆虽设而不用，逆风日行二千里。图说甚略俱不明了，晋江丁君拱辰《演炮图说》云：夹板船大顺风，日夜行六百里。火轮船顺逆风顺逆流亦行六百里。以表与脉较准，一呼一吸为时一秒二。船皆行二丈一尺似属征实，然一周八万六千四百秒，以二丈一尺乘之，里法百八十除之，得一千八百不合，盖所据推算尺度之殊不足异也。至原传图说，帆设而不用则何必设，又画有法条，实为无用皆不足据。或谓风力可以飞石移山，并其逆风能行者亦疑之，不知飞石移山之风，顺风且不可行，逆风岂真谓此。殆谓寻常逆风，他舟袖手，此可径进。风若稍顺，则熄火张帆，未尝废帆不用也。其巧在三角帆以破风立版以破浪，行船巧在轮运，轮巧在曲拐，若夫风浪之力，所以大者气法也，水火之力亦气法也。分风擘浪，则彼气之力失势，火炽水沸，则此气之力得势。彼失此得其加減此例，诚有不

可拟议者则逆风能行，理有固然。虽日二千里不无夸张，或谓书夜行千二百里者近是。

火轮船式

火轮船式（一）

火轮船式（二）

火轮船式（三）

火轮船式（四）

火轮船式（五）

火轮船式（六）

子作火炉，上开烟窗，丑为火罐，寅位开小洞，盖以铁版，上湾装一卯管，与辰桶连。辰桶下装巳戌酉三管，巳管通午桶，未竿之底，致气推上。酉管通午桶，未竿之上，致气推下。惟戌管独弯，通出气之亥管，又辰桶中装小申桶，高低视辰桶之半，而无底板。长短约可罩住，或巳戌或酉戌二管。故丑罐水滚至极，气从丑上卯入辰，过巳至午，则未竿必升上，未竿升而申竿必下。未申竿头装曲柄，各系转轮竿，上下不止，轮即辘轳不住。舟车之利，莫便于此。又卯管当半装机关钮，如关之则水汽不通辰桶，而未申竿即不运动，舟车可立止不行。其寅位铁版之轻重，约以丑罐中水汽之加减五分之一，假如水汽得五十斤，则铁版当用四十斤，气满丑时，罐随气可升降。若无此铁，恐罐有迸裂之忧也，昔未作此器时，牛马之外，最捷莫如明驼，日行千里。由今视之，则瞠乎后矣，有心济世者，曷勿仿式为之。

其丁筒内之戌号铁片，既水汽蒸激如此，其动甚快，激上迫下，则辛号用一条铁，连合戌号铁片，上出筒外，合著机关，辛号铁条就感动在外之机关，虽此条但上下感动，而因此牵制于别项活窍，则周围轮机，无不转动也。

又曰火轮船自英国寄信至印度，由地中海行走，二月可到。若用常船，则虽走地中海捷路，亦须三四月方到。其方便可见矣。惟此船费银甚多，公司今要罢之，各商情愿捐银，仍照此法办理也。此船由英国京城起程，驶入地中海。地中海东南有一地，在南海之间，如腰带之形，相连亚西亚及亚非利加之地。海舟在此，要改般三日之陆路，过至红海，另用炊气船接进印度海。直至孟买后，可由陆路转寄孟雅刺各处矣。但此等火船，只可在外洋阔河驾驶，宜慎用于小河窄港。缘斯船中舱之底，火煮两铜锅沸水，待水之沸气，蒸入机窍内，则机关自动，机动则能使船旁两轮

，棹水转动不停，其行如飞。恐有迎面小艇，狭港相遇，则有翻倾之害，故中国可行于长江大河，难行于舟艇聚密之小港也。

《每月统纪传》曰：今西方各国，最奇巧有益之事，乃是火蒸水汽、舟车所动之机关，其势若大风之无可当也。或用为推船推车，至大之工，不藉风水人力，行走如飞，或用之造成布匹，妙细之业，无不能为，甚为可奇可赞，至其感动之理，却非难明。盖万物之内，多被热气布涨成之，虽铁条厚实之物性亦如此。近火烘热，则必涨大一些，而水力尤甚。盖水一分煮到极沸，则变为气，须千分百分之地，才可容载之兹。若将一罐以水斟满，而将盖封之，致气不能出，则水到沸时，其罐必迸裂。是水布涨之力可见矣。今以蒸水之气感动机关，即是此理也。读者看上画图，可明此理。其甲号者乃是大铁罐，用时必斟满以水，在下乙号是火炉，炎火甚炽，因煮水滚，必当有变气。罐内独有丙号一筒，为水汽所出，气过此筒则别至丁号大筒，此筒上下皆塞，惟有癸号小筒，水汽由之进，至壬号大盘复冷变回水也。其丙号筒至子号，则分为二，其一在己号，入丁号筒之上，其一在庚号，入丁号筒之下，在子号又有一扇小门，转移于己号庚号两小筒之间。此通则彼塞，又丁号筒内，有戊号一片铜或铁，密合其筒内径，而可在筒内上下。

水汽由丙筒至子号小门，上己筒进丁筒，其戊号铁片则迫下，且子号小门封塞，己筒水汽，则必由庚筒下进至丁筒，其戊号铁片，复激上至子号小门，则封塞庚筒也。戊之铁片，恒常上下，如此致所进之气，不复由己庚二筒而出，乃由庚后一癸筒出，至壬处复变水矣。

卷八十六

浙江巡抚刘片奏：查嘉兴县县丞龚振麟，于道光二十年六月，调赴宁波军营差委，因素有巧思，在营制造轮船。前钦差大臣裕谦，令督制军营一切器械，迨九月间。臣复令在省局监工，凡军器中一切应用机括之物，皆系该员督率指示。如铸造炮位向须合土为模，再行范金倾铸，而土模非月馀不能干燥，极为费手，上年冬间，雨雪连绵，模不能干，以致炮不能铸。该员冥心苦索，创为铁模，试用与土模无异，仍可源源熔铸，且事简功倍，所省工费尤多，不特内地工匠等所未知，并为西洋夷法所未有，其运施之灵，用心之细，实属不可多得。现在扬威将军，已照会臣将该员先行记功，以示鼓励。兹查出该员监造鸟枪，亦有不能合用，功罪不能相掩，是以臣声请一并交议。但其在局数月监造之器，不计其数，且多灵巧坚固，洵属劳绩懋著，即鸟枪之震落门盘，露有沙眼，亦因多加火药之故。况仅止四杆，为数无多，可否将该员应得处分，俯予宽免，奉旨准行。

庚子夏英夷犯顺，侵入舟山，其时振麟备职禾中，奉檄赴甬东，见逆帆林立，中有船以筒贮火，以轮击水，测沙线，探形势，为各船向导，出没波涛，维意所适，人僉惊其异，而神其资力于火也。振麟心有所会，欲仿其制，而以人易火，遂鸠工制成小式而试于湖，亦迅捷焉。中丞刘公开制船事，令依前式造巨舰，越月而成，驶海甚便。中丞又以炮架旧式重滞，仅能直击，与林少穆制府其相筹画，拟数千斤重器置于上，界一人之力，使之俯仰左右旋转轰击，授以绳墨。振麟得以师承其意，而如法以成，即图中磨盘架四轮车是也。辛丑秋八月，蛟门失事，省城添局制造，授振麟以铸炮事。铸炮向以合土为模，经旬累月，一模始成，一铸即废，不可复用，当军书旁午，缓难济急，且时入冬令，雨雪连绵，制尤不易。尝谋一劳永逸之计，殚思竭虑，拟以铁易土为模，而苦无成法，遂以私臆创造，模成后鼓铸便捷，旋蒙入告，并以所呈图说刊订成书。移咨沿海，同人纷索，遂复校刊是编，叙而存之，以志一时之知遇云尔，龚振麟自序。

炮始于范蠡，然飞石击人，非火攻也。元人得西洋炮轰取襄阳，后不甚著。前明中官郑和造大舶征服西洋诸国，招徕粤东通市，于是中国有佛郎机炮。兵家者言，盖缺如也。惟泰西汤若望火攻挈要秘要两卷，专讲炮法，颇为详备。然其建炉造模之繁难，甚于内地，内地泥模，层层笋合，虽较汤法简便，泥以水合，非一月不能干透。若值冬令雨雪阴寒，晴霁绝少，则非三两月不能干透。且一铸之后，随即毁之，当军兴紧迫之际，何能咄嗟而办。禾城龚振麟县丞，精于泰西算法，故制造军械，皆能覃思极巧，神明乎规矩之外，如造夷船式，炮车用四辘，可以推拽进退，车上另用磨盘木四面旋转，皆堪施放。辛丑夏，英夷犯顺，予从事镇海粮台，兼管炮局，甚虑制造之艰缓，与商变通之法。振麟拟创铁模，工匠骇为河汉，既而铸造若干，著有成法，其法至简，其用最便，一工收数百工之利，一炮省数十倍之费，且旋铸旋出，不延时日，无瑕无疵，自然光滑，事半功倍，利用无穷。辟众论之，异轨开千古之法门，其有裨于国家武备者岂浅鲜哉。道光癸卯四月上浣，东牟鹿泽长

识。

视炮之大小，约分为几节〈（或四五六七节均可，总以炮身之长短为准，长则约分多节，不必拘定）〉。合土按各节式，做成泥炮以为心〈（每节上下卯笋，须极吻合）〉。烘透接成一泥炮，使无偏倚〈（炮箍炮耳，及照星花纹起线处，悉照式完备）〉。然后用土按节，合成外模〈（照铁模本身外线做成车板于内面车旋，务令极圆）〉，烘透。每节于径线分为两瓣〈（如合瓦式须极正极为要）〉，倾铸时，从炮口一节起，首先另做成圆平土托一块〈（亦烘极干）〉。将炮口一节泥炮，倒竖于托上，次将外模一瓣亦竖于托上，与所竖泥炮遥对务准〈（中间留出空位，即系炮模地步）〉。覆用熟泥，补平烘透〈（与两边瓣缝相平直）〉。再将次一瓣合成一节，用两铁箍箍紧，另用烘透之泥圆板一块〈（周围与节周相等）〉，覆于一节之上〈（圆板与节相合，须先做成笋槽，俾第二节之卯笋可以相属）〉。板上留出铸口范铁倾铸，成一节之一瓣。亦待冰透即将先立之一瓣，轻轻退开，除净所补之泥，仍旧合好箍紧〈（每瓣相合之缝际，须做小卯笋，扣合俾无参差之弊）〉。复取泥圆板覆上，范铁倾铸，则一节合瓦式成矣。且缓出模，仍然安置不动，待冰透取去上覆泥圆板，将第二节之泥炮，接于已铸之第一节泥炮上，次将外模一瓣，续于已铸之第一节外模上，亦如前法用泥补好烘透，再加次一瓣接合，用箍箍好，上覆泥圆板，按次倾铸。凡各节层层悉如前法，次第倾成，务使相属〈（各节两瓣相合之缝，须令错落如砌砖墙之真缝同式）〉。凡每节之一瓣，须用口字样熟铁钮二个，相对嵌入，使安放有准〈（须于未铸之先，反嵌于外模里面，留出口字下脚使铁汁自为齿住）〉。以上各节铸完，即将内外泥胚去净，磨光听用，用后放于干燥处所，不可近潮气，虽用至数百次，完好如初，永无弊矣〈（若铸四千斤以上至万斤炮之模，惟将每节分为三瓣，馀法同）〉。

先将每瓣内面，用细稻壳灰和细沙泥调水，用帚薄薄刷匀，如粉墙状。次用上等极细窑煤调水刷之，两瓣相合〈（如合瓦形）〉。用铁箍箍紧，烘热，节节相续，馀法皆与用泥模同，至倾足成炮后，立可按瓣次序，剥去铁模〈（如脱笋壳状）〉，露出炮身，凝结未透，尚属全红，设有不平处所，即用铁丝帚铁锤收拾，是以凿洗之工可省。并可立出炮心，除净泥胚，膛内即天然光滑，亦不费旋洗之工矣。

一、铁模用一工之费而收数百工之利也。始造时仍先用土分段合成，较泥模工料加至二倍，既成之后，一劳永逸。虽倾铸数百次，愈久愈熟，非若泥模一铸即成瓦砾废器，是以两泥模之工之用，而作数百次之工之用也。

一、铁模用匠之省无算也。改用铁模，则泥模之工料，以及舂泥打泥板之小工可省，所需惟做炮心之匠，铸炮之匠耳。如用匠四十名，每日可出炮三位。若赶办二日相牵，可出九位。虽阴雨亦不能间阻，计算一炮之工，仅费数千文，是一炮较泥模，已省至十馀倍矣。

一、铁模用匠，可限定工程也。盖泥模须舂泥极熟，打泥板待晒干作模，又须层层用炭烘透，工匠藉辞拖延时日，督催严则倾铸时，故使瑕疵丛生，而诿于督催过严，泥未舂熟，模未干透之故，使督者无从置辞。而铁模则永无此弊，故可定限，刻期而成。

一、铁模铸成炮后，可省修饰之工也。泥模铸后，即成瓦砾，嵌于炮身，须用多工细细凿洗修饰，今铁模所铸，立刻出模，炮身自然干净，丝毫不加修饰，则修饰之工省矣。

一、铁模所铸，可省洗膛之工也。泥模所铸，非两三日不能冰透，使火气内攻，熔汁浸润于膛心胎上，出之既属不易，洗之更费工程，无论如何旋洗，总难一气光滑，不若铁模所铸旋铸旋出，火气不致内攻，膛胎出之既易，复能天然光滑，上下如镜，施放可以致远而无涩滞之弊。

一、铁模铸炮，可无蜂窝之弊也。泥模虽费，用炭火烘足，外面干透，而土性自润，一见热汁，则潮气自生，是以腾沸不已，即生蜂窝，不能坚结浑然，施放可虞。今铁模无湿气可生，无腾沸之事，则蜂窝不起矣。

一、铁模可经久收藏，以备岁修之用也。泥模不特一用即废，且开工后，必须待至一月左右，始能范金倾铸。是待一炮之成，已须经月之久。今铁模既成，目下倾铸，收利无算足，用后仍复完善如初，可以收藏，以备岁时添补修改之用。其时只须置炉做炮心，不待天时，立可范铸，二三日炮即成就，用毕复可收藏，垂之永久，利用无穷焉（如军行塞外，道路修阻，炮身重滞，搬运不易，可将炮模携带，随地鼓铸尤为便捷）。

按：制炮法，炮之一身，厚薄轻重，均有一定准则。故西法有比例推算之说，要皆以膛口空径为则，譬如一炮，约定膛口空径为一寸，则炮墙近尾处应厚一寸，近耳处应厚七分五厘，口边应厚五分（故自外观之口锐而尾丰），耳之圆径及耳之长，俱应一寸，比例相生，作为定率推步，是以炮体大而膛口亦大，故可用数十百斤封门之弹。不然，则炮体蠢然重滞，炮口窄不容拳，徒有数千斤之名。虽食药多而子力不称，安望其致远乎。若谓前法膛大墙薄，有炸裂之虞，盖未细推耳。即照空径一寸推之，近尾处厚亦一寸，计通径为三内，减空径容积得面积（六寸二十八分三十一厘八十五毫）。较空径面积（七十八分五十三厘九十八毫），已大至八倍矣。以八倍之力束之而尚炸裂，必是铁料不善，岂可诿之于厚薄间耶。似比例相生之法，为至善也。至位置炮耳，前后有四六比例之法，以轻重计之（不可以寸尺计为至要），自耳中心至炮口，十居其四。二自尾珠至耳中心，十居其五八，再以炮体围圆定上下（以耳之外圆线上切炮体之中线，则耳就下，适得其半，如捧托然）。不特运用轻捷，俯仰如意，更无纵跳倾欹之弊。

又药膛火门，亦有一定之法。炮膛内须置药膛〈（药膛径小于炮膛径二分许）〉，底圆口微敞，如茶杯里面底形〈（所重在底圆万不可平）〉。开火门须于紧挨药膛之极底处，则无后坐之虞。此工匠最难措手处，略不经心为其所误，虽制作精细，亦为废物矣〈（开火门法，铜铁各异，铜炮于铸成后，用尺内外比量极准以钻开之。铁炮先用熟铁缠丝，打成火门管听用，俟铸时安稳泥心胎之际，将火门管置于心胎尖上，极正极准，而后范金倾铸即成矣）〉。

铁模全式

泥炮心式

第一节铁模式瓣分势

第一节铁模右瓣分势

第二节铁模式

第三节铁模式

第四节铁模式

第五节铁模左瓣分式

第五节铁模右瓣分式

西洋铸炮之法，首在煅炼之工。而围径之大小长短，又须俱合算法。且药膛为炮身吃重之处，尤须坚厚得力，方无炸裂之患。是以西洋炮身，尾粗而头细。至于铜铁之性，各有不同，铜则性柔，铁则性刚。铸铜炮则工本甚巨，铸铁炮较为省费，果能锻炼精纯，即铁亦胜于铜。各省之铁，惟粤省所产者为佳。其中又有荒山，及新旧黑麻铁、洋麻铁数种。所谓洋麻铁者，系产自外洋，其荒山铁者，系在荒山采矿炼成新片铁也。又从而煅之，谓之新黑麻尖锅铁。此铁性较纯，铸炮匠工初只用八成，而用荒山新片铁七成，合熔铸成炮位，多有蜂窝，后经改新黑麻尖锅铁，加至八成，取其坚实，配以荒山新片铁二成，或以新黑麻尖锅铁七成，配以洋麻铁三成，加工煅炼铸成质体，内外一律光润，始无蜂窝之患。至于头尾之粗细，药膛之大小，亦须配造合式。其炮耳安置更要合宜，轰震可期稳固耳。若偏前，炮发则炮身后仰耳。若偏后，则炮头下覆，要在轻重衡平，置耳自宜微后，又须偏下，不宜过高，方为合法。其泥模务须焙干，否则火气下激，水汽上蒸，水汽大，则蜂窝亦多，蜂窝多则有炸裂之患，故须炮口朝上灌铸，则后尾之铁较为坚实，其安引门更要得法，若引门直大，则火气透泄，发火必迟。偏前则必后坐，其孔必须自后微斜，

前透入药膛底，不可分毫向前，烘药一燃，炮即发出而不动摇。至于炮膛为炮身之主宰，而受药之处贵乎圆坚，方免涩滞。须按围径大小，另铸一生铁药膛。其引门用熟铁打就，贯入膛底。将铁心先用青麻或藤皮裹住，后用泥滚圆晒干。先上沙浆，次用白土泥浆敷上。用木矩板限住，转圆俱合围径之数，晒干用火焙透，外用乌烟擦之。贯入生铁药膛内，上用泥条顶住，使炮心居中不移。将泥模逐层安上。其合缝处，用泥盖护，又用铁箍束住，使其不脱。用火烧红，俟冷时内用乌烟擦之，周围用干土舂实筑之，以固其模。铸时其铁水务须熔炼纯熟，去净渣滓，接续倾铸，不宜延缓间断，至满为度。俟过三四日火气稍退，将土撒卸，去其模，则炮形自露矣。更俟冷透卸下，取出炮心，再用炭火烧过，俾铁性一律纯熟，然后令工匠打磨炮身，务要内外光滑，钻通引门，刻镌字号，试验演放，响亮稳固即可合用。今绘图式，以备参考。

凡铸炮弹无论大小务要取其光圆坚实，围径尺寸须合膛口。不官过大过小则药力闭塞，恐有涩滞，小则药力泄气，弹出无力。而弹子又有数种，如实心及通心等类。大抵三五千斤小炮，可用实心弹子，若八千斤至万馀斤之大炮，近则实心弹子亦可用，远则弹子重大恐难得，力又不若，用通心弹子较为轻捷。所谓通心者，系弹子中大用下铸时即通一圆孔，用木塞住两头，外仍取圆用油灰弥补光平。譬如一万一千斤大炮用实心弹子约无七十馀斤，若通心即可减去一二十斤，分出用木塞无亦不过五十馀斤。其体轻可以击远，至于铸弹子之法，若用两模配合铸出，则中腰必露线痕，不能光滑，必须先用蜡作弹形围径取圆，再用泥包外模，上留一眼，用火焙其模，则蜡自熔泻而出，而模中自空然后从眼内倾铸开模，则其弹光圆无痕。若铸通心弹，十先作泥心一条，将蜡配成弹子圆形，再用泥包外模亦如前法，泄蜡灌铸，则模开弹出。中虚一孔，而围径亦光圆，此铸弹子之大略也。

铸炮图式

炮模式

三千斤铁炮式

二千斤铁炮式

四千斤铁炮式

一千四百斤铜炮式

卷八十七

夷炮铁质，重七百餘斤，用铜仿铸，重九百餘斤。其制火门一段最厚。自火门以至炮尾，其势渐增，自火门以至炮口，其势渐减。膛口极大而薄，火门下一段，内有药膛，较膛口收缩三分。装药二斤，封口铁弹七斤，虽七百斤可抵三千斤炮用。时林少穆来浙，出前明焦勛所葺泰西汤若望造炮之法，分火攻挈要、秘要二卷，总名之曰《则克录》。其论筑台砌窑建模诸法，似不若中国较为简便。但以炮模干透为主，而其确不可易者。如铸铕，分战攻守三等，铕身之上下长短厚薄，各有所宜。其言曰西洋铸大铕，必依一定真传，比照度数，推例其法。不以尺寸为则，只以铕口空径为则。盖各铕异制，尺寸不同，惟铕口空径，则是就铕论铕，比例推类，自无差误。战铕空径三寸起至四寸止，身長从火门至铕口三十三径，火门前铕墙厚一径，耳前墙厚七分五厘径，铕口墙厚半径，铕底厚一径，尾珠在外，其珠之长大，各得一径。铕耳之长大俱各一径，火门至耳际得十三径，耳得一径。耳前之铕口径得十九径，此系四六比例之法。火门距耳得十分之四，带耳至铕口，得十分之六。此战铕之制也。守铕一名彖铕，口下空径五寸，火门前装药处空径二寸五分，身長从火门至铕口八径。膛内装药窄处得二径，药前宽处得六径。装药墙厚半径，铕口墙厚二分五厘径，铕底厚一径，尾珠铕耳长大各六分径，火门至耳际二径，耳得六分径。耳前至铕口得五径四分，此系四分比例之法。谓火门距耳得一分，带耳至铕口得三分，盖以铕前膛宽体轻故也。以其膛口极宽，故名彖铕。彖铕即守铕也。又炼铁之法，铁质粗疏，兼杂土性，必着实烧煮化去土性，追尽铁屎，炼成熟铁，庶得坚固。铜质精坚，具有银气，须先看验纯杂若何，如法参兑上好碗锡少许，用寻常炉座，将铜熔成清汁，以锡参入化匀，倾成薄片，听候烧入大炉铸造。按今用铁必用大炉，非两日夜不能追尽铁粪，洋铜本已炼净，只用小炉熔之，半日即能浇铸。用铁欲老，用铜欲嫩，皆与之合。其铸造各种奇弹，以及提硝炼磺用炭，皆有一定准则。

又放炮近远之法，凡炮倒放只宜一度至四度，仰放自一度以至六度。盖铕用弹三四斤重者，平度击放，可到四百步。仰高一度，可到八百步，高二度可到一千四百步，高三度可到一千八百步，高四度可到二千步，高五度可到二千一百步，高六度可到一千一百五十步，若高七度从上坠落，则反近矣。诸凡放铕以此例推，西洋教练火器之制，有学教官，教授各艺，朝夕演习。十日一考，立簿册注，三进者赏，退者罚，原等者免。再次原等者责，五次原等者逐回改业。限期以一季为度，必欲造成一应器械。饭食悉资官给，亦无廩粮，学成方许教官开送武官处试演。十发而仅中五六者，止称通艺，回学再习，十发不差一者，称为成艺，收入营内，厚给廩粮衣甲，即名武士。礼仪服饰，咸旌异之。百发不差一者，始为精艺，给廩旌异，超等优示。其教官之责，即以所教武士之技艺精粗多寡以为升降。

又根本至要，则在智谋，良臣平日，博选壮士，练精神器，胆壮心齐，审机应变，自能战胜守固而攻克矣。否则空有其器，付托非人，适以资敌。其书约二三万言，

此其肯綮也。予得此书后，与龚县丞互相起发，颇得神器三昧。用夷炮堆放斤两尺寸，按原炮加一倍，自二三四倍以至九倍，均可照算。先就夷炮用加一倍，加二倍之法，作模试铸，可抵旧炮五千斤八千斤之用。计自开铸以迄八月二十五日以前，共铸大小铜炮一百二十余门。除分拨定海外，余皆摆列港口炮台。又夷炮架，炮耳以后，架若层梯而下，以便演放时测量远近高下，以为仰放平放尺寸。架下有四轮，可以拽炮进退。林制府云：其在粤有磨盘炮架，可以旋转四应者。龚县丞将炮架改为两层，下层照常安轮，下层中心，以铁桩贯之，炮耳以后仍列梯级。虽四五千斤之炮，只以一二入拨之，即可随意所向。予以英夷惯于奇正相生，水陆夹攻，应移港口内有馀之炮，兼防间道来袭。督帅以兵不足倚，恐其委而资敌也。詎知英夷觊知港口炮台层列，但以虚声攻击，而别用奇兵由招宝山、金鸡山后攻入。镇海不守，而所铸神器及架，俱为夷人所有，岂不惜哉。又曰：铜炮光滑，炮子及远，计千斤铜炮，可当三千斤铁炮之用。但铜炮一放，则浑身热透，难以连叠施用，而铁炮则一时不能红透。惟在铸之精细光滑，使与铜炮同功，则善矣。

又曰木炮用坚木为之，长丈二尺，膛三寸，外围口厚三寸，底厚五寸，形式一切如铁炮之式。剜木心，两面合成，圆围用铁觚十三圈，铁圈外再用毛竹包裹，以麻绳绞固，装药斤许，或装大铁弹一枚，或装铁条十馀皆可。共重百馀斤，四人六人，皆可抬放。每炮可连放数次，每放一次，刷矾水一次，即所谓抬炮也。或施于山谷之战，或沙漠难运重炮之地，似较铁炮为便利。

臣前次奏时，仿照洋炮之法，制备应用等因，谨已捐资集匠，将现有之炮位，先造转轮车架，以利推运而便旋转。又封口炮子一项，向来俱用实铁弹，于致远攻坚，已属得力。但一炮只毙一贼，多亦不过数贼而止。臣曾见洋炮有空心弹子之法，名为炸弹，因密授匠人做法，即在臣行署，督令试铸。虚其中而留一孔，此中半装火药，杂以尖利铁棱，仍将其孔塞住，纳于炮口。将孔向外，一经放出，其火力能到之处，弹子即必炸开，弹内之药，用磺较多，可以横击一二百步，其弹子炸成碎铁，与内贮之铁棱，皆可横冲直撞，穿肌即透，遇物即钻，一炮可抵十数炮之用。近日铸成试放已向远处裂开，附近民人观者如堵，不知所用何法，而竟诧为未有之奇。是此种炸弹，实为行军利用。现就炮口尺寸，多制土模铸造应用，其前派游巡将弁，叠据禀报。自旧腊下半月至今，各于沿山隘口，逐加搜捕实已全无贼踪，即荒僻山梁，积雪深厚之处，亦无人马行迹。臣复密加查访，均属相符，据兵民僉称，总因炮火猛烈，贼番闻风远遁。

一、攻夷宜用炸弹飞炮，方足制胜也。伏查夷变以来，历见各省章奏，虎门厦门宝山，皆为夷船飞炮所溃。其炮弹所到，复行炸烈飞击，火光四射，我军士多望风胆裂。其实夷船亦不尽飞炮，大抵攻坚城，沈敌船，则用实心之弹。惊敌阵，溃敌众，则用空心之炸弹。而内地大炮，则惟有实心铁弹，故止能透一线，洞一孔，而无益于行阵变化之用，有正无奇，非善策也。惟飞炮炸弹之法，内地罕见，多骇为神奇，不知如何制造。道光二十四五年间，剿番青海，曾随林制军讲求火器，师心创

铸，居然造成。曾经演试，其弹炸裂，飞击远到，边方聚观，无不骇异。且其弹浑成铸就，较之洋夷飞弹，用两瓣合成者，更为圆巧适用。曾经奏奉朱批嘉奖在案。其弹椭圆，有如鹅卵，其法以泥为外模，复以泥为中胎。其泥胎中，先藏尖利锥刀碎磁等件，复留上窍，以便铸成之后去泥入硝磺入毒药。大约二斤之弹，须空五六两，六七斤之弹，须空一斤有奇，余以类推。装药填实之后，仍与实心弹同重，则以椭补圆之故也。浑圆之弹，轻而寡力，故放出不能及。惟椭圆力重，到远始炸也。其入药宜磺多而硝少，以硝性直出，磺性横出也。弹皮不宜过厚，亦不宜过薄。厚则药力不能炸，薄则药先炸而不能及远也。弹所到处，其弹皮固炸裂四散，而弹心之尖锐锥刀，亦复横穿直透，且毒烟所及，人皆晕倒，火光所射，众皆溃骇。数弹落营，而阖营皆乱，一弹入船，而全船可破。声如霹雳，势如鬼神，实为破敌奇器。伏查近年办理善后以来，所造防江大炮，身笨膛小，虽七八千斤，不过抵三四千斤之用。不若将此炸弹多造，装入配用，则炮虽不可改造，而弹子易于得力，亦足以挽其弊。

一、水陆战炮重笨，扛炮受子无多。宜改制以小受大之轻炮，方能利用也。窃查整顿水师之要，总以船炮为先。而内地江船，断不能如海船之坚大。至于海运沙船，虽系行海，亦非战舰。即一二千斤之炮，亦难施用。而抬炮之力量远近，又仅与抬铳等，故无以御海贼。今日欲反其弊，必须讲求炮制，使能以小受大，以轻胜重，以短及远，简便灵动，庶几一炮抵数炮之用，小炮同大炮之长，足以收克捷实效。飞炮炸弹，固为制敌奇器，但大弹必大炮方能容受，止可施于守城。守炮台，而不能施诸战阵，可施于大海船，而不可施于中号小船，犹未足征利用之效。因又讲究小炮，可容大弹之法。不用铸造而用打造，不用生铁而用熟铁，方能使炮身薄而炮膛宽。缘生铁铸成，每多蜂窝涩体，不能光滑，难于铲磨，故弹子施放，不能迅利。至熟铁则不可铸，而但可打造。其打造之法，用铁条烧熔百炼，逐渐旋绕成圆，每五斤熟铁，方能炼成一斤，坚刚光滑无比。初次制成小炮二位，一重二百斤，一重一百六十斤，二百斤者，可容二斤有零之大弹，可抵千二百斤炮之用。重百六十斤者，可容一斤十二两大弹，可抵千斤炮之用。虽不能以一当十，已可以一当五。因又精益求精，再仿制百二十斤小炮一位，百斤小炮一位〈（以上小炮现存江南城守营）〉，而其膛可受大弹，仍与前两炮等，竟可以一当十矣。炮愈轻，工愈精，力愈大〈（炮轻力大，则其架必须稍大，或压以沙袋，庶放炮时架不扬起）〉。铁经百炼，永无铸造之炸裂。施用灵活，尤胜巨炮之笨重。弹子飞出，到远四炸，又足以惊敌营而裂贼船。一人可以挽放，两人可以扛抬。小车小船，皆可运载。即施之陆战行阵，亦可进止自如，摧坚破众，较之生铁铸成，身厚膛小之大炮，其用广而效大，治不可同年语。即较之抬炮仅受弹子数两者，亦得力十数倍。

再大炮惟用诸战舰，而不便于陆战。现在江浙所制炮车炮架，亦止可施于沿海近岸，而西北平原，列阵驰击，尚非所宜。冕曾随林制军剿番青海，创制陆战炮车，仿轿车式而略小，不用木箱，而用生牛皮，以铁架撑之，倒安威远炮一位，内用抽屜，分藏火药炸弹，其箱内可放衣械行粮。驾以一马，虽沙陆之地，皆可长驱而进。

临敌则卸马用人，以后为前，两人倒推而进，连环开放，一如排枪之用。地狭列小阵，前环十馀车。地广列大阵，前环数十车数百车，连环施放，间以抬枪弓矢，夹护左右。我军既有凭恃障蔽，心定胆壮，敌军莫能犯。夜间下营则以数百车环列向外，即成营盘，可代鹿角。历来讲求车战者莫善于此。东南各省，不能车行者，无所用之。若天津沿海陆路，伏地雷数层，迎敌于前，遥列车炮于地雷之后，敌至则先点地雷，后开车炮。而官兵大队之鸟枪抬炮，又在车炮之后，此万全必胜之策。宜于平时置备，庶金汤巩固，而人心安堵矣。

或谓空心炸弹，长于横击，至攻坚直透则不如实心弹之有力。曰有此轻铁宽膛之炮，则实心大弹亦可用。但其弹亦必用熟铁，而不用生铁，用打造而不用倾铸，方可光圆滑溜，与夷弹相等，以百斤之轻炮，而可容二斤之实心大弹，亦胜营制炮弹得力良多。

制法

一、磨盘炮架。须选极坚极燥之木为之〈（榆槐樟柳皆可，惟松杉枫不可用）〉。按炮规，定俯仰，分度数。梯铁什件，更宜浑坚吻合。其机巧在一枢心〈（即图中磨盘头中心）〉。两滑车〈（即辕木所藏铁轮）〉，配合时，务须度取炮身轻重之中心，以辕木上承炮耳处为准。则下布枢心滑车为犄角势，使轻重持平〈（此最要者总在炮耳之前后，轻重相匀，不特运用轻捷，而施放时，亦无坐跳之弊）〉。虽重至万斤，以一人之力，即可旋转轻捷，指挥如意。

一、四辆炮车。辕木车轮，亦须坚燥木料，其机巧在轮轴承辕木处。视炮轻重之中心，亦以辕木上承下处为准。俾推挽行走，及停轮施放，头尾轻重相适，无欹斜之弊，运用始能轻捷。

语云“工欲善其事，必先利其器”。神器为克敌制胜之首务，若置如磐石，止击一敌，即敌适入于的中，亦仅一击而已。焉望其指挥如意，所向披靡耶。今考重学引重法，制成枢机二式，畀一人之力，可以旋转如圆，随向轰击，一磨盘为战舰，为敌台，为城关攻守之具。一四辆为行阵，为隘口，为奇仗夹击之具，纵敌如潮涌，靡不克捷。

磨盘炮车全式

磨盘炮车底盘分式

磨盘炮车左右辕木分式

磨盘炮车横档及铁什件式

四辆炮车全式

四辆炮车分式及铁什件式

四辆炮车轮轴分式

大炮用滑车绞架图

炮法贵乎精，又贵神速便捷，则单架之法，不可不讲。如八千斤至万斤之大炮，其炮架须用坚木制就，架之前后两傍，用粗铁环各二个，前面炮门，下用橧木横限一条，镶入石壁内，上亦安粗铁环二个，后面安绞架一具，左右立二柱，上架绞架横木轴，二柱之下，亦安二铁环。另制滑车二对，前面左右各一对，每对两个，前滑车内连镶二小轮，后滑车内镶一小轮。俱钉用铁环，配用光滑油绳，如欲推出。将左右前滑车一对，钩在炮门横限上二圈内，后滑车一对，钩在炮架后环内。然后将二绳引于绞架之上，绕之以手，用力绞转则炮自然前进矣。务使炮头伸出炮眼之外，方可施放。否则恐轰震炮墙。如欲挽回，将后滑车钩在炮后木柱二圈内，前滑车钩在炮架前面铁环内，前后互易而用，将前滑车二绳，引于绞架之上，绕之如前，用力绞转则炮自挽回矣。将炮门掩闭，用湿透炮刷子扫净炮膛，然后下药，用木棍送入膛内，次下弹子，又用扎就麻球。如膛口大小塞入膛内使药不四泄，弹出有力。装毕再放，放毕如前法挽回，再装连发。四五炮后，须少停片刻，以防炮身透热。其炮台下，石板须铺平，磨细使其光滑，车轮行动无碍，方能轻便。大抵三二千斤之炮，只用滑车，即可扯动，无须绞架。盖用滑车一副，人力可省三分之二。譬如八千斤之炮，架有四轮，按一人扯一百斤计之，须用八十人。如用滑车，只须二十四人，即可扯动。若再加用绞架其省力加倍，只用八人绞之便可轻轻行动，是用力省而成功多。如欲使炮高下左右，用坚木棍撬起，垫之挪之转之不过二三人之力足矣。至于战船上炮，尤宜仿制车架。现在粤省内河各台，均经安用滑车绞架，其新修战船亦俱安设滑车，演放甚为得法。若仅以木棍撬转，不特多用人力，且重而难移，而炮架时被撬动，不无损坏，究不若用滑车绞架之灵便得用也。今绘图于后。

仿制西洋举重滑车绞架图

前图所论，用滑车绞架之法，系就平地扯炮而言。且炮架下又有四车轮转旋，故易于运动。至若凭空举重，如大炮上架等类，则其轻重悬殊，与平地迥不相同，尤须藉滑车绞架之力方可举起。是以两器互相为用，其力更大，单用则其力倍减。大抵重物空悬，有垂压之势。滑车绞架并用，则纵或脱手，其绳必不能骤开，免致下坠。即如粤省现制三万斤大铜炮一位，其质体甚重，难以举动。曾令工匠仿西洋滑车绞架式，制就一具，如法举起，挪动上架，甚为便捷。大凡制造滑车绞架，必须用坚木为之。大滑车外加铁箍，复加粗钩，内镶三轮，或二轮不等。又制举重绞架，

每具用坚木柱三根，头尾包铁，下安铁锥，使著地不移。上贯铁横梁箍住，中悬一铁环，使三柱上合而下分，支撑左二右一，如鼎足而立。其左柱二根中间，用横铁条一道以限之，使其稳固。下安绞架横轴，以便运动，旁附铁齿轮一个，形如菊芷，外圆内方，贯入轴端。上垂铁尺一条，其形如凿，轴顺转则无碍轮形，若逆转则格住轮齿，轮便不动，绳力不懈，使其有进无退。此制器之最巧者也。如欲绞起大炮，前后各置举重架一具，先将三轮滑车钩住上铁圈，下二轮滑车钩住重物围绳，每架用十余人力绞之，后用数人扯住绳头，以免滑脱。若后面再用一绞架，更省人力。此现制滑车绞架之式，考诸西洋人南怀仁所著《灵台仪象志》内载运用滑车绞架各图说，大略相同。

附大滑车图

此旋转活动炮架，又谓之磨盘架，用坚木制就。凡交接着力紧要之处，皆镶铁板以固之。所有一万二千斤、八千斤大炮，须用此架，方能灵便。而其工价较巨，视炮之大小，酌量配架。架分上下两层，其下层比上层四旁略大，上架下藏生铁辘轳小轮，左右各三个，下露十分之二，联络下架，合而为一，进退旋转日易。架之前后安二铁圈，为施滑车之用。内有十字木，前后二道，前一道安铁磨心，须要坚粗，贯于上。架旁及后面有二沟，其周围下镶铁板以利轮行。此二沟皆承上架，辘轳铁轮，得以左右旋转。上架前有横铁枝一道，横木四道贯紧，旁加大钉贯下之，使坚固不脱。其前横木二道上下相加，中心铁板包固。中有一孔，对人下轴，如磨之有枢而旋转之，全在两旁辘轳。铁轮三个，加以架旁四孔，插木棍推挽之，故觉灵便。如万斤八千斤大炮，只用四人可推旋转左右，甚不费力。现在粤省炮台各大炮，均制此架，甚为得用，今绘图于后。

旋转活动炮架图

门者所制炮架，木脆而轮细，不堪演放。兼且迟重难移，匠人惟知有轮必转，大小则一。殊不知轮大则轻快，小则重滞，有天渊之差也。试言乎舟上绞车中安一枝绞柄，其长三尺以绞重物，如重一千斤，手自绞柄之末，用力绞之，得一百斤之力，原有定额。若移而至一尺五寸之处，其用力必当三百斤，再移而至于一尺则甚重，或至五寸，则任出多力而不动矣。以此比轮形异而法同。今之炮架制轮，必当配合，庶得轻快便捷。如架长六尺者按十分之三折之，配轮径一尺八寸。架长四尺者，配轮一尺二寸，余可仿此。内外加镶铁箍，如恐大木难求，二三片合亦可用之。如此则架上安炮，用力十分之一，可扯之行。若用铜铁制轮，又再加轻，每百斤用力三斤八两而已。又如制滑车之法，如图仿制一对，上轮比下轮递小，酌量绳之大小。而留其窍以穿绳，以不压下绳为度。每个内藏小轮三个，逐窍如式，穿络麻绳扯物。如单用一小轮，一百斤之物，用力四十七斤，二小轮用力四十斤，三小轮用力三十六斤，四小轮用力三十三斤，五小轮用力三十斤，六小轮用力二十五斤。如扯万斤亦依此算法。假如大炮一位，重八千斤，落架用力八百斤，再用滑车一对，内

藏六小轮，止用二百斤力扯之。又再加绞架一个绞之，得用力二十斤。绞架之上安二绞柄，其一插入轴中，上下对分，长与绞轮之全径等。旁安之柄，长与绞轮半径，均右手对拨柄拨之，或对绞柄绞之，又或对绞轮扯之。此三者力均十分之一，另上一枝绞柄，上出轴心过半，而手由柄木绞之，则倚轻。若由后复用一绞架，纠缠手中所扯之绳，又再用力十分之一，闻者不之信，观于时辰理。机械内藏大小四五轮，下悬铜葫芦重至七八斤。逐轮牢连，递相减力。至摆尺之际，以一小箴阻之，可止七八斤之力，于此可知也。又如撬物之木柄长七尺，撬物百斤，过物至地平之上一尺二寸，手对二尺之处举之，用力一百斤。举至三尺，用力五十六斤，四尺用力三十八斤，五尺用力二十九斤，六尺用力二十四斤，七尺用力二十斤。又如挨磨轮轴面径一尺二寸，亦用绞柄长七尺，穿入窍中一尺二寸，手对二尺之处挨之，用力一百斤，对四尺挨之用力三十八斤。其轻重等第与撬柄同。今将移大炮之高低，用六尺之撬柄，其轻重与六小轮滑车等。二者取便，皆可择之。至于滑车之用，不但轻快兼且敏捷。观象台仪器重数千斤，窥测星辰，转运不容以稍缓，皆恃滑车功力。不然夜测星辰，四分之久星已移度，而测炮犹测星辰，不容稍迟。独八千斤炮位，非滑车不能便捷利用，小者可免耳。

卷八十八

前代制炮之法，原于佛郎机，佛郎机即佛兰西也。初佛郎机与巴社回人战，制火器大破回人。回人不知其名，遂以其国号名之。上古初未有以炮战者，至北宋广州始效其法。西洋制物恒遵勾股，立表测影，期于必合。夷炮之多中者，非恃千里镜也，其制造演放皆准乎法也。曾游海外诸邦，遇精于数学者，辄为咨访，且闻其制炮演炮，动合度数，心窃志之。今者英夷肆扰，率土共愤。而水战莫先于火器，谨即素所见闻者笔之于书，以备当道之采择。如图所绘炮形而论之，以小挈大，以寸作尺，以尺作丈。如炮重二千斤，身長五尺，尾径一尺，头径八寸，口径四寸。设若用刀切为上下两半截论之，弹发出去，必由中间一线直出，不待智者而后知也。其下半截可置弗论。而上半截尾径五寸头径四寸，以五尺之长而尾至头已差一寸，犹目中所视上面之靶线，与炮中所发下面之弹线出至炮口，渐合一寸。若出至一丈，渐合二寸，发至二丈五尺，已合五寸，则靶线与弹线已相交会合。发至三丈，则靶线转在下面，而弹线反在上面。两线相距已差二寸，由此而渐远至一百二丈五尺，弹与靶上下已差二丈。又如佛山所铸生铁大炮，身長一丈，尾径二尺，头径一尺四寸，切去下半截不论，而上半截尾径一尺，头径七寸。以一丈之身而尾至头，自上面之靶线，与下面之弹线，渐差三寸。若二丈则渐合六寸，至三丈三尺三寸，渐合一尺，则靶线与弹线相交会合。再发去四丈三尺三寸，则靶线又转而在下，弹线又反而在上，两线相距上下已差三寸，至一百零三丈三尺三寸，上下已差三丈，若至二百零三丈三尺三寸，则差六丈。如弹发至四里，每里约一百丈，计共四百零三丈三尺三寸，则上下积差十二丈三尺三寸。如再铸之中铜炮重三千斤，身長六尺，尾径一尺二寸，头径九寸五分，至四里亦差八丈。如欲中他船底，而弹反高越桅尾。不论大小炮位，皆有高越之差，此法按图细心检视，了如指掌。为今之计，已成之炮，不论万斤至百斤，各先度尾之径若干，尾之径围若干尺寸，于炮头制一干坚木圈，周围与炮尾一样大，不容毫发之差。将木圈套附炮头，与炮口平齐木圈勿伸出，便符勾股度数，如此则自引门后正中一线直视至炮头正中，与敌船相对，然后施放，虽使童稚，亦能中的矣。或恐木圈经久销缩，有破裂之变，则用铁板镶固，虽久不坏。而新铸之炮，立令匠人于炮头外皮渐渐加厚。如花瓶口围至与尾一样大便合用矣。至于炮头上面正中，要起一珠为表，炮尾大围之处，上面正中，亦当起一珠为表，与前表相对，更为细微。如前有珠后无珠无可相对，反致生疑。不如前后皆无珠，较为妥协。久而精熟，得其变通，制造演放，动中肯綮，克敌制胜，可操掌握矣。

◎炮圈图说

按照炮头之圈，如式制就，束之炮头，勿紧勿松。制法内外圈务要极圆，内圈居中，勿偏四旁，方合度数。兹又绘副圈图一个，形属三角，高与圈厚等，后稍放长，前后皆要刻一线痕以为中标识。用时方不偏斜，如恐一时木圈遗失，或逢损坏，则用此三角形缚之炮头，由引门后上面正中，向炮头上面正中，直视对绳然后开炮，

其法亦同。其照视之法，如炮图后，人目所视，前后均平，如水面，向敌直去为度，如使前后高低不均，致有微差。已成之炮，加此木圈，已合法度，若再加珠为表，其法益密。绘明珠式，以便安置。前珠可钉在木圈上面正中，后珠可安在引门后上面正中。安后珠之方法，如铜炮可钻一螺蛳窍，旋转入窍；如是铁炮坚刚难钻，可用松香煮蜡粘之，或用牛皮胶均可，如恐脱落，再粘亦易。测准之法，如式由两表尖峰对正，均平为准。

总之已成之炮，不外加圆木圈及三角形二法，未铸之炮，不离头径加大如花瓶口，头之围至与尾之围等。前后如图安珠为表，斯为万全。夫制度之法，必当因时变通，整理合度，以垂久远，似乎不必拘泥旧章也。果能如是，则虽有夷炮百种新奇，不出此范围之中。

◎佛郎机子母炮安表式

制炮始于佛郎机，故回人谓炮为佛郎机。今中华，惟子母炮尚存旧号。粤人谓之搭提，闽人谓之板槽，以其身有一槽，中加铁板塞紧，各以其意而名之也。大炮而外御寇破敌，无逾于此轻快便捷，顷刻可叠发数出，连环不断。兵录最取此种为第一。得力惟当安照星，照星即立表也。盖其腰间广大，无可作准，必当如图立表。如头径四寸，尾径五寸，则尾径大于头一寸，对半折之得五分，则头应加高五分。今头上立表高二寸，而尾后立表可高一寸五分。前后表各制一小孔，如管中窥物状。从二小孔窥之对靶直击，发无不中也。今之子母炮，多不立表。立亦不符尺寸，演放不能十分准的。未制之子母炮，切不可不加表也。如已造就，亦可安之。

◎中西用炮论

凡中西大小炮位，自五百斤至五千斤止。每百斤用营制火药四两，而炮弹用薄棉先裹，外加红布包缝周密。用广东排钱尺，引绳度地。炮头加三角形，炮口高一度半，平放演试。不拘大小炮位皆至百丈便坠地。即试八千斤炮，远亦如是而止。若不包棉，不包布，炮腹不满，药力旁泄，兼弹子与炮腹相磋，涩而不滑，则尚不能及如是之远。观于木喷筒，吹泥弹，满腹则力大而远，弹小则气泄易坠，理甚易明也。若欲使弹强发百丈以外至百五十丈，先于彼处立靶，然后此地安炮，向天边空际高六度半放去，则能至百五十丈之远。如向空廿度至三十度高击去，可期二三里。然弹线如弯弓，不能径直，斜坠而下，虽远无用，万一能中，亦已无力矣。世俗传闻之说，谓大炮响如霹雳，声震三百里，弹子可击三四十里，一遭轰击，山崩地裂，屋宇被击，坍塌平地，此皆未经演试之谈。殊不知炮响小大一样，极大者声震五十里。大小炮皆发里许。击沙袋击山麓于百丈远，仅入土三四尺而已。惟至五六十七十丈之处，入土六尺至八尺之深。击砖墙仅洞穿一孔，连透数重墙壁。击三合土墙，则坚不甚坏，惟击石则碎裂。击杉木船只可穿三四重。若牛皮幔紧，亦可穿五六重。悬牛皮间网纱七八层，三十丈还不能贯穿。若击夷人战船，坚木厚三寸者，

可贯穿二层，太远则不入。至力穷之处，席帆不能穿，惟染灰迹而已。所以夷人交锋，如在一里内外，不甚开炮，必在相距五六十丈极八十丈之内，彼始开炮，十可中七八也。若至一里之远，弹子多坠无力难准。虽可加高相补，究是无力。兼夷船上炮式不长，皆自二尺至四尺，最长七尺止。六七尺者发多中，三四尺者，弹虽到靶，或高或下或偏，而口径二寸至六寸，此外未见矣。其弹子所至亦仅符一里内之用。今就英吉利佛兰西亚墨利加三样炮式，与中华生铁炮铜炮同用营药演放，比较远近相等，独是药料较胜，坠数较减耳。我军若不惜加费，再加工料，均是一样得力。何必拘执用彼藤炭法，惟是彼船在洋，进退活动，且娴习日久，熟知炮性，击八十丈以外，炮口加高，量高补坠。有量天尺插在炮口，以定远近。加高度数，折为尺寸以补坠数，兼炮架活动，上下四旁，多系滑车，轻快便捷，皆中国营兵所不习。即彼此炮弹远近相均，尚难制胜，而况药有美恶乎。今当铸就新炮之式，再加长腹，用上料火药，光滑大弹，炮身漆绿色安置树林青草间偃旗埋伏，使彼千里镜不能窥出安炮之处。而我军远窥测准，乘其无备必可制胜。更于波罗浴日亭向狮子洋之处，就地铸就，每位二万斤三万斤长大大炮四位，安置向外远击。此处设哨屯兵，稽查奸细，时刻戒严，以制其大艘内犯。然其施放亦必待一里以内。盖炮腹愈大，用药愈多则其弹子亦随之递增重大。所以大炮击远仅能与小炮均，非大炮及远小炮及近也。譬如射箭，大小弓箭相差不远。弓大箭大而镞亦重，其射远仍是六十步，即如子母炮虽小，亦可至百丈也。

凡立靶演练，只可度地五十丈及七十五丈，先将此二靶试准，再立百丈之靶，终日如法演练，无不多中。若如燕塘立靶之处，自平地至半山脚，靶比平地加高四丈。其远百二十三丈而试靶平放不能到位，必当斜向靶上空际，用量天尺自地平测至高六度半，计十有四丈，演放坠落，方在靶上无异。即夷人放天炮，不惟无准难中，而中亦无力。凡弹子所去至百五十丈，已渐低落，如强弩之末不能穿鲁缟也，必当以百丈内为用。按算所坠若干，加高相补。如测视红心至百丈，加高二丈四尺亦可中。此外即不可用。若新更加长火药顶真，定可加远，不在此论。燕塘演练，虽年年有期，无如立靶之处，高县半岭四丈之高。演放惟认前面山石以为标准，使有素习此处地势者，炮准加高，亦只能中此处之靶，若移之他处，或使击船，固执旧方，诚有万难。且旧制炮位，头小尾大，多有弹子差高每至三丈左右。姑作绝长补短，以坠下抵高越。殊不知坠下之数，比高越之数有不同。且高越有限度，而坠下无垠涯。旧制即使可用，以高越之数补坠下，在百丈以外，姑许其中，若在百丈，高越三丈，而坠下只二丈四尺，相除尚高越六尺。如敌在七十五丈，高越二丈二尺五寸，坠下只一丈二尺，则相除高越一丈零五寸矣。如敌在五十丈，高越一丈五尺，坠下只七尺，则相除尚高越八尺矣。敌在二十五丈，高越七尺五寸，坠下二尺，则相除高越五尺五寸矣。更加测视者多照不到位，高越愈多，使现敌人交锋已久，尽知其弊，所以迅速直迫而来，使我利器竟成虚设。试立一靶远五十丈，用旧制炮位，不加圆圈，不加三角等法，与之测视正对红心，定必高越成丈无移。此法与西法相同。宜制三角准头，练试准绳，使知炮药弹子之性，相距道里远近，量高补坠之数，则发自多中。

至于旧法测视数端，有用锡片钻三空，安在炮尾上面窥之者。有用木版二片各开二孔，前后悬葫芦者。有或悬垂珠，分安前后，二形相切，对线演放者。此二式谓之星斗，仅可以定偏正，而不可以定高低。惟有用竹管窥者，不拘定对靶，能知变通，上中下转移，斯可权用。今燕塘立靶之处，急宜改移进前廿三丈，木靶加阔加高各二尺，便合演练。而五十丈及七十五丈，为对炮之常经，更当演熟。不然纵使此处练至百中，移至他处则不合用矣。或问既能平放百丈，何以不能斜放向上百二十三丈之远，何以加此二丈之高，二十三丈之远，即如此大差乎？假使敌据高台，我岂不能高中乎？不知弹子出口，其力甚刚，设若击炮台上，当在地平斜，斜向上六七八十丈之远，弹子有力，始能得中。如至百丈以外，是谓强弩之末，再欲使其就下之重体凌空勉力而上，譬诸少年之人，血气方刚，登山甚疾，老大气衰之人，平行尚难，何况登高。以人喻炮，物理可推也。

至若击夷船之法，夹板船上，每桅三节相续，全靠左右偏摘摘紧，前后四桅牵连，相依为用。若击坏空中桅盘，四枝摇动，宽松倾侧，不堪驾驶，必当退出修理。又最忌攻击尾后，因多窗棧，木版脆薄，一击裂散。若火轮船上面与夹板无异。惟身加长而无中桅，内藏机械，包裹蒸气处处紧秘，张缩冲动，经过各轮，始达船旁。激水大轮，其质薄轻，始能越浅水。故易于击坏，坏其一机，则蒸气泄出，不能行动。击破烟筒，则满船昏暗，迷目难堪，若坏其长筒，则当驶回外国，方能修理。观彼船上，惟安头尾两炮位，每重千馀斤至二千斤而止，其脆薄可知也。惟测视攻击之法，尤当变通。其夹板顺大风日夜行六百里，火轮船顺逆流昼夜行千二百里。以时辰表与人脉息呼吸，较准推算，人脉一呼一吸之间，二船皆行二丈二尺。夹板船逆风对我军面前经过一呼一吸，船行一丈。如对面前斜去斜来，一呼一吸能行七尺。其炮自点引门，一呼一吸始响，又一呼一吸弹始到，攻击时当如数按算，加量进前，则不大差。

至防夷船桅炮悬放之法，彼船桅盘上所安小炮甚长。自高击下，其势倍顺，比之地平演放倍远。炮台内火药，宜藏僻处，以防火弹坠落。其炮台内兵房，比墙宜低四尺，倒水倾落房后，使无所施。其大夷船桅安炮之盘，约高四丈，距台十丈，用勾股法推算，似编中长房曲折，及圆形二台，前墙高一丈二尺，后面兵房高八丈，桅尾弹击来，皆落后池矣。

压炮之物，向多用砂袋，重至五六十斤。演时炮身或退后或仰起，惟有五谷一压不动。计用红曲米一斤，小麦十二斤，绿豆二斤，芝麻二斤，粟十五斤，用红布袋盛之。演时先入药弹舂足实，测准即将五谷压在炮耳适中上面，然后点引门，响后用麻扫浸水，洗尽灰烬，方可再演。凡撬柄扒扫引门，锥水桶尖方炮枕，一切演放之具，皆当备足，庶免一物不备，临时束手无策。

以上所陈弹子，自二十五丈五十丈七十五丈至百丈四处坠下之数，系就中上营药为率。若用上料好药，则坠数较少，而下等之次药，其坠无所底止，皆不在此论。

◎用火药法

中华炮式，如炮身重每百斤，用火药四两。如夷炮四千斤，乃四千磅，实重三千斤，用药七斤八两。中有身短而口大者，则加用十分之二亦无妨。惟演放时听声用药，临演之际，预用红布袋，每包二斤，或三斤，可以写明，用时送入炮腹逐包舂实，用引门锥，用力插看，以实为度。

◎用炮弹法

凡炮口配弹子，以九折为率。如口径六寸，配弹径五寸四分。口径二寸，配弹径一寸八分，馀可仿此。试弹之法用铜板，或纸皮规一孔周围符之，便知圆否。又当光滑，腰间一线，宜敲平贴，先用薄棉裹之，次用木红布包缝，周密送入炮腹。大弹入后，加群弹一包十二个，每个就炮口之径二折。如口六寸，每弹径一寸二分，口二寸每弹径四分，馀皆仿此。群弹已入，再用旧麻绳解散扎成圆球，与炮口紧合，再舂入炮腹，使弹有力。自高击下，亦不辗出。弹勿过细，恐泄气无力，不能及远，或偏左右。

◎经试坠数

升平日久，向来大炮入弹演练，亦非常事。而放亦不求其中，中亦不知其差高之度，与坠下之数。今独立靶高一丈二尺，阔八尺，上画横线，日日演试。细验弹至二十五丈，坠二尺，至五十丈坠七尺，至七十五丈，坠一丈二尺，至百丈，坠二丈四尺止。此外至百十丈，坠三丈二尺，至一百二十三丈，坠十丈，皆不合用。兹特据实数汇列明晰，以便逐处加高补坠，不论远近，皆有准绳。

◎测准亦有不中论

凡演练大炮，必当炮好药佳弹圆，其架便捷，架下地方平坦，不偏左右。安靶之地，不宜太高，亦不可过远，有一不合，便不能中。如炮已旧，腹中生锈，凸凹不平，引门宽大，演放无力，或引门在炮腹底面进前二三分者，必能退撞，并有一经演放，炮口仰高，或连架跳起，或偏左右以致不中，此可加米压重。亦有火药不纯，打不到靶，炮弹不圆及过小者，或腰间起线不平炮架不得其宜，地有不平，炮身欹斜左右，偏左者弹必偏左，偏右者弹必偏右，皆不能中靶。若四者皆得其宜，发无不中也。

◎中华用炮变通转移法

西人铸炮用炮之法，极尽精微，不同于中华之草率。若示华人以西法，在智慧者一闻晓畅，其不解者，必谓历来演放，皆如用鸟枪打鸟，但用目力由尾视头对靶，何

尝不中乎。不知大炮，与鸟枪大有不同。鸟枪所击只十丈，而头小尾大，至十丈只差五六寸。入弹又非一丸，故所差不知。而大炮之差，则动论寻丈，必知变通转移方合演放。若就数种度数不同之炮，执定一样演放，安能命中。即如用竹管窥视一法，较之各款星斗较为相近。然当有分上中下转移之法，方能中靶。若执定管窥，不知转移，难期多中。转移之法，先将炮位度量，如身長八尺，头径一尺一寸，尾径一尺五寸，比头径大四寸对半折得二寸为母，以身長八尺为除，除之每十丈弹子差高二尺五寸。如相去五十丈，差高一丈二尺五寸，如弹坠七尺，尚差高五尺五寸，如用竹管欲打红轮正中，当测视红轮下五尺五寸，六折形三尺三寸。若打七十五丈，弹子差高一丈九尺，此处坠下一丈二尺，弹尚差高七尺，此处五折半形三尺九寸，竹管当向红轮下四尺左右。又如在相去百丈，差高二丈五尺，坠下二丈四尺，相除尚差高一尺五折算，形只五寸竹管当向红轮下五寸。亦有每百丈差高一丈八尺者，在五十丈差高九尺，扣坠数七尺，尚高二尺，六折算，形只一尺二寸，当向红轮下一尺二寸演放。如相去七十五丈，差高一丈三尺五寸，扣坠下一丈二尺，相除尚差高一尺五寸，六折算，形只在九寸左右也。当向红轮下一尺左右便合，如相去百丈，差高一丈八尺，而坠下二丈四尺相除尚多坠下六尺，五折算，形只三尺当向红轮上三尺演放。均是佛山新铸炮位，而测视有上下之不同，使执管窥之见，将前炮与后炮一同演放，均是百丈之红轮，前炮向下一尺，后炮向上六尺，其上下之差计有七尺，诚有天壤之别。凡用竹管者能如法转移，便与所用三角形相符。

◎西人铸炮用炮法

西人铸炮，其铁皆经百炼熔净。先用蜡制成一炮，丝毫无异，次用泥封密阴干。铸时用火烘模开孔，泄出蜡油，然后将铁灌入，四五日后，始开模取出置之荒野人迹不到处。将炮实满火药，用长心引火绳一点，各人尽远避藏迹，一经炮响腾跃空中，跌落不坏以不炸裂为度，使无后患。其铸法合度，多以引门上长方形为表，或安头上或安尾后，或头尾皆安，亦合度数。而火药较之中华，又更精细。坠数较减，如中华火药至五十丈弹坠七尺，至百丈弹坠二丈四尺，用西人火药五十丈坠四尺，百丈坠二丈左右而已。其弹子乃用蜡模铸就，浑圆如地球，腰间并不起微线。演时或用千里镜，或就引门测视对靶，自一十丈至百丈左右，皆有逐处加高补坠高低转移。如击七八十丈及百丈，制一象限仪，插入炮口，如上段所述方法加高一度，至五十丈高八尺七寸四分，至百丈高一丈七尺四寸八分。攻击甚准，并绘一图以便考证，此法《灵台仪象志》有图可据也。

◎用炮远近释疑

或曰：子所著前编，演炮差图，每百丈差高二三丈，设若四里差高十丈左右，其变通加三角表之法，善勾股者亦称合度。向闻大炮击远二三十里，姑不之信，意者或有十里，其弹子弯者不计，直者想有六七里可用。若据今日在燕塘演试中西大小炮位，皆在百丈左右，而直弹大约不过六七十丈，此外则渐渐坠低，其用法当如何安

置耶。应之曰：用炮之法，不论弹发十里以至一里，皆当取其弹子直去者，用之弯坠者舍之。如弹发十里而直者有六七里，今仅发一里为百丈而直弹有六七十丈，当以此为用。加三角表之法，诚不可无。虽六七十丈之中，略有小坠，此处有力可用。此外至八九十丈百丈左右，弹渐渐坠下，不甚合用矣。而用者当渐加高以补其坠。如弓箭射靶，其理则一。现在贤良祠西洋炮式三位可据也。或曰：若然，则已合西法。设使不加三角表，定然高越。但见燕塘演练百丈之靶，虽多有高越过靶，亦有不高越中靶者，何耶？曰：炮制不一律，其中有尾过大而头过小者。每百丈差高至有三丈馀，至靶高越必多。若如头稍加大，则每百丈差高二丈四尺者，至此弹子坠落亦，恰在二丈四尺，可以恰中。而旁观者，以为不加三角表，亦可远近一律中靶。殊不知，惟可中此百丈之靶。若自二十五丈至五十丈七十五丈三处，各有高越安，能适中。或曰：加三角表三处，既已各有坠数，不加此表，反有高越。亦有法可绳之否？曰：凡炮位不同，一位自有一位度数。弹发高低，其性不同所差惟在炮头之径数。差一寸者，至百丈即差丈馀。虽同一厂所铸，一时一式，皆非一律。其用法当未经演放先度定此几位尺寸度数，逐位度量身长及头尾之径。如上法算定差高补坠之数记载一纸，谨记在心。上架竹管放低，转移窥测，则与加三角表同法。加三角表加高补坠数，架竹管放低就差高，随弹高下，均可互用。若无分等，第不知度数，执定一律演放，而不察者以为不加三角表，击百丈亦时有中靶。不知击近又有不同耳。或曰：子所论是矣。惟所云击至六七十丈之远，恐夷船之炮比我较能远。及以七十丈为用，窃恐不敌。曰：夷人制炮之时，已预配远近，用炮之时，有知远之方。先于船上用千里镜窥视人形大小，以定道里远近。测视准头远近不同，约量弹子可到，两地相去窥视人形明晰，在六七八十丈左右，弹放出去直而有力可中，然后开炮。远则不开也。然亦有时特意虚发者。如两处交锋，相距旷远，窃恐弹发不到，先驾火轮船，迅发一炮，探之不能中，则不开放。二十年以前，曾在澳门闻海上夷人战船交锋对炮，驶得甚近约在六七十丈，始肯开炮。方今演试，始觉所言皆合。或曰：若此所云，夷炮亦不甚远，何以自河下击上乡村有三四里之远耶。曰：凡炮安高一度半平放可至百丈，若高六度半，可至百五十丈，高十度可至二百丈，高二三十度，击上空中坠落，便有三四里。不见夷船安炮其口仰上乎。此乃攻击城池，恐吓居民，不能有准也。要之夷人用炮考试，犹中国科场之考箭，倘推广其法，则海内之善于用炮者，到处皆是，此御寇之大助也。

◎用炮摘要

一、凡击敌之法，当首先审视人形长短以知远近，方能命中。若就现时之炮，无分远近，不知加高放低，执定一律演放，弹发无准。若知远近，击远加高，击近放低，发必多中，不致高越。加高补坠，放低就差，高用量天尺较之，便知对靶高低尺寸。大约击大船高约一丈，相去二十五丈及五十丈七十五丈，三处测对船底。此外至一百丈，测对船底之上尺，击百十丈，测近船面。如小船高约五尺者，自二十五丈至七十五丈，比大船再低一尺。惟一百丈及百十丈，当再低五寸。所谓低一尺或低五寸，乃见水面离船底大概之形。此就现时所铸之炮，总论大略十位有六七位

如是。其中亦有不尽如此者，若未曾用量天尺较对，猝遇交锋，就此权用，不特多中，且不高越船上，此就不加三角表而论也。

一、凡炮位准头，尽在炮头之径，当知算差之法。不知算法，虽知远近，亦难有准。若如编中算法，算出差高之度，除起弹坠之数，尚差高若干，转移演放，发无不中。

一、凡铸炮如中华所铸，每多头过小而尾过大，能中远不能中近，近则高越。西人铸炮，头尾相差无几，能中近不能中远。中华之炮，能中远，只在一百丈至百十丈，若自七八十丈以内，弹多高越。西人铸炮能中近，自出口至七八十丈皆可中。此外至百十丈，测之正对，多不能中，当加高补坠。中西二炮比较，击近者胜于击远近者易中，其力甚刚，远者难中，其力甚微。凡炮位能中远者，恒不能中近，能中近则又不能中远。故算法不可不知。若欲铸就远近一律，测正皆可中靶。即西人之善铸炮者，亦不能兼。今就欧逻巴各国炮式，度量推算，演试较合。惟佛兰西有一式，头径比尾径小无几，使弹不坠，每百丈差高一丈七尺。自弹出口直至七八十丈，所坠抵补差高，恰能相近，所差只在一二尺。若敌船相距八十丈以内，测正攻击，皆可命中。惟八十丈以外至百丈及百十丈，当渐加高补坠，较之仅能中远者不同。但敌船之大者，长十丈，高一丈。至百馀丈之远视之，短且低矣。且水上渺茫，弹自空中斜坠击之难中，中亦无力。盖敌船迫近其形甚大，弹子直贯易中。若欲击远，则加高补坠，所以离远不甚开炮也。今用一算法，不论大小炮，先算后铸，如佛兰西式为有准。

卷八十九

象限仪图式附制象限仪尺寸

此仪即弧三角。其制法大小随意，大则度宽，小则度密，以取圆三百六十度，分为四限之一得右限九十度。兹粤省所制半径五寸七分，旁另留余位三分，以备贯钉，又附左限十度，角穿一垂线下悬，一重球坠之。其方柄宜直长二尺七寸，上安两小铜圈，以便测视地平高低。每面宽七分，安在仪面之后，柄伸出一尺五寸便合用。

此象限仪，即浑天仪四分之一也。按周天三百六十度，一限计分九十度，每度本作六十分。今因制具狭小，以每度权作十分算。此仪俗谓之量天尺，其为用也甚广。测视七政躔度，与夫量山度云，霄壤之高下皆可推算。而西洋人用之测验炮差，尤为精微。盖炮之高下，各有不同，而加落之数，亦属无定，要在有所准绳非可臆揣。故用此仪以较之，其法无论有表无表之炮，先将炮口安平，然后将此仪插入口内，使垂线不偏左右。其炮身中线自与之俱平。如欲击百丈以内之靶，则先以线平试演一炮，视弹去到靶或高或低。低则加高，高则落低。加高则用右仪视垂线偏右几度，低则用左仪视垂线偏左几度。其加落若干度，若干分，均须随时记清，以后施放即为准绳。如欲击二百丈之靶，又须较之百丈量为加高，如系击三百丈则又须倍加，总期中肯为率。余可类推。平时司炮者果能按炮一二，演试得法，各自记明，虽未必炮炮皆中靶，然亦必不离上下左右之间。不然，弹飞如陨星，一闪而过，又奚能远视测量高下之尺寸。至若大炮固能击远，然过远则弹去究竟无力。大约三百丈之内，一百丈以外，方能有劲也。盖炮力近则猛烈，可以摧坚破锐，至左右仪高下之数，只须左右各十度测量即可足用。故将左仪十度附于右仪之左，以便运用，此用仪之大略也。然炮之食药，分量之多寡，弹子之轻重大小，均须合式。平时一一配定，方能有准。若弹子小而膛口大，则药力四泄，弹出无力，而不能击远。倘弹子稍大，不合膛口，又恐有涩滞之虑。必须详慎，亲为检点，此乃就平地设靶而言。若夫由高而击低，自下而攻上，须将仪柄执之手中与炮身比平，从柄上前后两铜圈孔内，测视彼处，或高几度，或低几度，高则递加，低则递减。须知陆地设靶，与水面不同。如敌船来自水面，则进退无定，又在临时相度远近。测看敌船驶来，或乘风力或顺潮信，更须视风力之缓猛，潮信之长落，以察其船行之迟速，然后从容施放。如果审度得宜，不患炮发之无准矣。

中线高下图◎演炮须知中线准则论

夫演炮须对靶，而目线与中线互有参差。立靶既有远近之分，则弹去即有高下之殊。要必有所准绳，而后可融会变通。盖炮有大小，头尾粗细之径，固有不同。而其形质浑圆，自百斤至千万斤，大小虽殊，用法则一。由中心测直，而画其中线，当为准则，以较高下之差。然后用象限仪以记其加高落低之数，庶几稍有把握。今于

后幅绘二图以论之。如无表之炮，其尾粗而头细，若从引门上用目线对炮头测平，则炮头较炮尾必高，而炮口自与之俱高，其中线亦与之愈远而愈高。假如炮口中线与上线相距一尺，出至二三丈之外，则中线渐远渐高，及至到靶，必高越目线之上而过。又如有表之炮，其头已加表与尾径相等，若从引门上用目线对炮头测平，则炮口内中线亦与之俱平。假如炮口中线与上线相距一尺，则对靶上相去自亦一尺。此两炮目线虽同，而中线彼此高下迥殊。设以此两炮下子燃放，如击百丈以内之靶，可知无表之炮有高越之差，有表之炮，有弹坠之失。然中线差高之数，其远近丈尺各有不同，而算差之法，不可不知。譬如前论无表之炮，作身長二尺头径二寸八分计之，上下分中得半径一寸四分，尾径四寸得二寸，则头较尾小六分。即以六分为母，以身长二尺归之，计每尺差三分。如一丈则差三寸，十丈则差三尺，百丈则差三丈。若弹子由中线发出至百丈之远，有渐坠之势。譬如弹至百丈约坠二丈四尺，除坠数外计尚差高六尺，则弹子仍越靶而过。盖因不知炮头尾径粗细之差，及加高落低之法。故两炮俱不得中，此一定之理也。如能知中线高下之差，高测则低，低则加高，用象限仪测量合度，此两炮又何尝不中靶耶。此算远近差高捷便之法，与勾股算数相同，故附其说，俾司炮者得以易晓。

勾股相求算法图◎勾股相求算法图说

按勾股之法，其用甚广。以之测影，推度山川之高深，平原之广远，非勾股莫由而知。今略举一端以明其法。如图所绘直线为股，横线为勾，斜为弦。譬如大股高二丈，大勾长三丈，以股求勾，问小股一尺，该小勾几何。法置大勾长三丈为实，以大股二丈为法除之，则每尺之股，得小勾各一尺五寸。若股一丈，则得小勾一丈五尺，若大股二丈，则得大勾三丈。又以勾求股，问小勾一尺，得小股几何。法置大股二丈为实，以大勾三丈为法除之，则每小勾一尺，得小股六寸六分六厘。如问小勾五尺，该小股几何，法以小勾五尺与大股二丈相乘，得一丈为实。以大勾三丈为法除之，得小股三尺三寸二分三厘。若勾二丈，则得股一丈三尺三寸三分，勾二丈五尺，则得股一丈六尺六寸六分。若勾三丈，则得股二丈，恰符原数。馀可类推。此勾股相求算法之大略。与前篇炮位中线差高算法相同。因恐司炮者不谙勾股算法，难于洞晓，是以中线准则论内，附陈便捷算法，俾人易晓。今仍附此图以备参考。

◎量炮头尾径捷便法

前篇所论，演炮须知中线准则，然犹虑司炮者，不谙测视头尾径之法，仍恐不甚了然，故又立一捷便较法，使人人可以易晓。假如有一炮，尾粗而头细，其形质浑圆，必须量头径尾径之数，方能得中线之准。其法以尺先自炮尾后蒂分中而上，用横线与尾扯平，量直有若干尺。譬如测得四寸，则上下可知计八寸矣。上下分中而算，下四寸可置勿论。计仅得上半四寸，再用尺测炮头，譬如测得六寸，分而计之，则上下各得三寸，下三寸可置勿论。以炮头上三寸与炮尾上四寸测平，相较计炮头

周径各短一寸，故须立表补一寸。前后各得四寸之数，使其匀平，分中测视，方得其正。此犹就一炮而言。其他各炮前后粗细，又自不同，如较短一寸则补一寸，短二寸则补二寸，视短数之多寡，定立表之高低，方为合式。盖立表之意，无非欲使头尾之径，高低相等，取其平直而已。以之测正，可为标准，击近视高低亦可用，击远则炮口加高，难以取准。若临时揣摩，则必失矩度，此又不若用象限仪测之平时，记明尺度，较有准，则俾仓猝施放，不致失所凭依，今绘图于左。

量头尾径图==◎进呈演炮图说疏〈（靖逆将军奕山等）〉==

道光二十二年七月二十二日，奉上谕。有人奏近得一书名《演炮图说》系丁拱辰所著。此人曾在广东铸炮，演试有准，亦晓配合火药之法。著奕山祁 贡查明，是否实有丁拱辰其人，现在曾否在粤所制炮台炮位，果否坚固适用，据实具奏。又闻广东造得火轮船，亦颇适用，著即绘图呈进，并将是否内地匠役制造，每船工价若干，一并详悉查明具奏。钦此。伏查丁拱辰系福建监生，前来军营投效，呈献象限仪一具，测量演炮高低之法。当经臣等于上年冬月间，亲往燕塘地方用象限仪测视演放，尚为有准。该监生颇知急公，曾赏给六品军功顶戴。该监生著有《演炮图说》，系讲求演炮准则，而于配合火药以及修筑炮台铸造炮位，亦只有论说，未经亲为制造。前经署督粮道西拉本即就原书详加考校，复于团练壮勇之时，或在平地低处，或于炮台高处，先立靶于水面，用象限仪测视，演放大炮，往往中靶者多。该道与丁拱辰互相参酌，择其演炮要法，别拟图说数则，言简意括。刊挂炮台，俾人人易晓，现在驻守各台壮勇，俱能深明其法。其台上炮架，一律制造，滑车绞架，推挽亦极灵便。除别制象限仪二具，交赍折差弁带京呈进外，兹将丁拱辰所著原书，及该道西拉本更订数条，各缮一册，先附报便，咨送军机处进呈。至于火轮船式，曾于本年春间，有绅士潘世荣，雇工匠制造小船一只，放入内河，不甚灵便。缘该船必须机关灵巧，始能适用。内地匠役，往往不谙其法。闻澳门尚有夷匠，颇能制造，而夷人每造一火轮船，工价自数万圆不等。将来或雇觅夷匠，仿式制造，或购买夷人造成之船，随时酌量情形，奏明办理。再查本年六月间绅士潘仕成独力报效，不惜重赀，雇觅米利坚国夷官壬雷斯，在僻静寺观，配合火药，又能制造水雷。据该绅士声称所制水雷一物，尤为精巧利用，曾派人在彼学习技艺，俟将来造成后。如果演试有效，该绅士自行派人赍送到京，听候阅验，合并陈明〈（源案：火轮船大小不一，如欲载多兵多炮，航大洋之火轮船，自非价数万圆不可。若行内河之火轮船，其轮不在两旁而在船底，如磨磬式者，现在粤东城外珠江有之。询彼夷人制造不过数千圆，每日亦可行八百余里。由珠江至香港即有二百里洋面，则宁海上海内洋亦可遄行。中国制造火轮船，但须仿此磨盘式之火轮船是矣。至此奏所云试造不灵便者，仍由粤商师心仿造，未延夷匠指授之。故倘肯出赀延夷匠为师，不旬日而可成矣。又大火轮船，有头号二号三号不等，去年上海夷酋以三号火轮船出售于宁波，制造极其精工，索价二万圆，则凡所称每舟需十万圆者尤妄说也）〉。

卷九十

◎西洋

○西洋低后曲折炮台图说〈（丁拱辰）〉

西洋炮台，可拒天炮火炮大炮火箭。其台最忌前低后高，以及台内构屋建塔高出墙头。因英夷一种天炮斜发空际，坠落炸裂乱滚。又学佛兰西飞炮，将大弹入大炮内，对阵直击，弹子炸裂，火迸敌营。倘轰击只在墙外，不致焚烧。若台内行兵之处，后有屋宇高墙，则一被轰击，火光飞溃，立足无地，且能焚烧火药局。其弹径四五寸，形如蜡丸，上留一口，腹中空虚，藏许多小弹，每弹皆用染蜡绵沙线札之。各通一引，总结于口内。实火药著处破裂，火光一发，小弹带火乱喷，利害甚于天炮。如大炮对阵轰击，若墙内屋宇高耸，或炮台后墙枕山，高于前墙，一遭炮击，瓦石飞扬，亦难立足。所以前宜高，后宜低；形势宜曲折坚固，宜三合土；收弹宜网喉，如图所绘。墙高一丈二尺，厚上八尺，下一丈二尺，顶如覆竹形。墙内路阔一丈，密挂网一丈，或四方或斜方形略如酒漏样。网喉长九尺，每网之下开一井将网尾入井一尺，使大炮自空中坠落，由喉入井，著水必熄矣。其路后筑兵房高八尺，比前墙低四尺，而房后高只四尺，倒水斜倾，落屋后之池。屋脊慎勿用瓦，亦用三合土，厚一尺，前后有门以通人。兵房之后留一路，阔三尺，路之后开一长池，若天炮之弹，坠在网喉，必落井中。如坠在屋背，必辗转落池，而炮墙既高于兵房，桅炮弹子，不能中入矣。台筑河旁，两岸对峙，各筑一台，略朝向外，口如八字样。仍于炮台之内，相去半里，由河边陆地填出一茎，直出中流尽处。渐广如出水莲花茎之两旁，各筑一墙，扶翼中道，以护来往接应者。于水中茎尽处，筑一台长方形，势向外安炮，共成鼎足。形三面攻击，声威雄壮，仍于台前河中多立品字木桩，名梅花桩，中泓留一水道甚狭，逶迤曲折，如之字样。使敌艘而得直入，若循道曲折而进，则两岸中流三台合攻，岂能飞越。至若海外孤悬，或海口三面环海，一面枕山者，则用圆台，大略如是也。

○西洋圆形炮台图说〈（丁拱辰）〉

上所陈曲折炮台式，乃是内河两岸形势，他如虎门横档孤悬海中，或两山对峙，半面环海，半面枕山，则当稍异。此则不用曲折之字样，可用圆形台式，就其山麓形势，循环周筑。或拱抱山后，就地筑造，勿似大角沙角，后枕山面甚高，前临海港甚低。如圈椅样，一遭炮击碎石炸裂，飞火喷烧，立足无地，何暇顾及交锋。夷炮来攻最喜寻此形势，便彼攻击。若前高后低并空其后面，不筑墙则彼虽有许多奇炮，皆无所施其巧。今绘一图，半面环海，就山麓环抱开一平壤，阔四丈，内台墙厚上八尺，下一丈二尺，墙后路阔二丈，路后兵房，并房之前，后墙身阔一丈，兵房后用一坑，阔六尺，深丈馀，墙高一丈二尺，路张网喉，每喉下开一井。兵房高八尺，坑愈深愈好。若有山上流泉，导入坑堑，可使天炮坠落，遇水必灭。如无泉

水已落坑底，其火亦不能喷高矣。兵房之制，亦与陆地河旁台式稍异。前有门而后不开门，其山巅可铲平，以筑小台。台墙略低，只用大炮中炮数位，过山炮子母炮十杆，弓箭手十人，前助击敌，后防间道。小台之门向后开一小径，曲折而下，直达大台之右，入于大台之内。台内开一偏门，以通行入，台墙后近山处，铲去山土一层，环抱周围，高与墙等，使其山脚壁立，而从间道者，亦不得越登矣。此抱山后之法，胜于枕山。而向闻澳夷云：中华炮台，既不合式，况加石砌，更易迸裂。西洋各国炮台，皆就山势掘平，或掘山分为二三层，依山筑台，随式而成，率用三合土筑成。观澳门三巴门外城垣，东西望洋炮台，皆三合土为之，二百余年不圯，是其明证。至若山如屏障，或如木梳形，可就此法变通，亦难板执耳。以上二台，俱开三角炮眼，胜于方图炮眼，炮架下铺，细石或坚木板，或三合土，不可用泥土。致炮架陷入土中，难以移动也。其木桩或三枝相近，连而为一，中下用横门交连，一齐打落水底。上加大小石块压之，使不能绞起。因夷人有举重算法，及一应举重，挨磨车、绞车、绞架滑车、螺旋转诸器，拔之甚易。若如此法，绞拔扯锯，皆无所施也。

长方曲折炮台式

圆炮台式○润土炮台图说〈（丁拱辰）〉

猝遇寇警，囊沙为墙，厚一丈，隙安炮位，其法最妙。厦门用此法，敌人炮弹击来，只入沙二三尺。惟是可暂不可久，沙袋月馀朽腐则不能得力。易成可久者，莫如润土。炮台不时泼水，可期数年不坏。可自水口至内河，择险要两岸，锹锄润土筑炮台。墙排列，各略朝外，如八字样，上墙百堵。或地方狭窄，就地酌量，墙高五尺五寸，内藏数千斤大炮。每墙隙，安置一位，外口阔二尺二寸，内口阔七尺，安五六七八千斤大炮。馀留外口阔一尺八寸，内口阔五尺，安二三四千斤大炮。酌量炮位之大小，按留墙隙作炮眼，敌炮直来，柔能胜刚，得其弹可用。而墙内可留一路，阔三尺，以便行兵，路边可开一池，深阔长与墙高阔长等，就所锹起之土，恰敷台墙之用。然后引水入池，如此则大炮火炮，直来不能中伤，天炮自空际斜坠必落池中。若在池后，尤不为害。墙高五尺五寸，外边上下长二丈，内边长一丈六尺五分，及一丈七尺五分。二款照配，上厚八尺，下厚一丈二尺，墙顶勿作平坦，当凸起，如覆竹形。炮架下及后面，共长二丈，阔七尺，当打木桩作基，上铺细石板，或铺坚木方，堪演放炮架之轮，方不沉陷土内，致难转动。自海口至内河各险要，可用此法。大小炮位，当有千馀，方足御寇。此是有定位，不能移动，可守不可战。若欲出洋追逐，制胜之方，莫如造坚固夹板，或恐缓不及事，则如靖海侯施将军克复金厦二岛之策，著有成效，馀无他策。

润土炮台式○炮台旁设重险说〈（江苏候补知府黄冕）〉

一炮台左右旁近，宜环设暗沟地雷，并设伏兵，以示重险也。查各省沿海炮台，以

防内地海盗则有馀，若以御洋夷，则适足树的招攻，毫无益于守御。缘洋夷以船炮为城郭，习惯攻战。如使我炮仅中其船舷两旁，不过倒退摇撼，无损于敌。除非适中其火药舱，方能轰裂，否则适中头鼻，亦足使驾驶不灵，安能有此准的。而夷船攻我，则于数里内外，遥升高桅，用远镜测量，情形了悉。一面先用大炮飞弹遥注炮台轰击，使我兵惊溃，即一面分兵绕出炮台后路，夹攻其后，使我水陆腹背受敌。此虎门厦门定海上海宝山失事情形，如出一辙。今议防夷，仍止以炮台坚大为事，而不讲求夷敌绕攻炮台之计，非善策也。欲求万全，必移海口炮台于内河要害之处，尤必于炮台左右远近别设重险，方足以有备无患。其法在一伏地雷，一设暗沟。

地雷之法有用之攻城者，必先掘地道潜入，且耗火药十百倍，非战守所用。其用之待敌者，古法用磁瓦罐瓮分贮火药，或用两铁，一盖一底，联以螺丝旋，亦未以收迸裂之力。如欲用药少而得力大，必用生铁铸成浑器而空其中。但留小孔，实以火药毒药并藏刀剑碎锥在内，闭气愈紧则迸裂愈雄。各就地势酌用，方圆长短之地雷，相度敌兵来路。无论高坡平地散伏错设，平日不设药线，俟临敌之时，方始安置。其看守药线之人，或伏山坳，或伏地沟，远埋药线，伺敌入伏，即行点放。或黑夜遣谍潜往点放，或募人佯作汉奸，投敌点放。其地雷嘴口向下倒垂，以衔药线，其药线须藏于竹管内，以防雨水潮湿，此只就内地火药而言，若仿造西洋自来火药，则但须蜡封嘴口，而别埋一无药长绳于数里外，临时但一牵动其绳，而火药自发，尤可收一发聚歼之效，胜于攻剿十倍。一处受创，处处惊畏，草木皆兵，自不敢长驱无忌矣。盖炸弹即小地雷，而地雷即大炸弹，用药少而得力大，尽可多设数处数重，首尾互应，以资层层得力。

或谓敌于地雷已发之后，又遣后队冒死续进，且或先驱牛马俘卒，前行尝试，而后以精兵随之，其时地雷已罄，又将何以制敌。曰：地雷以内，又必环以暗沟，始万全无患。深掘重堑，多种荆棘蒺藜，或灌泥水，其上施板盖土，望如平地，一践其上，人马皆陷。此等如遇冲要之处，二道三道皆可施設，但必深秘勿泄，使我兵知之，而敌不知避，则必堕吾计中矣。至于炮台不过虚张旗帜，佯置兵炮以诱敌。其得力之处，全在炮台以外别伏精兵相机策应，若夫当地雷之处，或佯走以诱敌，而无地雷之处，设疑形以误敌，此则临时制变，存乎其人，有非笔墨所能尽者。

语曰：三折肱始为良医，又曰不经一失，不长一智，是故前车者，后车之鉴也。夷变以来，非无宿将忠谋，皆以承平剿内寇之法，施之外夷。证治不符，方药屡换。冕从事浙海，目击情形痛深创巨，因病悟方，不敢以败军之将，遽忘报国之心。爰成御夷数策，一炸弹，二轻炮，以利其器（见前卷）；三地雷，四暗沟，以重其险。皆前人所未有，而边防所必备。曾从林制军剿番青海，已将炸弹轻炮制造，试用有效，曾经奏闻。至地雷之法，不过就炸弹而扩充之，无论西北东南皆可，为陆战陆守之奇器，用力少而成功多。省兵省饷，妙难殚述。盖亲尝利害，又竭耳目心思而后得之。其炸弹飞炮，英夷陆战长技，实不外此。至轻炮地雷，则英夷遇之

，尚不能当此。合之粤中所造攻船水雷而用之，水陆皆操胜算。而犹患海防无备者，未之有也。然此法，止可施之外夷剧寇。若内地乱民胁从居半，宜剿抚兼施，未可玉石俱焚，敬告仁者，慎毋轻试。

○地雷图说〈（江苏候补知府黄冕）〉

地雷造法，空其中，以藏利器，以出药线。窍其旁，内用泥胚，外用木模，铸成后去泥实药，一切如造炸弹之法。每具轻者一二十斤，重者一二三百斤，计每铁十斤，配炸药一斤许，轻重照数加减。

一、造地雷之法，以闭气坚固为得力。一二十斤者，留孔方圆不过一二分，一二百斤者，留孔不过一寸。铸成时，宜用口对孔吹之，遇有铁窝露气之处，宜以油灰粘糊，使不出气为度。

一、地雷一二十斤者，可击数十丈，一二百斤者，可击数百丈。铸造须量其空处，装药多少，酌定铁之厚薄以为模式，总以炸力猛勇为度。盖铁太厚而药力少，则炸必缓而力弱，药太多而铁过薄，则地雷过于扬高，恐冒过贼面，而击贼无多。是在制造时，每成一土模，必加斟酌，使恰合机宜，方可留用。否则另修土模，期于尽善。

一、地雷之法，必先试验于天津陆地，或南苑空旷之处，由火器营监造演放。如果得力，再行多造，分给陆路各营，以及各海口水师。

一、地雷安设，宜于容敌最多最要之路，分伏数层，以数十具为一层，药线牵连，如同瓜藤蔓引，一发皆发。

一、地雷腹内藏有锋利之物，倘铁铸地雷，或不敷用，则并用瓦罐，多贮石灰，夹放火药、小炸弹于其中。用三合油灰，封盖整固，以佐铁雷之不及。同时点放，则炸飞无数，皆能击贼，而石灰迷贼，亦可助我制敌。

一、地雷紧要，全在引线，制造得法，安放得宜，不潮湿，不迸断，不泄露，宜专派心腹备弁一二员，带兵数十名，或登高了贼，或挖地数尺以藏身，勿令贼望见。其引线制造，必须试过。倘试而不效，加意讲求，必以尽善为度，否则有治法，无治人而谓地雷之不可用，则谬之甚者也。

地雷之利，三言蔽之，曰省铁、省火药、省兵饷而已。何谓省铁？内地铸造三四千斤及七八千斤之大炮，费铁费人工无数，笨重难运，及敌以飞炮火箭遥攻，守台兵弃炮溃窜，徒委之于敌。今地雷外匣不过生铁十馀斤，及一二百斤不等，连在内锥刃计之，每地雷小者不过需银一二两，大者需银一二十两而止。合计用银一二万两

，即可造地雷一二千具。分布天津江浙闽粤五省，每省数百具，即皆固若金汤。视大炮之费铁多，而得力少者何如，其善一也。古法所制地雷，皆掘坑藏窖，全恃火药之多，其攻城地道固需火药数万斤，即拦路地雷埋伏罌罐，亦动需火药数百斤不等。由其少迸裂之能，但仗焚烧之焰。今则生铁铸成浑器，闭愈紧固，则力愈猛烈。小者不过火药数斤，大者不过十馀斤，而可当千百斤之用。且外而铁片，内而刀剑，皆同时炸裂四出，不止焚烧之力。敌不入伏，断不点放，无虚发浪费之弊。视大炮之乱轰浪放者，固殊天渊，即视古法地雷，亦费省而力大，其善二也。海夷船艘飘忽沿海，处处设防，每苦兵饷浩大。今但于天津、江浙、闽广海口登陆之处，相度形势、要害，凡容敌最多最要之区，分设数伏，多设数处，可以一登再发。此外分歧可绕之路，或开沟挖断，或安放小地雷，或别设疑阵误敌。但需阅定形势之远近，安轰击之大小，绘图贴说，秘存营县，入于交代；或埋桩暗记，秘授心腹弁兵，则水师人人胸有成算，识定胆壮，临阵毫不张仓。数十兵守扼要，可当千百兵之用，可轰千万之敌。视纷纷多调外省客兵，劳费万倍者何如，其善三也。至地雷形制，不拘一定，略图于左。

上圆下平地雷式长方地雷式上锐下平地雷式

四方地雷式○详覆用地雷法〈（道光二十二年八月户部主事丁守存）〉

窃职奉谕制造地雷曰十个，前经呈请札飭粮台收贮存案。兹奉札询地雷机关暨装药埋伏等法。按地雷乃择地埋伏之物，均系自拟式样，用生铁铸成圆炮，装盛红油木柜，每个计重八十斤，计容炸药五斤，内有铁管一个，重八斤计容药十两。内竹管一根，上头作马蹄形，入纸撚药线，由柜底木槽顺出闸板之外，其木槽内实以烘药一两许，上糊棉纸一层，以防烘药泛出。烘药槽之上，有方形圆孔，木板中有铁叶机关，上层有空底瓦盆一个，将炭球烧着入内，煨以热灰。其铁叶机关有铁钉一根箭住，再将上面圆孔木盖盖住，并将铁炮上面薄木板，用四小钉钉住，择要害路口，不致积潦之所，掘坑二尺许，将油柜埋入，上面盖以防雨木盖，覆以浅土，令无露出，以一面留一气眼，以出火气。并又为每日换火之用。再于地雷柜二三尺之外，照翻车大小刨深二尺许长坑，横拦来路，其木柜旁，竹管之内铁钉之上，系以坚细麻绳。由地内埋通节竹，将绳横入，引过翻车下深坑，以一端用橛栓住，再将翻车安妥，翻车之上，盖以浮土，令与平地造成车辙马迹之形，令人不疑。贼来西著翻车，车压其绳，绳牵其机，火坠药燃。其炮出地七八尺许，然后炸裂，铁片飞空，皆能杀贼。其炸裂远近之数，无从预定。大约可在周围数十丈外，现在均未装药，易于存贮。其药必临时再装，方免疏虞，并可免日久生潮。复查监造时，系由天津派外委王天文督催工役，登记帐簿，此外尚造有自来火竹炮喷筒等式样四件。据该外委禀称，共领用过制钱五百七十千文，至地雷机关，该外委亦能通晓，合并声明，伏乞鉴核施行。

按：丁之地雷与黄之地雷，二法迥殊。黄之地雷，由我兵自发之，丁之地雷，则候

敌践机自发之。但引线自行点放者，全在得人伺便，否则失之毫厘，此黄之法难于丁也。丁之由敌践机自发者，止能轰伤其前队，黄法则可俟敌全队入伏，并可俟敌已入二伏三伏而后同时点放。如得其便可奏大功，此丁之逊于黄也。但丁法机巧而登陆之路甚多，难于遍设。黄法简易，即陆路最旷之天津，亦不难处处安伏，若于隘处用丁法，而于容敌最多最旷之路用黄法，则敌登陆即入彀中，计出万全矣。故并存其说。

卷九十二

《阴符经》曰：火生于木，祸发必克。凡物必相克而后可相制，水克火也。乃藉水势激发而火愈烈，相反而适以相济，其理不可测，而其巧固不可阶矣。海夷犯顺，恃其船坚炮利，而欲制炮必先制船。会米利坚夷兵官壬雷斯抵粤，自言能造水雷，遣善泅水者，潜至敌人船下或顺流放去，泊于船底，藉水激火，迅发如雷，虽极坚厚之舟，罔不破碎。事成索酬数万。时值闽浙用兵，猝欲得其法以破敌，不惜重资如数预约。乃稟商靖逆将军，暨督抚大宪，结札开局。凡九阅月而水雷成，演试以径尺馀西桅数百本，联贯六层，排比周密，缆撙成箒，广袤七尺馀，厚约六七尺，将炮具载火药二百斤，安置箒底。须臾机发，如迅雷惊霆，烟焰烧空，木植飞腾折裂，屡试辄验。夫夷船底厚不过尺，似此炮力猛锐，又何坚之不摧，何敌之不破哉。奏赉进呈，复于天津演试，其效如前。且每造一具，数日可成，价仅需四十金，每省但费四千金，即可造成百枚。可攻百艘之敌，制夷胜算莫过于此。爰绘图系说，刊布流传，以便演习而靖海防。易传曰：水在火上既济。既继之曰：思患而豫防之，成之为此。盖亦居安思危之志也夫。

攻船水雷总图

桠内位置图

承机图

发机图

鼓力入水深浅差等雷桠送至船底位置护盖图

木塞图

罗盖图

药盖图

铅铁坠图

神之震威善击者莫如雷，制器以象之，利用破敌，沉之水中，即藉水激火而轰焉上发，此水雷之所由名也。凡铜之事九：曰护盖、曰罗盖、曰药盖、曰火床、曰揭板、曰火帽、曰柱套、曰直水管、曰曲水管。铁之事八：曰铜叶、曰坠、曰揭板轴、曰弹条、曰火塔、曰鼓钉、曰鼓柱、曰螺丝钉。木之事七：曰桠、曰隔板、曰浮球、曰塞、曰扛机板、曰扛锭、曰机纆。革之事二：曰鼓围、曰垫。绳之事二：曰引

、曰悬。弦之事二：曰机系、曰鼓撈。合硝磺炭之事一：曰药。油灰以密之，漆布以固之，而器之事备矣。引绳之长，利搭放也。榑锐首尾，利分水也。油灰漆布，防濡滞也。铜叶螺丝，合缝固也。加以革垫，密无罅也。挂铅铁坠，坠使沈也。悬之浮球，宜浅深也。护盖横窍，以时启闭，通缓急也。千窍为罗，滤水滓也。水管窍细，机欲缓也。管底一曲，通鼓腹也。革木坚韧，水鼓牢也。竖柱夹鼓，欲不倚也。火床之设，在鼓旁也。床有揭板，承起弹也。揭板有轴，利转捩也。弹条三级，并有力也。并弹丸三，防或失也。自然火帽，冒火塔也。火塔中空，药管通也。揭板之鼻，系机系也。机系上系，扛机板也。扛铤承板，与鼓对举而易起也。机机之楔也，欲系急而勿褪也。拔塞灌水，用适时也。水涨鼓起，机括动也。揭起弹落，激火发也。药气上轰，震如雷也。无坚不破，有触皆飞，而器之用利矣。

榑制八木合成，大小长短任便配造。木以樟榆之类为佳，其过坚及脆而松者，均不合用。今制大号者，长三尺六寸，高一尺五寸，宽一尺三寸五分，木厚一寸五分，内用隔板分作三隔，中隔安置水鼓火床各机括首尾二隔，可共受火药一百八十斤。次者长二尺八寸五分，高一尺五寸，宽一尺三寸五分，木厚一寸五分，除安置机括外，可受药百二十斤。若欲多用火药三四百斤，以至千斤，则将榑制拓大，自无可。

水鼓火床等器，先按部位，安于榑内，将榑试水，保无渗漏，然后扳起三弹条，承于揭板，唇上系机系于揭板鼻端，按底水鼓，将机系上系于扛机板孔中，取机楔紧，使不得松褪。火帽三，紧冒于火塔之首，火床药管内，实满烘药，逐件查点妥当。用油灰螺丝钉固封榑盖，其罗盖护盖加用皮垫。应用一切，预备完全，俱运至水次。将火药，由榑盖药孔倾入，首尾两隔，实满而止。即将药盖用皮垫油灰封固，系定浮球，及引绳，用木塞紧塞护盖移榑于水，四面配挂铅铁坠，使榑沈而球浮，斯水雷之事备。若同时应用，有数十雷器之多，承机亦不宜太早，约预先三二日内陆续装备。其榑试水后，须晾令全干。凡铜铁机括，用油拭过，方为妥协，缘五行相生之理，铜铁俱能生水，若装贮后封备日久，恐水汽泛而锈衣积聚，或致机括涩蚀，或致烘药潮湿，有一受弊，便不能灵应如意也。

雷器装备妥协后，令极善没水之兵，潜送至敌人船底，将引绳搭系水中锚索，务使水雷恰在船底之中，勿得差错，即将护盖木塞拔出，速即登岸远避，为时约五六分久，水灌鼓涨机板扛揭板而起，揭板起尽，弹条击落，火帽迸裂发火，迫入火塔，直透药管内，烘药然，火势横溢，药仓如迅雷轰然起矣。

雷榑入水，必须深至三尺五六寸，方能发弹。缘火床三弹条，用力扳起，承于揭板之唇，其力共用约三十斤。系定机括，任从上颠下顿，弹条终不能落。必须水灌鼓涨，扛起揭板，乃能落弹。用雷器者，断无误发机括之虞，此最妙之法也。而水鼓之力，又视水之浅深为差等，如榑入水一尺，鼓之起力约有十斤，入水三尺，则起力可得三十斤，入水愈深，鼓力愈急，若深至一丈，则鼓力能起百斤之弹矣。

洋船大者长十五六丈，次者长十一二丈、八九丈不等。其系锚之索，抛在水面，离船约二三丈。水雷引绳须长七八丈，方合用计，搭于锚索，放去尚可入船底四五丈间，适当大桅之下矣。若锚索或偏左偏右，度其势顺流放去，不能适当船底之中，则须另制小铁锚，系定引绳，至敌船上流安插，务使雷槎恰顺流浮在船底中间，地位不可差失。然洋船身重，泊定后风吹不甚动移，且首尾俱有锚索，若用两雷器将引绳之稍结连，一从船左，一从船右，顺流而下，引绳遇锚索挂，住两雷器恰在船底，左右夹攻，更为得力。

护盖，范铜为之，厚一分，高一寸二分，径二寸四分，铺边五分，螺丝钉四。内容罗盖，外横设圆窍。管长九分，径八分。受塞木，使水不得入。欲用则拔塞以受水，取厚铜所以防磕碰。取横窍所以防上压也。

塞木不宜过坚，松杉之类为佳。长二寸许，一头削圆以纳护盖横窍，一头削方，以使用力楔紧。务使涓滴不能渗漏，方能将此雷槎久藏水中，万无一失。如要用时，即拔去塞木，水自灌入，约为时五六分久，水涨鼓起弹落而火发矣。此塞木先编烙字号花押，水勇缴令，即执以为凭。

罗盖，炼薄铜为之。高八分，径一寸五分，铺边二分半。螺丝钉四周身细窍千百，罩于水管之上，藏于护盖之内，所以滤去水中渣滓，不致入塞水管。

药盖，圆铜片为之。径一寸五分，厚半分，先用油灰革垫密贴药孔，后用盖封。有四螺丝钉，缘雷槎。大号者，装药后过重，难于迁移，故临用时，始装药。若小号者较轻，装药后始封槎盖，则盖上未开入药之孔。药盖原可不用。

坠以铅铁为之，大小轻重任便。器大宜重坠，器小宜轻坠。先于槎外四围下半截安定，有环螺丝钉，入水时始用坠，周围均匀系挂。必安于槎之下半截者，欲其下重则波浪掀翻，无倾侧之患也。必入水时始挂坠者，欲槎与坠分运，则轻便易举也。夫木器内空，入水则力善浮，铅铁坚重，入水则力善沉。若浮力与沉力适均，则槎仅平水面，届在浮沉之间，必再加六七斤沉力而槎始沉。惟一沉必直至水底乃止，故必用浮球，有十二三斤浮力者，悬绳以提之。欲槎入水七尺，则悬七尺之绳，欲槎入水一丈，则悬一丈之绳，使浮沉浅深因地置宜，惟我所命。浮球必须十二三斤浮力者，欲其抵对六七斤沉力之外尚有馀力，不致俱沉也。

卷九十五

汤若望《远镜说》，用一凹一凸，颇言其理，而作法不详。今洋制多用纯凹，因积思而得其法，今说其略焉。

《远镜说》云：人睛中有眸，睛底有◎〈（刻本如此，想是图其形状，盖谓凹也）〉，屈申如性。高洼二镜，自备目中云云。其作法用套筒，安一凹镜于内，安一凹镜于外，缩筒视远，申筒视近。缩以配短视，申以配老花。然则远镜从目睛悟得也。短视睛多凸，故凹杀其凸，而短视者能见远矣。衰老睛近平，故凸益其凸，而老花者能察细矣。一补偏救弊之理耳，凹称大光明〈（凹为大光明，凸为次光明，本《远镜说》）〉。凸能恢物象，其所长也。凹视物则小，凸视远则昏〈（凸视近极即是“显微”）〉。其所短也。明能解昏，恢以显小，是补偏救弊之术也。盖物远不能见者，影小而色淡耳。凸为外镜，恢其影矣。而未免于昏，凹为内镜，大其明矣，而未免益小，合之则兼赅交济，所以成远镜也。然目有不合奈何？于短视者稍缩，则凹得力，于老花者稍申，则凸得力，于平人则在申缩之间，而目之异者同矣。然远近有差奈何？物近则稍申，使凸得力，物远则稍缩使，凹得力，而远近之差者，齐矣。既悉此理，便可制造。而远近说谓须察二镜之力若何，相合若何，比例若何，必须面授，而不肯言其所以然，今皆推说得之，并推广得三种焉。远镜创于默爵〈（见《畴人传》）〉，言其理者，则汤若望《远镜说》。言其妙者，一见于阳玛诺《天问略》，一见于南怀仁《仪象志》，一见于戴进贤《星图》。于一凹一凸之制，皆无异辞，然未见其佳者。观《远镜说》图作七筒，戴进贤有非大远镜不能窥视之论，必愈长愈佳，而所见者皆长不过尺耳。此初出之一种也。一种用两凸，外浅内深，最长者亦止尺馀，视物甚大而清，但其影倒见，俱用之于仪器窥筒。盖物象既倒，偏上者反下，偏下者反上，是物一差分，则影差二分，于以测物则目畅而差微，易得中影，此用非远镜，而亦可为远镜也。一种纯用凸镜，外用一浅凸，内用数深凸，合为一筒，从三面起，至六面止，而优劣不与焉。洋制佳者多如此，为后出一种，而诸书皆未及，惟皇朝礼器图有之。义取备物，故论说不详耳。统观其理，凸凹之力，相合比例，皆在乎深浅。深浅之分，不可量。则量其收光之长短，其法取凸镜对日，承以板片，上蒙白纸，由近渐远，则日光射板，由大渐小，而光渐浓，过此复大又淡矣。极小最浓之尺寸，即为是镜之深力也〈（愈短愈深，愈长愈浅）〉。业镜者名几寸光，此即火镜取火之法也。今以光是顺透而收小，命为顺收限。夫凸有一面凸者，为单凸，有两面凸而深恰相等者，为双凸，又有深浅不等者，命为畸凸。用虽同而力限之长短各异，惟顺收限则无论何面向日，皆如一日。若版置镜上，令不遮日，稍侧其镜，则有返照日光射版上，亦能取得极小最浓处，与顺收限理同。而度必短，命为侧收限，此限在双凸，则两面向日，其度必等。在畸凸必不等，至单凸理当一有一无，而乃一长一短，恒若一与三也。虽皆有法推算，姑不多及。只取单凸一种，以平面向日论之。有侧收限二，求顺收限法，以六乘得十二。有顺收限三十，求侧收限，法以六除得五，即所求。若凹则无收限而有侧收限，必以凹面向日〈（平向日则无光独与凸异）〉。盖凹与凸反，凸以平面

向日，正是凹形，此阳燧取火之理也。作远镜法，其一种凹凸相合者，各求其限取凹一而凸二为定率焉。盖一凹一凸，假如限俱一寸，则势均力齐，若相切为一必成一平镜矣。今凹切目，推凸离之，则物影渐大〈（凹力止于此，凸力渐大也）〉，至极大而清，即是远镜。能及其顺收之半则止，是凹力不足也。凹深加倍，必至顺收限而止，故以凹一凸二为定率也〈（凡用限法必归一律，俱顺或俱侧皆可。凹无顺限，取侧限六乘之，用其虚数可也）〉。其二种两凸相合者，或两凸若一。则任求一顺收限，倚之以为两镜之距，则视物影倒而极清，亦稍大焉。若内深外浅，则各取其顺收限，并之以为距，盖外凸愈浅，而距愈长，影亦愈大而显。今命为距显限焉，此种最佳，易作易用，惜影侧耳。其三种内筒，用纯凸相合者，外凸亦宜浅。然所见者，至长五尺而止。或缘凸过浅，则非极大不易作。而携镜游览，长三四尺，于用已足耳。其内三凸，或同深，或深浅不等，俱以距显限为率。如用甲乙丙，则甲与乙，乙与丙，各用其距显限为之。其合为一筒，则命为大光明限，缘目切甲视远，则无所见而光烂然。离目渐远，必见物清而小，愈远愈小，同凹镜理故也。然则外加浅凸，岂非仍即凹凸相合之理欤。推其相合比例，如大光明限一尺，则外凸之顺收限二尺，是亦一与二之定率也。数筒展足，共数宜四尺馀。盖外凸限二尺，则镜长宜四尺，一如加倍之理。馀数寸者，以为收展及相衔之准耳。若内凸用四，则大光明限须缩之。凸用五，须再缩。凸用六，又再缩。其法各置其距显限。四凸者用一五除〈（合六六六拆）〉，五凸者五折，六凸者四折以为距，即得大光明限。其外凸顺收限，皆视大光明限加一倍，然宜稍短二三分，不宜稍长，恐量难准确也。盖外凸顺收限，假如二尺，展足约四尺，目距凸四尺，则见倒形，而大光明限，虽合凹理，实皆凸形，故能倒其倒形，使复顺也。夫用倒者，取其能清，非取其倒也。外限稍短则稍深内外之距，用时须稍缩，不过力稍杀耳。若外限稍长，则稍浅用时稍申，必过其限，不可用矣。凹凸相合者亦然。但其器长，则外凸须大，否则内凹显，外凸小矣。而纯凸者，器虽长，外凸径小而内凸亦能显使大也。此后出之镜，所以弃简就繁，必有取尔。又五凸六凸，非能加胜。而四凸者，如甲乙丙丁，多有另作数短筒。视甲乙递深者以备调用，盖甲乙稍深则视大，而稍暗稍浅，则稍大而更明，时明物小则用深，时晦物大则用浅，亦一巧也。

卷九十六

夫地理者，讲释天下各国之地式，山川河海之名目，分为文质政三等。其文者，则以南北二极，南北二带，南圆北圆二线，平行上午二线，赤寒温热四道，直经横纬各度，指示于人也。其质者，则以江湖河海，山川田土，洲岛湾峡，内外各洋，指示于人也。其政者，则以各邦各国，省府州县，村镇乡里，政事制度，丁口数目，其君何爵，所奉何教，指示于人也。此三者，地球之纲领也，不可缺一。且地理本乎天文，由天文方知地形如何，度数如何，地面各处之所在，天下人类之差别，是以欲穷究此理，应先思地体如球，常丸转于日球之外，相距甚远，然后能悉地身与各星相关，而地理之所谓文者，乃可推测。

曰：昔人论地体，不过曰其长无尽，其厚莫测，上居人道，下属鬼方，其东升西没之日月星辰，不过为地之点缀装饰而已。又有测度而云者，地体圆扁，周围与天边相连，如表罩与表面相合。迨后人历经实据，始觉地体本圆如球，昔论皆属虚伪，故今名为地球。其实显有情形堪证。譬如天气清明，毫无遮蔽，有船开行，人则立于岸边观望，其船渐渐去远，初则不见其船身，后则不见其船桅。又如有船自远而来，初则但见其桅，后则方见其船。若海面为平者，何能有此情形。盖去船开行已远，身桅皆当不见，来船既已临近，身桅皆当见之，且船身比桅大，去船何以自下而上，先不见其身，后不见其桅，来船何以自上而下，先见其桅，后见其身乎。若船上人望此地亦如之。去船先不见其平地，后不见高山，来船先见其高山，后见其平地，可见地本圆者。此理之可征者一也。再前明正德十四年，有二人一名玛加连士，一名德拉给，从欧罗巴驾船向西而行，一直西进，永不改向或有阻隔，不过略为转湾，迨驶过其处，仍然向西行，越一千一百二十四日，不料复抵当日开船故处。越数载，复有安逊谷哥二人等，驾舟往返循环，亦皆如是。若地系直者，何能从西而往，由东而返。皆因地体本圆，故能循环。此理之可征者二也。又凡有向北而走者，但见北方各星如自下而上，渐起渐高，其南方各星，又似自上而下，渐垂渐低。若向南而走则见北斗星，如渐降渐下，行至赤道之间，则北斗星即不见矣。其南方各星，又似自天边而现，渐起渐高者。可见地由南而北，亦系圆形。此理之可征者三也。尚有一理，最易明地体之圆，在《月蚀论》内。

曰：夫地体之圆，前已引证解明，无可疑矣。至其循环之理则何也？昔人云：地球悬于浑天之中，静而不动，日月各星，昼夜循环于其外。迨前明嘉靖二十年间，有伯罢尼亚国人，哥伯尼各者，深悉天文地理，言地球与各政相类，日则居中，地与各政，皆循环于日球外，川流不息，周而复始，并非如昔人所云静而不动，日月各星，循环于其外者也。以后各精习天文诸人，多方推算，屡屡考验，方知地球之理，哥伯尼各所言者不谬矣。并察得地球之转有二：一则日周，一则年周。日周者，本身之周而复始也。昼夜运动西向东旋，随旋随升，凡十一时七刻十一分四秒方周，故地上之人，仰观各星，皆如东升西没，此乃地球东旋之明验也。且地球既昼夜旋转，地上之人，何以不觉其动。譬如乘舟，或东行，或西行，值风息浪静之际，

在船之人，并不觉得船身摇动，惟觉岸边山林屋宇动转。船东行，视彼如西往，船西往，见彼如东行。此理亦可为证也。年周者，旋于日外之周而复始。因其随旋随升，尽历十二宫位，凡三百六十五日二时七刻三分四十五秒，方能一周。故有四季之分，寒暑之别也〈（源案：此即西人地动太阳静之创说，俱地球既运转不停，则人视北极亦当变动而不能止其所矣，姑存备一说）〉。

曰：按哥伯尼各之法以日居中，地球与五星循环于其外。本体无光，皆受日光而明。近远之度数相别，循环之日期不同。因其法顺情合理，故今之讲习天文者，无不从之。兹将日体之广大，旋转之日期，及地球五星等本体之大小，离日之远近，循环之迟速，开列于左。

日

，径长三百一十五万里，比地径大一百一十倍，身大一百三十二万八千四百六十倍。居天之中，枢纽盘旋，不离本位，凡二十五日六时一周复始。

水星

，径长一万一千三百里，比地径小一倍半，身小十分之九。离日一万三千三百六十一万里，循环于日之外。凡八十七日十一时四刻十四分三十秒，方行一周。本身西向东旋，至十二时零四分，周而复始。

金星

，径长二万七千八百七十里，比地径微小，比地身小一分有二。离日二万五千万里，循环于日之外。凡二百二十四日八时二刻十一分二十七秒，方行一周。本身西向东旋，至十一时五刻六分，周而复始。

地球

，径长二万八千六百五十里。离日三万四千五百万里，循环于日之外，凡三百六十五日二时七刻三分四十九秒，方行一周。本身西向东旋，至十二时，周而复始。

火星

，径长一万五千九百二十里，比地径小一半有馀，比地身不足一半。离日五万二千六百一十三万里，循环于日之外，凡六百八十六日十一时一刻三分二十七秒，方行一周。本身西向东旋，至十二时二刻九分，周而复始。

木星

，径长三十三万一千二百一十里，比地径大十一倍有馀，身大一千四百七十倍。离日一十八万万里，循环于日之外，凡四千三百三十日六时二刻，方行一周。本身西向东旋，至四时七刻十一分，周而复始。

土星

，径长二十七万五千二百九十里，比地径大九倍有馀，身大八百八十七倍。离日三十二万九千二百万里，循环于日之外，凡一万零七百五十六日二时一刻十二分，方行一周。本身西向东旋，至五时一刻一分，周而复始。

五星之内，惟木土二星与地球皆有跟星相随，其地球之跟星即月也。本体亦无光，其所发之光，乃受日光照射者。其径长七千八百二十里，比地径四分之一有馀，比地身小四十九倍，离地八十五万九千五百里，循环于地球之外，故曰地之跟星。其循环于地之外有二周，一为有定之周，乃自某处起行循环一周，仍归某处也。凡二十七日三时六刻十三分四秒。一为交会之周，乃每月朔或望之际也，凡二十九日六时二刻十四分三秒。盖月绕地行于本道，地亦绕日行于本道，至二十七日三时六刻十三分四秒，月虽仍归起行之本处，而地已离原处去远二十七度，故月至起行本处不能如前之交，会必须多行二十七度，方能与日地三者交会也。其行二十七度，需二日二时四刻数分，故朔至朔或望至望，每月必二十九日六时二刻十四分三秒也。每年共循环地球十二次，因其循环之十二次，不足三百六十五日之数，所以三年一闰，五年再闰也。本身西向东旋至二十七日三时六刻十三分四秒，周而复始。

其木星有四跟星。第一离木星九十三万八千四百二十八里，循环于木星之外，凡一日九时一刻十二分三十三秒方周。第二离木星一百四十九万零四百四十五里，循环于木星之外，凡三日六时四刻十三分四十二秒方周。第三离木星二百三十八万四千七百一十二里，循环于木星之外，凡七日一时六刻十二分三十三秒方周。第四离木星三百一十九万五千三百二十六里，循环于木星之外，凡十六日八时二刻二分八秒方周。

其土星有七跟星。第一离土星四十九万里，循环于土星之外，凡一日十一时一刻三分二十七秒方周。第二离土星六十五万四千五百里，循环于土星之外，凡二日八时六刻十四分二十二秒方周。第三离土星九十二万零三百里，循环于土星之外，凡四日六时一刻十分十二秒方周。第四离土星二百一十万里，循环于土星之外，凡十五日十一时二刻十一分方周。第五离土星二百八十万里，循环于土星之外，凡七十九日三时七刻三分方周。第六比第一星相近，离土星四十一万一千九百七十四里，循环于土星之外，凡一日四时三刻八分方周。第七去土星尤近，离二十四万一千五百二十四里，循环于土星之外，凡十一时二刻七分方周。再土星除七跟星相随外，尚有一圈绕于其体之外，名之曰土星圜。以至好千里镜观之，见其如有二圈相叠，约宽六万三千里。周围离土星亦约六万三千里，旋于土星之外，凡五时二刻二分十五秒方周，其圜非他，乃无数之跟星萃聚，各于本道圜绕其外。其星虽非尽集于一所，人视之相离甚远，惟见其光交射，如一线之相连，故人见其圜与土星相离也。可见土星虽离日甚远，所受之日光无多，然而四面环绕之跟星甚众，势必受其众光照耀而益明也。

五星离地之远近，均以离日之远近为准。其离日有比地近者，有比地远者。近者以地球离日之里数为度，除去星离日之里数若干，下馀若干，即星之离地里数也。远者以星离日之里数为度，除去地球离日之里数若干，下馀若干，即星之离地里数也。以此推之，五星离地之远近，即可知矣。此一定之理，虽易明晓，但五星与地并行于日之外，迟速不同，远近各别，其地球五星相离之远近，曷能概论。如各星地球，错综而行，时日不同，然必有交会之期。至星地交会，或均在日上，或均在日下，势必相离较近。若各星已行至日上，而地尚在日下，或地行至日上，各星又至日下，其相离自然较远。今将五星离地至近至远里数，分列于后。

水星与地球交会之际，相离二万一千一百三十九万里，时日当中，相离四万七千八百六十一万里。

金星与地球交会之际，相离九千五百万时，时日当中，相离五万九千五百万里。

火星与地球交会之际，相离一万八千一百一十三万里，时日当中，相离八万七千一百一十三万里。

木星与地球交会之际，相离一十四万五千五百万里，时日当中，相离二十一万四千五百万里。

土星与地球交会之际，相离二十九万四千七百万里，时日当中，相离三十六万三千七百万里。

以上所论之金木水火土五星，乃自古所传，近日西土考察，始知旧五星外，又另有五星，亦循环于日之外，本体无光，皆受日光而明，远近之度数相别，循环之日期不同，内惟一星，比地大四倍，其四星皆小于地，但查出之年限未久，故中华之书，未有记载，今此书止论地球，故不暇备列也。

曰：月球本体无光，借太阳之光而明。故凡循环于地球之外，每有晦明消长隐露更生之别。此因人居地上见其如此，其实月之本体，则总系半边光明也。譬如以线系一球，对灯光而转于人之外，则此球若在灯人之间，或上或下，其被光照而明之半边，则对于灯，其背阴而暗之半边，则对于人。若离其间往右而转，人视之见其黑者渐渐退少，亮者渐渐增多也。凡转至人在灯球之间，或上或下其被光照而明之半边，则对于人，其背阴而暗之半边，则对于外。若离其间仍往右转，人再视之，其亮者又渐渐增多也。但球之所在，不论前后左右，其体受灯照者，永是半边，并无差别。其所以晦明消长，乃人之所见者也。月体亦然。凡行于本道在日地之间，或上或下，其有光之半边，必然向日，其无光之半边，必然向人，此乃月朔之时也。凡离于日地之间，往西行本道，越八分之一，其有光者渐长，无光者渐消，人于地上观之，见其微露一弯如蛾眉，又行本道至八分之二，则见其光渐渐长至半规，故

名为上弦。又行本道至八分之三，见其光益长至多半规，犹卵形。日又行本道至八分之四，即半途之中，其光盈规，人于地上观之，见其团圆如镜，此乃朔后至月望之时也。凡行本道至八分之五，其明又渐消，晦又渐长，人于地上观之，见其光初退一弯，又如卵形之式，又行本道至八分之六，则见其光渐渐消去半规，故名为下弦。又行本道至八分之七，其无光者益增，有光者益减，则见其微馀一弯光明，故名为蛾眉残月。此乃望后至将晦之时也。凡行本道至八分，已尽之一周，复至日地之间，其无光之半边，又向于人，其有光之半边又向于日，此乃再月朔之时也。可见月与日合则为朔，离则为弦，对则为望。但或合或对地日月三者，不能常常正直，故虽合而无日蚀，虽对而无月蚀也。盖月地各行本道，迟速不同，至相合之际，地与日正对，而月在其间，不上不下适当其中，方有日蚀。至相对之际，月与日正对，而地在其间，不上不下，适当其中，方有月蚀。若至相合之际，地与日正对，而月在其间，或上或下，所以每月皆有月朔，而不能皆有日蚀也。至相对之际，月与日正对，而地在其间，或上或下，所以每月皆有月望，而不能皆有月蚀也。再月之上弦下弦何以分辨，盖月光弯环者向西，则为上弦，月光弯环者向东，则为下弦也。

卷九十七

曰：人必明于月蚀之故，乃可证地圆之理。夫日蚀月蚀，果何故耶？盖地月各行于本道不息，月乃地之跟星，离地球八十五万九千五百里，循环于地球之外，相离地球之远近，虽异于各星，却有交会之际。其交会之际，如日居上而地居下，月在其中，斯有日蚀。缘地本黑暗，必受日光而明，凡有月过其中，势必掩蔽日光不能下照，且月之正面，受日光而明者向上，其背面黑暗者向下，故日蚀必在月朔。乃此时日月地俱平直相对也，其交会之际，如月居上而日居下，或月居东而日居西，地在其中，斯有月蚀。缘月本体亦黑暗，必受日光而明，凡有地过其中，势必掩蔽日光，不能射照，且月之循环地球之外，必于十五日方能行至地球背面，故月蚀必在月望，乃此时月地日俱平直相对也。再日月之蚀，所蚀多寡不同，故有三等之分，一曰满蚀，一曰半蚀，一曰圆蚀。

其满蚀者，乃本体全被蔽者也。日月之蚀皆然。日蚀者，盖月道非圆，其形如卵，故月行本道，离日地有远近之分，虽本体较日甚小，但近日则不能全蔽其光，近地则可以全蔽其光也。且满蚀更有随蚀随现，蚀后微停始现之别。盖日大月小，日光照明，月之黑影下垂尖锐，离日愈远，其影愈尖，势必影随形转，地上之人，若在月影之末，其处黑影尖小，月身一动，其影即过，人则即见日光，故曰随蚀随现也。地上之人，若在月影之中，其处黑影宽大，月身虽动，其影不能立刻过完，及至刻影过完，必缓斯须，人则方见日光，故曰蚀后微停始现也。月蚀者，地体大于月，月经于地，受日射于影中，地大月小，可以全蔽，无所受之光，月即黑，故为满蚀。且满蚀亦有随蚀随现，蚀后微停始现之别。盖日大地小，日光照明，地之黑影上射尖锐，地离日愈远，其影愈尖，亦必影随形转，天上之月，若离地远，其处黑影窄小，过之甚易，毋庸耽延，即刻可现，人则即见月光，故曰随蚀随现也。天上之月，若离地近，其处黑影宽大，过之较久，必需迟滞不能即现，人则微待方见月光，故曰蚀后微停始现也。

其半蚀者，有多半少半之分，日月之蚀皆然。盖此际地月各行本道，虽然交会，未曾平直相对或上或下，惟蔽半光，故为半蚀。

其圆蚀者，乃中间黑暗，周围露光也。惟日蚀则然。盖月体较日体甚小，虽平直相对，但月近日远地，其黑影未曾到地，是以地上之人，尚可见日之周围圆光，故为圆蚀。且日蚀非每朔而有之，因月行本道，或左或右，不能常与日地平直相对而交会也。又月蚀亦非每望而有之，因地行本道，其影随形而转，月行本道，不能常常遇地之影也。但日蚀月蚀，每年至多不能越七次，至少不能无二次。且日蚀比月蚀较多，但月蚀比日蚀易见，至日之满蚀甚少，每十八年之间，共约七十次，乃四十一次日蚀，二十九次月蚀也。又不能天下各处皆然，因有先后之分，多寡之别，故不能画一也。

以上已解明月蚀之故，乃月上日下，地在其中，日所发之光，为地影遮蔽不能照于月身，而地影射于月身也。夫影必如形，一定之理。若地体果方，月中之地影必露圭角，何以月蚀或满或半，或多半或少半，人但见其黑影永为圆者，盖地必圆形，始有圆影。地球之圆，无可疑矣。

曰：夫彗星，古者不明其理。或以为硫磺之气，由地上升而然，然尽即息。或以为五星之流火，或以为地上之流星，或以为至高之云，受日光照射而明。更有以为妖星出现，主有水旱刀兵之灾，纷纷议论，不一而足，凡此皆不明彗星之理者也。自乾隆二十四年以后，西域之精习天文者，逐日多方考察，渐悉奥理。盖彗星之现，至高且久，硫磺气然，由地而起，何能及其高久。即五星流火，地上流星，亦不过瞬息之光。彗星则有数日皆现者，数月皆现者。且现必终夜光明，其非流火流星也明矣。如乾隆二十四年所现之彗星六月有馀，更可知也。况流火流星，无定期亦无定向，而彗星则现有定期，行有恒道。即至高之云，日照而明，一遇风吹，或飘散，或变形，何能如其有定恒也。至妖星之论，尤属杳茫，彗星各国皆见，若主灾异，理应各处皆然，何以此国有刀兵，彼国却无，或彼国有刀兵，又无彗星出现也。此等议论，乃古人不知彗星之运动，惟见其时隐时现，故以为无定。自加西奴及合略等考查真确，始悉彗星之本体，与五星相同。惟所行之本道，与五星异耳。金木水火土五星，均循环于日之外，月及各跟星，又循环于所跟者之外。除此尚有别星，亦循环于日外者，名曰彗星。其循环之道，与五星等行法不同。盖五星绕于日外，其循环之道近于圆形，日在正中。彗星亦绕于日外，其循环之道近乎卵形，日在一边，因其本道长圆，是以所行似有多寡不同。其近于日则所行甚速，日渐分明。远于日则所行甚缓，日渐隐没。故时隐时现，人不能常见。虽用至上之千里镜观之，亦不得见。越数十载，各按其本行轮回之期而现，人方得见也。且彗星之体，大小不同，所行之道，亦有直横斜三者之分，或如卵形而行，或直道而来，绕过日体，仍直道而去，各从其所向，行于本道，所行较五星甚缓，往返之年限亦久，故人不能深悉其定期。如五星之准，然有数星亦知其轮回之限，如前明嘉靖十年所现之彗星，越七十六载，于万历三十五年复现。西域习天文者，推算其行度乃倒退而转，即嘉靖十年所现者，至康熙二十一年又现，较前所差不足一年之期。后之习天文者，按前推算，预定其期，云至西洋之一千七百五十七、八年间，即乾隆二十二、三年，此星必复现，至期果然。今以七十五六年之数计之，道光十四五年间所现者，亦此星也。又康熙十九年所现之彗星，光芒甚大，查古书所载前一百零三年，即明隆庆十一年所现者，亦如此星。按其运动行度推算，此星乃一百零三年周而复始者，至乾隆四十八年果复现。今以一百零三年之数计之，至道光六十六年，其星必当复现也。又康熙四十一年所现之彗星，察其形体光芒，即前康熙七年所现者，按其运动行度推算此星，乃三十四年周而复始者，越三十四载，即乾隆元年，其星复现，至乾隆三十五年又现，嘉庆九年又现，道光十八年又现，皆此星。今以三十四年之数计之，至道光五十二年，其星亦必复现也。

迄今西域之精习天文者，考查推算，共识彗星二十有一，皆循环于日之外。各行本

道，运动不同，可见彗星亦如五星之类，不过法稍异耳。

犹有一者异于五星，即其光芒也。其光芒按牛敦等诸精习天文者所论，并非他故，乃日之太阳真火，锻炼其星而星体所发之晕远射也。何以见之，如彗星之初现也，离日尚远其光芒微细，及渐渐近日，则光芒渐渐长大，其始退也，离日尚近，其光芒远射甚长，及渐渐远日，则光芒亦渐渐短小，相离愈远，不惟光芒隐没，即本体亦不见矣。且其光芒与日相对，如日在右，其光芒则左射，日在东，其光芒则西射，常散见于背后也。譬如然物于空中，若不动摇，其烟必一直上升，若稍动之，其烟必偏斜而上，天上之彗星亦然。再彗星分为三等，一名有须者，一名有尾者，一名有发者。其有须者，比日先出，光芒在前，本体在后。其有尾者，日落方现，本体在先，光芒在后。其有发者，与日相对，地间其中，光芒在本体之后，故人视之如在本体周围，若发之在本体，翳翳然也。更有数星，其体甚小，光芒微暗，人视之如无光芒者也。

以上辩论考察，详明确据，毫无疑义，前人纷纷虚谬之论，岂其然哉。

曰：凡论星者七政，列宿皆在其中，但因各星所发之光，有大小明暗之别，且因其所行本道，有不离本处者，有离本处可以常见者，又有离本处又不能常见者。故此分为三等：一曰恒星、一曰五星、一曰彗星。夫恒星者，乃本体有光之星也。彼此相离之远近永无差异，惟因地球本体西向东旋，故人见其与日球每日似由东而西也。其数目莫测，其离地甚远。盖天狼乃为离地之至近者，尚离一百三十八万秭里。譬如火炮所发至快之弹子，每一时能行三千三百六十里，虽飞行七百万年，亦不能及天狼之处。其他星远者，更何从测度推算哉。有用极长之千里镜测者，其见五星与月较大数倍，其见恒星则比前转小，惟光略明耳。盖凡有光者，远观之其光发散，似大而暗，近观之其光团聚，似小而明。故用千里镜观恒星五星等之大小即此理也。其本体之广大，应接近远而拟议之。今以日球较验，譬如日体比地球大一百三十二万八千四百六十倍，其离地不过三秭四京五兆里，而人观之，其本体大不满五寸。若再离远十倍，不过三十四秭五京里，其体则大不满五分。再离远十倍，不过三百四十五秭里，其体则大不满五厘。再离远十倍，不过三千四百五十秭里，其体则大不满五毫。再离远十倍，不过三万四千五百秭里，其体则大不满五丝。再离远十倍，不过三十四万五千秭里，其体则大不满五忽。若论其光亦当如之。且小至厘毫丝忽，相离又既甚远，如何能见，不过以其理而言之。今天狼离地远至一百三十八万秭里之多，虽不用千里镜，而尚能见其体大如星，光明远耀，可见其体比日体甚大，其光比日光尤明。此离地至近之恒星，尚若是，其他更何能论定哉。是以不能尽为推算其体之大小，离之远近。但各恒星离地球既极远，尚能见其光明，则本体必甚大也。

至恒星之数，不假千里镜之力，而目能得见者，约一千馀。迨后按壹巴尔哥者，所算定之数，二千零二十二星。后之各习天文者，逐日考察渐加渐多，至发拉摩斯德

者，则论定数目增至三千。因其身有大小之别，故分为六等。其至近者视之，体大光明为一等。其次渐远，体光略小者，为第二等。再其次则愈远，体光又略小者为第三等。以次推之，渐远渐小。次第而分故有六等焉。不以千里镜观之，但得见其一星。若用极长之千里镜细察之，则尚有四面环绕之星甚多，萃集于一所也。即如昴宿，不用千里镜视之，惟有七星。若以千里镜观之，按胡各者算有七十八星。嗣后又有雷达者，算有一百零八星之多。参宿，不用千里镜视之，则惟有三星。若以千里镜观之，按加理略者算有八十星。嗣后又有雷达者算之，约有二千星之多。其他宿及各星之数目，若用至上之千里镜观之，尚有见不真者，焉能尽算得其数。其跟星循环之理，亦如日月地五星等本身之盘旋。且恒星本体之光，与日相同，日则离地较近，虽盘旋而其光常明，无所分别。星则离地甚远，其本体自有之光大小不等，故旋至光大者，下射可以到地，视之得见。若旋至光小者，下射不能到地，即不能见矣。再其光亦非常明，乃闪闪不定，与五星之光定而常明者不同。盖五星受日光而明，然其离地较近，又光力充足，故地中上升之气，不能遮蔽。其恒星虽本体自有之光明，然其离地甚远，又光力微弱，故地中上升之气，得以或蔽。但五星或临没或始出之际，因天边之气，比天中之气甚多，故其光亦闪闪莫定，不能常明。若遇有风之时，气之飘动甚速，其光之闪闪更频也。以此推之，则恒星亦必如日球有别星环绕于其外，惟因至高极远，难以测算，故不能悉定耳。

夫列宿者，天文家以为数星之环集，借鸟兽之名，而名之也。盖上古厄日多同巴鼻罗尼亚二国之牧童，夜间牧于田野，仰观天上各星集于一处，或有多者或有少者，其形不一，因以地上庶物鸟兽等之名，随意而名之。嗣后习天文者，因其名已定，且昔人皆仍之未改，习惯自然，故亦不肯改易，仍照旧名。即天文图上亦按其名之形，而绘之。但其星之集，本与所定鸟兽等名，毫不相似。至其数目，在中国不过二十有八，在西域曩时亦不过三十有三，居北方者二十有一，居南方者一十有二，今之人逐日考察，陆续增至七十七宿。在黄道者一十有二，居北方者三十有四。居南方者三十有一。其黄道之十二，即十二宫也。共千有百四十四星。至多者乃西宫内有二百零七星。至少者乃戌宫内有四十二星。至于南北二方之宿，日渐加增，至今共查得有一百零八宿。缘此书专论地球，而各星与之相关者，不过略言大概，并非解释天文，故未备载其名也。

曰：夫天汉者，古人议论纷纷，皆无证据。非惟中华为然，即西域亦然。缘彼时尚未深悉天文之理，又无千里镜察看，不过因各臆说。如华名河汉，番名乳道，各就其名以为说辞也。今特察看真实，盖天河于晴明之夜，不用千里镜而观之，但见其茫茫如白烟一道，横于空际，似残破间断者。若以至上之千里镜而观之，乃无数甚小之星，萃集一条，其光辉射照甚多，则纷纭散乱，故但能辨其为星，而其星之数过多，亦断难推算。且离地甚远，光力微弱，是以无千里镜观之，但能见其如白云一道，而不能辨其为无数小星之萃集也。

曰：地球大小各圈，既已按处详绘，无不周备。察地理者，又观其四小圈，必横分

地球为五段。而各段中之处，或在南，或在北，或在中，势必有三者之别，各自不同。故以每段而名之，五道：其一热道，在南北二带之间者，宽四十六度五十六分，古之人以为此段地，正当日光直射，其地甚热，尽是荒沙，故名之曰热道。迨后人稽查详明，始知古言错误，盖此段地有日月，霜露风雨及时而降，不惟人可安居，且物更繁产，每年田禾稻谷，两季收割，且所产各香料药材，五金宝玉，较他处更为精美。如印度南洋诸岛，及南墨利加三处，在热道之中者，其水土膏腴，所产各物，比地球诸处尤为丰美。盖因日行于本道，不过于二带之外，其光直射，正照其地，故较别段微热，并非人所不能安居者也。其二曰温道，有二道焉，一在北极圈线之间，一在南极圈线之间，每宽四十三度四分，名之温道者。盖因此段日光照临斜射，非同热道之正直相对，故其地热稍减，渐觉温和，如中国及地中海是也。其三曰寒道，亦有二道焉。一在北极圈线之内，一在南极圈线之内，每宽二十三度二十八分，名之寒道者。盖因其此段每岁多半不见日光，即或得日照临，其光亦不过斜射，且日凡在天边下之时，甚觉寒冷，无处不冰，其地虽不若热温二道之舒畅，与物产之丰殖，人居之合宜，然而其地亦有居人牲畜，如俄罗斯东北方，及欧罗巴近北洋诸国，并非全无人物者也。

卷九十八

曰：凡运动流行于地球四面者，名曰气。由地上升，不过数十里而即止。去地近者厚而密，去地远者薄而稀。其为气视之莫见，抚之莫获，放之则弥六合，卷之则退藏于密。故有轻重刚柔之殊，人物共所包罗，以通呼吸而延寿命。且又易于聚散，其散也则为热，其聚也则为冷。是以所受之热，愈炎而愈散，所受之冷，益寒而益聚。一散一聚，无不流动焉。夫何有是气哉？乃地上之山川、人物、水火、金石、谷蔬、草木等万物之所发者也。试以其重验之，比水约轻八百五十六倍。既有轻重，其包罗人物之外者应重，势必压伏难举，而人何以不觉其重。盖因所包罗者上下周围均同，故人不自觉也。譬如人入水底，何以不觉其重，若以身接飞泉下流，何以又觉其重。盖在水底者，上下周围，均为水所载，故虽重而不自觉其重。其接飞泉下流者，水往下倾，身之上皆为水压，虽轻而仍觉其重也。又譬将手入桶水之中，不觉其重，若将桶开一孔泻水，以手承之，则手自被水压而往下。盖手在水中，周围有水包之，故不觉其重，手在水下，惟有上流之水下压，故觉其重也。再譬如将海沫一团，以线系于大木桶之底，随后用水贮满桶内，海沫体质极软，而其上压之水甚多且重，何以不能将海沫压损，盖海沫中已浸满水体。故外水虽多，乃周围包之，不能压损。况其体中所浸之水虽少，亦可敌外面之水也。气之理亦然。气比水尤轻，水既周围包罗，不觉其重，气亦周围包罗，所以尤不觉其重也。又气越厚密则越重，越薄稀则越轻。地方所在越高，则其气越薄稀而轻，越低则其气越厚密而重。是以人居地面，则服其气，若去地远，则气力薄而不能保其生命也。曩者，嘉庆年间，西域有人乘风球上升，去地约十四五里之远，其人即觉有耳聋者，有手痹者，又有受万种凄凉，莫可明言者。诸各不同，倘若离地愈远，不知更作何状。可见人离地面，不可过于高远也。又气之轻重厚薄，各处各时皆不相同，故西域制造阴晴表，以度量其轻重，再凡运动流行之物，皆有轻重之质。而气则除轻重外，犹有刚柔之性，其体质若有外力制之，可以由大而缩小，然其体质亦具有力。或去其外力之制，又可以舒小而复大也。譬如以皮气球将气装满，封固其口，人或以手按之，则气必收缩而曲敛，将手离开，则必舒放而复元。惟人手按之之际，但觉其气势腾起而拒手。若将气球掷地，势必跳跃。若非气有刚柔之力，何能如此。再其刚柔之力，有多寡之别。若按之力小，其腾起之势亦小，按之力大，其腾起之势亦大。且本性原有三等可见。一则虽按之不论几多年限，其力终始如一，并无消减。二则热之愈甚，其力愈大。三则若无阻隔，抑压者其舒而发散，即弥漫无穷也。但气之厚密，各处不同。故欲定其高量非易，所以气之凝也。愈远于地面，则愈薄焉。

曰：夫气既为运动流行之物，而其本性原寂静不动。上下四旁，不偏不倚，常为均平。有一处失其均平之势，则周围之气皆因之而动，其动则为风。其成风之由，一则因热，一则因冷。热则令气发散，而此处较彼处尤为轻稀，冷则令气凝聚，而彼处比此处更重密。缘气动有迟速之殊，故风起有利迅之别。屡次试验，尝见四刻之内，有行二三里者，有行百五六十里者。且风所以常变不定，皆因其由来使然。若其由来常如一辙，则风亦始终不变也。凡在海上驾舟之人，常见热道之间，周年东

风，名曰不易之恒风。其故皆因日之类行，从东而西，将在下之气曝之，使散其气。俟日过复凝，于是其气已歉，则东方之气，从西流而弥缝之，故常随日俱西，流动不息，周而复始，所以恒变为东风也。又有言其处恒发东风者，因地球本体，一日一周之故，盖地球每日由西而东旋转，其面上之气，自必流行其上。从东而西，如舟行逆水，或由西而东，其水过于舟身，必从东往西而流也。其风亦有时偶因他故，稍为变易，其故不一。今就南北二带之风言之，其风凡从一方而起，无甚变幻，其名为二带风者，乃由赤道至北，约三十度，至南亦约三十度，南带北带之间所发者也，有三等之别：其一名曰恒吹风。北方永从正东而起，惟在赤道上，及去赤道或南或北二三度之处，虽恒吹东风，然亦稍有变异，不能永为一定也。其二名曰当令风。乃六个月一方而起，再六个月从相对之方而吹。其风凡转对方之际，每有烈风暴雨，雷电交作，乃春秋二分之时也。其三名曰海地微风。乃每日自子时至午时，则由地向海而吹，自午时至子时，则由海向地而吹。因其风微细，所吹不过二三十里即息故也。

曰：雷者，空中闪电发烧之声也。其鸣为雷霆，又名霹雳。其光则为闪电，又名雷鞭。夫何以有是雷电哉？凡天气炎热从地面必有能然之气，如硝磺等之类，发泄而上腾，至其气在空中，积满之际，则然而化为雷电。故夏令居多，冬令甚鲜。至雷鸣之声，或云皆因于硝气迅然发泄所至。若云中无硝气，则惟有电掣而无雷鸣。又凡雷鸣必先闪电而后雷响。其鸣声长短，亦因有山应之则其声悠长，若在谷中其声更长。且其声之大小疾缓乃相离遥远，故先见其光，后闻其声也。其雷在热道一带，时所恒有。若在赤道之上，则声愈洪巨，屋宇舟车人物无不震动。凡雷行纵横不定，常于空中且进且退，往返回环，一时则千盘万旋不已。其所以致雷下降者，每因云积甚厚。倘一遇风，则吹散消灭而雷不鸣。凡塔顶之金铜等物，亦皆有吸雷下降之力。故凡雷鸣时在高处较低处为尤多。再雷鸣之时，撞钟放炮，皆属不宜。盖因钟炮之声，均能动气，恐气动而致雷下降也。又雷鸣时，所有硝磺火药等易然之物，必须藏匿恐被雷火引著而轰击也。

曰：日重见者，乃云上所形之日体也。皆由太阳之光，映射于浮云内，故人视之如别有一日也。凡日遇有重见，即有光环相随于后，且必有或雨或雪相继而下。日之重见有多寡不等，其二日尚为人所时见，然已觉其少。其三四五六日，则人罕见之。顺治十八年，波罗尼亚有同时见七日者，尤少之少也。月重见者，乃云上映照之月体，其数之多寡与日略同，其所重出之月，一时或旋绕于真月之外，一时或并列于真月之旁也。

曰：冰者，乃严寒所凝结之水也。夫水本流行之物，一凝则静而不动，其体坚实，必须剖之始开，击之方碎。且凝结之量包涵甚大，试观贮水之器，往往被其鼓裂。凡石罅中若凝结充满，亦可裂开，而山或为之崩坠。凡寒冷至极，则凝结如山，距赤道数十度之处，见于海面者甚高且大，宛如岛屿，半浮水上半没水中。春初及谷雨时，人尚可近之，迨谷雨后则无人敢近，恐其融化倾坠而被压也。近二极之处，

虽大暑时亦不融化，所以南方离赤道六十八度，北方离赤道八十一度之处，恒为积冰所阻，不能越过。

曰：潮者，乃海水之动而不失其常也。每日十二时三刻四分，必有二次之消长，长足则渐消，消尽而复长。其长也则名曰上潮，其落也则名曰下潮。盖日月众星皆有吸水之力，视远近为微甚。而月尤近于地，是以地球月围所包之海水，凡在月正对之下者势必被月吸起，故各处地方月至当头其处，海水必然长高，其长则为上潮也。不惟月至当头为然，即月至下面天顶，其上面地球之处，亦如月在当头，仍为上潮，可见月至上面天顶，上面地球正对处长潮，而下面亦长，月至下面天顶，下面地球正对处长潮，而上面亦长，盖地球上下二面各处正对之水，其与月相离至近者，则月吸之甚力，其潮上起其与月相离至远者，则月吸之不力，其潮下坠。势必相离于地球中心，而较周围各处之水逾高愈下。所以地球上下二面之水各为增长，地球各处地方，凡距上下二顶各九十度之间者，其海水一上一下分流，势必消减而并落。其落则为下潮也。又因月行于本道，每至一午线之上必经由二次，一则于上面，一则于下面，并须十二时三刻四分，方能一周，是以四海之水十二时三刻四分二次消长焉。夫潮每月朔望，定有两次消长，较平日为尤甚，名曰大潮。盖因朔乃日月相遇，交会并在一处，其相吸之力更大，故地球上面甚高，而下面之潮其坠亦甚大也。望乃日月相距间，对列在两边，其所分吸之力亦大，故地球上面之潮较盛，而下面之潮其坠亦较甚也。其长既较平日甚大，而其落亦比平日尤低，理所必然也。又每月之内，定有两次消长，较平日为尤小，名曰小潮。即在月之上弦下弦。盖因二弦之时，日月相距九十度之远，若月与潮长之处，正对其落处，乃日正对之下。若日与潮长之处，正对其落处，乃月正对之下，其因月吸而落之水，又被日吸而长，其因日吸而落之水，又被月吸而长，故两分其水势，然月近于地，其吸力较大，日远于地，其吸力较小，故此时之潮，虽长而不能大，因月吸之力胜于日吸之力也。再大潮每年有二次，较各月尤大，小潮亦有二次，较各月尤小者。则在立春立秋之时，日近于地而吸力较大，所以潮之或长或落较他月为尤甚。且潮之长落因乎月，时常与月相随，由西而东。是以每月于朔望而至一处午线之上，其处即为潮长，至次日则月迟三刻四分，方能再至午线上，而潮亦必须迟至三刻四分始能再长也。故凡各处十二时三刻四分之内，有二次之长落，六时一刻九分三十秒，有一次之长落，凡知一处每日长潮落潮之时，以后每一日多加三刻四分，即明晓矣。然地球并非四面全水，故潮之长落，各处亦不能尽同。况且山峡洲岛阻束水势所以同时之潮，又有或高、或低、或大、或小、或长落、或不长落之别焉。

夫海水之动，前于《潮论》已为详释。此外尚有别动之端，其名曰流。而流之动与潮之动，迥不相同，亦不相碍，皆因地球本体西向东旋。是以洋海之水，其流大抵由东而西。但为山峡洲岛阻隔，不能尽属顺流，故有分歧，或变为南向北流，北向南流，西向东流不等，然终归一派，仍西向而流也。总而言之，其各流甚急且大，常令舟行退回，十分险要，故驾舟之人，凡过其处，务宜预为防备，以免失落迟误之患。

曰：地震者，乃地内硫磺各石类之然烧也。避之不得亦莫知其动至何处。其为硫磺等各石类然烧而成者，已有实据可证。西域有勒美里者，将铁末硫磺与水三和匀，通共重三十八斤，穴埋地中，越数日，竟致地面震动坟起，且有火焰发出。又乾隆二十年，布路亚国都，地动倾覆之害，自古罕见。地缝中所出黑尘劫灰及有水翻滚，皆具硫磺气味。总之地中有温泉，及硫磺各矿，其处则必频频遭地震。因硫磺各石其性不一，有相合者，有相反者。譬灰与水二性相反，若两相值势必骤发。其在地中亦然，一遇聚合，即然烧爆发。若地窍宽阔，足以舒其所发之性，则无地动。倘地窍窄狭，不能舒其所发之性，其发必将周围摇动，然尽方息也。又地中有一窍然烧，而临近各窍，亦必被其殃。譬如火药，若有少许引线，则各处皆然。故凡地动一处，相离则数十里转瞬皆动也。又凡地中各窍既然，其上面周围之处，均为摇动。譬如以重物击壁之中心，其壁上下两旁周围，必皆震动。其体愈刚坚者，其震动愈远。再地动有因本处而震动他处者，有因他处而震动本处者。凡本处之动，上下摇动，其动也大。他处之动，两旁摇晃，其动也小。再凡地动之际，皆有声响，乃地中然烧，其气发散之音也。再凡地大震，必有各预兆于其先，或天边有黑云出现，缓缓上腾，弥漫空中，或地上酷热，上腾之气，被其散漫，而大风暴发。或天气极热，微风不动，万物烦燥，故凡风暴地震，必先有异兆，即天地寂静，万籁无声，而树木无风自动，此皆灾变之将至也。

曰：火山者，乃地中之火，由此发窍而出之路也。其穴口所吐者，并有浮石温石等随火发出，上为黑烟，灰烬渣滓腾空如浓云，俯不见日。其火山高低不等，其低者则火由穴口发出，高者则山旁绽裂，火由缝出。其山中喷出之石灰浆水等则低者常多，高者常罕。总计天下之火山，现有火出者，大小共六十八处。其在洲上者二十有八，其在岛中者四十。今已无火，其形仍旧者，大小共九十二处，其在洲上者四十有五，其在岛中者四十有七，后释其地，再为注明。

卷九十九

古之人以地体为平坦，东西之相距，较南北甚宽，故立纬线以量二极相离之远近，立经线以量东西相距之长短。其纬度则从二极算起，其经度则从铁岛算起。盖以为画铁岛地方之午线，即至西最中之午线也。迨后人考查详明，深悉地球之形体，而欲准定地面各处之所在，仍用纬经二线之法。其法先以地球分为一百八十段，每段横画一圈宽一度，均与赤道周围相平，在赤道之北者九十圈，南者亦九十圈，其圈则为平行线，其度则名曰纬度。每一度六十分，每一分六十秒，又以赤道于地球上分为三百六十格。每格直画一圈，宽一度均达南北二极，与赤道相搭，为直角。其三百六十度，分为两半，不拘从何圈算起，往东一百八十度，往西亦一百八十度，至背面相对之处而止。其圈则为午线，其度则名曰经度也。每度数亦与纬度相同，则地球之上，各处皆有平行线，与午线相搭。而各处之地位，居于何度，相离若干，无不了然，是以欲知何所只观其居于地球南北第几平行线，与午线相搭之处，即可明矣。今凡论地纬者，乃一处之相距于赤道也。凡论地经者，乃一处之午线相距于第一午线也。其纬度在于午线上计算，从赤道而起，往北九十度，往南九十度，其在北者则曰北纬度，在南者则曰南纬度，地愈近于极，则其纬数愈多，愈近于赤道，则其纬数愈少，各处之纬数，至多不能越九十度。盖赤道之离二极也，亦各九十度，午线由赤道至于极，亦各九十度也，其经度在赤道上计算，从第一午线而起，往东一百八十度，往西一百八十度。其在东者则曰东经度，其在西者则曰西经度。其定立午线之首，前款已为详明。其纬度因地球二极处形扁，相离稍有差别，然甚觉微细，为数无几，故诸察地理者一例计算，未曾区别也。但其经度之数，有长短之别与纬度不同。盖因地球体圆，自赤道南北两分而前，渐近于二极，其平行线渐觉圈小，而其午线之相离亦渐窄，尽于枢纽之处。故离赤道六十度之处，其经度较之在赤道上者，不过一半。所以午线相离之至远者，在赤道上，而经度之至长者，亦在赤道上也。故各处之经度，凡论远近，总应归赤道上计算也，其经线可以按度数而算，亦可以按时刻而算。按度数而算，则每一度分为六十分，每一分分为六十秒。按时刻而算，则每十五度作为四刻，每一度作为四分，又每十五度有迟早一点钟之差别。在东者迟四刻，在西者早四刻，盖日之类行由东而西，先过东边之地方，后过西边之地方，所以东边得日在先，西边得日在后。及至在西者方届其时，而在东者已越其时矣。故东迟西早，每十五度有一点钟之差，譬如京师时届午正，以东十五度之处则已交未初，以西十五度之处，则尚系午初。再东再西，总以十五度为限。按此类推，即可知其时刻也，今绘纬经二度图于后以备览。

经纬二度图

经纬二度图

〈丙丁一线为赤道，譬如戊字为一处地方，其纬度即从己至戊之线，其经度如以甲癸乙一圈为第一午线，从癸至己即其经度也。若庚字为一处地方，其纬度即从辛至

庚之线其经度，即从癸至辛也。如辛字为一处地方，则无纬度，因其在赤道上。其经度亦从癸至辛也，如癸字为一处地方，则纬经二度皆无。盖因其在赤道上故无纬度，在第一午线上，故无经度也。〉

以上所论，以类推可见。其一、凡居于赤道上之处，不见纬度。盖纬度从赤道起算，直至二极。必须离开赤道，或往南往北一秒半秒方有可计算。凡居于第一午线上之处，不见经度。盖经度从第一午线起算，直至东西。必须离开第一午线，或往东往西一秒半秒，方有可计算，所以若居于第一午线与赤道交会之处者，纬经二度皆不见，其理亦然。其二、凡同居一午线之上者，或南或北于赤道相距同远，则彼此纬数相同，时刻不异。但因其所居南北不同方，故彼此有昼夜长短之别。譬如在南者昼五十二刻，夜四十四刻，是昼长夜短也。在北者则昼四十四刻，夜五十二刻，是昼短夜长也。若北方昼长夜短，则南方必昼短夜长，此理之所必然也。推之四季，亦彼此相反。在南者时届春令，在北者则为秋令。在南者时届夏令，在北者则为冬令。若北方春令，则南方秋令，北方夏令，则南方冬令。盖其所居同线而异方，故纬数相同，时刻相等，而昼夜则相异，四季则相反也。其三、凡居两面相对一午线之上者，或在南或在北，彼此于赤道相距同远，则纬度相同方位各异。但因其所居东西相对，故彼此有子午正对之差。譬如在东者时交午正，在西者则届子正。若东方子正，则西方必午正。然其昼夜之长短相等，四季之时令相同，盖因彼此所距于赤道同远，故纬度之数目不异也。

再各平行线，因离于赤道渐远，其圈渐小，每度数目，虽仍为六十分，每分六十秒，每秒六十微，然较之赤道上者，则逾远愈为短少，至二极之处而尽。故将各平行线较赤道只有若干之数目算明，画图开列于后以备查阅。

平行线分秒微 第一 五十九 五十九 二十四 第二 五十九 五十七 三十六 第三 五十九 五十五 一十二 第四 五十九 五十一 三十六 第五 五十九 四十六 一十二 第六 五十九 四十一 一十二 第七 五十九 三十三 三十六 第八 五十九 二十五 一十二 第九 五十九 一十五 三十六 第十 五十九 四 四十八 第十一 五十八 五十三 二十四 第十二 五十八 四十四 四十八 第十三 五十八 二十七 三十六 第十四 五十八 一十三 一十二 第十五 五十七 五十七 ○ 第十六 五十七 四十一 一十二 第十七 五十七 二十二 四十八 第十八 五十七 三 三十六 第十九 五十六 四十三 四十八 第二十 五十六 二十二 四十八 第二十一 五十六 ○ 三十六 二十二 五十五 三十七 四十八 第二十三 五十五 一十三 四十八 二十四 五十四 四十八 六 二十五 五十四 二十二 四十八 二十六 五十三 五十五 四十八 二十七 五十三 二十七 三十六 二十八 五十二 五十八 一十二 二十九 五十二 二十八 四十八 三十五 一十一 五十七 三十六 三十一 五十一 二十五 四十八 三十二 五十五 五十二 四十八 三十三 五十一 十九 一十二 三十四 四十九 四十四 二十四 三十五 四十九 九 ○ 三十六 四十八 三十二 二十四 三十七 四十七 五十五 二 三十八 四十七 一十六 四十八 三十九 四十六 三十七 一十二 四十四 四十五 五十七 三十六 四十一 四十五 一十六 四十八 四十二 四十四 三十一 一十二 四十三 四十三 五十二 四十八 四十四 四十三 九

一十二 四十五 四十二 二十五 四十八 四十六 四十一 四十四 四十八 四十七 四十五 五十五
一十二 四十八 四十九 ○ 四十九 三十九 二十一 三十六 五十三 三十八 三十四 一十二
五十一 三十七 四十三 四十八 五十二 三十六 五十六 二十四 五十三 三十六 六 三十六
五十四 三十五 一十五 三十六 五十五 三十四 二十四 三十六 五十六 三十三 三十三 ○
五十七 三十二 四十一 一十二 五十八 三十一 四十七 二十四 五十九 三十五 五十 ○ 六十
三十 ○ ○ 六十一 二十九 五 二十四 六十二 二十八 一十一 一十二 六十三 二十七
一十四 二十四 六十四 二十六 一十八 ○ 六十五 二十五 二十一 三十六 六十六 二十四
二十四 三十六 六十七 二十三 二十七 ○ 六十八 二十二 二十八 四十八 六十九 二十一
三十三 三十六 七十二 三十一 一十二 七十一 一十九 三十二 二十四 七十二 一十八
三十三 ○ 七十三 一十七 三十二 二十四 七十四 一十六 三十一 四十八 七十五 一十五
三十一 一十二 七十六 一十四 三十三 三十六 七十七 一十三 三十 ○ 七十八 一十二
二十八 四十八 七十九 一十一 二十七 ○ 八十一 二十五 一十二 八十一 九 二十二
四十八 八十二 八 二十一 ○ 八十三 七 一十九 一十二 八十四 六 一十六 四十八
八十五 五 一十三 四十八 八十六 四 一十四 四十八 八十七 三 八 二十四 八十八 二 五
二十四 八十九 一 三 ○ 九十 尽 ○ ○

古之察地理者，曾以地球分为五道，乃热道一段，寒道温道各二段，外又以六十道分之，而宽狭不一。南北二方各三十段，名之曰时刻道，其故有二焉：一则指明各地彼此相去之远近，二则辨明各地昼夜时刻之长短。但欲指明地球各处之所在，或南、或北、或东、或西、纬经二度，既已绘定详明，而各处所在，必能洞悉胸中，斯能不迷于所视。顾后世之察地理者，未尝多用其法，以指示各处所在。故仍论之，夫时刻道者，乃地球一段地方，间于二横圈之中者也。凡居每道上之人，其时较于相挨道上者之时有二刻之差。别又有一月之差别。盖屡试屡验，凡居于赤道上之处，昼夜均平，日则六时，夜则六时。若所居相距赤道者，凡日之类行，越于春秋分处，愈近夏至之处，昼则渐长夜则渐短，日至其处而止。愈近冬至之处，昼则渐短，夜则渐长，日亦至其处而止。且其昼夜之度，时刻之数，愈离于赤道，或南、或北，则逐道愈渐加增，甚至南北二圆线之处，其昼之长者，竟增至十二时之多。再由二圆线至二枢纽之处，竟增至六个月之久，有昼无夜，皆为白日。是以按时刻之差别，若干即分地球为若干道。自赤道起至日长六时二刻之处，横画一圈为第一道，自一道起，至日长六时四刻之处，又横画一圈为第二道，因此每于多二刻差别之处，即画一圈至二圆线之处，日则长至九十六刻。圈则共画二十四道，又自二圆线起，至二枢纽之处，日长则逐月加增，所以由圆线至日长一个月之处，横画一圈。由日长一个月之处，至日长两个月之处，又横画一圈，因此每于多一个月差别之处，即画一圈，至二枢纽之处，日则长至六个月，圈则共画六道。从此可见，由赤道至圆线共有二十四道，每道递增二刻，由圆线至枢纽共有六道，每道递增一个月，南北相同，每方三十道，统计六十道再二刻之道，离赤道愈远，其道愈窄，一个月之道，离圆线愈远，其道愈宽。今将各道离赤道若干，宽窄度数，日长时刻，开列于后，以备便览。但其所论之月，因中华与西域之月数不同，且在北方者多一日，在南方者少一日，故改为按日而计也。

赤道上周岁，日长六时。第一道 离赤道八度三十四分 道宽八度三十四分 日至长六时二刻。第二道 离赤道十六度四十三分 道宽八度九分 日至长六时四刻。第三道 离赤道二十四度十分 道宽七度二十七分 日至长六时六刻。第四道 离赤道三十度四十六分 道宽六度三十六分 日至长七时。第五道 离赤道三十六度二十八分 道宽五度四十二分 日至长七时二刻。第六道 离赤道四十一度二十一分 道宽四度五十三分 日至长七时四刻。第七道 离赤道四十五度二十九分 道宽四度八分 日至长七时六刻。第八道 离赤道四十八度五十九分 道宽三度三十分 日至长八时。第九道 离赤道五十一度五十七分 道宽二度五十八分 日至长八时二刻。第十道 离赤道五十四度二十八分 道宽二度三十一分 日至长八时四刻。第十一道 离赤道五十六度三十六分 道宽二度八分 日至长八时六刻。第十二道 离赤道五十八度二十五分 道宽一度四十九分 日至长九时。第十三道 离赤道五十九度五十七分 道宽一度三十二分 日至长九时二刻。第十四道 离赤道六十一度十六分 道宽一度十九分 日至长九时四刻。第十五道 离赤道六十二度二十四分 道宽一度八分 日至长九时六刻。第十六道 离赤道六十三度二十分 道宽五十六分 日至长十时。第十七道 离赤道六十四度八分 道宽四十八分 日至长十时二刻。第十八道 离赤道六十四度四十八分 道宽四十分 日至长十时四刻。第十九道 离赤道六十五度二十分 道宽三十二分 日至长十时六刻。第二十道 离赤道六十五度四十六分 道宽二十六分 日至长十一时。第二十一道 离赤道六十六度六分 道宽二十分 日至长十一时二刻。第二十二道 离赤道六十六度二十分 道宽十四分 日至长十一时四刻。第二十三道 离赤道六十六度二十八分 道宽八分 日至长十一时六刻。第二十四道 离赤道六十六度三十二分 道宽四分 日至长十二时。第二十五道 离赤道六十七度二十三分 道宽五十一分 日至长〈（北方三十一日，南方三十日）〉。第二十六道 离赤道六十九度五十分 道宽二度二十七分 日至长〈（北方六十二日，南方六十日）〉。第二十七道 离赤道七十三度三十九分 道宽三度四十九分 日至长〈（北方九十三日，南方八十九日）〉。第二十八道 离赤道七十八度三十一分 道宽四度五十二分 日至长〈（北方一百二十四日，南方一百二十日）〉。第二十九道 离赤道八十四度五分 道宽五度三十四分 日至长〈（北方一百五十六日，南方一百五十日）〉。第三十道 离赤道九十度 道宽五度五十五分 日至长〈（北方一百八十八日，南方一百七十八日）〉。

前地球循环款内，已论地球本体之转有二：一则日周，一则年周。日周者，本体之周而复始也，昼夜运动，西向东旋，随旋随升。年周者，旋于日外之周而复始也。因其随旋随升，尽历十二宫位，是以有四季之分，寒暑之别也。今将四季寒暑之故，特为详明。夫地球循环日外之道，乃黄道中线也。其南北二极，与天之南北二极，常为直对相应。虽运行不息，其二极所指，永不更移，盖因其轴若于黄道直竖，则地球周围循环，日光常居赤道，其二极总无近远之别，而日之光照终年南北相同

。既同，何能有四季寒暑之别。其轴若于黄道平横则地球周围循环，日光一时居于赤道，一时在北极顶上，一时在南极顶上，所有地上各午线之处，无不络绎而遍照，虽其处不无四季寒暑，但日体出乎二带之外，何能有夏冬二至也。只因其轴于黄道略为偏斜，有二十三度二十八分之锐角，故地球周围循环，有时北极近日，而南极则远于日，有时南极近日，而北极则远于日，有时赤道与日相对。凡至二极近日，故有夏冬二季，赤道与日相对，故有春秋二季也。盖地球在春分之黄道，与赤道交会处，其二极同距日远，而所受日光照明，二方相同，故北方温和，南方凉爽，在北者则为春，在南者则为秋。若离春分之处，向北而往，则北方之天气，渐渐变为暑热，是由春而夏，南方之天气，渐渐变为寒冷，是由秋而冬也。地球在夏至之黄道，与北带相连处，其北极近于日，南极远于日，而所受日光照明二方相异。故北热而南冷，在北者则为夏，在南者则为冬。若离夏至之处，向南而旋，则北方之天气，渐渐变为凉爽，是由夏而秋，南方之天气渐渐变为温和，是由冬而春也。地球在秋分之黄道与赤道交会处，其二极亦同，距日远，而所受日光照明二方相同。故北方凉爽，南方温和，在北者则为秋，在南者则为春。若离秋分之处，向南而往，则北方之天气，渐渐变为寒冷，是由秋而冬，南方之天气，渐渐变为暑热，是由春而夏也。地球在冬至之黄道与南带相连处，其南极近于日，北极远于日，而所受日光照明二方相异，故南热而北冷，在南者则为夏，在北者则为冬。若离冬至之处，向北而旋，则北方之天气，渐渐变为温和，是由冬而春，南方之天气，渐渐变为凉爽，是由夏而秋也。由此类推，而各道日之长短差别，益可以明悉矣。今画此地球，循环日外，并四季寒暑二图于后，以便备览。

地球循环日外图

地球循环日外图

甲乙丙丁一圈，乃地行本道也。其式如卵形，四方距日有远近之别，前已解释。兹绘图置日于其中者，以明地行各宫之节气，并四季之时令也。夫地之本道，分为十二段，每段应一宫，自乙字处起，是为第一段。乃戌宫从右递数第二段，则为酉宫。第三段，则为申宫。第四段，则为未宫。第五段，则为午宫。第六段，则为巳宫。第七段，则为辰宫。第八段，则为卯宫。第九段，则为寅宫。第十段，则为丑宫。第十一段，则为子宫。第十二段，则为亥宫也。地行每约一月之期则过一宫，春分之时，地入辰宫，地上之人观日如进戌宫。谷雨之时地入卯宫，地上之人观日如进酉宫。小满之时地入寅宫，地上之人观日如进申宫。夏至之时地入丑宫，地上之人观日如进未宫。大暑之时地入子宫，地上之人观日如进午宫。处暑之时地入亥宫，地上之人观日如进巳宫。秋分之时地入戌宫，地上之人观日如进辰宫。霜降之时地入酉宫，地上之人观日如进卯宫。小雪之时地入申宫，地上之人观日如进寅宫。冬至之时地入未宫，地上之人观日如进丑宫。大寒之时地入午宫，地上之人观日如进子宫。雨水之时地入巳宫，地上之人观日如进亥宫也。

地球循环本道，已为解释详明，今将地入每宫四季寒暑之别，绘图于后备览。

四季寒暑图黄道上四球乃地球也。各球上北字乃为北极，南字乃为南极。中通一线为地之轴，与黄道相搭为二十三度二十八分之锐角。周围循环，二极定向，永不更移。各地球上白色者，乃向日之半边，墨色者，乃背日之半边。本体之转虽一日周而复始，然向于日者，总是半边。凡地在辰宫，人则见日如在戌宫，乃北方春分之时，南方秋分之时也。地之赤道与日正对，南北二极相距同远，受日光照临，二方相同，故北方温和，南方凉爽。各处从赤道两分或往北、或往南太阳卯正而出，酉正而没，昼夜尽为均平。日终六时，夜间六时也。自辰宫行至丑宫，人则见日如在未宫，乃北方夏至之时，南方冬至之时也。北极近于日南极远于日，北方受日光直照则热，南方得日光斜射故冷，北方各处从赤道往北见日者多，则昼长夜短，按各处时刻道，自六时增至六月。南方各处从赤道往南见日者少，则昼短夜长，亦按各处时刻，道自六时增至六月也。自丑宫行至戌宫，人则见日如在辰宫，乃北方秋分之时，南方春分之时也。地之赤道与日再为正对，南北二极相距同远，受日光照临二方，亦相同，故北方凉爽，南方温和，各处从赤道两分，或往北、或往南太阳亦卯正而出，酉正而没，昼夜尽为均平，日终六时，夜间六时也。自戌宫行至未宫，人则见日如在丑宫，乃北方冬至之时，南方夏至之时也。南极近于日，北极远于日，南方受日光直照则热，北方得日光斜射故冷。南方各处从赤道往南见日者多，则昼长夜短，按各处时刻道，自六时增至六月，北方各处从赤道往北见日者少，则昼短夜长，亦按各处时刻道，自六时增至六月也。自未宫行至辰宫，人则见日如在戌宫，乃北方又春分之时，南方又秋分之时。此十二宫一周之始终，四季循环之次序也。

卷一百

天自恒星外，其周太阳之各行星则有可计焉。绘图于后，以俟观天文者，考而知也。居中为日，周日第一道曰水星，其广大较地八分之一，凡八十八日限，周日一转。第二道曰金星，其广大约与地均，凡二百二十五日限，周日一转。第三道曰地球，即人所居者是。凡三百六十五日二时七刻零，周日一转。其南北极枢纽不离其处而东西，则每一昼夜一易转，有一太阴旋绕即月也。有月道图，朔望晦明图附。第四道曰火星，较地略小，凡六百八十七日限，周日一转。第五道曰花女星，凡一千一百九十三日限，周日一转。第六道曰火女，即陆星，凡一千三百二十五日限，周日一转。第七道曰虹女星，凡一千三百四十二日限，周日一转。第八道曰海女星，凡一千三百四十六日限，周日一转。第九道曰酒女星，凡一千三百八十日限，周日一转。第十道曰义女星，凡一千五百十一日限，周日一转。第十一道曰天后，即巧星，凡一千五百九十四日限，周日一转。第十二道曰谷女，即威星，凡一千六百八十一日限，周日一转。第十三道曰武女，即焰星，凡一千六百八十七日限，周日一转。自五道至此凡九星，较水星更小。古人未尝寻见，今用大千里镜，窥其形多棱角，虽各异其道而有相交之际。或曩为一星，而分裂之未可知也。第十四道曰木星，广大百倍于地，凡四千三百三日限，周日一转。有四大阴旋绕。第十五道曰土星，即沿星，其象与众星殊，外有长圆圈如带，较金星略小，凡一万零七百五十九日限，周日一转，有八太阴旋绕。第十六道曰天星，又较小于土星，凡三万零六百八十七日限，周日一转，有六太阴旋绕。第十七道曰海王星，亦是新寻见者，较天星略小，而大于地数十倍，凡六万零一百二十七日，周日一转。曾于寻得之时，已一见太阴旋转，然细思此星离日已远，又大于地球，必非一太阴所能偏照，俟再谛观以告同人。若彗星圈道长圆竟天其辽远未易厘定，有时见其光下垂者，人谓之尾云。夫诸星行皆随日转，或迟或速，而日亦二十五昼夜零为之一转，果谁系之而谁运之者。呜呼，仰观之下，使吾愈不能忘于真神创造之德矣。

试以一直径二尺大之圆物作日观，悬垂于大片空地上，水星之小，比如芥子。离星作八丈二尺，金星比如大豆，离日作十四丈二尺，地球之大，同于金星离日作二十二丈五尺，火星又小于地球，比如粒黍，离日作三十二丈七尺，火木之间九星，譬更小而如沙，离日作五六十丈不齐。木星最大，拟之以橘，离日作一百三十二丈，土星较小如中橘，离日作二百十一丈零，天星较小，比如梅子，离日作三百九十六丈，海王星略大，比如小桃然，离日作六百六十丈，然执此以喻，犹未必肖，况以片楮而绘星十七道，亦只以仿佛其痕迹，而岂能量天之高，星辰之远哉。

日晷图

凡欲定时，先将指南针定明南北向，平铺日晷图，又将三角尖版一块，大小如式，以尖角向南，底角向北，竖在午线上，不使有偏倚斜侧，放置日中。如正午时，则版全无影，馀视版影所射，便识何时矣。苟有好之者，务必选空阔片地，使日光自

朝至暮常见者，置一石磴上，用细石照式，刻阔狭时辰线，毋失分毫，定南北向置磴上，又用照式三角尖铜版一，粘置午线中，可时时阅之，岂不便于作事乎。

按：日晷与自鸣钟，略有迟速，详见时刻论与安息日期注。故凡定时者，亦须用加减活法，致日晷所指之时，与钟所指之时，两相吻合。